


Irineane tasorentsi oquenquetstacotaqueri

Avincatsarite Jesoquirishito



New Testament in Asháninka (PE:cni:Asháninka)

Irineane tasorentsi oquenquetsatacotaqueri Avincatsarite Jesoquirishito
New Testament in Asháninka (PE:cni:Asháninka)

copyright © 2008 Wycliffe Bible Translators, Inc.

Language: Asháninka

Translation by: Wycliffe Bible Translators, Inc.

Asháninka [cni], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Asháninka

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-21

PDF generated using Haiola and XeLaTeX on 4 Mar 2019 from source files dated 14 Nov 2018

166be83d-e31e-5665-b8e5-244a7e211a4c

Contents

ISANQUENARE MATEO	1
Mr.	57
Ir.	92
ISANQUENARE JOA	151
Yan.	192
Rom.	241
1 Cor.	262
2 Cor.	282
Gal.	295
Ef.	304
Flp.	312
Col.	318
1 Ts.	324
2 Ts.	329
1 Ti.	332
2 Ti.	339
Tit.	343
Flm.	346
Heb.	348
Stg.	366
1 P.	372
2 P.	378
1 Jn.	382
2 Jn.	387
3 Jn.	388
Jud.	389
Ap.	391

ISANQUENARE MATEO 1:1 1 ISANQUENARE MATEO 1:24

YORA MATEO ISANQUENATACOTAQUERI JESOQUIRISHITO, JAOCÀ ICANTA IRIORI YOAVISACOTANTI

Isanquenataquero ivajiropee ishanincapeeni Jesoshi.

(Ir. 3.23-38)

¹ Meeca nosanquenajeitempiro ivajiropee icharinepeeni Jesoquirishito. Tempa irio ishanincani Iravirini aisati Avaramani.

² Ari itimini Avarama. Iri itomi iriori: Isaca. Iri itomi iriori Isaca: Jacovo. Iri itomipee iriori Jacovo: Jora aisati irirentipee. ³ Iri itomipee Jora: Jareshi aisati Sara. Iro irinironi Jareshi opajitani Tamara. Iri itomi Jareshi: Eshiromo. Iri itomi Eshiromo: Arama. ⁴ Iri itomi Arama: Aminarava. Iri itomi Aminarava: Naso. Iri itomi Naso: Saramo. ⁵ Iri itomi Saramo: Voso. Iro irinironi Voso opajitani Arava. Iri itomi Voso: Overe. Iro irinironi Overe opajitani Oroto. Iri itomi Overe: Jese. ⁶ (6,17a) Iri itomi Jese: Iraviri, yora pincatsaritsatsiri. Ari icarajeitaque iriori 14 shirampari.

Impoiji itimi itomi Iraviri: Saromo. Iro iriniro Saromo ora yaaveitaniri Oriashi. ⁷ Iri itomi Saromo: Orovoama. Iri itomi Orovoama: Aviashi. Iri itomi Aviashi: Asa. ⁸ Iri itomi Asa: Josavata. Iri itomi Josavata: Jorama. Iri itomi Jorama: Oshiashi. ⁹ Iri itomi Oshiashi: Joatama. Iri itomi Joatama: Acasa. Iri itomi Acasa: Eshequiashi. ¹⁰ Iri itomi Eshequiashi: Manasheshi. Iri itomi Manasheshi: Amo. Iri itomi Amo: Joshiashi. ¹¹ (11,17b) Iri itomi Joshiashi: Jeconiashi, aisati irirentipee. Ari icarajeiti iriori aisati 14 shirampari. Itimantari Jeconiashi, yora soraropee poneachari Vavironiaqui yaajeitanaqueri maaroni joropee anta inampiqui.

¹² Impoiji itimi itomi Jeconiashi: Saratiyeri. Iri itomi Saratiyeri: Sorovaveri. ¹³ Iri itomi Sorovaveri: Aviori. Iri itomi Aviori: Eriaquimi. Iri itomi Eriaquimi: Asoro. ¹⁴ Iri itomi Asoro: Saroco. Iri itomi Saroco: Aquimi. Iri itomi Aquimi: Erioro. ¹⁵ Iri itomi Erioro: Erisara. Iri itomi Erisara: Mata. Iri itomi Mata: Jacovo. ¹⁶⁻¹⁷ (16,17c) Iri itomi Jacovo: Jose. Iri Jose ojimetsori Maria, ora iriniro Jesoshi. Ipajitiri aisati Quirishito. Ari icarajeiti maaroni iriori shirampari 14.

Itimapaaque Jesoshi.

(Ir. 2.1-7)

¹⁸ Meeca noncamantempi jaoca ocantari itimantacari peerani Jesoshi. Ainiro yora Jose ijinatsori, opajita Maria. Isareacaro irayero, iro cantaincha tequera irineero. Iro cantaincha otsomontetaque: iro otsomontetantacari otasoncaquero Ishire Tasorents.

¹⁹ Iro iotantacari Jose otsomontetaque, iquenqueshireaca iriori: “Te oncameetsateji tsinane. Timatsiata oneayetiri. Eiro nairotsi”. Iro cantaincha icameetsataque, icoaque incavintsayero Maria, te irininteji iroashiventayero; iquenqueshiretanaca: “Eiro nocamantajeitirts oshanincapee, ishirontimentarocari. Apaniro noncantero irointi: ‘Eiro meeca naimpitsi’ ”. ²⁰ Irootaque iquenqueshiretanaqueri, irosati imapocantacari inampire Tasorents, ineamainetaqueri. Icantapaaqueri:

—Jose, tempa aviro ishanincani Iravirini, eiro piquenqueshireatsi. Tecatsi onee shirampari pijinatsori. Iro otsomontetantacari otasoncaquero Ishire Tasorents. ²¹ Coajica ontimeri otomi, pimpajiteri iriori Jesoshi. Iro pimpajitanteeariri Jesoshi iroavisacojeiteri antayetirori caari cameetsatatsi.

²² Iro intimanteari iriori omoncaratanteari isanquenatiniri peerani camantantatsiniri Isayashini. Irio Avincatsarite sanquenatacaaqueriri. Jero oca icantiniri: ²³ “Coajica otsomontetashitanaquea caari neiri shirampari, ontimeri otomi. Impajiyeteri Emanoere”. Iro Emanoere ocanti aneanequi arori: “Itsipajeitaquee Tasorents”.

²⁴ Ari itinaanaca Jose, iquemisantaqueri icantaqueriri. Ijatashitaqueri Maria, icantaqueri:

—Ari coajica naasanotempi.

²⁵ Iro cantaincha tequera irineeroji: iro caariquerá ineantaro, tequera intimeji otomi. Itimantacari, ipajitaqueri Jesoshi. Impoijiquea yaasanotaquero.

2

Ipoqui ioyevetariri impoquiro irineeri Jesoshi.

¹ Ari itimapaaque Jesoshi anta Verequi. Otimi Vere anta Joreaqui. Itimantacari Jesoshi, irio pincatsariventantatsiri Eroreshi. Ari yareetapaaca Jerosarequi poneajeitachari pashiniqui quipatsi, anta arejiqui. Iquenapaaque anta iquenapainta catsirincaiteri. Ishiavetari saserotepee, ioyevetari impoquiropee, paitaricapee. ² Isampitapaaqueri jerosaresati:

—¿Jaoca yora ivincatsarite joriopee, yora iroaquera timaintsiri? Noneaqueri anta nonampiqui impoquiro iotacaanari itimaque. Meeca nopoqui nompincatsateri.

³ Iquemantacariri yora pincatsari Eroreshi, iquenqueshireanaca, aisati iquempejeitaca maaroni jerosaresati. ⁴ Impoiji yora Eroreshi icajemacantajeitaqueri maaroni jivat-acaajeitaqueri saserotepee aisati maaroni yora oametantajeitirori sanquenarentsi. Isampijeitaqueri:

—¿Paita ocantiri Sanquenarentsi? ¿Jaoca intimapeeri yora Quirishitotatsiri?

⁵ Yacajeitanaque:

—Ocanti Sanquenarentsi intimapaaque Verequi, aca Joreaqui. Irootaque isanquenatacotitacariniri peerani yora quenquetsatacantantatsiniri pajitachaniri Miqueashi: ⁶ “Otimi Vere anta Joreaqui. Eiro itseencajeitirotsi ora nampitsi. Tempa imponeaquea anta Pincatsarisanori. Impincatsariventajeiteri maaroni joriopee”.

⁷ Impoiji imanaquero Eroreshi icajemacantaqueri yora coatsiri irineeri Jesoshi. Isampijeitaqueri:

—¿Jaoca ocaratiri pineantacariri impoquiro piotantacari itimapaaque pincatsari? Pincamantasanotena niotasnotantearori itimantacari.

⁸ Ari icamantaqueri. Impoiji icantaqueri aisati:

—Cameetsa pijajeite meeca Verequi, pamenaiteri jaocarica isavicasanotaqueri yora jananequi. Ariorica pineapaaqueri, pimpocaje aisati aca, pincamantapeena. Nocoaque noneeri narori, nompincatsatanteariri.

⁹ Ari ijajeitanaque. Nianqui ineajiri aisati impoquiro ineajiri chapinqui anta iponeacanta. Ijivatanaqueri impoquiro anta itimaquenta jananequi, impoiji yaratincapaaque anta, ioejantapaacarori ivanco. ¹⁰ Iquimoshireimentasanotacari impoquiro iotacaajeitaqueri. ¹¹ Impoiji ijatanaque pancotsiquinta, iqueapaaque. Ineapaaqueri Jesoshi, aisati iriniro. Itiyeroashitapaacari Jesoshi, ipincatsatapaaqueri. Impoiji itatareapaaqiro itsivoote, yaajiro ashirotatsiri pajitachari oro. Opinatasanotaca. Aisati yaajiro casancayetatsiri, ipajeitapaaqueri. ¹² Impoiji imaajeitanaque irioripee. Ineamainetaqueri Tasorentsi, icantaqueri:

—Eiro pipianajatsi anta Eroshiqui; ariorica pimpianaje piipatsitequi, pinquenanaje pashiniqui avotsi.

Ishiajeitanaca Ejipitoqui Jose, jero Maria; yaanaqueri Jesoshi.

¹³ Ari ipiajeitanaja yora iovetariri impoquiropee. Impoiji aisati yora Jose ineamaine-taqueri inampire Avincatsarite. Icantapaaqueri:

—Meeca pijajeite: avirori, yora jananequi, aisati iriniro. Pishiajeitanaque Ejipitoqui. Pisavicajeitapaaque anta irosati noncantantempi. Irotaintsi incoayeteri Eroreshi yora jananequi. Icoaque iroyeri.

¹⁴ Irosati ijajeitantanaca, nianquiiteni tsiteniri. Yaanaqueri jananequi anta Ejipitoqui, itsipatanacaro iriniro. ¹⁵ Ari osamanitanaque isavicajeitapaaque anta. Impoiji icamaque Eroreshi. Iquemacotaqueri icamaque, irosati ipajeitanta aya iipatsitequi. Irootaque peerani isanquenatacqeniri oca yora quenquetsatacantatsiniri pajitachari Oseashi. Iriotaque Avincatsarite sanquenatacainiri. Isanquenatini: “Icanti Tasorentsi: ‘Intimavetea notomi anta Ejipitoqui, noncajemajeri impiaje aisati’ ”.

Yora Eroreshi yoacantaqueri jananequipee.

¹⁶ Impoiji ionirotanaque Eroeshi yamatavitaqueri yora iovetariri impoquiropee: te impiajeji aisati. Ari quisasanotanaca, itiancaqueri soraropee, icantiri:

—Pijajeite anta Verequi, poajeiteri maaroni jananequipee, pintsoncajeiteri maaroni shirampari: iroquera timayetatsiri, maaroni; aisati poajeiteri moncaratainchari apite irosarintsite, maaroni.

Ja, icantaqueri chapinqui yoranqui tequera irimoncarateroji Jesoshi apite irosarintsite. ¹⁷ Aisati isanquenatacotaqueroni oca yora quenquetsatacantatsiniri pajitachaniri Jeremiashi: ¹⁸ “Oncajamacotasanofteri aramasato otomipee, oshequi iraacojeiteri. Ompajitea Araquere iraacoterineri otomipee. Iro oashiretanteari iroiteetero otomipee, maaroni”.

Iopianaja Jose Nasaretequi, yaanajiri Jesoshi aisati iriniro.

¹⁹ Ari impoiji icamaque Eroeshi, ainiroquera isaviqui Jose iriori anta Ejipitoqui. Impoiji ineamainetajiri aisati inampire Avincatsarite, icantaqueri:

²⁰ —Tsame pimpianaje anta piipatsitequi, paanajeri jananequica aisati iriniro. Camaque meeca coavetachari iroyerime.

Ari ipajijeitirori iipatsite Jose iipatsiteni Ishiraerini. ²¹ Ari ijatanaji, yaajeitanajiri anta iipatsitequi. ²² Iro cantaincha yareetantajari Jose, icamanteetiri:

—Irio pincatsariventajeitirori meeca joreasati yora Arequerao. Ipoyeetajari iririni: yora Eroreshini.

Ari aisati itsaroacaapaacari Jose yora pincatsaritajantsiri, aisati ineamainetaqueri Tasorentsi, icantiri:

—Paamayeariya yora Arequerao.

Irosati yovaantanaja Jose anta Carireaqu. ²³ Yareetapaaca, isavicapaaque nampitsiqui pajitachari Nasarete. Irootaque omoncaratantacari isanquenatacotiteetacariniri Jesoshi: “Imponeaquea Quirishito Nasaretequi”.

3

Yora Joa vaotisatantatsiri iquenquetsatacantapiniti anta caaraiteriqui.

(Mr. 1.1-8; Ir. 3.1-18; Joa 1.19-28)

¹ Ari impoiji ijataque Joa, yora vaotisatantatsiri ora caaraiteriqui: ora carirequiniri. Iquenquetsatacapinitiri ishaninca, ² icantapinitiri:

—Pinquenqueshirejeitanaquea, eiro piquempejeitajatsi peerani: paventajeiteari meeca Tasorentsi, irotaintsi impincatsariventajeithee.

³ Ari peerani iquenquetsatacotaquerini Joa yora quenquetsatacantatsiniri pajiveitachaniri Isayashi. Jero oca isanquenatacotaqueriniri Joa: “Coajica inquenquetsatacaajeiteri ishaninca anta caaraiteriqui, incanteri: ‘Paamayeariya Avincatsarite, pincameetsatanaque paacameetsatavacaajeitanteari’ ”.

⁴ Irio iquitsaatari Joa tijachari iviti cameyo. Irio ishiticatsaquitari meshinantsitsa. Yoapinitari quentori aisati irapinitiri ija pitsi. ⁵ Ijatashijeitaqueri maaroni jerosaresati iquemisantajeitavaqueri, aisati maaroni joreasati aisati maaroni savicajeitatsiri Joriraniqui. ⁶ Icantajeitapaaqueri:

—Ainiro nantayetiri caari cameetsatatsi. Nocoaque incavintsayena Tasorentsi, iroavisacotajena.

Impoiji ivaotisajeitavaqueri Joa Joriraniqui.

⁷ Aisati ipocajeivetaca variseopee aisati saroseopee, icoajeivetaca irivaotisajeiteame, iro cantaincha iquisatsatavaqueri Joa. Icantavaqueri:

—Te pincameetsajeitejive, quempejeitaquempi maranke. ¿Pijitashijeivetampa eiro yoasanquejeitimpitsi Tasorentsi? ⁸ Picoajeitaquerica novaotisajeitempi, ari cameetsa pisavicajeite niotanteari pojocasanotaquero caari cameetsatatsi pantapini-jeitiri. ⁹ Picantajeivetaca: “Narojeitaque ishanincani Avaramani, aitaque irineacameetsataquena Tasorentsi”. Pamatavitaja avisati. Incoauericame Tasorentsi, impeajerome oca mapi ishanincani Avaramani, iro cantaincha eiro ojatitsi inquitequi. Aisati piquempejeitaca avirori: patsipetashijeitacaro pishanincavetacari Avaramani. ¹⁰ Tempa

achaquitapinitiro inchatopee caari timatsi oitsoqui, impoiji ataajeitajiro. Aisati inquempetea Tasorentsi, irotantsi iroasanquejeiteri maaroni caari antiniri icoacaajeivestariri. ¹¹ Ariorica niotaque yojocajeitiro atiripee caari cameetsatatsi yantajeitaqueri, novaotisajeitaqueri nijaqui. Iro cantaincha timatsi impoitapeenaneri: intiancajeiteneri iriori quemisantajeiterineri Ishire Tasorentsi, irinti tseencantatsiri iroasanquejeiteri. Oshequi ipincatsaritaque irinti impoitenaneri. Oshequi nopincatsataqueri; notseencaja narori catsini. ¹² Ariorica avitero aroso, impoiji antincaiquitero. Otaqui antayero, irointi oitsoqui anquempoyejero onantariqui. Aisati inquempetea Avincatsarite, irinashitacaajeitajeari atiripee: incavintsayeri quemisantajeiterineri, irintiquea caari cameetsatatsine irojocajeri paamariqui, ora caari tsivacanetatsi.

Ivaotisataca Jesoshi.

(Mr. 1.9-11; Ir. 3.21-22; Joa 1.31-34)

¹³ Impoiji ijataque Jesoshi Joriraniqui, iponeanaca Carireaqui. Ijatashitaqueri Joa, irivaotisatavaqueariri. ¹⁴ Te incoaveteaji Joa irivaotisateri, icantavaqueri:

—Eiro novaotisatimpitsi avinti. Aviroquea vaotisatapeenane avinti. ¿Paita picoantari novaotisatavaquempi avirori? Oshequi pipincatsaritaque.

¹⁵ Yacanaqueri Jesoshi:

—Nocoasanotaque pivaotisatavaquena. Irootaque icoacaquenari Tasorentsi.

Icantaqueri:

—Ari, novaotisataquempi.

¹⁶ Ari ivaotisataqueri, impoiji yaatanaji. Impoiji iriori Jesoshi, ineavaquero Ishire Tasorentsi, oponeaca inquitequi, aniireashitapaaqueri, oshiyavetapaacari sampaquiti. Aatapaaqueri. ¹⁷ Impoiji iquemajetaqueri Tasorentsi anta inquitequi, icanti:

—Iriotaque yoca notomi nonintasanotaqueri. Oshequi noveshireimentacari.

4

Yora camaari icoavetaca irantacayerime Jesoshi caari cameetsatatsi.

(Mr. 1.12-13; Ir. 4.1-13)

¹ Impoiji Ishire Tasorentsi aanaqueri Jesoshi anta ocaraitapai. Aitaque ocoaqueri irineantaveteari camaari. Icoavetaca camaari irantacayerime Jesoshi caari cameetsatatsi. ² Ari itimaque Jesoshi anta ocarataque 40 quitaiteri, te iroyeaji catsini. Aasanotaqueri itashe. ³ Impoiji yora camaari ijatashitaqueri Jesoshi, irineantapeempariri. Icantavetapaacari:

—Avirosanotaquerica Itomi Tasorentsi, jentsite, pimpeero mapica pitantane, poan-tearori.

⁴ Yacanaqueri Jesoshi:

—Te apaniro oncoiteimotee atantane, irointi acoaque anquemisantero maaroni icantaqueeri Tasorentsi.

⁵ Impoiji yaanaqueri camaari anta Jerosarequi: anta ochoviinaquittapaaque ivanco Tasorentsi. ⁶ Icantavetacari:

—Avirorica Itomi Tasorentsi, pisapocanaque oshaavijinta quipatsiqui. Pinquen-queshireero ocantiri Sanquenarentsi: “Intianquemperi Tasorentsi inampire inquem-poyempi. Irancatsatavajempi eiro pipariantatsi mapiqui”.

⁷ Yacanaqueri:

—Aisati ocanti Sanquenarentsi: “Eiro pineantaritsi Pivincatsarite, tempa irio Tasorentsi”.

⁸ Aisati yapiivetajari camaari, yaanajiri antearoqui toncaari. Ijicotapainiri maaroni quipatsi, icantavetari:

—Pineajeitaqueri maaroni savicajeitatsiri, aisati tempa ocameetsajeitaque maaroni imajeitaqueri. ⁹ Ariorica pimpincatsatena narori, noncamantajeiteri maaroni impincat-sajeittempi avirori.

¹⁰ Yacanaqueri aisati:

—Pijanirotaje. Avironiro Satanashi. Tempa ocanti Sanquenarentsi: “Pimpincat-satasanoteri Avincatsarite, tempa iriotaque Tasorentsi. Apaniro irinti catsini pin-quemisanteri”.

¹¹ Irosati ijatantanaja camaari. Impoiji ipocaque inampirepee Tasorentsi, intaco-jeitacari.

Ijataque Jesoshi Carireaqui.

(Mr. 1.14-15; Ir. 4.14-15)

¹² Impoiji iquemaque Jesoshi yoyeetaqueri Joa caravosoqui, irosati ipiantanaja Carireaqui. ¹³ Iro cantaincha te irisavicateji Nasaretequi, ainti ijataque Caperenaoqui, isavicaque anta. Otimi Caperenao anta otsapijaqui antearoja incajare. Otimi quempeji Savorono aisati Nejatari. ¹⁴ Aisati isanquenatacotaqueroni oca yora Isayashini peerani: ¹⁵ “Otimi Savorono aisati Nejatari otsapijaqui incajare, anta Joriraniqui intatiquero, anta Carireaqui. Anta itiminta oshequi itsipapee atiri, caari inajeiti jorio. ¹⁶ Oquempetimojeivetacari itimini tsiteniriqui, te iriojeiveitearini Tasorentsi. Irija-jeiteme Sharincaveniqui, iro cantaincha meeca oquempetaca itimi quitaitetacojeitiriri, iotacaajeitiriri”.

¹⁷ Ari intanacarori Jesoshi iquenquetsatacaa jeitaqueri atiri anta, icantajeitaqueri:

—Pinquenqueshirejeitanaquea, eiro piquempetajatsi peerani. Irotaintsi impincat-sariventajeittempi Tasorentsi.

Icoyeaqueri Jesoshi aparopee iroamere.

(Mr. 1.16-20; Ir. 5.1-11)

¹⁸ Ari ishiteatanaca Jesoshi anta otsapijaqui incajare: ora timatsiri Carireaqui. Ineapaqueri apite shirampari, yora Shimo Petero, jeri aisati irirenti, yora Antirishi. Irio quitsatapinitiriri shima. Ineapaqueri Jesoshi, iquitsajeiti, ¹⁹ icantapaqueri:
—Tsame pojatanaquena. Nocoaque pinquemisantacaapiniteri atiri.

²⁰ Irosati yojocajeitantanacaro iitsarite, yojajetaqueri. ²¹ Ari yavishimatanaque irosati ineantapaacari Santiago aisati Joa. Iriojeitaque itomipee Severeo. Isavicajeiti ivitoqui, ishiticajeitiro iitsarite. Icajemapaaqueri Jesoshi, ²² irosati yojajetaitantanacari. Yojocajeitanaqueri iriri apaniro anta ivitoqui.

Iquenquetsatacantayeti Jesoshi anta Carireaqui.

(Mr. 1.39; 3.7-8; Ir. 4.40; 6.17-19)

²³ Iquenaquenayetanaque Jesoshi anta Carireaqui. Maaroni nampitsiqui iquenquetsatacaa jeitaqueri atiri anta pancotsiqui yapatotapinijeitancari. Icantiri atiri jaoca icanta Tasorentsi ipincatsariventajeitaquee. Yoavisaacojeitaqueri oshequi mantsiaripee: onashiyetaca aayetiriri imantsiare. ²⁴ Iquemacojeitaqueri Jesoshi yora savicajeitatsiri anta arejiqui: iotacotaqueri maaroni shiriasati. Yaajeitanaqueeneri Jesoshi oshequi ishaninca mantsiyetatsiri iroavisacojeiteri. Yojouiiyetaca, icatsiyetaque, icamanat-apiniyetaque, iquisoporoquiyetaque. Aisati yaanaqueneri neayetiriri camaari. Ari yoavisacojeitavaqueri Jesoshi. ²⁵ Yojajetaqueri oshequi carireasati, tecaporishisati, jerosaresati, joresati, poneayetachari Joriraniqui intatiquero.

Iquenquetsataque Jesoshi anta toncaariqui: iquenquetsatacotaqueri quimoshirejeitatsineri.
(Ir. 6.20-26)

¹ Ineajeitaqueri Jesoshi icarajeitaque oshequi apatotimentajeitariri, ari ijataque toncaariqui, isavicaque anta. Yora iroamerepee yapatojeitaqueri atiri, maaroni. Icantajeitaqueri ishoncajeitapaacari. ² Impoiji yoamejeitaqueri, icantajeitaqueri:

³ —Inquimoshiretacaajeiteri Tasorentsi maaroni caari shemetatsi, impincat-sariventajeiteri. ⁴ Inquimoshiretacaajeiteri Tasorentsi maaroni oashirejeivetainchari, iroimoshirencajeiteri. ⁵ Inquimoshiretacaajeiteri Tasorentsi maaroni ashinoncaincar, incavintsaajeiteri. ⁶ Inquimoshiretacaajeiteri Tasorentsi maaroni coasanotatsiri intime cameetsa, iramatacojeiteri. ⁷ Inquimoshiretacaajeiteri Tasorentsi maaroni cavintsaajeitiriri ishaninca, incavintsaasanojeiteri iriori. ⁸ Inquimoshiretacaajeiteri Tasorentsi maaroni cameetsashirejeitatsiri, irineajeitajeri. ⁹ Inquimoshiretacaajeiteri Tasorentsi maaroni oimajerentajeitaqueri quisachari, intomintajeiteari. ¹⁰ Ariorica

pincameetsatanaque, irootaque inquisantempi, ari pinquimoshiretanaque: aviro savicasanotatsineri anta ipincatsaritinta Tasorentsi. ¹¹ Iriotempirica atiri piquemisantajeitaquena, incantimatempi, inquisaquempi, intseeyacotaquempi. Ari pinquimoshirejeitanaque. ¹² Pinquimoshirejeitanaque, piveshireajeitanaquea: impinatasanojeitempi Tasorentsi anta inquitequi. Eiro pipeacotarotsi: tempa peerani iquisheetirini iriori yora camantantatsiniri.

Yora quemisantatsiri ishiaquero tivi aisati tsomentotsi.

(Mr. 9.50; Ir. 14.34-35)

¹³ Aisati icantajeitaqueri Jesoshi:

—Tempa ativitatinitiri ivatsa eiro ishititantatsi. Irompa terica ompoteate, ontimaite: tempa ari ajocajero, tecatsi coyeroneri. Piquempejeivetacaro tivi: avirojeitaque oameetsajeiterineri atiri. ¹⁴ Ariorica otimi nampitsi anta toncaariqui, otsiota maaroni pancotsipee tsiteniriqui. Tecatsi ancantero nampitsi amanero, tempa oconijatasanoti. Aisati piquempejeitacaro, aviro oamejeiterineri maaroni atiri: eiro pimanirotsi piojeitiri. ¹⁵ Aisati, ariorica pintsiotero pitsiomento, te pimanapiniteroji otapinaqui cantiri. Tempa poapinitiro anta onantariqui yamenajeitantzari maaroni savicajeitatsiri pancotsiqui. ¹⁶ Aisati aviroripee, cameetsa pisavicajeitanaque irineajeitantempi maaroni pishanincaphee ocameetsataque maaroni pantajeitaqueri. Impoiji irineacameetsajeitantzeariri Apa savicatsiri inquitequi.

Iquenquetsatacotaquero Jesoshi isanquenareni Moishishini aisati yora quenquetsatacantatsiniri.

¹⁷ Aisati icantajeitaqueri:

—Eiro pijitashijeitatsi nocoaque nojocacaajempiro piquemisantiro isanquenare Moishishi aisati icantajeitiniri yora quenquetsatacantatsiniri. Iro cantaincha nocoaque noamejeitempiro icantasanojeitaqueri. ¹⁸ Queariotaque oca noncamantempi: ontsoncajearica quipatsi aisati inquit, iro cantaincha eiro otsonquimatatsi catsini isanquenajeitaqueri. Omoncarataquea maaroni icantaqueri. ¹⁹ Eirorica piquemisantasanoiro isanquenatiniri, aisati ariorica poameteri pishaninca eiro iquemisantasanoiro, eiro ineacameetsatasanotimpitsi Tasorentsi anta ipincatsaritinta. Iro cantaincha ariorica pinquemisantasanoitaquero maaroni isanquenajeitiniri, aisati ariorica poamejeiteri pis haninca inquemisantasanojeitero, ari pimpincatsariventasanotantapaaje anta ipincatsaritinta Tasorentsi. ²⁰ ¿Pijitashijeitacarimpa icameetsajeitaque yora oametantirori sanquenarentsi aisati yora variseopee? Meeca noncamantempi: te irimoncarajeitero icoacaajeivtariri Tasorentsi. Eirorica panaacojeitiritsi pincameetsatasanote, eiro p jatitsi anta ipincatsaritinta Tasorentsi.

Icantajeitaqueri Jesoshi: “P quisavacaacariya”.

(Ir. 12.57-59)

²¹ Aisati icantajeitaqueri:

—Piojeitaquero icantiniri yora intacaroniri: “Eiro poanti. Ariorica poante, iroasanquetayempi Tasorentsi”. ²² Iro cantaincha noncamantempi: eiro piquishiritsi pishaninca: yoasanquetaimpicari Tasorentsi. Eiro picantiritsi: “Te pioteji”: iquishimpicari yora oametavacainchari. Eiro picantimatiritsi pishaninca: pitaacari anta Sharincaveniqui. ²³ Pamene, ariorica pijate anta ivancoqui Tasorentsi poaqueneri pivira pimpanteariri; iro cantaincha otimirica iquishimentaqueempiri pishaninca, ²⁴ aritsita icantavacatsita pivira, pijatashiteri yora quisaquempi. Pincamanteri: “Eiro napiitajirotsi caari cameetsatatsi. Pincavintsayena aacameetsatavacaajeitantzeari”. Ariorica cameetsa paacameetsatavacaajea, ari pimpianaje ivancoqui Tasorentsi, irosati pimpantapeempariri pivira. ²⁵ Ariorica intime quishempineri aanaquempineri anta joeshiqui. Ari pishintsite pincantajeri: “Eiro p quisajanatsi, tsame aacameetsatavacaajea aisati”. Ariorica irareetacaapaaquempi joeshiqui, incanteri variria: “Paanaqueri yoca”, impoiji iroiminqueaqueMPI anta caravosoqui. ²⁶ Impoiji eirorica pipinatasanotiri maaroni pirevitiriri, eiro yoimisoquijacantajimpitsi aisati.

Icantajeitiri Jesoshi: “Paimentarocari pijina; paimentaricari pijime”.

(Mt. 19.9; Mr. 10.2-12; Ir. 16.18)

²⁷ Aisati icantajeitaqueri:

—Piojeitaquero icantaqueri intacaroniri: “Eiro paimentarotsi pijina, eiro paimenta-
rtsi pijime”. ²⁸ Noncamantempi nainti: ariorica pinevetearo tsinane aisati pinquen-
queshiretero pantero, ainiro pantane; aitaque pinquenqueshiretaquea paimentearo
pijina. ²⁹ Noshiacantempiro: ariorica antacayempi poquisanori caari cameetsatatsi,
pinquitsoreero, pojocajero. Te pininteji catsini ojatacayempi Sharincaveniqui. Tempa
ocameetsati pijanaroquitashitea anta inquitequi. ³⁰ Ariorica antacayempiro pacosanori
caari cameetsatatsi, pimpesajero, pojocajero. Te pininteji catsini ojatacayempi Shar-
incaveniqui. Tempa ocameetsati pijacaraquitanaje anta inquitequi. Pineaquero, te
oncameetsateji catsini pampiitapinitero caari cameetsatatsi. ³¹ Aisati icantaqueuni yora
intacarori: “Arriorica pincoaque pojocajero pijina, pisanquenatenero paperi pojocanta-
jearori, ari moncarataca”. ³² Iro cantaincha noncantempi nainti: eiro catsini pojoca-
jirotsi pijina. Arriorica pojocajero pijina, aisati paaje pashini, aitaque paimentaquearo
pijinasanori: paavioncaque pijina. Aajerica aisati pijina ontine antane: aimenteari
ojimesanori. Aisati yora aajeroneri, ontine irantane. Irointiquea apatiro ocameetsaveta
pojocajero arriorica aimentaqueempi, tecatsi pashini.

Icanti Jesoshi: “Eiro pamatavitirts i pishaninca catsini”.

³³ Aisati icantaqueri Jesoshi:

—Piojeitaque ocantini Sanquenarentsi. Oametaquerini ashanincani: “Pintseeyarica,
eiro picantashitatsi: ‘Ioti Avincatsarite nomoncaratempiro maaroni nocantaquemperi.
Arriorica namatavitimpi, iroyenata’. Arriorica pincante: ‘Ioti Avincatsarite nomoncar-
atero maaroni nocantaqueri’, ari pimoncaratero, maaroni”. ³⁴ Irootaque isanquenatiniri
peerani. Iro cantaincha nocantimpi nainti: ¿paita pincoanteari pincante: “Ioti Avincat-
sarite queario oca nocantaqueri”? Ocameetsataque pimoncaratasanotaquero maaroni
picantaqueri. Eiro aisati picantitsi: “Tempa ocantani otimi inquite, aisati noquempeta
narori, nocantani tampatica noneanati”. Noncantempi nainti: iro inquite isavicantari
Tasorentsi; iotimpi, ioti queariorica picantaqueri. ³⁵ Aisati eiro picantitsi: “Tempa
ocantani otimi quipatsi, aisati narori nocantani tampatica noneanati”. Noncantempi
narori: itsoteiro Tasorentsi quipatsi, iotimpi; ioti queariorica picantaqueri. Eiro pican-
titsi: “Tempa ocantani otimi Jerosare, aisati narori nocantani tampatica noneanati”.
Noncantempi: ipincatsariventajeitiri Tasorentsi jerosaresati, iriotaque pincatsarisanori.
Ioti queariorica picantaqueri. ³⁶ Eiro picantitsi: “Eiro notseyatsi, irosati noncaman-
taquea, noncanteani tampatica noneanate”. Tempa irio Tasorentsi cantatsine jaocarica
oncarate ancame. Pimpincatsateri irinti, irio iotimpiro pitseyyanirica. ³⁷ Eiro pitseyatsi,
eiro pamatavitantsi. Queariorica pantero paitapeerica, pincante: “Je, nantero”.
Eirorica pantirotsi, pincante: “Eiro nantirotsi”. Moncarataca. Te oncameetsateji
pishequiyero pineane pamatavitanteariri itsipapee.

Icantiri Jesoshi: “Eiro pipiataritsi quishempineri”.

(Ir. 6.29-30)

³⁸ Jero aisati icantajeitaqueriri Jesoshi:

—Aisati icantaqueniri iriori yora intacaroniri: “Arriorica pinquitsoreero iroqui itsipa,
ocameetsati impiatacoventajeari inquitsoreitempiro poqui avirori. Arriorica pijireiteri
pishaninca iraji, ocameetsati impiatacoventajeari, irijireitempiro paji avirori”. ³⁹ Iro
cantaincha noncantempi nainti: eiro pipiataritsi quisajeitaquemperi, irointi arriorica im-
pasavorotempi acaquero, pishineteri aisati otsipa pivoro impasatero aisati. ⁴⁰ Arriorica
incoaque atiri iraitempiro piitsaare, pimpavaqueri aisati poicoro. ⁴¹ Arriorica imper-
anatempi paanajeneri irovaararo aparoni quirometero, poavisayeneri apite quirome-
tero. ⁴² Arriorica incantapeempi pishaninca: “Pimpenero”, ari pimpavaqueri. Aisati,
arriorica incantempi: “Pimpashitavaquenarota oca”, ari pimpashitavaqueari, eiro pit-
saneapitsataritsi.

Icantiri Jesoshi: “Pinintajeiteri quisajeitaquempi, pincavintsaajeiteri”.

(Ir. 6.27-36)

⁴³ Aisati icantajeitaqueri:

—Aisati icantaqueni yora intacaroniri: “Pininteri pishanincasanori, pincavintsayeri. Irintiquea quisaquempi, pinquisavaqueri iriori”. ⁴⁴ Iro cantaincha noncantajeitempi nainti: pinintajeiteri maaroni quisajeitaquempi, pincavintsayeri, pincanteri Tasorentsi incavintsayeri, maaroni. ⁴⁵ Irootaque icoacaajeitaquerirri Tasorentsi maaroni quemisantajeitiriri itomintajeitacari. Tempa iriotaque vetsiquiriri catsirincaiteri: yovoreacojeitaqueri maaroni atiri, cameetsajeitatsiri aisati caari cameetsajeitatsi. Aisati incani, yoariajeitaqueneri maaroni atiri: yora quemisantatsiri aisati caari quemisantatsi. ⁴⁶ Ariorica pincavintsayeri apaniro yora cavintsaimpire, ¿pjjitimpia irineacameetsatempri Tasorentsi? Tempa ioti tseencantatsiri icavintsaavacaajeita iriori. ⁴⁷ Ariorica pincavintsayeri apaniro yora shanincatasanojeitimpire, ¿paita pishemetanteeari? Aitaque iojeiti maaroni caari ioterine Tasorentsi icavintsaavacaajeita iriori. ⁴⁸ Pincameetsatasanotanaque catsini, pinquempejeitanaqueari Apa Tasorentsi: tempa icameetsatasanotaque irinti catsini.

6

Yoamejeitaquee Jesoshi jaoca ancanteari ancavintsaante.

¹ Aisati icantajeitaqueri Jesoshi:

—Eiro pishiacantanirotatsi piquemisanti, eiro piquemisantamempeatsi pamatavitanteearime atiripee. Ariorica irineaquempi Apa Tasorentsi pishiacantaca, eiro ineacameetsatimpitsi iriori. ² Ariorica pimpashiteari ashinoncaincari coiteimojeitacariri, eiro picamantajeitiritsi itsipapee. Irootaque yamenirojeitari yora shiacantavetachari iquemisanti. Ariorica ipiri ashinoncaincari paitarica, icamantajeitaqueri quemisantajeitatsiri, aisati savicajeitatsiri anta nampitsiqui. Icoanirojeitaque iriori irineacameetsajeiteri ishaninca. Ariorica irineacameetsaveteari ishaninca, iro cantaincha moncarataca: eiro ineacameetsatiritsi iriori Tasorentsi, tecatsi impinateri. ³ Ariorica pincavintsayeri ashinoncaincari, pimanaquero: eiro piotacaajeitiritsi itsipapee. ⁴ Ari iriotaque Tasorentsi irinti, impinatempi irinti.

Yoamejeitaquee Jesoshi jaoca ancanterori anquenquetsatacayeri Tasorentsi.

(Ir. 11.2-4)

⁵ Aisati icantajeitaqueri:

—Ariorica pinquenquetsatacayeri Tasorentsi, eiro piquempetaritsi shiacantavetachari: icoaque iriori incatiye anta yapatojeitanta atiripee, aisati anta nampitsiqui nianqui, irineantanirojeitavaqueariri ishanincapee. Queario oca noncamantempiri: moncarataca. Ariorica irineacameetsajeiteri ishaninca, iro cantaincha eiro ineacameetsatiritsi Tasorentsi. ⁶ Ariorica pinquenquetsatacayeri, pijate apaniro pivancoqui, pashitacotanaquea tsompoina, impoiji pinquenquetsatacayeri Apa. Irineaquempi apaniro irinti, irineacameetsatempri, impinatempi. ⁷ Ariorica pinquenquetsatacayeri, eiro pineanatashiveeta, vero, vero, vero. Aitaque yametaro caari iotiri Tasorentsi, ineaveetashita. Ijitashijeiveta ariorica irineanatashiveetea, ari inquemisantaqueri. ⁸ Queariyea, piquempejeitaricari avirori. Iotasanoliro Tasorentsi maaroni coiteimojeitaquempi. Tequerata pincanteri, iotitacaro coiteimotaquempi. ⁹ Ariorica pinquenquetsatacayeri Tasorentsi, ari pinquempetaquerori avirori oca:

Apa, savicatsiri inquitequi,
oshequi nopincatsatasanojeitaquempi.

¹⁰ Pimpincatsariventajeitena narori.

Nocoajeitaque aca quipatsiqui nomajeitempiro maaroni pincoacaajeitenari, nonquempeteari pinampirepee anta jenoqui:

tempa imajeitaquempiro iriori maaroni picoacaajeitaquerirri.

¹¹ Pimpapinijeitena noyeari coiteimotaquenari.

¹² Ainiro nantajetiriri caari cameetsayetatsi,
iro cantaincha eiro poasanquetimentanarotsi,
irointi nocoajeitaque pincavintsaajeitena.

Aisati narori noncavintsaajeiteri noshaninca
antanajeitenaneri paitapeerica, eiro noquishiritsi iriori.
¹³ Eiro pishinetiritsi yora camaari irineantajeitena,
eiro pishinetiritsi irantacaajeitena caari cameetsatatsi.
Pincantaitatiyempani pimpincatsariventajeitena.
Pincantaitatiyempani pintasoncaventajeitena.
Aisati narori, noncanteani nompincatsajeitempi, maaroni.
Irootaque nocantaquempi, ari.

Icantiri Jesoshi: "Pincavintsaajeiteri itsipapee".

¹⁴ Aisati icantajeitiri:

—Arriorica pincavintsayeri quisajeitaquempi, incavintsaajeitempi avirori Apa savi-catsiri inquitequi. ¹⁵ Iro cantaincha eirorica picavintsairitsi pishanincapee, eiro icav-intsaajeitimpitsi Apa.

Yoamejeitaqueri Jesoshi jaoca incanteari, ariorica intitimenteari Tasorentsi.

¹⁶ Aisati icantajeitiri:

—Aisati, ariorica pintitea pinquenqueshiretanteeariri Tasorentsi, eiro piotacaajeitiritsi itsipapee. Eiro piquempetaritsi yora shiacantachari iquemisanti: ariorica ititapinita, yoashirevorotashitaca iriojeitanteeari ishaninca itita. Yatsipetashitacaro, te inqueneshireteriji Tasorentsi, irointiquea icoaque incavintsaajeiteri ishaninca. Eiro ip-inatiritsi Tasorentsi. ¹⁷ Ariorica pintitimenteari Tasorentsi pinquenqueshiretanteeariri, cameetsa pinquishitea, pinquivavorotea aisati, ¹⁸ oncanteata eiro iotanta pishaninca pitita. Apaniro iriotempi irinti Piri jenoquiniri, impinatempi irinti.

Icantiri Jesoshi: "Pimpioteri pivaararo anta inquitequi, pinquenqueshireteri Tasorentsi".

(Ir. 11.34-36; 12.33-34)

¹⁹ Aisati icantajeitiri Jesoshi:

—Eiro pipiotirotsi pivaararo aca quipatsiquica: opatsaaranticari, aisati icoshiy-eetimpicari. ²⁰ Aintquea pimpioteri pivaararo anta inquitequi: eiro ainti opatsaitsi, aisati eiro ainti icoshiyeetajimpitsi. ²¹ Ariorica ontme pivaararo aca quipatsiqui, pinquenqueshiretapinitero timajeitatsiri aca quipatsiqui; iro cantaincha ontimerica pivaararo inquitequi, pinquenqueshiretapinitero Tasorentsi. ²² Otimi poqui pamenantari, otimantari piotantari. Oshiaquero tsionmentotsi pitsiotapinitantari tsiteniriqui pineantari. Arriorica ocameetsataque, piojetanaque, ²³ iro cantaincha eirorica ocameetsati, eiro pamenitsi, eiro piotitsi, pintime tsiteniriqui. Aisati oquempetaca, ariorica pinquenqueshiretapinitero caari cameetsatatsi, eiro piotiritsi Tasorentsi, ainti pintime tsiteniriqui.

Icantri Jesoshi: "Ariorica pantaveetanontea avisati, tecatsi pincantea panteneri Tasorentsi icoacaaquempi".

(Ir. 16.13)

²⁴ Pashini aisati icantiriri Jesoshi:

—Tecatsi pincantea pintsameeteneri apite pivatorote, aisati oquempetaca: ariorica panteneri Tasorentsi icoacaaquempi, irompa ariorica pantaveetanontea avisati paantearori pivaararo. Tecatsi pincantero apite. Pineaquero, ariorica pinintasanoteri Tasorentsi, eiro picoitsi pivionquero pivaararo. Aisati, ariorica pincoaque pivionquero pivaararo, eiro picoitsi pinquemisanteri Tasorentsi.

Icantiri: "Eiro piquenqueshiretatsi, irinti pinquenqueshireteri Tasorentsi".

(Ir. 12.22-31)

²⁵ Aisati icantajeitiri Jesoshi:

—Meeca noncamantajeitempi: eiro piquenqueshiretapinitirotsi paitapeerica poayeteari, pirayeteri, pinquitsaatapiniteari, paitapeerica. ¿Irompa pitimantari poapinitearo poari? Te iro pintimantea, tempa iro pitimantari pinquenqueshireteri vetcicanaquempi. ¿Irompa otimantari pivatsa pinquitsaatero, poaneenquero? Te iro ontimantea. Irointi pitimajitanta piojeiteri Tasorentsi, aisati panteneri icoacaaquempi. ²⁶ Pamenajeiteri yora tsimeripee: te impanquitanonteaji,

aisati te irantanonteaji ivanco irivioncantearori ivanquire. Iro cantaincha ipapinitiri Apa Tasorentsi yoari maaroni quitaiteriqui. Ari icavintsairi maaroni quitaiteriqui; tempa avinti icavintsaasanotaquempi, eiro yoashinoncaimpitsi. ²⁷ Ariorica piquenqueshirete, ¿arimpa pimatero pishequiajero pisarintsite? Eiro. Patsipetashita piquenqueshiretashita. ²⁸ ¿Paita piquenqueshiretarori piitsaare, pitarica pinquitsaateari? Pamenajeitro oteapee tojari, te onquenqueshireteaji irointi: “¿Paita nonquitsaateari?” Te onquiriqueji, aisati te ontijeji, ²⁹ iro cantaincha, oshequi oaneencaca. Pamene, peerani oshequi yoaneencaveitani yora pincatsariveitachaniri Saromoni, iro cantaincha te inquempetasanotearoji oteaquipee: oshequi oaneencasanota irointi. ³⁰ Tempa irio Tasorentsi oaneenquirori oteaquipee tojari, iro cantaincha eiro osamanititsi ontame, impoiji tempa itaapiniyeetiro, pomei. Irompa avinti, pintimajeiteni peerani: tempa iroaneencasanotempi avinti. Pishireteari, eiro pitseenquiritsi. ³¹ Eiro picantashiretitsi, eiro picantitsi: “¿Paita ayeari? ¿Paita ireri? ¿Paita anquitsaateari?” ³² Icoajeitiro ocapée yora tseenajeitantsiri. Iro cantaincha iojeitimpi Piri jenoquiniri, iojeitiro coiteimojeitaquempi. ³³ Irioquea pijivate pimpincatsateri, aisati pincanteri iroameetsashiretempi, impoijiquea impapinijeittempi coiteimojeitaquempi. ³⁴ Ari eiro piquenqueshiretirotsi osaitequera, pitarica panteri. Irintacotempi osaitequera, aisati maaroni quitaiteriqui. Timatsi aquenqueshiretaqueri meeca quitaiteriqui, te oncameetsateji anquenqueshiretero aisati osaitequera.

7

Icantajeitiri Jesoshi: “Eiro picantimatiritsi itsipapee”.

(Ir. 6.37-42)

¹ Aisati icantajeitiri Jesoshi:

—Eiro picantimatiritsi pishaninca. Ariorica pincantimateri itsipapee, icantimpihari Tasorentsi: “Ainiro pantane avirori”. ² Ariorica anquisaqueri itsipapee, ari inquisavaquee arori; aisati oquempetaca, ariorica ancavintsayeri itsipapee, incavintsayee arori. ³ Otimirica pantayetiri avirori, te oncameetsateji pincanteri pishaninca avirori: “Ainiro pantane”. Jero oca noshiacaventempi: ariorica pitijaquitaca quimota avinti, ¿arimpa pinequero itijaquiro pishaninca ovane quipatsi capichaji? ⁴ ¿Ocameetsatimpa pincanteri: “Jentsite, naajempiro pitijaquiro”? Eiro pineirotsi. ⁵ Oshequi picantashitaca. Pijivate pojoquero inchatora jocaaquempirira avirori, impoiji pamenaje paantajeanariri itijaquiro pishaninca. Aisati pincoaquerica pincanteri pishaninca irojocajero yantayetiri, pijivate pojocajero caari cameetsatatsi pantayetiri avirori. ⁶ Te pimpapiniteriji otsiti cameetsatasanotatsiri ivatsa. Aisati te pimpapiniteriji chancho marereatatsiri mapi iroyearo, eiro icoitsi iroyearo. Tempa ari iraticavaquerome, irovitsintavaquerome, impoiji inquisacotaquearo iroyeari, irantsiquimentaqueempiro. Aisati oquempetaca, ocameetsati irineane Tasorentsi. Ocameetsati piquenquetsatacayeri itsipapee ashainca, iro cantaincha ariorica inquishimentempiro, incanteata.

Icantiri Jesoshi: “Te pantsipetashiteaji piquenquetsatacairyi Tasorentsi”.

(Ir. 11.9-13)

⁷ Aisati icantiri Jesoshi:

—Ariorica pincanteri Tasorentsi, irimatempiro pitarica pincanteriri. Pincoayetajero pitarica, impoiji pineajero. Ariorica pareetea pancotsiqui, pincantapaaqueri savicatsiri: “Pashitareenaro”, ari irashitareaquempiro. ⁸ Aitaque ipapinijeitiri Tasorentsi maaroni coacotiriri. Aisati ariorica pincoayetanaque, iramenacayempiro. Ariorica pincanteri: “Pashitareenaro”, ari irashitareaquempiro. ⁹ Ariorica incantempi pitomi: “Apa, pimpema noyeari”, ¿arimpa pimpaqueri mapí? ¹⁰ Ariorica incantempi: “Pimpema shima noyea”, ¿arimpa pimperi maranque iroyeari? ¹¹ Pinequero, te pincameetsatasanojeiteji, iro cantaincha piojeti picavintsaapinitiri pitomipee. Irinti Apa savicatsiri inquitequi icameetsatasanotaque, ioti irinti catsini icavintsaajeitaqueri maaroni quenquetsatacajeitiriri.

Icantajeitiri Jesoshi: "Pincavintsaavacaajeitea".

(Ir. 6.31; 6.43-46)

¹² Aisati icantajeitiri:

—Ariorica pincoaque incavintsaajeitempi pishanincapee, ari pincavintsaajeiteri avirori. Pincoaquericame iroashinoncaajeitempime, ari poashinoncaajeiterime avirori. Irootaque isanquenatiniri yora Moishishini aisati maaroni camantantatsiniri.

Iquenquetsatacotiro Jesoshi apite avotsi.

(Ir. 13.24)

¹³ Jero aisati ishiacantiniri Jesoshi:

—Pincoaquerica pinqueapaaquero ivanco Tasorentsi, pinqueapaaquero orijani omoro. Ainiro pashini avotsi, antearo irointi, te ompomerentsiteaji anquenantearo, aisati anta ocaratapainta otimi omoro antearo. Iro cantaincha maaroni quenayetanaintsine anta irashinoncaajeitea anta Sharincaveniqui. Icarajeiti iriori oshequi. ¹⁴ Iro cantaincha timatsi ora orijani avotsi, aisati orijani omoro. Oshequi opomerentsitaca irointi, itimi aparopee quenantarori. Iro cantaincha irareetea intinti TasorentsiQUI, incantaitatiyempani intime irioriqui.

Iquenquetsatacotiri Jesoshi amatavitantatsiri.

(Ir. 6.43-44)

¹⁵ Aisati icantajeitiri Jesoshi:

—Queariompia, yamatavijeitimpicari shiavetariri quenquetsatacotiriri Tasorentsi. Pishiacantiricari ovisha, pijiticari tecatsi incantemp; iro cantaincha noquempetacantaqueri nainti maniti: oshequi icovencati. ¹⁶ Pamerasanoteri yantayetiri, piotanteariri icameetsatirica. ¿Otimantarompa tojari ova? Teve, te ontimantearoji. ¿Otimantarompa iyera? Aisati te omateroji. Aisati iquempejeita yora amatavitantatsiri: tecatsi incantero irimatero cameetsayetatsiri. ¹⁷ Inchato cameetsari otimi oitsoqui cameetsari, ari avaquearo. Iro cantaincha terica oncameetsateji inchato, te ontameji oitsoqui cameetsari. ¹⁸ Ora inchato cameetsari, tecatsi oncantero ontimero oitsoqui caari cameetsatatsi. Aisati caari cameetsatatsi inchato, tecatsi oncantero ontimero cameetsatatsiri oitsoqui. ¹⁹ Tempa achaquitapinitiro inchato caari oitsoquitatsi, ataapinitiro. ²⁰ Aisati piojeiteri maaroni coatsiri iroamejeitempi. Piotaque ocameetsatirica yantayetiri, ari cameetsa aisati yoametantiro irineane Tasorentsi. Irompa terica oncameetsateji yantayetiri, te oncameetsateji aisati yoametanti.

Jaoca icantari iotasanoliriri Jesoshi.

(Ir. 6.47-49; 13.25-27)

²¹ Pashini aisati icantiriri Jesoshi:

—Ainiro inaveta oshequi cantashitanari: “Aviro novincatsarite, oshequi nopincatsatimp”. Iro cantaincha eiro ijajeititsi iriori anta nompincatsaritenta. Irinti jatasanotatsineri anta inquitequi maaroni yora antasanotiniriri Apa icoacaajeitaqueriri. ²² Ariorica nompincatsaritasanotanaque nampatojeiteri maaroni atiri noncantacoven-tajetanteariri. Intime oshequi cantashitenaneri: “Novincatsarite, oshequi noquen-quetsatacotaquempi. Nocantaqueri neiriri camaari: ‘Paventeari Jesoshi paviscotanta-jeari’. Aisati nocantaqueri noshaninca: ‘Irio Jesoshi matacaanarori notasoncantayeti’ ”. ²³ Iro cantaincha noncanteri narori: “Te niotempiji, te noshanincatempiji. Tsame pijate arejiqui, oshequi pantayetiro caari cameetsatatsi”. ²⁴ Pamene, ariorica pin-quenqueshiretero maaroni nocantaquempi, aisati ariorica pantenaro maaroni nocoo-ccaquempi, ocameetsati. Ontime piotanteari, pinquempeteari vetsquirori ivanco mapiqui. ²⁵ Opariaque incani, ooncanaca. Aisati otimi antearo tampea otatsincave-tanacaro, iro cantaincha te aaveeroji. Iro caari aaveantaro, yovetsiquiro mapiqui, oquisotasanotaque. ²⁶ Aisati oquempetaca avirori, eirorica piquenqueshiretiro maaroni nocantaquempi, aisati eirorica pantanaro maaroni nocooacaavetimpipi, te oncameet-sateji. Eiro otimitsi piotanteari. Pinquempeteari vetsquirori ivanco anta impanequivi.

²⁷ Opariaque incani, ooncanaca. Aisati otimi antearo tampea, otatsincanaquero. Ojaraaquero, jarai; otsoncanaquero, aanaquero, poyere. Tempa yatsipetashitacaro

yora vetcicavetarori. Eiro patsipetashitarotsi avirorije piquemajeitaquena, irointi pantasanotero noocoacaajeitaquempi.

Yovecarataquero Jesoshi iquenquetsatacaajeitiri apatotimentajeitariri.

(Mr. 1.22)

²⁸ Irootaque icantajeitaqueriri apatotimentajeitariri anta toncaariqui, ari yoajeitana-queri cavaco maaroni. Icantajeiti:

²⁹ —Oshequi ioti irinti, oshequi ipincatsariti, cameetsa yoamejeitaquee; te inquem-peteariji yora oametantavetarori Sanquenarentsi.

8

Yoavisacotiri Jesoshi patsaatsiri.

(Mr. 1.40-45; Ir. 5.12-16)

¹ Ari iquenquetsatacanti Jesoshi anta toncaariqui, impoiji yoirincapaaja, yoijajeita-queri oshequi atiri. ² Ari ijatashitaqueri aparoni shirampari patsaatsiri, itonquio-tavacari, icantavaqueri:

—Novincatsarite, pincoaquerica poavisacotajena, niotaque aitaque pimatajenaro.

³ Ari yacotanaque, ipamitaqueri, icantiri:

—Aitaque nocoaque. Aitaque paviscotanaje meeca.

Irosati yavisacotantanaja. ⁴ Ari icantaueri Jesoshi:

—Eiroya picamantitsi, irointiquea pantero icantiniri peerani Moishishi: pijatashiteri saserote, pincamanteri irinti: “Nopatsaaveitani, iro cantaincha pamenajenate, avisaco-tajana: te aneajeroji meeca novatsaaro”. Ari iramenavaquempi, impoiji iroyeri pivira, intayeneri Tasorentsi, irojeitanteari ashanincaphee paviscotaji.

Ari ijatanaque.

Yora Jesoshi yoavisacotiri inampire capitano.

(Ir. 7.1-10)

⁵ Ari yovaanaja Jesoshi, aisati yora oijajeitiriri, impoiji yareejitapaaca Caperenaoqui. Itonquiotavacari aparoni capitano, yora ivincatsarite oshequi soraro. Caari ini jorio yora capitano. ⁶ Icantavaqueri:

—Novincatsarite, ainiro nonampire anta novancoqui, te irimatajeaji irishevatajea, aisati oshequi icatsitaque. Catsiqueti oanaqueri. Nocoaque poavisacoteri.

⁷ Ari yacanaqueri:

—Aitaque nojataque noavisacotajeri.

⁸ Iro cantaincha icantiri:

—Oshequi nopincatsataquempi: te noncameetsateji, eiro pintsipatapaanatsi anta no-vancoqui. Ariorica pincante iravisacotanaje, niotaque ari iravisacotanaje: patsipetaro-cari pijate novancoqui. Oshequi pipincatsariti. ⁹ Timatsi peranatanari, aisati itimi soraro noperanajeitacari narori. Ariorica noncanteri soraro: “Pijate”, ari irijataque. Ariorica noncanteri itsipa: “Pimpoque”, ari impoque. Ariorica noncanteri nonampire: “Jeroca panteri”, ari irimataquero. Aisati onquempetaquea avirori, aitaque omoncarataquea pitarica pincanteri.

¹⁰ Ari yoanaqueri Jesoshi cavaco, icantajeitiri oijajeitiriri:

—Queario oca noncamantempi: oshequi catsini iquemisantanotaque yoca, yanaa-cojeitaqueri maaroni jorio iquemisanti. ¹¹ Coajica anta ipincatsaritinta Tasorentsi intime oshequi itsipapee atiri poneayetachaneri otsipapeequi quipatsi. Incarajeiteri Avarama, Isaca, Jacovo, maaroni. ¹² Iro cantaincha eiro itimitsi oshequi jorio anta. Icoacaavetacari Tasorentsi intsipajeitearime anta ipincatsaritinta, iro cantaincha oshe-qui itseencajeitaqueri, irootaque intiancajeitanteeariri anta otsitenitasanotinta. Oshequi anta iroashinoncaajeitea, oshequi inquematsicatearo.

¹³ Ari icantiri yora capitano:

—Meeca pijataje pivancoqui. Piquemisanti, irootaque iravisacotantajeari pinampire. Irosati yavisacotantanaja inampire.

Yoavisacotiro Jesoshi irairo Petero.
(Mr. 1.29-31; Ir. 4.38-39)

¹⁴ Ari ijatanaque Jesoshi ivancoqui Petero. Ineapaaquero irairo, ojoquiitaca, aaquero catsiirentsi. ¹⁵ Ipamitapairo acoqui, irosati avisacotantaja. Otinaanaja, irosati opan-tavacariri iroapeempari.

Yoavisacojeitiri Jesoshi oshequi pashinipee atiri.
(Mr. 1.32-34; Ir. 4.40-41)

¹⁶ Ari ishaavijiitanaque catsirincaiteri, irosati yamantajeitapaacari oshequi neiriri ca-maari. Ari iquenquetsatacaavaqueri, irosati yavisacojeitantajari. Aisati yoavisacojeita-queri oshequi joquijjeitachari. ¹⁷ Aitaque itsataaquero Jesoshi maaroni iquenquetsataco-tiniri peerani Isayashini: “Coajica iroavisacojeiteri Quirishito oshequi mantsiyetatsiri, oshequi incavintsaajeiteri”.

Icantajeitiri Jesoshi atiripee: “Pojajeitanaquena”.
(Ir. 9.57-62)

¹⁸ Ari ineajeitavaqueri Jesoshi oshequi catsini apatotimentajeitacariri, irosati icant-an-tariri iroamerepee:

—Tsame ajajeite intatiquero incajare.

¹⁹ Ari icantiri oametantirori Sanquenarentsi:

—Oametanari, jaocarica pijateri, nocoaque noijatanaquempi.

²⁰ Yacanaqueri:

—Yorari parari ainiro imoro imaantari, aisati yora tsimeripee ainiro yaatantari imaantari. Noponeaca narori anta inquitequi, natiritapaaque, iro cantaincha te aneroji novanco nainti nomanteeari. Patsipetashitacari pojatanaquena, pashinoncaacari.

²¹ Icantiri pashini iroamere:

—Novincatsarite, nocoavetaca noijatempime, iro cantaincha incamaquetsita apa: impoijquea quiso noanaquempi.

²² Iro cantaincha icantaqueri:

—Pojatenata, impoiji ariorica incame piri, ainiro tijerineri itseencaririnte: yora caari iotiri Tasorentsi.

Yora Jesoshi ipeaquero antearo tampea.

(Mr. 4.35-41; Ir. 8.22-25)

²³ Ari itetanaca Jesoshi pitotsiqui, icarajeitaqueri iroamerepee. ²⁴ Ari imaanaque Jesoshi. Nianquiaqui omapocashijeitacari iroamerepee antearo tampea, otejatapaaca omotoncane. ²⁵ Ari ijatashitaqueri, yoisaquireaqueri, icantaqueri:

—Novincatsarite, jentsinocanti ampiinquenive: poavisacojeiten, aisati poavisacota-jea avirori.

²⁶ Ari itinaanaca, yacanaqueri:

—¿Paita pitsaroantacari? ¿Paita caari piquenqueshiretasanotantana?

Impoiji ipeajiro tampea, aisati ipeajiro omotoncane. Opeasanotanaja tampea, opeasanotaja omotoncane. ²⁷ Ari yoajeitanaqueri cavaco, icantavacaanaca:

—Jaoca icantari yoca? Pinequero ipeajiro tampea, aisati ipeajiro omotoncane, maa.

Yoavisacojeitiri Jesoshi pashinipee neiriri camaari.

(Mr. 5.1-20; Ir. 8.26-39)

²⁸ Ari yareejeitanaca intatiquero, yaatacotapaaque. Opajita nampitsi Carara. Ari iponeaca tijaariqui apite neiriri camaari, itonquitavacari Jesoshi. Yora camaari, oshequi iquisacaacari neiriri, irootaque itsaroacaajeitancariri ishaninca, te inquenan-tajearo tijaariqui. ²⁹ Icantavaqueri camaari:

—¿Aviro? Niotaquempi, aviro Itomi Tasorentsi. ¿Paita pipocashitantanari? ¿Irompa pipocashitantanari meeca poashinoncayena? Tequera omoncarateaji nonquematsi-catantearori anta ishaavji.

³⁰ Ari itimi anta oshequi chancho, yoajeitanta. ³¹ Icantiri camaari:

—Ariorica poavisacoteri neanarica, pintianquena anta chanchoqui, nonijapeempari iriori.

³² Ari icantiri:

—Pijate, pinijapeempari iriori.

Ari ijatanaque, ineavaqueri iriori chancho, irosati ishiajeitananaca imperitaqui, ipiincajeitanaque incajarequi, tsapo, tsapo, tsapo. Itsitiaeitanaque, pomiririri, poyere. ³³ Ari ineavaqueri shentajeivetariri, ishiajeitanaca. Ijatanaque nampitsiqui, icamantapaaqueri ishaninca maaroni oca ineakeri. ³⁴ Ari ijatashijeitaqueri maaroni savicajeitatsiri, icantapaaqueri Jesoshi:

—Tsame pijataje: eiro pipocajitsi aca nonampiqui.

9

Yoavisacotiri Jesoshi caari shevatacha.

(Mr. 2.1-12; Ir. 5.17-26)

¹ Ari itetanaja aisati Jesoshi pitotsiqui, icarajeitiri iroamerepee. Ipiajeitanaja inampisanoriqui. ² Ari yameetaqueneri caari shevatacha, yamacotaqueri shitashintsiqui. Iotaque Jesoshi oshequi iquemisantaque, irootaque icantantavacariri:

—Piveshireanaquea, noshaninca, meeca noavisacotempi; eiro noquishimentimpirotsi caari cameetsatatsi pantayetiri.

³ Ari iquemajeitaqueri oametantirori Sanquenarentsi, icantavacaajeitanaca:

—Ijitasorentsitacateemi Jesoshi.

⁴ Ari iotaque iriori iquenqueshirejeitiri, icantajeitiri:

—¿Paita pquisashirejeitananari? ¿Paita pitseencajeitananari? ⁵ Ariorica noncantataqueri yoca: “Meeca noavisacotempi, paniitanaje”, tempa ari pamenajeitavaqueri, sorererere. Eirorica nomatirotsi, ari pishirontimentena. Iro cantaincha pijitashijeitaca nocantashitari: “Noavisacotempi, eiro noquishimentimpirotsi caari cameetsatatsi pantayetaqueri”. ⁶ Nocoaque piojeite te noncantashiteaji. Noponeaca narori inquitequi, natiritapaaque. Icantaquena Apa: “Poavisacotenari antirori caari cameetsatatsi, impoiji eiro aquishimentajiritsi aisati yantayetiri”. Nocoaque piojeite ainiro notasorenca.

Ari icantiri caari shevatacha:

—Pincatianaje, paanajero pishitashi, pijataje pivancoqui.

⁷ Ari icatianaja, cati; ijatanaji ivancoqui. ⁸ Ineajeitavaqueri maaroni apatojeitainchari, yamenajeitavaqueri sorererere. Itsaroajeitanaque, aisati icantajeiti:

—Tempa icameetsati Tasorentsi, imatacaaqueri yoca yoavisacotajiri mantsiaripee.

Icantiqueri Jesoshi Mateo: “Pojatanaquena”.

(Mr. 2.13-17; Ir. 5.27-32)

⁹ Ari yovaanaja Jesoshi anta nosaviquinta narori. Ineapaaquena naitayetiri noshaninca iirequite nompanteariri oromasati. Icantapaaquena:

—Tsame, pojatanaquena avirori.

Ari nocatianaca, noijatanaqueri. ¹⁰ Impoiji naanaqueri anta novancoqui, noacaapaacari. Ari nocajemiri Jesoshi, itsipa iroamerepee, yora notsipajeitari napatojeitiniri oromasati iirequite, itsipapee caari quemisantatsi, maaroni. Ari noajeitaca. ¹¹ Ari ipocashitaquena yora variseopee, icajemiri itsipapee iroamere Jesoshi, isampijeitiri:

—¿Paita yantiri yora oamejeitimpi? Jeri yoacaajeitacari apatotiniriri oromasati quirequi, aisati icarajeitiri caari cameetsajeitatsi. Te oncameetsateji.

¹² Ari iquemaque iroamere, impoiji ijatashitaqueri Jesoshi, icamantapaaqueri; impoiji icantanaque iriori:

—Yora caari mantsiatatsi te incoyeji iravintea, irintiquea mantsiyetatsiri coatsiri iravintea. ¹³ Tsame pijajeite pinquenqueshirejeitero icantiri Tasorentsi: “Te noncoyeji poapinitenari pivira, pintaapinitenari; irointiquea nocoasanotaque pincavintsaajeiteri pishaninca”. Te iro nompocantea nonquemisantacaajeiteri cameetsayetatsiri, irintiquea caari cameetsajeitatsi.

Irootaque icantiriri Jesoshi variseopee.

Icamantiri Jesoshi paita caari ititanta iroamerepee.

(Mr. 2.18-22; Ir. 5.33-39)

¹⁴ Impoiji ipocaarantaque iroamerepee Joa, isampitapaaqueri Jesoshi:

—Pamene, notitapinita noquenqueshirentariri Tasorentsi, aisati iquempetaca yora variseopee; irintquea poamerepee avirori, te intitimateaji. ¿Paitaquea?

¹⁵ Ari yacanaqueri:

—Piojeitaque yamejeitari yora iroaquera aatsi ijina: icajemajeitaqueri ishaninca, yoacaajeitacari, iveshireimentajeitacari iriori. ¿Paita iroashiretacantearir icajamacantiri? Iro cantaincha, ariorica irijatanaque arejiqui, impoijiquea iroashirejeitanaquea, intijeitanaquea. Aisati narori, coajica nojataje, impoijiquea iroashirejeitanaquea, intijeitanaquea noamerepee. ¹⁶ Aisati, otimirica piitsaare iroquerari, te pintsereeroji pim-pataquero peesatotaintsiri pimaatsara. Ariorica poavitajero, eiro omoncaratavacaatsi. Aisati ariorica pinquivajero oshirincamaotanaque iroquerari, antsivianaquea peesato-taintsiri, ontseraneaque. ¹⁷ Tempa apeantantaro iroquerajari pearentsi imeshinaqui iroquerari, impoiji antsitacotaquero eiro aparajatanta. Ariorica oshimoretanaque, aravoncanaque, ontapiaqueri imeshina. Iroquerarica ini, eiro ipesacotitsi, aisati eiro aparajatatsi: tempa iroquera ini. Iroricame ampeantantajearome pearentsi iroquerajari peesatitatsiri imeshina, tempa ari iraravoncanaqueme, intoncanaqueme, ton. Aitaque intsereanaqueme, aisati amparajatanaqueame iroquerajari, chararara. Iroquera oni oca noamejeitimpipi, te oncameetsateji onconoyearo peeraniniri poame-jeitiriri avirori.

Irootaque icantaqueriri Jesoshi.

Yoavisacotiro Jesoshi irajatatsiri aisati yoitinaajiro camaintsiri.

(Mr. 5.21-43; Ir. 8.40-56)

¹⁸ Irosati ipocashitancari pincatsaritatsiri, itiyeroashitapaacari Jesoshi, ipincatsata-paaqueri; icantapaaqueri:

—Camaque nishintio, iro cantaincha nocoaque pijate novancoqui pimpamitapeero aneantajeari.

¹⁹ Ari yojatanaqueri Jesoshi, nocarajeitanaqueri narori, maaroni iroamerepee.

²⁰⁻²¹ Ari anta nianqui avotsi oneavaquena tsinane, ocarataque 12 osarintsi ashinoncaaca: ocantani irajataquenive. Oquenqueshiretaca: “Ariorica nantitaqueri iitsaare Jesoshi, ari navisacotanaje”. Ari oquenapaaque itapiiqui, antitaqueri ovarashiqui iitsaare. ²² Ari ipitsocanaca, inequiero, icantaqueri:

—Piveshireanaquea, nosharinca, piquemisantake, irootaque paviscotantajari.

Ari avisacotaji.

²³ Ari novaajeitanaja, nareejeitapaaca ivancoqui pincatsari, noneapaaqueri shiovita-coventirori camaintsiri, aisati oshequi ashaninca, icajemajeitanaque. ²⁴ Ari icantajeitiri Jesoshi:

—Pijajeitanaque. Te oncameji oca piraacojeitiri, irointi omai.

Ari ishirontimentajeitacari, iji, iji, iji. ²⁵ Ari isoquijajeitanaque, irosati iqueantapaaca Jesoshi. Yajiricavacotapaaquero, irosati otinaantanaja. ²⁶ Irosati iquenquetsatacojeitancari maaroni savicajeitatsiri.

Yamenacaajiri Jesoshi apite caari amenatsi.

²⁷ Ari novaajeitanaja aisati, itimi anta apite caari amenatsi. Yojatanaqueri Jesoshi, icantajeitiri:

—Tempa aviro ishanincani Iravirini. Pincavintsaajena.

²⁸ Ari noqueajeitapaaque pancotsiqui, aisati iriori yora caari amenatsi. Ipocashijeta-queri Jesoshi, impoiji icantavaqueri:

—¿Paamaacampa ari nomatero namenacaajeitajempi?

Icantiri:

—Je, novincatsarite; nioti ari pimatajena.

²⁹ Irosati ipamijaquitantacari, icantaqueri:

—Pishiretaquena, irootaque noaviscotantempiri.

³⁰ Irosati yamenajeitantanaja, iro cantaincha icantasanotaqueri:

—Eiroyea picamantiritsi itsipapee: “Yamenacaajana Jesoshi”.

³¹ Iro cantaincha ijajeitanaque, icamantajeitaqueri maaroni ineajeitaqueri:

—Yamenacaajana Avincatsarite.

Ineanatacaajiri Jesoshi caari neanatatsi.

³² Ari impoiji, jeri ipocapaaque neiriri camaari, te irimateroji irineanate. ³³ Ari itianquiri Jesoshi yora masontitacaaveitariniri, ineanatacaajiri. Ari yoajeitanqueri cavaco maaroni amenajeitaqueriri, icantajeiti:

—Peerani, te aneapiniteriji quempetearine yoca.

³⁴ Iro cantaincha icantanirojeiti yora variseo:

—Yamitacotiri ivincatsarite camaari, irootaque imatantacariri iamaaririnte itianquiri.

Oshequi icavintsaajeitaqueri Jesoshi atiripee, icoaque inquemisantajeite.

³⁵ Ari oshequi iquenaquenayetanaque Jesoshi maaroni nampitsipeequi, yoametapini-jeitiri noshaninca anta yapatotapinijeitanta. Iquenquetsatacotapinitiri Tasorentsi, jaoca icanta ipincatsariventanti. Yoavisacojeitiri maaroni: tecatsi ompomerentsitimoteari, imataquero maaroni mantsiarentsipee. ³⁶ Ari ineakeri oshequi catsini atiri yapatotimentajeitacari, oshequi icavintsaajeitaqueri. Icanti:

—Oshequi yashinoncaajeitaca, tecatsi intacotearine. Iquempejeivetacari ovisha yora caari ishenteeti.

³⁷ Impoiji icantajeitana:

—Oquempetaca otimi oshequi oitsoqui panquirents, iro cantaincha te intimeji oshequi aviiteroneri. ³⁸ Pincantajeiteri Pivincatsarite intiancajeitanteeariri oshequi quenquetsatacaajeiterineri ashaninca, quemisantacaajeiterineri.

10

Imatacaajeitaqueri Jesoshi iroamere yoavisacojeitaqueri neiriri camaari aisati mantsiayetatsiri.

(Mr. 3.13-19; Ir. 6.12-16)

¹ Ari icajemajeitaquena Jesoshi, maaroni itsipapee iroamerepee, nocarajeiti 12. Imatacaajeitaquena noavisacojeitaqueri neiriri camaari, nojocacoventajeitaqueri iamaarite. Aisati imatacaaquaena noavisacojeitaqueri maaroni mantsiayetatsiri.

² Ari itiancajeitaquena nomayetero imatacaaajeitaquenari. Ari nocarajeitiri Shimo, irosati ivajiro aisati Petero; jeri Antirishi, irirenti Petero; Santiaco, yora itomi Severeo; Joa, yora irirenti Santiaco; ³ Jeripi; Varitorome; Tomashi; aisati narori: narotaque apatoveitanariniri oromasati iirequite; Santiaco itomi Arejeo; Tareo; ⁴ Shimo, icantiri aisati Sheraroro; jeri aisati yora Jorashi Ishicariote, yora aacaanterineri coajicani Jesoshi.

Itiancajeitaqueri Jesoshi iroamerepee inquenquetsajeite.

(Mr. 6.7-13; Ir. 9.1-6; 10.3-11)

⁵ Ari itiancajeitaquena Jesoshi, icantavaquena:

—Eiro pijatashitiritsi yora itsipapee atiri, aisati eiro pijatitsi anta itiminta samariasati.

⁶ Irintiquea pijatashijeite maaroni ajorioririnte. Noshiacantajeitaqueri ovisha yora caari ishenteeti. ⁷ Jaocarica pinquenayetanaqueri, pinquenquetsatacaajeiteri atiripee. Pincamantajeiteri: “Irotaintsi impincatsariventajeitee Tasorentsi”. ⁸ Poavisacojeiteri mantsiaripee, pointinaajeitajeri camayetatsiri, poavisacojeiteri patsaayetatsiri aisati neayetiriri camaari. Oshequi nocavintsaajeitaquempi, iro cantaincha tecatsi noncoacojeitempi. Meeca pincavintsaajeiteri itsipapee, iro cantaincha tecatsi pincoacojeiteri avirori. ⁹ Eiro paanaqueritsi piirequite, ¹⁰ pitsarate, otsipa piitsaare, pisapatote, piotiquiro, tecatsi catsini. Tempa ocameetsati incavintsaajeitempi maaroni yora pincavintsaajeiteri avirori: ocameetsati impashijeitempi maaroni coiteimojeitaquempi. ¹¹ Ariorica pareetea nampitsiqui, pincoapeeri quemisantasanotatsiri; pisaviquimoteri iriori irosati povaantanaejeari otsipapeequi nampitsi. ¹² Ariorica pareetapaaquea, pineacameetsajeitapeeri savicajeitatsiri. ¹³ Ariorica irineacameetsajeitavaquempi iriori, pincanteri Tasorentsi incavintsaasanoteri. Iro cantaincha terica irineacameetsatempi, eiro picantiritsi incavintsayeri. ¹⁴ Eirorica ineacameetsatavaquempi, aisati eirorica quemisantavaquempi, ari povaanajea. Pincantanaqueri: “Te pinquemisantavaquena, ari coajica iroasanquejeitempi Tasorentsi”. ¹⁵ Queariotaque oca noncantempi: coajica,

ariorica incantacoventajeiteri Tasorentsi maaroni atiri, iroasanquetaajeiteri maaroni soromasatini aisati maaroni comorasatini. Iro cantaincha iroasanquetaasanojeiteri catsini maaroni caari neacameetsajeitelpine, oshequi irashinoncaajeitanaquea. ¹⁶ Meeca nontiancajeitempi, iro cantaincha oquempetaca notianquiri ovisha anta itiminta covencari: oshequi iroashinoncaajeitempi tseencantatsiri. Pinquenqueshirejetanaquea, eiro catsini poashinoncairitsi pishaninca.

Irootaque icantajeitavaquenari Jesoshi.

Icamantajeitiri Jesoshi iroamerepee: “Coajica oshequi inquisajeitempi itsipapee”.

(Mr. 13.9-13; Ir. 21.12-19)

¹⁷ Aisati icantajeitaquena Jesoshi:

—Queariomphia, yoashinoncaimpicari ashaninca. Iraajeitanaquempi anta yoametavaaaejitanta pincatsaripee iroasanquetaacantantempi. Aisati iraajeitanaquempi ashanincaphee anta yapatojeitantly, impasanatapinitempi. ¹⁸ Iriojeitempirica piquemisan-tajeitaquena, iraanajempi anta itiminta ivincatsaritepee itsipapee ashaninca, impoiji pinquenquetsatacaajeiteri iriojeitantenari itsipapee ashaninca. ¹⁹ Ariorica iraajeitanaquempi, eiro piquenqueshireatsi, eiro picantitsi: “¿Paitampa noncanteriri?” Narotsitaquea nanti oamejeitempineri paitarica pincanteriri. ²⁰ Eiro piotashitatsi avirori pinquenquetsatacayeri, irointi Ishire Tasorentsi oametasanotempineri pinquenquet-satacayeri. ²¹ Coajica oshequi inquisavacaimentajeitaquena atiripee. Aparo iroacanteri irirenti, pashini iroacanteri itomi, aisati itsipapee iroacantayeteri ashuyetariri. ²² Piquemisantajeitaquena, irootaque inquisajeitantempi pishanincaphee, iro cantaincha eiro poipacairotsi piquemisanti. Ariorica pincanteani pinquemisantena, noavisaco-jeitempi, cameetsa pisaviquimojeiteni anta inquitequi.

²³ Ariorica inquisajeitempi savicajeitatsiri aparoni nampitsiqui, ari pishianaque, povaanajea otsipaqui nampitsi. Queario oca noncamantempiri: eirotsitarica pitsoteiro maaroni nampitsi isavincantari ajorioririntepee, aisati nompiapaaje narori. Tempa noponeaca narori inquitequi, natiritapaaque. ²⁴⁻²⁵ Ariorica irimoncaraveteari iroamere oametiriri irlote, iro cantaincha eiro yanaacotiritsi. Aisati ariorica irimoncaraveteari nampirents yora nampitariri ipincatsariti, iro cantaincha eiro yanaacotiritsi. Ari meeca oshequi iquisajeitaquena ashaninca, ijitashijeitaquena naro ivincatsarite camari. Piquemisantajeitaquena, tempa irootaque inquisajeitantempi avirori, ²⁶ iro cantaincha, eiro pitsaroacaajeitaritsi. Meeca te iriojeiteji maaroni nopincatsaritaque, iro cantaincha coajica iriotasanojeitanaque maaroni; irineajeitaquena nompincatsaritasan-otanaque, aisati pincarajeiteni avirori. ²⁷ Meeca apaniro nocamantajeitaquempi, te iriojeiteji yora tseencantatsiri, iro cantaincha coajica niotacaajeiteri. Meeca nomanavetacaro, iro cantaincha coajica noncamantasanojeiteri maaroni. ²⁸ Irimajeivetearo iriori iroajeitaquempi, iro cantaincha eiro pitsaroacaaritsi: tecatsi incantempi intianquempi Sharincaveniqui. Irinti pimpincatsatasanoteri Tasorentsi: incoaquerica iriori irimatajero iroajempi aisati intianquempi Sharincaveniqui. ²⁹ Pamene, te impinateaji tsimeripee, iro cantaincha terica incoacayeri Apa incame, eiro icamitsi aparoni, catsini. ³⁰ Lotiro jaoca ocaratiri piishi, iotasanolimpi catsini. ³¹ Pineaquero, oshequi panaaco-jeitiri tsimeripee, oshequi iquenqueshiretaquempi. Meeca eiro pitsarotsi. ³² Ariorica pincanteri ashaninca: “Nopincatsataqueri Jesoshi”, aitaque anta inquitequi noncanteri Apa: “Ipincatsataquena iriori, noshanincatacari”. ³³ Iro cantaincha pincanteririca ashaninca: “Te nompincatsateriji Jesoshi”, ari anta inquitequi noncanteri Apa: “Te impincatsatenaji yora, te nioteriji narori”.

³⁴ Aisati icantana Jesoshi:

—Eiro pijitashitanatsi nopoqui iraacameetsatavacaajeitanteari maaroni savicajeitatsiri. Te iro nompocantea iraacameetsatavacaajeitanteari, irointi inquisavacaja-jeitanteari. ³⁵ Irointi nopoanta inquisanteariri shirampari iriri, onquisantearori tsinane iniro, onquisantearori tsinane airo, ³⁶ inquisanteariri shirampari ishanincasanori. ³⁷ Tempa ocameetsati pinintajeiteri piri aisati piniro, iro cantaincha ocameetsatasanoti pinintasanojeiteni narori. Eirorica pinintasanotanatsi narori, eiro noneacameetsatimpitsi

avirori. Aisati, ocameetsati pinintajeiteri pitomi aisati pishinto, iro cantaincha ocameetsatasanoti pinintasanotena narori. Eirorica pinintasanotanatsi narori, eiro noneacameetsatimpitsi avirori. ³⁸ Nocoaque pinquearioventenaro maaroni nocoo- caaqueempiri. Ariorica inquishimenteetempiro, iro cantaincha nocoaque pimpomer- entsiventenaro. Eirorica pipomerentsiventanarotsi, eiro noneacameetsatimpitsi narori. ³⁹ Ariorica pincavintsaasanotajea avisati meeca, pashinoncaasanotanaquea coajica. Iro cantaincha pinquemisantsasanotenerica meeca, ariorica iroashinoncaajeivetempi pishaninca, iro cantaincha eiro patsipetarotsi: coajica paneajeitanaje anta ocameet- saitetasanotinta catsini. ⁴⁰ Maaroni aacameetsajeitelpineri, yaacameetsajeitaquena narori. Aisati maaroni aacameetsajeitanari, yaacameetsajeitaqueri Apa iriori: yora tiancaquenari. ⁴¹ Ariorica irioyeetempi aviro quenquetsatacotiriri Tasorentsi, irootaque iraacameetsatantempi, ari pimoncaratavacaajeitea impinajeitempi Tasorentsi: avirori, aisati yora aacameetsajeitelpineri. Aisati oquempetaca, irioyeetempirica picameetsati avirori, irootaque iraacameetsatantempi, ari pimoncaratavacaajeitea impinajeitempi Tasorentsi. ⁴² Ariorica irioyeetempi piquemisantana, irootaque impacotantempirori pireri, riotero Tasorentsi, impinatasanoteri yora cavintsaimpiri.

Irootaque icantajeitanari Jesoshi.

11

Itianquiri Joa iroamere irineeri Jesoshi.

(Ir. 7.18-23)

¹ Ari ivecaraquero yoamejeitaquena Jesoshi, yovaanaja anta otsipapeequi nampit- sipee, yoamejeitaqueri savicajeitatsiri, iquenquetsatacaaajeitaqueri. Noijatanajiri narori, aisati nocarajeitaqueri itsipapee iroamerepee, nocarajeiti 12. ² Chapinqui yoiminquee- taqueri Joa, yora vaotisatantatsiri. Meeca ari inaqueri caravosoqui, iro cantaincha iquemacotaqueri yantayetaqueri Quirishito, irosati itiancantacariri iroamerepee iriori:

³ —Pijatashijeiteri Jesoshi, pisampitaiter: “¿Avirompa Quirishito naamaajeitari? Terica aviro, ari naamayaea pashini”.

⁴ Ari yareejeitapaacari Jesoshi, isampitapairi. Ari yacavaqueri:

—Pimpiajeitanaje, pincamantapeeri Joa maaroni piquemaqueunari aisati maaroni pineacotaquenari. ⁵ Namenacaajeitajiri caari amenajeivetacha, naniitacaajeitajiri caari shevajeivetacha, noavisacojeitaqueri maaroni patsaaajeivetachari, noquemacaajeitajiri caari quemaveitachani, noitinaajiri aisati camavetainchari, niotacaajeitaqueri ashinon- caajeivetachari jaoca incanteari iravisacotantajeari. ⁶ Inquimoshirejeitanaque maaroni caari tseencana. Irootaque pincamantapaaqueriri Joa.

Yora Jesoshi ineacameetsataqueri Joa.

(Ir. 7.24-30)

⁷ Ari ipiajeitanaja iroamerepee Joa, impoiji iquenquetsatacaaajeitaqueri Jesoshi yora apatotimentajetacariri:

—Ari peerani pijatapinijeiti anta caaraiteriqui, piquemisantapinijeitiri Joa. ¿Paita pijatashijeitantariri? Tempa piojeitiri iotiri iriori Tasorentsi, irootaque pijatashitariri. ⁸ ¿Pinequerimpa iquitsaata cameetsa? Teve. Yora quitsatarori iitsaare cameetsari isavicajeiti anta ivancoqui pincatsari. ⁹ Tempa piojeitaqueri iriotaque quenquetsatirori irineane Tasorentsi. Queariotaque, iro cantaincha yanaacotasano- otiri itsipapee quenquetsatacotiriri Tasorentsi. ¹⁰ Iquenquetsatacotaquerini peerani Tasorentsi, icantanani: “Notiomni, nontianqueri coajica jivatemperni, inquenquetsata- caapaaqueri ishaninca, incanteri: ‘Pinquenqueshirejeitea, paamaajeiteari Avincatsarite’ ”. ¹¹ Meeca noncamantempi, queariotaque: tempa itimi oshequi catsini atiri, iro cantaincha yanaacojeitaqueri Joa, yora vaotisatantatsiri. Yanaacotasanojeitaqueri itsi- papee, iotasanotaqueri Tasorentsi. Iro cantaincha maaroni neajeitaquerineri Tasorentsi impincatsaritapaaaje, iranaacotasanooteri Joa, iriotasanojeitanaque irinti. ¹² Peerani iquenquetsatacotaquempini Joa, meeca noquenquetsatacaaajeitaquempi narori, pio- jeitacariri Tasorentsi. Ari impincatsariventajeiteri maaroni coasanojeitatsiri iri- ojeiteri. ¹³ Peerani maaroni yora camantantatsiniri iquenquetsatacotiri Quirishito,

aisati iquempetani Moishishini. Aisati icantajeiti: “Irotantsirica impoque Quirishito, irijivatapaqueri Iriashi”. Impoinji meeca ipocaque iriori Joa,¹⁴ ariorica noncantempi: iriotaque Joa iquenquetsatacotiri, ¿arimpa pijitaque namatavitaquempi?¹⁵ Otimirica piyempita piquemantari, pinquemaquena.

Irootaque icantajeitiriri maaroni apatotimentajeitariri.

Icantiri Jesoshi: “Te piotacotasanojeitenaji”.

(Ir. 7.31-35)

¹⁶ Jero oca aisati icantajeitaqueriri Jesoshi:

—Piquempejeitacari jananequipee, savicajeitatsiri saiteriqui, cantiriri itsipapee:
¹⁷ “Notamporovetaca, iro cantaincha te pojatanaquenaji; nosoncavetaca, iro cantaincha aisati te pojatanaquenaji. Nomaninquevetaca, te pojatanaquenaji”. ¹⁸ Pinequero, picoajeiveta irantajeiterome pishaninca paitarica picoacaajeivetacariri. Pineavetari Joa, itivetaca aisati te irireroji cachojari, ari picantashijeitari: “Oo, inequeri Joa camaari, ititantacari”. ¹⁹ Ari noponeaca narori inquitequi, natiritapaaque; te nontiveteaji nainti, aisati niriro cachojari nainti. Ari picantimajeitaquena: “Jeri yonta oashenti, shinquinarinti. Ishanincatacari aitaqueeriri airequite aisati itsipapee caari cameetsayetatsi”. Iro cantaincha ioti Tasorentsi, ocameetsataque maaroni icoacaquenari; aisati maaroni quemisantanari, iojeitaque ocameetsataque icoacaquenari Apa.

Irootaque icantajeitaqueriri.

Irashinoncaajeitanaquea maaroni tseenquiriri Jesoshi.

(Ir. 10.13-15)

²⁰ Impoiji iquenquetsatacojeitaqueri Jesoshi yora neajevetacariri itasoncanti, iro cantaincha itseencajeitaqueri. Icanti:

²¹ —Irashinoncaajeitanaquea maaroni coraseisati, aisati vetsairasati. Oshequi inea-jeivetaquena notasoncantayeti, iro cantaincha te inquenqueshireteaji, te inquemisan-teji. Irineauquename notasoncantayeti yora tirosatini peerani, aisati yora shirosatini, inquenqueshirejeitanaqueame irinti, irojocajeitaquerome caari cameetsatatsi yantajeitiniri, inquemisantajeiteme. ²² Coajica, ariorica incantacoventajeiteri Apa, iroashinon-caajeiteri yora tirosatini aisati yora shirosatini: oshequi te incameetsajeiteni. Iro cantaincha iroashinoncaasanojeitaqueri catsini yora coraseisati aisati vetsairasati: tempa inea-jeivetaquena notasoncantayeti, iro cantaincha te inquemisanteraji. ²³ Aisati iriori caperenaosati, ijitashijeiveta irijate inquitequi, iro cantaincha itseencajeitaqueri: irootaque irijajeitanteari iriori ishaaviji. Irineauerome yora soromasatini maaroni in-eajeitaqueri caperenaosati, inquenqueshirejeitanaqueame, eiro itsoncajeitirime peerani Tasorentsi, ontimeme meeca inampi. ²⁴ Coajica iroashinoncaajeitajeri aisati Tasorentsi soromasatini, iro cantaincha iroashinoncaasanojeiteri catsini yora caperenaosati.

Irootaque icantaqueriri Jesoshi.

Yora Jesoshi iquenquetsatacairy Iriri.

(Ir. 10.21-22)

²⁵ Impoiji iquenquetsatacairy Jesoshi Tasorentsi, icantiri:

—Apa, aviro pincatsariventajeitiriri maaroni inquitesati aisati maaroni quipatsisati, oshequi nopasonquitimpi. Ainiro cantashitachari: “Niotasanoti nainti”, iro cantaincha pimanapitsajeitaqueri piotiri. Irintiquea piotacaajeitiri itsipapee, yora itseenqueetiri.

²⁶ Pineshiloncaajeitaqueri irinti, picoacaajeitaqueri iriote.

²⁷ Irootaque icantaqueriri iriri, impoiji icantajeitaqueri ashaninca:

—Irio Apa iotacaanari maaroni. Apaniro iotasanotaque irinti naro itomi, te iri-otacotenaji itsipapee. Apaniro niotiri narori, tempa narotaque itomi; yorari itsipapee, te iriotaque jeiteriji Apa. Irintiquea iotasanotaque iriote yora noamejeitaqueri. ²⁸ Ariorica pashinoncayea, ariorica ompomerentsitimotempi paitapeerica, pim-pocashitena pincamantena; ari noncavintsayempi, nintacotempi eiro opomerentsiti-motantajimpitsi aisati. ²⁹ Pinquemisantena narori, pincoajeite noamejeitempi; oshequi

nocavintsanti, oshequi noneshinoncatanti. Ariorica pinquemisantena, noveshireacaajeitemi. ³⁰ Pamene, eiro noperanatimpitsi, eiro noashinoncaimpitsi, irointi namitacotapini jeitemi.

12

Yora Jesoshi irio cantatsiri paitapeerica antayeteri saavaroqui.

(Mr. 2.23-28; Ir. 6.1-5)

¹ Ari pashini saavaro noi jajeitanaqueri Jesoshi, ijivajeitanaquena anta oantsipeequi. Narotaque iromerepee. Ari aajeitaquena notashe, irootaque navitantanacarori oitsoui tirico, noajeitacaro. ² Ari ineajetaquena variseopee, irosati icantantacari Jesoshi: —Pamenerite poamerepee. Meeca saavaro, te oncameetsateji meeca iravitantearo.

³ Ari yacanaqueri:

—Tempa pineanatapinivetaro Sanquenarentsi quenquetsatacotiriri Iravirini. Aajeivetacarini peerani itashe, aisati aajeivetacarini maaroni oijajeitiriri. ⁴ Ari iqueapaaque ivancoqui Tasorentsi, icantapaaqueri yora saserote: “Aajeitaquena notashe”. Ari otimaveta anta tanta yoashiyeetanariri Tasorentsi. Te oshinetanteji iroajeitearo ashaincapée, apaniro irinti yoaro saserote. Iro cantaincha icavintsaajeitavaqueri, te incoyeji iroashinoncayeri, irootaque ipajeitancariri Iravirini, aisati itsipajeitari. Yoajeitaca. Meeca te pincanteji: “Te oncameetsateji yantiniri Iravirini”, ari ¿paita picantantari meeca: “Te oncameetsateji yantiri yoca”? ⁵ Aisati isanquenatini Moishishi: “Eiro pantaveetantarotsi saavaro”. Iro cantaincha maaroni saavaro ijatapiniti saserote ivancoqui Tasorentsi, yantaveetapiniti. Te pinquishimenterini, tempa pineacameetsataquero yantayetiri. ⁶ Tempa atiri yanaacojeitaquero ivanco Tasorentsi, ocameetsati ancavintsaajeiteri irinti, eiro avashinoncairitsi. ⁷ Pinequiero, isanquenatini peerani: “Icanti Tasorentsi: ‘Te noncoyeji poapinitenari ovisha, pintaapinitenari; irointiquea nocoasanotaque pincavintsaajeiteri pishaninca’”. Pinquemasanoterome oca icantiri Tasorentsi, eiro picantimentirime yoca aviitirori tirico, te aneeroji irantane. ⁸ Noponeaca narori inuitequi, natiritapaaque. Narotaque nainti cantatsine paitarica antayeteri saavaroqui.

Yoavisacotiri saavaroqui Jesoshi tsiricoipacori.

(Mr. 3.1-6; Ir. 6.6-11)

⁹ Ari novaajeitanaja, noqueajeitapaaquero pancotsi yapatojeitantari. ¹⁰ Itimi anta tsiricoipacori. Ari yora variseopee isampijejitavaqueri Jesoshi:

—¿Ocameetsatimpa poavisacoteri saavaroqui tsiricoipacori?

Icoajeitaque iroavisacoteri saavaroqui, irootaque incantajeitanteari: “Yantaveeniroti Jesoshi saavaroqui, te incameetsateji”. ¹¹ Ari yacanaqueri:

—Pamene, ariorica saavaroqui impariaque omoroqui povishate, tempa paajeri, poisoquijajeri. Ocameetsati picavintsairi. ¹² Tempa atiri yanaacotiri ovisha icameetsatasanoataque. Ocameetsataque ancavintsaajeiteri saavaroqui.

¹³ Impoiji icantiri yora tsiricoipacori:

—Pancotaje.

Ari yacotanaji, cameetsatanaji iraco, omoncarajaro otsipa iraco. ¹⁴ Iro cantaincha quisajeitanaca variseopee. Ijajeitanaji, yoametavacaajeitanaca, icantajeiti:

—¿Jaoca ancanteriri Jesoshi, avacantanteariri?

Oquenquetsatacotaquerini Jesoshi sanquenarentsi peerani.

(Mr. 3.7-12; Ir. 6.17-19)

¹⁵ Iotaque Jesoshi icoajeitaque iroyeri, irootaque yovaantanajari. Ari noi jajeitanaqueri, nocarajeitiri oshequi itsipapee atiri. Itimi oshequi mantsiyatatsiri, iro cantaincha yoavisacotiraqueri maaroni, ¹⁶ impoiji icantajeitaqueri:

—Eiroyea picamantitsi: “Yoavisacotiraqueri Jesoshi”.

¹⁷ Ari itsoteajiro Jesoshi maaroni iquenquetsatacotaqueriniri peerani Isayashi. Jero oca irineane Apa Tasorentsi isanquenatiniri: ¹⁸ “Jeri yoca Quirishito nocoacaaqueri irantenaro maaroni nocoacaaqueri. Oshequi nonintaqueri, oshequi noneacameetsataqueri. Nontianqueneri noshire, quiso oanaqueri, amitacotapiniteri. Incamantajeiteri

itsipapee atiri jaoca noncanteari noameetsatanteariri maaroni. ¹⁹ Eiro icantavacaimentarotsi paitapeerica, eiro iquenquejairitsi itsipapee. Eiro icajemacotapinitiritsi itsipapee. ²⁰ Eiro yoashinoncairitsi oashiretachari. Eiro yamatavitiritsi coatsiri iriotena. Aitaque, incanteani incavintsante, aisati impincatsariventantasanote. ²¹ Iriotaque oavisacojeiterineri itsipapee atiri, te intimeji pashini oavisacojeiterine”. Irootaque icantiri Tasorentsi peerani.

Yora variseopee icantimajeitaquero Ishire Tasorentsi.

(Mr. 3.20-30; Ir. 11.14-23)

²² Impoiji yameetaqueneri Jesoshi neiriri camaari: te irameneji, aisati te irineanateji. Ari yoavisacotajiri: yamenacaajiri aisati ineanatacaaajiri. ²³ Ari yoajeitanaqueri cavaco maaroni neacojeitaqueriri. Isampitavacaajaiteitaca:

—¿Iriompa yoca Quirishito aamaajeitacari?

²⁴ Iro cantaincha icantajeiti variseopee:

—Irio Satanashi, yora ivincatsarite camaari, amitacotiriri itiancajiri iyamaaririnte.

²⁵ Ari iotaque Jesoshi iquenqueshirejeitiri, icantajeitiri:

—Ariorica irimanatavacaajaiteame savicajeitatsiri quipatsiqui, tempa ari impoyereavacaajaiteame. Aisati iquempetaca yora savicajeitatsiri nampitsiqui, ariorica inquisavacaajaiteame, tempa ari intreetareavacaajaiteame. Aisati iquempejeita maaroni atiri, ariorica inquisaqueri ishanincasanori, eiro quiso yoajiritsi. ²⁶ Pamene: irioricame Satanashi amitacotenaneme notianquiri noyamaaririnte, tempa nompoyereavaacaajaiteame. ²⁷ Aisati irioricame amitacotenaneme notianquiri camaari, ¿irisatimpa camaari amitacojeitiriri pishanincaphee iriori yojocantariri camaari? ²⁸ Iro cantaincha irootaque Ishire Tasorentsi amitacotanari notiancantajariri camaari. Tempa irootaque piotanteameri ainiro icarajeitaquempi Tasorentsi, icoaveta impincatsariventajeitempime. ²⁹ Intimerica coatsiri incoshiteri shintsitatsiri, tempa irijivateri irayeri, shepi; iroisoteri, oiso, oiso. Impoiji incoshiteri ivaararo, eiro imatirotsi impiateari yora ashivetarori ivaararo. ³⁰ Yora caari quemisantana, iriotaque quisauenari. Aisati, iquisaquena maaroni caari amitacotana.

Iquenquetsacotaqueri Jesoshi yora cantimajeitirori Ishire Tasorentsi.

(Mr. 3.28-30; Ir. 12.10; 6.43-45)

³¹ Aisati icantiri Jesoshi variseopee:

—Yora Tasorentsi icavintsaajeitiri maaroni caari cameetsajeitatsi aisati maaroni can-timajeivtariri, eiro iquishimentajeitiritsi yantayetiri. Iro cantaincha eiro icavintsaajeitiritsi yora cantimajeitirori Ishire. ³² Noncamantempi: noponeaca nainti inquitequi, natiritapaaque, iro cantaincha incavintsaajeiteri Apa maaroni cantimajeivtanari. Eiro icavintsaajeitiritsi irinti cantimatirori Ishire. Eiro icavintsairitsi meeca, aisati coajica eiro icavintsairitsi, irointi iroasanquetaasanojeiteri. ³³ Ariorica ocameetsati inchato, ocameetsati oitsoqui iroori; terica oncameetsateji inchato, aisati iroori oitsoqui, te oncameetsateji. Ariorica pineero oitsoqui, tempa piotaque ocameetsatirica inchato. ³⁴ Pishiajeitaqueri camaari, te pincameetsajeiteji: tecatsi pincantea poametante cameetsa. Te oncameetsateji piquenqueshirejeitiri, irootaque caari ocameetsatanta picantajeitiri. ³⁵ Irinti cameetsatatsiri shirampari iquenqueshiretapinitiro cameetsayetatsiri, irootaque ocameetsatantari yantayetiri. Yora caari cameetsayetatsi iquenqueshiretapinitiro caari cameetsatatsi, irootaque caari ocameetsatanta yantayetiri. ³⁶ Coajica incantacoventajeitaquempi Tasorentsi: inquenqueshiretacaajempiro maaroni picantajeitiri meeca. ³⁷ Ocameetsajeitirica picantajeitiri, ari irineacameetsatempi, iro cantaincha terica oncameetsayeteji, incantempi: “Ainiro pantayetiri, oshequi pinquematsicatimentearo”.

Irootaque icantiriri Jesoshi variseopee.

Iquenquejaajeitaqueri Jesoshi yora tseencajeitantzatsiri.

(Mr. 8.12; Ir. 11.29-32)

³⁸ Impoiji icantajeivtarri variseopee aisati oametantayetirori Sanquenarentsi:

—Oametanari, nocoaque namenempi pintasonquero paitapeerica, niotantempri avi-rotasperica Quirishito.

³⁹ Yacanaqueri Jesoshi:

—Te pincameetsajeiteji, oshequi pitseencaqueri Tasorentsi, irootaque picantanta-nari. Eiro notasonquimojeitimpitsi piotantenerime. Otimi yantayetiniri Jonashi: pishiretearome ishiacantaquenari, ari pinquemisantaquename. ⁴⁰ Peerani iniaquerini anteari omani, ocarataque mava quitaiteri inaqueri isheitoqui. Aisati narori, nonca-maque, oncarataque mava quitaiteri nonaque narori omoroqui tsompoina. ⁴¹ Coajica incantacoventajeitempi Tasorentsi, incantajeitempi: “Ainiro pantanejei avirorije. Peerani yora ninivesati iquemisantajeitaquerini yora Jonashi, iquenqueshirejeitan-tacari. Avintije, pineajeivetacari Quirishito, oshequi yanaacotasano tiri Jonashi, ipin-catsaritasano tiri inti, iro cantaincha te pinquemisantajeiteriji”. ⁴² Aisati incantajeit-tempi: “Ainiro pantayetiri avirorije. Peerani ora ivincatsaroten savasatini oquemaque oshequi iotaque Saromo, irootaque ojatantacari arejiqui oquemisantantacariri. Jeri isaviquimojeivetimpi avinti anaacotiriri Saromo, iro cantaincha te pimpincatsater-iji”. ⁴³ Noshiacantempiro aisati: oquempevetaca yora camaari itimantacari ishire-qui shirampari, ipeaquero ishire ivanco. Ari yojoqueetiri camaari, yavisacovetaja yora itimantari. Ijataque camaari anta caaraiteriqui, anta opirijateaque. Icoaveta irimaoreeme, iro cantaincha te irimatero. ⁴⁴ Impoiji icantanioti: “Nompianajeta novancoqui noponeacanta”. Ari ipianaja, ineapaaquero opishitaca, ocareniteanaque, ovetsicayetaca isavimentopee, imaamento, maaroni. ⁴⁵ Ari ijatashtanaqueri pashini iamaaririnte, icarati 7. Oshequi yanaacojeitiri icamaaritasanojeiti. Icantiri: “Tsame pisavicajeite novancoqui”. Ari, peerani yashinoncaavetaca capichaji yora itimantari camaari; meeca irampiitaja irashinoncaasanojeitaja catsini. Aisati pinquempejeitea avirorije. Pashinoncaajeivetaca, te piojeiteniji. Meeca pineajeivetacena, iro cantain-cha te pimpincatsajeitenaji, irootaque pampiitaja, pashinoncaasanojeitaja.

Irootaque icantajeitaqueri Jesoshi.

Ishanincajeitacari Jesoshi maaroni quemisantajeitiriri.

(Mr. 3.31-35; Ir. 8.19-21)

⁴⁶ Ari iquenquetsatacacaajeitaquena Jesoshi, aisati yora apatojeitachari anta pancot-siqui. Irosati opocantapaacari iriniro Jesoshi, jeri irirentipee, ocatiapaaca saiteriqui, ocajamacantaqueri. ⁴⁷ Icamanteetaqueri:

—Areetapaaca piniro, jeri parentipee, ocoapaaquempi. Ocoaque onquenquetsata-cayempi.

⁴⁸ Yacanaqueri:

—¿Janicampa ina? ¿Janicampa iyepree?

⁴⁹ Ari ijicojeitaquena, icantiri:

—Jeri yoca noamerepee, iriojeitaque iyepree, aisati iroojeitaque ina. ⁵⁰ Iriotaque noshanicatasanojeitacari maaroni antiniriri Apa Jenoquiniri icoacaajeitaqueriri: no-cantajeitaqueri iye, tsio, jero ina.

13

Iquenquetsatacotaqueri yora panquiveetatsiri.

(Mr. 4.1-9; Ir. 8.4-8)

¹ Irosati isoquijantanaja Jesoshi, ijatanaque otsapijaqui incajare. Noijajeitanaqueri,

² aisati yapatotimentajeitacari oshequi atiri. Ineaquero pitotsi, otsatacota; ari itetapaacaro, isavicapaaque. Ari nocatiaeitaca narori otsapijaqui. ³ Impoiji, oshequi iquenquetsatacacaajeitaquena, ishiacantiri panquiveetatsiri, icanti:

—Ijati panquiveetatsiri yojocaitiro oitsoqui tirico iroanequi. ⁴ Opariaarantapaaque aparopee oitsoqui avotsiqui, impoiji ipocapaaque contsaro, yoitapaacari oitsoqui.

⁵ Otsipapee oitsoqui opariaarantapaaque mapiqui. Te anta ontimasanoteji quipatsi, ari jentsipaite oshiocavetanaca, aisati jentsipaite otsoancavetapaaca. ⁶ Iro cantain-cha te ontimasanoteji ovaritsa. Ijenoquitapaaque catsirincaiteri, oshimpetanaque,

impoiji ocamanaque. ⁷ Pashini pariapaintsi quitotsequishiqui: anaanaquero irointi, oshioaque, ajaanaquero panquirentsi. ⁸ Orari pashinipee oitsoqui opariapaaque quipatsisanoriqui cameetsari. Oquimotanaque, oitsquitanaque. Aparopee timanaintsi oitsoqui ocarataque 100, iro otsipapee ocarataque oitsoqui 60, iro otsipapee ocarataque oitsoqui 30. ⁹ Otimirica piyempita piquemantari, pinquemavaquero oca nocanta-jeitaquempi.

Yoametaqueri Jesoshi iroamerepee ishiacaaventiniriri.

(Mr. 4.10-12; Ir. 8.9-10)

¹⁰ Impoiji notsipajeitanacari pashinipee iroamere, nocantajeitaqueri Jesoshi:

—¿Paita pisiacantantanariri yora itsipapee? Te inquemajeiteroji picantaqueriri.

¹¹ Ari yacanaquena:

—Nocoacaajeitaquempi piojeitanaquero caari iojeiti itsipapee. Nocoaque piojeite jaoca icanta Tasorentsi ipincatsariventajeitimp, iro cantaincha te noncoacayeriji yora itsipapee iriojeitanaque. ¹² Itimirica iovetachari, ari niotacaasanoteri. Iro cantaincha itsipapee, te incoyeji iriote, irootaque caari iotanta irinti; eiro noametiritsi irinti, aisati nompeapitsataqueri iotantavetari. ¹³ Irootaque noshiacantantanariri irioripee, te incoyeji irijojeite. Yamenajeiveta, iro cantaincha tecatsi irinee. Iquemajeivetavacaro iro cantaincha te inquemavaqueroji, te iriotavaqueroji nocantavetacariri. ¹⁴ Aitaque iquenquetsatacotitarini peerani Isayashi, icantini: “Pinquemajeivetea, iro cantaincha eiro piojeitavaquerotsi. Pamenajeivetea, iro cantaincha eiro pineasanojeitirotsi. ¹⁵ Te pincoajeiteji piojeitanaque, irootaque caari piquenqueshireajeitanta. Te pincoyeji pinquemajeite, irootaque povitantacarori piyempita. Te pincoajeiteji pamenasanojeite, irootaque pimatsiocantacari. Te pincoyeji catsini noavisacojeitempi”. Irootaque iquenquetsatacotiriniri peerani Isayashini. ¹⁶ Iro cantaincha pamenajeitanaji avinti, piquemisantajeitajana, irootaque pinquimoshiretasanojeitanteari. ¹⁷ Queario oca noncamantempiri: icoajeiveitani peerani yora quenquetsatacantantsiniri aisati cameetsajeitatsiniri irineerome oca pineajeitaqueri avirori. Icoajeiveitani inquemerome oca piquemajeitaqueri meeca. Iro cantaincha te irineajeitenaji, te inquemajeitenaji.

Irootaque icantaquenari Jesoshi.

Yora Jesoshi yoamejeitaqueri paita ishiacantiniriri.

(Mr. 4.13-20; Ir. 8.11-15)

¹⁸ Ari icantajeitaquena Jesoshi:

—Meeca noamejeitempi oca noshiacantajeitaqueneriri incaranqui. ¹⁹ Ari nocaman-tapinitiri itsipapee jaoca icanta Tasorentsi ipincatsariventanti, iro cantaincha terica inquemero, iquempetacaro oitsoqui pariaintsiri avotsiqui. Ipoqui camaari, yojocacaqueri iquenqueshirevetacaro noneane. ²⁰⁻²¹ Aisati itsipapee iquemavetavacaro nocantave-tacariri, iveshireimentavetacaro, irootaque iquisantacariri ishaninca. Iro cantaincha te iriotasanoteji, te inquemisantasanoteji, irootaque yojocantajarori iquemisantaveta. Ari ishiaquero iriori oitsoqui pariapaintsiri mapiqui. ²² Ijojeiveta itsipapee noamejeivetari, iquemavetaro noneane, iro cantaincha oshequi iquenqueshireyetiro paitapeerica, aisati oshequi iveshireimentaro irovaararo, irootaque caari iquenqueshiretacaro noneane. Te inquemisanteji. Ishiaquero iriori oitsoqui pariapaintsiri quitotseequishiqui. ²³ Iro cantaincha ainiro itsipapee quemisantasanotirori noneane, quemasanotirori. Oshequi iquemisantaquena, iquearioventaquero maaroni nocoacaqueriri. Ishiaquero oitso-qui pariapaintsiri quipatsiqui cameetsari, ora shequianaintsiri oitsoqui: aparopee timayetanaintsiri oitsoqui 100, iro otsipapee otimaque oitsoqui 60, iro otsipapee aisati otimaque oitsoqui 30.

Irootaque icantaquenari.

Iquenquetsatacotiri Jesoshi yora quishiriri panquitirori tirico.

²⁴ Pashini aisati ishiacantaquenari Jesoshi, icantaquena:

—Aitaque icanta ipincatsariventanti Tasorentsi, iquempetacari yora panquitirori oitsoqui tirico. Ocamenteatsaque oitsoqui ipanquitiri. ²⁵ Impoiji tsiteniriqui imai, aisati imaajeiti iratiritepee. Ipocaque tsiteniriqui quisqueriri, yamaquero oitsoqui

tiriconiro. Oshiavetaro tirico, iro cantaincha oquepiati. Ipanquitiro anta ivanquirequi ashitarori iroane, iconoaitiniri tirico. Impoiji ijatanaji. ²⁶ Ari impoiji aisati oshiocanaque tirico, oitsoquitanaque. Aisati oshiocanaque tiriconiro, oconoanacaro. ²⁷ Ineaquero iratiritepee, ijatasitaqueri, icantaqueri: “Tempa ocameetsati oitsoquipee apanquijetiri anta poanequi. ¿Paita oshiocantacari tiriconiro?” ²⁸ Yacanaqueri: “Irioyeata quisakenari panquitaitirori”. Ari isampijeitiri: “¿Picoaquempa nojajeite nontsocayetajero tiriconiro?” ²⁹ Icantiri: “Aitanaque. Pitsocacotirocari tiricosanori. ³⁰ Ocantavacata. Oshiocacoterota meeca. Coajicaquea amenavaquero oitsoquitanaquetsita tirico. Impoijiquea, noncantajeitempi: ‘Pimpesajeitero tiriconiro, paajeitero, pintayero. Impoijiquea paviitero tiricosanori, poajero anta pancotsiqui noquempoyeantaroriqui’ ”.

Irootaque ishiacantajeitaquenari Jesoshi.

Ishiacantiro Jesoshi oitsoqui moshitasa.

(Mr. 4.30-32; Ir. 13.18-19)

³¹ Jero oca pashini ishiacantajeitanari Jesoshi, icanti:

—Aitaque icanta ipincatsariventanti Tasorentsi, ishiacantiro oitsoqui moshitasa ipanquieetiri oantsiqui. ³² Orijaniqui onaveta oitsoquijaniqui, iro cantaincha oshiocanaquerica, antearotanaque, anayetanaquero otsipapee panquiyetachari, aitaque irimencotataquearo tsimeripee ojempequiqui.

Ishiacantiro Jesoshi tapiacaarori tanta.

(Mr. 4.33-34; Ir. 13.20-21)

³³ Jero pashini ishiacantaquenari:

—Aitaque icanta ipincatsariventanti Tasorentsi, iquempevetaro tsinane ovetsiquiro tanta. Aaquero ovane tirico oshequi, aisati oconoiro tapiacaarori capichaji. Oconoasanotiyo, impoiji otapiaquero maaroni.

³⁴ Aitaque icanta Jesoshi, ishiacaaventapinijeitiniri apatotimentajeitariri, iota ishiacantiniri. ³⁵ Imoncarataquero isanquenatiniri peerani yora quenquetsatacantatsiniri: “Icanti Tasorentsi: ‘Oshequi noshiacanteneri atiripee; noncamanteri caari iojeitini peerani’ ”.

³⁶ Impoiji ijatanaque Jesoshi, yojocajeitanajiri yora apatotimentajeitariri, ijatanaque pancotsiqui. Narotaque iroamerepee, noijajeitanaqueri. Nocantaqueri:

—Poametasanotenaro oca pishiacantajeitiniriri yora apatotimentajeitimpiri. ¿Paita oshiacantiri tiriconiro ipanquiyetiri tiricomashiipi?

³⁷ Ari yacanaquena:

—Noponeaca narori inquitequi, natiritapaaque. Naro shiaqueriri panquitirori tirico cameetsari. ³⁸ Ora oantsi oshiacantaquero quipatsi asavicaejitancari. Ora oitsoqui cameetsari oshiacantaqueri pincatsatiriri Tasorentsi. Irointi tiriconiro oshiacantaqueri pincatsatiriri camaari. ³⁹ Yora quisantatsiri, panquitirori tiriconiro, ishiacantaqueri camaari. Ora yaviitaqueri oitsoqui oshiacantaquero ontsoncanteari quipatsi. Yora iratiritepee ishiacantaqueri inampirepee Tasorentsi. ⁴⁰ Pinequero, yapatotacantaquero tiriconiro, itaasanotaquero, pomein. Oca oshiacantaquero nanteri coajica nontsoncantajearori quipatsi. ⁴¹ Nontiancajeiteri oshequi nonampirepee, nampatotacantaquero maaroni caari cameetsajeitatsi; te nonintacayeriji incarajeiteri maaroni pincatsajeitansari. ⁴² Nojocacantajeiteri anta paamariqui: oshequi irashinoncaajeitaquea anta, oshequi inquematsicatearo. ⁴³ Impoiji irishipaquireajeitanaque maaroni cameetsajeitatsiri, inquempejiteari catsirincaiteri. Incarajeiteri Apa anta ipincatsaritinta. Otimirica iyempita atiripee, ocameetsati inquemisantajeitena.

Iquenquetsataquaqueri Jesoshi quirequi imaneetiri.

⁴⁴ Aisati icantaquena Jesoshi:

—Aitaque icanta Tasorentsi ipincatsariventanti, ishiaqueri oshequi quirequi imaneetiri quipatsiqui. Ari ineashitacari quirequi pashini shirampari. Imanaqueri iriori, te incamanteji. Iquenqueshiretaca: “Namananterota quipatsi, nashitanteeariri timatsiri quipatsiqui”. Impoiji ijataque ipimantajeitaquero maaroni yashijeitari iraanteariri

quirequi. Irootaque yamanantantacarori quipatsi itimantari oshequi quirequi. Impoiji iquimoshireventaqueri oshequi quirequi, yoca yamanantacotaqueri. ⁴⁵ Aisati iquem-petaci coatsiri iramanantero marereatatsiri mapi, cameetsatasanotatsiri. ⁴⁶ Ineaquero aparoni, ocameetsatasanotaque, opinatasanotaca. Icoasanotaqueri, irootaque ipiman-tantarori maaroni timimojeitiriri yaantariri quirequi. Impoiji itsoncaqueri iirequite yamanantantarori aparoni mapi cameetsari.

Iquenquetsatacotiro Jesoshi quitsari.

⁴⁷ Aisati icantajeitaquena Jesoshi:

—Pashini aisati noshiacantempiro jaoca icantari Tasorentsi ipincatsariventanti. Oquempetaca iquitsati shirampari incajarequi. Yojocaqueri iitsarite nijaqui, impoiji inoshicacotaqueri shimagetatsiri; icaantanacave, monquire, monquire. Inashiyetaca. ⁴⁸ Ijaacaro quitsariqui, inoshicacotaqueri otsapijaqui. Impoiji isavicaque, icoyeayeta-queri cameetsayetatsiri. Irintiquea yora caari cameetsayetatsi yojocaqueri. ⁴⁹ Aisati onquempetaje ariorica nompocaje. Nontianqueri nonampirepee irinashitacaajeiteari cameetsajeitatsiri aisati caari cameetsajeitatsi. ⁵⁰ Irojocajeiteri caari cameetsajeitatsi anta paamariqui. Oshequi irashinoncaajeitanaquea, inquematsicasanojeitearo paa-mari. ⁵¹ ¿Piquemajeitaquerompa oca nocamantajeitaquemperi?

Nacajeitanaqueri:

—Je, noquemajeitaque.

⁵² Ari icantauena:

—Arriorica inquemisantena yora oametantirori Sanquenarentsi, iriojeitanaqueri os-hequi: tempa meeca iotiro maaroni isanquenayeetiniri peerani: aisati, inquemisan-tenarica, iriotero iroqueratatsiri noamejeitiriri meeca. Iriotanaqueri jaoca icantari Tasorentsi ipincatsariventanti.

Ipianaja Jesoshi Nasaretequi.

(Mr. 6.1-6; Ir. 4.16-30)

⁵³ Ari ivecaraquero Jesoshi ishiacantajeitaquenaro, impoiji ijatanaque, ⁵⁴ ipianaja anta iipatsitequi iponeacanta. Noijajeitanaqueri narori. Ari yoametantapaaque anta yapatojeitanta ashanincapee. Yoajeitanaqueri cavaco maaroni quemajeitavaqueriri, icantajeiti:

—¿Janica oametiriri yoca otimantacari iotantari? ¿Paitaquea matacaqueri itason-cantayeti? ⁵⁵ Tempa iriotaque itomi vetsiquirori inchato. Tempa irootaque iriniro Maria. Tempa iriotaque irirentipee yora Santiago, Jose, Shimo, jeri Jorashi. ⁵⁶ Tempa aisati acarajeitaquero iritsiropee. ¿Paita ipincatsanirotantacari?

⁵⁷ Ari iquisajeitaqueri, itseenajeitaqueri, irootaque icantantariri:

—Timatsi pincatsatiriri quenquetsatirori irineane Tasorentsi, iro cantaincha itseen-caleitiri ishanincasanori.

⁵⁸ Ari oshequi itseenajeitaqueri ishanincasanori, irootaque caari itasoncantayetanta oshequi anta inampisanoriqui.

14

Yora Eroreshi yoacantaqueri Joa, impoiji ijitashitajari itinaanaja, ijitajiri irio Jesoshitajantsiri.
(Mr. 6.14-29; Ir. 9.7-9)

¹ Irosati yora Eroreshi iquemacotaqueri Jesoshi. Yora Eroreshi ipincatsariventajeitiri maaroni carireasati. ² Icantajeitiri ishanincapee:

—Irioyeata Joa Jesoshitajantsiri. Noacantavetacari, iro cantaincha aamaashiteari tinaanajaitatsi ini, irootaque imatantarori itasoncantayeti.

³⁻⁴ Ari chapinqui yora Eroreshi yaapitsataqueri irirenti Jeripe ijina, opajita Eroriashi. Yora Joa icantavetacari: “Te oncameetsateji paapitsateri pirenti ijina”. Irosati yaacan-tantacari, yoiminqueacantaqueri. Yoisoyeetaqueri carenatsaqui. ⁵ Ari icoavetaca iro-a-cantitearime, iro cantaincha oshequi ipincatsajeitaqueri atiri Joa, ioeitiri iquenquet-satacotiri Tasorentsi. Ijivetaca Eroreshi: “Arriorica noacanteri, inquisacojeitanaqueari

atiripee".⁶ Impoiji omoncarataca quitaiteri itimantacari peerani Eroreshi. Yapatojeitaqueri oshequi ishaninca, iquimoshireimentajeitacari. Aisati omaninquetacotimentaqueri oshinto Eroriashi. Oshequi ineacameetsataquero,⁷ irootaque icantantarori:

—Pitarica pincoacotaquenari, aitaque nompaquempiro. Ioti Tasorentsi eiro namatavitimpitsi.

⁸ Ocantiro iniro:

—Pincanteri iroacanteri Joa.

Irosati ocantantariri:

—Nocoaque poacanteri Joa, impoiji pimpacotenaro matitaqui iitoni, iotanteari ina queario icamasanotaque.

⁹ Ari yoashiretanaca Eroreshi. Te incoaveteaji, iro cantaincha iquemajeitaqueri maaroni ishaninca icantaquerori irishintotsori.¹⁰ Irootaque ipesacantantacariri Joa.

¹¹ Impoiji yameetaquenero matitaqui iito Joani. Aavaquero, aanaquenero iniro.¹² Iranti iroamereni yaajeitanaqueri, itijaitiri. Impoiji ijajeitanaque, icamantapaaqueri Jesoshi:

—Yoyeetaqueriyea Joa.

Ijivataquero itasoncaquero Jesoshi tanta, yoshequiaquero.

(Mr. 6.30-44; Ir. 9.10-17; Joa 6.1-15)

¹³ Iquemantacari Jesoshi icamaque Joa, ijatanaque apaniro anta tenta intimeji atiri. Intentajeitanaquena, iro noquenajeitantanacari pitotsi. Iro cantaincha iquemacojeitaqueri atiripee, iponeayetanaca nampitsipeequi, ishiteajeitanaca, yojajeitanaquena.

¹⁴ Ari naatacojeitapaaque, noneajeitapaaqueri oshequi apatojeitainchari. Oshequi icavintsaajeitapaaqueri, yoavisacojeitaqueri mantsiaripee.¹⁵ Ari ishaavijitanaque catsirincaiteri. Nocarajeitaqueri pashini iroamere, nocantajeivetacari:

—Pamene, caraiteitaque aca, aisati ishaavijiteanaque catsirincaiteri. Pintianajeiteri yocapee irijajeite nampitsipeequi iramanantajeite iroyeari.

¹⁶ Yacanaquena:

—¿Paita irantsipetashitanteari irijate? Jentsite, pimpajeiteri avirori iroajeiteari.

¹⁷ Nocantajeitaqueri:

—Te ontameji nompajeiteriri. Jero oca ocarataque tanta apapacoroni. Jerica aisati apite shima.

¹⁸ Icantaquena:

—Pamaquenaro.

Ari nopaqueri.¹⁹ Impoiji icantajeitaqueri:

—Pisavicajeite saveshishiqui.

Ari isavicajeitanaque. Impoiji yaavaquero tanta aisati shima. Ari yamenanaque jenoqui, icantiri iriri:

—Irove, Apa, pipaquinaro oca noyearica.

Impoiji icarajaquero, ipaquinaro. Novaajeitaqueneri yora apatojeitainchari.

²⁰ Yoajeitacaro maaroni, iquemajeitanaca. Impoiji napatojeitajiro timaarantapaajantsiri, nojaayetajiro cantiriqui, ocarataque 12.²¹ Naamaaca ari icarajeiti yora oajeitacarori 5,000 shirampari, aisati tsinaneppee, jeri aisati jananequipee.

Yora Jesoshi yanijatiro incajare, te intsitiaquiteji.

(Mr. 6.45-52; Joa 6.16-21)

²² Impoiji icantajeitaquena:

—Noamerepee, pintejeitanajea pitotsiqui, pijivajeitanajena intatiquero.

Impoiji aisati icantajeitaqueri apatojeitainchari:

—Pijajeitanaje pivancopeequi.

²³ Impoiji ijatanaque apaniro toncaariqui, iquenquetsatacairy iriri. Ari otsitenitanaque, itimi apaniro iriori anta.²⁴ Narojeiquea nainti, noquenacojeitanaque nianquijaqui. Antearo omotoncane, aisati oipiaciontajana tampea.²⁵ Irotajantsi onquitaitetaje noneajeitavaqueri, yanijatapaaquero incajare, te intsitiaquiteji. Te niojeitavajeriji,

²⁶ irootaque notsaroacaajeitantariri, nocajemajeitanaque:

—Jeee. Coraqueve camaarira.

Oshequi notsaroacaajeitacari.²⁷ Iro cantaincha icantajeitapajana:

—Narotaque pocajantsi, piveshireimentajeitavajena, eiro pitsaroacaajeitanatsi.

²⁸ Ari icantiri Petero:

—Avirorica novincatsarite, pincajemena nanijatashitanajempi nijaqui.

²⁹ Ari icantiri:

—Caatequeti.

Irosati imitajantanaca, yanijatanaque anta Jesoshiqui. ³⁰ Iro cantaincha impoiji iquenqueshiretaquero tampea, aisati itsaroanaque. Ineavaitia itsitianaque, icajem-anaque:

—Novincatsarite, paavajena.

³¹ Irosati yacotashitantavajari, yaavajiri. Icantiri:

—Capichaji pishiretaquena, ¿paita pitseencantanari?

³² Ari itetanajaro pitotsi, irosati opeantanaja tampea. ³³ Oshequi nopincatsajeitaqueri, nocantajeitaqueri:

—Queariotaqueteemi, aviro Itomi Tasorents.

Yoavisacojeitiri Jesoshi mantsiyetatsiri anta Jenesaretequi.

(Mr. 6.53-56)

³⁴ Ari nomonteajeitanaja, nareejeitapaaja Jenesaretequi. ³⁵ Yora savicajeitatsiri io-jeitavaqueri Jesoshi, itiancajeitaqueri ishaninca, yamacantajeitaqueri mantsiyetatsiri.

³⁶ Ari yantitapaaqueri iitsaare ocaratapai. Yavisacojeitanaji maaroni antitajeitaqueriri.

15

Icantavacainmentajeitaro paita caari acameetsashirejeitanta.

(Mr. 7.1-23)

¹ Impoiji ipocashijeitiri Jesoshi variseopee aisati oametantirori Sanquenarentsi. Iponeajeitaca iriorijei Jerosarequi. Isampitapaaqueri:

² —Tempa arojeitaque jorio. Amejeivetacaro tequeratsitarica avajeitea, ajivati aquivacotasanotha. Irootaque yoamejeitaqueeri yora peeraniniri. ¿Paita caari iquempejeitanta poamerepee? Yoashinirotaca, te inquivacoteaji.

³ Yacanaqueri:

—Oshequi pimoncaratashiyetacaro icantashiyetacaniri peeraniniri, irootaque caari pimatantaro yoamejeivetimpri Tasorents. ⁴ Tempa icanti irinti: “Pimpincatsateri piri aisati piniro”. Aisati icanti: “Incameta yora cantimatiniriri iriri aisati iriniro”. ⁵ Iro cantaincha aviroripee, picantajeitiri pishaninca: “Pincanteri ashitimpri ‘Nomempempime quirequi, noncavintsayempime, iro cantaincha nojivataque nocantaqueri Tasorents nomperiri iriori’ ”. Poamenirojeitiri eiro icavintsairitsi ashitariri, eiro ipincatsatiritsi.

⁶ Pinequero, poametashinirojeitacari icantashiyetacari pishaninca, te poamejeiteriji irineane Tasorents. ⁷ Pishiacantavetaca piquemisantiri Tasorents, iro cantaincha te pinquemisanteriji. Queario oca iquenquetsatacotimpri peerani Isayashini:

⁸ “Icanti Tasorents: ‘Icantashijeitaca ipincatsataquena, iro cantaincha te irishirejeitenaji. ⁹ Yatsipetashitacaro yapatotimentashitana, te iroametanteroji noneane, irointi yoametantiro irineane iriori’ ”.

¹⁰ Impoiji icajemajeitiri yora apatotimentajeitariri, icantajeitiri:

—Pinquemajeitena, piojeitavaquero oca noncamantempri: ¹¹ ora ayeari, tecatsi oncantero ashire ompeacayearo. Irointiquea oca aneaveetashiyetari, irootaque matirori ashire ompeacayearo.

¹² Impoiji nojatashitiri Jesoshi, nocarajeitiri itsipapee iroamerepee, nocantajeitiri:

—¿Tempa piote iquishimentajeitimpri variseopee oca picantiriri?

¹³ Yacanaquena:

—Coajica intsocajero Apa jenoquiniri maaroni caari ipanquitiri iriori. ¹⁴ Ari inaji yora variseopee: te irioteji, iquempejeitacari caari amenatsi. Oquempetaca icoaque irijate jaocarica, icoaque irancatsatanajeri itsipapee caari amenajeitatsi iriori. Aitaque impariajeitaque omoroqui maaroni, terocn.

¹⁵ Icantiri Petero:

—Te nonquemempiji, poametenaro oca pshiacantiri.

16 Icantiri:

—¿Tequerampa ontine piotantari? **17** ¿Tempa piote paitarica ayeari ojataque asheitoqui, impoiji ashitajero? Tecatsi oncantero ashire. **18** Iro cantaincha pineanatantaro paitarica piquenqueshiretiri: terica oncameetsateji, eiro picameetsashiretitsi. **19** Tempa piojeitiro piquenqueshiretiro caari cameetsatatsi, poanti, painmentaro pijina, pantiro caari pai, picoshiti, pitseeya, picantimatiri pishaninca. **20** Irootaque caari picameetsajeitanta. Iro cantaincha terica pinquivacoteaji, tecatsi oncantero pishire.

Yoavisacotiro Jesoshi oshinto canasato.

(Mr. 7.24-30)

21 Irosati ijatantanacari Jesoshi Tiroqui aisati Shiroqui. Itentajeitanaquena maaroni iroamerepee. **22** Ojatashitaqueri cananasato, caari oni jorio. Ocantiri:

—Novincatsarite, tempa aviro ishanincani pincatsari Iravirini. Nocoaque pincavintsayena, aisati noshinto. Yataanaquero iroori camaari, catsiqueti yoanaquero.

23 Iro cantaincha imajeretanaque, te iranqueroji. Nocantajeivetari narori:

—Pincantajero ojatajeta, oshequi ashereajeitaquee.

24 Icantiro:

—Itiancaquena Apa noncavintsayeri jorioopee.

25 Iro cantaincha opocashitiri, otiyeroashitacari, aiquero ocantatiiri:

—Novincatsarite, pincavintsayena.

26 Icantiro:

—Te oncameetsateji aapitsateri atomi yoari ampanteariri otsiti. Te aviro jorio, ¿paita noncavintsaantempi?

27 Acanaqueri:

—Queario, novincatsarite, oca picantiri. Iro cantaincha, tempa yoaro otsiti iroaritsopequi yora ashitariri.

28 Yacanaqueri:

—Tsinane, cameetsa pishiretaquena. Aitaque nomataquempiro oca picoacotaquenarica.

Irosati avisacotantanaja oshinto.

Yoavisacojeitiri Jesoshi oshequi mantsiaripee anta incajarequi.

(Mr. 7.31-37)

29 Ari yovaanaja aisati Jesoshi, iquenanaque otsapijaqui incajare anta Carireaqu. Impoiji itoncaanaque toncaariqui, isavicapaaque. Noijajeitanaqueri narori, aisati iriori maaroni iroamerepee. **30** Ijatashijeitaqueri oshequi atiripee, yaajeitanaqueneri oshequi mantsiyetatsiri: choritatsiri, caari shevatacha, caari amenatsi, caari neanatatsi, maaroni. Ari yoavisacojeitiri. **31** Ari yoajeitanaqueri cavaco maaroni neajeitaqueriri. Ineajeitajiri ineanataji caari neanaveitachani, ishevajeitanaja caari shevaveitachani, yaniiyetanaji caari aniiveitachani, yamenanaji caari amenaveitachani. Icantajeiti:

—Tempa icameetsataque Tasorentsi, yora pincatsariventajeitiriri maaroni jorioopee.

Yapiitajiro Jesoshi itasoncajiro tanta, yoshequiajiro aisati.

(Mr. 8.1-10)

32 Impoiji icajemajeitaquena Jesoshi, aisati iriori maaroni iroamerepee. Icantajeitaquena:

—Oshequi nocavintsaajeitaqueri maaroni yora apatotimentajeitanari. Ocarataque meeca mava quitaiteri icarajeitaquee: tecatsi meeca iroajeiteari. Oshequi aajeitaqueri itashe meeca. Arriorica nontiancavetajeari meeca, aitaque ajaajeitanaqueri itashe, eiro yaaveajatsi irareejitaja ivancoqui.

33 Nocantajeitaqueri:

—Pamene, caaraiteitaque aca. ¿Jaoca ayerori tanta avacaajeiteariri? Oshequi icarajeiti catsini.

34 Isampitaquena:

—¿Jaoca ocaratiri tanta timatsiri?

Nacanaqueri:

—Ocarataque 7, aisati timatsi shivajaniqui aparopee.

³⁵ Ari icantajeitiri apatojeitainchari:

—Pisavica jeite quipatsiqui.

³⁶ Irosati yaantacaro tanta aisati shivajaniqui. Icantiri iriri:

—Ariove apa, pipa quena noyeari.

Impoiji icarajaquero, ipajeitaquenaro. Naajeitavaquero, impoiji novaajeitaqueneri iriori apatojeitainchari. ³⁷ Yoajeitanaca, iquemajeitanaca. Impoiji napatojeitajiro timaarantapaajantsiri, nojaajiro cantiriqui ocarataji 7. ³⁸ Icarajeiti oajeitainchari 4,000 shirampari. Aisati oajeitainchari oshequi tsinane aisati jananequipee. ³⁹ Impoiji itiancajeitajiri Jesoshi:

—Meeca pijajeitanaje pivancopeequi.

Irosati notejeitantanaja pitotsiqui, nomonteanaja anta Macataraqui.

16

Icoaveta saserotepee irineerime Jesoshi intasoncanteme.

(Mr. 8.11-13; Ir. 12.54-56)

¹ Impoiji ipocashitaqueri variseopee aisati saroseopee: icoajeivetaca irantacayerime Jesoshi caari cameetsatatsi ontimanteameri inquisantearimeri. Icantavetapaacari:

—Jentsite, namenempi pintasoncante, niotanteari piponeacarica inquitequi.

² Yacanaqueri Jesoshi:

—Pamene, ariorica ishaavijiiteanaji, pinea querorica opotsonaiteanaji, tempa pican-tateiti: “Eiro oparii incani”. ³ Iro cantaincha, oquitaitetamani, pineamaneririca iquieriteamaniro catsirincaiteri, aisati otsiteniiteamani, ari picantajeiti: “Ompariye meeca incani”. Piojeitaque jaoca ocanta inquite, pioti ompariaquerica incani. Iro cantaincha te piojeiteroji maaroni pinea queri meeca quipatsiqui. ⁴ Te pincameetsajeiteji, oshequi pitseencajeitaqueri Tasorentsi: picoajeiveta pineena nontasoncante, iro cantaincha eiro nonijaimprotsi. Apatiro pinea queri coajicani oca ishiacantiri Jonashi.

Irootaque icantaqueri Jesoshi, irosati ijatantanaja.

Ishiacantiniri Jesoshi tapiacaarori itantane variseo aisati saroseo.

(Mr. 8.14-21)

⁵ Ari nareejeitanaca intatiquero, nocarajeitiri itsipapee iroamere. Impoiji noquen-queshireitaqueri tanta: tecatsi namaque. ⁶ Icantajeitaquena Jesoshi:

—Paamayearoya tapiacaarori itantane variseopee aisati saroseopee.

⁷ Ari nosampitavacaaca:

—¿Paita icantanteeri: “Paamayearoya tapiacaarori itantane”? Te ameji tanta, iroitatsi icantantaqueeri.

⁸ Iotashitaca Jesoshi nocantajeitaqueri, icantajeitana:

—Te pishiretasanojeitenaji. ¿Paita picantantari: “Te ameji atantane”? ¿Paita piquen-queshiretacari? ⁹ ¿Tequerampa piojeiteji? Chapinqui otimaveta tanta apapacoronni, iro cantaincha noacaajeitacari 5,000 shirampari. Paajeitajiro timaarantapaajantsiri: ¿jaoca ocaratiri cantiriqui pijaajiri timaarantapaajantsiri?

Nocantiri:

—Ocarati 12.

¹⁰ Aisati impoiji ocarati tanta 7, noacaajeitacari 4,000 shirampari. ¿Jaoca ocaratiri cantiriqui pijaajiri timaarantapaajantsiri?

Nocantiri:

—Ocarati 7.

¹¹ Icantana:

—¿Paita caari piojeitanta meeca? Te nonquenqueshireteroji tanta pipeacotanacari. Queariomphia, paamayearoya tapiacaarori itantane variseopee aisati saroseopee.

¹² Impoiji niojeitanaque te inquenqueshireteroji tapiacaasanotarori tanta, irointi ishiacaventiro maaroni yoametantayetiri variseopee aisati saroseopee. Te irininteji Jesoshi iramatavijeitee yora variseo aisati saroseo.

Icantiri Petero Jesoshi: "Avirotaque Quirishito".

(Mr. 8.27-30; Ir. 9.18-21)

¹³ Impoiji nojajeitanaque anta Sesareaqui: ora nampitsi yovetsicacantaqueri Jiripo. Ari icantaquena Jesoshi:

—Noponeanaca narori inquitequi, natiritapaaque, iro cantaincha ¿paita yaamaa-jeitaquenari atiri, janicana?

¹⁴ Nacanaqueri:

—Icanti aparopee: “Irioyeata Jesoshi Joani, yora vaotisatantaveitachaniri, itinaanaja”. Icanti itsipapee: “Irioyeata Iriashini, yonijantaja”. Icanti itsipapee: “Irioyeata Jerimi-ashini, yonijantaja”. Irio itsipa ijijetimpi aviro quenquetsatacantatsiniri, pitinaanaja.

¹⁵ Ari isampitana:

—Avirojei, ¿paita picantajeitiri avirori?

¹⁶ Yacanaqueri Shimo Petero:

—Avirotaque Quirishito naamaajeitari. Aviro Itomi Tasorentsi, yora Aneasanotatsiri.

¹⁷ Icantiri:

—Queario picantaque, Shimo itomi Jonashi. Te irio oamejeitempirone atiri, irinti Apa jenoquiniri oametimpiori. ¹⁸ Nopajitimpi Petero: ocanti pivajiro “Mapi”. Nocoacaque-mpi poamejeiteri atiri noamejeitaquempi avirori. Eiro imatiritsi camaari iroashinon-kaajeiteri quemisantajeiteroneri pincamanteriri. ¹⁹ Noametempi pitarica irantajeiteri atiri irineanteariri Tasorentsi anta ipincatsaritinta. Eirorica piquemisantacairi atiri aca quipatsiqui, eiro ijatitsi inquitequi; irinti maaroni pinquemisantacaaajeiteri irisavicajeite anta inquitequi.

²⁰ Impoiji aisati icantajeitana:

—Eiroyea picamantiritsi atiri: “Iriotaque Jesoshi Quirishito”.

Yora Jesoshi icamantitacari iroamere incame.

(Mr. 8.31-33; Ir. 9.22)

²¹ Impoiji icamantaquena Jesoshi:

—Irotaintsi nojate Jerosarequi. Anta oshequi iroashinoncaajeitena yora savicacan-tatsiri, yora jivatacaajeitiriri saserotepee, yora oametantirori Sanquenarentsi, maaroni. Aitaque oncanteari iroyeetena, iro cantaincha oncarate mava quitaiteri, ari nonti-naanaje aisati.

²² Iro cantaincha ipiatsatacari Petero:

—Novincatsarite, te oncameetsateji oca picantaqueri. Eiro pashinoncaatsi, eiro picamitsi.

²³ Ari ipitsocashitanacari Jesoshi, icantiri:

—Pijate, piquempetacari Satanashi. ¿Paita pitseencantaquenari? Te pioteroji ico-caaquenari Tasorentsi, irointi piotaque icoacaaquenari atiri.

Icamantiri Jesoshi paita icoacairiri maaroni oijajeitiriri.

(Mr. 8.34-38; 9.1; Ir. 9.23-27)

²⁴ Impoiji icantajeitana:

—Picoasanotirica pinquemisantasanoena, eiro pantanontatsi avisati, irointi pim-pomerentsiventenaro pitarica noncoacaaquempi narori. Ariorica iroashinonca-menteetempiro, iro cantaincha pinquemisantasanoena. ²⁵ Yora coavetachari incavintsayea irisati irashinoncayea; irintquea yora caari cavintsaachane irisati irineeri Tasorentsi irinti. ²⁶ Ariorica intime ashiyetarori maaroni timayetatsiri quipatsiqui, iro cantaincha eirorica ijati inquitequi, tempa yatsipetashitacaro maaroni. Pine-aquero, tecatsi pincantea pimpinateri Tasorentsi irisavicacantempiri anta inampiqui.

²⁷ Noponeaca narori inquitequi, natiritapaaque. Coajica nompiaje aisati aca, nontsi-patapaaqueari nonampirepee, nompincatsaritapaaque, nonquempeteari Apa. Nomp-inajeiteri maaroni quearioventanarori nocoacairiri. Irinti maaroni caari quemisantana, noashinoncaajeiteri. ²⁸ Queario oca noncamantempiri: eirotsitarica picamajeititsi avirori, pineajeitavajena nompocaje, nompincatsaritasanotapaaje.

17

Ipashinitanaque Jesoshi.
(Mr. 9.2-13; Ir. 9.28-36)

¹ Ari 6 nomaajeiti, impoiji yora Jesoshi yaajeitanaqueri Petero, Santiaco, jeri Joa, yora irirenti Santiaco. Yaajeitanaqueri anta antearoqui toncaari. ² Ineajeitavaqueri ipashinitimojeitanacari. Ishipaquireavorotanaque, iquempetanacari catsirincaiteri; aisati iitsaare, oquitamarotasananaque catsini. ³ Imapocaqueri Moishishini, jeri Iriashini: iquenquetsatacacaqueri Jesoshi. ⁴ Yora Petero, icantiri Jesoshi:

—Novincatsarite, aitanaquempaquea nopocajeitaque naroripee aca, noneajeitaque-mpi nainti. Pincoaquerica, novetsiquempiro mava pancotsijaniqui: aparoni pashi, aparoni irashi Moishishi, iro otsipa irashi Iriashi.

⁵ Irosati omapocantapaacari omaaroncapaaca mencori, oshipaquireapaaque iroori. Isavicaque Tasorentsi mencoriqui, icanti:

—Iriotaque yoca notomi nonintasanotiri, oshequi noveshireimentasanotacari. Pin- quemisantajeiteri.

⁶ Iquemajeitancarori iroamerepee oca, itarecajeitanaca, oshequi yoajeitanaqueri cavaco. ⁷ Iro cantaincha ipocashitaqueri Jesoshi, ipamijeitaqueri. Icantiri:

—Pincatiaeitanaje, eiro pitsaroajeititsi.

⁸ Ari yamenajeitanaji: tecatsi irineaje, apaniro inaji Jesoshi. ⁹ Impoiji yoirincajeitanaja, icantajeitiri:

—Eirota picamantitatsi oca pineaqueri. Ariricaquea noncamaque aisati nontinaanaje, irosatiquea pincamantantayetaqueari itsipapee atiri. Tempa noponeaca in-quitequi, natiritapaaque.

¹⁰ Ari nocantajeitaqueri:

—Yora oametantirori Sanquenarentsi icantajeiti: “Irotantsirica impoque Quirishito, irijivatapaaque ironijantapaajea Iriashini”. ¿Paita icantajeitantarori oca?

¹¹ Yacanaquena:

—Queario icantaqueri: “Ironijantapaajea Iriashini, irovetsicajeitaqueri maaroni”.

¹² Noncamantempi: nijantaja inaji Iriashini, iro cantaincha te iriojeitavaqueri atiri. Oshequi yoashinoncaajeitaqueri. Aisati narori, oshequi iroashinoncaajeitena.

¹³ Impoiji niojeitanaque iquenquetsatacotaqueri Joa, yora vaotisatantatsiri.

Yoavisacotiri Jesoshi evancari camanatatsiri.
(Mr. 9.14-29; Ir. 9.37-43)

¹⁴ Ari nareejeitapaaca anta itiminta oshequi atiri yapatojeitaca. Irosati ipocashitanacari Jesoshi shirampari. Itiyeroashitapaacari, icantapaquaqueri:

¹⁵ —Novincatsarite, pincavintsayeri notomi: oshequi icamanatapiniti, oshequi yashinoncaapinitaca. Ipariapiniti paamariqui, itaapinita, pomein: aisati ipiincapiniti ojaqui, pocn, pocn. ¹⁶ Naavetanacanari poamere, nocantavetari: “Poavisacotajenari”, iro cantaincha te irimateriji.

¹⁷ Ari icantajeitana Jesoshi:

—Te pinquemisantajeiteji, te pincameetsajeiteji. ¿Jaoca oncarate nontsipajeitempi piotanteari? Oshequi pitseencajeitaquena.

Impoiji icantiri ashitariri itomi:

—Jentsite, pamaquenari pitomi.

¹⁸ Ari iquisatsataqueri camaari, irosati ijatantanaja. Irosati yavisacotantaja yora evancari. ¹⁹ Impoiji nomanacaacari nosampijeitiri:

—¿Paitaquea caari nomatantaro noavisacojeiteri narori?

²⁰ Icantajeitaquena:

—Iro caari pimatantaro te pinquemisantimateji capichaji. Queario oca noncamantempi: pinquemisanterica capichaji ari pincantero oca toncaari: “Povaanajea anta”, ari ovaanajea. Pinquemisantasanofterica, tecatsi pomerentsitimotempine. ²¹ Iro cantaincha pincoaquerica pojoqueri camaari quempetariri yoca, ocameetsati pinquenquetsatacasanoteri Tasorentsi aisati pintitea.

Yapiitajiniri aisati Jesoshi, icantajiri iroamere: “Irotaintsi noncame”.

(Mr. 9.30-32; Ir. 9.43-45)

²² Ari notsipajeitacari Jesoshi anta Carireaqui: narori aisati maaroni itsipapee iroamere. Icantajeitana:

—Noponeaca narori inquitequi, natiritapaaque. Irotaintsi irayeetena, ²³ iroyeetena. Oncarate mava quitaiteri nontinaanaje aisati.

Noquemajeitantacariri, oshequi noashirejeitanaca.

Ipinataquero Jesoshi yovetsicantayetarori ivanco Tasorentsi.

²⁴ Impoiji nojajeitanaque Caperenaoqui. Ainiro anta itimi yora quempoyeiriri quirequi yoameetsatantayetarori ivanco Tasorentsi. Ari ijatashitiri Petero, isampitiri:

—¿Ipashitapinitarimpa oametimpri iirequite, yoameetsatantayetarori ivanco Tasorentsi?

²⁵ Yacashitanacari:

—Je, ipiri.

Impoiji ipianaja Petero pancotsiqui. Isampitavaqueri Jesoshi:

—Shimo, ¿paita piquenqueshiretiri? Yora pincatsaripee, ¿janica icoacotapinitiri iirequite? ¿Icoacotirimpa ishanincasanori? Terica, ¿irintimpa icoacotiri itsipapee atiri?

²⁶ Yacanaqueri:

—Tempa icoacotiri itsipapee atiri.

Ari icantiri:

—Queario, tecatsi incoacoteri ishanincasanori. Aisati oquempetaca narori, tecatsi incoacotena Apa: tempa noshanincatacari. ²⁷ Iro cantaincha te noninteji ontine inquisimentenari yora quempoyeiriri quirequi. Meeca pijate incajarequi, pimpitasate. Ariorica paaque shaori, pinquirancaqueri, pinequeri ivantequi quirequi. Paavaqueri, impoiji paanajeneri yora quempoyeiriri quirequi, pimpapaaqueri. Iriotaque avinarojei, avirori aisati narori.

18

Iquenquenquetsatacotaqueri Jesoshi pincatsatachaneri anta inquitequi.

(Mr. 9.33-37; Ir. 9.46-48)

¹ Impoiji, nocarajeitaqueri itsipapee iroamere, nojatashijetaqueri Jesoshi, nosampi-jeitiri:

—Anta ipincatsaritinta Tasorentsi, ¿janica intsipateari impincatsaritasanote?

² Ari icajemaqueri jananequi, isatecaqueri nianqui, ³ icantajeitana:

—Queario que oca noncamantempi: pinquenqueshirejeitea, paventajeiteari Tasorentsi; nocoaque pinquempejeiteari yoca jananequi, pishiretasanotena. Eiorica pishiretasanotanatsi, eiro pineirotsi ipincatsaritinta Tasorentsi. ⁴ Te irishemeteti yoca: maaroni quempetearine impincatsaritasanotanaque anta inquitequi. ⁵ Ariorica paacameetsateri quempetariri yoca jananequi, paacameetsajeitena narori. ⁶ Iro cantaincha ariorica pantacayeri caari cameetsatatsi, noasanquetasanotempi. Oncameetsateme pijivateme pincameme eiro pantacantarime caari cameetsatatsi. Tecatsi noasanquetimentemperi. ⁷ Queario intime antayeterone caari cameetsatatsi, iro cantaincha oshequi irashinoncaajeitanaquea yora antacairiri.

Icantiri Jesoshi: “Pantirocari caari cameetsatatsi”.

(Mr. 9.42-48; Ir. 17.1-2)

⁸ Aisati icanti Jesoshi:

—Meeca noshiacantempiro. Ariorica antacayempi paco caari cameetsatatsi, pim-pesajero, pojocajero; aisati pinquempetero piiti antacayempirica caari cameetsafatsi. Ocameetsaveta pinqueapontsoquitapaaaje anta inquitequi, te oncameetsateji ontine apite paco, irootaque pijatanteari Sharincaveniqui, aisati te oncameetsateji ontine apite piiti, irootaque pijatanteari Sharincaveniqui. Ainiro anta paamari caari tsivacanetasatsi: quearioya piquemaatsicatarocari. ⁹ Aisati ariorica antacayempiro poqui caari cameetsatatsi, pinquitsoreero, pojoquero. Ocameetsati pinqueanaraquitaje inquitequi; te oncameetsateji ontine apite poqui, irootaque pijatanteari Sharincaveniqui

pinquematsicatantearori paamari. Pineaquero, te oncameetsateji catsini pantero caari cameetsatatsi.

Icanti Jesoshi: “Eiro pitseenquiritsi jananequipee”.

(Ir. 15.3-7)

¹⁰ Aisati icanti Jesoshi:

—Aisati eiro catsini pitseenquiritsi jananequipee. Ainiro inampirepee Apa quem-poyeaventajeitaqueriri jananequipee, camantacoventapinitiriri. ¹¹ Noponeaca narori inquitequi, natiritapaaque. Nopocashitaqueri jatatsinemeru Sharincaveniqui, noav-isacotantajeariri.

Ishiacantiri Jesoshi ovisha peainchari.

(Ir. 15.4-7)

¹² Aisati icantajeitana Jesoshi:

—Noshiacantempiro aisati. Ariorica intime ashitariri 100 irovishate. Impeaque-arica aparoni, tempa irashitacotanaqueri yora 99 irovishate iramenantajeariri yora peainchari. ¿Paita piquenqueshirejeitiri avirori? ¹³ Irineajeririca aisati, ¿iriompa iriveshireimentea yora apatojeitainchari caari peacha? Te, irintiquea iriveshireimentea yora peavetainchari. Tempa queario. ¹⁴ Aisati iquempeta yora Apa jenoquiniri: te incoyeji irijate Sharincaveniqui aparoni jananequi.

Icantiqueri Jesoshi: “Poameteri pishaninca eiro yantantarotsi caari cameetsatatsi”.

(Ir. 17.3)

¹⁵ Aisati icantaquena Jesoshi:

—Arriorica irantero pishaninca caari cameetsatatsi, irootaque poashiretacotanteariri, ocameetsati pijatashiteri, pincanteri. Apaniro pijatashiteri, eiro picamantiritsi itsipapee. Arriorica inquemisantempi cameetsa irisavicanjeari, ari pinquempetacantajeri pirenti, paacameetsatavacaaja aisati. ¹⁶ Iro cantaincha eirorica iquemisantimpitsi, pijatashitajeri aisati, paanaqueri itsipa piyemisantaririnte: arriorica aparo, arriorica apite. Intsipajitempi iriotanteari paitarica pincanteriri, aisati intsrarojeitapeeri iriori. ¹⁷ Eirorica iquemisantajeitimi, ari pincamantajeiteri maaroni piyemisantaririnte, intsrarojeiterita iriori. Eirorica iquemisantajeitiri, ari pinquempetacaajaeari tseencantatsiri, antirori caari cameetsatatsi; eiro picantajiritsi quemisantatsiri. ¹⁸ Paitarica pincantajeiteriri incanteri aisati iriori Tasorentsi. Pincantajeiteririca ainiro irantane, aisati incanteri iriori Tasorentsi. Pincantajeiteririca te aneroji irantane, aisati inquem-petea iriori Tasorentsi. ¹⁹ Nampiitajempiro: irosatirica pincantajeiteriri avirori Apa jenoquiniri; arriorica pincarajeite apite, ari inquemisantasanojeitempi. ²⁰ Jaocarica iram-patotimentenari apite quemisantanari, arriorica mava, aisati narori noncarajeitaqueri.

Yoamejeitiri Jesoshi: “Pincavintsante”.

²¹ Impoiji yora Petero isampitiri Jesoshi:

—Novincatsarite, inquishenarica noshaninca, tempa ocameetsati noncavintsayeri, eiro nopiataritsi. Iro cantaincha irampiitapinitenarica inquisaqueri, ¿jaoca oncarate noncavintaapiniteri? ¿Ariompa oncarate 7?

²² Yacanaqueri:

—Irosati pincanteani pincavintsayeri: eiro pipiataritsi catsini. ²³ Noshiacantempiro jaoca icanta Tasorentsi ipincatsariventanti. Itimi pincatsari coatsiri impinatajera iratiritepee. ²⁴ Icajemaqueri aparoni, irevitiriri oshequi quirequi catsini. Icantavetari: “Pimpinatajena”. ²⁵ Yacanaqueri: “Tecatsi noncantea nompinatajempi”. Ari icantiri pincatsari itsipapee: “Payeri yoca. Pimpimanteri, pimpimantero ijina, itomipee, irovaararo, maaroni, naantajeari quirequi irevitanari”. ²⁶ Iro cantaincha itiyeroanaca quipatsiqui yora irevitiriri, icantiri: “Eirotsita pipimantanatsi. Coajica nompinatajemp-iro, maaroni”. ²⁷ Ari oshequi icavintsairi ivatorote, icantiri: “Aitanaji, moncarataca, eiro nocoacotajimpitsi”. ²⁸ Ari ijatanaque yora irevantavetachari. Iquenanaque avotsiqui, itonquitavacari irevitiriri iriori capichaji. Icaticavaqueri itsanoqui, icantiri: “Pishintsite pimpinatajena ora pirevitanari”. ²⁹ Ari itiyeroavetanaca iriori, icantave-tari: “Eirotsita picoacotanatsi, coajica nompinatajempis maaroni”. ³⁰ Iro cantaincha

te incavintsayeriji irinti. Yoiminqueacantaqueri, icantiri: “Ariorica pimpinatajena maaroni, noncanteri iroimisoquijajempi”. ³¹ Ari ineantacariri itsipapee, yoashirejetanaca. Ijatashitaqueri ivatorote, icamantaqueri: “Noneaqueri yoranqui picavintsairi, te incavintsanteji irinti. Yoiminqueacantaqueri irevivetariri irinti capichaji”. ³² Ari icajemacantaqueri ivatorote, icantiri: “Picantaquena: ‘Eirota pipimantanatsi’, irootaque nocavintaasasanotantaquempi, nocantimpi: ‘Aitanaji, eiro pipinatajanatsi’. Iro cantaincha te pincameetsateji avinti. ³³ Tempa oncameetsateme pincavintsayerime avirori yora irevivetimpri capichaji, pinquempetename narori nocavintaasaaquempi”. ³⁴ Ari iquisaqueri, yoiminqueacantaqueri, icantiri: “Meecaquea aviroriniro, ariorica pimpinatasanotajena maaroni, ari noimisoquijajempi”. ³⁵ Ari piojeitaquero oca noshiacantimpri. Eirorica picavintsanti, iroasanquetasanotempi Apa jenoquiniri, pinquempeteari yora noquenquetsatacotiri.

19

Ijataque Jesoshi Joreaqui.

¹ Ari iquenquetsatacaana Jesoshi chapinqui anta Carireaqui. Impoiji yovaanaja Joreaqui, anta Joriraniqui intatiquero. Noijatanaqueri narori, aisati itsipapee iroamere.

² Aisati yojajeitaqueri oshequi itsipapee atiri. Aisati oshequi yoavisacojeitaqueri mantsiayetatsiri.

Iquenquetsatacotiri Jesoshi joquirori ijina.

(Mr. 10.1-12; Ir. 16.18)

³ Aisati ijatashitaqueri Jesoshi variseopee. Icoavetaca incomitacayearime, irootaque isampitantavetariri:

—¿Ocamenteatimpa irojocajero shirampari ijina?

⁴ Yacanaqueri:

—Tempa pineanatapinivetero Sanquenarentsi. Peerani yovetsicaqueri Tasorentsi shirampari aisati tsinane, ⁵⁻⁶ aisati icanti: “Ariorica irayero shirampari ijina, intentareanaqueri iriri aisati iriniro, iro cantaincha te noncoacayeriji irojocajero ijina. Nocoaque quiso iroanaquero. Peerani inashiveitani shirampari aisati ijinatsori, iro cantaincha ariorica iraaquero, onquempetaquea apaniro irinaque, eiro yojocavacaajatsi”. Tempa aitaque itsipatacacari Tasorentsi, te oncameetsateji irojocacaajeri atiri.

⁷ Ari isampitiri aisati:

—¿Arimpa? ¿Paita icantantariri Moishishi peerani: “Pisanquenatenero pijina paperi pojocantearori, impoiji ocamenteatati pojocajero”?

⁸ Yacanaqueri:

—Te pincameetsashireteji, irootaque icantantimpri Moishishi ocamenteatati pojocajero pijina. Iro cantaincha te incoacayempi Tasorentsi pojocajero. Icoacaquempi eiro pojocajirotsi catsini. ⁹ Nocantimpi narori, ariorica pojocajero pijina impoiji paaje pashini, aitaque paimentaquearo pijinasanori. Apatiroti ariorica ojivate aimentempi, ocamenteatavi pojocajero.

Iquenquetsatacotiri Jesoshi caari aatsi ijina.

(Mr. 10.1-12)

¹⁰ Impoiji, nocarataqueri pashini iroamere, nocantaqueri Jesoshi:

—Ariompa, jaata eirota naitame nojina narori.

¹¹ Icantauquena:

—Eiro pimajeitirotsi pinquemajeitero oca nocantaquempi. Apaniro inquemero yora yoametasanotiri Tasorentsi. ¹² Timatsi caari matiro iraye ijina: irosati itimapaaque. Timatsi itsipa yaitsoquiyetiri, caari yaanta ijina. Timatsi pashini caari coatsi iraye. Icoaque intimashitea inquearioventeneri Tasorentsi paitapeerica iranteneriri. Pimaterorica pinquemero oca, ari pinquenqueshiretero.

Ipamijeitiri Jesoshi jananequipee.

(Mr. 10.13-16; Ir. 18.15-17)

¹³ Impoiji yamaqueneri Jesoshi jananequipee, icantajeitiri:

—Pimpamiteri notomipee, pincanteri Tasorentsi incavintsaajeitenari.
Nocantajeivetari:

—Eiro pashereiritsi Avincatsarite.

¹⁴ Iro cantaincha icantana:

—Eiro picantiritsi: nocoaque iramajeitenarita jananequipee. Iojeiti iriori ipincat-sajeitaquena. Maaroni quempetariri yoca irisavicafeite anta ipincatsaritinta Tasorentsi.

¹⁵ Irosati ipamijeitantzavacari, icantiri Tasorentsi:

—Apa, nocoaque pincavintsaajeiteri yoca jananequipeeca.
Impoiji ijatanaji.

Jero oca icamantiriri Jesoshi ashitaarantachari.

(Mr. 10.17-27; Ir. 18.18-27)

¹⁶ Impoiji ijatashitaqueri Jesoshi aparoni evancari, isampitapaaqueri:

—Oametantsiri, picameetsataque. ¿Paita cameetsatatsiri nanteri narori nosavican-teari anta inquitequi, noncantaitatiyempani?

¹⁷ Ari icantiri:

—¿Paita picantantanari: “Picameetsataque”? Itimi aparo cameetsatatsiri: yora Tasorentsi. Iro cantaincha pincoaquerica pijate inquitequi, pantajeitero maaroni icantiniri Moishishini.

¹⁸ Icantiri:

—Otimi oshequi icantayetiniri: ¿paita picoaqueri nanteri?

Yacanaqueri:

—Eiro poantitsi, eiro pantirotsi caari pai, eiro picoshititsi, eiro pitseeyacotaritsi pishaninca, ¹⁹ pimpincatsateri piri aisati piniro; oquempetaca pininta avisati, aisati pinintajeiteri itsipapee iriori.

²⁰ Icantaqueri:

—Aitaque nomatitacaro nojananequitapaini, irosati meeca. ¿Paita pashini nanteri?

²¹ Yacanaqueri:

—Picoaquerica pintsoteaquero maaroni, pijate pimpimantero maaroni timimojeitimpipi, pimperi ashinoncachari maaroni ovinaro; impoiji impinatempi Tasorentsi, ontine pivaararo inquitequi. Ariorica pimpimantero maaroni, tsame pojatanaquena narori.

²² Iquemavaitiilo oca, ijatanaque, yoashiretanaca. Otimi oshequi irovaararo, te incoyeji impimantero. ²³ Impoiji icantajeitana Jesoshi:

—Queario oca noncamantempiri: opomerentsitmotari ashitaarantachari irijate anta inquitequi. ²⁴ Nampiitajempiro: tempa opomerentsitaca inqueero cameyo omorojaniqui quitsapi. Iro cantaincha opomerentsitasanotaca catsini irijate ashitaarantachari anta ipincatsaritinta Tasorentsi.

²⁵ Noquemajeitantarori oca noajeitanaquei cavaco. Nosampitiri:

—¿Ariompa? ¿Janica meeca materone iravisacotaje?

²⁶ Yamaquena, icantaquena:

—Eiro imatirotsi atiri, iro cantaincha irinti Tasorentsi irimataquero maaroni. Tecatsi ompomerentsitimoteari irinti.

Te irantsipetashitearoji quemisantsirsir yoijatasanotanaqueri Quirishito.

(Mr. 10.28-31; Ir. 18.28-30)

²⁷ Icantaqueri Petero:

—Pamene, nocoasanojeitaque noijatanaquempi, irootaque nojocajeitancarori maaroni timimojeivetanari. ¿Paita naayetajeri coajicani aisati?

²⁸ Icantajeitana Jesoshi:

—Queario oca noncamantajeitimpipi, tempa noponeaca inquitequi, natiritapaaque: coajica ontine quipatsi iroaquerari. Narori, nosavique anta novincatsarimentoqui, nompincatsatasanotaque. Aisati avirorije, pincarajeitena pimpincatsarjeitanaque, ontine 12 pivincatsarimentopee pisavicafeiteari aviroripee. Pimpincatsariventajeiteri maaroni joriopee. ²⁹ Ariorica pojajetanaquena, tecatsi pantsipejeitea. Ariorica pojocanaquero pivancopee, pirentipee, pitsiropee, piripee, piniropee, pitomipee, piipatsite, paitapeerica. Iro cantaincha ariorica pojatasanotanaquena, te pantsipetashitearoji. Ariorica pojocanaquero aparo, impajempi Tasorentsi 100. Aisati iraajeitanaqueimpi

inampiqui pisaviquimojeitanteeariri iriori, pincantaitatiyempani. ³⁰ Itimajeiti meeca oshequi pincatsarijeitatsiri aca quipatsiqui, iro cantaincha eiro ipincatsarijeitajitsi inquitequi: ariorica aparopee pincatsaritanajantsine. Aisati itimajeiti meeca oshequi ashinoncaajeitachari, iro cantaincha coajica anta inquitequi impincatsaritaarantapaaje.

20

Iquenquetacotaqueri tsameejeitatsiri anta ovamashiqui.

¹ Pashini aisati icanti Jesoshi:

—Noshiacantempiro aisati jaoca icanta Tasorentsi ipincatsariventanti. Itimi ashitarori irovamashite. Tsiteniquera ijatamani nampitsiqui irameneri tsameetenerine. ² Ineapaaqueri coatsiri intsameeteneri, icantiri: “Ariorica pintsameetena meeca, irosati ishaaviniji, nompinajeitempi aparoni quirequi: yora pajitachari tenario”. Icantajeiti: “Ari cameetsa”. Ari icantiri: “Meeca pijajeite, pintsameejeite”. Ijajeitanaque, itsameejeiti. ³ Impoiji ijenoquitapaaque catsirincaiteri, ijatanaji aisati nampitsiqui yora ashitarori irovamashite. Ineapaaqueri itsipapee shirampari, icatiashijeitaca anta, tecatsi irantajeite. ⁴ Icantiri: “Ariorica pintsameejeite anta novamashitequi, cameetsa nompinajeitaquempi”. Icantajeitiri: “Ari”. Irosati ijajeitantanaca, itsameejeiti. ⁵ Aisati tampatica ijati nampitsiqui, itsameetacaajeitiri itsipapee. Aisati ishaavijini itsameetaajeitiri itsipapee aisati. ⁶ Impoiji aisati antoo ishaavijiteanaji, ijatanaji nampitsiqui. Ineapaaqueri caari tsameejeitatsi. Icantajeitiri: “¿Paita patsipetashijeitanci picatiashijeitaca? Te pintsameejeiteji”. ⁷ Yacajeitanaqueri: “Tecatsi tsameetacaajeitenane”. Icantiri: “Pintsameejeite novamashitequi, pincarajeiteri yora jivajeitanaintsiri incaranqui”. ⁸ Ari otsimancaiteanaji, yora ashitarori icantiri quempoyeiniriri iirequite: “Pincajemajeiteri maaroni tsameetacotanarori novamashite, pimpinajeiteri. Pijivateri pimpinajeiteri yora imoitatsiri itsameejeiti. Impoiji pimpinajeiteri jivajeitatsiri itsameejeiti oquitaitetamani”. ⁹ Ari ipocajeiti yora imoitatsiri itsameejeiti: capichaji itsameejeiti iriori, iro cantaincha ipinajeitaqueri aparoni tenario. Aisati imoncaratavacaajeitaca ipinajeitaqueri maaroni. ¹⁰ Impojiniquea ipocajeiti iriori yora intamanarori itsameejeitamani. Ijitalashijeivetaca iranaacojeiteri impinajeiteri. Iro cantaincha ipinajeitaqueri aisati aparoni tenario. ¹¹ Ineatiri iirequite, iquisatsataqueri yora tsameetacairiri, ¹² icantiri: “Yora imoitatsiri itsameejeiti capichaji, iro cantaincha imoncarataquena pipinataquena. Nanti nojatitamanaca oquitaitamani notsameeti, opomerentsivetaca, oshequi nomasavitaque. Oncameetsateme nanaacoterime nayeri quirequi”. ¹³ Ari icantiri: “Noshaninca, te namatavijeitempiji. Tempa nocantimpi oquitaitetamani: ‘Nompinatempi aparoni tenario’; picantajeivetana: ‘Ari, cameetsa’. ¹⁴ Paanajeri meeca piirequite, pijajeitaje pivancoqui. Nopinatashitacari yora imoitatsiri itsameeti aparo tenario imoncaratantaquempi. ¹⁵ Tempa ocameetsati nopashitacari noirequite. ¿Paita caari picoanta noncavintsayeri?” ¹⁶ Aisati noncamantempi: anta inquitequi impincatsarijeitanaque yora caari pincatsarijeitatsi aca quipatsiqui. Yorari irinti pincatsarijeivetachari aca, eiro ipincatsarijeitajitsi anta inquitequi. Aisati icantajeivetari Tasorentsi oshequi atiri: “Pinquemisantena”, iro cantaincha te inquemisantajeiteji, irootaque caari irijajeitantea iriori inquitequi.

Yapiitajiro aisati Jesoshi, icanti: “Nonceme, aisati nontinaanaje”.

(Mr. 10.32-34; Ir. 18.31-34)

¹⁷ Ari impoiji ijatanaque Jesoshi Jerosarequi, itentajeitanaquena narori, aisati itsipapee iroamere. Apaniro icantajeitaquena:

¹⁸ —Meeca ajajeite Jerosarequi. Ari noponeanaca narori inquitequi, natiritapaaque. Irotaintsi irayena jivatacaajeitiriri saserotepee aisati yora oametantirori Sanquenarentsi, incantena: “Te pincameetsateji”. ¹⁹ Incanteri oromasati: “Payeri Jesoshi, poyeri”. Irishirontimentajeitena iriori, impasanajeitena, impajacojeitena coroshiqui, nonceme. Oncarataque mava quitaiteri irootinaajena aisati Apa.

Ojatashitiri Jesoshi ijina Severeo.

(Mr. 10.35-45)

²⁰ Impoiji ojatashitiri Jesoshi ijina Severeo, otsipatari otomipee: yora Santiacos aisati Joa. Otiyeroashitapaacari, ocantapaqueri:

—Nocoaque pincavintsayena.

²¹ Isampitiro:

—¿Paita picoiri?

Ocantiri:

—Coajica, ariorica pimpincatsaritasanotanaque, nocoaque irisaviquimotempi notomipee: aparo irisavique pacosanoriqui, irio itsipa irisavique pampatequi. Pincanteri incarajeitempi impincatsarijeitanaque.

²² Icantiro, aisati icantiri otomipee:

—Te pioteji paitarica picoacotanari. Oshequi nonquematsicayetearo paitapeerica.

¿Tempa pintsaroacayearo pinquematsicatearo avirori?

Yacanaqueri:

—Te nontsaroacayearoji, ari nomataquero narori.

²³ Ari icantiri:

—Queario pinquematsicajeitearo. Iro cantaincha te naro cantatsine janicarica saviquimotenaneri coajica: irio cantatsine Apa, irinti.

²⁴ Noquemajeitantarori oca icantajeitiriri, noquisajeitaqueri yora Santiacos aisati Joa; iro noquisantacariri, icoaveta impincatsariteme. ²⁵ Iro cantaincha icajemajeitaquena Jesoshi, icantajeitaquena:

—Piojeitaque yora ivincatsaritepee itsipapee atiri yamejeitaca iperanajeitacari ishanin capee. ²⁶⁻²⁷ Iro cantaincha eiro píquempejeitaritsi. Eiro picoajeititsi avirori pimperanajeiteari pishanin capee. Pincoaquerica pimpincatsariventante pintacojeiteari pishaninica, eiroquea piperanayetaritsi. Pantajeiteneri pishaninica paitarica incoacaajeitempi. ²⁸ Noponeaca narori inquitequi, natiritapaaque, iro cantaincha te iro nompocantea nomperanajeitempi, irointi nopocanta nintacojeitempi aisati noncamimentajeitempi, maaroni.

Yoavisacotiri Jesoshi apite caari amenatsi.

(Mr. 10.46-52; Ir. 18.35-43)

²⁹ Ari noponeajeitanaca Jericoqui, noquenajeitanaque avotsiqui. Yojajaeitan aquena oshequi atiri. ³⁰ Ari isaviqui otsapiqui avotsi apite caari amenatsi. Icamanteetiri:

—Coraque Jesoshi.

Ari icajemajeitanaque:

—Pincavintsaajeitapeena: tempa aviro ishanincani Iravirini.

³¹ Ari iquisatsataqueri yora apatojeitainchari, icantajeitiri:

—Pimajerete.

Aiquero icajemajeitanaque:

—Novincatsarite, pincavintsayena: tempa aviro naamaajeitacari, aviro ishanincani Iravirini.

³² Icatiapaaca Jesoshi, icantiri:

—¿Paita picoiri nantempiri?

³³ Icantiri:

—Novincatsarite, nocoaque namenaje.

³⁴ Ari icavintsaairi, ipamititaqueri iroqui. Irosati yamenantanaja, aisati yojajaeitan aqueri.

Ijataque Jesoshi Jerosarequi, ipincatsajeitavaqueri atiri.

(Mr. 11.1-11; Ir. 19.28-40; Joa 12.12-19)

¹ Ari nareejitapaaca Vetejajequi, oquempejitaro toncaari ipajiyetiro Orivomashi. Irotapaajantsi Jerosare. Itianquiri Jesoshi apite iroamere, ² icantiri:

—Pijivatanaque anta nampitsiquinta. Pineapaaquero voro, otsatacataca; otsipatacari orijani. Pintasatacoreapeero, pamaquenaro. ³ Irisampittempirica ashaninca: “¿Paita pitsatacoreantarori?” Ari pincanteri: “Irio coirori Avincatsarite”. Ari incantempi: “Paanaqueneri”.

⁴ Iro yantantarori oca, imoncaratiro isanquenatacotaqueriniri peerani yora camantatsiniri pajitachari Sacariashi: ⁵ “Pincamantajeiteri jerosaresati: ‘Coraquetaqueni pivincatsarite. Icameetsataque, te irishemejeji. Inquijacotapeempari vorojaniqui’ ”. ⁶ Ari ijatanaque apite, ineapairo voro, yamaqueneri. ⁷ Apite yamaque: tsinane, aisati orijani. Yoanquetaqueneri imititsaqui quitsaarentsi, impoiji iquijacotacari Jesoshi. ⁸ Ari itimi oshequi atiri anta avotsiqui, yoayetaqueneri iroicoropee anta avotsiqui iraaticcantanaquearori voro. Aisati yoayetaqueneri ojempequijaniqui inchatoshi avotsiqui, iraaticcantanaquearori. Aitaque yametaro yoayetiniri pincatsaripee iroicoropee aisati ojempequijaniqui inchatoshi. ⁹ Ari ijivajeitanaqueri oshequi atiri anta avotsiqui, aisati impoijeitanaqueri oshequi pashini. Icajemajeitanaque:

—Jeriqueti ishanincani Iravirini, tsame ampincatsajeitavaqueri. Itiancaqueri Avincatsar, tsame aneacameetsajeiteri. Tempa inéacameetsatiri iriori Tasorentsi.

¹⁰ Ari yareetapaaca Jerosarequi. Isampitavacaajeitaca maaroni jerosaresati:

—¿Janicampa yoca?

¹¹ Yacajeitaqueri itsipapee:

—Iriotaque Jesoshi, poneachari Nasaretequi, ora timatsiri Carireaqui. Oshequi iquenquetstacotiri Tasorentsi.

Yojocajeitapairi Jesoshi pimantayetatsiri anta ivancoqui Tasorentsi.

(Mr. 11.15-19; Ir. 19.45-48; Joa 2.13-22)

¹² Ari ijataque Jesoshi ivancoqui Tasorentsi, iquisajeitapaaqueri maaroni amanatatsiri aisati pimantatsiri, yojocajeitapaaqueri. Aisati iquempejeitaqueri yora pinaavaaariri iirequite, aisati yora pimantiriri paroma: itatsinquitapaaqueri imesatepee aisati isavimentopee. ¹³ Icantajeitaqueri:

—Ocanti Sanquenarentsi: “Icanti Tasorentsi: ‘Ocameetsati pinquenquetsatacapini-jeiten aca novancoqui’ ”. Iro cantaincha avirojei te pinquenquetsatacapaajeiteriji, irointi picoshitapinijeitiri pocajejitatsiri.

¹⁴ Impoiji ijatashitaqueri oshequi caari amenatsi aisati choriyetatsiri. Yoavisacojeitaqueri. ¹⁵ Ari ineaajeitaqueri yora jivatacaaajeitiriri saserotepee aisati yora oametantirori Sanquenarentsi, iquisajeitanaca. Ocameetsati yantayetiri, aisati icantajeiti atiripee:

—Tsame ampincatsajeiteri ishanincani Iravirini.

Irootaque iquisajeitancariri yoranqui, ¹⁶ aisati icantajeitaqueri Jesoshi:

—¿Piquemaquerompa oca icantajeitiri atiripee? Te oncameetsateji impincatsajeit-empí.

Yacanaqueri:

—Je, noquemaqueri. Tempa pineanatiro Sanquenarentsi cantatsiri: “Impincatsajeit-eri Quirishito yora jananequipee”.

¹⁷ Ari ijatanaji Jesoshi, quiso noanajiri narori, aisati itsipapee iroamere. Nojajeitanaque Vētaniaqui, aitaque nomaaajeitapairi.

Yoamaaquero Jesoshi iyera.

(Mr. 11.12-14, 20-26)

¹⁸ Ari oquitaitetamanaji nopiajeitanaja Jerosarequi. Nianqui itasheanaque Jesoshi.

¹⁹ Ineapaaquero avotsinampiqui iyera. Icoavetapaacaro oitsoqui, te ontameji; irointi iotaca oshi. Icanti:

—Meeca eiro otimajitsi aisati oitsoqui iroajeitajearori atiri.

Irosati oshimpeshitantanaca, ocamaque iyera. ²⁰ Noneantacarori, nosampitiri:

—¿Jaoca ocantanacari oshintsitantanacari oshimpeshitanaque?

²¹ Yacanaquena:

—Queario oca noncamantempiri: ariorica pishiretasanoteari Tasorentsi, pimatero avirori quempetarori pineaqueri meeca. Aisati pincanteririca Apa: “Povaajero oca toncaari, pojoquero anta incajarequi”, aitaque irimatacaquempiro. Iro cantaincha, eiro pitseenquiritsi. ²² Ariorica pishiretasanoteari, irimatacaquempiro paitapeerica pincoacoteriri.

Icantavacaimentari Jesoshi: “¿Janicarica tianquiriri?”

(Mr. 11.27-33; Ir. 20.1-8)

²³ Ari nareejitapaaaja ivancoqui Tasorentsi, yoametantapaaji Jesoshi. Irosati ijatashitantapaacari yora jivatacaaajeitiriri saserotepee aisati yora jivatacantantatsiri, isampijeitiri:

—¿Janicampa tianquimpri pantayetantarori ocapee? ¿Janica nintacaimpuri pipincat-saritancatari?

²⁴ Yacanaqueri:

—Aisati narori, aparo nosampitempi: ariorica pancaquena, noncamantempi janica tiancaquenari. ²⁵ ¿Janicampa tianquiriri Joa ivaotisatantayetariri ashanin capee? ¿Ir-impa tianquiriri Tasorentsi? ¿Irimpa tianquiriri atiri?

Ari icantavacaajeitanaca:

—Ancanteririca: “Irio Tasorentsi tianquiriri”, icanteecari: “¿Paita caari piquemisan-tantari?” ²⁶ Iro cantaincha ariorica ancanteri: “Irio tianquiriri atiri”, iquisajeiteecari atiripee. Tempa ijitashijetari irio Tasorentsi tianquiriri Joa iquenquetsati.

²⁷ Ari icantajeitiri:

—Te nioteji janicarica tianquiriri.

Icantiri:

—Aisati narori, eiro nocamantimpitsi janicarica tiancaquenari nantantarori ocapee.

Ishiacantiniri yora saserotepee ashitachari itomi apite.

²⁸ Aisati icantajeitiri Jesoshi:

—Meeca noshiacantempi ashitachari itomi apite: ¿paita piquenqueshiretacotiriri? Icantiri intarori itimi: “Notiomi, pijate meeca pintsameete anta ovamashiqui”.

²⁹ Yacanaqueri: “Eiro notsameetitsi”, iro cantaincha impoiji ijati itsameeti. ³⁰ Aisati icantiri itsipa itomi: “Notiomi, pijate meeca pintsameete anta ovamashiqui”. Ari icantiri: “Ari, apa, nojataque”. Iro cantaincha te irijateji. ³¹ Meeca nosampitempi: ¿janica antasanotiniriri iriri icoacairiri?

Yacanaqueri:

—Yora jivatatsiri itimi, jatatsiri itsameeti.

Icantiri aisati:

—Queario oca noncamantempi: irijivajeitempi irijajeitanaque inquitequi yora coshitantatsiri aisati ora antapiniyetiriri shirampari caari ai. ³² Ipocapaaque Joa icamantavetimpi jaoca pincantajeameri pincameetsatantajeameri, iro cantaincha te pinquemisantavaqueriji. Iranti iquemisantajeitaqueri yora apatotiniriri oromasati iire-quite, aisati oquemisantaqueri antapiniyetiriri shirampari caari ai. Pineajeivetacari iquemisantajeiti icameetsatantajari, iro cantaincha te pinquenqueshirejeiteaji aviror-jei; te pinquemisantavaqueriji Joa. Irabajite iranti inquitequi: avirorquea avinti, eiro pijajeititsi.

Iquenquetsatacotaqueri Jesoshi amenirori ovamashi.

(Mr. 12.1-12; Ir. 20.9-19)

³³ Jero oca pashini icantiriri Jesoshi:

—Pashini aisati noshiacantempiro: pinquemajeitavaquero. Itimi shirampari pan-quitirori ovamashi. Itantacotiro otsapiqui. Aisati yovetsiquiro intsinaicitantearori oitsoqui, aisati onanteari oja. Yovetsiquiro pancotsi jenoquitatsiri yamenacotantarori savicatsiri ora panquiresnsi. Impoiji icantiri pashini ishaninca: “Meeca nocoi pame-nenaro novamashite, aisati pintsameetacotenaro”. Icantiri: “Ari”. Impoiji ijatanaque yora ashitarori ovamashi pashiniqui quipatsi. ³⁴ Peeranitanaque omoncarataca ot-imanaque oitsoqui. Itiancavetacari iratiritepee: “Pijajeite pincanteri yora amenirori novamashite impacantena nashitari narori”. Ari ijajeivetanaca. ³⁵ Ineajeitavaqueri yora amenirori ovamashi: ipasatavaqueri aparo, tac, tac; pashini yoavaqueri, shemi; irio itsipa ipichavaqueri, pitse, pitse. ³⁶ Ari yora ashitarori, ari itiancavetaca pashini iratiritepee, icarajeiveta oshequi. Iro cantaincha yoashinoncaajeitavaqueri yora amenirori ovamashi.

³⁷ Impoiji iquenqueshiretaque yora ashitarori: “Meeca nontianqueri notomi. Iriitatsi

impincatsatavaque irinti". Ari itiancavetacari iriori. ³⁸ Iro cantaincha ineajeitanta vacariri, icantanirotavacaaca: "Coraquetaqueni yora itomi ashitarori iroamashite. Ariorica incame iriri, iriotaque ashitajearoneri ovamashi. Tsame avavaqueri, impoiji ashijejitajearo arori ovamashi". ³⁹ Ari yaajeitavaqueri, shepi; yaanaqueri anta otsapiqui, yoqueri, shemi. ⁴⁰ Ariorica impocaque yora ashitarori iroamashite, aamaaca, jaoca incantapeeriri yora amenavetanariri iroamashite?

⁴¹ Icantajeitiri:

—Tempa iraanirojeiteri, iroashinoncaaajeiteri, iroajeiteri. Impoiji iramenaje pashinipee cameetsatatsiri, amenajenerine iroamashite, yora paaranterineri irinti oitsoqui irovate.

⁴² Ari icantiri Jesoshi:

—Tempa pineanatiro ocantiri Sanquenarentsi: "Itseencaquero mapi yora vetsquirori pancotsi, iro cantaincha ipeaquero Tasorents otincamiaro pancotsi. Tempa icameetsataque Avincatsarite, tempa avajeitanaquero cavaco maaroni yantajeitiri". ⁴³ Irootaque nocantajeitantsipi: eiro pineajeitiritsi Tasorents impincatsariventajeitempi. Irrintuea irinti impincatsariventajeiteri pashinipee: yora pincatsatasanojeiterineri, quemisantasanojeiterineri. ⁴⁴ Naro shiacantachari mapi nocantaquempi: terica pio-tavaquena, pashinoncayea; terica pinquemisantena, pijate Sharincaveniqui.

⁴⁵ Ari iquemajeitavaqueri yora jivatacaaajeitiriri saserotepee aisati yora variseopee. Ijojeitaque irio iquenquetsatacotaqueri Jesoshi. ⁴⁶ Icoajeivetaca iraacanterime Jesoshi, iro cantaincha itsaroacaajeitacari atiripee. Iotaqueri atiripee queario iquenquetsatacotaqueri Jesoshi Tasorents.

22

Iquenquetsatacotaqueri Jesoshi cajemacantavetariri ishaninca iroajeitea.

¹ Pashini aisati ishiacantiniri Jesoshi, icantajeitiri:

² —Noshiacantempiro jaoca icanta Tasorents ipincatsariventanti. Itimi pincatsari itomi aatsineri ijina. Impoiji icoaque pincatsari iriveshireimentajeiteari ishanincapee itomi. Icajamacantajeivetacari iroacaajeitearime. ³ Itiancavetacari inampirepee, icajemacantajeivetacari ishaninca, iro cantaincha, te impocajeiteji. ⁴ Itiancavetaja aisati, icantiri: "Pincamanteri yora nocajemacantacqueri: 'Vetsicayetaca maaroni. Yoayetaqueri vaca aisati vacajaniqui. Caate piveshireimenteari itomi aatsineri ijina'".

⁵ Iro cantaincha te inquemisantavaqueriji, irointi ijajeitanaque jaocarica. Ijati aparo iroanequi, irio pashini ijati iomparita. ⁶ Irio pashinipee yaajeitavaqueri itiancane, shepi; yoashinoncaaavaqueri, impoiji yoajeitavaqueri, shemi. ⁷ Ari iquisanaca yora pincatsari. Itiancaqueri soraro, yoapaaqueri yora oaqueriri itiancane aisati itaitaqueri ivancopee.

⁸ Impoiji icantiri itsipapee inampirepee: "Vetsicayetaca maaroni, iro cantaincha te incameetsateji yora nocajemacantajeivetacari". ⁹ Pijajeite meeca anta nampsiqui, pincantajeiteri maaroni pineajeitaqueri: "Caate avinti avincatsaritequi, piveshireimenteari itomi aatsineri ijina". ¹⁰ Ari ijajeitanaque, yapatojeitaqueri maaroni ineajeitaqueri: cameetsayetatsiri, caari cameetsayetatsi, maaroni. Ijaajeitapaacaro pancotsi. ¹¹ Ari ijataque yora pincatsari ivetsajetavacari pocajeitaitsiri. Ineaqueri aparoni shirampari caari quitsaatacha cameetsa. ¹² Icantiri: "Noshaninca, nopajeivetaquempi quitsaarentsi cameetsari pinquitsaatimentearimeri notomi. ¿Paita caari piquitsaatantaro?" Te iranqueji. ¹³ Ari icantiri inampire: "Poisoteri iracoqui aisati iitiqui. Pojoqueri anta otsitenitaquenta, anta itiminta iraajeitachari aisati cavintsaaajeitachari". ¹⁴ Pinequiero: icajemacantavetacari oshequi, iro cantaincha te irishequiteji yora icoyeananotaqueri.

Yoametiri Jesoshi variseopee iranteneri pincatsari icoacairiri.

(Mr. 12.13-17; Ir. 20.20-26)

¹⁵ Impoiji ijajeitanaque variseopee, yoametavacaajeitaca:

—Jaoca ancanteriri Jesoshi ancomitacanteariri? Ariorica incomitaquea, irosati anquisacantanteariri.

¹⁶ Impoiji itiancajeitaqueri iroamerepee, itsipajeitacari oijatiriri Eroreshi. Isampijeita-paaqueri Jesoshi:

—Oametanari, niojeiti queario poametantaque. Cameetsa poametantiro irineane Tasorentsi, te pintsaroacayeariji itsipapee atiri, aisati te pimpincatsateriji. ¹⁷ Meeca pincamantena paitarica piquenqueshiretiri: ¿ocameetsatimpam amperi Sesari airequite? ¿Tericampa oncamenteateji?

¹⁸ Iro cantaincha iotaque Jesoshi icoajeivetaca iramatavijeiterime. Isampitiri:

—¿Paita picoantacari pamatavitena? Te pincameetsateji. ¹⁹ Pinijayenari quirequi pipapinitiriri oromasati.

Ari yamaqueneri apamentaquito, ipajiyetiri tenario. ²⁰ Ari isampitiri:

—¿Janicampa ashitarori ishiacantaro oca? ¿Jaoca opajitari ivajiro oca sanquenatain-charica?

²¹ Yacanaqueri:

—Tempa Sesari.

Ari icantiri:

—Panteneri Sesari icoacaimpiri, aisati panteneri Tasorentsi icoacaimpiri iriori.

²² Iquemajeitavaqueri, irosati yoajeitantanacari cavaco. Ari ijajeitanaji.

Icantiri Jesoshi saroseo: “Queario, antinaajeitanaje”.

(Mr. 12.18-27; Ir. 20.27-40)

²³ Impoiji yora saroseopee ipocashitaqueri Jesoshi, ijitashijeitaca iriori eiro atinaa-jeitajatsi, eiro ajajeititsi inquitequi. Ari isampitapaqueri:

²⁴ —Oametanari, icantini peerani Moishishi: “Ontimerica shirampari ijina, iro cantaincha te intimacayeroji itomipee. Impoiji incamaquerica, ocameetsati irajero irirentini ijinani, intimacayero otomi, iro cantaincha irishiacanteri itomini irirentini”.

²⁵ Ari itimi shirampari aisati irirenti, icarajeiti 6. Yaavetajaro ijina, iro cantaincha te intimacayeroji itomi. Impoiji icamaque iriori, torein. Yaavetajaro aisati irirentini, te intimacayeroji aisati, impoiji icamaque. ²⁶ Aisati iquempejeitaca irirentipee, maaroni aajeivetajarori: te intimacayeroji itomipee. ²⁷ Impoiji ocamaque iroori tsinane, torein.

²⁸ Ariorica intinaajeitanaje, ¿janicampa aajeroneri? Pamene, ijinantajeiveitaroni maaroni.

²⁹ Ari yacanaqueri:

—Oshequi picomijeitacaro. Te piojeiteroji Sanquenarentsi, aisati te pioteji ita-sorentsitasanoti Tasorentsi. ³⁰ Ariorica antinaajeitanaje, tecatsi aajantsineri. Maaroni tinaajantsineri inquempejeitajeari inampireepe Tasorentsi: eiro yaajeitapajitsi ijina.

³¹ Intinaajeitanaje maaroni camajeitatsiri, tempa pineanatiro icantimpiri Tasorentsi:

³² “Narotaque Tasorentsi: ipincatsataquena Avarama, ipincatsataquena Isaca, ipincatsataquena Jacovo”. Te incanteji: “Ipincatsaveitanani”, pinequiero, aneatsi meeca inajeiti: irootaque ipincatsajeitantarcariri. Aisati, aneatsi inajeiti, irootaque ipincatsariventanta-riri iriori Tasorentsi.

³³ Noquemajeitantarcarori oca, noajeitanaqueri cavaco, nocantajeiti:

—Tempa cameetsa yoametanti Jesoshi.

Icamantiri Jesoshi paita ocoacaasanoteeri Sanquenarentsi.

(Mr. 12.28-34)

³⁴ Iquemajeitaque variseopee cameetsa yacanaqueri Jesoshi saroseopee, irootaque itsaroacantajeitanacariri iriori irineanatajerai aisati. Ari ipocashitaqueri iriori variseopee Jesoshi. ³⁵ Icoajeivetaca incomitacayearime. Icarajeitiri aparoni oametantirori Sanquenarentsi, isampitiri:

³⁶ —Oametanari, ainiro oshequi oamejeitaquee Sanquenarentsi: ¿paita cameetsa-tasanotatsiri anquemisantajeiteri?

³⁷ Yacanaqueri:

—Iro cameetsatasanotatsiri oca: “Pinintasanoteri catsini Tasorentsi, yora Avincat-sarite: pinquearioventero pinintasanoteri, pincantaitatiyempani”. ³⁸ Irootaque ana-acotantatsiri isanquenajeitiri. ³⁹ Otimi otsipa, quempatarori: “Oquempeta picavintsaaja

avisati, pincavintsaajeiteri pishanincapee". ⁴⁰ Ariorica pimajeitaquero oca, ari pimoncarajeitaquero maaroni isanquenatiniri Moishishi, aisati maaroni isanquenatiniri yora quenquetsatacantatsiniri.

Icantavacimentajeitacari Quirishito: “¿Janica ishanincatacari?”

(Mr. 12.35-37; Ir. 20.41-44)

⁴¹ Ari Jesoshi isampijeitiri yora variseopee apatotimentajeitariri:

—¿Paita piquenqueshiretacotiriri Quirishito? ¿Janica irishanincateari?

⁴² Yacajeitanaqueri:

—Irishanincateari Iravirini.

⁴³⁻⁴⁴ Icantiri:

—Peerani osanquenatacaaqueri Ishire Tasorentsi Iravirini, icantantariri Quirishito: “Novincatsarite”. Tempa piotiro isanquenare: “Yora Tasorentsi icantiri Novincatsarite: ‘Pisavique, notiomni, nacosanoriqui, pincaratena ampincatsariventante. Aitaque pisavique irosati nontsoncajeitanteeariri maaroni quisajeitaquempi’ ”. ¿Paita icantantariri Iravirini: “Novincatsarite”? ⁴⁵ Iriorica Quirishito ivincatsarite Iravirini, ¿paita picanantariri irio ishanincani? Tempa amejeita apincatsajeitiri jivajeiteeri itimi.

⁴⁶ Tecatsi incantajeitea irancanaqueri. Aisati itsaroacaajeitacari itsipapee irisampiterime iriori.

23

Yoamejeitiri Jesoshi atiri jaoca icantari oametantirori Sanquenarentsi aisati variseopee.

(Mr. 12.38-40; Ir. 11.37-54; 20.45-47)

¹ Impoiji icantajeitaqueri Jesoshi apatotimentajeitariri, aisati icantaquena narori, aisati icantajeitaqueri iriori itsipapee iroamere:

² —Yora oametantirori Sanquenarentsi aisati yora variseopee ijitashijeivetaca iquemetacari Moishishi: oshequi iperanatashijeitaquempi. ³ Ocameetsaveta pantayetero paitapeerica icantayetimpri, iro cantaincha eiro pantirotsi yantashiyetari iriori. Icantajeivetimpri: “Cameetsa pintime”, iro cantaincha te intimeji iriori cameetsa. Te irimateroji iriori icantajeivetimpri. ⁴ Oshequi opomerentsitimojeitaquempi pantajeitaquero icantajeitaquempi, iro cantaincha te impomerentsiventearoji iriori.

⁵ Yantashiyetaro paitapeerica pineanteariri, pineacameetsatanteariri. Imavacotacaro irineane Tasorentsi iracoqui aisati yamatseetacotacaro ivancainaqui; antearo oni, pincantajeitanteeariri: “Pineaqueri, quemisantincari ini”. Aisati oshequi yoanencashitacaro itsaare ocaratapai. ⁶ Ariorica yoajeita, icoasanotaque intsipatapiniteari pincatsatatsiri. Aisati anta yapatojeitanta icoasanotaque savicamente cameetsari. ⁷ Icoaque cameetsa pivetsajeiteari anta nampitsiqui, icoaque pincantajeiteri: “Oametanari”. ⁸ Iro cantaincha avinti, eiro piquempetaritsi: eiro picoitsi incanteetempi: “Oametanari”. Iriotaque Tasorentsi oamejeitimpri; avirojei, pimoncaratavacaajeitaca. ⁹ Aca quipatsiqui eiro picantashitaritsi itsipapee: “Apa”. Itimi Piri apaniro anta inquitequi. ¹⁰ Aisati eiro pishinetiritsi incanteetempi: “Novincatsarite”. Itimi pivincatsarite apaniro, yora Quirishito. ¹¹ Pincoquerica pimpincatsaritanaque, pijivate pintacojeiteari itsipapee.

¹² Ariorica pincantajeiteri: “Nompincatsariventempi”, ari pishemetaque catsini, iro cantaincha iroashinoncayempi Tasorentsi. Impeajeri pincatsaritajantsine maaroni caari shemejeitatsi.

Iquenquejairi Jesoshi oametantirori Sanquenarentsi aisati variseopee.

¹³ Icantiri Jesoshi yora oametantirori Sanquenarentsi aisati variseopee:

—Oshequi pamatavitantajeiti, coajica irootaque oshequi pashinoncaajeitanteeari. Eiro pijatitsi anta ipincatsaritinta Tasorentsi, aisati te pincoacayeriji itsipapee irijate iriori. ¹⁴ Oshequi pamatavitantajeiti, coajica irootaque oshequi pashinoncaajeitanteeari. Picoshitaquero camajimentaaro ovanco; pishiacantavetaca piquenquetsatacairy Tasorentsi, pisamaninirotashitacaro, vero, vero, vero. Aitaque iroasanquetasanojeitempi Tasorentsi. ¹⁵ Oshequi pamatavitantajeiti, coajica irootaque oshequi pashinoncaajeitanteeari. Oshequi pipomerentsiventacaacari itsipa atiri pipeantacariri jorio. Impoiji

poametiri yamatavitanti, inquempetantempi irijatanteari Sharincaveniqui. ¹⁶ Oshequi pamatavitanti: piquempetacari caari amenatsi yora acatsatiriri iyamarajaquiririnte. Pashinoncaajeitanaquea. Picantashinirota: “Ariorica ancante: ‘Tempa otimi ivanco Tasorents, piotanteari eiro namatavitimpitsi’, ari ocameetsati amatavitante. Iro cantaincha ariorica ancante: ‘Tempa otimi oro anta ivancoqui Tasorents, piotanteari eiro namatavitimpitsi’, ari eiro amatavitanti”. ¹⁷ ¿Paitasa picantantari? Te pionirojeiteji catsini. Oshequi pineaveetashita. ¿Paita cameetsatasanotatsiri? ¿Irompa oro cameetsatasanotatsiri? ¿Irompa ivanco Tasorents cameetsatasanotatsiri? Tempa irootaque ocameetsatantari oro otimi ivancoqui Tasorents. ¹⁸ Aisati picantashinirojeita: “Ariorica ancante: ‘Tempa otimi atantanariri Tasorents avira, piotanteari eiro namatavitimpitsi’, ari ocameetsati amatavitante. Iro cantaincha ariorica ancante: ‘Tempa itimi avira avaqueneri Tasorents, antaaqueneri, piotanteari eiro namatavitimpitsi’, ari eiro amatavitantsi catsini”. ¹⁹ ¿Paitasa picantantari? Te pionirojeiteji catsini. ¿Paita cameetsatasanotatsiri? ¿Iriompa pivira? ¿Irompa pitaantanariri Tasorents pivira? Tempa irootaque icameetsatantari pivira pitaaqueneri Tasorents. ²⁰⁻²² Pamene, oshequi picanti: “Tempa otimi ataantanariri Tasorents”, “Tempa otimi ivanco Tasorents”, “Tempa otimi inquite”, paitapeerica. Picantashinirotaro, impoiji pijitashiniroveta ocameetsati pamatavitanti. ¿Pijitimpa te intimeji Tasorents? Noncamantempi: itsoteaquero itasorenca maaroni. Ioejito pantajeitiri, iroasanquetimentempiro maaroni pamatavitanti. ²³ Oshequi pamatavitantajeiti, coajica irootaque oshequi pashinoncaajeitanteeari. Pamene, timatsi pimayevetacari. Ariorica paaque piirequite 10, pipaqueri Tasorents aparoni; ariorica paaque 10 oshi pipanquitiri, jero pipavetacari aparoni oshi. Iro cantaincha te pinquenqueshireteroji icoacaasanovetaquempiro Tasorents: icoaveta pintimeme cameetsa, icoaveta pincavintsayerime pishaninca, icoaveta pinquemisanterime. Oncameetsateme pimajeiterome maaroni ocapee, impoiji ariorica paaque paitapeerica oncarate 10, aparoni pimpaqueri Tasorents.

Yovaajiniri, icantajiri aisati:

²⁴ —Te pioteji catsini, iro cantaincha picoajeiveta poamejeiterime itsipapee. Oshequi piquearioventavetacaro pipomerentsiventasanovetacaro caari icoacaasanotimpi Tasorents; iro cantaincha te pinquenqueshiretimateroji capichaji oca icoacaasanovetimpire. ²⁵ Oshequi pamatavitantajeiti, coajica irootaque oshequi pashinoncaajeitanteeari. Piquivasanovetaro piramento otapiiqui, iro cantaincha te pinquierojo osantequi: oshequi oshittaque. Aisati piquempejeita avirori, poameetsantashita ineacameetsajeitantzimpire ashanincaphee, iro cantaincha pishirequi te pincameetsateji catsini: oshequi picoshitapiniti aisati oshequi pinevetaro vaararontsi. ²⁶ Te piojeiteji catsini. Pijivate pinquivasanotero osantequi, impoiji eiro oquipatsitajitsi aisati otapiiqui. Arioricame pincameetsashiretaqueme, irineacameetsajeitempime ashanincaphee. ²⁷ Oshequi pamatavitantajeiti, coajica irootaque oshequi pashinoncaajeitanteeari. Piquempejeitacaro yoanteetariri camatsiri, ipotsotiro quitamarori. Ocameetsavetaca saiteriquica, iro cantaincha tsompoina oshittaque, ojaacaro itonqui camatsiri. ²⁸ Ineacameetsajeivetaro ashanincaphee pantayetiri, iro cantaincha te pincameetsashireteji: oshequi pamatavitanti aisati oshequi pantapinitiro caari cameetsatatsi. ²⁹⁻³⁰ Oshequi pamatavitantajeiti, coajica irootaque oshequi pashinoncaajeitanteeari. Peerani yora pishanincaphee yoajeitaqueri quenquetsajeitironiri irineane Tasorents, yora cameetsatatsiniri. Meeca povetsicajeitiro pancotsipee pinquenqueshirejeitan-teariri yora quenquetsatacantatsiniri. Poanencayetaquero cameetsa. Picantanirojeiti: “Nontimitaqueame nainti peerani, eiro noajeitirime, eiro noquempetarime nainti noshanincani oajeitaqueriniri”. ³¹ Picanti avirori: “Noshanincajecitacari yora peeraniniri”. Queario oca picantanirojeitiri. ³² Aisati piquempejeitacari, avirojeitaque oayeri. Tempa iriojeitaque intacaroniri, meeca aviro vaajeitajirori poantaji. ³³ Piquempejeitacari maranque, te pincameetsajeiteji catsini. ¿Pijijitimpa eiro pija-jeititsi Sharincaveniqui?

Icantajeitaqueri Jesoshi: “Iroasanquetaajeitaquempi Tasorentsi”.
(Ir. 13.34-35)

³⁴ Aisati icantajeitaqueri Jesoshi:

—Nontianquempiri coajica itsipapee quenquetsatacoterineri Tasorentsi, iotasantomiriri, oametanteroneri irineane. Niotaque povaaranteri, pashinipee pimpajacotaanteri, itsipapee pimpasanataaranteri anta papatojeitanta, itsipapee aisati pinquisaaranteri jaocarica irijayetanaqueri. ³⁵ Ainiro pantanejei avirori, picoacaajeitaqueri incama-jeitaque maaroni cameetsatatsiri: yora Averini, maaroni. Aisati yora Sacariashi, yora itomini Verequiashini: iquemisantacaavetacari ashanincani anta ivancoqui Tasorentsi, iro cantaincha yoajeitaqueri. Pintimitaqueame avirori, pamijeitaquerime poajeitaquerime avirori. Pashi poajeitiro poantajeiti. ³⁶ Aitaque iroasanquetimentajeitaquemppiri Tasorentsi maaroni picoacaajeitaqueri incame. ³⁷ Jo, aviro jerosaresati. Oshequi poapinitiri quenquetsatacotiriri Tasorentsi, pipichaavaqueri maaroni itiancayevetimpipi. Oquempeta teapa osaramonquitari orijanipee, ocaavintsairi, nocoaveta nonquempetearome narori, noncavintsaajeitempime. Iro cantaincha te pincoajeiteji. ³⁸ Jero ivanco Tasorentsi pineacameetsajeitaqueri: eiro nopiahitajarotsi aisati. Aisati Apa, eiro ipocashitajirotsi iriori. ³⁹ Eiro pineapinijeitajanatsi aisati. Apanivani pineajeitavajena aisati, pincantajeite: “Icameetsataque Jesoshi, iriotaque Avincatsarite tianquiriri”.

24

Icanti Jesoshi: “Coajica intireetajero ivanco Tasorentsi”.
(Mr. 13.1-4; Ir. 21.5-7)

¹ Ari iponeaca Jesoshi ivancoqui Tasorentsi, irotajantsi irijataje. Ari nojatashitaqueri, nocarajeitaqueri itsipapee iroamere, namenacaajeitaqueri ivanco Tasorentsi aisati otsipapee pancotsi. ² Ari icantauquena:

—Ari pineamempeajeivetacaro meeca oca pancotsipeeca. Queario oca noncamantemppiri: coajica intireetajero maaroni, irovarayeetajero maaroni mapipee.

³ Ari nojajeitanaque toncaariqui ipajieetiro Orivomashi. Isavicapaaque Jesoshi, ari nojatashitaqueri, nosampijeitaqueri:

—Pincamantajeiten: ¿jaoca oncarate intireetantajearori pancotsipee? ¿Paita iotacayenane jaoca oncarate pimpocantajeari? ¿Jaoca oncarate omoncaratantajeari maaroni picantauquenari?

Icantaueri Jesoshi: “Coajica oshequi inquematsicayetearo atiri”.

(Mr. 13.5-8; Ir. 21.8-11)

⁴ Yacanaquena:

—Queariompiya, yamataviyeetimpicari. ⁵ Intime oshequi pocatsine, cantapaatsine: “Narotaque nainti Quirishito”. Iramatavyetapeeri oshequi atiri. ⁶ Pinquemapiniteri incante: “Imanatavacaajeita atiripee anta”. Incante itsipa: “Coajica irimanatavacaajeitea anta”. Iro cantaincha eiro piquenqueshirejeitatsi. Aitaque oncanteari irimanatavacaajeitea, iro cantaincha tequeratsita omoncarateaji maaroni nocantaquemppiri. ⁷ Aitaque oncanteari yora atiri inquisajeitanaqueri itsipapee atiri; intime pashinipee quemajeit-erone itashe, iro cantaincha eiro otimanajitsi iroanajeari; aisati onicapinitea quipatsi; ⁸ iro cantaincha eirotsita iquematsicaatasanotarotsi.

Icantiri Jesoshi: “Oshequi inquisanayeeteri quemisantatsiri”.

(Mr. 13.9-13; Ir. 21.12-14)

⁹ Pashini aisati icantauquena:

—Ariorica iriojeitanaque atiri piquemisantajeitaquena, iroashinoncaapinijeitempi, iroaarantempi, inquisajeitempi maaroni atiri. ¹⁰ Intime oshequi jocayeteroneri iquemisanti, impoiji inquisaqueri quemisantasanotantsiri, iraacantayeteri, paitapeerica. ¹¹ Intime amatavitantatsineri, incantavetea: “Nonquemisantacayempi”, iro cantaincha iramatavijeiteri maaroni quemisantavetavaquearine. ¹² Oshequi irantajeitiero atiri caari cameetsatatsi, oshequi catsini, impoiji irijocajeitajero inintavacaajeitan. ¹³ Iro cantaincha noavisacojeiteri maaroni quearioventanarori nocantaqueriri.

¹⁴ Pijajeitanaque maaroni quipatsiqui, pincamantajeiteri maaroni atiri nocoaque nomp- incatsariventajeiteri; impoijquea omoncaratea maaroni nocantaquempi.

Icanti Jesoshi: “Irashinoncaajeitea coajica joreasati”.

(Mr. 13.14-18; Ir. 21.20-24)

¹⁵ Aisati icamantajeitana Jesoshi:

—Peerani isanquenatini yora Iranieri, yora camantantatsiniri, icantini: “Intime coajica anta ivancoqui Tasorentsi caari cameetsatsatsine, iramparajeitero maaroni”. Tempa piotiro oca noquenquetsatacotiri. Ariorica pineaqueri yoca nocamantacotiri, ¹⁶ aisati pintimerica Joreaqui, pishiajeitanaque toncaariqui. ¹⁷ Ariorica pisavique saiteriqui, eiro pijatapanajantitsi pivancoqui paantapanajantearori pivaararo, irointi pishiasanotanaque. ¹⁸ Aisati pintimerica oantsiqui, eiro pipashitapaintarotsi otsipa piitsaare. ¹⁹ Oshequi ashinoncaajeitanaquea tsinane tsomontetatsineri aisati antsotayerine ojananequite: eiro omatirotsi oshiasanotanaque. ²⁰ Aitaque coajica pishiajeitanaque, iro cantaincha pincanteri Tasorentsi eiro pishiantatsi incaniniqui aisati quitaiteriqui pimaoreajeitanci.

Icanti Jesoshi: “Oshequi catsini irashinoncaajeitea maaroni savicajeitatsineri”.

(Mr. 13.19-23)

²¹ Aisati icanti:

—Aitaque oshequi iroashinoncaajeitempi. Pashinoncaasanojeitanaquea, panaacojeiteri maaroni peeraniniri aisati maaroni timajantsineri coajica. ²² Arioricame osamanitanaqueme iroashinoncaajeitempime, pintsoncajeiteame maaroni; iro cantaincha incavintsaajeiteri Tasorentsi maaroni quemisanterineri incoyeajeiteri, irootaque eiro osamanitanta iroashinoncayeetempi. ²³ Ariorica incanteetempi: “Pamene, jeri yoca Quirishito”, eiro pishiretavacarotsi incantempiri. Aisati, incanteetempirica: “Nijaantapaaja anta Quirishito”, eiro pishiretavacarotsi. ²⁴ Intime oshequi amatavitantatsineri, incante: “Naro Quirishito”, irio itsipa: “Naro quenquetsatacotiriri Tasorentsi”. Oshequi intasoncantayete, iramatavijeiteri oshequi savicajeitatsineri, iro cantaincha eiro imatiritsi yora quemasantasanotatsineri. ²⁵ Piquemaquena nocamantitaquempi jaoca oncanteari coajicani. ²⁶ Incantempirica: “Timatsi Quirishito anta caaraiteriqui”, eiro patsipetashitatsi pijatashitena. Ariorica incantempi: “Ainiro Quirishito anta pancotsiqui tsompoina”, eiro pishiretarotsi. ²⁷ Ari noponeaca narori inquitequi, natiratapaque. Tempa imapocapinitimpi iporequi, porec, impoiji otsoteapaintiro inquitequi: aisati nonquempetapaafea narori, ariorica nompocaje. Nomapocajeitapajempi, iro cantaincha pineajeitavajena, maaroni. ²⁸ Jaocarica icamapinitiri camatsiri, aitaque ipocashitapinitiri tisoni. Aisati oquempetaca, oshequi itseencanti joriopee, irootaque impocashitanteariri oshequi amatavijeiterineri.

Aitaque oncanteari impocantajeari Jesoshi.

(Mr. 13.24-27; Ir. 21.25-28)

²⁹ Aisati icanti Jesoshi:

—Ari oshequi ompomerentsitimojeiteri atiri, maaroni: irashinoncaajeitanaquea. Impoiji intsipaite intsivacanaque catsirincaiteri, aisati yora cashiri; imparajeitanaque impoquiropee, irishevajeitanaquea maaroni inquitesati. ³⁰ Impoiji nonconijatapaafe anta inquitequi, irosati iroashirejtantaqueari maaroni tseencajeitanari. Irineajeitavaquena maaroni atiri nonquenapaaje mencoriqui: nompincatsaritasanotapaque, noshipaquireasanotapaque. ³¹ Nontiotapaque irijojeitanteari maaroni nonampire impocajeitantaapeempari iramatajeitantaapeempariri maaroni quemasantajeitanari, maaroni nocoyeajeitaqueri. Intsoncajeitanaqueri savicajeitatsiri pashinipeequi quipatsi, maaroni.

Ishiacantajeitiniri Jesoshi iyera.

(Mr. 13.28-31; Ir. 21.29-33)

³² Pashini icantajeitaquena Jesoshi:

—Meeca noshiacantempiro iyera: pinquenqueshiretasanotero. Ariorica oshiojampequitanaque, aisati oshitanaje, ari piojeitanaque irotimatabajantsi onquimojantsitaje.

³³ Aisati oquempetaca: ariorica pineajeitavaquero oca nocantaquempi, piojeitanaque irotajantsi nompocaje. ³⁴ Eirotsitarica picamajeiti, ario pineajeitavaquero maaroni oca nocamantaquempi. ³⁵ Ompeanaquea inquite aisati quipatsi, iro cantaincha eiro opeatsi irointi noneane. Omoncaratajea maaroni nocantaquempi.

*Te ayojeiteji jaocarica oncarate impocantajeari Jesoshi.
(Mr. 13.32)*

³⁶ Pashini aisati icantajeitaquena Jesoshi:

—Iro cantaincha tecatsi iotatsine jaocarica oncarate: te irioteji inampirepee Apa, aisati te nioteji narori. Iranti Apa apaniro ioti. ³⁷⁻³⁹ Peerani itimaveitani Noeni, yoapinijeita ishaninca, ishinquitapinijeita, yaapinijeitiro ijina, maaroni. Te inquen-queshirejeiterojo icamantavetariri: “Coraquetaque oonquea”. Impoiji itetacaro pitotsi, yashitacotanaca, tarocn. Impoiji aisati omapocajeitaqueri atiri incani, ooncanaca, itsoncajeitanaca, itsitiajeitaque. Aisati inquempejeitaquea maaroni atiri, ariorica omoncaratapaaquea nompocantajeari narori: eiro iquenqueshirejeitatsi, nomapoca-jeitapaajeri. Impoiji irashinoncaajeitanaquea maaroni tseencajeitatsiri. ⁴⁰ Intimerica apite tsameetatsineri anta oantsiqui: naanajeri aparoni nontsipatanaqueari, irio itsipa eiro naanajiritsi. ⁴¹ Ontime apite tsinane tononqueroneri tirico: naanajero aparoni nontsipatanaquearo, iro otsipa eiro naanajirotsi.

Icantiri Jesoshi iroamere: “Paamaajeitajena”.

(Mr. 13.33-37; Ir. 12.41-48; 21.34-36)

⁴² Aisati icantana:

—Paamaajeitena, pinquenqueshiretapinijeiten: te piojeiteji jaoca oncarate nompocantajeari. Nomapocapaimpicari. ⁴³ Oquempetaca yora ashitarori ivanco icoshiy-eetiri: iroteme irotantsi impoque coshiterineri, irisaquiteme, eiro ishinetirime in-coshiteri, irointi iroimpiavajerime. ⁴⁴ Aisati narori, paamaajeitena: nomapoquimpicari. ⁴⁵ Pinquempejeiteari namparentsi cameetsari, yora iotasanolatsiri. Icantiri nampitariri: “Aviro vetcicapiniteroneri iroajeiteari notomi, pimpapiniteri cameetsa”. ⁴⁶⁻⁴⁷ Ariorica irineaqueri cameetsa yovetsicapinitiro yoari, ari incanteri: “Cameetsa pantayetaquero nocoacayetaquempi. Meeca aviro quempoyeajenarone maaroni timimojeitanari. Cameetsa nompinatemp, nioti eiro pamatavitanaatsi”. Tempa ari inquimoshiretanaque inampire. ⁴⁸ Iro cantaincha intimerica itsipa inampire, caari quemisanterine yora nampitariri. Incante iranti: “Meeca jataque ini nampitanari, eirotsita ipajatsi”. ⁴⁹ Iquisaqueri itsipa namparentsi, icapojapinietiri, ishinquitapinitaca. ⁵⁰ Impoiji imapocapaajiri yora nampitariri: te iraamaajeariji. ⁵¹ Ari yoasanquetapaaqueri, itian-caqueri arejiqui itsipajeitantaempariri yora amatavitantatsiri. Ari anta yoashire-tasanotanaca aisati oshequi icavintsaanaca. Eiro piquempejeitaritsi avinti, irintiquea pinquempejeitea quemisantasanotiriri nampitariri.

25

Iquenquetsatacotiro Jesoshi ora 10 evancaro.

¹ Pashini aisati icamantaquena Jesoshi:

—Meeca noshiacantempiro aisati jaoca icanta Tasorents iipincatsariventanti. Otimi 10 evancaro, coatsiri amenavaqueri ojimetsori impoque. Otsitenitanaque, irosati aantayetacaro otsioro. ² Ari ocarataque evancaro iotasanolaintsiri apapacoroni, aisati ocarataque caari iotatsi iroori apapacoroni. ³ Aavetacaro iroori otsioro, iro cantaincha te ayeji oja orivo. ⁴ Irointi ora iotatsiri, aacotanaquero oja, ontsiotantearori. ⁵ Ari osamanitanaque, tequera impoque. Impoiji aajeitaquero ovochoquine, omaajeitanaque. ⁶ Ari nianquiite oquematii icanteetaquero: “Coraquetaque pijimetsori, pijate pame-najeitavaqueri”. ⁷ Ari otinaajeitanaca, ovetsicajeivetaro otsioro. ⁸ Ocantavetaro caari io-tatsi: “Pimpema narori oja, irotantsi ontsivaque notsioro”. ⁹ Iro cantaincha acanaquero ora quenqueshiretainchari: “Eiro nopimpirotsi, eiro onarotsi oja. Nompempirica, tecatsi nontsiotanaqueari narori. Pijajeite pamanantanontapaintea avirori”. ¹⁰ Ari ojatanaque amanantavetapainta. Jentsipaite yareetapaaca ojimetsori, iqueanaque anta yoajeitanta,

icarajeitaquero ora vetsicajeitainchari, yashitacojeitanaca. ¹¹ Impoiji opiavetaja caari quenqueshireacha, ocantavetapaacari: “Pashitareajenaro narori, noneapajempi”. ¹² Iro cantaincha yacanaquero: “Te niotempiji, janicampirica. Te noncoyeji pimpocashitena aca”. ¹³ Pinquenqueshiretero oca noshiacantimpiri: paamayena, te piojeiteji jaocarica oncarate nompocantajeari.

Ishiacantiniri Jesoshi yora iomparitachari.

(Ir. 19.12-27)

¹⁴ Icantaquena aisati:

—Pashini noshiacantempiro jaoca icanta Tasorentsi ipincatsariti. Oquempetaca ijatanaque ashitaarantachari pashiniqui nampitsi. Ijivataque icajemajeitaqueri maaroni inampirepee, icantaqueri: “Nocoaque pinquempoyeajeitenari noirequite”. ¹⁵ Icantiri aparo: “Jeri S/. 200,000, pinquempoyeajenari”. Irio icantiri itsipa: “Jeri S/. 80,000, pinquempoyeajenari”. Irio itsipa aisati ipaqueri S/. 40,000 inquempoyeanteariri. Irio anaacotantaintsiri ioti yora ipasanotaqueri oshequi. Yora caari ipasanoti, irio caari iotasanolatsi. Ari ipajeitaqueri, impoiji ijatanaque pashiniqui nampitsi. ¹⁶ Yora aasanotiriri quirequi oshequi ijatanaque iomparita. Yoshequiasanotaqueneri iirequite ivatorote, icaratiri S/. 200,000 aisati. ¹⁷ Aisati iomparita yora airiri S/. 80,000. Yoshequiaqueri aisati, yaantacari aisati itsipa S/. 80,000. ¹⁸ Iro cantaincha irinti aavetariri S/. 40,000, yaanajiri quirequi, itijiri omoroqui quipatsi. ¹⁹ Impoiji ipiaja yora ivatorote, icantapairi: “Pimpajeitena meeca noirequite”. ²⁰ Ari ipocaque yora aaqueriri S/. 200,000, yamaqueri aisati itsipapee S/. 200,000. Icantiri: “Jeri quirequi pipaquetenari. Oshequi niomparitaca, noshequiasanotaqueri. Jeri itsipa quirequi, icarati aisati S/. 200,000”. ²¹ Ari icantiri ivatorote: “Cameetsataque, pimatasanotaquero nocoacaaque-mpiri. Chapinqui piquempoyeajanari capichaji, nocoaque meeca pinquempoyeajenari oshequi aisati. Nocoaque oshequi noveshireacayempi”. ²² Impoiji ipocapaaque yora airiri S/. 80,000. Icantiri ivatorote: “Jerica quirequi pipaquetenari. Oshequi niomparitaca, noshequiasanotaqueri. Jeri itsipa quirequi, icarati aisati S/. 80,000”. ²³ Icantiri ivatorote: “Cameetsataque, pimataquenaro nocoacaaquempi. Chapinqui piquempoyeajanari capichaji, nocoaque meeca pinquempoyeajenari aisati oshequi. Oshequi noveshireacayempi”. ²⁴⁻²⁵ Impoitapaaque yora aavetariri S/. 40,000, icantapaaqueri: “Niotaquempi avirori, te pincavintsante, oshequi notsaroacaimpi. Nojiti ariorica noshequiaquerime piirequite, ari paapitsatenarime maaroni, irootaque caari niomparitanta. Notijaqueri piirequite, maaroni. Jerica, noipiajimpiri”. ²⁶ Yacanaqueri: “Te pincameetsateji, oshequi piperataca. Piovetaca nocoavetaca narori irishequianaqueme noirequite. ²⁷ ¿Paita caari pipantari yora itsipa quempoyeapinitiriri quirequi? Pimpajerime iriori, impinataquename, naantajeameri aisati. Aisati iroimpiajenarime maaroni nashisanori”. ²⁸ Ari icantiri itsipa inampire: “Paapitsatageri noirequite, pimpajeri yora ashitasanolatariri meeca S/. 400,000. ²⁹ Nompasanoteri yora ashitaarantachari. Irintiquea yora caari ashitaarantacha, naapitsatageri ora capichaji timimovetariri. ³⁰ Meeca paanajeri yoca anta otsiteniitetinta: te incameetsateji. Nocoaque incarajeiteri maaroni yora oashire-jeitachari aisati ashinoncaajeitachari”.

Icanti Jesoshi: “Coajica noncantacoventajeiteri atiri”.

³¹ Impoiji icantajeitana Jesoshi:

—Noponeaca narori inquitequi, natiritapaaque. Coajica nojatanaje, impoiji nompiaje aisati; oshequi nompincatsaritapaaque, noncarajeitapaaqueri oshequi nonampirepee. Nompincatsaritasanotapaaque, impincatsatasanojeitavaquena maaroni savicajeitatsiri.

³² Nampatojeiteri maaroni atiri, jaocarica isavicajeitiri. Nonquempeteari yora ashitariri ivira inashitacaari: irovishate aisati yora iyavarate; aisati narori nonashitacayeari quemisantajeitanari aisati tseencajeitanari. ³³ Noncantajeiteri maaroni quemisantajeitanari: “Pimpocajeite aca nacosanoriquica”. Irinti tseencajeitanari noncantajeiteri: “Pimpocajeite avirori aca nampatequica”. ³⁴ Impoiji noncamantajeiteri savicajeitatsiri nacosanoriqui: “Caatanaque, maaroni, oshequi iriveshireacaajeitempi Apa maaroni.

Peerani, catsini yovetsicajeitaquempiro pisavica jeitanteari anta inampiqui. Meeca pijajeite pincarajeiteri. Cameetsa impincatsariventajeitempi. ³⁵ Aavetaquenani notashe, pipajeitaquenaro noari. Aavetaquenani nomire, pipajeitaquenaro niraqueri. Te piojeivetenaji, iro cantaincha pineshiloncajeitaquena anta pivancopeequi. ³⁶ Te ontimaveiteani noitsaare, ari pipajeitaquenaro. Nojoquiiveitani, ari pijatashijetana pineajetana. Yoiminqueetaquenani caravosoqui, ari pijatashijetana, picavintsaaajeitaquena". ³⁷ Impoiji incantajeitena yora cameetsajeitatsiri: "¿Arimpa novincatsarite? ¿Jaocampa ocaratiri aantavetaquempiro pitashe nopantaquempiro poari? Te nonquenqueshiretajeroji. ¿Jaocampa ocaratiri aantavetaquempiro pimire nopantaquempiro piraqueri? ³⁸ ¿Jaocampa ocaratiri noneshinoncatantaquempiro novancoqui? ¿Jaocampa ocaratiri nopantaquempiro piitsaare? ³⁹ ¿Jaocampa ocaratiri nojatashitantimpire noquivantimpiri?" ⁴⁰ Ari nancanaqueri: "Queario oca noncamantempiri: ariorica picavintsaaqueri aparoni quemisantanari picavintsaaquena narori". ⁴¹ Impoiji noncanteri yora catiajeitainchari nampatequi: "Tsamempi pijajeitanaque anta Sharincaveniqui, pinquematsicajeitearo anta paamariqui yovetsicajueri Tasorentsi peerani. Yovetsiquiniri camaari aisati maaroni oijajeitiriri. Meeca pincarajeiteri anta, oshequi pashinoncayea. ⁴² Peerani aaquena notashe, iro cantaincha te pimpennaji noyeari. Aaquena nomire, iro cantaincha te pimpennaji nireri. ⁴³ Nojatashivetimpi noneempime, iro cantaincha te pineshiloncatavaquenaji, te poisavicavaquenaji pivancoqui. Te nonquitsaaveiteami, iro cantaincha te pimpennaji noitsaare. Nojoquiitacanai aisati yoiminqueetaquena caravosoqui, iro cantaincha te pijatashitenaji pineena". ⁴⁴ Impoiji irancajeitena: "Novincatsarite, ¿jaocampa ocaratiri noneantavetaquempiro pashinoncaaca, iro cantaincha te noncavintsayempiji?" ⁴⁵ Ari noncanteri: "Queario oca noncamantempiri: te picavintsaaajeiteriji yora quemisantajeitanari, irootaque caari picavintsantana narori". ⁴⁶ Ari iroashinoncaajeiteri Tasorentsi anta Sharincaveniqui, incantaitatiyempani. Irinti cameetsajeitatsiri irisavica jeitaje inquitequi, incantaitatiyempani.

26

Icanti joriopee: "¿Jaoca ancanteriri Jesoshi avacantanteariri?"

(Mr. 14.1-2; Ir. 22.1-2; Joa 11.45-53)

¹ Impoiji icamantajeitaquena Jesoshi, narori aisati itsipapee iroamere:

² —Piojeiti ocarati apitenivani quitaiteri omoncaratantajejeri quitaiteri apajitiri Yavisantaniri. Noponeaca narori inquitequi, natiritapaaque, iro cantaincha coajica impajacotacanteetaquena.

³ Ari yapatojeitaca yora jivatacaajeitiriri saserotepee aisati yora savicacaajeitantsiri. Yapatojeitaca anta ivancoqui yora ivincatsarite saserotepee. Ipajita iriori Caijashi.

⁴ Yoametavacaajeitaca, icanti:

—¿Jaoca ancanteriri Jesoshi aanteariri aisati avacantanteariri? Iro cantaincha te ancoyeji iriojeitanaque atiripee: quisacoventaricari.

⁵ Ari icanti itsipapee:

—Irotantsi quitaiteri Yavisantaniri: inquimoshirejeitanaque atiripee. Eiro amatiritsi ayeri meeca Jesoshi, quisacoventajeitaricari.

Osaitiri vetaniasato Jesoshi.

(Mr. 14.3-9; Joa 12.1-8)

⁶ Impoiji yovaanaja Jesoshi Vetaniaqui, noijajeitanaqueri. Nojajeitanaque maaroni, irosati ivancoqui Shimo, yora patsaaveitachaniri peerani. ⁷ Noajeitapaaca, irosati opocantacari tsinane amacotaquero casancajari. Oshequi ovinaro casancajari. Ari osaitapaaqueri iitoqui. ⁸ Noneajeitantarori oca, noquisajeitanaqueri, nocantajeiti:

—¿Paitaquea aparajataroroi? ⁹ Ompimanterome casancajari, ayeme oshequi quirequi, impoiji oncavintsayerime oshequi ashinoncaajeitachari.

¹⁰ Yacanaquena Jesoshi:

—¿Paita picantimentantarori oca tsinaneca? Ocamenteetsataque oca antaqueri.
11 Incantaitatiyempani incarajeitempi ashinoncaajeitachari, pincantaitatiyempani pin-cavintaapinijeiteri irinti. Irompa nainti, eiro nocantani nosavique aca. **12** Iotaque noncame, irootaque osaitantanari. **13** Queario oca noncamantempiri: coajica pin-quenquetsatacaaajeiteri maaroni savicajeitatsiri quipatsiqui, pintsoeteaquero maaroni nampitsi, aisati pincarajeiteri oshequi itsipapee. Jaocarica pijajeiteri pincamantajeiteri atiripee antaquerica oca tsinane, iriojeitanteari ocavintaquena.

Icantiri Jorashi saserotepee: “Namitacotempi payeri Jesoshi”.

(*Mr. 14.10-11; Ir. 22.3-6*)

14 Impoiji ijatanaque itsipa iroamere, yora pajitachari Jorashi Ishicariote. Ijatashijeitaqueri yora jivatacaajeitiriri saserotepee, **15** icantapaaqueri:

—Arriorica noncamantajeitempi jaoca pincanteriri Jesoshi paanteariri, ¿paita pimpinajeitenari?

Yacanaqueri:

—Nompinatempa quirequi.

Ari ipajetaqueri imentaqui quirequi, icarati 30. Iro yovetsiqueetiri imentaqui perata.

16 Irosati ipiantaja Jorashi, yamenasanotiri Jesoshi iriotanteari jaoca iraacanteriri.

Ivecaratantacarori Jesoshi yoa.

(*Mr. 14.12-21; Ir. 22.7-23; Joa 13.18-30*)

17 Ari moncarataca noajeitantarori tanta caari tapiacha. Nojatashijeitaqueri Jesoshi, nosampijetiri:

—¿Jaoca picoaqueri nojajeiteri novetsicanempirori poyeari pinquenqueshiretan-tearori Yavisantaniri?

18 Icantaquena:

—Pijajeite Jerosarequinta, pincantapaaqueri yora pineapaaqueri: “Icanti oamejeiteeri: ‘Irotantsi nomoncaratero. Nocoaque noyea anta pivancoqui, noncarajeiteri noamerepee’ ”.

19 Ari nojajeitanaque, nocantapaaqueri. Yonijaquenaro ivanco, irosati novetsican-tacaro noajeiteari. **20** Ari tsitenijencaiteanaque ipocapaaque Jesoshi, isaviquimojeita-paaquena, **21** nojeitanaca. Impoiji icantajeitaquena:

—Queario oca noncamantajeitempi: meeca, aca picarajeitica, timatsi aacantenaneri.

22 Ari noashirejeitanaca, irosati nosampijetantarari:

—¿Narompa, novincatsarite, aacantempineri?

Irio itsipapee aisati icantiri:

—¿Narompa, novincatsarite, aacantempineri?

23 Yacajeitaquena:

—Iriotaque yoca quitacotaquenarica meeca nomatitatequi. **24** Noponeaca inquitequi, natiritapaaque. Oquenquetsatacotanani Sanquenarentsi peerani, aitaque nomoncaratero maaroni oquequetsatacotanari. Iro cantaincha oshequi irashinoncaasan-otanaquea yora aacantenaneri. Oncameetsateme eiro itimime iriori, impoiji eiro yashinoncaame.

25 Impoiji isampitiri Jorashi:

—¿Narompa, oametanari, aacantempineri?

Yacanaqueri:

—Je, avirotaque.

Yoamejeitee Jesoshi avajeitimenteari aisati irajeitimenteri.

(*Mr. 14.22-25; Ir. 22.19-20; 1 Cor. 11.23-26*)

26 Ari tequera nontsoncajeitero noyea, ari yaaquero Jesoshi tanta, yajiricaquero, ipasonquitiri Tasorentsi. Impoiji icarajaquero, ipajetaquena, icantajeitaquena:

—Paajeitavaquero, poajeitearo. Tempa narotaque camimentajeitempineri.

27 Impoiji yaaquero aisati nirajeitantarri, ipasonquitajiri Tasorentsi. Ipacojeitaque-naro, icantajeitaquena:

—Pirajeitero, maaroni. ²⁸ Tempa irootaque niraja amparajatimentajeitelpineri, incavintsaajeitantempi Tasorentsi. Ariorica paventajeitena, eiro iquenqueshiretajirotsi Tasorentsi caari cameetsatatsi pantajeitiri. Iroaquera oca nocantajeitaquempi piojeitanteeari jaoca pincantajeari pavisacojeitantajeari: avirorije, aisati maaroni timajeitatsiri. ²⁹ Eiro meeca nirajirotsi aisati ovaja. Ariorica nirajero aisati, noncarajeitemi irajeitero anta ipincatsaritinta Tasorentsi.

Icantiri Jesoshi iroamere: “Meeca tsiteniri pojocajeitanaquena”.

(Mr. 14.26-31; Ir. 22.31-38; Joa 13.36-38)

³⁰ Ari nopampoyeaventajeitiri Tasorentsi, impoiji nojajeitanaque anta toncaariqui pajitachari Orivomashi. ³¹ Nareejitantacari, icamantajeitana Jesoshi:

—Meeca tsiteniri pojocajeitanaquena. Tempa oquenquetsatacojeitimpini Sanquenar Ents: “Incamaquerica shentajeitiriri irovishate, irishiajeitanaque irovishate, irovaraajeitanaquea”. ³² Iro cantaincha ariorica nontinaanaje aisati, nojivajeitanajempi Carireaqui.

³³ Ari icantiri Petero:

—Arioricampa irojocajeitanaquempi irinti yocapee, iro cantaincha nainti, eiro nojouimptsisi.

³⁴ Yacanaqueri:

—Queario oca noncamantempi: meeca tsiteniri, tequerarica irineaje teapa, ari oncarataque mava pincante: “Te nioteriji Jesoshi”.

³⁵ Icantiri:

—Ariorica nontsipatempa ancamajeite, iro cantaincha eiro nocantitsi: “Te nioteriji Jesoshi”.

Aisati nocantajeivetacari narorije, maaroni.

Iquenquetsatacairy Jesoshi Iriri anta Jetsemaniqui.

(Mr. 14.32-42; Ir. 22.39-46)

³⁶ Impoiji ijatanaque Jesoshi Jetsemaniqui, noijajeitanaqueri: narori, aisati maaroni itsipapee iroamere. Icantaquena:

—Pisavicajeitavaquetsita aca: nojate anta nonquenquetsataavaquerita Apa.

³⁷ Ari yaanaqueri Petero, jeri itomipee Severeo apite. Oshequi yoashiretanaca, iquenqueshiretanaca. ³⁸ Impoiji icantiri:

—Oshequi catsini noashiretanaca. Pisavicajeitavaqueta aca, pisaaquiteyea.

³⁹ Ari yavisaque capichaji, impoiji itarecapaacaro quipatsi, iquenquetsatacaaqueri Iriri:

—Apa, te noncoaveteaji nonquemaatsicatearome, iro cantaincha eiro nantirotsi nocoavetari narori, irointi nantempiro picoacaaquenari avinti.

⁴⁰ Impoiji ipiashitacari iroamere, ineajeitapaaqueri imaaajeitaque. Icantiri Petero:

—Tempa pamavetimatero pivochoque, te pimateroji pisaaquitimate capichaji.

⁴¹ Pisaaquite, pincanteri Tasorentsi iramitacotantempi eiro pantantarotsi caari cameetsatatsi. Picoavetaca pimatasanoterome maaroni nocoacaaquempi, iro cantaincha te pimateroji.

⁴² Ari ipianaja, icantajiri aisati:

—Apa, picoacaaasotaquenarorica nonquemaatsicatearo, aitaque cameetsa: nomoncaratero maaroni picoacaaquenari.

⁴³ Ipianaja aisati, ineajeitaqueri iroamerepee, imaaajeitaque: oshequi aajeitaqueri ivochoque. ⁴⁴ Ari ipianaja aisati, iquenquetsatacaaajiri. Irosati yapiitaque icantaqueriri incaranqui. ⁴⁵ Ipiashitajari aisati iroamere, icantiri:

—¿Maajimpimpa aisati? Meeca moncarataca. Noponeaca inquitequi, natiritapaaque; meeca icantacoventaquena, meeca irayena caari cameetsajeitatsi. ⁴⁶ Pintinaajeitanaje, tsame ajataje. Jeri, yocatapaaque aacantenaneri.

Yayeetaqueri Jesoshi.

(Mr. 14.43-52; Ir. 22.47-53; Joa 18.2-11)

⁴⁷ Irosati ipocashitantapaacari Jorashi, yora yoamevetari Jesoshi: ijivajeitapaaqueri oshequi atiri. Yamayetaque ivesamentopee, ivasamentopee, maaroni. Ipocajeita-paaque aisati yora jivatacaa jeitiriri saserotepee aisati itsipapee savicacantajeitatsiri.

⁴⁸ Icamantanirotitacari Jorashi incaranqui:

—Nonintavorotapaaqueri Jesoshi, piojeitanteeariri. Impoijiquea pajiricapeeri avirori.

⁴⁹ Irosati ijatashitantacari, icantapaaqueri:

—¿Ainirompi, oametanari?

Inintavoronirotapaaqueri. ⁵⁰ Icantavaqueri Jesoshi:

—Noshaninca, ¿paita pipocashitiri aca?

Irosati ipocashijkeitantapaacariri maaroni, yaajeitapaaqueri, tapi. ⁵¹ Irosati yaantacaro itsipa iroamere ivesamento iriori, ipesavetacari inampire ivincatsarite saserote. Ipeshitaqueri iyempita. ⁵² Icantiri Jesoshi:

—Poajero pivesamento, ipiatimpicari. Tempa impesheetajeri iriori pesantapinitatsiri.

⁵³ Tempa piote noncoaquericame, noncanterime Apa, impoiji intianquenarime oshequi catsini inampire inquisacoventename. ⁵⁴ Iro cantaincha inquisacoventenaricame, iroav-isacotenericame, eiro nomoncaratirome ocamantacotitananiri Sanquenarentsi.

⁵⁵ Impoiji icantajeitiri yora pocashijeitaqueriri:

—¿Paita pamashitantanari pivesamento aisati pivasamento? ¿Narompa coshinti piquisantanari? Pineapinitana maaroni quitaiteriqui anta ivancoqui Tasorentsi, noametanti; ja, payenaniqueti. ⁵⁶ Iro cantaincha irootaque paajeitantaquenari omocaratantajeari oquenquetsatacotitananiri Sanquenarentsi.

Irosati narori notsaroantanaca, noshianaca. Aisati iquempejeitaca maaroni iroamerepee.

Yayeetanaqueri Jesoshi anta inauenta oametavacainchari.

(Mr. 14.53-65; Ir. 22.54-71; Joa 18.12-24)

⁵⁷ Ari yayeetanaqueri Jesoshi anta ivancoqui Caijashi: yora ivincatsarite saserotepee. Yapatojeitanta yora oametantirori Sanquenarentsi aisati yora savicacantajeitatsiri. ⁵⁸ Ari impoitanaji Petero anta otsapiqui iipatsite saserote. Iqueapaaquero otantacota quipatsi, isaviquimotapaaqueri yora soraropee. Yamenapaaque iritanteari jaocarica incanteeteriri Jesoshi. ⁵⁹ Ari yora oametavacaajeitainchari icoayetanaque tseeyacotearineri Jesoshi, ontimanteari iroacantanteeariri. ⁶⁰ Ari itimi oshequi tseeyacovetacariri, iro cantaincha tecatsi incanteri iroacanteri. Impoiji ipoqui apite pashini tseeyacotapaariri, ⁶¹ icantapaaque iriori:

—Icanti yoca: “Nontireajero ivanco Tasorentsi: oncarate mava quitaiteri novetsicajero aisati”.

⁶² Ari icatianaca ivincatsarite saserote, icantiri Jesoshi:

—¿Tecatsimpa pincanteri avirori? ¿Paita ojita oca icantacojeitaquemperi?

⁶³ Imajeretaque Jesoshi, te iranqueriji. Yapiitajiri aisati:

—Tempa ineaquempi Tasorentsi, yora aneasanotatsiri. Pincamantasano: ¿avirrompa Quirishito, Itomi Tasorentsi?

⁶⁴ Yacanaqueri:

—Narotaque. Noponeaca inquitequi, natiritapaaque. Coajica pineajena nosavique iracosanoriqui Tasorentsisanori, aisati pineavajena nonquenapaaje mencoriqui, nompiaje aca quipatsiqui.

⁶⁵ Irosati iquisantanacari saserote, irosati itsereantanacaro iitsaare. Icanti:

—Pinquemaniroteriqueti: ijitasorentsitacateemi. ¿Paitampa acoantacari intime pashini camantacoterineri? ⁶⁶ ¿Paita piquenqueshirejeitiri avirorije? ¿Jaoca ancanteariri?

Yacajeitanaqueri:

—Cameetsa incame.

⁶⁷ Impoiji iquitiojavorojeitaqueri ivoroqui. Impoiji icapojanajeitaqueri, aisati ipasana-jeitaqueri, tac, tac, tac; ⁶⁸ icantiqueru:

—Quirishito, pincamantena: ¿janica capojanataquemperi?

Icanti Petero: “Te nioteriji Jesoshi”.

(*Mr. 14.66-72; Ir. 22.55-62; Joa 18.15-27*)

⁶⁹ Ainiroquera isaviqui Petero anta saiteriqui. Oneaqueri nampirentsi, ocantiri:
—Aviro oijatiriri Jesoshi, yora carireasati.

⁷⁰ Icanti Petero:

—Te nioteji paitarica picantaquenari.

⁷¹ Ari ijavetanaca anta iqueavetapaaca, otimi pashini nampirentsi, oneavaqueri iroori,
ocanti:

—Jeri yoca oijatiriri Jesoshi, yora nasaretesati.

⁷² Icantanaquero:

—Te nioteriji yoca picantaquenari. Terica ontampaticate oca nocantaquempi, nocoaque iroasanquetenata Tasorentsi.

⁷³ Impoiji capichaji, jeri pashini cantapairiri:

—Queario, avirotaque oijatiriri: noquemaquero pineanataque, avirotaque carireasati.

⁷⁴ Yacanaqueri:

—Teve, te nioteriji yora shirampari picantaqueri. Ioti Tasorentsi queario nocantaquempi. Terica ontampaticate nocantaquempi, nocoaque iroasanquetenata Tasorentsi.

Irosati ineantanaca teapa. ⁷⁵ Ari iquenqueshiretanaquero icantaqueriri Jesoshi: “Eirotsitarica ineoji teapa, oncarate mava pincante: ‘Te nioteriji Jesoshi’ ”. Ari isoquijanaji, iraapaaca jii, jii.

27

Yayeetanaqueri Jesoshi anta Piratoqui.

(*Mr. 15.1; Ir. 22.66-23.1; Joa 18.28-32*)

¹ Ari iroquaera oquitaitetamani, yoametavacaajeitaca yora jivatacaajeitiriri saserote-peee aisati savicacaajeitantsiri:

—Jaoca ancanteriri meeca Jesoshi avacantanteariri?

² Ari yoisoyeetaqueri, yayeetanaqueri anta itiminta pincatsari, yora pajitachari Pirato.

Ishiticaja irisati Jorashi.

(*Yan. 1.18-19*)

³ Yora Jorashi, yora aacantiriri Jesoshi, iotaque yoacantashitacari Jesoshi. Oshequi iquenqueshiretanaca, irosati yoipiantajantanari yora 30 imentaqui: yora peratatatsiri. Icantapaquaqueri yora jivatacaajeitiriri saserote aisati yora savicacaajeitantsiri:

⁴ —Jeriniro piquirette. Te oncameetsateji oca nantaqueri. Tecatsi irante Jesoshi, naacantashitacari.

Yacajeitanaqueri:

—Jm, aviroyea.

⁵ Ari ipishoncanajiniri quirequi anta ivancoqui Tasorentsi, iquenaitaji, ipianaja. Impoiji ijatanaque, ishiticaja irisati. ⁶ Yora jivatacaajeitiriri saserote yaajeitajiri quirequi, icantajeiti:

—Te oncameetsateji aca anquempoyejeri yoca quirequica. Tempa iriotaque apinataqueriri iroacantanteariri.

⁷ Ari yoametavacaajeitaca:

—Jaoca ancantajeriri quirequica?

Icanti:

—Tsame amanantero quipatsi antijanteariri camatsiri caari anepinijeiti.

Iro yamanantaqueri quipatsi ora yaapiniyeetiri quipatsi yovetsiqueetiri coviti.

⁸ Meeca ipajiyetaquero oca quipatsi: “Ivinaro Jesoshi yoacantantacariri”.

⁹ Imoncarataquero isanquenatitacaniri Jeremiashi: “Irayeri 30 imentaqui quirequi, yovetsicanteetariri perata. Iriotaque ivinaro iraacantanteariri Quirishito. Eiro ishequititsi quirequi impinatantaveteariri. ¹⁰ Iriotaque iramanantantearori quipatsi anta yaapiniyeetiri quipatsi yovetsiqueetiri coviti. Iriotaque Avincatsarite canterineri iramanantero quipatsi”. Irootaque isanquenataqueniri Jeremiashini.

Ari icantacoventiri Pirato Jesoshi.

(*Mr. 15.2-15; Ir. 23.2-25; Joa 18.28-19.16*)

¹¹ Ari icatiimotacari Jesoshi yora pincatsari pajitachari Pirato. Isampitiri iriori:
—¿Avirompa ivincatsarite joriopee?

Yacanaqueri:

—Je, narotaque.

¹² Impoiji iquishimanataqueri yora jivatacaajeitiriri saserotepee aisati yora savicacantantatsiri, iro cantaincha tecatsi incante iriori, imajeretashitaca. ¹³ Isampitiri Pirato:
—¿Tempa pinquemerri icantacotaquempi? ¿Paita caari pineanatanta avirori?

¹⁴ Tecatsi incante, te impiateariji. Ari yoanaqueri cavaco pincatsari, oshequi iquenqueshireanaca.

¹⁵ Ari maaroni osarintsi, ariorica omoncarataca Yavisantaniri, yora Pirato isampitapinijeitaqueri savicajeitatsiri: “Timatsi oshequi pishaninca anta caravosoqui. ¿Picoaqueampa noisoquijajempiri aparoni?” Aitaque icantapinita maaroni quitaiteri Yavisantaniri, yoimisoquijapinitiri aparoni, janicarica icoiri joriopee. ¹⁶ Itimi caravosoqui meeca shirampari iquemacojeitaqueri joriopee, ipajita Varavashi: oshequi yoanti irinti. ¹⁷ Ari meeca yapatojeitaca oshequi atiri, irootaque icantajeitancariri:

—Piojeiti nametaca noimisoquijempiri aparoni timatsiri caravosoqui. ¿Janicampa picoajeitiri noimisoquijajempiri meeca? ¿Iriompa Varavashi? Terica pincoyeriji Varavashi, ¿irioricampa picoajeitaque noimpacajempiri Jesoshica, yoca picantiri Quirishito?

¹⁸ Iotaque Pirato oshequi iquisashitacari Jesoshi yora jivatacantantatsiri, te incoacaa-jeiteriji ashanincabee inquemisantajeiteri. Ijivetaca Pirato incantajeiterime ashaninca: “Nocoaque poimpacajenari Jesoshi”. ¹⁹ Aisati incaranqui otianquiniri ijina camantiriri: “Ocanti pijina: ‘Eiro poacantiritsi Jesoshi, icameetsatasanotaque. Nomishitacari incaranqui, oshequi noquenqueshiretacotaqueri’ ”. Irootaque caari icoantaveta iroacanterime. ²⁰ Iro cantaincha yora jivatacaajeitiriri ashanincabee icantajeitiri:

—Pincantajeiteri: “Poimisoquijajeri Varavashi, irinti Jesoshi, pimpajacotacanteri”.

Icantajeitaqueri:

—Aviroyeampa, pitarica picoaqueri avirori.

²¹ Ari yapiitajiri Pirato, isampijeitiri:

—Jeri icarataque apite: ¿janicampa picoaqueri noimpacajempiri?

Icantajeitaqueri:

—Varavashi.

²² Isampijeitiri:

—Jaoca noncanteriri Jesoshica: yoca ipajyeetiri Quirishito?

Yacajeitanqueri:

—Pimpajacotacanteri.

²³ Isampijeivetari:

—¿Paitampa yantaqueri nompajacotacantanteariri?

Aiquero icajemajeitanaitiri:

—Pimpajacotacanteri. Pimpajacotacanteri.

²⁴ Ari iotanaque yatsipetashitaca isampinajeivetacari, aisati oshequi iquisajeitanaca atiripee. Icantiri inampire:

—Pamacotenaroja nija.

Yamacotaqueneri, impoiji iquivacotaca, iriotanteari atiri te incoaveteoji iroacanteri Jesoshi. Ineajeitaqueri atiripee, aisati icantajeitiri:

—Te naro coatsine noacanteri. Picoajeitaquerica avinti, aviroyeampa.

²⁵ Yacajeitanqueri:

—Nocasanojeitaque, tempa narojeitaque cantaquempi. Inquishenata nainti Tasorentsi, aisati ocameetsati inquisheri notomipee narori.

²⁶ Ari yoisoquijajiri Pirato Varavashi. Icantiri soraro:

—Paanajeri Jesoshica, pimpassateri, impoiji pimpajacoteri.

Yora soraropee ishirontimentajeitacari Jesoshi.

(Mr. 15.16-20; Joa 19.1-3)

²⁷ Ari yaanaqueri soraro Jesoshi anta ivancoqui pincatsari, icajemajeitaqueri itsipapee soraro. ²⁸ Ari isapocaqueri Jesoshi iitsaare, impoiji iquitsaatiri otsipa quitsarentsi,

quiraanirori. ²⁹ Yovetsicaqueneri iramatseere totsequi, yamatseetaqueri. Aisati ipaqueri chacopi, icantiri:

—Pajiriquero opinico chacopi.

Yora pincatsari peerani iquitsaatapinitaro quiraanirori, yamatseetaro iramatseere pinatasanotachari, aisati yajiric平initiro iotiquiro cameetsari. Ari itiyeroashiniro-jeitacari soraropee Jesoshi, ipincatsatamempeacari, ishirontimentajeitari, icantajeitiri:

—Aviro, novincatsarite. ¿Pipincatsariventajeitirimpma maaroni joriopee? Iji, iji, iji, iji.

³⁰ Iquitiojajeitaqueri, impoiji yaapitsatajiri chacopi, ipasatantajari iitoqui. ³¹ Oshequi yapiinataqueri ishirontimentanatacari, iji, iji, iji. Impoiji isapocajiri quitioncanirori, iquitsatajiri aisati iitsaaresanori. Yaajeitanaqueri impajacoteri.

Ipajacojeitaqueri Jesoshi coroshiqui.

(Mr. 15.21-32; Ir. 23.26-43; Joa 19.17-27)

³² Ari yaajeitanaqueri Jesoshi impajacotanteariri. Anta avotsiqui itonquiotavacari shirenesati, ipajita Shimo. Iperanatavacari soraro:

—Jero oca coroshica, paanaqueneri yoca.

Ari yaanaqueneri. ³³ Yareejeitapaaca Coricotaqui. Iro apajitiro aneanequi: iitontsini.

³⁴ Ari ipeevetacari Jesoshi ovaja, oconoajata quepishijatatsiri. Ineantavetavacaro, te incoyeji irirero. ³⁵ Ari ipajacojeitaqueri soraropee coroshiqui, impoiji ineatsajeitaca iriojeitanteari janica aajeroneri iitsaare. ³⁶ Impoiji isavicajeitaque, yamenajeitaqueri.

³⁷ Isanquenajeitaquero paperiqui: “Jerica Jesoshi. Iriotaque ivincatsarite joriopee”. Impoiji ipajacotaquero coroshiqui, ivatitotacaro Jesoshi. ³⁸ Impoiji aisati ipajacojeitaqueri apite coshinti: aparo yoatiacotaqueri iracosanoriqui Jesoshi, irio pashini yoatiacotaqueri irampatequi. ³⁹ Ari ainiro avisayetatsiri avotsiqui, ishirontimentajeitacari Jesoshi. Itecainajeitaca, ⁴⁰ ishirontajeitaca, iji, iji, iji. Icantajeitiri:

—Pintireerome ivanco Tasorentsi, aisati oncarate mava quitaiteri povetsicajerome aisati. Jentsite, poavisacotajea avisati. Avirorica itomi Tasorentsi, jentsite paniireashita-jea.

⁴¹ Aisati iquempejeitaca yora jivatacaaajeitiriri saserotepee, yora oametantirori Sanquenarentsi, jeri yora savicacantatsiri: ishirontimentajeitacari. Icantajeiti:

⁴² —Ijitalashiniroveitani yoavisacojeitirini ashanincabee, iro cantaincha meeca te irimatajeaji iriori iroavisacotajea irisati. Jentsite, amenavaqueritsita: iriorica avincatsarite, iraniireapaaaje. Ariorica iraniireapaaaje, ari ampincatsatanaqueri arori. Iji, iji, iji. ⁴³ Ari ipincatsarivetari Tasorentsi iriori: ariorica iroavisacoteri irinti. Aamaya ari incoaque iroavisacoteri itomi, tempa icanti meeca yoca: “Narotaque Itomi Tasorentsi”. Iji, iji, iji.

⁴⁴ Aisati iquempejeitaca yora coshitantatsiri ipajacoyeetaqueri: ishirontajeitaca iriori.

Icamaque Jesoshi.

(Mr. 15.33-37; Ir. 23.44-46; Joa 19.28-30)

⁴⁵ Ari icarataque catsirincaiteri tampatica, omapocanaca otsiteniiteanaque, otsimoirotanaque: irosati ishaaviniji. ⁴⁶ Ari ishaaviniji antearojenca icanti Jesoshi:

—Eri, Eri, arama savacatani.

Iro acantiri aneanequi: “Apa Tasorentsi, ¿paita pojocantanari?” ⁴⁷ Iquemantacariri yora savicajeitantsiri, icanti:

—Pinquemerite, icajemaqueri Iriashi.

⁴⁸ Ari ishianaca aparoni, yovincaquero pijoncashincanari ovajaqui quepishijari. Isattaquero inchaquiiqui, ijicotacovetakanari Jesoshi, irantsimicantearorime, ⁴⁹ iro cantaincha icantiri itsipapee:

—Eiro pantiritsi: tsame amenavaquerita, impocashiteririca Iriashi iroavisacoteri. Iji, iji, iji.

⁵⁰ Ari icajemanaji aisati Jesoshi, impoiji icamanaque, torein.

Iquenquetsacotiri yora neajeitaqueriri Jesoshi icamaque.

(Mr. 15.38-41; Ir. 23.45-49)

⁵¹ Icamantacari Jesoshi, otsereanaque oticaashiro ivanco Tasorentsi: intanaca jenoqui otsereanaque, tsererere, irosati ishaaviji. Aisati onicanaca quipatsi, nica, nica, nica; ocotareanaque antearo mapipee. ⁵² Yashitareacotanaca tijaari, itinaajeitanaja oshequi quemisantatsiri, tinare. ⁵³ Impoiji, itinaantajari Jesoshi, ijajeitanaque yora itsipapee tinaajeitajanchari Jerosarequi. Ineajeitaqueri oshequi atiri.

⁵⁴ Ari yora capitano aisati yora soraropee ineajeitaquero onicanaca quipatsi, aisati ineajeitaqueri yora tinaajeitajanchari, ineaquero otsiteniitanaque, maaroni. Impoiji yoajeitanaque cavaco, aisati icantajeiti:

—Queariotaque: iringa Itomi Tasorentsi.

⁵⁵ Otimi anta nijanteaji oshequi tsinanepee, amenajeitaqueri Jesoshi. Iroojeitaque oijaveitariniri, oponeajeitaca Carireaqui. Quiso oapinitirini, opapinitirini yoari.

⁵⁶ Ocarajeitaquero Maria maquitarasato; jero otsipa Maria: ora iriniro Santiago aisati Jose; jero aisati iriniro utsipa Santiago aisati Joa. Ari oneajeitaqueri Jesoshi, icamanaque.

Yoimunqueetaqueri Jesoshini omoroqui.

(Mr. 15.42-47; Ir. 23.50-56; Joa 19.38-42)

⁵⁷ Ari ishavijiiteanaque. Itimi aparoni iroamereni Jesoshi, ipajita Jose. Iponeaca iriori Arimateaqui; ashitaarantincari ini. ⁵⁸ Ijatashitaqueri Pirato, icantapaaqueri:

—Camaque Jesoshi. Nocoaque pishinetenari naanajeri noiminquiajeri omoroqui: onta yovetsiqueetiniriri camatsiri.

Ari icantiri iriori soraro:

—Pishineteri yoca iraanajeri.

⁵⁹ Ari ijataque, yaanaqueri, yampinaicacotaqueri tocoyaqui caari pitsitatsi. ⁶⁰ Impoiji yoqueri omoroqui mapi iroaquera imoqueetiro. Itivironquiro antearo mapi omoroqui, yashitacotantacariri. Impoiji ijatanaji Jose. ⁶¹ Ainiro osavicaque anta Maria maquitarasato aisati utsipa Maria. Oneacotaqueri yoimunqueaqueri.

Ijati soraro ishentajeivetaro omoro inauenta Jesoshi.

⁶² Iro quitaiteri ipajacotantariri Jesoshi opajita Yavisantaniri. Oquitaitamanaque ijatashitaqueri Pirato yora jivatacaajeitiriri saserote aisati yora variseopee.

⁶³ Icantajeitapaaqueri:

—Novincatsarite, noquemajeitaqueri icantaqueri chapinqui yora amatavitantatsiri: “Noncamaque, impoiji oncarataque quitaiteri mava, ari nontinaanaje”. ⁶⁴ Nocoaque pintianque soraro meeca irishentasanotero omoro anta yoimunqueaquerinta. Iramenasanotero irosati omoncaratanteari mava quitaiteri. Ijatashitircari iroamereni, yaanajiricari. Impoiji icantajeitircari ashanincapee: “Tinaanaja inaji Jesoshi”. Peerani oshequi yamatavitantini iriori, iro cantaincha ariorica iraanajeri, yamatavitasanojeitircari iroamereni ashanincapee, icanticari: “Tinaanaja inaji Jesoshi”.

⁶⁵ Icantiri Pirato:

—Jeri yoca soraropee, pijajeite pamenasanojeitero.

⁶⁶ Irosati ijajeitantanaca, yashitacotasanoquaqueri, impoiji ishentajeitiro soraro.

Itinaamanaja Jesoshi.

(Mr. 16.1-8; Ir. 24.1-12; Joa 20.1-18)

¹ Ari avisanaque quitaiteri imaoreajeitancari, meeca otomincotapaaque. Tsiteni-qua ojatamanaque Maria maquitarasato, aisati utsipataro omariaroronte. Ojataque amenamanajero omoro yoyetaquerinta Jesoshini. ² Omapocanaca antearo onicanaca quipatsi aisati. Jeri aisati itimi inampire Avincatsarite: iponeanaca inquitequi, ipoquaque itivironcapaaquero mapi, irootaque isavicanapaacari. ³ Oshequi ishipaquireapaaque, iquempetacaro iporequi. Oquitamarotasanotaque iiitsaare, oquempetacaro sharaca.

⁴ Oshequi catsini itsaroacaajeitavacari soraropee, te irimatajeji irishevatajea: iquempetanaca incamaquerica. ⁵ Ari icantiro tsinane:

—Eiro pitsaroitsi avinti. Niotaque irio pipocashiveta Jesoshi. ⁶ Te aneajeriji meeca, tinaanaja ini. Tempa icamantitaquempini. Caatanaque, pamenero aca yoyeevetacarica.

⁷ Impoiji pishintsitanaje pijatananje pincamantajeitapeeri iroamere: “Tinaanaja Avincatsarite, irijivajeitanaqueempi Carireaqui. Aitaque pineajeitapaajeriri anta”. Irootaque nocamantaquempi.

⁸ Ari oasanotanaque cavaco, aisati oshequi oquimoshiretanaque. Ojatanaque, os-hiashitanacari iroamere, oncamanteri. ⁹ Nianqui imapocaquero Jesoshi, ivetsatacaro. Ojatashitaqueri, otiyeroashitacari, ajiricapairi iitiqui. Oshequi opincatsatapaacari.

¹⁰ Impoiji icantaquero:

—Eiro pitsaroitsi. Pijajeite meeca pincamantajeiteri noamereni irijajeiteta anta Carireaqui. Aitaque irineajeitapaajenari anta.

Ijitalshijeivetaca joriopee yaanajiri iroamereni Jesoshi.

¹¹ Ari ojatashitaqueri iroamereni tsinane. Iranti yora soraro shentavetarori omoro ijataarantaji nampitsiqui, icamantajeitapairi yora jivatacaajeitiriri saserotepee.

¹² Yapatojeitiri iriori yora savicacantantatsiri. Yoametavacaajeitaca:

—Jaoca ancanterori meeca amanacotanteariri?

Ari icajemajeitaqueri soraro, icantajeitaqueri:

—Jeri yoca quirequica, nocoi nompinatempi. ¹³ Pincantashijeiteari atiripee: “Nomaajeitaque nianquiteni. Ipocaque iroamereni Jesoshi, yaanajiri”. ¹⁴ Arriorica inquemacovetaquempi yora pincatsari, pincantaque: “Nomaaque”, noncamanteri narori: “Eiro piquishiritsi soraropee. Te irimayeji. Narotaque cantaqueriri: ‘Pintseeya’ ”. ¹⁵ Ari yaajeitaqueri quirequi, icamantajeitaqueri atiri: “Nomaajeitaque, impoiji yaajeitajiri iroamereni Jesoshi”. Ainirotatsi meeca icantajeiti joriopee meeca.

Ineajeitajiri Jesoshi anta Carireaqui.

(Mr. 16.14-18; Ir. 24.36-49; Joa 20.19-23)

¹⁶ Ari nojatanaque Carireaqui, notsipajeitacari itsipapee iroamere. Aparoni peaincha, yora Jorashi. Nojajeitanaque toncaariqui icantaquenari chapinqui Jesoshi.

¹⁷ Noneajeitapaajiri, nopincatsajeitapaajiri. Iro cantaincha aparopee tseencaveta-paincha. ¹⁸ Ari ipocashijeitana Jesoshi, icantaquena:

—Icantitaquenani Apa peerani: “Pimpincatsaritasanote meeca aca inquitequi aisati pimpincatsariventasanojeiteri maaroni quipatsisati”. ¹⁹ Irootaque nocantantimpipi: pijajeite maaroni nampitsipeequi, pinquemisantacaajeiteri maaroni atiripee, pintsotea-queri maaroni. Arriorica inquemisantajeitaque, pivaotisajeiteri: irootaque icoacaaqueriri Apa, aisati noocoacaajeitaqueriri narori, aisati ocoacaajeitaqueriri Ishire Tasorentsi.

²⁰ Pincamantajeiteri atiri irimajeitero maaroni nocamantaquempi. Quiso noajeitanaquempi, noncanteani, irosati nompocantajeari nompincatsaritantapaajeari.

Ari ocarati. Narotaque sanquenatirori: Mateo

YORA MARICOSHI ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

Yantayetiri Joa vaotisatantatsiri.

(Mt. 3.1-12; Ir. 3.1-18; Joa 1.19-28)

¹ Meeca noncamantempiro cameetsatatsiri. Noncamantempi yoavisacotanti Jeso quirishito. Tempa iriotaque itomi Tasorentsi. ² Peerani isanquenatinini camantan tatsiniri pajiveitachaniri Isayashi. Jero oca isanquenatiniri: “Icantiri Tasorentsi it omi: ‘Pinquemena, notiomu. Nontianqueri quenquetsatacotpineri, irijivatanaque mpu. Incantajeiteri atiri: Paamaajeiteari Quirishito, pincameetsashirejeitanaque. ³ Inquenquetsatacajeiteri ishaninca caaraiteriqui. Incantajeiteri: Pincameetsashirejeitanaque oncanteata ariorica impoque Avincatsarite, irineacameetsajeitantaapeempiri’”. ⁴ Ari moncaratapaaca icantiniri peerani Isayashini. Yareetapaaca caaraiteriqui Joa, yora vaotisatantatsiri. Icantajeitaqueri ishaninca:

—Pinquenqueshireempa, eiro piquempetajatsi peerani. Ariorica pojocasanojeita jero pantajeiveitaniri, ari novaotisajeitaquempi, impoiji iriojeitanaque atiri icavintsaa jeitaquempi Tasorentsi, eiro iquenqueshireacotajimpirotsi pantaveitaniri.

⁵ Ari ijatashijeitaqueri maaroni joresati, aisati maaroni jerosaresati, icamantajeita pairi:

—Ainiro nantayetiri caari cameetsatatsi. Nocoaque navisacotaje.

Ari ivaotisajeitavaqueri Joa Joriraniqui. ⁶ Irio iquitsaatari tijachari iviti cameyo. Ishit icatsaquitari meshinantsitsa. Yoapinitari quentori aisati ija pitsi. ⁷ Ari icamantapinitiri ishaninca:

—Coraque impoitapeenaneri, yanaacotaquena, ipincatsaritasanoti irinti. Nopincat satasanotaqueri catsini, narori notseencaja narosati. ⁸ Novaotisajeitaquempi nijaqui, iro cantaincha intianquempiro irinti Ishire, ontsipajeitantaapeempiri.

Ivaotisatapaaca Jesoshi.

(Mt. 3.13-17; Ir. 3.21-22)

⁹ Ari pashini quitaiteri yareetapaaca Jesoshi. Iponeaca Nasaretequi, timatsiri Carireaqui. Ivaotisatavaqueri Joa Joriraniqui, ¹⁰ impoiji yaatanaji. Yamenanaque jenoqui, irosati ineantavacaro Ishire Tasorentsi. Omapocapaaca anuireashitapaaqueri, oshiaqueri sampaquiti. ¹¹ Iquematiiri Tasorentsi icantiri:

—Avirotaque notomi nonintasanotiri. Oshequi noquimoshireeventasanotaquempi.

Ijatanaji Jesoshi caaraiteriqui.

(Mt. 4.1-11; Ir. 4.1-13)

¹² Impoiji aanaqueri Ishire Tasorentsi caaraiteriqui. ¹³ Itimaiti anta ocarataque 40 quitaiteri. Yora Satanashi ineantavetacari, irantacayerime caari cameetsatatsi. Aisati tecatsi ishaninca intsipateari, irinti timatsi covencayetatsiri, iro cantaincha intaco jeitacari inampirepee Tasorentsi.

Iquenquetsataque Jesoshi.

(Mt. 4.12-17; Ir. 4.13-15)

¹⁴ Ari pashini quitaiteri yashitacoyeetaqueri Joa caravosoqui. Impoiji ijatanaji Je soshi Carireaqui. Icamantajeitaqueri ishaninca jaoca icanta Tasorentsi yoavisacotanti.

¹⁵ Icantajeitaqueri:

—Irotaintsi impincatsariventajeitajee Tasorentsi. Pinquenqueshireempa, eiro piquempetajatsi peerani: te pincameetsaveiteani. Pinquemisantajeite pavisacontajeari.

Icoyeaqueri Jesoshi iroamerepee.

(Mt. 4.18-22; Ir. 5.1-11)

¹⁶ Ari pashini quitaiteri ishiteatanacaro Jesoshi incajare timatsiri Carireaqui. Ineapaqueri Shimo, aisati irirenti, Antirishi. Iquitsati incajarequi: aitaque icantapinita, iquitsatapinitiri shima. ¹⁷ Icantapaaqueri Jesoshi:

—Poijatanaquena, nocoaque pinquemisantacaapiniteri atiri.

¹⁸ Irosati yojocantanacaro iitsarite, yoijatanaqueri. ¹⁹ Capichaji yovaavetanaca aisati, ineapaqueri Santiaco, Joa, apite: iringa que itomipee Severeo. Isavicajeiti ivitoqui, ishiticayetiro iitsarite. ²⁰ Icajemapaaqueri, yoijajeitanaqueri. Yojocanaqueri iriri, isavicaque irinti pitotsiqui, icarajeitaqueri amitacojeitiriri.

Iqueapaaque Jesoshi yapatojeitantari joriopee.

(Ir. 4.31-37)

²¹ Impoiji yareetapaaja Jesoshi Caperenaoqui, icarajeitiri iroamerepee. Irootaque saavar, imaoreajeitantari, iqueajeitapaaque pancotsiqui yapatojeitantari. Yoametan-tapaaque. ²² Yora atiripee, yoajeitanaque cavaco, icantajeiti:

—Pineaqueri, cameetsa yoametantasanotaque, iotasanolri irinti. Te inquempeteariji yora oametapinijeiveteerori sanquenarentsi: te iringasanoteji irinti.

²³ Aisati itimi anta pancotsiqui aparoni shirampari neiriri camaari.

²⁴ Icajamacotavaqueri Jesoshi, icantavaqueri:

—Niotaquempi: aviro nasaretesati, aisati aviro itomi cameetsari Tasorentsi. ¿Paita pipocashitananari? ¿Arimpa pintsoncajeitapaaquena?

²⁵ Icantiri Jesoshi camaari:

—Pimajereiteteve. Pinijantareanajeri noshaninca.

²⁶ Ari yampitsiitacaanacari ashaninca, antearojenca icajemanaque, irosati inijantare-antananjari camaari. ²⁷ Aisati yoajeitanaque cavaco ishaninca, maaroni. Isampitava-caanaca:

—¿Pineaquerompa imataqueri? Iroaqera aquemaquero oca yoametaqueeri. Aisati imataqueri camaari, itiancaqueri: itsaroacaitacariteemi.

²⁸ Irosati iquenquetsatacotantajetacari maaroni carireasati.

Yoavisacotiro Jesoshi irairo Petero.

(Mt. 8.14-15; Ir. 4.38-39)

²⁹ Ari iponeajeitajari pancotsiqui yapatojeitantari, ijajeitanaque ivancoqui Shimo, jeri Antirishi. Yojajeitanaqueri Santiaco aisati Joa.

³⁰ Icamantiri Jesoshi:

—Ojoquiitaca irairo Shimo, aaquero catsiirents. Jero onta nariainchari.

³¹ Ari ijatashtanaquero, yacatsavacotapaaquero, yoisavicipaajiro. Irosati opean-tanaja ovätsiire, irosati opajeitantacari iroyeari.

Iro saavar yoavisacoyetantacariri Jesoshi mantsiyetatsiri.

(Mt. 8.16-17; Ir. 4.40-41)

³² Iqueanajи catsirinaciteri, irotanaintsi ontsitenijencaiteanaje, yamayetaqueneri Jesoshi maaroni mantsiyetatsiri, aisati maaroni yatajeoncayetiri camaari. ³³ Maaroni nampitsiquiniri yapatojeitapaaaca omoroqui pancotsi. ³⁴ Isavicajeitapaaque maaroni mantsiyetatsiri, onashiyetaca imantsiarepee. Yoavisacojeitajiri. Aisati icantaqueri camaari:

—Pinijantareajeitanajeri yora patajaonquiri, aisati pimajerejeite.

Yora camaari, iojeitaqueri Tasorentsi ini Jesoshi, irootaque caari icoanta Jesoshi incamanteri atiri.

Imananaja Jesoshi, ijatanaji.

(Mt. 4.23; Ir. 4.42-44)

³⁵ Oquitaitetanaque, tsiteniqueru itinaamanaja Jesoshi. Ijatamanaque anta tecatsi timatsine, iquenquetsatacairy iriri. ³⁶ Icoacoayetajiri Shimo aisati itsipajeitari.

³⁷ Ineantapaaajariri, icantapaaqueri:

—Icoacoajeitaquempi maaroni ashaninca.

³⁸ Ari icantavaqueri iriori:

—Ari inajini. Tsame avaanajea otsipapeequi nampitsi. Aitaque anta nonquenquetsat-acaajeiteri itsipapee atiri, irootaque nopocantacari quipatsiquica.

³⁹ Iquenaquenayetanaque, itsoteajeitaquero nampitsipee anta Carireaqui. Iquenquet-satacaapinitaqueri ishaninca anta yapatotapinijeitanta, yoavisacojeitaqueri maaroni neiriri camaari.

Yoavisacotaqueri Jesoshi patsaatsiri.

(Mt. 8.1-4; Ir. 5.12-16)

⁴⁰ Pashini quitaiteri ijatashitaqueri patsaatsiri, icantapaaqueri:

—Tempa aviro pincatsari, pincavintsayena. Ainiro pitasorenca: pinintirica poavisacotajena, ari pimataquero.

⁴¹ Oshequi icavintsaasanotavaqueri. Ari yacotashitavaqueri, ipamitavaqueri. Icantavaqueri:

—Je, noninti: aitaque pavisacotaje.

⁴² Irosati opeantanaja ivatsaaro, yavisacotanaji. ⁴³ Itiancajiri, icantasanotiri:

⁴⁴ —Noncantempi: eiro picamantayetiritsi itsipapee, irinti pijatashiteri saserote. Pinijaapaajeri pavisacotaji. Pimoncaratero icantiniri Moishishini: poyeneri Tasorentsi pivira iriotanteari pishaninca pavisacotaji.

⁴⁵ Ari ijatanaque, iro cantaincha icamantacoyetaquero, yovaraaquero. Iotacojeitaqueri Jesoshi, irootaque caari ijatanta nampitsiqui. Itimaiti anta ocaraiteti. Ijatashijeitaqueri atiri poneayetachari otsipapeequi nampitsi.

2

Yoavisacotaqueri Jesoshi choritatsiri.

(Mt. 9.1-8; Ir. 5.17-26)

¹ Pashini quitaiteri ipianaja Jesoshi Caperenaoqui. Iquemacojeitajiri areetaja ivancoqui.

² Yapatojeitaca oshequi atiri, ijaapaaca pancotsiqui. Tecatsi inquenapee pashini inquempejitantapeemparori omoro. Iquenquetsatacaajeitaqueri Jesoshi.

³ Ari icompitacotapaquaqueri choritatsiri. Icarati amiriri itsipasati. ⁴ Tecatsi inquempejitantapeempariri Jesoshi, yojocaajeitavaqueri atiripee. Ari yataitacaanaqueri otataroqui pancotsi. Itatareapaaquero, itampaticataquero inauenta Jesoshi. Imataquero omoro, ari yoaniitacotaqueri inareantariqui. ⁵ Iotavaqueri Jesoshi ishirejeitacari, irootaque icantantacariri:

—Noshaninca, ainiro pantayetiri, iro cantaincha eiro noasanquetimentimprotsi, aitaque noavisacotajempi.

⁶ Ainiro anta isavicaidai oametantirori sanquenarentsi. ⁷ Icantashiretaque iriori:

—¿Paita icantashinirotantarori oca? Ijitasorentsinirotacateemi. ¿Jaoca incanteriri iroavisacotanteariri? Tempa apaniro yoavisacotanti irinti Tasorentsi.

⁸ Ioshiretashitaca Jesoshi icantashiretaqueri, icantiri:

—¿Paita picantashiretantari? ⁹ ¿Paita pomerentsitasanotachari? ¿Pomerentsinimpa nocantiriri yoca choritatsiri: “Eiro noasanquetimpitsi, iointi noavisacotajempi”? Te ompomerentsiveteaji: eiro piojeitsi nomaterorica. Iointi pomerentsivetacha noncantteri yoca: “Pincatianaje, paajero pinariantavetari, paniitanaje”. Tempa onconijatasanotanaque nomaterorica. ¹⁰ Aca quipatsiquica nocavintsaajeitiri caari cameetsatatsi, aisati noavisacojeitaqueri. Nocoaque piojeite ainiro notasorenca noavisacotanteariri.

Ari icantauqueri choritatsiri:

¹¹ —Nocantimpi, pincatianaje, paanajero pinariantaniri, pijataje pivancoqui.

¹² Irosati icatiantanaja, yaanajiro inariantaniri, isoquijanaji. Ineajeitavajiri ishaninca, yoajeitanaque cavaco. Icantajeitanaque:

—Tempa icameetsatasanoti Tasorentsi, te aneapiniteroji peerani quempetarori oca.

Ari icantavacaaca.

(Mt. 9.9-17; Ir. 5.27-39)

¹³ Ipijanaja Jesoshi aisati otsapijaqui incajare. Yapatotashijeitapaajari aisati atiri, yoametavajiri. ¹⁴ Impoiji yovaanaja aisati. Ineapaaqueri Irevi, yora itomi Arijeo,

isavicaiti pancotsiqui yapatotapinitiri quirequi: yapatotapinijeitiniri oromasati. Icantapaqueri:

—Tsame, pojatanaquena.

—Ja, tsamequeti.

Ari icatianaca, yoijatanaqueri. ¹⁵⁻¹⁶ Ari ijajeitanaque ivancoqui Irevi. Yoacaajeita-paacari oshequi oijajeitiriri Jesoshi, iroamere, apatotapinitiriri quirequi, maaroni. Jeri aisati yoacaacari caari cameetsayetatsi. Yareejeitapaaca oametantirori sanquenarentsi, variseo ini. Ineacotappaqueri Jesoshi yoimojeitacari caari cameetsayetatsi. Isampita-paaqueri iroamere:

—¿Paita itsipajejitariri yocapee, yoajeita? Te incameetsajeiteji.

¹⁷ Ari iquemavaqueri iriori Jesoshi, icantiri:

—Yora caari mantsiatatsine te incoyeji aavinterineri, irintiquea mantsiatatsiri. Te iro nompocantea noncajemerri cameetsatatsiri, irintiquea caari cameetsatatsi.

¹⁸ Ari itijeita iroamerepee Joa aisati iroamerepee variseo. Yora atiri ipocashitiri Jesoshi, icantappaqueri:

—Jeri meeca itijeita iroamerepee Joa, aisati iquempejeita iroamerepee variseo. ¿Paita caari ititanta poamerepee avirori?

¹⁹ Ari icantavaqueri Jesoshi:

—Oquempetaca ariorica iraye shirampari ijina, incajemajeiteri ishaninca inquimoshireventajeiteri. Ariorica irareejeitapeempa, ¿arimpa intijeitapeempa iriori? Eiro. Tempa iriveshireimentapeempa. Pinequero, meeca nocarajeitiri noamerepee: ¿paita nontitacanteariri? ²⁰ Aisati, ariorica irojocajeitanajeri ishaninca aatsiri ijina, impojiniquea intijeitanaquea. Aisati coajica, nojocanajeririca noamerepee, iroashiretacojeitanaquena, irosati intijeitantananaquea. ²¹ Tempa ajacapinitiro quitsaarentsitsara, irootaque oshiricamaotantari. Impoiji, te oncameetsateji impataqueetero nianqui iroquerari: tequera oshiricamaoteji irointi. Impataqueeterome, impoiji ariorica inquiveetajerome aisati, oshiricamaotanaqueme iroori iroquerari, antsiviacaquerome maatsarantsi. Impoiji ontserereacaquero iroquerari. ²² Ariorica ampeantantajearime pearentsi iroquerajari peesatitatsiri imeshina, tempa ari intapianaqueame, intoncanaqueme. Aitaque intsereanaqueme, aisati amparajatanaqueame iroquerajari, chararara. Tempa apeantantapinitaro iroquerajari imeshinaqui iroquerari. Pinequero: iroquerari oca noamejeitimpiri, te oncameetsateji onconoyearo ora yoametapinijeitimpiniri intaroniri.

Icantavacainmentacaro saavarō.

(Mt. 12.1-8; Ir. 6.1-5)

²³ Ari pashini saavarō iquenanaque Jesoshi panquirentsiqui, itsipajejitariri iroamerepee. Ari nianqui yaviitapairo iroamere oitsoqui tirico, itaquireiro otaqui, yoajeitaro oitsoqui.

²⁴ Ari icantiri variseo:

—Paitateemi yaviitantarori oitsoqui, itaquireitacaro quitaiteri amaoreantari. Te oncameetsateji. ¿Paita yantantarori?

²⁵ Ari yacanaqueri Jesoshi:

—¿Tempa pinquenqueshireeroji sanquenarentsi quenquetsatacotiriri peerani Iravirini? Te ontimeji iroyeari, aaqueri itashe, aisati itsipajejitariri. ²⁶ Ainiro onaveitani tanta yovetsiqueetiniriri Tasorentsi: te irishineyeeteriji iroajeitearo atiri, apaniro yoaro saserote, irinti. Iro cantaincha aavetacari itashe Iravirini. Ijatashitiri Aviatara, yora ivincatsarite saserote, icantiri: “Notasheajeitaque. Tecatsi noajeiteari”. Ari ipavaqueri tanta: “Jero oca, poyea”. Ari yoacaro, aisati yoacaajeitacari itsipajejitariri. Caari inajeiti saserote, iro cantaincha te irininteji Tasorentsi iroashinoncaajeiteri. ²⁷ Pamene, yovetsiquiniri Tasorentsi atiri quitaiteri imaoreajeitacaro. Te iro irovetsicanteanari atiri irineapincatsatearo quitaiteri. ²⁸ Narotaque cantacaantaquerori quitaiteri amaoreantajeitarri: tempa noponeaca narori inquitequi, natiritapaaque.

Yora Jesoshi yoavisacotiri quisoporoquitatsiri iracoqui.

(Mt. 12.9-14; Ir. 6.6-11)

¹ Yora Jesoshi ijatanaji aisati pancotsiqui yapatojeitantarri. Aitaque isaviquiri shirampari quisoporoquitatsiri iracoqui. ² Yamenashijeitavaqueri atiri, sorerere: icoaque iriote ariorica iroavisacotajeri saavarroqui. Icoajeitaque incantajeite: “Te oncameetsateji oca yantiri Jesoshi”. ³ Yora Jesoshi icantiri quisoporoquitatsiri:

—Pincatiaje, caate aca nianqui.

⁴ Impoiji isampipeitaqueri maaroni amenajeitauntsiri:

—¿Cameetsampa aneshinoncateri atiri quitaiteri amaoreajeitantarri? ¿Ariompa avashinoncayeri? ¿Ocameetsatimpa avavisacoteri? Tericampa, ¿picoaquempa ayer?

Iro cantaincha imajerenirojeitanaque. ⁵ Iquisanaca Jesoshi, yamenajeitaqueri, aisati iquenqueshireanaca. Iro iquenqueshireantanacari te incavintaantajeiteji atiri. Icantiri shirampari:

—Pancotaje.

Ari yacotanaji, irosati yavisacotantanaja. ⁶ Isoquijajeitanaque variseopee, ijatashijeitanaqueri ishaninca Eroreshi. Yoametavacaajeitaca:

—¿Jaocasa ancanteriri Jesoshi, avanteariri?

Yoavisacotanti Jesoshi anta incajarequi.

(Mt. 4.24-25; 12.15-21; Ir. 6.17-19)

⁷ Yora Jesoshi aisati iroamerepee ijajeitanaji incajarequi, yojajeitanaque oshequi carireasati, aisati joreasati, ⁸ jerosaresati, iromeasati, intatiquerosati Jorirani, maaroni savicajeitaqueri Tiroqui, Shiroqui, maaroni. Iquemacojeitaqueri itasoncanti, irootaque ijatashijeitantarcariri oshequi atiri. ⁹ Icantiri iroamere:

—Pamaquenarota pitotsi, nontetearo: ishenacajeitapaanacari ashanincapee.

¹⁰ Ari iquenquetsatacaaajeitaqueri, impoiji yaniireapaaji aisati quipatsiqui. Oshequi yoavisacojeitavaqueri. Yora mantsiyatatsiri iteencareyetaqueri ishanincapee, impamitanapeempariri Jesoshi. ¹¹ Yora atiri yatajeaonquiri camaari ipincatsajeitaqueri. Antearojenca ineanatacaaqueri icantajeitaqueri:

—Jesoshi, aviotaque itomi Tasorentsi.

¹² Icantasanotiri Jesoshi:

—¿Paita picantantanari? Pimajerete, eiro picamantacotanatsi.

Icoyeaqueri Jesoshi iroamerepee.

(Mt. 5.1; 10.1-4; Ir. 6.12-16)

¹³ Ari impoiji itoncaanaque toncaariqui. Icajemaqueri yora icoyeaqueri, ari ijatashijeitaqueri. ¹⁴ Icoyeasanotaqueri 12 shirampari, intsipatasanojeitanteeariri. Impoiji intiancajeiteri inquenquetsatacaaajeiteri ishaninca irineane Tasorentsi. ¹⁵ Aisati imatacaaqueri itasoncantajeitaque irojocanteariri camaari. ¹⁶ Ari icoyeaqueri iroamere 12. Icoyeaqueri Shimo, ipajitajiri aisati Petero. ¹⁷ Aisati icoyeaqueri Santiago itomi Severeo. Icoyeaqueri Joa irirenti Santiago: ipajieetajiri aisati Voaneriji, acantiro aneanequi “Shintsiri”. ¹⁸ Aisati icoyeaqueri Antirishi, Jeripi, Varitorome, Mateo, Tomashi, Santiago itomi Arikeo, Tareo, Shimo. Iriotaque Shimo shintsiyetirori paitaricapee. ¹⁹ Aisati icoyeaqueri Jorashi Ishicariote: iriotaque aacanterineri coajica Jesoshi.

Ijiyevetari yatajeaonquiri camaari Jesoshi.

(Mt. 12.24-32)

²⁰ Impoiji ipianaja Jesoshi pancotsinentsiqui. Yapatojeitajiri aisati oshequi atiri. Tecatsi incantea iroyea. ²¹ Iquemacotaqueri Jesoshi ishanincasanori, ijatashivetajari iraanajerime ivancosanoriqui. Icantavacaanaca:

—Te irineacoteoji Jesoshi, tsame aanajeri.

²² Ario ipocashitiri aisati jerosaresati, oametantirori sanquenarentsi. Icantacotashita-paacari:

—Iriotaque Satanashi atajaonquiriri Jesoshi. Tempa Satanashi iriotaque ivincatsarite camaari: iriotaque amitacotiriri itianquiri iamaaririnte, irootaque imatantacariri.

Yacanaqueri iriori Jesoshi.

(Mt. 12.22-32; Ir. 11.14-23; 12.10)

²³ Icajemaquera Jesoshi, icantavaqueri:

—¿Queariompa yatajeaoncaquena camaari? Pamene: jaoca incanteari Satanashi irojocajea irisati? ²⁴ Oquempetaca ariorica inquisavacaajeitea savicatsiri nampitsiqui, irojocavacaajeitea, ¿arimpa irisavicajeitanaje cameetsa? ²⁵ Aisati oquempetaca ariorica inquisavacaajeitea savicatsiri pancotsiqui, ¿arimpa inquisoavacaajeitajea? ²⁶ Aisati iquempetaca, ariorica Satanashi inquisherime iamaaririnte, irojocavacayeame, eirome itimime: aitaque impoyereavacayeame. ²⁷ Aisati iquempeta iriori coshitantatsiri: itsaroacaari shintsitsatsiri inqueavancoteri incoshitanteeariri irovaararo. Ariorica impocashiteri, irijivataapeeri iraapeeri, iroisotapeeri shintsitsatsiri, impoijiquea incoshiteri paitaricapee yoayetiri ivancoqui. ²⁸ Queariotaque oca noncamantasanotempi: icavintsaajeitajiri Tasorentsi maaroni antirori caari cameetsatatsi. Aisati, ariorica incantimajeveteari, incavintsaajeiteri aisati. ²⁹ Iro cantaincha, eiro icavintsaajeitiritsi irinti cantimatiyoror Ishire: incantaitiyempani intime iriori Sharincaveniqui. Eiro catsini yavisacotajtsi.

³⁰ Irootaque icantaqueriri Jesoshi. Pineaquero, icantashinirojeivetaca incaranqui: “Irio camaari amitacotiriri Jesoshi”. Tempa irootaque Ishire Tasorentsi amitacotiriri, caari ini camaari.

Icamantiri Jesoshi janica ishanincatasanotacari.

(Mt. 12.46-50; Ir. 8.19-21)

³¹⁻³² Ari isaviqui Jesoshi pancotsiqui, isaviquimojeitapaaqueri areejitapaariri. Impoiji areetapaaca iriniro, otsipajeitapaari irirentipee. Ocatlapaaca saiteriqui, ocantiri oneapaaqueri:

—Pincantenari notomi.

Ari iqueashitanaqueri, icantapaaqueri:

—Areetapaaca piniro, parentipee, aisati pitsiropee. Osavicapaaque saiteriqui, ocoapaquempi.

³³ Ari yacavaqueri:

—Jaoca ocantari inatatsiri? Jaoca icantari iyetatsiri?

³⁴ Irosati ijicotantanacari saviquimojeitaqueriri. Icantanaque:

—Jeroca inatatsiri. Jerica iyetatsiri. ³⁵ Janicarica antapinitirori icoacairiri Tasorentsi: iriojeitaque iyetatsiri, tsiotatsiri, inatatsiri. Noshanincajeitacari maaroni quemisanta-jeitanari.

4

Ishiacantiri panquiveetatsiri.

(Mt. 13.1-23; Ir. 8.4-15)

¹ Yoametantaji aisati Jesoshi anta otsapijaqui incajare. Yapatotimentapaajari oshequi atiri catsini. Irosati itetantaca pitotsiqui, itianquero nianquija capichaji, isavicaque. Icatiashijeitapaacari otsapijaqui maaroni ashaninca. ² Yoameyetaqueri paitaricapee, aisati ishiacaaventiniri, icantiri:

³ —Meeca noncamantempi. Ijataque panquiveetatsiri yojocaitiro oitsoqui tirico.

⁴ Yojocaitiro, opariaarantapaaque avotsiqui. Ipocapaaque contsaro, yoapaacaro, itson-quitapaaqueri. ⁵ Pashini pariapaintsi oitsoqui mapiqui. Te ontimasanoteji oshequi quipatsi, jentsipaite oshiocavetanaca. ⁶ Ari ijenoquitapaaque catsirincaiteri, irosati os-

himpeshitantanaca. Te omparitsatasanoteji, irootaque ocamantanacari. ⁷ Opariapaaque pashini oitsoqui quitotseequimashi qui, oquimotanaque quitotseequi. Irootaque ajaana-

querori, caari oitsoquitanta panquirents. ⁸ Pashini pariapaintsi quipatsiqui cameetsari. Oquimotanaque, otimayetanaque oitsoqui. Aparo oitsoquitanaantsi ocarati oitsoqui

30. Pashini otimanaque aisati oitsoqui ocarati 60. Iro otsipa ocarati oitsoqui 100.

⁹ Piquemavaquerorica oca nocantaquemperi, piotavaquero, pinquenqueshiretavaquero.

¹⁰ Impoiji ijajeitanaji atiripee, itimanaji apaniro Jesoshi, itsipajeitari aparopee oijatiriri, aisati iroamere caratatsiri 12. Isampijeitiri:

—¿Jaoca ocantari oca pishiacaaventiniriri?

¹¹ Icantanaqueri:

—Meeca noncamantempiro caari piojeitini: aitaque piojeitero jaoca icantari Tasorentsi ipincatsariventanti. Irompa irinti yontapée, eiro nocamantasanoitirts, irointi noshiacantiniri oncanteata ¹² iramenavetea, iro cantaincha eiro ineasanotits, inquemavetea, iro cantaincha eiro iotasanoitits. Eiro iquenqueshireatsi, eiro icavintsajiritsi Tasorentsi.

¹³ Aisati icantakeri:

—¿Tempa pinquemavaquero oca noshiacantimpri? Ariorica noshiacantempiro aisati, jaoca pincanteari piotantearori? ¹⁴ Yora jocaiyetirori oitsoqui ishiaqueri ovaayetirori irineane Tasorentsi. ¹⁵ Aparopee jocaiyetapaincha avotsiqui oshiaqueri quemisantavetavacarori irineane Tasorentsi, iro cantaincha yora Satanashi yojocapitsatajiri iquenqueshireantavetacari: te inquemisantanajeji. ¹⁶ Aisati oca jocaitapainchari mapiqui, oshiaqueri quemavetavacarori irineane Tasorentsi. Intsipaite iquimoshireventavetavacaro. ¹⁷ Ishiaquero panquirentsi caari timatsine ovaritsa. Intsipaite ocamaque. Iquemisantavetaca, irootaque yoashinoncanteetacariri, aisati iquisanentanteetacariri. Intsipaite yojocanajiro iquemisantaveta. ¹⁸ Oca jocaitainchari quitotseequimashiqui os-hiacaaventiri quemavetavacarori irineane Tasorentsi. ¹⁹ Iro cantaincha iquenqueshiretapinitiro timayetsatsiri aca quipatsiqui, iquimoshireventajeitiro yashiyetari. Aiquero icoanaitii irashijitearo paitaricapee, irootaque yojocantajarori iquemisantavetari. Ishiaquero caari timatsi oitsoqui. ²⁰ Iroquea oca irointi jocaitapainchari quipatsiqui cameetsari, os-hiacaaventiri quemasanotavaquerori irineane Tasorentsi. Aitaque ishiretasanotacaro, iriotaque shiacaaventainchari panqurentsipee timanaintsiri oitsoqui. Aparo oitsoquitanaantsi ocarati oitsoqui 30. Pashini otimanaque aisati oitsoqui ocarati 60. Iro otsipa ocarati oitsoqui 100. Oca oitsoqui os-hiacaquero amajeitaqueneriri Tasorentsi, aparo iranaacotaqueri itsipapee.

Ishiacantiniri Jesoshi tsiomentotsi.

(Ir. 8.16-18)

²¹ Aisati icantakeri:

—Ancoaquerica antsiotea, ¿arimpa avajero tsiomentotsi covitiqui tsompoina? ¿Arimpa amanaquero tsiomentotsi? Tempa acoiro antsiujeitearo maaroni amenajeitanteari. ²² Coajica onconijatanaque maaroni amanavetari, iriojeitanaquero maaroni antajeitaqueri. ²³ Otimirica piquemantari, pinquemavaquero oca nocamantaquempi.

²⁴ Pashini icantakeri aisati:

—Pinquenqueshiretero oca piquemaqueri. Ariorica capichaji pinquemisantavaquero nocamantimpri, ari capichaji piotavaquero. Ariorica pinquemisantasanoquero, ari oshequi piotavaquero, noametasanotaquempiro catsini. ²⁵ Yora iotavaquerori noametaqueriri, aiquero noametasanoteri catsini. Yora caari iotavaquero nocamantavetacariri, eiro iotitsi catsini.

Ishiacantiniri Jesoshi panquitirori oitsoqui.

²⁶ Aisati icanti:

—Tempa ipincatsariventajeetaquee Tasorentsi. Ishiaqueri shirampari jatatsiri ipanquitiro oitsoqui quipatsiqui. ²⁷ Imaapiniti tsiteniriqui, issaaquitapiniti quitaiteriqui. Ocontetsoaquitanaque ivanquire, oquimotanaque. Te iriotacoteroji jaoca ocantanacari osiocantacari. ²⁸ Oshiocaque quipatsiqui: ojivati otsoaqui, impoiji ominca, impoiji opa, impoiji antaiquitanaque oitsoqui. ²⁹ Ariorica osampaquitanaque oitsoqui, intotacoyeetero, tempa omoncaratapaaca iraantearori.

Ishiacacaaventiniri moshitasa.

(Mt. 13.31-32; Ir. 13.18-19)

³⁰ Aisati icanti Jesoshi:

—¿Jaoca noncantempirori noshiacaaventempiro jaoca icanta Tasorentsi ipincat-sariventanti? ¿Jaoca ancanterori anquenquetsatacotantearori? ³¹ Oshiaquero oit-soqui moshitasa. Irointi oitsoqui, te onquempetearoji pashinipee oitsoquiyetatsiri: quiripequiitaque oni catsini. Ariorica ampanquitero, ³² oshiocanaque. On-quimotanaque, anayetanaquero otsipapee panquirentsiyetatsiri. Antearoyetanaque ojempequipee, aitaque iramampeapinitearo vanquiyetachari.

³³ Aitaque icantapinita Jesoshi, ishiacaaventapinitiniri atiri iroametanteariri irineane Tasorentsi. Ariorica capichaji iquemaquero, ari capichaji yoametaqueri: oshequirica iquemavaquero, ari oshequi yoametaqueri. ³⁴ Iotaca ishiacaaventapinitiniriri. Irin-tiquea iroamere, itsoteajeitaqueneri yoametasanojeitiri.

Yoimajerentaquero Jesoshi tampea.

(Mt. 8.23-27; Ir. 8.22-25)

³⁵ Iqueanaji catsirincaiteri. Icantajiri iroamere:

—Tsame amonteanaje intatiquero.

³⁶ Itiancanajiri apatotimentajeitariri:

—Tsamajempi pijajeitanaje pivancoppeequi.

Irosati inaque iriori pitotsiqui, isavicaque. Itejeitanaja iroamere, yoimonteajiri. Aisati imonteacotanaja yora apatotimentariri otsipapee pitotsi. ³⁷ Omapocavaqueri nianquija antearo tampea catsini. Ora omotoncane otejatapaacaro pitotsi, irovetainch ajaayeame. ³⁸ Imaaque Jesoshi anta opataquiqui, itiinataca. Yoisaquireaqueri iroamere, icantaqueri:

—Oametanari, ¿paita caari pinquenqueshireanta? Irotanaintsi ampiincajeite.

³⁹ Itinaanaja, icajemacotaquero tampea, aisati icantiro incajare:

—Pimajerete, pimajerejate.

Opeanaja tampea. Omajerejatasanotanaji incajare. ⁴⁰ Icantiri:

—¿Paita pitsaroantari? ¿Paita caari pishirejeitantarri Tasorentsi?

⁴¹ Oshequi catsini itsaroasanojeitanaque. Icantavacaanaca:

—¿Janicampa yoca, oquemisantantacariri tampea? Aisati incajare, oquemisantaqueri.

5

Yoavisacotiri Jesoshi neiriri camaari.

(Mt. 8.28-34; Ir. 8.26-39)

¹⁻² Yareejitanaca intatiquero, yamatsecapaaque quipatsiqui: irootaque iipatsite jerasesati. Intsipaito tonquiotavacari neiriri camaari, iponeanaja anta tijaarimashiqui,

³ aitaque isaviquiri. Tecatsi aaveerineri iroimajerenteri. ⁴ Yoisotapiniyeevetari iracoqui carenatsa, aisati iitiqui, iro cantaincha ipesayetaquero, peti, peti. Tecatsi anacoterine ishuntsiti. ⁵ Icantatiani: tsiteniriqui, quitaiteriqui, iquenayeti tijaariqui aisati ton-

caariqui. Icajemayeti, itoyetaro mapi. ⁶ Yoca shirampari ineitavacari arejiquinta Jesoshi, ishiashitanacari, itiyeroashitapaacari. ⁷⁻⁸ Icantavaqueri Jesoshi camaari:

—Pinijantareanajeri yoca shirampari.

Antearojenca icajemacotapaaqueri:

—¿Paita pashereantanari? Aviro Jesoshi, itomi Tasorentsi inquitequiniri, tempa ineajeitaquee. Nocantasanotimpi catsini, eiro poashinoncaanatsi.

⁹ Ari isampitiri Jesoshi:

—¿Jaoca pipajitari?

Yacanaqueri:

—Nopajita Oshequianti. Iro nopajitantari, oshiquianti noni catsini. ¹⁰ Eiro pitian-canatsi pashiniqui nampitsi.

Aitaque icantasnotapinivetaacari catsini. ¹¹ Ari anta itimi oshequi chancho, yoajeitaionciquiji. ¹² Yora Oshequianti icantiri:

—Ari pintianquenari anta chanchoqui, irineavaquena iriori, quiso noapaajeri.

¹³ Ari ishinetaqueri; inijantareanajiri camaari shirampari, yojocanajiri. Ineavaqueri irinti chancho. Icarajeiti chancho 2,000. Ishiajeitanaca imperitaitequi, ipiincajeitanaque

incajarequi, pocn, pocn, pocn; itsitiaeitanaque, pomiririri. ¹⁴ Itsaroajeitanaque shentajeivetariri, ishiajeitanaca, icamantapairi savicajeitatsiri nampitsiqui, aisati oantsipeequi. Otsoceanaca neantsi. Ipocajeitanaque atiri irameneri jaocarica icantacari chancho. ¹⁵ Ijatashijetiri Jesoshi, ineajeitapairi yora neaveitariniri camaari. Isavacaji, iquitsaataja, timanaji iquenqueshirentantari. Ari ineajeitapaaqueri, itsaroacaajeitapaacari. ¹⁶ Yora neasanotaqueriri incaranqui icamantajeitaqueri:

—Pineaqueri, yoavisacotajiri Jesoshi yora neaveitariniri camaari. Aisati yoviincacantaqueri chancho.

¹⁷ Impoiji icantasanojeitiri:

—Pijataje, eiro pipocajitsi aisati nonampiqui.

¹⁸ Ari itetanaja Jesoshi pitotsiqui. Icantasanovetari yora yoavisacotiri:

—Nocoaque noijatanaquempi.

¹⁹ Iro cantaincha, icantiri Jesoshi:

—Eiro pojatanatsi, ainti pijataje pinampiqui, anta pishanincaqui. Pincamantapeeri: “Ineshinoncatajana novincatsarite”.

²⁰ Ari ijatanaque neaveitariniri camaari Tecaporishiqui. Icamantajeitapairi maaroni atiri:

—Yoavisacotajana Jesoshi.

Yoajeitavaqueri atiri cavaco.

Yoavisacotiro Jesoshi irajashetatsiri.

(Mt. 9.18-26; Ir. 8.40-56)

²¹ Ari imonteanaja Jesoshi intatiquero. Yapatojeitavacari oshequi atiri anta otsapijaqui. ²² Yareetapaaca shirampari pajitachari Jairo, yora jivatacaajeitiriri atiri anta pancotsiqui yapatotantari. Ineapaaqueri, itiyeroashitapaacari Jesoshi.

²³ Icantasanotapaaqueri:

—Irotaintsi oncame noshinto. Pimpoque pimpamitapeero avisacotantajeari iroori, eiro ocamantatsi.

²⁴ Ari yoijatanaqueri, aisati yoijajeitanaqueri oshequi catsini apatotimentariri, yovetacajeitanaqueri. ²⁵ Ocarajeitaqueri tsinane irajashetatsiri. Ocaratacotaque osarintsite 12 irajashetantacari. ²⁶ Oshequi yaavinteenayevetaro, aiquero yoatsyeetaquerori. Atsipetashitacaro opinaventayevetacaro maaroni ashiyevetari. Te avisacotimateji, aiquero ojatati irajatanaque catsini. ²⁷⁻²⁸ Oquemaque icantacoyeetiriri Jesoshi: “Oshequi yoavisacotanti”. Osatecanacari oijajeitiriri, oquenapaaque itapiiqui. Oquenqueshiretanaca:

—Ariorica nantiteri iitsaare, aitaque navisacotanaje.

Ari antitaqueri iitsaare, ocaratanaji irajaveitani. ²⁹ Oquemavaitia maaririri, avisacotanaji. ³⁰ Aisati iriori Jesoshi, iquemashitavaitiaro itasorena. Ari ipitso-cashitanacari oijajeitiriri, icantiri:

—¿Janicampa antitaquenarori noitsaare?

³¹ Yacanaqueri iroamere:

—Tempa pineeriji yoshequitaque oijajeitimpiri. Yovetacayetaquempi. Aiquero picanti: “¿Janicampa antitaquenarori noitsaare?”

³² Yamenamenayetanaque irineero antitaqueriri iitsaare. ³³ Iroori tsinane, oshequi otsaroanaque, opcioncanaque, pio, pio. Iotanaque avisacotaji. Otiyeroashitapaacari, opincatsataqueri. Otsoteaquero ocamantasanotaqueri maaroni. ³⁴ Icantiro:

—Tsinane, pishiretaquena, irootaque paviscotantajari. Meeca pijataje, pinquimoshiretanaje. Aitaquenea paviscotajiri.

³⁵ Tequerata intsonquerome ineanatiro, ipocajeitapaaque inampirepee Jairo. Icantapaaqueri:

—Camanaque pishinto. ¿Paita pantsipetacanteariri pashereaque yoca oametantatsiri?

³⁶ Iquemavaqueri Jesoshi oca icantapaaqueri. Icantiri Jairo:

—Eiro picantashiretitsi, nainti pishiretea.

³⁷ Tecatsi irishinete oijatanaquerine. Irinti ishinetaque yora Petero, Santiacos, Joa. Iriotaque Joa irirenti Santiacos. ³⁸ Yareejeitapaaca ivancoqui Jairo. Ineapaaqueri atiripee: icajemajeitaque, iraashiretacojeitacaro, iraacojeitacaro. ³⁹ Iqueapaaque, icantapaquaqueri:

—¿Paita picajemacojeitantarori? ¿Paita piraacojeitantarori? Te oncamasanoteji evancaro, irointi omai.

⁴⁰ Ishirontimentajeitavacari, iro cantaincha yoisoquijajeitapairi. Yaanaqueri irini, jero inironi, aisati iroamere, iqueanaque anta onauenta evancaroni.

⁴¹ Yajiricavacotapaquaquiero acoqui. Icantiro:

—Tarita comi.

Acantiro aneanequi arori: “Evancaro, pintinaanaje”. ⁴² Otinaanaja evancaro, tancore, aniitanaji. Ocarataque osarintsite 12, irootaque omatantajari aniiveetaji. Yoasanojetanaque cavaco oshaninca. ⁴³ Icantasanotiri:

—Eiroya picamantayetritsi atiri. Meeca pimpero oyari.

6

Ijataque Jesoshi Nasaretequi.

(Mt. 13.53-58; Ir. 4.16-30)

¹ Ari ijatanaji Jesoshi, yareetapaaja iipatsitequi iriori. Yoijajeitajiri iroamere.

²⁻³ Impoiji quitaiteri imaoareajeitantarri, yoametantapaaji anta yapatotapinijeitacanta joriopee. Yoajeitavaqueri cavaco oshequi quemavaqueriri. Itseencajeitaqueri Jesoshi, icantajeiti:

—Tempa iriotaque ashanincasanori arori. ¿Jaoca oponeimotacariri oca yoametantiri? ¿Jaoca icantacari itasoncantayetantacari? ¿Caarimpa yoca vetsicapinitirori inchato? Iriotaque otomi Maria, tempa iriotaque irirentipee Santiacos, Jose, Jorashi, aisati Shimo. Aisati iritsiropee, tempa osaviquimojeitaquee aca.

⁴ Icanti Jesoshi:

—Ari ineacameetsajeivvetacari atiripee camantantatsiri. Iro cantaincha iriorica camantantatsiri ishanincasanori, ari intseenqueri.

⁵ Ari itseencajeitaqueri, irootaque caari itasoncantapinitanta anta inampiqui. Aparopee ipamiyetiri mantsiayetatsiri, yoavisacoyetiri. ⁶ Iro cantaincha te inquemisanajeiteriji ishaninca, irootaque yoantanacari cavaco:

—¿Paita caari iquemisantajeitantan?

Yantayetiri iroamerepee Jesoshi.

(Mt. 10.1-15; Ir. 9.1-6)

Iquenaquenayetanaque Jesoshi nampitsipeequi, yoametantayetanaque. ⁷ Aisati icoyeaqueri iroamere 12. Imataacaqueri iroavisacotanteariri neiriri camaari. Impoiji itiancajeitaqueri; itsipatavacaayetanaca, apitepee ijayetanaque nampitsipeequi.

⁸ Icantasanotavaqueri:

—Ariorica pijatanaque, tecatsiyea paanaque. Eiro paanaquetsi poyeari, eiro paanaquerotsi pitsarate. Aisati eiro paanaqueritsi piirequite. Irointiquea paanaque pioquiro.

⁹ Aisati pisapatotanaquea, iro cantaincha eiro piquitsaatarotsi poicoro.

¹⁰ Aisati icantavaqueri:

—Jaocarica pisavicapaquaqueri, aitaque pintimaanitapaaqueri, irosati pijatantajeari pashiniqui nampitsi. ¹¹ Eiorica yaacameetsajeitavaquempi nampitsiquiniri, aisati eiorica iquemisantajeitavaquempi, ari povaanajea, iriotanteari pishemacari, eiro pipiashitaritsi aisati.

¹² Ari ijajeitanaque iroamere. Icamantajeitiri atiripee:

—Pinquenqueshirejeitea, eiro pantapinitirotsi aisati caari cameetsatatsi.

¹³ Yoavisacojeitiri oshequi yatajeaoncane camaari. Itiritantayetari quejitsi oshequi mantsiariee, yoavisacoyetiri.

Yora Eroreshi yoacantaqueri Joa.

(Mt. 14.1-12; Ir. 9.7-9)

¹⁴ Oshequi quemacojeitiriri Jesoshi, irootaque iquemacotantacariri aisati pincatsari pajitachari Eroreshi. Icantayeti atiripee:

—Iriotaque Joa vaotisatantatsiri, camavetainchari: itinaanaja. Iro itinaantajari itasorentsiti.

¹⁵ Timatsi pashini cantayevetachari:

—Irioyeata Iriashini: itinaanaja.

Pashini cantayetatsiri aisati:

—Iriotaque camantantatsiri. Ishiajiri camantantaveitachaniri.

¹⁶ Ari iquemacotaqueri Eroreshi, icanti:

—Iriotaqueteemi Joa. Nopesacantavetacari itsanoqui iro cantaincha itinaanaja aisati.

¹⁷⁻¹⁹ Ari peerani Eroreshi yaapitsataqueri irirenti ijina. Ipajita irirenti Jeripi, iro ijiniantaveitaniri, Eroriashi.

Yora Joa icantapinivetacari Eroreshi:

—Te oncameetsateji paapitsateri parenti ijina.

Oquisanaqueri Eroriashi, ocoasanoveta oacanterime, iro cantaincha te irininteji yora ojimentajari. Oshequi ashereapinitaqueri, irootaque yaacantantacariri Joa, yoiminquia-cantaqueri caravosoqui tsompoina. ²⁰ Ipincatsavetacari iriori Joa, iotiri icameetsatasan-oti, iquemisantasanoniri Tasorentsi. Te irishinevetearoji ijina oacanteri. Itsaroacaap-inivetari Joa, iquenquetsatacapinitiri. Ineacameetsatiro icantiriri Joa, iro cantaincha te irioteji jaoca incanteari. ²¹ Omoncarataja iitaiterite itimantacari peerani Eroreshi. Yoacaajeitari ivincatsaririnte, ivincatsarite soraro, aisati ivincatsarite carireasati. Irootaque quitaiteri oacantantacariri Eroriashi Joa. ²² Oqueapaaque oshinto Eroriashi anta yoajeitanta omaninquetsaveetapaaque apaniro. Ineacameetsatavaquero Eroreshi aisati itsipajeitari. Icantiro evancaro:

—Pincoacotena paitarica picoaqueri. Aitaque nompaquempiro. ²³ Inequena Tasorentsi, ioti eiro namatavitimpitsi. Paitaricapee pincoacotaquenari, aitaque nom-paquempi. Picoaquerica nompaarantempi noipatsite, aitaque nompaquempi cashetani.

²⁴ Osoquijanaji iroori, osampitapaaquero iniro:

—¿Paita noncoacoteriri?

Acavaquero iroori:

—Iro pincoacoteriri iito Joa vaotisatantatsiri.

²⁵ Intsipaite opianaja aisati, opashitanajari pincatsari. Ocoacotapaquaqueri, ocantiri:

—Nocoi meeca pimpacotenaro matitaqui iito Joa.

²⁶ Oshequi yoashiretanaca. Tempa aitaque icantaquero incaranqui: “Eiro namatavitimpitsi”. Aisati iquemajeitavaqueri maaroni itsipajeitacari. Te meeca incoajeji iramatavitero. ²⁷ Ari itiancaqueri oantatsiri, icantavaqueri:

—Pamaquenaro iito Joa.

Ari ijatanaque anta yoiminqueaquerinta, ipesapaaqueri itsanoqui. ²⁸ Yamacotaquero matitaqui iiton, ipapaaquero evancaro. Iroori, ovaquenero iniro. ²⁹ Iquemacotaqueri iroamereni Joani, ari ijatashijeitaqueri. Yaanajiri, itijajiri.

Yoacaacari Jesoshi oshequi atiri.

(Mt. 14.13-21; Jr. 9.10-17; Joa 6.1-15)

³⁰ Ipiajeitanaja itiancane Jesoshi. Icamantajeitapaajiri maaroni yantayetaqueri. Aisati icamantacoyeratairo maaroni yoametantayetaqueri. ³¹ Irosati icantani oshequi atiri ipocashitapinitiri Jesoshi, aisati ijajeitanaji. Te irinijantareeriji, tecatsi incantea iroyea. Icantajeitavaqueri itiancane:

—Tsame ajate ayojeitanaquea anta tecatsi timatsine. Amaoreajeitavaqueta capichaji.

³² Ari ijajeitanaque, iquenanaque pitotsiqui. ³³ Ari ineajeitavaqueri oshequi atiri, iojeitavaqueri. Iponeajeitanaca ivancopeequi, ishianaca, ishitejeitanaca. Ishianaca, yanaacojeitaqueri, yapatotimentajeitavacari. ³⁴ Imitajanaque Jesoshi, ineapaatiiri oshequi apatojeitainchari. Irosati ineshinoncajeitantaacariri ishiacaantapaaqueri ovisha caari timatsine amenerineri. Oshequi yoamejeitapaaqueri paitapeerica. ³⁵ Ari ishaavijitanaji catsirincaiteri. Ipocashitiri iroamere, icantiri:

—Meeca anajeitaque aca caaraiteriqui, tecatsi avajeiteari. Aisati ishaavijitaque catsirincaiteri. ³⁶ Pintiancajeiteri atiri irijajeitajeta oantsiqui, nampitsiqui quempejiniri. Iramanantajeitapeeta iroyeari.

³⁷ Yacanaqueri, icantiri:
 —Pimperita avinti iroyeari.
 Icantiri iroamere:
 —¿Picoavetampa nojate namanantaite tanta nompantajeiteariri? Oshequi ompinatea noacantajeiteariri maaroni, eiro imoncaratarotsi airequite.

³⁸ Yacanajiri:
 —Jaoca ocaratiri pitantane timatsiri? Pijate, pamenaitero.
 Ari ineaitiro, icantaqueri:
 —Apapacoronii ocarati tanta, aisati apite shima.

³⁹ Icantiri:
 —Poisaviquerii atiripee ara saveshishiqui. Pampatoyeteri, aisati pinashitacaayeteari.

⁴⁰ Ari yapatojeitaqueri, isavicaejitanaque. Aparoni apatojeitainchari icarati 100 atiri. Itimi oshequi itsipapee apatojeitainchari aisati. Inashiyetaca pashinipee apatojeitainchari, icarayetaque 50. ⁴¹ Ari yaaquero Jesoshi tanta aisati shima, yamenanaque jenoqui. Icantiri iriri:
 —Ariove, Apa, aviro paquenarori oca noyearica.

Icarajaquero tanta. Ipaqueri iroamere irovayeteneri apatojeitainchari. Aisati shima, yovayetaqueneri maaroni atiri, ⁴² ari yoajeitanaca. Iquemajeitanaca, te intsonqueroji. ⁴³ Yaayetajiro timaarantapaajantsiri, ijaayetajiro cantiriqui ocarati 12. ⁴⁴ Icarajeiti ocarorii 5,000 shirampari.

Yanijjatiro Jesoshi incajare.

(Mt. 14.22-33; Joa 6.16-21)

⁴⁵ Impoiji itianquiri Jesoshi iroamere, icantiri:
 —Pintetanajea pitotsiqui. Pijivajeitanaquena intatiqueronta, anta Vetsairaqui: non-tiancajeitajerita ivancopeequi yoca apatojeitainchari.

⁴⁶ Impoiji ijatanaque Jesoshi toncaariqui, iquenquetsatacairy iriri.
⁴⁷ Otsitenijencaiteanaji, inianquijatacotanaque iroamere incajarequi. Itimaiti Jesoshi apaniro quipatsiqui. ⁴⁸ Ineaqueri iroamere, icomacomajeveta, iotaqueri imaojempequitaque. Aiquero oipiacotajiriri tampea. Ari oquitaitetimataji ijatashitajiri iriori Jesoshi. Yanijjatanajiro incajare, te intsitiyeji. Iro iravisanaquerime, ⁴⁹ iro cantaincha ineajeitavajiri, yanijjatapaajiro incajare. Ijijeivetavacari irio camaari. Ari icajemajeitanaque:

—Eeeee. Coraquenive camaari.

⁵⁰ Ari ineajeitavaqueri maaroni. Itsaroajeitanaque. Ineanatapaajiri:
 —Pinquimoshirejeitaje. Narotaque pocajantsiri. Eiro pitsaroashijieitatsi.
⁵¹ Itetapaaja pitotsiqui, itsipajeitapaajari, opeanaja tampea. Yoajeitanaque cavaco catsini. ⁵² Ineajeivetacari incaranqui itasonquiro tanta, iro cantaincha tequera inquenqueshireimateaji.

Yantayetiri Jesoshi anta Jenesaretequi.

(Mt. 14.34-36)

⁵³ Ari imonteanacaro, yareejeitapaaca Jenesaretequi. Yaatacojeitapaaque.
⁵⁴ Imitajajeitapaaque, intsipaite iojeitavaqueri atiri. ⁵⁵ Ishiashijetapaacari. Yamacojeitaqueri mantsiayetatsiri inareantariqui. Jaocarica itimapairi Jesoshi, aitaque anta yaacotanaqueneriri. ⁵⁶ Iquenaquenayeti nampitsijaniquipi, nampitsiqui antearo, aisati oantsiqui. Jaocarica iquenanaqueri Jesoshi yoayetaqueneri mantsiayetatsiri. Yoayetaqueneri nianqui nampitsiqui, icantajeitavaqueri:

—Pishinetenaro nompamititavaquempiro ocaratapai piitsaare.

Ari yavisacojeitaji maaroni pamititajeitavaqueriri iitsaare.

Yamejeitari joriopee.

(Mt. 15.1-20)

¹ Ari ipocapaaque variseopee, aisati aparopee oametantirori sanquenarentsi, iponeaca Jerosarequi. Yapatotimentapaacari Jesoshi. ² Ineajeitapairi iroamere, yoajeita iriori:

te inquivacoteaji. Icantajeiti intacaroniri: “Ariorica ayea, ajivate anquivacotea ancameetsashiretanteeari”. ³ Yora variseo yamejeitaro tequeratarica iroyeata, inquivacotasanota. Tempa yamejeitaro maaroni joriopee. Irompa eirorica inquivacotita, eiro yoatsi. Aitaque imoncaratajiro yoametantapinitiniri intacaroniri. ⁴ Ariorica imponeajea anta nampitsiqui nianqui, eirorica inquivacotasana tapaaajatsi, eiro yoapaajatsi. Aisati imoncaratashiyetaro oshequi paitarica yoameyetiriri ishanincani. Inquivajetapinitiro pajo, onero, oya, maaroni. ⁵ Ari isampijeitapaaqueri Jesoshi:

—¿Paita caari imoncaratantaro poamere yoametantapinitiniri intacantaqueeniri? Jeri yoca meeca oainchari, te inquivacoteaji: ainiro irantane.

⁶ Icantavaqueri Jesoshi:

—Oshequi pamatavitantayeti. Aitaque icamantacotitaquempini peerani Isayashini. Isanquenatini: “Icantashivetana yoca atiri: ‘Picameetsati’, iro cantaincha te inquenqueshiretenaji. ⁷ Yatsipetashitaro itiyeroimentavetana; ipincatsatashivetana. Pamatavishiyetacari pishaninca: picantanirovetari oca poametantavetari irootaque irineane Tasorentsi”. Queario oca icantaqueniri Isayashi.

⁸ Aisati icantiri Jesoshi:

—Pojocashitacaro icantavetimpri Tasorentsi, irointi piquemisantashitacaro yoametantapinitiri atiri. ⁹ Aitaque pitseencaquero icantiri Tasorentsi, irointi picoaque pimoncaratajero yoametantapinitiri intacantaroniri. ¹⁰ Icantini Moishishini: “Pimpincatsateri piri, aisati piniro”. Aisati icanti: “Aitaque iroasanqueteri Tasorentsi yora cantimatiriri iriri aisati iriniro”. ¹¹ Iro cantaincha picantashinirojeivetari ashaninca: “Ariorica pincashiacayeri Tasorentsi piquirette, ari pimpasanoteri. Irashinoncayearica piri, piniro, pincanteri: ‘Eiro nomatirotsi noncavintsayempi: nocashiacaaqueri Tasorentsi noquirette nomperiri’ ”. ¹² Aitaque meeca te pishineteriji pishaninca irintacoteari iriri, iriniro. ¹³ Picoacaqueri inquemisantero poametapinitiriri, aisati poametaqueri intseenquero icantiri Tasorentsi. Aitaque picantanirotapinitari: pojocacaayetiri ashaninca inquemisanti.

Icamantiri Jesoshi paita caari icameetsatanta atiri.

(Mt. 15.10-20)

¹⁴ Ari icajemajiri aisati apatojeitainchari, icantajeitiri:

—Pinquemajeitavaquena maaroni. Piojeitavaqueri oca. ¹⁵ Ocameetsati avajeitearo paitapeerica, eiro otimitsi antane: tecatsi oncantero avari ashire. Piquenqueshiretiro caari cameetsatatsi, irootaque pantapinitantarori. ¹⁶ Otimirica piyempita piquemantari, pinquemavaque.

¹⁷ Ari ijajetanaji apatotimentariri, iqueapaaji Jesoshi pancotsiqui. Isampitiri iroamere:

—¿Jaoca ocantari pishiacaaventiniriri?

¹⁸ Icantiri:

—Aisatimpa avirori, ¿tempa pinquemavaquena? Paitapeerica iroyeari ashaninca, ocameetsati, eiro otimitsi irantane. Tempa piotavaqueri. ¹⁹ Eiro omatirotsi ishire, ainti ojataque isheitoqui, impoiji ishitajiro.

Irootaque yoamejeitiriri ocameetsataque paitarica yoyeyetari. ²⁰ Aisati icantiri:

—Oca iquenqueshiretiri antacairiri ashaninca caari cameetsatatsi. ²¹ Te iroyearoji caari cameetsatatsi, irointi iquenqueshiretiro. Irootaque yantajeitantarori maaroni: yantavintsatiro tsinane caari yai, antavintsatiri shirampari caari ai, icoshiti, yoanti. ²² Yamentaro ijina, aimentari ojime. Inevetaro yashiyetari pashini atiri. Icamaaritanti, yamatavitanti, imayempitapiniti, imashitsati, icantimatanti, ishemeti. Te ontimeji iojeitantarri. ²³ Iquenqueshiretiro atiri caari cameetsatatsi, irootaque yantantarori: impoiji otimi irantanepee.

Yoavisacotajiro Jesoshi oshinto shirojenishiasato.

(Mt. 15.21-28)

²⁴ Impoiji ijatanaji Jesoshi Tiroqui. Isavicapaaque pancotsiqui, te incoaveteaji irioyeterime. Iro cantaincha tecatsi incantea irimanea. ²⁵ Otimi anta tsinane, yatajeaonquiero

oshinto camaari. Oquemacotavaqueri tsinane Jesoshi, ojatashitaqueri, otiyeroashita-
paacari. ²⁶ Caari oni jorio, oponeaca Shirojenishiaqui. Ocantapaqueri:

—Yatajeaoncaquero noshinto camaari, poavisacotajenaro.

²⁷ Icantavaqueri:

—Nojivatavaquerita noshanincasanori nintacoteari. Te oncameetsateji aapitsatajeri
yoari ajananequite, amperi otsiti iroyeari.

²⁸ Iroori acanaqueri:

—Je, queario. Aitaque iniri otsiti njanteaji. Yoatsopequitayetari atomi.

²⁹ Icantajiro:

—Je, cameetsa; queario picantaqueri. Cameetsa pijataje meeca, avisacotanaji pishinto.

³⁰ Opianaja ovancoqui. Oneapaajiro oshinto, onariaca omaamentoqui, avisacotaji.

Yora Jesoshi yoavisacotiri mayempivetachaniri.

³¹ Impoiji yovaanaja aisati Jesoshi, iquenanaji Tiroqui, Shiroqui aisati Tecaporishiqui.
Ari yareetapaaja incajarequi Carirequiniri. ³² Yameetapaaqueneri aparo shirampari
imayempiti, aisati imasontiti. Icantapaqueri:

—Pimpamitavaqueri, poavisacotajeri.

³³ Yora Jesoshi yojocanajiri apatotimentariri, apaniro itsipatanacari mayempi. Yoiminquiaqueneri iracotsapaqui iyempitaqui. Iquitiojaquero iracotsapaqui, ipanta-
queri ineneequi. ³⁴ Yamenanaque jenoqui, yaneencanaque, icantiri:

—Epeta.

Acantiri arori aneanequi: “Ovitareanaja”. ³⁵ Ovitareanaja iquemantari. Opeanaja
iniconeneveitani, cameetsajencatanaji ineaveetaji. ³⁶ Yapiitapinivetari:

—Eiroya picamantacotanatsi.

Iro cantaincha te inquemisanteriji, ariquero catsini icamantacotaqueriri. ³⁷ Aiquero
catsini yoajeitanaqueri cavaco Jesoshi. Icantajeitiri atiripee:

—Paitaquea, ocameetsatasanoti yantayetiri. Imatasanotaquero Jesoshi maaroni
yantayetiri. Iquemacaayetajiri mayempiveitachaniri, aisati yora masontiveitachaniri,
ineaveetacaayetajiri.

8

Yapiitajiro Jesoshi yoshequiajiro tanta.

(Mt. 15.32-38)

¹ Pashini quitaiteri yapatojeitaca aisati oshequi atiri, tecatsi iroajeiteari. Yora Jesoshi
icajemiri iroamere, icantavaqueri:

² —Nocavintsaaajeitaqueri yocapee. Iro nocavintsaaajeitantariri mavataque quitaiteri
itsipajeitaquena, te iroajeiteaji meeca. ³ Aajeitaqueri itashe. Timatsi aparopee poneain-
chari paricoti: ariorica nontiancavetajeari meeca ivancoqui, ari irimaoshirejeitanaque
nianqui avotsiqui, irimaotsajeitanaque.

⁴ Yacanaqueri iroamere:

—Jaoca ancanteari anquemacaajeitanteeariri tanta? Aca caaraiteriqui.

⁵ Isampitiri:

—Jaoca ocaratiri pitantane?

Icani:

—Ocarati 7.

⁶ Icantajeitiri apatotimentajeitariri:

—Pisavicajeite quipatsiqui.

Yaaquero tanta, ipasonquitiri iriri. Icarajaquero, ipajeitaqueri iroamere, yovaa-
jeitaqueri apatojeitainchari. ⁷ Itimaque aisati shivajaniqui aparopee. Ipasonquitaco-
taqueri aisati. Impoiji icantiri iroamere:

—Pimpajeiteri aisati shivajaniqui.

⁸ Ari yoajeitaca, iquemajeitanaca. Yaayetajiro timaarantapaintsiri, yoajiro cantiriqui.
Ocarati jaajanchari 7. ⁹ Icarajeiti oainchari 4,000. Impoiji itiancajeitajiri:

—Pijajeitaje pivancopeequi.

Icoaveta variseo irineerime Jesoshi intasoncantayete.

(Mt. 15.39; 16.1-4; Ir. 12.54-56)

¹⁰ Itsipajeanajari iroamere, itejeitanaja pitotsiqui. Ijajeitanaji anta Tarimanotaqui.

¹¹ Ari ipocapaaque variseo. Iquisatsatiri, icantiri:

—Jentsite, pintasoncantayete niotantempi aviotaque Tasorentsi, impoijiquea ariorica nonquemisantanirottempi.

¹² Oshequi catsini ocantimoneentacari Jesoshi. Icanti:

—¿Paita icoajeitancari maaroni atiri nonijayeri nontasoncante? Queariotaque oca noncamantasanotempi, eiro ineanatsi nontasoncantayete.

¹³ Ari ijatanaji Jesoshi, itetanaja aisati pitotsiqui. Ijatanaji, imonteanaja intatiquero.

Icantiri Jesoshi: "Yamatavitimpicari variseo".

(Mt. 16.5-12)

¹⁴ Ipeacojeitanacaro iroamere iraanaquerome tanta pitotsiqui, aparo yaanaque.

¹⁵ Icantiri Jesoshi:

—Paamaventearo tapiacaarori tanta, yashitari variseo, aisati yashitari Eroreshi.

¹⁶ Ari icantavacaanaca, icantajeiti:

—Tecatsi atantane, irootaque icantantaqueeri: "Paamaventearo tapiacaarori tanta".

¹⁷ Iotacotaqueri Jesoshi, icantiri:

—¿Paita picantavacaantari: "Tecatsi atantane"? ¿Paita caari piquemanta? ¿Paita caari piotanta? ¿Paita caari piquenqueshiretanta? ¹⁸ Otimaveta poqui, ¿paita caari pineanta? Otimaveta piquemantari, ¿paita caari piquemanta? ¿Paita caari pinquenqueshiretanjaro ¹⁹ noshequiantacarori tanta? Ocaraveta apapacoroni tanta, icarati oacarori 5,000 shirampari. Ari paajiro timaarantapaajantsiri. ¿Jaocampa ocarati jaajanchari cantiri?

Yacajeitanajiri:

—Ari ocaratiri 12.

²⁰ Icantiri Jesoshi:

—Aisati pashini, ocarati tanta 7, icarati aisati oacarori 4,000. Paajiro aisati timaaran-tapaajantsiri. ¿Jaoca ocaratiri cantiri pijaajiri?

Icantajeitiri:

—Ocarati 7.

²¹ Icantiri:

—¿Tequerampa meeca piotavaquero? Te iro nonquenquetsatacote tanta incaranqui, irointi noquenquetsatacoti yoametantiri variseo aisati Eroreshi.

Yoavisacotajiri Jesoshi quitapoajaquiri.

²² Ari ijajeitanaji Vetsairaqui. Yameetapaqueneri quitapoajaquiri. Icantapaaqueri:

—Pimpamitavaqueri iramenantajeari.

²³ Ari yacatsatanaqueri quitapoajaquiri, yaanaqueri otsapitapaaca nampsisi. Iquitio-jaqueri iroquiqui, ipamijaquitaqueri. Isampitaqueri:

—¿Amenavetajimpimpa?

²⁴ Yamenananaji, icanti:

—Je, namenavetajari, noneavetajari shiramparinta, iro cantaincha te inconijatasanoteji, ishiavetacaro inchato, aniiatantsiri.

²⁵ Yapiitajiri aisati, ipamijaquitajiri iroquiqui. Impoiji yamenasanotanaji, yavisaco-tasanotanaji. Yamenananaji, conijaitetasanotanaji maaroni. ²⁶ Icantiri Jesoshi:

—Eiroyea piquenanajitsi nampsisi, apatiroyea povaanajero pivancoqui.

Iotiri Petero Quirishito ini Jesoshi.

(Mt. 16.13-20; Ir. 9.18-21)

²⁷ Ari yovaanaja Jesoshi, itsipatanajari iroamere. Ijajeitanaque nampsipeequi anta Sesareajiripoqui. Inianquitanaque avotsiqui, isampijeitaqueri iroamere:

—¿Paita yaamaajeitaquenari atiripee?

²⁸ Yacanaqueri:

—Aparopee aamaayetaincha aviro Joani vaotisatantatsiniri. Irio itsipa yaamaaqueMPI aviro Iriashini. Itsipapee aisati icanti aviro camantantatsiniri, pitinaanaja.

²⁹ Isampijeitaqueri:

—Avirojei, ¿paita piquenqueshirejeitiri?
 Yacanaqueri Petero:
 —Avirotaque naamaajeitacari peerani: aviro Quirishito.
³⁰ Icantasanotiri:
 —Eiroyea picamantacotanatsi.

*Icantajeitiri Jesoshi: "Noncamimentajeitempi".
 (Mt. 16.21-23; Ir. 9.22)*

³¹ Ari yoametajiri aisati:

—Noponeaca narori inquitequi, natiritapaaque. Coajica oshequi nonquemaatsicati-mentajeitempi. Queario, intseencaquena pincatsaripee, aisati jivatacaaajeitiriri saserote-pee, aisati oametantirori sanquenarentsi: intseencajeitaquena, iroacantajeitaquena. Noncamaque, iro cantaincha oncarataque mava quitaiteri, irosati nontinaantanaajeari.

³² Aitaque icantasanojeivetacari. Yora Petero yaanaqueri quempequetiji ara, icantaqueri:

—¿Paita picantantarori oca? Te oncameetsateji poamaimatea.

³³ Ari ipitsocashijeitacari Jesoshi iroamerepee, yamenajeitanaqueri. Irosati ishintsitsatantacariri Petero:

—Piquempetacari Satanashi. Pijate, te pincameetsateji. Piquempejeitacari atiri, te pinquenqueshireempa. Te piterojo icoacaquenari Tasorentsi.

Jaoca ancantajeiteari aijatanteariri Jesoshi.

(Mt. 16.24-28; Ir. 9.23-27)

³⁴ Impoiji icajemiri Jesoshi apatojeitachari aisati iroamere. Icantiri:

—Ariorica picoaque pojajeitena, eiro pantirotsi caari cameetsatatsi picoashiyyetvari avirori. Pojajeitanaquena, pinquearioventajeitenaro maaroni noncoacaquemperi: piojeite ariorica pincamimentena. ³⁵ Terica pincoyeji pincamimentena, patsipetashita pitimi, ainti pijate Sharincaveniqui. Iro cantaincha ariorica pincamimentena, aisati ariorica pinquemisantacayeteri atiri, eiro patsipetashitarotsi: pincantaitatiyempani panee anta inquitequi. ³⁶ Ariorica pashijeitearo maaroni timayetatsiri aca quipatsiqui, aintiquea pijate Sharincaveniqui, tempa pantsipetashitearo pashiyetearo. ³⁷ Ariorica pijate Sharincaveniqui, ¿jaoca pincanteari pijatanteari inquitequi? ³⁸ Tseencantatsiri inajeiti maaroni timajeitatsiri, aisati yantapinijeitiro caari cameetsatatsi. Noponeaca inquitequi, natiritapaaque. Coajica nojataje inquitequi: meeca, ariorica pipashiven-tacaana, aisati ariorica pipashiventacaaro noneane, coajica nompiapaajerica, nom-pashiventacaapeempi avirori. Aisati ariorica nompiaje nompincatsaritasanotapaaque, nonquempetapaaqueari Apa, aisati nontsipajeitapaaqueari inampirepee.

9

Ipashinitimotanaqueri Jesoshi iroamere.

(Mt. 17.1-13; Ir. 9.28-36)

¹ Aisati icantajiri Jesoshi:

—Queariotaque oca noncamantasanoempri. Pamene, acarajeitaque meeca aca. Eirotarica picamajeititsi, ari pineavaqueri Tasorentsi impoque, impincatsaritapaaque, intasorentsitapaaque.

² Avisanaque 6 quitaiteri. Yaanaqueri Jesoshi yora Petero, Santiaco, aisati Joa, ijivatanaqueri anta antearoqui toncaari. Ari itimajeitapaaque apaniro. Ipashinitanaca Jesoshi, ipashinitimotanaqueri oijajeitiriri. ³ Oshipaquireanaque iitsaare. Oquitamarotanaque catsini. Aca quipatsiqui te aneeroji catsini quempetearoneri.

⁴ Imapocapaaca, iconijatimotapaaqueri Iriashini aisati Moishishini, iquenquetsatacaa-paaqueri Jesoshi. ⁵ Ineaveetashitanaca Petero:

—Oametanari, tempa ocameetsatasanoti pamaquena aca, noneantaquemperi. Meeca nocoaque novetsicajeitempi mava pancotsijaniqui: aparoni pashi, aparoni irashi Moishishi, iro otsipa irashi Iriashi iriori.

⁶ Itsaroasanojeitanaque catsini, irootaque caari iotanta Petero paitarica incanterimeri. ⁷ Otsimancajeitapaaqueri mencori. Omapocanaca irineane Tasorentsi menkoriqui, icantajeitaqueri:

—Iriotaque notomi nonintasanotiri, pinquemisanteri.

⁸ Intsipaita yamenayevetanaca iroamere, tecatsi irinee, irinti apaniro Jesoshi. ⁹ Irosati ipiajeitananaja, yoirincajeitanaja. Icantasanotiri Jesoshi:

—Eiroyea picamantacotirotsi oca pineaqueri. Coajica nonceme. Ariorica nontinaanaje, irosati pincamantacotantenari oca pineaqueri meeca. Tempa noponeaca inquitequi, natiritatapaaque.

¹⁰ Ari iquemajeivetavacari, irosati isampitavacantanaca paita ojitari oca icantiriri Jesoshi: “Coajica nonceme. Nontinaanaje aisati”. ¹¹ Isampijetaqueri:

—¿Paita icantantari oametantirori sanquenarentsi: “Tequeratarica impoque Quirishito, irijivatapaaque Iriashini”?

¹² Irriori Jesoshi yacanaqueri:

—Queario icanteetiri: “Irjivatapaaque Iriashini, iroameetsajeitapaaque maaroni”. Noponeaca narori inquitequi, natiritatapaaque, tempa naro isanquenatacotiniri peerani: “Oshequi inquemaatscatearo, aisati oshequi intseencajeitavaqueri”. ¿Paita icantantoniri oca? ¹³ Meeca noncamantempi: aitaque peerani ipocaji aisati Iriashini. Oshequi yantanayetaqueri, imoncarataquero isanquenatacotiteetacariniri.

Yoavisacotiri Jesoshi yatajeaoncane camaari.

(Mt. 17.14-21; Ir. 9.37-43)

¹⁴ Ari ipiajeitanaja anta isavicajeitaquenta iroamerepee pashini. Ineajeitapaaqueri itsipajeitapaaqueri oshequi apatotimentacariri. Itimi oametantirori sanquenarentsi, ineanajeitiri yora iroamerepee Jesoshi. ¹⁵ Ari ineajeitavaqueri Jesoshi, ipocaji, yoasantavaqueri cavaco. Ishiashijeitanacari, ivetsajeitavacari. ¹⁶ Isampitapaaqueri:

—¿Paita pineanatacojeitiri?

¹⁷ Yacanaqueri aparoni shirampari, icanti:

—Oametanari, namaquemperi notomi. Yatajeaoncapinitiri camaari. Imasoniaqueri notomi. ¹⁸ Irnjiricapaajeririca, ipishoncajiri quipatsiqui, ishimoretacaanacari, yatsicanajitacaanacari, iquisoporoquitacaanacari. Nocantavetari poamere: “Poavisacotajeri”. Teve, te irimateroji.

¹⁹ Yacanaqueri Jesoshi:

—Te pinquemisantimajeiteji. ¿Jaoca oncarate piojeite? Noametapinijeivetaquempi, iro cantaincha te pinquemisantajeitavaque. Jentsite, pamaquenarite pitomi.

²⁰ Ari yamaqueneri. Yora camaari, inepaaqueri Jesoshi. Yampitsitacaanacari jananequi, ipariacaanaqueri quipatsiqui, poron. Ipinaironcapinaironcatanaca, ishimoretanaque ivantequi. ²¹ Yora Jesoshi isampitaqueri iriri jananequi:

—¿Jaoca ocaratiri intantanacari?

Yacanaqueri:

—Ainiroquerani ijananequitapaini. ²² Oshequi yojocacaapinitari paamariqui, aisati ni-jaqui. Icoaveta iroamayerime. Pitasoncantirica, pineshinoncatajena, poavisacotajenari.

²³ Icanti Jesoshi:

—¿Paita picantantanari: “Pitasoncantirica”? Pinquemisanterica, aitaque irimataque-mpiro Tasorentsi paitapeerica.

²⁴ Antearojenca icanti iriri jananequi:

—Noquemisantaveta. Tericampa nonquemisantsanote, pinquemisantacaasanotena avinti.

²⁵ Irriori Jesoshi ineavaqueri ishiashijeitapaaqueri oshequi atiri. Iquisatsataqueri camaari, icantiri:

—Avironirotaque camaari. Pimasontitacanti, pimayempitacanti. Meeca nocantasanotimpi, poimpacanajeriqueti, eiro patajeaoncajiritsi aisati.

²⁶ Icjemanaque camaari, yampitsitacaanacari jananequi, yojocanajiri. Yora jananequi iquempevetanacari camatsiri. Oshequi cantayetanaintsi:

—Camanaque inaque.

²⁷ Iro cantaincha yacatsavacotajiri Jesoshi, yoitinaajiri, icatianaja iriori. ²⁸ Impoiji queajeitapaaqui pancotsiqui. Iojeitaca iroamere, isampijeitiri:

—¿Paitaquea caari nomatantaro narori noavisacoteri?

²⁹ Yacanaqueri:

—Oshequi ishindsighti yora camaari, irootaque caari pimatantari poavisacotajeri yora yatajeaonquiri. Aisati maaroni quempejeitariri, eiro pimajeitiritsi. Iro cantaincha, pincantasanofteririca Tasorentsi, ari iramitacotempi poavisacotajeri yatajeaoncane camaari.

Yapiitajiniri Jesoshi iroamere: “Aitaque noncamaque”.

(Mt. 17.22-23; Ir. 9.44-45)

³⁰⁻³¹ Ari yovaanaja Jesoshi anta, iquenanaji Carireaqui. Ari icoaque iroameteri iroamerepee apaniro, irootaque imantanajari ijajeitanaji. Icantanaqueri:

—Noponeaca narori inquitequi, natiritapaaque: coajica iraacaanteetena. Irayena atiri, iroyena. Ari noncamasanovetaquea, impoiji, omavatapaaque quitaiteri, ari non-tinaanaje aisati.

³² Iro cantaincha te iriojeitavaqueroji iriori oca icamantavetacariri. Itsaroajeitanaque irisampiterime.

Jaoca ancanteari ampincatsariventante.

(Mt. 18.1-5; Ir. 9.46-48)

³³ Ari yareejeitapaaca Caperenaoqui, isavicajeitapaaque pancotsiqui. Isampitiri Jesoshi iroamere:

—¿Paita picantavacaanacari avotsiqui?

³⁴ Imajerejeitanaque iriori, ipashiventajeitanaca. Icantavacaajeitanaca anta avotsiqui, icanti:

—Meeca acarajeitica, ¿janicampa anacotantatsineri impincatsarite?

³⁵ Ari isaviqui Jesoshi. Icajemiri iroamere, icantiri:

—Ariorica pincoye pimpincatsariventante, pintacojeiteari pishaninca maaroni, aisati pamitacojeiteri, pineshioncajeiteri.

³⁶ Yamaqueneri aparoni jananequi. Isatecapaaqueneri nianqui, yavitsanotavaqueri. Icanti:

³⁷ —Pishirejeitena narori, impoiji pincavintsayeri jananequi. Ariorica pincavintsayeri, aisati narori, pincavintsayena. Aisati oquempetaca, ariorica pincavintsayena, te naro pincavintsaasanote, irintquea Apa tiancaquenari.

Yoavisacotanti pashini quemisantatsiri.

(Mt. 10.42; Ir. 9.49-50)

³⁸ Impoiji yora Joa icantanaqueri:

—Oametanari, noneajeitaqueri shirampari, icanti: “Noquemisantaqueri Jesoshi, irootaque nojocantacariri camaari”. Te meeca ancarajeiteriji iriori aca, irootaque notsaneacotantariri.

³⁹ Icanti Jesoshi:

—Eiro pitsaneacotaritsi. Tempa nomatacaaqueri itasoncanti, eiro meeca icanti-matanatsi irinti. ⁴⁰ Janicarica caari quisamenteene iringataque acarajeitiri.

Icantiri Jesoshi: “Pincavintsaavacaajeitea”.

(Mt. 18.6-9; Ir. 17.1-2)

⁴¹ Aisati icantiri Jesoshi:

—Ariorica iringataquempi atiri aviro quemisantanari, irootaque incavintsavauquempi, aitaque impinateri Apa. Quearioaque oca nocamantasanotimpri. ⁴² Jeri yoca jananequi, quemisantanari: eiro catsini pantacairitsi caari cameetsatatsi. Pantacay-eririca, iroasanquetayempi Tasorentsi, pashinoncaasananotaquea. Oncameetsateme pincamiteame peerani, eiro pashinoncaitame. ⁴³ Jero oca noshiacantempri meeca piotanteari te oncemeetsateji catsini pantero caari cameetsatatsi. Ariorica antacayem-piro paco caari cameetsatatsi, pimpeshero. Aitaque ocameetsatiri pijapontsoquitanaque inquitequi, oncanteata anta paneantasanotapaajeari. Te oncemeetsateji catsini ontine apite paco: eiorica pipeshirotsi, irootaque pijatanteari Sharincaveniqui. Aitaque anta otimiri paamari caari tsivacanetatsi, aisati iriori yora quenitsi caari caamanetatsi. ⁴⁴ Eiro

anta icamitsi quenitsi, aisati eiro otsivacanetitsi paamari iroori. ⁴⁵ Aisati ariorica antacayempiro piiti caari cameetsatatsi, pimpesajero. Aitaque ocameatsatiri pijapontso-quitanaje inquitequi, onanteata anta paneantasanotantapaajeari. Te oncameetsateji ontine apite piiti: eirorica pipeshirotsi, irootaque pijatanteari Sharincaveniqui. ⁴⁶ Eiro anta icamitsi quenitsi. Aisati eiro otsivacanetitsi paamari iroori. ⁴⁷ Aisati ariorica antacayempi poqui caari cameetsatatsi, pinquitsoreero. Ari ocameetsatiri pijnaroquitanafe anta ipincatsaritinta Tasorentsi. Te oncameetsate ontine apite poqui: eirorica piquitsoreirotsi, irootaque irojocanteetempiri Sharincaveniqui. ⁴⁸ Eiro anta icamitsi quenitsi. Aisati eiro otsivacanetitsi paamari iroori. ⁴⁹ Avirojeitaque quemisantajeitanari, irootaque inquisajeitantempiri caari quemisantajeitatsi. Arriorica pinquemisantajeitena, ompomerentsitimotempi. ⁵⁰ Ocameetsati tivi. Irompa ariorica ompeanaquea ovoteare, tecatsi oncantajea ompoteataje aisati. Aisati piquempetaca avirori: ariorica paacameetsatavacaajeitea, tempa ocameetsati: pincanteani paacameetsatavacaajeitea, maaroni.

10

Ijataque Jesoshi Joriraniqui intatiquero.

¹ Ari yovaanaja Jesoshi, iquenanaji Joreaqui. Aisati ijataji intatiquero Joriraniqui. Yapatotimentajari aisati oshequi atiri, yoamejeitapajiri. Tempa aitaque yametaro yoametantapiniti.

Icanti Jesoshi: “Eiro pojocajirotsi pijina”.

(Mt. 19.1-12; Ir. 16.18)

² Ipocashitapaaqueri variseo. Icoaveta incomitacayearime Jesoshi, irootaque isampi-jeitantapaacariri:

—¿Oshinetantampa irojocajero shirampari ijina?

³ Yacavaqueri:

—¿Paitampa icantimpiniri Moishishi?

⁴ Yacajeitanaqueri iriori:

—Icantini Moishishi: “Pisanquenatajenero pijina, pincamantajero: ‘Nojocajempi’. Impoijiquea oshinetantajea irosati pojocantajearori”.

⁵ Icantanaqueri Jesoshi:

—Te incoaveteaji Tasorentsi pojocajero pijina, iro cantaincha te ontineji piquen-queshireantari, irootaque isanquenatantimpironiri Moishishini oca. ⁶ Peerani intantacarori yovetsicantaque Tasorentsi, yovetsicaqueri shirampari. Aisati iroori tsinane yovetsicaqueri. ⁷ Irootaque yojocantariri shirampari iriri, aisati iriniro, irantearori ijina. ⁸ Ari icarati shirampari, aisati tsinane: apite inavetaca. Iro cantaincha, ariorica irayero ijina, inquempetaquea apaniro irinaque: quiso iroavacaya. ⁹ Ari ineakeri Tasorentsi apaniro inaque, meeca eiro pinijantareacaajiritsi.

¹⁰ Ari itimapaaji anta pancotsiqui. Isampitajiri aisati iroamere:

—¿Jaoca ocantari oca picantaqueriri?

¹¹ Icantiri:

—Janicarica joquerone ijina, ariorica iraaje otsipa tsinane, tempa iraimentearo ijinasanori. ¹² Aisati oquempeta iroori tsinane, ariorica ojocajeri ojime, aajerica pashini shirampari, tempa aimenteari ojimesanori iroori.

Yora Jesoshi ineacameetsataqueri jananequipee.

(Mt. 19.13-15; Ir. 18.15-17)

¹³ Ari yameetapaaqueneri jananequipee, icantapaaqueri Jesoshi:

—Pincanteri Tasorentsi cameetsa irisavicacaajeiteri yoca jananequipee.

Iro cantaincha icantavaqueri iroamerepee:

—Eiro pamiritsi jananequipee, pashereiricari oametanari.

¹⁴ Te onimoteriji Jesoshi yantiri iroamere. Icantiri:

—Pishineteri impocashitenata jananequi. Eiro pitsaneanatsi. Pinequeri yoca jananequi, ishirejeitaquena: ipincatsariventajetiri Tasorentsi maaroni quempejeitariri iriori. ¹⁵ Queariotaque oca nocamantasanotimpiri, irinti jananequi ipincatsatiri

Tasorentsi. Irompa irinti yora caari shiiri jananequi, yora caari pincatsatiri Tasorentsi, eiro ijatitsi irinti anta ipincatsaritinta.

¹⁶ Yavitsanojeitavaqueri jananequi, ipamitaqueri iitoqui. Icantajeitiri:
—Cameetsa irineshiloncatempi Tasorentsi.

Ijaticari Sharincaveniqui ashitaarantincari.

(Mt. 19.16-26; Ir. 18.18-27)

¹⁷ Ari ijataji Jesoshi, iquenanaji avotsiqui. Ishiapaaca aparoni shirampari, itiyeroashitapaacari. Icantiri:

—Oametantsatsiri, cameetsari pini. ¿Paitampa nanteri naneantajeari, noncantatiyempani?

¹⁸ Icantiri:
—¿Paita picantanari: “Cameetsari pini”? Tecatsi cameetsatatsine, irinti apaniro Tasorentsi icameetsati. ¹⁹ Piovintsataquero oca icantacantiniri Moishishini: “Eiro poantitsi. Eiro painmentarotsi pijina. Eiro painmentaritsi pijime. Eiro picoshititsi. Eiro pitseeyacotaritsi atiri. Eiro pamatavitantsi paitanteariri yashiyetari pishaninca. Pimpincatsateri piri, aisati piniro”.

²⁰ Icantanaqueri iriori:
—Pamene, ainironi nevancaritapaini, aitaque notsoteaquero maaroni ocapee, irosati meeca.

²¹ Yora Jesoshi, yamenanaqueri, inintaqueri. Icantaqueri:

—Ainiro apanivani caari pimati. Pijate meeca pimpimantayetero maaroni pashiyetari. Pimpashijeiteari caari ashitaarantachane, pashini paapaaje pivaararo inquitequi. Im-pojii, tsame, pojatanaquena.

²² Iquemavaitiiri icantaquerirri, yoashiretanaca. Iro yoashiretantanacari oshequi timimotiriri irovaararo. Icantavorotanaca, ijatanaji. ²³ Ari ipitsocashitanacari Jesoshi iroamere, icantiri:

—Yora ashitaarantachari opomerentsitimatari irijate anta ipincatsaritinta Tasorentsi.

²⁴ Iquemavaitiiri iroamere, yoajeitanaque cavaco. Yapiitajiniri aisati Jesoshi, icantiri:
—Evancari, aitaque opomerentsitaca pijate anta ipincatsaritinta Tasorentsi. ²⁵ Tempa opomerentsitaca inqueero cameoy omoroqui quitsapi. Iroquea irointi pomerentsitasanotachari irijate ashitaarantachari anta ipincatsaritinta Tasorentsi.

²⁶ Yoajeitanaqueri cavaco catsini iriori. Icantavacaanaca:

—¿Janicampa meeca avisacotajantsine? Opomerentsitasanotaca.

²⁷ Yamenanaqueri Jesoshi, icanti:

—Eiro imatashitarotsi atiri iroavisacotajea irisati, irintquea Tasorentsi matacayerine iroavisacotajeri. Tecatsi pomerentsitimatotearine irinti.

Yora Tasorentsi impinajeiteri maaroni oijajeitiriri Quirishito.

(Mt. 19.27-30; Ir. 18.28-30)

²⁸ Impoiji Petero icantanaqueri iriori:

—Naroqua nainti, aitaque nojocayetaquero maaroni, pitarica nashijeiveitaniri, nojatanaquempi meeca avirori.

²⁹ Icanti Jesoshi:

—Queariotaque oca noncantempi. Ariorica pincoaque pojatanaquena, eiro patsipetashitarotsi pojocayetero pinampi, pirentipee, pitsiropee, piniro, piri, pijananequitepee, poanepee. Aisati ariorica pincoaque pinquemisantacayeri pishaninca, eiro patsipetashitarotsi. ³⁰ Queario, inquishimentempiro piquemisantaquena, ompomerentsivetea, iro cantaincha eiro patsipetashitarotsi. Ariorica pojocanaquero aparo, impajempi Tasorentsi 100: pivancopée, pirentipee, pitsiropee, piniropee, pijananequitepee, poanepee, maaroni. Aitaque coajica ontimimojeitempi oshequi anta paneasanojeitapajenta, pincantaitatiyempani. ³¹ Ainiro pincatsarivetachari meeca, iro cantaincha coajica eiro ipincatsaritajtsi; ainiro meeca yora caari pincatsariyetatsi, iro cantaincha coajica impincatsarite irinti.

Yapiitajiniri aisati Jesoshi: “Noncamaque”.

(Mt. 20.17-19; Ir. 18.31-34)

³²⁻³³ Ari iquenajeitanaque avotsiqui, irotaintsi irijajeite Jerosarequi, ijivatanaque Jesoshi. Yoajeitanaqueri cavaco oijajeitiriri, aisati itsaroajeitanaque. Ari yapatotiri aisati yora 12 iroamere, icantiri:

—Pinquemena. Tempa noponeaca inquitequi, natiritapaaque. Meeca ajate Jerosarequi. Coajica iraacanteetena anta, iraavaquena jivatacaajeitiriri saserotepee, aisati oametantirori sanquenarentsi, iroacantaquena. Iraacantajena aisati, iraantenari pashinisati atiri. ³⁴ Irishirontimentajeitaquena, inquitiojena, impasanatena, iroyena. Omavatapaaque quitaiteri, irosati nontinaantanajeari.

Icantiri Jesoshi jaoca incanteari impincatsaritanteari.

(Mt. 20.20-28)

³⁵ Ipoqui quempeji Santiacos, jeri Joa, yora itomipee Severeo. Icantiri:

—Oametantsiri. Nocoaque pishinetenaro paitarica noncoacotempiri.

³⁶ Icantavaqueri Jesoshi:

—¿Paita picoiri noshinetempiri?

³⁷ Icantiri:

—Coajica pimpincatsaritasanoote, pishinetena nosaviquimotempi pacosanoriqui. Irio iyeca irisaviquimotempi pampatequi, nonquempejeittempi avirori pipincatsariti.

³⁸ Icantiri Jesoshi:

—Te pioteji paitarica picantaquenari. Pamene, oshequi nonquematsicatearo narori, ¿arimpa pimatero oshequi pinquematsicatearo avirori?

³⁹ Icantanaque iroamere:

—Je, ario nomataquero.

Icantiri:

—Je, aitaque ontima coajica pinquematsicateari. ⁴⁰ Iro cantaincha tecatsi noncantea noshinetempi pisavique nacosanoriqui, aisati nampatequi. Irintuea cantatsineri Tasorentsi janicarica saviquimotenaneri: iotitacarini peerani yora saviquimotenaneri.

⁴¹ Iquemajeitantarcariri yora itsipapee iroamere, iquisanentanaqueri Santiacos, aisati Joa. ⁴² Icantajeitiri Jesoshi:

—Caate, pimpocajeite. Pioti itimi ivincatsaritepee pashinipee atiri. Iperanayetacari ishaninca iriori. Aisati yora savicacaajeitiriri iriori, iperanajeitacari ishaninca. ⁴³ Eiro piquempejeitaritsi avirori. Aintiquea ariorica pincoaque pimpincatsariventajeiteri pishaninca, pintacojeiteari maaroni pitsipajeitari. ⁴⁴ Aisati ariorica pincoaque pisavacante, ari pintacojeiteari maaroni pitsipajeitari. ⁴⁵ Noponeaca narori inquitequi, natiritapaaque. Te iro nompocantea nonampiteari atiri, iroituea nopolanta nintacojeiteari itsipapee. Aisati noncamimenteri oshequi atiri, noavisacotanteariri.

Yoavisacotiri Jesoshi Timeojani.

(Mt. 20.29-34; Ir. 18.35-43)

⁴⁶ Ari yareetaca Jesoshi anta nampitsiqui pajitachari Jerico. Yovaanaja aisati, itsipajeitanacari iroamerepee aisati oshequi apatojeitainchari. Ainiro isavacaiti avotsinampiqui shirampari pajitachari Timeojani, iriotaque itomi Timeo. Icamarajati Timeojani, icoacotapinitiri atiri impashiteari quirequi. ⁴⁷ Iquemacotavaqueri impoque Jesoshi, yora nasaretesati. Iroquera iquemacotavaqueri, icajemavaqueri, icantiri:

—Jesoshi, tempa aviro ishanincani Iravirini, pineshinoncatapaajena narori.

⁴⁸ Oshequi atiri ishintsitsajeitaqueri:

—Pimajerete.

Iro cantaincha aiquero catsini icajemasanotanaji aisati:

—Aviro quempetajariri Iravirini. Pineshinoncatena narori.

⁴⁹ Icatiapaaca Jesoshi, icanti:

—Pincajemerri.

Icjemeetiri camarajari, icanteetiri:

—Piveshireanaquea, pincatianaje. Icajemimpi yonta.

- ⁵⁰ Irosati yojocantanacaro yoicotari, icatianaca, cati. Ijatashitanaqueri Jesoshi.
⁵¹ Icantavaqueri Jesoshi:
—¿Paita picoacotanari? ¿Jaoca noncantajempiri?
Yacanaqueri camarajari:
—Apa, nocoaque namenaje.
⁵² Icantiri Jesoshi:
—Meeca pijataje. Pishiretaquena, irootaque pavisacotantajeari.
Irosati yamenantanaja, yojatanajiri avotsiqui.

11

Iyatanaque Jesoshi Jerosarequi, ipincatsajeitavaqueri atiripee.

(Mt. 21.1-11, 14-17; Ir. 19.28-40; Joa 12.12-19)

- ¹ Iquempejijeitapaacaro Jerosarequi, Vetejajequi, aisati Vetaniaqui: onauenta toncaari pajitachari Orivomashi. Yora Jesoshi itiancaqueri iroamere apite, ² icantavaqueri:
—Pijatapainte anta nampitsiqui onta amontetacari. Pareetapaaquearica, pineapaaqueri aparoni voro, tequera irantearitasanote, tequera inquijacoyeeteari. Ainiro itsat-acota: pintsatacoreapeeri, pamaquenari. ³ Arriorica incanteetavaquempi: “¿Pitaquea pitsatacoreantariri voro?” Ari pincantanaqueri: “Irio coiriri Avincatsarite. Coajica iroimpiajempiri aisati”. Ari irishinetempi.
- ⁴ Ari ijatanaque iroamere. Ineapaaqueri voro anta avotsiqui. Itsatacota ashitacoroqui pancotsi. Itsatacoreapaaqueri. ⁵ Ainiro isaviqui atiri, isampitavaqueri:
—¿Paita pantiri? ¿Paita pitsatacoreantariri voro?
- ⁶ Yacanaqueri, icantiri oca icantavaqueri Jesoshi. Ari ishinetavaqueri yaanaqueri voro. ⁷ Ari yacatsatacotaqueneri Jesoshi. Yoanquetaqueneri imititsaqui iitsaarepee, impoiji iquijacotacari. ⁸ Ari yaniitacaanaqueri avotsiqui, ipincatsajeitavaqueri maaroni ishaninca, imaaronajeitaqueneri quitsaarentsipee avotsiqui. Yora itsipapee ipesaqueri inchatoshi, aisati yoqueneri avotsiqui. ⁹ Yora jivajeitaqueri aisati impojeitaqueri, icajemajeitanaque:
—Jeritapaaque oavisacojeiteeneri, tsame aacameetsajeitavaqueri. Coraqueni, irio-taque itiancaqueeneri Avincatsarite. ¹⁰ Peerani Iravirini ipincatsariventirini ashanincani: meecaquea, impincatsariventaquee yoca aneavaquerica. Iriotaque ishanincani Iravirini. Tsame ampincatsajeiteri Tasorentsi inquitequiniri.
- ¹¹ Ari yareejitapaaca Jerosarequi, iqueapaaque ivancoqui Tasorentsi. Itsotea-quiero yamenayetaquero, iro cantaincha ishaavijiiteanaque catsirincaiteri. Isoquijanaji, ijatanaji Vetaniaqui. Itsipajeitanajari iroamerepee.

Ineaquero Jesoshi iyera caari timatsi oitsoqui.

(Mt. 21.18-19)

- ¹² Ari oquitaitamanaji aisati, yojocanajiro Vetania, irijate Jerosarequi. Nianqui aavetacari itashe. ¹³ Ineaquero paricoti inchato, pajitachari iyera. Otimaveta oshi. Ari ijatashitiro, icoavetapaacaro oitsoqui. Te aneeroji, irointi oshi. Tequeratsita moncaratajera oitsoquitantajeari. ¹⁴ Icantanaqueri Jesoshi iroamere:
—Tecatsi iroajitajeari atiri oitsoqui aisati.

Itianajeitajiri Jesoshi pimantayevetachari anta ivancoqui Tasorentsi.

(Mt. 21.12-17; Ir. 19.45-48; Joa 2.13-22)

- ¹⁵ Ari yareejitaja aisati Jerosarequi. Iqueapaaaji ivancoqui Tasorentsi. Yojocajeita-paaqueri maaroni pimantajeivetachari aisati maaroni amanantajeivetachari. Itatsin-quityetapaqueri imesatepee yora pinavacaavetariri iirequite. Aisati itatsinquitayeta-paaqueri isavickamentopee pimantajeivetariri sampaquiti. ¹⁶ Itsaneapitsajeitacari irayetanaqueme vaararontsi anta ivancoqui Tasorentsi. ¹⁷ Ari yoametantaque, icanta-jeitiri:

—Peerani isanquenatironi irineane Tasorentsi, icantini: “Irootaque oca novanco. Aca inquenquetsatacayaiteitanenari maaroni atiri”. Tempa piojeivetaro. Iro cantaincha avirojei pipeaquero ivanco coshinti.

¹⁸ Ari iquemajeitavaqueri maaroni yora apatotimentariri, irootaque yoajeitanta-nacariri cavaco. Aisati iquemacotaqueri jivatacaajeitiriri saserote, oametantirori san-quenarentsi, maaroni. Icantajeivetaca:

—¿Jaoca ancantaniroteriri Jesoshi, avanteeariri?

Iro cantaincha tecatsi incanteri, itsaroacaajeitacari. Tempa ipincatsajeitiri atiri Jesoshi. ¹⁹ Iqueanaji catsirincaiteri, ari yojocanajiro Jesoshi nampitsi.

Ineajeitaquero iyera, ocamanaque.

(Mt. 21.20-22)

²⁰ Oquitaitetamanaji aisati, ipianaja anta onauenta iyera. Ineapaaquero, ocamanaque, irosati anta ovaritsaqui. ²¹ Iquenqueshiretaquero Petero icantanaqueri Jesoshi oshaiteji. Icantiri:

—Oametanari, pamenero iyeraca poamaimatanaqueri oshaiteji. Camanaque.

²² Yacanaqueri Jesoshi:

—Pishireteari Tasorentsi. ²³ Queariotaque oca noncamantajeitempi. Ariorica pincanteri Tasorentsi: “Povaajero otishinta, poviincajero anta incajarequi”. Eirorica pitseencashiretitsi, aisati ariorica pioshiretasanotaque ovaanaquea, ari irimataque-mpiro. ²⁴ Irootaque noncamantantempiro oca: ariorica pinquenquetsatacayeri Tasorentsi, paitarica pincanteriri, pinquenqueshirete: “Aitaque irimataquenaro nocantaqueriri”. Pishiretearirica, aitaque irimataquempiro. ²⁵ Ariorica pinquenquetsatacayeri Tasorentsi, pijivate pincavintsayeri pishaninca: eiro piquishimentiritsi paitapeerica iranteri. Impoiji aisati avirori, eiro iquishimentimpirotsi Apa Tasorentsi pantayetiri avirori. ²⁶ Eirorica picavintsairitsi pishaninca, eiro icavintsaimpitsi avirori Tasorentsi.

Icantimentavacaacaro itasorenca Jesoshi.

(Mt. 21.23-27; Ir. 20.1-8)

²⁷ Ari yareejeitanaja aisati Jerosarequi, yaniitamanaji anta ivancoqui Tasorentsi. Yora jivatacaajeitiriri saserotepee, oametantirori sanquenarentsi, aisati savicacaantatsiri ipocashijetaqueri. ²⁸ Icantajeitapaaqueri:

—¿Janica oametimpiori pipincatsaritanti pimayetantarori pantayetiri? ¿Janicampa meeca peaquempiri pincatsari, pimayetantacarori pantayetiri?

²⁹ Icantavaqueri Jesoshi:

—Meeca aparo nosampijeitempi avirori. Ariorica pancaquena avirori, noncamantempiro. ³⁰ Yora Joa ivaotisatantayeti. ¿Janicampa tianquiriri ivaotisatantayeti? ¿Iriompa Tasorentsi tianquiriri? Tericampa, ¿irintimpa atiri tianquiriri? Panquenaqueti.

³¹ Ari icantavacaanaca saserotepee:

—Ariorica ancanteri: “Iriotaque Tasorentsi tianquiriri”, icanteecari: “¿Paita caari piquemisantantari Joa?” ³² Aisati eiro acantiritsi: “Iriotaque atiri tianquiriri”. Iquisheecari.

Pinequero, yora saserote itsaroacaajeitacari atiripee; maaroni atiri ineacameetsajeitaqueri Joa, icantajeiti: “Tempa irio Tasorentsi tianquiriri Joa icamantanti”.

³³ Irootaque icantantariri saserotepee:

—Te nioteji janicarica tianquiriri.

Icanti Jesoshi:

—Aisati narori, eiro nocantimpitsi janicarica tiancanari nopincatsaritanti nomatarori oca.

12

Ishiacaventiniri Jesoshi panquitirori ovamashi.

(Mt. 21.33-46; Ir. 20.9-19)

¹ Impoiji ishiacantiniri oca, icantiri:

—Ipanquitiro ovamashi shirampari. Itantacotaquero otsapiqui, yovetsicashita-queri onanteari ovaja. Impoiji yovetsiquiro shitamencotsi anta jenoqui iramen-coventantearori maaroni. Impoiji aisati icantiri tsameetacantatsiri: “Pishentenaro maaroni: coajica nompinatemp cameetsa”. Impoiniji ijatanaque pashiniqui quipatsi.

² Osamanitapainti iraacanaque oitsoqui ova. Ari yora ashitarori itiancavetari inampire aparo, iraaranteme ova. ³ Te impavaqueriji, irointi yaanirotavaqueri, tapi; ipasatashitavacari, tac, tac. Yoipiavajiri, tecatsi iraanaque. ⁴ Ari itiancavetaca aisati itsipa inampire. Iposainatavaqueri iitoqui, toc, toc, yoashinoncaavaqueri. ⁵ Itiancavetaca pashini aisati. Yoavaqueri, shemi. Aisati itiancavetacari oshequi itsipapee: aparopee ipasanatavaqueri, irio itsipapee yoavaqueri. ⁶ Apanivaniquea itimanaque itemi iriori, inintasanotiri. Icantashiretanaque iriori: “Irrioricampa irinti notomi irio impincatsatavaqueri”. Itiancavetacari iriori. ⁷ Iro cantaincha icantavacaanaca tsameetacotirori: “Jeritapaaque itemi ashitarori, ariorica incamaque iriri, riotaque yoca ashitasanota-jearoneri. Tsame avavaqueri, impoijiquea ashijeitajearota ainti irovamashite”. ⁸ Ari yaavaqueri, yoamirotavaqueri, shemi. Yojocaqueri otsapitapaaca ovamashi. ⁹ ¿Paita piquenqueshirejeitiri? ¿Jaoca incanteriri ashitarori irovamashite? Tempa impoque irinti, impoyereapaaqueri iratiritepee. Pashini iramenaje shentajenerine. ¹⁰ Tempa pineanatiro sanquenarentsi. Ocanti: “Yora vetsiqueronemeri pancotsi itseencajiro mapi intincamitantearameri ivanco, icanti: ‘Te oncameetsateji’”. ¹¹ Iro cantaincha Avincatsarite ipeajiro mapica otincami ivanco, ocameetsatasanoti. Tempa irootaque avantanacari cavaco”.

¹² Iotacojeitavaquero icantaqueri Jesoshi, riotaque ishiacaaventaqueri. Icoajeiveta iraajeitanaquerime, iro cantaincha itsaroacaajeitacari yora apatotimentajeitacariri. Ari yojocajeitanajiri, ijajeitanaji.

Isampitiri variseopee: “¿Arimpa ampajeri ivincatsarite oromasati airequite?”

(Mt. 22.15-22; Ir. 20.20-26)

¹³ Itianqueetiri variseopee aisati oijatiriri Eroreshi. Icoavetaca incomitacayearime irineane Jesoshi. ¹⁴ Yareetapaaca, icantapaaqueri:

—Oametantsiri, niojeitaquempi avirotaque cameetsatatsiri. Te oncantimoneentanaquempiji paitarica icantayetiri atiri, te pintsaroacayeariji. Tampatica poametantiro icoacaajeiteeri Tasorentsi. ¿Ocameetsatimpa nomperi ivincatsarite oromasati quirequi? ¿Tericampa oncameetsateji? ¿Nomperimpa? ¿Eirompa nopersitsi?

¹⁵ Iotacotaqueri Jesoshi, iramataviterime yoca sampitaqueriri. Icantiri:

—¿Paita picoantacari pincomitacayename? Pamaquenari quirequi, ponijayenari.

¹⁶ Ari aparo yamaqueneri. Isampijetiri:

—¿Janicampa shiacantachari ivoroqui? ¿Janicampa ashitarori ivajiro?

Yacajeitanaqueri iriori, icantiri:

—Irio ashitaro Shisari, yora ivincatsarite oromasati.

¹⁷ Icantiri:

—Panteneri pincatsari icoacaimpiri, aisati panteneri Tasorentsi icoacaimpiri iriori. Yoajeitanaqueri cavaco yora sampijeitiriri.

Icantiri Jesoshi: “Queario, antinaajeitanaje”.

(Mt. 22.23-33; Ir. 20.27-40)

¹⁸ Icantapiniti saroseo: “Eiro itinaajatsi camatsiri”. Ari ipocashitiri iriori Jesoshi, isampitapaaqueri:

¹⁹ —Oametantsiri, isanquenajeitanaroni peerani Moishishi, icantini: “Ariorica incame shirampari, irojocanaquero ijinani. Eirorica itimacaanaquerotsi itemi, cameetsa iraitajeri irirentini ijinani. Ariorica intimacayero itemitsori camaintsiri, irishiacanta-jeitajeri itemisanori iriori”. ²⁰ Ari. Ainiro shirampari irirenti. Yaaveta ijina, impoiji icamaque, toren. Tequera intimacayeroji itemi. ²¹ Yaavetajaro irirentini apitetapaintsiri. Icamaque iriori, aisati te intimacayeroji itemi. Aisati iquempetaja iriori yora mavat-apaintsiri. ²² Aisati iriori iquempejeitaca maaroni irirentini. Tecatsi intimacayero itemi. Impoiji ocamaque iroori tsinane, toren. ²³ Coajica ariorica intinaajeitanaje camajeitaintsiri, ¿janicampa aajeroneri? Tempa aitaque ijinantajeiveitaroni maaroni.

²⁴ Icantiri Jesoshi:

—Te piteroji sanquenarentsi, aisati te piotacoteriji Tasorentsi, tempa irootaque picomitantacarori oca. ²⁵ Icamajeitaque, toren. Coajica intinaajeitanaje aisati. Iro

cantaincha eiro yaajitsi aisati ijina. Eiro itimajitsi aacaajerineri aisati. Aitaque irishiapajeari inampire Tasorentsi savicatsiri jenoqui. ²⁶ Meeca noncamantempi: aitaque intinaajeitanaje camajeitatsiri. Tempa pineanataquero isanquenare Moishishi. Oquenquetsatacotiyo quitotsequishi, otaavetaca iro cantaincha te ontsonqueaji. Anta iquemaquero peerani Moishishi icantiriri Tasorentsi: “Narotaque Tasorentsi, icantani ipincatsajeitaquena Avarama, Isaca, aisati Jacovo”. ²⁷ Pineaquero, aneatsi ini iriorije, irosati icantani iquemisantiri Tasorentsi. Te inquemisantajeji camaintsiri, irintiquea aneatsiri. Pineaquero, te ampoyereempaj. Oshequi picomitasanotaca avirori.

Iquenquetsatacotiyo icoacaasanotaqueeri Tasorentsi.

(Mt. 22.34-40)

²⁸ Iquempejitatapaaque aparoni oametantirori sanquenarentsi. Iquemapaaqueri ican-tavacaanaca. Iotacotapaaqueri Jesoshi, cameetsa yoametavaqueri saroseo. Ari isampi-tapaaqueri:

—¿Paita icoacaasanoteeri Tasorentsi?

²⁹ Yacanaqueri Jesoshi:

—Tempa isanquenataqueeroni Moishishi peerani icoacaasanoteeri Tasorentsi. Jero oca isanquenatiniri: “Noshaninca, pinquemisantajeiten. Yora Tasorentsi, iriotaque Avincatsarite, apaniro ipincatsariti irinti. ³⁰ Oshequi catsini pinintasanoteri, pincanteani. Aisati pinquenqueshiretapiniteri”. ³¹ Aisati isanquenatin: “Oquempetaca avisati nintajancha, aisati pinquempejeteri maaroni picarajeitiri, pinintajeiteri”. Irootaque inintacaasanojeitaqueeri maaroni.

³² Icantanaqueri oametantirori sanquenarentsi:

—Je, aitaque. Queariotasanoque oca picantaqueri. Apaniro ini Tasorentsi, tecatsi pashini. ³³ Cameetsa oshequi catsini anintasanoteri, anquenqueshiretapiniteri. Aisati oquempeta arosati nintajancha, aisati anquempeteri maaroni acarajeitiri, anintajeiteri iriori. Irootaque icoacaasanotaqueeri Tasorentsi. Te iro incoasanote atayeneri poshiniri.

³⁴ Iquemaqueri Jesoshi, cameetsa icantaqueri, icantiri:

—Irotantsi pimpincatsateri Tasorentsi, impincatsariventantempi iriori.

Impoji itsaroacaajeitacari atiripee irisampitajerime aisati.

Iquenquetsatacota irisati Quirishito.

(Mt. 22.41-46; 23.1-7; Ir. 20.41-44)

³⁵ Yoametanti Jesoshi anta ivancoqui Tasorentsi:

—Icanti oametantirori sanquenarentsi: “Yora Quirishito, irishanincatasanotajeari Iravirini”. ¿Paita icantantarori? ³⁶ Tempa iro Ishire Tasorentsi sanquenatacarairiniri Iravirini. Isanquenataqueroni oca: “Yora Tasorentsi icantiri novincatsarite: ‘Pisavique aca nacosanoriqui, pincarateria ampincatsarijeite. Aitaque noasanquetaajeiteri maaroni quisajeivetaquempi’”. ³⁷ Tempa iquenquetsatacitarini Iravirini Quirishito, icantiri: “Novincatsarite”. ¿Jaoca incanteari Iravirini impincatsatageri ishaninca impoitajantsiri itimi?

Ari iquemajeitavaqueri, iquimoshirejeitanaque oshequi apatotimentacariri. ³⁸ Ari yoametantaji aisati, icanti:

—Paamayeariyea oametantirori sanquenarentsi. Icoashita iroaneencashitea, irishemetacayero iitsaare, inquenaquenatsatsacaayetero. Icoaque irineacameetsatashiteari ishaninca anta nampitsiqui. ³⁹ Aisati ariorica ijatapiniti anta pancotsiqui yapatojeitanta, icoyeapinitiro savicamentotsi cameetsatasanotatsiri. Aisati ariorica irampatojeitea ishaninca iroajeitearica, icoaque iriori irisatecapeempa nianqui incarajeitanteeariri pincatsaripee. ⁴⁰ Yaapitsanirotaquero maaroni timimovetarori camajimentaaro. Osamani ineanatashimempeavetacari Tasorentsi, vero, vero. Oshequi yamatavitaveta, iro cantaincha coajicani iroasanquetasanotakeri catsini Tasorentsi.

Ora ashinoncaincaro opaqueri Tasorentsi maaroni timimovetarori.

(Ir. 21.1-4)

⁴¹ Ari isavicaque Jesoshi, imontetacaro yoapiniyetantariri quirequi. Yamenajeitaqueri oshequi pocajeitatsiri, itetapinitiri iirequite yoantaririqui. Ipoqui oshequi

ashitaarantincari, itetapaaque oshequi catsini iirequite. ⁴² Opocapaaque iroori aparoni camajimentaaro ashinoncaincaro. Otetapaaque iroori apimentaquite quirequijaniqui, te impinaveteaji inti. ⁴³⁻⁴⁴ Icajemiri iroamere, icantiri:

—Queariotaque oca noncamantempi: capichaji otevetaca oca ashinoncaincaro, iro cantaincha ineacameetsatasanotaquero Tasorentsi. Tempa opaqueri maaroni timimovetacarori: tecatsi meeca amanantantajeari oyeari. Irintiquea yora ashitaarantincari, oshequi itejeivetaca, iro cantaincha te irineacameetsatasanoteriji Tasorentsi: tempa oshequitatsi iirequite iquempoyeanontari.

13

Icantiri Jesoshi: “Cojica ontireanajea ivanco Tasorentsi”.

(Mt. 24.1-2; Ir. 21.5-6)

¹ Impoiji isoquijanaji Jesoshi. Icantiri aparoni iroamere:

—Oametanari. Pamenero mapica yovetsicantarori ivanco Tasorentsi: antearo oni, aisati ocameetsati pancotsi.

² Icantiri Jesoshi:

—Pineaquero jaoca ocantari oca mapipanco. Antearo onaveta, iro cantaincha coajica intireetajero, ojocayetanaquea nijanteaji mapi. Ompoyereajea pancotsi.

Isampitiri iroamere: “¿Jaoca oncarate ontireantajeari?”

(Mt. 24.3; Ir. 21.7)

³ Impoiji isavicanaque Jesoshi toncaariqui, opajita Orivomashi. Imontetapaaro ivanco Tasorentsi. Imananaca Petero, Santiago, Joa, jeri aisati Antirishi: ijatashijeitaqueri Jesoshi. ⁴ Isampitapaaqueri:

—Pincamantajeitena. ¿Jaoca oncarate ontireantajeari ivanconta Tasorentsi? Ariorica coajica omoncarataapeempa ontireanteari, ¿jaoca noncanteari niotantajeari?

Icantiri Jesoshi: “Cojica irashinoncaajeitea atiri”.

(Mt. 24.4-8; Ir. 21.8-11)

⁵ Icantiri Jesoshi:

—Yamataviyeetimpicari. ⁶ Intime oshequi pocayetatsineri, cantatsineri: “Narotaque nanti Quirishito”. Iramatavitapeeri oshequi atiri. ⁷ Ariorica pinquemacoteri imanatavacaaca atiri, aisati pinquemerri pashini cantatsine: “Irimanatavacaajeitea atiri”. Iro cantaincha eiro pitsaroanaquetsi. Aitaque oncanteari coajicani, irimanatavacaapinitaea, iro cantaincha tequerata omoncarateaji nompincatsaritantanapajeari. ⁸ Yora atiri inquisapinitanaqueri itsipapee. Oshequi irimanatavacaajeitea itsipasatipee atiri. Onicapiniyetanaquea quipatsi, aisati intasheapinijetanaque atiripee. Aiquero ojatatiye, inquematsicajeitearo paitapeerica, irashinoncaasanojeitanaquea.

Icantiri Jesoshi: “Inquisheetapinijeiteri quemisantatsiri”.

(Mt. 24.9-14; Ir. 21.12-19)

⁹ Aisati icantaqueri Jesoshi:

—Paamaventea. Icantacoventimpicari, yaimpicari yora oametavacainchari. Ariorica pijate anta yapatojeitantzari aitaque impasanayeetavaquemperi, tac, tac. Iraanaquemperi anta itiminta savicacaantatsiri, aisati anta itiminta pincatsari. Ariorica irayempi, irosati pinquemisantacayeri, iravisacotantajeari. ¹⁰ Irijivajeite maaroni atiri inquemacojeitena noavisacotanti, impoiji nompocaje, nompincatsaritasanotapaaque. ¹¹ Ariorica irayee-tanaquempi anta, ariorica incantacoventeetempi, eiro picantashiretsi: “¿Jaoca non-canteriri?” Aitaque oametaquempi Ishire Tasorentsi paitarica pincanteriri. Irootaque neanatacaaquempine, eiro pineanatashitsi avirori. ¹² Coajica aparo shirampari iraacanteri irirenti, iroacantanteariri. Pashini iraacanteri itomi. Aisati pashini atiri inquisanaqueri ashitariri, iroacanteri. ¹³ Piquemisantaquena, irootaque inquisanteetempi maaroni. Queario, ompomerentsitimojeitempi, iro cantaincha ariorica pincanteani pishiretasanotena, aitaque noavisacotajempi.

Icantiri Jesoshi: “Coajica ompomerentsitasanotanaquea anta Joreaqui”.

(Mt. 24.15-20; Ir. 21.20-23)

¹⁴ Aisati icantiri Jesoshi:

—Ariorica pineanatero isanquenaren Iranirini, piotavaquero icantiniri: irashinoncaajeitanaquea atiri. Icanti intime ivancoqui Tasorentsi caari cameetsatsine. Te oncameetsateji intime anta. Ariorica pintime Joreaqui, aisati pineeririca yoranqui, pishintsite pishiajeitanaque anta toncaariqui. ¹⁵ Ariorica pisavique pancotsiqui sateriqui, eiro piqueapanajantitsi paantapanajantearori paitapeerica, irointi pishianaque. ¹⁶ Aisati pisaviquerica oantsiqui, eiro pipiapanajantatsi paantapanajantearori piitsaare. ¹⁷ Ariorica omونcaratapaaquea maaroni oca, joo, oshequi ashinoncayetanaquea tsomonteyetatsine, aisati ashinoncaaqua ea antsotayerine ojananequite: ompomerentsitimojeitearo oshianaque. ¹⁸ Pincanteri Tasorentsi, oncateata ariorica pishianaque, eirotarica oparii incani. Pishiasanojeitanaque, yaimpicari quisajeitempineri.

Yaamaventacaajeitacari Jesoshi: “Yamatavitimpicari”.

(Mt. 24.21-26; Ir. 17.22-24; 21.22-24)

¹⁹ Jero aisati icantiri Jesoshi:

—Aitaque coajica irashinoncaasanojeitanaquea catsini oshequi atiri. Peerani te irineapiniveitearoni quempetearoneri oca, jeri yora maaroni intacaroniri, te irineeroni. Coajica aisati maaroni impoitajantsineri, eiro ineirotsi aisati quempetearoneri oca. ²⁰ Irishintsite iroimajerentajeiteri Tasorentsi: eiorica, impoyereavacaajeiteame. Iro iroimajeretanteariri, incavintsaaajeiteri quemisantajeiterineri, tempa irinintajeiteri iriori. ²¹ Pamene, ariorica incamanteetempi: “Pineavaqueri: jerica Quirishito”, eiro piquemisantiritsi. Aisati ariorica incanteete: “Pineaveri: jeri yonta”, eiro piquemisantiritsi catsini, itseeyani. ²² Impocapaaque amatavitantatsine, incantapaaque: “Narotaque nainti Quirishito, narotaque camantantatsiri”. Intasorentsime mempeavetapaaquea, incoavetaquea pinquemisantavaqueri, irimayetempiro caari pineapiniti. Incoavetea iramataviterime quemisantajeitiriri Tasorentsi, iro cantaincha tecatsi incanteri. ²³ Paamaventea. Nojivatitaquempiro nocamantasanojeititaquempiro maaroni.

Yora Jesoshi icamantacotaja impiantajeari.

(Mt. 24.29-31; Ir. 21.25-28)

²⁴ Aisati icantiri:

—Ariorica irovecaraanaquero iquisavacaajeita, impoijiquea intsitenitanaque catsirincaiteri, eiro iquempetajatsi meeca. Aisati eiro iquitasantetanajitsi cashiri. ²⁵ Aisati impariaarantanaque impoquiropee, imponeaquea inquitequi, imporocayetanaque itsipapee. ²⁶ Noponeaca inquitequi, natiritatapaaque: coajica irineajeitavajena atiri nonquenapaa je menceriqui. Nontasorentsitasanotapaaque, nompincatsaritapaaque. ²⁷ Aisati nontiancajeiteri nonampirepee irampatojeiteri maaroni quemisantajeitanari. Imponeanaquea maaroni quipatsipeequi.

Ishiacaaventiniri Jesoshi iyera.

(Mt. 24.32-35; Ir. 21.29-33)

²⁸ Yovaajiniri aisati, icantiri:

—Jero oca piotantearori oshiacaaventiri iyera. Iroquerarica oshiocajempequiyetaje, ariorica ontimanaje oshi, piotaque irotajantsi osarintsitapaaje. ²⁹ Aisati, ariorica pineajeitavaquero maaroni oca nocamantayetaquempi, piote quempejitapajana, irotaintsi nompocashitajantempi. ³⁰ Queariotaque oca nocamantimpipi. Tequeratsita pincamajeite avirori, omونcaratapaaquea maaroni oca nocamantimpipi. ³¹ Ompeajea inquite aisati quipatsi, irompa irointi noneane, eiro opeajatsi.

Aamaajeitajeari Jesoshi: te ayojeiteji jaocarica oncarate impocantajeari.

(Mt. 24.36-51; Ir. 21.34-36)

³² Jeroca aisati icantiri:

—Jaocarica oncarate quitaiteri, jaocarica incarate catsirincaiteri, tecatsi iotatsine. Aisati te iriojeji yora inampire Tasorentsi jenoquiniri. Pamene, narotaque itomi Tasorentsi, iro cantaincha te nioteji. Irintiquea iotatsi apaniro Apa. ³³ Paamaventea,

aisati paamaajeitena. Te pioteji jaoca oncarate nompocantajeari. ³⁴ Nonquempeteari shirampari, jatatsiri paricoti. Ariorica yojocanaquero ivanco, icantajeitanaqueri maa-roni inampirepee paitarica irantajeiteneriri. Aisati iriori yora shentiniriri ivanco icantanaqueri iriori: "Paamajenayea". ³⁵ Irootaque nocantajeitantimpiri: paama-jeitajenaya avirori. Te pioteji jaoca oncarate nompocantajeari: ariorica inqueanaje catsirinaciteri, ariorica nianquinte tsiteniri, ariorica irineaje teapa, ariorica onquita-maroiteamanaje quitaiteri nompocaje. ³⁶ Paamaventea, paamaasanojeitena. Arior-ica nompocaje, nomapocapaimpicari. Noneapaimpicari, maatsimpi catsini. ³⁷ Oca nocantimpiri, irootaque nocantajeitaqueriri maaroni atiri. Paamaventasanojeitea, paamaasanojeitena, maaroni.

14

Icoajeitaque jorioopee iraacaantajeiteri Jesoshi.

(Mt. 26.1-5; Ir. 22.1-2; Joa 11.45-57)

¹ Ari apitenivani quitaiteri omoncaratajera quitaiteri yavisantaniri. Iro iquenqueshire-tantarori quitaiteri peerani yavisantaniri inampire Tasorentsi, oajeitiriri itomipee ejipitosati. Quitaiteri yavisantaniri te iroapinitearojo tapiachari tanta, irointi caari tapiacha. Ari icoaque jivatacaajeitiriri saserotepee aisati oametantirori sanquenarentsi jaoca incanteriri iramataviteri Jesoshi, iraanteariri. Aitaque icoaveta iroyerime Jesoshi.

² Icanti:

—Eiro aantaritsi quitaiteri yavisantaniri: iquisacoventajeitaricari atiripee.

Osaitiri Jesoshi casancajari.

(Mt. 26.6-13; Joa 12.1-8)

³ Ari isavicaque Jesoshi Vetaniaqui, anta ivancoqui Shimo patsaveitachaniri. Oshequi oajeitachari anta. Opocapaaque tsinane, amacotapaquero casancajari. Iojataca oja nararo, oshequi ovinaro. Ocemeetsatasanoti onantari, iro yovetsiqueetiri mapi pajitachari aravashitoro. Ocarajacotapaaqueneri, osaitantapaacari iitoqui. ⁴ Itimanaque aparopee quisaneentajeitaquerori. Icantavacaanaca iriori:

—¿Paitampa meeca aparajatantacarori oca casancajari? ⁵ Arime ompimanterome, aantaquearome oshequi quirequi, impoijiquea ompayeterime ashinoncayetachari.

Impoiji iquisatsajeivetacaro, ⁶ iro cantaincha icantiri Jesoshi:

—Eiro piquishimentirotsi. ¿Paita pashereantarori? Ocemeetsatasanoti osaitaquena.

⁷ Aitaque incantaitatiyempani ashinoncaincari: pincanteani pincarajeiteri, aisati pineapiniteri. Ariorica pincoaque pintacoteari, aitaque pimataquero, pimpaqueri. Irompa nainti, eiro nocantaitatiani nontsipajeitempi aca. ⁸ Te omayeteroji paitapeerica, irointi omataque osaitaquena. Tempa asaitapinitiri camatsiri, iro cantaincha te iriota-coteaji. Irointi oca tsinane ojivataquena osaitaquena, aneatsiquerana noni. Iotaquena noncamaque. ⁹ Queariotaque oca noncamantempiri: jaocarica incamantantajeitero atiri noneane, incamantacotero antaqueri oca tsinaneca, inquenqueshireajeitanteearori.

Iquenqueshireti Jorashi iraacanteri Jesoshi.

(Mt. 26.14-16; Ir. 22.3-6)

¹⁰ Ainiro iriori Jorashi Ishicariote icarajeitiri iroamere Jesoshi. Ijatanaque apaniro anta itiminta jivatacaajeitiriri saserotepee, incantacoventanteariri Jesoshi.

¹¹ Iquemajeitavaqueri ora icantapaaquerir, iquimoshirejeitanaque, icantiri:

—Cameetsataque: oshequi nompinajeitempi quirequi.

Impoiji iquenqueshireti Jorashi:

—¿Jaoca noncanteriri naacantanteariri? ¿Jaoca oncarate?

Yovetsicajeitiro iroamere iroajeiteari.

(Mt. 26.17-19; Ir. 22.7-13)

¹² Moncaratapaaca quitaiteri yoajeitantarori tanta, caari tapiacha. Aisati yoari ovishajaniqui: yametapinijeitaro yoajeitari quitaiterqui iquenqueshiretapinitiro yavisantaniri oantatsiri peerani. Isampitiri Jesoshi iroamere:

—¿Jaoca picoqueri novetsicajeitero avajeiteari?

¹³ Ari itiancaque iroamere apite, icantiri:

—Pijate nampitsiquinta. Aitaque pintonquitavaqueari aparoni shirampari, iraacote chomoqui nija. Poijatanaqueri iriori. ¹⁴ Jaocarica anta inqueapaajeri, aitaque iniri ashitarori ivanco; iringataque pineanatapeeri. Pincantapaqueri: “Icanti oametantatsiri: ‘Jaocame nosavictapeempari, noacantapeempariri noamere?’ ” ¹⁵ Irosati ironijantavaquempiroi anta jenoqui oshitamencotanta: antearo oni. Timatsi ovetsicajeitaca maaroni avantayetearori: apanivaniji povetsicajeitapaquero ayeari.

¹⁶ Ari ijatanaque iroamere nampitsiqui, ineapaquero oca icantaqueriri, impoiji yovetsicapaaquero yoari.

Icamantacotaqueri Jesoshi aacaanterineri.

(Mt. 26.20-25; Ir. 22.21-23; Joa 13.18-30)

¹⁷ Ari ishaavijiiteanaque catsirincaiteri. Yareetapaaca iriori Jesoshi, itsipajeitapaacari iroamerepee. ¹⁸ Isavictapeempari, yoajeitapaaca, icantiri Jesoshi:

—Queariotaque oca noncamantempiri. Meeca acarajeitica, timatsi aacantenaneri, oacojeitaqueeri.

¹⁹ Yoashirejeitanaca, icantiri aparo:

—¿Narompa aacantempineri?

Aisati itsipa:

—¿Narompa?

Aisati itsipapee isampijeitanaqueri. ²⁰ Icanti Jesoshi:

—Tempa iringataque aacantenaneri chaantacotaquenari meeca nomatitatequi.

²¹ Noponeaca inquitequi, natiritapaaque. Irotanaintsi noncame: aitaque ontsataaquea isanquenatacotitaquenari. Iro cantaincha irashinoncaitaquea yora aacantenaneri. Eirome itimime iriori, eirome yaacantaname, aisati iriori eirome iquematsicatarome, coajica.

Ishiacaventajequeero Jesoshi incamimentajeitee.

(Mt. 26.26-29; Ir. 22.14-20; Joa 13.21-30; 1 Cor. 11.23-26)

²² Ainiro yoajeitaca, yaaquero Jesoshi tanta. Ipasonquitiri iriri, icarajaquero, ipajeitaqueri iroamere. Icantiri:

—Paajeitero, tempa narotaque camimentajeitimpineri.

²³ Impoiji yaaquero pajoqui aisati. Ipasonquitaqueri iriri, ipacojeitaqueri, irajeitavaquero. ²⁴ Icantajeitaqueri:

—Irootaque niraja amparajatimenterineri oshequi atiri. Ariorica noncamimentempi, piojeitaqueri queario icantapeempari Tasorentsi, iroavisacojeitempi. ²⁵ Queariotaque oca nocamantajeitimpiri. Eiro meeca napiitajirotsi aca quipatsiqui nirajero ovaja. Ariorica nosavicipaaje anta ipincatsaritinta Tasorentsi, ari nirapajero pashinijari.

Icantajeitiri Jesoshi iroamere: “Coajica pojocajeitanaquena”.

(Mt. 26.30-35; Ir. 22.31-39; Joa 13.31-38)

²⁶ Ari ipampoyeaventajeitanaqueri Tasorentsi, impoiji ijajeitanaji anta toncaariqui, opajitanta Orivomashi. ²⁷ Icantajeitaqueri Jesoshi:

—Coajica pojocajeitanaquena. Aitaque isanquenatacotiteetaquempini: “Noyer yora shentiriri ovisha, impoiji inquenashiveetanaquea irovishate”. ²⁸ Iro cantaincha, coajica nontinaanaje, nojivajeitanaquempi anta Carireaquai.

²⁹ Icantiri Petero:

—Ariorica irojocajeitempi maaroni irinti yoca, irompa nainti, eiro nojoquimpitsi.

³⁰ Icantiri:

—Queariotaque oca noncamantempiri: meeca tsiteniriqui, tequeratsitarica irampiitajerota irineaje teapa, oshequi pintzaroanaque. Oncarate mava pincante: “Te nioteriji Jesoshi”.

³¹ Iro cantaincha icantasanoti Petero:

—Eiro nojoquimpitsi. Ariorica ancorajeitavacaya ancamaite, eiro nocantitsi: “Te nioteriji”.

Aisati omoncarataca icantajeitaqueri maaroni itsipapee.

Iquenquetsatacairy Jesoshi iriri anta Jetsemaniqui.

(Mt. 26.36-46; Ir. 22.39-46)

³² Ari yareejitapaaca anta Jetsemaniqui. Icantajeitiri iroamere:

—Pisavicajeitavaqueta aca, nonquenquetsatacavaquerita Apa.

³³ Irintiquea yaanaqueri Petero, Santiaco, jeri Joa. Iquenqueshireanaca, aisati yoashiretanaca. ³⁴ Icantiri:

—Apa, aviro avinti mayetirori maaroni, paitapeerica. Nocoavetaca poavisacotename oca nonquematsicatari, iro cantaincha eiro pantirotsi nocoavetari narori, pantenaro picoacaquenari avinti.

³⁵ ³⁶ Impoiji ipianaja anta isavicauenta iroamere. Ineapaatiiri, maajeitaque. Icantapaaqueri Petero:

—Shimo, ¿maaquempimpa? Tempa pamavetimatero pisaaquitimate capichaji.

³⁸ Pisaquite. Pincanteri Tasorentsi oncanteataquea ariorica incoaque camaari irantacayetempiro caari cameetsatatsi, eiroquea pantantarotsi. Queario picoasanovetaca pantenerime Tasorentsi icoacaaquempiro, iro cantaincha te pimateroji.

³⁹ Iopianaja aisati, iquenquetsatacrajiri aisati iriri. Irosati icantajiri icantaqueriri incaranqui. ⁴⁰ Ipiapaaja aisati, ineajeitapaajiri, maajeitaji aisati. Oshequi catsini aajeitaqueri ivochoquine. Oshequi ipashiventajeitaca, te irioteji pitarica incanteriri.

⁴¹ Ari ipianaja aisati mavatapaintsiri. Impoiji icantapaaqueri:

—Meecaquea pimaajeite, pimaoreajeite. Noponeaca inquitequi, natiritapaaque. Moncaratapaaca, aitaque meeca icantacoventaquea: irayena meeca caari quemisantatsi.

⁴² Meeca pintinaanaje, tsame ajataje. Ja, jeri yocatapaaque aacantenaneri.

Yaajeitaqueri Jesoshi.

(Mt. 26.47-56; Ir. 22.47-53; Joa 18.2-12)

⁴³ Irosatiquera ineaveeti Jesoshi, ipocapaaque yora Jorashi, iriotaque tsipaveitariniri yora iroamere Jesoshi. Itsipajeitapaacari meeca oshequi atiri. Yamajeitapaaque isaviritepee, aisati inchaquiipee. Iriojeitaque itiancane jivatacaaajeitiriri saserotepee, jeri itiancane oametantirori sanquenarentsi, jeri savicacantatsiri. ⁴⁴ Icantajeitacari yora Jorashi:

—Meeca noncamantasanotempi piotantapeempariri Jesoshi: pineaquina nonintavorotapaaqueri, pajiricapeeri. Paanaqueriyea, pishentasanoteriyea.

⁴⁵ Ari ipocapaaque, iquempejitatapaacari. Icantapaaqueri:

—Oametanari.

Inintavoronirotapaaqueri. ⁴⁶ Yajiricajeitapaaqueri, tapi, yaajeitanaaqueri. ⁴⁷ Aparo iroamere yaaquero isavirite. Ipeshitaqueri iyempita inampire ivincatsarite saserote, peti. ⁴⁸ Icantajeitavaqueri Jesoshi:

—¿Narompa coshinti? ¿Paita pamashitantanari pisaviritepee aisati inchaquiipee? Paashitanaquena, eiro noshiapitsatimpitsi. ⁴⁹ Aitaque maaroni quitaiteri notsipajeive-taquempi anta ivancoqui Tasorentsi, noametantini. Ja, payenaniqueti. Meecaquea moncarataca ocantiri sanquenarentsi.

⁵⁰ Irriori iroamere, yojocajeitanaaqueri, ishiajeitanaca maaroni. ⁵¹ Aparo quea evancari oijavetanacariri Jesoshi. Te inquitsaatanaqueaji, irointi yampinaicanaca ivashicaro. Yajiriqueevetavacari, ⁵² itsaneanaca iriori, yojocanaitiro ivashicaro, ishiatsempequitanaca.

Icantajeiti pincatsaripee: “Ocameetsati incame Jesoshi”.

(Mt. 26.57-68; Ir. 22.54-65; Joa 18.12-14, 19-24)

⁵³ Impoiji yaajeitanaaqueri Jesoshi ivincatsaritequi saserote. Yapatojeitimentapaacari maaroni jivatacaaajeitiriri saserotepee, savicacaaajeitantsiri, aisati oametantirori sanquenarentsi. ⁵⁴ Irriori Petero yojatacovetanacari Jesoshi, iro cantaincha nijanteji, irosati yareetantapaaca anta ivancoqui saserote. Isaviquimotapaaqueri yora

nampirentsipee, itatapaaquero paamari. ⁵⁵ Ainiro aisati anta pancotsiqui ivincatsarite saserote aisati maaroni oametavacaajeitachari. Isampijetiri atiri:

—¿Pineacotaquerimpa yantiro Jesoshi caari cameetsatatsi noacantanteariri?

Iro cantaincha, tecatsi irineacoteri. ⁵⁶ Ipocapaaque oshequi tseeyacotacariri, te omoncarateaji icantayetaqueri. ⁵⁷ Aparopee catianaincha, itseeyacotashitacari, icanti:

⁵⁸ —Noquemajeitaqueri Jesoshi, icanti: “Coajica noshoveajero ivanco Tasorentsi, oca yovetsicane atiri. Ari oncarate mava quitaiteri novetscicajeneri nainti pashini ivanco, caari yovetsiqui iriori atiri”.

⁵⁹ Iro cantaincha te omocaratavacayeaji icantayevetacari.

⁶⁰ Icatianaca nianqui yora ivincatsarite saserote. Isampitaqueri Jesoshi:

—¿Paita caari paquimatanta? ¿Paita ojita oca icantacoyetaquemperi yoca?

⁶¹ Irriori Jesoshi imajeretaque, te iranqueji. Yapiitaqueri yora ivincatsarite saserote:

—¿Avirompa Quirishitotatsiri, itomi Tasorentsi noneacameetsajeitiri?

⁶² Yacanaqueri:

—Narotaque. Aitaque noponeaca narori inquitequi, natiritapaaque. Coajica pineajena nosavique anta iracosanoríqui Apa, noncarateri nompincatsarijeite. Aisati pineavajena nonquenantapaajearo onta mencorinta, nompiae aisati quipatsiqui.

⁶³ Yora ivincatsarite saserote yaitanacaro iitsaare, itsereanaquero, tsererere; iquisanaca. Icantanaque:

—¿Paitampa meeca acoantari pashini camantacoterineri? ⁶⁴ Piquemajeitavaqueri meeca: ijitasorentsinirotacateemi. ¿Paita picoajeitiri? ¿Jaoca ancanteriri?

Icantajeitanaque:

—Ainiro irantane, cameetsa incame.

⁶⁵ Ainiro aparopee quitiojayetaqueri. Impoiji ipashicavorotaqueri, aisati ipasanatiri. Icantiri:

—Pincamantenate janica pasavorotaquemperi.

Aisati iriori nampirentsipee, ipasanajeitaqueri.

Icant Petero: “Te nioteriji Jesoshi”.

(Mt. 26.69-75; Ir. 22.55-62; Joa 18.15-29)

⁶⁶ Isaviqui iriori Petero anta pancotsiqui ishaaviji. Opocapaaque aparoni inampire saserote. ⁶⁷ Oneapaaqueri Petero, itaataque paamari. Amenashetapaaqueri, sorerere, ocantiri:

—Aviro tsipatariri yora Jesoshi nasaretesati.

⁶⁸ Itsaroanaque iriori, icantanaque:

—Jm, te nioteji paitarica picantiri. Te nonquemempiji aisati.

Isoquijanaji saiteriqui, ijatanaque anta otsapiqui. Ineanaque teapa. ⁶⁹ Oneajiri aisati nampirentsi. Ocantajeitiri yora ocarajeitaqueri:

—Iriotaque yoca tsipatariri Jesoshi.

⁷⁰ Aisati icantaji Petero. Ari osamanitapainti capichaji. Yapiitajiri yocapee, icantiri:

—Queariosanotaque. Aitaque pitsipatarini iriori, aviotaque cariresati.

⁷¹ Icantasanotiri:

—Te nioteriji yora shirampari picantaqueri. Ioti Tasorentsi queario nocantaque: notseeyanirica, nocoaque iroasanquetayenata Tasorentsi. ⁷² Yapiitajiro ineanaji teapa. Iquenqueshiretanajiro Petero icantacheri Jesoshi: “Tequeratarica irampiitanajerota irineaje teapa, oncarate mava pincante: ‘Te noneeriji Jesoshi’ ”. Ari yoashiretanaca Petero, irosati iraantanaca, jii, jii.

Ari yaajeitanaqueri Jesoshi Piratoqui.

(Mt. 27.1-26; Ir. 22.66-23.5; Joa 18.28-40)

¹ Ari oquitaitetamani, yapatojeitamanaja yora jivatacaaajeitiriri saserotepee, savica-kaantajeitatsiri, oametantirori sanquenarentsi, maaroni. Aisati yapatojeitaca maaroni pashini oametavacainchari. Icantavacaimentajeitacari Jesoshi. Ari yoisoyeetanaqueri Jesoshi, yaanaqueri anta, ipapaaqueri Pirato. ² Isampitavaqueri:

—¿Avirompa ivincatsarite jorio?

Iriori Jesoshi yacanaqueri:

—Je, naro.

³ Icantajeiti jivatacaajeitiriri saserotepee:

—Oshequi yantaniroyetaqueri yoca, te incameetsateji.

⁴ Yapiitajiri Pirato, isampitajiri:

—¿Paitampa caari pacanta? Piquemavaqueri oshequi icantacotashijeitaquempi.

⁵ Te iranqueji Jesoshi. Irosatiquea iriori Pirato yoantanacariri cavaco. ⁶ Ari ainiro yametacari: maaroni osarintsi, ariorica omoncaratapaaja yavisananiri, yoimisoquijap-initiri aparoni yoiminqueetiri. Yoimisoquijajiri janicarica icoajiri atiripee. ⁷ Ainiro meeca yashitacotaca anta atiripee coajeivetachari irojoquerime pincatsari: ipajita aparoni Varavashi. Iro irojocantearimeri pincatsari, yoantaque. ⁸ Ari ijatashijeitaqueri yora apatojeitainchari, icantajeitapaaqueri:

—Meecaquea nocoi pantajeitenaro oca pametari: poimisoquijajenari aparoni poimin-quiri.

⁹ Yacavaqueri Pirato:

—¿Iriompa picoaqueri noimisoquijajempiri yora pivincatsarite?

¹⁰ Iotaque Pirato oshequi ipincatsajeitiri atiri Jesoshi, irootaque iquisajeitancariri saserotepee, yaacantantacariri. ¹¹ Ari yora saserote iquenaquenayetanaque, icantajeitaqueri atiripee:

—Picantacoventiricari Jesoshi. Pincantajeiteri: “Iranti poimpacaajeri Varavashi”.

¹² Yapiitajiri aisati Pirato, icantiri:

—¿Jaocampa meeca noncanteriri yoca pipincatsajeivetacari?

¹³ Icajemajeitanaji aisati:

—Pimpajacotacanteri coroshiqui.

¹⁴ Isampitiri:

—¿Paitampa yantaqueri nompajacotacanteariri?

Aiquero yovaapinijeitanaquero icajemajeitanaque:

—Pimpajacotacanteri, pimpajacotacanteri.

¹⁵ Icoanaque Pirato inquimoshiretacaajeitajeri yora atiripee, irosati yoipacantajariri Varavashi. Ja irintini Jesoshi ipasanatacantaqueri, ari yaacantaqueri impajacotacanteariri.

Oshequi yoashinoncaaqueri soraro Jesoshi.

(Mt. 27.27-31; Joa 19.1-3)

¹⁶ Iriori soraro yaanaqueri tsompoina ivancoqui Pirato. Ipajitironta pancotsi pere-torio. Yora soraro icajemajeitaqueri maaroni itsipapee. ¹⁷⁻¹⁸ Itseenajeitanaqueri, ishirontimentajeitacari, icantiri:

—¿Avirotaquempa ivincatsarite jorio? Jentsite, narori, nompincatsajeitempi. Tsame pinquitsaatearo quitioncanirori, aisati pamatseetearo amatseerentsi pinquempetan-teariri pincatsari, impoiji nompincatsajeitantempiri. Iji, iji, iji.

Ari iquitsaataqueri, aisati yantaqueneri totseequi, yamatseetaqueri. ¹⁹ Ipasanatiri iitoqui, iro ipasatantacariri savoroqui. Iquitiojaqueri. Itiyeroashinirotacari, ineapincatsatamempeacari. ²⁰ Ari oshequi yantavintsanataqueri, impoiji isapocajiri iitsaare quitioncanirori, iquitsaatajiri iitsaaresanori iriori.

Ipajacotantacariri Jesoshi.

(Mt. 27.31-56; Ir. 23.26-44; Joa 19.16-30)

Impoiji yaanaqueri anta impajacotanteariri. ²¹ Nianqui avotsi ineaqueri soraro shirampari pajitachari Shimo, iriotaque shirenatesi. Irio iriri Arijantero, jeri Irojo. Iponeanaja Shimo oantsiqui, iro iravisanaqueme, iro cantaincha yaavaqueri soraro, iperanatavacari:

—Panatanaqueneri Jesoshi coroshi.

²² Ari yaajeitanaqueri Jesoshi anta opajitanta Coricota. Iro ipajitarorri otishi oshiaqueri iitonaroqui atiri. ²³ Ipavetari ovaja oconoajataca aavintarontsi pajitachari mira. Iro cantaincha te irireeroji. ²⁴ Impoiji ipajacojeitaqueri, aisati ineaquempi mapijaniqui, iriojeitanteari janicarica aitajerineri iitsaareni. Ipavacaayetacaro. ²⁵ Ari

ijenoquitapaaque catsirincaiteri, irosati ipajacotantacariri. ²⁶ Isanquenataquero sanquenarentsi, ocanti: "Iriotaque ivincatsarite jorio". Ipatacaquero corosiqui jenioquiji. ²⁷ Ora pashini coroshi ipajacotaqueri apite coshinti. Aparo yoatiacotaqueri iracosanoriqui Jesoshi, irio itsipa yoatiacotaqueri irampatequi. ²⁸ Irootaque omoncaratantajari sanquenarentsi cantatsiniri: "Irishiacanteri caari cameetsatatsine". ²⁹ Ainiro anta avisayetatsiri icantimatanaqueri, aisati yavimacanaca, icantajeitiri:

—Joo, aviro shoveajeronemeri ivanco Tasorentsi. Oncarateme mava quitaiteri povetsicajerome avisati. ³⁰ ¿Arimpa pitasoncantashiyeta? Jentsite, pintasoncacoventajea avisati: poavisacotajea avisati, paniireanaje corosiqui.

³¹ Irosati icantaqueriri iriori yora jivatacaajeitiriri saserotepee, avisati oametantirori sanquenarentsi. Ishirontimentajeitacari, icantavacaajeitanaca:

—Irintiquea itsipa yoavisacoti. Jaaquea iriori te iroavisacotajeaji. ³² Jeri Quirishi-tovetachari, pincatsariventerinemeri ijorioririnte. Jentsite, amenavaquerita ariorica iraniireanaje ara corosiqui. Noneaqueririca, ari nonquemisantanaqueri.

Aisati iriori tsipatacariri Jesoshi ipajacojeitaca, itseencaqueri.

³³ Ari icaravetapaaca catsirincaiteri tampatica, otsitenitanaque maaroni quipatsiqui. Ari ishavijitanaji, iporeanaji avisati. ³⁴ Irosati icajemantanaca antearojenca Jesoshi, icanti:
—Eroi, Eroi, irama savatani.

Irootaque acantiri aneanequi: "Notasorentsire. Notasorentsire. ¿Paita pojocantaquenari?"

³⁵ Iquemavetavacari aparopee shirampari, icanti:

—Pinquemerri, icajemiri Iriashi.

³⁶ Ari ishianaca aparo atiri, yoviincapaqueneri quepishijariqui aajatirori. Yoisotacotaqueneri savoroquiiqui. Ipavetari irantsimicavaquerome. Icanti:

—Ari icantavacata: amenavaquerita ariorica impocashitapaaqueri Iriashi iroaniitapaajeri.

Icamanaque Jesoshi.

(Mt. 27.50-56; Ir. 23.45-49; Joa 19.30-37)

³⁷ Antearojenca icajemanaque Jesoshi, icamanaque, toren. ³⁸ Ainiro anta ivancoqui Tasorentsi antearo tocoya, tontari, opaincaca omoroqui. Intanaca jenoqui otserea-maotanaque, tsererere, irosati ishaaviji. Apitemaotanaji. ³⁹ Ainiro imontetacari iyapitanote soraro. Ineavaqueri jaoca icantanacari Jesoshi, icamantanacari. Irootaque icantantacari:

—Quearioteemi: iriotaque yoca shirampari itomi Tasorentsi.

⁴⁰ Otimaiti paricoti aparopee tsinane, amenajeitiri. Ocarajeitaiti Maria Maquitarasato, jero avisati pashini Maria, irootaque iriniro Santiaco, jeri avisati Jose. Yora Santiaco imoitatsiri itimi. Aisati ocarajeitiri Sarome. ⁴¹ Ainiro itimaveitani Jesoshi anta Carireaqui, oijajeitirini maaroni oca tsinanepee. Intacojeitarini avisati. Otimaque meeca aca oshequi otsipapee tsinane. Itoncaantanacari Jesoshi anta Jerosarequi, irootaque oijajeitiriniri.

Jaoca icantaqueriri Jesoshini.

(Mt. 27.57-61; Ir. 23.50-56; Joa 19.38-42)

⁴² Ishavijiiteanaji catsirincaiteri. Iro quitaiteri meeca yovetsicajeitiro iroajeiteari osaitequera, tempa osaitequera quitaiteri imaoreantajeitari. ⁴³ Ainiro Jose, yora poneachari Arimateaqui. Aitaque icarajeitiri yora oametavacaajeitainchari. Ineacameetsajeitiri atiripee. Yaamaari Tasorentsi, icoaque impincatsariventeri. Ipanacari iriori Pirato, ijatashitaqueri yamanantapajiri yora Jesoshini. ⁴⁴ Yoanaque cavaco Pirato. Iquenqueshiretanaque: "¿Icatimaitacampa icamanaque Jesoshi?" Ari icajemacantaqueri iyapitanote soraro. Isampitavaqueri:

—¿Queariompa? ¿Camasanotanaquempa Jesoshi?

⁴⁵ Icantiri:

—Je, camasanotaque ini.

Irosati itiancantacariri Jose intijeri Jesoshini. ⁴⁶ Yamanantaque Jose tocoya. Yoaniitaqueri Jesoshi, yapinaicacotaqueri tocoyaqui. Yoiponaaqueri omoroqui, anta imoqueetironta imperita. Itivironcashitanaqueri antearo mapi omoroqui. ⁴⁷ Oneacotaqueri jaoca yoquieri Maria Maquitarasato. Otsipataro Maria, ora iriniro Jose.

16

Itinaanaja Jesoshi.

(Mt. 28.1-10; Ir. 24.1-11; Joa 20.1-10)

¹ Avisanaque quitaiteri imaoresentajeitari. Amanantanaque tsinane casancajari, ontiritantajearimeri Jesoshini. Ari opajitari iroori tiriterinemeri Maria Maquitarasato. Aisati iroori ocaratiro pashini Maria iriniro Santiaco, jero aisati iroori Sarome. ² Ari capichaji quitaiteri ojatamani anta omoroqui yoyeetacarinta. Iro tominco ojatantacari. Ari ijenoquitapaaque catsirincaiteri, irosati areetantapaaca. ³ Ocantavacaanaca:

—¿Janicampa tivironqueerone ora mapi omoroquinta? Antearo oni, eiro aaveirotsi.

⁴ Amenapaaque, oneapaaquero mapi, tivironcanaca. Antearo catsini onaveta.

⁵ Queapaaquero omoroqui anta yoavetacarinta. Te oneapajeriji ocoavetapaaquero, irinti oneapaaque evancari, isavicaque acosanoriqui. Iquitsaataro quitsarentsi quitamarori catsini. Oapaaque cavaco. ⁶ Icantavaquero:

—Eiro poitsi cavaco. Irio picoaveta yora Jesoshi nasaretesati, yora ipajacoyeetaqueri. Itinaanaja, te aneajeriji aca. Pamenerote aca yoyeetacarica. ⁷ Pijataje meeca, pincamantapeeri iroamere. Aisati pincamanteri Petero. Pincantapaaquero: “Irijivatanaque-mpi anta Carireaqui, aitaque pineapaajeriri anta. Tempa aitaque icamantitimpini”.

⁸ Ari osoquijanaji, oshianaca. Opioncanaque, oanaque cavaco catsini. Otsaroanaque, irootaque caari ocamantacotantari.

Oneajiri Maria Jesoshi.

(Joa 20.11-18)

⁹ Irootaque itinaantajari Jesoshi tominco. Iro intasanotajari yonijaajaro Maria Maquitarasato. Irootaque peerani yatajeaoncaveitaniri 7 camaari, iro cantaincha yoavisacotaqueroni. ¹⁰ Irosatiquea ojatantanaca iroori ocamantapaaquero yora itsipajeiveitaniri Jesoshi. Irosatiquera yoashiretacojeivetari, iraacojeivetari aisati. ¹¹ Ari ocamantavetaacari:

—Tinaanaja Jesoshi, noneajiri.

Te inquemisantavaqueroji.

Ineajiri apite iroamere Jesoshi.

(Ir. 24.12-35)

¹² Impoiji ipashinivorotanaca Jesoshi, inijapaajari apite iroamereni, yaniijetanaji anta oantsiqui. ¹³ Ari ipianaja yoca neaqueriri, icamantapaaquero itsipapee. Aisati iquempetavaqueri, te inquemisantavaqueriji.

Iquenquetsatacajeitiri Jesoshi maaroni iroamerepee.

(Mt. 28.16-20; Ir. 24.36-49; Joa 20.19-23)

¹⁴ Impoiji yoajeitaja iroamerepee, icarajeitaji 11. Irosati inijajeitantapaajariri Jesoshi. Icantajeitaqueri:

—Tempa nocamantitimpini nontinaanaje: ¿paita caari piquemisantantana? Tempa ontine piquenqueshireantari. ¿Paita caari piquemisantantari neajanari incaranqui?

¹⁵ Pijajeite pintsoeteanaquero maaroni quipatsiqui. Pincamanteri maaroni atiri jaoca incantajeari iroavisacotajeari iriori. ¹⁶ Janicarica quemisantavaquerone ora pincamanteri, aisati ariorica irivaotisatajea, aitaque iroavisacotajea. Irompa yora caari quemisantavaquerone, iroasanquetasanoteri Tasorentsri irinti. ¹⁷ Jaocarica pijajeiteri, intasoncacoventempi Tasorentsri, iriojeitanteari atiri queariotaque oca picantaqueriri. Nomatacayempiro poavisacotanteari yatajeaoncane camaari. Pioyetero otsipapee neantsi pinquenquetsatacotantenari. ¹⁸ Ariorica pajiricaveteari maranque, ariorica irantsicavetempi, iro cantaincha eiro yoamaimpitsi. Aisati, ariorica pirero piantatsiri, eiro oamaimpitsi. Aisati ariorica pimpamiteri mantsiatatsiri aisati pincantacoventer, ari iravisacoejtaje.

Ivecarataquero Maricoshi isanquenare.
(Ir. 24.50-53)

¹⁹ Irootaque icantajeitaqueriri Avincatsarite Jesoshi, irosati yoancantanaja inquitequi, isavicipaaji anta iracosanoriqui Tasorentsi, icaratapaajiri ipincatsaritapaaji iriori. ²⁰ Ari ijajeitanaque iroamerepeeni. Iquenaquenayetanaque, icamantantayetanaque jaocarica iquenanaqueri. Quiso yoiri Avincatsarite, yamitacojeitiri. Aisati itasoncantayetaque, iojeitantaçari atiripee queariosanotaque icamantajeitapairiri. Aitaque ocanta. Ari ocarati. Narotaque sanquenatirori: *Maricoshi*

YORA IROCASHI ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

Ivetsatari Tiojiro.

¹⁻⁴ ¿Ainirompi Tiojiro? ¿Tecatsimpa oyempine? Meeca noninti nonquenquetsatacoteri Jesoquirishito. Icarajeitaque oshequi sanquenatacojeitaqueriri, icamantacoyetaquero yantayetaqueri. Ineajeitaqueri, aisati iquemacojeitaqueri, irootaque isanquenatacotantariri. Noneanataqueri narori isanquenare, aisati nosampitacoyetaqueri yantayetaqueri niotasanolantacarori, notsoteaquero maaroni. Meeca novaajempiro narori, nocoaque tampatica piotasanotero yantayetaqueri Jesoshi, piojeite te iramatavijeitimpiji yora sanquenatirori.

Yora Cavigriyeri icamantiri Sacariashi intime itomi.

⁵ Peerani, ipincatsaritantzari Eroreshi anta Joreaqui, itimini saserote pajitachari Sacariashi. Iriotaque ishanincani Aviashi: ariorica yantaveetiniri Tasorentsi anta ivancoqui, icarajeitiri ishanincasanori iriori. Opajita ijina Sacariashi Isavere, irootaque ishanincani Aaro. ⁶ Quemisantincari ini iriori Sacariashi, aisati ijina. Icantani imayetaqueri icantiriri Tasorentsi, iojeitiri atiri icameetsataque. ⁷ Te intimeji itomipee: shiravaro oni ijina, aisati imoncaratavacaajeitaca yanteashipajeitaque.

⁸ Ari omoncarataca quitaiteri yantaveejeiti ishaninca. Yamejeitaro itiancapinitiri aparoni saserote itainiri Avincatsarite casancapatsari. ⁹ Icantajeitiri Sacariashi ishaninca: —Meeca aviro queasanotatsine anta, pintayeneri Avincatsarite casancapatsari.

¹⁰ Ari iqueanaque, irinti yora apatojeitainchari isavicafejeiti saiteriqui, iquenquetsatacacjeitiri Tasorentsi. Aitaque ariorica itaaquero casancapatsari, iquenquetsatacacjeitiri Tasorentsi. ¹¹ Anta tsompoina, imapocaqueri inampire Avincatsarite, icatiapaaca quempeji onantariqui casancapatsari, icatiapaaca irampatequi. ¹² Ineantavacariri yoanaque cavaco, aisati oshequi itsaroanaque. ¹³ Iro cantaincha icantaqueri:

—Sacariashi, eiro pitsaroitsi. Timatsi picantaqueri Tasorentsi; tempa iquemaqueMPI, irootaque ontimanteariri coajica pijina pitomi. Pimpajiteri Joa. ¹⁴ Oshequi pinquimoshireventeari, aisati inquimoshireventajeiteari oshequi pishanincapee. ¹⁵ Aisati irineacameetsatasanoteri Tasorentsi iriori. Eiro irirotsi cachojari. Quiso oasanoteri Ishire Tasorentsi, tequeratsita intime, quiso oyeri: oncanteani oameteri. ¹⁶ Oshequi inquemisantaceaajeiteri pijorioririnte, impincatsajeitanteeariri Tasorentsi, tempa irio Avincatsarite maaroni. ¹⁷ Inquempeteari Iriashini, oshequi oametiri Ishire Tasorentsi, aisati otasoncacaqueri. Irijivatanaqueri Avincatsarite, incamantajeiteri ishanincapee iraamaajeiteari, aisati incamanteri inquemisantajeiteri. Iroamejeiteri ishaninca inquemisanteari, inquempeteari yora peeraniniri iquemisantini intacaroniri. Iroamejeiteri tseencantatsiri cameetsa inquemisanteri Tasorentsi.

¹⁸ Icantaqueri Sacariashi:

—¿Arimpa? ¿Jaoca noncanteari niotasanolanteari queariotaque oca picantaquenari? Anteashipataquena, aisati nojina, anteashipataque iroori.

¹⁹ Yacanaqueri:

—Naro Cavigriyeri, quiso noiri Tasorentsi. Iriotaque tiancaquenari nocamantantimpirori oca cameetsatatsiri. ²⁰ Aitaque omoncarataquea oca nocamantaquempi, iro can-taincha te pishiretearoji, irointi pitseencaquena. Meeca pimasontite, eiro pineanatajitsi irosati intimanteari pitomi.

²¹ Ainiro anta saiteriqui apatojeitainchari yamenaajeivetacari Sacariashi, icanta-jeitaque:

—Osamanitanaqueteemi ipeaca. ¿Paita caari isoquijantaja?

²² Impoiji isoquijanaji, te irimatajeoji irineanataje, irointi ijicojicotashitaca. Impoiji iojeitanaque, icantajeiti:

—Timatsi ineakeri anta tsompoinaqui.

Te irineanatasanoteji catsini. ²³ Irosati icanta, oshequi quitaiteri yantaveetaji aisati ivancoqui Tasorentsi. Impoiji ipianaja ivancoqui iriori. ²⁴ Impoiji oaque ijina, irosati oquempoyeantaca ovancoqui. Icarati 5 cashiri te osoquijajeji. ²⁵ Ocanti:

—Peerani te intimeji notomi, irootaque nopashiventantacari, iro cantaincha eiro nopashiventajatsi aisati. Icavintsaaquena Avincatsarite, tempa icameetsatasanoti.

Yora Cavigriyeri icamantiro Maria: “Intime pitomi”.

²⁶ Impoiji icarataque 6 cashiri otsomotetantacari Isavere. Ari itiancajiri aisati Tasorentsi Cavigriyeri:

—Pijate Nasaretequi: ora carireaqueiniri. ²⁷ Pincoapaaquero Maria, ijinatsori Jose. Irioataque ishanincani Iravirini. Ocashiacari ayeri, iro cantaincha te oneayeteriji shirampari.

²⁸ Ari ijatashitaquero. Imapocapaaquero, icantapaaquero:

—¿Ainirompi, Maria? Noncamantempi: oshequi inintasanotaquempi Tasorentsi, quiso yoaqueMPI. Oshequi icavintsaasanotaquempi, panaacotaquero maaroni pitsinaneronte.

²⁹ Iro cantaincha otsaroanaque iroori, oquenqueshiretanaca: “¿Paita ojita oca icantauenari?”

³⁰ Icantaquero:

—Eiro pitsaroitsi. Queario, icavintsaasanotaquempi Tasorentsi. ³¹ Irotaintsi poye. Coajica pintimeri pitomi, pimpajiteri Jesoshi. ³²⁻³³ Impincatsaritasanote. Iriojeitanaque atiri irio Itomi Tasorentsi, savicatsiri inquitequi. Tempa iriotaque Avincatsarite. Peerani yora Iravirini ipincatsariventaveitarini pijorioririnte. Iro cantaincha incanteri Tasorentsi: “Notiomni, aviro pincatsariventajeiterineri maaroni, pincantaitatiyempani”. Aitaque incanteari impincatsaritanaque, eiro yoipacaajirotsi.

³⁴ Ari ocantiri:

—Jaoca incanteari intimanteari notomi? Te intimeji nojime.

³⁵ Yacanaquero:

—Iro timacayempine Ishire Tasorentsi. Aisati intasoncaventaquempi Tasorentsi, savicatsiri inquitequi jenoqui. Coajica incantacojeiteri pitomi: “Icameetsatasanoti, te aneeroji irantane. Iriotaque Itomi Tasorentsi”. ³⁶ Aisati noncamantempi: anteashipatasanovetaca iroori pishaninca Isavere, aisati icanteetiro shiravaro oni, iro cantaincha icarataque meeca 6 cashiri otsomontetantacari. Coajica ontimeri otomi.

³⁷ Pineaquero, tecatsi pomerentsitimotearine Tasorentsi, imajeitaquero pitarica icoiri.

³⁸ Ocantiri iroori:

—Irioyeampa Avincatsarite. Onimotaquena pitarica icoacaaquenari: icoacaaquenarica intimashitea notomi, ari cameetsataque.

Irosati ipiantanaja inampire Tasorentsi.

Ojataque Maria oquivantiro Isavere.

³⁹ Pashini quitaiteri ojatanaque Maria Joreaqui. Oshintsiti ojatanaque toncaariqui.

⁴⁰ Areetapaaca anta ivancoqui Sacariashi. Oneapaaquero Isavere, ocantapaaquero:

—¿Ainirompi?

⁴¹ Oquemantavacarori Maria ocajemapaaque, oquematiiri ishevatanaca orijani, moyec. Aisati oametasanotaquero Ishire Tasorentsi, ⁴² irosati ocajemanvacaro. Ocantiro:

—Tempa ineshinoncajeitaquee Tasorentsi, aisati iquempejeitiro maaroni tsinane; iro cantaincha avinti, panaacojeitaquena: ineshinoncatasanotaquempi catsini. Tempa aisati ineacameetsatiri pirijani. ⁴³ Aviro ashitearine Avincatsarite. ¿Paita piquenqueshiretanari pineana? ⁴⁴ Pamene, noquemantavaquempi pivetsatapaaquena, iquimoshiretanaque norijani, ishevatanaca, moyec. ⁴⁵ Pishiretasanotavacaro maaroni icamantaquempi Avincatsarite, irootaque ineshinoncatantaquempi.

⁴⁶ Ocantiro Maria:

—Tempa icameetsatasanotaque Avincatsarite, ⁴⁷ iriotaque Atasorentsite aisati oavisacojeiteeneri coajica. Oshequi noquimoshireventaquequi. ⁴⁸ ¿Paita icavintsantanari narori? Nashinoncaavetaca, tecatsi niote narori. Iro cantaincha iriojeitanaque maaroni

atiri noquimoshireventaque. ⁴⁹ Oshequi itasoncacoventaquena, tempa itasorentsi-tasanotaque, icameetsatasanotaque. ⁵⁰ Icantatiani icavintsaajeitaqueri maaroni pincatsajeitiriri. ⁵¹ Oshequi itasoncantayetaque. Intsoncajeitajeri maaroni shemejeitatsiri. ⁵² Imajeitaqueri pincatsarivetachari yojocacaaqueri ipincatsariventanti. Irintiquea ashinoncaincari ipeajiri pincatsari. ⁵³ Iquemacaacari tasheavetachari, aisati yaapitsatajiri ashitaarantincari maaroni timimojeivtariri. ⁵⁴ Icantani Tasorentsi yamitacojeitaqueri ajorioririnte, te impeacoteiji arori icavintsaajeitaquee. ⁵⁵ Aitaque imataquero maaroni icantaqueriru intacaroniri peerani: Avarama aisati maaroni ishanincani, catsini. Irootaque ocantirori Maria. ⁵⁶ Ari osavicaiti mava cashiri, impoiji opianaja onampiqui.

Itimaque Joa vaotisatantatsiri.

⁵⁷ Ari moncarataca otimiri Isavere otomi. ⁵⁸ Iquemacojeitaquero oshanincapee, iquimoshireventaque. Icantajeitaque:

—Tempa ineshinoncatasanotaquero Avincatsarite.

⁵⁹ Ari ocarataque imaacotaque 7, moncarataca intoyeantanteariri. Yamejeitaro jorio ipajitavaca iriori, icantajeiti ishaninca:

—Tempa impajitea Sacariashi, inquempetajeari iriri.

⁶⁰ Iro cantaincha ocanti iriniro:

—Eiro ipajitatsi Sacariashi, ainti impajitea Joa.

⁶¹ Icantajeivtaroi:

—¿Paitaquea? Te intimeji pishaninca pajitachaneri Joa.

⁶² Ari isampijetiri Sacariashi:

—¿Paita picoiri avinti?

⁶³ Ari ijicotiro paperi, isanquenajeitaqueneriri: “Aitaque, impajitea Joa”. Irosati yoajeitantanaca cavaco. ⁶⁴ Imapocanaja Sacariashi ineanataji aisati, icanti:

—Tempa icameetsati Tasorentsi.

⁶⁵ Impoiji yoajeitanaqueri cavaco maaroni ishaninca. Iquemacojeitaqueri maaroni savicajeitatsiri toncaaripeeque: ora timatsiri Joreaqui. ⁶⁶ Iquenqueshirejeitanaca maaroni quemacojeitaqueriri: “¿Jaoca icantari yora jananequi? ¿Paita iranteri coajicani? Tempa ineshinoncatasanotaquero Avincatsarite”.

⁶⁷ Impoiji Ishire Tasorentsi oametaqueri Sacariashi, icantantarori oca:

⁶⁸ —Tempa icameetsatasanoti Avincatsarite, irioataque tasoncaventajeitaqueeri. Ipocashijeitaquee iroavisacojeitajee. ⁶⁹ Peerani Iravirini yantiniri Tasorentsi icoacairiri. Meeca itiancaqueri Tasorentsi ishanincani Iravirini, itasorentsi que, yoavisacotantaque. ⁷⁰ Tempa peerani icantirini Tasorentsi quenquetsatacotiriniri:

⁷¹ “Nontianquempiri oavisacojeitelpineri, intimerica quisajeitelpineri, irojocacoventajeitaquempi. ⁷² Noncavintsaajeitaqueri ishanincani Avarama, maaroni. Eiro nopeacotajarotsi nocantajeitaqueriri. ⁷³ Peerani nocantasanotaqueri Avarama:

⁷⁴ ‘Coajica noavisacojeiteri pishanincapee, nompiajeiteari quisajeivtearineri, impoiji eiro itsaroajeititsi inquemisantajeitena. ⁷⁵ Noameetsajeiteri, noncanteani noneacameetsajeiteri’ ”. Irootaque icantaqueriri Tasorentsi peeraniniri.

⁷⁶ Meeca notiomni, noncamanttempi: iriojeitempi atiri aviro quenquetsatacoterine Tasorentsi jenoquiniri. Pincamantajeiteri incameetsatanaque, iraamaajeiteari Avincatsarite.

⁷⁷⁻⁷⁸ Poamejeiteri ashanincapee iriojeitanteari jaoca incanteari iravisacotantajeari. Pincamantajeiteri icavintsaasanojeitaqueri Tasorentsi, eiro iquenqueshiretajirotsi yantayetiri caari cameetsatatsi. Ariorica icontetapaaque catsirinaciteri, te ontsitenitanajeji, irointi oquitaitetanaji. Aisati oquempetaca, ariorica imponeaquea Avincatsarite jenoqui, ayotasanojeitanaque cameetsa asavicajeite.

⁷⁹ Iroavisacojeiteri maaroni caari iovetari Tasorentsi, maaroni tsaroayevetachari incame. Iriotacaajeitapaquaqueri jaoca incanteari iraacameetsatanteariri Tasorentsi.

Irootaque icantaqueri Sacariashi.

⁸⁰ Ari avisanaji oshequi osarintsi, yantearitanaque Joa, oshequi iquemisantaqueri Tasorentsi. Ari itimaqueri apaniro caaraiteriqui, irosati iquenquetsatacariri ishanincapee.

Itimaque Jesoshi.

(Mt. 1.18-25)

¹ Ari ipincatsariventanti Jerosarequi oromasati, ipajita Shisari Acoshito. Ari iroaquera itimapaaque Joa, icanti Shisari:

—Nocoaque irisanquenatacojeitea maaroni atiripee, niotanteari jaoca icarajeitiri.

² Iro isanquenajeitantarori ivajiropee, irio Shirino pincatsariventajeitiriri shirasati.

³ Ari ijajeiti atiri anta nampitsiqui itimajeitini ishanincani peerani, isanquenatacojeitaca.

⁴ Itimi meeca Jose anta Nasaretequi, ora timatsiri Carireaqui. Iro cantaincha ishanin-catacari Iravirini: yora pincatsariveitachaniri. Iro inampini Iravirini Verequi, timatsiri anta Joreaqui. Irootaque ijatantacari Jose Verequi, irisanquenatacotantajeari irisati.

⁵ Itsipatanacaro iroori ijinatsori, irotimataintsi ontimacote. ⁶ Ari yareetantapaacari Verequi, irosati oquemantacaro atsicaneentaquero, niii. ⁷ Icoayevetapaaca pancotsi irimaanteari, iro cantaincha ijaajeitacaro pancotsipee irisavicanapeempameri: irointi timatsi ivanco virantsi. Aitaque otimaqueriri otomi, jivatatsiri itimi. Oponataqueri, oaqueri ora iquempoyeanteetanariri virantsi yoari.

⁸ Ari otsitenitanaji, ainiro anta queshiiqui isavicafeiti shentajeitiriri irovishate.

⁹ Imapocaqueri Avincatsarite, ishipaquireacojeitaqueri, oquempetaca quitaiteri, aisati ineajeitavaqueri inampire Avincatsarite. Itsaroajeitanaque; icantaita, shiquere. ¹⁰ Iro cantaincha icantapaaqueri:

—Eiro pitsaroajeititsi, timatsi noncamantempi: ocameetsatasanotaque. Pin-quimoshireventajeitearo, aisati inquimoshireventearo maaroni atiri. ¹¹ Iroaquera iti-maque Verequi oavisacojeitimpineri: iriotaque Avincatsarite Quirishito. ¹² Jeroca non-camantempi piotanteariri. Pijate ivancoquinta virantsi, pamenaiteri yora iroaquera timaintsiri; pineapaaqueri iponaaca anta ivancoqui virantsi, iponataca.

¹³ Irosati imapocajeitantarori oshequi jenoquisati, icantajeiti:

—Tempa icameetsatasanoti Tasorentsi, ¹⁴ nopolincatsatasanojeitiri anta inquitequi. Aca quipatsiqui irisavicaaajeiteri cameetsa maaroni ineacameetsajeitiri.

¹⁵ Ari ipiajeitanaja inquitequi, impoiji icantajeiti shentajeitiriri irovishate:

—Icamantaquee Avincatsarite timaque Verequi oavisacojeiteeneri. Tsamete amenai-teri.

¹⁶ Ari ishiajeitanaca, ineajeitapaaqueri Jose, jero Maria, jeri iriori otomi, iponaaca ara. ¹⁷ Ari icamantajeitapaaqueri maaroni icamantaqueriri inampire Tasorentsi. ¹⁸ Ari yoajeitanaque cavaco maaroni quemajeitaqueriri. ¹⁹ Iroori Maria oshequi oquen-queshiretaquero oca icantajeitaqueriri, oquenqueshiretapinitaquero. ²⁰ Ari ipiajeitanaja ashitariri irovishate anta queshiiqui. Icantajeitanaque:

—Tempa icameetsataque Tasorentsi. Ocameetsataque maaroni inijaaqueeri aisati maaroni icamantaqueeri. Cameetsa ini Tasorentsi.

Itoyeantajaniquitaqueri Jesoshi.

²¹ Ari ocarati 7 imaacotaque Jesoshi, irosati itoyeantanteetacari. Aisati ipajitiri Jesoshi: imoncarataquero icantaquerori Maria chapinqui inampire Tasorentsi.

Icanti Jose aisati Maria: “Nocoacaqueri Jesoshi irantasanoteneri Tasorentsi pitarica ico-ccaqueriri iriori”.

²²⁻²⁴ Ari peerani isanquenatacaaqueri Avincatsarite Moishishini: “Ariorica ontimeri tsinane otomi, onquempoyeempaya ovancoqui oncarate 40 quitaiteri: eiro ojatitsi ampatojeiteari quemisantatsiri. Ariorica omونcarataquea 40 quitaiteri, ocameetsati ojate ivancoqui Tasorentsi onquemisantajeari aisati. Aanajeneri Tasorentsi apite sampaquiti, ariorica apite paroma. Ompapaaqueri saserote, iroyeri, impoiji intayeneri Tasorentsi. Impoiji onquempetajea aisati peerani, cameetsa ojatapinitaje aisati, on-quemisantapinitaje”. Timatsi pashini isanquenatiniri aisati: “Irioricashirampari yora jivatatsiri otimiri tsinane, icoaque Avincatsarite inquemisantasanoteri, iranaacoteri impoiterineri intime. Ocameetsati iraanajeri ashitariri ivancoqui Tasorentsi, incanteri Tasorentsi: ‘Jerica notomi, jivatatsiri itimi. Pitarica pincoacaqueriri, nocoaque irantasanotempi’ ”.

Ari ocarataque 40 quitaiteri itimantacari Jesoshi, irosati ijajeitantanaja Jerosarequi: Jose, Maria, jeri Jesoshi. Imoncarajeitaquero maaroni isanquenatiniri Moishishi ojatap-initantajeari Maria onquemisante. Aisati ocamantaqueri Tasorentsi:

—Jerica notomi, nocoaque irantasanotempiro paitarica picoacaquaquerir.

²⁵ Ari itimi anta Jerosarequi shirampari pajitachari Shimeo. Quemisantasanotatsiri ini, cameetsa isaviqui, iquemisantsasanotaquero Ishire Tasorentsi. Aisati yaamaari Quirishito: yora veshireacaajeitearineri maaroni joriopee. ²⁶ Ocamantaqueri Ishire Tasorentsi: “Eirotsitarica picami, pineavaqueri Quirishito: yora intianqueri Avincatsarite”. ²⁷ Irosati otiancantacari Shimeo anta ivancoqui Tasorentsi; impoitapaaqueri Jose, Maria, jeri Jesoshi. ²⁸ Ineavaqueri Jesoshi, ijatashitaqueri, yatsomaavaqueri; icantiri Tasorentsi:

—Novincatsarite, tempa picameetsati, ²⁹⁻³⁰ noneaqueri oavisacotenaneri, yora picantaquenari. Meeca moncarataca, tecasti noncoyeri aisati. Noquimoshiretaque, vetsicaquena nonceme. ³¹ Queario, pitiancaqueri iroavisacojeiteri maaroni atiri: ³² irio iotacaajeiterine pashinipee atiri, iriveshireimentajeiteari maaroni joriopee quemisanta-jeitimpi.

³³ Irosati yamenantanaca Jose, jero Maria, yoanaqueri cavaco; iquenqueshiretasan-otiro icantaqueri Shimeo. ³⁴⁻³⁵ Aisati icantajeitaqueri:

—Nocoaque irineshiloncajeitempi Tasorentsi.

Aisati icantiro iriniro:

—Pamene, coajica oshequi piraacoteari pitomi: ipoqua ayojeitanteari avavisaco-jeitaja, iro cantaincha incarate oshequi ashaninca tseencajeiterineri: iroashinoncaa-jeitea iriori. Irintiquea pashini ashanincapee, iroveshireimentasanojeiteari pitomi. Aparo intseencajeiteri, pashini iroveshireimenteari, onconijatanteari iquenqueshire-jeitiri.

Irootaque icantaquerori Shimeo.

³⁶⁻³⁷ Ari otimi aisati ivancoqui Tasorentsi tsinane pajitachari Aana: oshequi ocamantapinitiri oshaninca irineane Tasorentsi. Ipajitani irini Janoeri: iriotaque ishanincani Asere. Anteashipatasanotaque Aana: ocarataque osarintsite 84. Camajimentaaro oni, ocarataque 7 osarintsi irosati icamantacari ojimeni. Meeca osavicaque ivancoqui Tasorentsi. Ocantani: quitaiteriqui, tsiteniriqui oquenquetsatacapinitiri Tasorentsi; oshequi opincatsataqueri. Te onquenqueshiretasanoteroji oayetari. ³⁸ Ari ojatashitaqueri Jesoshi iriori. Ocantaqueri Tasorentsi:

—Ariove, noneaqueri narori.

Aisati ocantajeitiri oshaninca:

—Jerica yoca, iriotaque oavisacojeiterineri ashanincapee: maaroni aamaajeitariri.

³⁹ Ari imataquero Jose aisati Maria maaroni isanquenataqueri Moishishi: tempa isanquenatacari Avincatsarite. Impoiji ipiajeitanaja Nasaretequi: timatsiri Carireaquí.

Evancariquera Jesoshi, ipianaja ivancoqui Tasorentsi.

⁴⁰ Ari iqueveanaque Jesoshi, aisati ishindsightanaque, aiquero ijatanaque iotasano-tanaque, yanaacotiri ijananequiririnte. Oshequi ineshiloncajaqueri Tasorentsi. ⁴¹ Ari ijatapiniti anta Jerosarequi, itsipajeitari Jose aisati Maria. Aitaque ijatapinitiri maaroni osarintsi ariorica omونcaratapaaca quitaiteri Yavisantaniri. ⁴² Ari ocarataque irosarintsite Jesoshi 12, ijajeitanaji aisati, ⁴³ iquimoshireventaquequeri Tasorentsi. Pashini quitaiteri ipiajeivetanaja maaroni ishaninca, iro cantaincha isavicanaque Jesoshi Jerosarequi apaniro. Te irivoteari ishaninca, ⁴⁴ yaamaashivetcari itsipajeitanajari ishanincapee pashini. Ari ishaaviniji icoacoayevetacari ishanincaqui, ⁴⁵ iro cantaincha te irineajeriji. Irosati ipiantanaja Jerosarequi, icoacoayevetajari, ⁴⁶ ocarataque mava quitaiteri. Impoiji ineapaajiri ivancoqui Tasorentsi: icarajeitiri oametantayetsiri. Iquemisantayetiri yoametantayetiri, aisati isampijeitiri paitapeerica. ⁴⁷ Yoajeitanaquequeri cavaco atiripee, icanti:

—Pamenerite evancarica: oshequi iotantari, cameetsa yacanaqueri yora oametantat-siri, te incomitearoji.

⁴⁸ Aisati yoapaaqueri cavaco Jose, jero Maria. Ocantiri iriniro:

—Notiomi, ¿paitaquea pimanapitsantanari? Pamene, nocaratiri pirtsori nocoacoayevetaquempi. Oshequi nocoiteaqueMPI.

⁴⁹ Yacanaquero:

—¿Paita picoacoayetantanari? Tempa piote nocoasanotaque nosavique ivancoqui Apa.

⁵⁰ Iro cantaincha te inquemajeitavaqueriji icantavetacariri. ⁵¹ Impoiji yoijajeitanajiri, ipiajeitanaja Nasaretequi. Icantani iquemisantaqueri, tecatsi incantea impiatsateari. Irointi Maria oshequi oquenqueshiretaquero maaroni oca oneayetaqueri. ⁵² Aiquero ijatatii iotasanolanaque Jesoshi, yantearitanaque. Yora Tasorentsi inintaqueri itomi; aisati ishanincapee iriori, inintajeitaqueri Jesoshi.

3

Intantacarori Joa iquenquetsati.

(Mt. 3.1-6; Mr. 1.1-6; Joa 1.19-28)

¹ Ocarati meeca 15 osarintsi ipincatsariventajeitiri maaroni oromasati yora Tiverio Shisari. Ipincatsariventiri joresasati Pontsio Pirato. Yora Eroreshi ipincatsariventiri carireasati; irinti irirenti, Jiripo, ipincatsariventiri itoreasati aisati taraconitiresati. Aisati yora Irisania ipincatsariventiri avirenesati. ² Aisati meeca ipincatsariventajeitiri saserotepee Anashi aisati Cajashi. Ari itimaqueri Joa, itomi Sacariashi, anta caarai-teriqui. Icantiri Tasorentsi:

—Nocoaque meeca pinquenquetsatacayeri pishaninca, timatsi nocoaque pincaman-tajeiteriri.

³ Ari iquenaquenayetanaque Joa Joriraniqui, icantajeitiri ishaninca:

—Pinquenqueshirejeitea, eiro piquempetajatsi peerani, impoiji incavintsaajeitempi Tasorentsi: eiro iquenqueshireacotajimpirotsi pantajeiveitaniri. Impoijiquea novaoti-sajeitempi iritanteari pishaninca paviscotaji.

⁴ Imoncarataquero Joa icamantacotitariniri peerani Isayashini: “Anta caaraiteriqui intime coajica quenquetsatacayerineri ishaninca. Incamantajeiteri ishaninca: ‘Coraque Avincatsarite, pamenaajeiteri, paamaajeiteari. Pincameetsatanaque irineacameetsa-tantapeempiri. Ariorica pincameetsatanaque, pinquempetearo avotsi cameetsatatsiri inquenanteari Avincatsarite: poameetsatero irineacameetsatantearori. Pintampati-catero, ⁵ pijayero otsateni, pinquiaarantajero toncaaripee, pintampaticatajero maaroni tipiyetatsiri, pintijayetajero ovintenipee. ⁶ Impoiji maaroni atiri irineajeitavaqueri oavisacojeiterineri intianqueneri Tasorentsi’”.

Icantayetiriri Joa ishaninca.

(Mt. 3.7-12; Mr. 1.7-8; Joa 1.19-28)

⁷ Ari ijatashijeivetacari Joa oshequi atiri irivaotisajeiterime. Jeroca icantavaqueriri:

—Avirojeitaque camaari: oshequi pamatavitantajeiti, te pincameetsajeiteji. Te pin-coajeiveteaji pijate Sharincaveniqui, iro cantaincha te pinintasanoteji pinquemisanteri Tasorentsi, irootaque picoantavetacari pivaotisajeiteame. ⁸ Ariorica pinquenqueshire-jeitea pimpashinitantajeari, pintime cameetsa iriojeitanteari itsipapee queario pican-taque. Eiro picantashitatsi: “Noshanincatacari Avaramani, irootaque niotantacari noavisacotajea”. Pamatavitaja avisati. Incoauericame Tasorentsi, irimatero intason-querome oca mapica, impeajerome atiri, oshanincatajearime Avaramani, iro cantaincha eiro avisacotitsi iroori. Patsipetashitaca pishanincavetacari Avarama: piquempetarocari mapi. ⁹ Piquempejeitacaro aisati inchato. Iro cantaincha irotaintsi inchaquitero Tasorentsi inchato, imponquitireajero aisati. Terica oncameetsateji oitsoqui, in-chaquitero, intasanolajero, pomein. Piquempetarocari inchato caari cameetsatatsi oitsoqui: yojoquimpicari Tasorentsi.

¹⁰ Ari isampijeitiri:

—¿Paita picoiri nantajeiteri?

¹¹ Icantiri:

—Otimirica apite piitsaare, pimpaaranteri ashinoncaincari aparo. Otimirica oshequi poari, pimpaaranteri aisati ashinoncaincari. Pincavintsaantapinite.

Irootaque icantapinitiriri Joa.

¹² Aisati ijatashitaqueri Joa aayetiriri quirequi: yainiri yora oromasati, oshequi yamatavitiri aisati ishaninca. Ijatashiteitiri, icoaque irivaotisajeitavaqueri, isampitapaaqueri:

—¿Paita nanteri piotantenari queario noquemisantaque?

¹³ Ari icantavaqueri:

—Eiro paashitaritsi iirequite pishaninca, iointi pimoncaratero icantauquemperi oromasati.

¹⁴ Aisati ijatashiteitaqueri soraro, isampitaqueri:

—¿Paita nanteri narori?

Ari icantavaqueri:

—Eiro piquishirtsu atiri paapitsatanteariri iirequite, aisati eiro picantacotashitaritsi paitanteariri iirequite. Moncarataca ipinataquemperi pivincatsarite, eiro picoitsi aisati.

¹⁵ Ari yaamaajeitari Quirishito, ijitashiteiveta irotaintsi irareetea. Iquenqueshirejeitiri: “Iriorica Joa Quirishito”. ¹⁶ Iro cantaincha icantajeitaqueri Joa:

—Novaotisajeitaquempi nijaqui: te ompomerentsiteaji. Coajica impoque Avincatsarite irinti, oshequi nopincatsataqueri, notseencaja narori. Intiancajeitaquee irinti Ishire Tasorentsi, quiso oajeitee, oameetsajeitee. ¹⁷ Coajica irinashitacayeari cameetsatatsiri aisati caari cameetsatatsi. Oquempetaca arori anashitacaaro oitsoqui panquirents, aisati anashitacaaro osapentairoqui. Aquempoyeajiro oitsoqui, atairo osapentairoqui. Aisati inquempejeitee Avincatsarite arori: incavintsaaajeiteri cameetsajeitatsiri, iroashinoncaajeiteri caari cameetsajeitatsi. ¹⁸⁻²⁰ (-)

Ivaotisataca Jesoshi.

(Mt. 3.13-17; Mr. 1.8-11)

²¹⁻²² Ari ivaotisajeitaqueri Joa oshequi atiri, aisati ivaotisataca Jesoshi, irosati iquenquetsatacaantacari iriri. Omapocanaca anuireashitapaaqueri Ishire Tasorentsi, oponeaca inquitequi. Oshiapaaqueri sampaquiti. Aisati iquemajeitaquero icantiqueriri Tasorentsi:

—Avirotaque notomi nonintasanotiri. Oshequi noveshireimentaquempi.

Yoiminqeacantaqueri Eroreshi Joa.

(Mt. 14.3; Mr. 1.14; 6.17)

(v 18) Aitaque icanta Joa: icamantapinitiri atiri incameetsatanaque, aisati icamantiri jaoca incantajeiteari iroavisacojeitantzajeari.

(v 19-20) Aisati icantaque:

—Te oncameetsateji yantayetiri Eroreshi. Yaavetaro irirenti Eroriashi, iro cantaincha yaitaqueri Eroreshi. Ainiro oshequi pashini caari cameetsatatsi yantayetiri.

Ari iquisanaca Eroreshi. Ipincatsariventajeitiri carireasati, irootaque imatantacarori yaacantaqueri Joa, shepi, yoiminqeacantaqueri. Aiquero ijatatii yantanaquero catsini caari cameetsatatsi.

Isanquenatiro ivajiropee ishanincani Jesoshi.

(Mt. 1.1-17)

²³⁻³⁸ Peerani yovetsiquiri Tasorentsi Aran.

Iri itomini Aran ipajitani Sete.

Iri itomini Sete ipajitani Enoshi.

Iri itomini Enoshi ipajitani Cainama.

Iri itomini Cainama ipajitani Marerereri.

Iri itomini Marerereri ipajitani Jarete.

Iri itomini Jarete ipajitani Enoco.

Iri itomini Enoco ipajitani Matosara.

Iri itomini Matosara ipajitani Arameca.

Iri itomini Arameca ipajitani Noe.

Iri itomini Noe ipajitani Seme.

Iri itomini Seme ipajitani Aratajara.

Iri itomini Aratajara ipajitani Cainama.

Iri itomini Cainama ipajitani Sara.

Iri itomini Sara ipajitani Evere.
 Iri itomini Evere ipajitani Jarareque.
 Iri itomini Jarareque ipajitani Aracao.
 Iri itomini Aracao ipajitani Seroco.
 Iri itomini Seroco ipajitani Nacoro.
 Iri itomini Nacoro ipajitani Tare.
 Iri itomini Tare ipajitani Avarama.
 Iri itomini Avarama ipajitani Isaca.
 Iri itomini Isaca ipajitani Jacovo.
 Iri itomini Jacovo ipajitani Jora.
 Iri itomini Jora ipajitani Jareshi.
 Iri itomini Jareshi ipajitani Eseromi.
 Iri itomini Eseromi ipajitani Arini.
 Iri itomini Arini ipajitani Aranini.
 Iri itomini Aranini ipajitani Aminarava.
 Iri itomini Aminarava ipajitani Nasono.
 Iri itomini Nasono ipajitani Sara.
 Iri itomini Sara ipajitani Voso.
 Iri itomini Voso ipajitani Jovere.
 Iri itomini Jovere ipajitani Jese.
 Iri itomini Jese ipajitani Iraviri.
 Iri itomini Ivaviri ipajitani Natama.
 Iri itomini Natama ipajitani Matata.
 Iri itomini Matata ipajitani Mena.
 Iri itomini Mena ipajitani Merea.
 Iri itomini Merea ipajitani Eriaquimi.
 Iri itomini Eriaquimi ipajitani Jonama.
 Iri itomini Jonama ipajitani Jose.
 Iri itomini Jose ipajitani Jora.
 Iri itomini Jora ipajitani Shimeo.
 Iri itomini Shimeo ipajitani Irevi.
 Iri itomini Irevi ipajitani Matata.
 Iri itomini Matata ipajitani Jorimi.
 Iri itomini Jorimi ipajitani Eriyesere.
 Iri itomini Eriyesere ipajitani Jesoshi.
 Iri itomini Jesoshi ipajitani Ere.
 Iri itomini Ere ipajitani Eremarama.
 Iri itomini Eremarama ipajitani Cosama.
 Iri itomini Cosama ipajitani Ari.
 Iri itomini Ari ipajitani Merequi.
 Iri itomini Merequi ipajitani Neri.
 Iri itomini Neri ipajitani Saratiyeri.
 Iri itomini Saratiyeri ipajitani Sorovaveri.
 Iri itomini Sorovaveri ipajitani Eresa.
 Iri itomini Eresa ipajitani Joanana.
 Iri itomini Joanana ipajitani Jora.
 Iri itomini Jora ipajitani Joseca.
 Iri itomini Joseca ipajitani Semeini.
 Iri itomini Semeini ipajitani Matatiashi.
 Iri itomini Matatiashi ipajitani Mata.
 Iri itomini Mata ipajitani Nacai.
 Iri itomini Nacai ipajitani Eshiri.
 Iri itomini Eshiri ipajitani Naomo.
 Iri itomini Naomo ipajitani Amoshi.
 Iri itomini Amoshi ipajitani Matatiashi.
 Iri itomini Matatiashi ipajitani Jose.
 Iri itomini Jose ipajitani Janai.
 Iri itomini Janai ipajitani Merequi.
 Iri itomini Merequi ipajitani Irevi.

Iri itomini Irevi ipajitani Mata.
 Iri itomini Mata ipajitani Eri.
 Iri itomini Eri ipajita Jose.

Iri itomitsori Jose ipajita Jesoshi, iro cantaincha ijijeivetari ishaninca irio itomisanori.

Ari ocarataque irosarintsite Jesoshi 30, intantacaroniri iquenquetsatacaa jeitiri ishaninca.

4

Yora camaari irantacayerime Jesoshi caari cameetsatatsi.

(Mt. 4.11-12; Mr. 1.12-13)

¹ Ari ijatanaji Jesoshi, iponeanaja Joriraniqui. Quiso oanaqueri Ishire Tasorentsi, aanaqueri caaraiteriqui. ² Ocarati 40 quitaiteri itimaque anta, tecatsi iroyeari: aasanotaqueri itashe. Ari maaroni quitaiteri ijatashitaqueri yora Satanashi, icoaveta irantacayerime caari cameetsatatsi. ³ Icantavetapaacari:

—Avirorica itomi Tasorentsi, jentsite: pintasonquero oca mapica, pimpeero tanta, poyearo.

⁴ Yacanaqueri Jesoshi:

—Isanquenatini peerani Moishishi: “Ocameetsati avajeitearo avanaro eiro acamanta, iro cantaincha ocameetsatasanoti anteneri Tasorentsi maaroni icoacaajeitaqueeri”.

⁵ Aisati yaanaqueri antearoqui toncaari, ijicotapaaqueneri maaroni quipatsi, ⁶ icantiri:

—Pincoaquerica noncantajeiteri maaroni savicajeitatsiri impincatsajeitempi, ira-cameetsajeitempi. Tempa narotaque pincatsariventajeitiriri maaroni, ⁷ ariorica non-canteri impincatsajeitempi avirori, ari impincatsajeitempi. Apatiroquea nocoaque pintiyeroashitena, pimpincatsatena narori.

⁸ Yacanaqueri:

—Ocameetsati ampincatsateri Tasorentsi, apaniro ampincatsateri irinti. Irootaque ocantiri irineane.

⁹ Impoiji yaanajiri Jerosarequi, anta otataroqui ivanco Tasorentsi, antoo jenoqui. Icantiri:

—Avirorica itomi Tasorentsi, jentsite: pimpariye, eiro picamitsi. ¹⁰ Tempa ocanti Sanquenarentsi: “Irishentempi inampiree Tasorentsi, inquempoyeaquempi”. ¹¹ Ainiro aisati pashini isanquenatiniri: “Ari irancatsatavajempi iriori, eiro ishinetimpitsi pimpariye mapiqui”. Pinequero, ¿paita pitsaroantacari?

¹² Yacanaqueri:

—Aisati ocanti Sanquenarentsi: “Eiro pineantaritsi Tasorentsi: yoasanquetaimpicari”.

¹³ Ari iotaque camaari tecatsi incanteri Jesoshi, ijatanaji. Iro cantaincha ari irampiitajeri coajica.

Ipianaja Jesoshi Carireaquí.

(Mt. 4.12-17; Mr. 1.14-15)

¹⁴ Ari impoiji ipianaja Jesoshi Carireaquí, oshequi omatacaaqueri Ishire Tasorentsi. Te osamaniteji iquemacojeitaqueri maaroni savicajeitatsiri anta. ¹⁵ Icantajeiti:

—Tempa icameetsati Jesoshi; ariorica apatojeita, tempa cameetsa yoamejeitaquee.

Yareetanaja Jesoshi Nasaretequi.

(Mt. 13.53-58; Mr. 6.1-6)

¹⁶ Impoiji ijatanaji Jesoshi Nasaretequi, aitaque yan tearitaqueri inampisanoriqui. Ari saavarroqui ijatanaque anta yapatotapinijeitantarí, icantani ijatapiniti saávarroqui. Tsom-poina icatiapaaca, irineanateneri ishanincapee irineane Tasorentsi. ¹⁷ Ipeetavaqueri isanquenarení Isayashini. Yampinaicareavaquero, yamenaquero irineanateneriri. Ocanti: ¹⁸ “Quiso oaquena Ishire Avincatsarite, otiancaquena noncamanteri ashinon-caayetachari jaoca incanteari iroavisacotantajeari. Noncamanteri maaroni iperanat-acari camaari noimpacacoventajerí. Namenacaajeri aisati caari amenatsi. Aisati noimpacacoventajerí maaroni yoashinonqueeyetiri. ¹⁹ Aisati noncamantajeiteri atiri irotaintsi nontasoncacoventeri”.

²⁰ Ari yampinaicajiro sanquenarentsi, yoipiajiniri ipajiri, impoiji isavicanaji. Yame-nashejitaqueri, sorerere. ²¹ Icantajeitiri:

—Queario meeca nomoncarataquero oca noneanataquempi, oquenquetsatacotana.

²² Ari ineacameetsajeivetacari Jesoshi, aisati ineacameetsajeitaqueri icantaqueriri. Aisati isampitavacaaca:

—¿Tempa irio itomi Jose?

²³ Icantaqueri:

—¿Pitseencaquenampa? Naamaaca pincantename: “Jentsite, poavisacotajeriqueti pishanincasanori avirori. Noquemacotaquempi pitasoncantaque anta Caperenaoqui, meecaquea pintasoncantequeti aisati aca anampiquica”. ²⁴ Iro cantaincha noncamantempi pamejeita pitseenquiri pishanincasanori: te pioteji pimpincatsateri iriori, irintiquea pashini pipincatsati. ²⁵⁻²⁶ Queario oca noncamantempi: peerani itimantacari Iriashini, piojeiti te ompariyeji incani. Peerani osarintsitaqueni. Ocarati mava osarintsi aisati 6 cashiri, te ompariimateji incani catsini. Itashejeitanaque maaroni savicajeitatsiri quipatsiqui. Otimini oshequi camajimentaaro aca, iro cantaincha itianquiri Tasorentsi Iriashini pashiniqui quipatsi opajita Shironi. Itianquiri irijatashitero camajimentaaro savicatsiri anta Sarepetaqui. Itasoncapinitiniro oari, ipapinitiro. Irointi savicatsiri aca inampiqui, te intasonqueneroji. ²⁷ Aisati, peerani itimantacari Iriseomi, itimini aca oshequi patsaincari, iro cantaincha tecatsi iroavisacote. Apaniro irinti yoavisacotiri shiriasati pajitachari Nama.

²⁸ Iquemajeitancarori apatojeitainchari, iquisajeitanaca. ²⁹ Ari icatiaeitanaca, yaajeitaqueri, shepi. Yaanaqueri anta otsapitapaa nampitsi, otiminta imperita. Impishoncajeiterime, iroariyerime, ³⁰ iro cantaincha ipeimotanajari, ijatanaji.

Iopianaja Jesoshi Caperenaoqui.

(Mr. 1.21-28)

³¹ Ari ipianaja Jesoshi Caperenaoqui, ora carirequiniri. Saavarouqui yoamejeitajiri aisati atiri. ³² Yoajeitanaqueri cavaco, icantajeiti:

—Tempa ocameetsati oca yoametaqueeri. Ipincatsariti: iotasanoquero oca yoametaqueeri.

³³ Ari itimi anta yapatotapinijeitanta aparoni shirampari neiriri camaari. Antearojenca icajemacotavaqueri:

³⁴ —Aviro Jesoshi poneachari Nasaretequi. Niotaquempi: aviro itomi cameetsari Tasorentsi. ¿Paita pipocashitantanari? ¿Picoavetampa pojoquena?

³⁵ Ishintsitsataqueri Jesoshi, icantiri:

—Pimajerete. Pinijantareanajeri yoca shirampari.

Ari ipishoncanaqueri shirampari quipatsiqui, tiricn, irosati ijanirotantanajari. Tecatsi oajerine shirampari, tecatsitanaji. ³⁶ Yoajeitanaqueri cavaco aisati icantajeiti:

—Pineaqueri: apatiro ineanataqueri camaari, irosati ijatantanaja. Oshequi ipincatsariti, oshequi itasoncanti.

³⁷ Ari iquemacojeitaqueri Jesoshi maaroni savicajeitatsiri.

Yoavisacotiro Jesoshi irairo Petero.

(Mt. 8.14-15; Mr. 1.29-31)

³⁸ Impoiji ijatanaji Jesoshi ivancoqui Shimo. Icantajeitavaqueri:

—Ojoquiitaca irairo Shimo, oshequi oyatsiire. Poavisacotajero.

³⁹ Icatiapaaca onampinaqui, icantaqueri:

—Ari ompeanajea piatsiire, paviscotaje.

Irosati opeantanaja oyatsiire, maani; ocatianaja, opajeitajiri yoari.

Yoavisacoyetiri itsipapee atiri.

(Mt. 8.16-17; Mr. 1.32-34)

⁴⁰ Ari iqueanaji catsirincaiteri. Yameetaqueri Jesoshi oshequi mantsiyatatsiri, onashiyeta imantsiare. Ari ipamijeitavaqueri, yoavisacoyetiraqueri. ⁴¹ Impoiji ipocajajeiti oshequi yoitsavianquiri camaari, icajemajeitapaaque:

—Aviro itomi Tasorentsi.

Iojeitaque camaari iriotaque Quirishito, irootaque icantantacariri:
—Pimajerete, eiro picamantacotanatsi.

Yovaanaja Jesoshi pashinipeequi nampitsi.

(Mt. 4.23; Mr. 1.35-39)

⁴² Ari oquitaitetamanaji ijatamanaque Jesoshi anta ocaraitetapaaque. Icoacoajeitqueri atiripee. Ineantajariri, icantajeivetapaari:
—Eiro pijatajitsi, pisavique aca Caperenaoqui.

⁴³ Iro cantaincha icanti Jesoshi:

—Eiro nosaviquitsi. Nocoaque noncamanteri itsipapee atiri ipincatsariventajeitiri Tasorentsi, tempa cameetsa iriojeitero irlori. Irootaque itiancantanari Apa.

⁴⁴ Ari iquenaquenayetanaque Jesoshi anta Joreaqui, iquenquetsatacaajeitiri atiri anta pancotsipeequi yapatojeitantari.

5

Iquitsatiri Shimo oshequi shima catsini.

(Mt. 4.18-22; Mr. 1.16-20)

¹ Ari pashini quitaiteri iquenquetsati Jesoshi anta otsapijaqui incajare pajitachari Jenesarete. Itsitacajeitapaacari atiripee, icoajeitque inquemero irineane Tasorentsi. ² Ari ineaquero Jesoshi apite pitotsi anta otsapijaqui. Tecatsi teteearone: yora quitsatatsiri iquiviro iitsarite anta. ³ Itetaca Jesoshi ivitoqui Shimo, icantiri:

—Shimo, pintianquero capichaji.

Ari isavicaque pitotsiqui nianquijamaji, yoamejeitiri apatojeitainchari otsapijaquinta.

⁴ Ari osamanitanaque, itsoncanaquero yoamejeitaqueri. Icantiri Shimo:

—Pijate anta osaanajataquenta, pinquitsate.

⁵ Yacanaqueri:

—Oametantatsiri, noquitaitetacotaque noquitsavetaca incaranqui, tecatsi nimate catsini. Meecaquea picantaquena, aitaque nojataque nonquitsajeitajanteta aisati.

⁶ Ari iquitsataji: yaasanotaque shima, oshequi catsini: monquire, monquire. Jaaca inaca, irotaintsi ompeshe quitsari. ⁷ Icajemaqueri ishaninca savicatsiri pashiniqui pitotsi:

—Caateve, pamitacojeitenave.

Ari ipocacotaque, itetacotaqueri shima apite pitotsi, tero, tero; irotaintsi ontsitiye.

⁸⁻¹⁰ Icarati oshequi shima iquitsatiri, irootaque yoantanacari Petero cavaco; aisati iquempejeitaca itsipapee: jeri Santiaco aisati Joa. Iriotaque yoca itomipee Severeo. Iriotaque icaratapinitiri Shimo iquitsatapinitiri shima. Itiyeroashitanacari Shimo Petero, icantiri:

—Novincatsarite, cameetsa pijataje. Te noncameetsateji narori catsini, eiro pitsipatanatsi.

Yacanaqueri Jesoshi:

—Eiro pitsaroacaanatsi. Noncamantempi: oquempetaca peerani piquitsatapinitiri shima, nocoaque meeca pinquemisantacaapinijeiteri atiripee.

¹¹ Ari yaatacojeitapaaji, irosati yojocajeitantanajaro ivitopee, iitsaritepee, maaroni. Yojajaeitanqueri Jesoshi.

Yoavisacotiri Jesoshi patsaatsiri.

(Mt. 8.1-4; Mr. 1.40-45)

¹² Itimi anta nampitsiqui shirampari patsaasanotatsiri: otsoncaqueri ivatsaaro, opiticasshaqueri maaroni itseempequiqui. Ineantavacariri Jesoshi, itiyeroashitavacari, icantiri:

—Novincatsarite, tempa pitasorentsiti: pincoaquerica, poavisacotena.

¹³ Ari yacotashitaqueri, ipamitiri. Icantiri:

—Nocoaque. Pavisacotaje.

Irosati opeantanaja ivatsaaro. ¹⁴ Aisati icantiri:

—Eiroyea picamantacotanatsi. Meeca pijate saserotequi, pinijaapeeri iriotanteari pavisacotaji. Pimatero icantiniri Moishishini: paanajeneri saserote pivira intayeneri Tasorentsi iriojeitanteeari atiri pavisacotaji.

¹⁵ Iro cantaincha aiquero ijatatii icamantacojeitaqueri Jesoshi. Icarati oshequi catsini jatashijeivetacariri inquemisanterime, aisati pashini icoajeiveta iroavisacoterime. ¹⁶ Ari ijatanaque iriori anta caaraiteriqui, iquenquetasatacari iriri.

Yoavisacotiri Jesoshi caari shevatacha.

(Mt. 9.1-8; Mr. 2.1-12)

¹⁷ Ari pashini quitaiteri yoametantaji Jesoshi pancotsiqui. Isavicajeiti quempeji variseopee aisati oametantirori sanquenarentsi: iponeayetaca oshequi nampitsipeequi, anta Carireaqui, Joreaqui, aisati iponeayetaca Jerosarequi. Otimasanoti itasorenca Avincatsarite imatantarori yoavisacotantaque. ¹⁸ Jeritapaaque shirampari, icompi-tacojeitapaqueri caari shevatacha. Icoajeiveta iraanaquerime anta isavicaquenta Jesoshi, iro cantaincha tecatsi inquenapee, iticajeitaqueri atiripee. ¹⁹ Tecatsi incantea inqueapee, irootaque yataitacantacariri otataroquinta pancotsi. Imorontaquero, impoiji yoaniitacotaqueri anta inauenta Jesoshi. ²⁰ Iotavaqueri iriori ishirejeitacari, irootaque icantantavacariri:

—Noshaninca, ainiro pantane, iro cantaincha eiro noquishimentimpirotsi, irointi noncavintsayempi: eiro noquenqueshiretacotimpirotsi aisati, irointi noavisacotempi.

²¹ Ari icantavacaajeitaca variseopee aisati oametantirori sanquenarentsi:

—Piquemanirotaqueri: ijitasorentsinirotaca. Apaniro irinti Tasorentsyoavisacotanti.

²² Ari iotaqueri Jesoshi iquenqueshirejeitiri, irosati icantantanacari:

—¿Paita picantantari: “Ijitasorentsinirotaca”? ²³ Pamene, nocantaqueri: “Eiro noquenqueshireacotajimpirotsi pantane, irointi noavisacotajempi”. Meeca pitseen-cajeitaquena. Tempa opomerentsivetaca naniitacaajeri yoca. Eirorica yaniitajitsi, ari pintseencasanojeitena, pishirontimentajeitena. ²⁴⁻²⁵ Noponeaca narori inquitequi, natiritapaaque. Nocoaque piojeite ainiro notasorenca, aisati nomataqueronocavintsairi antirori caari cameetsatatsi, noavisacojeitiri.

Ari icantiri caari shevatacha:

—Jentsite, pincatianaje, paanajero pinariantari, pijataje pivancoqui.

Ari ineajeitavaqueri icatianaja, yaanajiro inariantari, ijatanaji ivancoqui. Icantanaque:

—Ariove, icameetsati Tasorents.

Ari icantiri saserotepee:

—Pineaquiero, nomataqueri caari pineapiniti, irootaque piotantameri oshequi nota-sorentsitaque. Aisati ari nomatajeri naanajeri coajica inquitequi.

²⁶ Ari yoajeitanaqueri atiripee cavaco, icantajeiti:

—Tempa icameetsatasanoti Tasorents, ipincatsaritasanoti. Te aneapiniteroji oca aneaqueri meeca.

Yojatiri Jesoshi Irevi, yora apatovetanariri pincatsari quirequi.

(Mt. 9.9-13; Mr. 2.13-17)

²⁷ Impoiji isoquijanaji Jesoshi, irosati ineantapaacariri Irevi, yora aitayetiriri ishaninca iirequite, impoiji ipiri pincatsari. Isaviqui anta isanquenatapiniti. Icantapaaqueri:

—Tsame, pojatanaquena.

²⁸ Ari yoipacanaquiero isanquenatacoyetiri quirequi, icatianaca, yojatanaqueri Je-soshi. ²⁹ Impoiji ijataque Irevi ivancoqui, icajemacantaqueri itsipapee vionquiniriri pincatsari iirequite, pashini ishanincapee, Jesoshi, maaroni. Yoacaajeitacari maaroni.

³⁰ Ipocaque saserotepee aisati yora oametantirori sanquenarentsi. Icantapaaqueri iromere Jesoshi:

—Pamenerite Jesoshi: icarajeitaqueri vionquiriri quirequi, yoajeita, irajeiti. Jeri aisati itsipapee caari cameetsayetatsi. Te oncameetsateji incarajeiteri iroajeitea.

³¹ Ari icantiri Jesoshi:

—Yora joquittachari iriotaque coatsiri iraavintea. Yorari caari joquittacha te incoyeji aavinterineri. ³² Iriotaque nopocashitiri caari cameetsatatsi niotacantajeariri eiro yan-tapinitajirotsi aisati caari cameetsatatsi. Te nompocashiteriji jivetachari icameetsati.

Isampitiri saserote: “¿Paita caari ititanta poamere?”

(Mt. 9.14-17; Mr. 2.18-22)

³³ Ari icantiri saserote Jesoshi:

—Pamene ititapinita iroamere Joa, aisati iquenquetsatacapinitiri Tasorentsi: aisati iquempejeitacari iroamere variseo. Iranti poamerepee, te intiteaji: yoapinijeita, irapini-jeiti.

³⁴ Ari yacanaqueri:

—Oquempetaca ariorica iraye shirampari ijina, incajemajeiteri ishanincaphee in-quimoshireventajeitanteeariri. Ariorica irareejeitaquea, ¿arimpa intijeitapeempa? Eiro. Aisati narori, nocarajeitiri meeca noamerepee: ¿paita nontitacanteeariri? ³⁵ Ariorica irojocajeitanajeri ishaninca aatsiri ijina, impoijiquea intijeitanaquea. Aisati nonquem-peetea narori: ariorica coajica noncame, impoiji iroashiretacojeitanaquena noamere, irosatiquea intijeitantaqueaari iriori. ³⁶ Aisati, otimirica piitsaare iroaquerari, te pintsereroji pimpataquero peesatotaintsiri pimaatsara. Aisati, ariorica poavitajerome, eiro omoncaratavacaatsi. Aisati pinquivajerorica ontsitiamao-tanaque iroaquerari, aisati antsivianaque peesatotaintsiri. Otsereacoticari iroaquerari. ³⁷⁻³⁸ Tempa apeantantaro iroaquerajari pearentsi imeshinaqui iroaquerari, impoiji antsitacotaquero eiro apara-jatantatsi. Ariorica oshimoretanaque, aravoncjtanaque, otapiasanotaqueri imeshina. Iroaquera ini, eiro ipesacotitsi, aisati eiro aparajatatsi oja. Irooricame ampeantanta-jerome pearentsi iroaquerajari peesatitatsiri imeshina, tempa iraravoncanaque, inton-canaque: ton. Aitaque intsereanaque, aisati amparajatanaquea iroaquerajari. ³⁹ Tempa ariorica irajeitero peesatotaintsiri pearentsi, eiro acoirotsi irero iroaquerajari.

6

Icantavacimentaro saavarro.

(Mt. 12.1-14; Mr. 2.23-3.6)

¹ Ari osaavarotaque, iquenanaque Jesoshi tiricomashiqui, itsipatanacari iroamere. Yora iroamere yavijeitaquero oitsoquipee, yamirocaitaquero otaqui, yojocaquero. Irointi oitsoqui, yoajeitacaro. ² Ineajeitaqueri variseopee, icantiri:

—Te oncameetsateji oca pantiri. Tempa irointi oca saavarro, amaoreajeitantarri, eiro ataquireaitantarotsi meeca. ¿Paita pantantarori?

³⁻⁴ Yacanaqueri Jesoshi:

—Tempa pineanatiro isanquenatacotiriniri Iravirini. Aaqueri itasheni aisati itsipa-jeitari. Otimi anta ivancoqui Tasorentsi tanta yovetsiqueetiniriri Tasorentsi. Apaniro yoajeitaro saserotepee, te irishineteriji itsipapee iroyearo. Iro cantaincha yashinoncaaca Iraviri, irootaque ipantacariri tanta yora ivincatsarite saserote, aisati ipajeitaqueri maaroni oijajeitiriri. Pineaquero, te irininteji iroashinoncayeri. ⁵ Noponeaca narori inquitequi, natiritapaaque: naro cantacantirori paitarica anteri saavarroqui.

⁶ Ari pashini saavarro ijatanaji anta yapatotapinijeita, yoametantapaaque. Itimi anta shirampari tsiricoipacori. ⁷ Yamenashetavaqueri oametantirori sanquenarentsi aisati variseopee, icoaque irioteri iroavisacotanterica saavarroqui. Icoaque incanteri ivincatsarite: “Noneaqueri Jesoshi yantaquero caari cameetsatatsi”. ⁸ Iro cantaincha iotaqueri Jesoshi iquenqueshirejeitiri. Icantiri tsiricoipacori:

—Caate, pincatiaphee aca.

Ari icatianaca, ijatashitaqueri. ⁹ Icantajeitiri Jesoshi:

—Meeca nosampijeitempi. ¿Paita cameetsatatsiri antajeiteri saavarroqui? ¿Cameet-sampa ancavintsayeri ashaninca? Terica, ¿picoaquempa avashinoncayeri? ¿Cameet-sampa avavisacoteri ashaninca? Terica, ¿picoaquempa ayeri?

¹⁰ Yamenajeitaqueri Jesoshi, imajerenirojeitanaque. Ari icantiri:

—Pancote.

Ari yacotanaque, cameetsatanaji iraco. ¹¹ Ari iquisajeitanaca saserotepee. Isampitava-caanaca:

—¿Jaoca ancanteriri avacantanteariri?

Icoyeajeitaqueri Jesoshi iroamerepee.

(Mt. 10.1-4; Mr. 3.13-19)

¹² Pashini quitaiteri ijataque Jesoshi toncaariqui, iquenquetsatacaiririri, iquitaite-tacotapaaque. ¹³ Ari oquitaitetamani icoyeajeitaqueri iroamerepee. Icarataque 12

icoyaqueri. Icoaque coajica intianqueri inquenquetsatacotanteariri. Jero oca ivajiropee: ¹⁴⁻¹⁶ Shimo (aisati ipajitiri Jesoshi: Petero), Antirishi (yora irirenti Shimo), Santiaco, Joa, Jeripi, Varitorome, Mateo, Tomashi, Santiaco (yora itomi Arijeo), Shimo (icanteetiri aisati Seraroro), Jorashi (yora itomi Santiaco), aisati Jorashi Ishicariote (yora aacanterineri coajica Jesoshi). Aitaque ipajjeitarri iroamere icoyaqueri Jesoshi.

¹⁷ Impoiji yoirincapaaja anta opampaitetinta. Itiminta oshequi iroamerepee, aisati oshequi catsini pashinipee atiri: iponeajeitaca Jore aqui, Jerosarequi, Tiroqui, aisati Shiroqui. Otimi Tiro aisati Shiro arejiqui, anta otsapijaqui antearoja incajare. Ijatashijetaqueri Jesoshi inquemisantajeitavaqueri, aisati icoajeitaque iroavisacojeiteri mantsiaripee. ¹⁸ Ari yoavisacojeitaqueri yatajeaoncayetiri camaari. ¹⁹ Icoajeitaque impamijeitapeeri, intasoncacoventanteariri iroavisacojeitanteeariri.

Iquenquetsatacotraqueri Jesoshi quimoshirejeitatsineri.

(Mr. 5.1-12)

²⁰ Ari yamenanaqueri iroamere, icantiri:

—Ariorica pashinoncaavetaca meeca, pinquimoshiretanaque: aitaque impincatsariventajeitempi Tasorents, coajica. ²¹ Ariorica pitasheavetaca meeca, pinquimoshiretanaque: aitaque inquemacaajempi Tasorents, coajica. Ariorica poashirevetaca meeca, pinquimoshiretanaque: aitaque inquimoshiretacaajempi, coajica. ²² Ariorica inquisajeitempi atiripee, intianquempi, incantimatemp, incante te pincameetsateji. Ariorica inquishimentajeitempiro piquemisantana, iro cantaincha inquimoshiretacayempi Apa. Tempa nopenaaca narori inquitequi, natiritapaaque. ²³ Ariorica inquisajeitempi, pinquimoshiretasanotanaque, pincantajeite: “Cameetsave”. Tempa aitaque cameetsa impinatasanotemp Apa inquitequi. Queario yora intacantajeitaqueeri iquisajeitaqueri peerani yora camantacotiriniri Tasorents.

Iquenquetsatacotiri Jesoshi ashinoncachaneri coajica.

²⁴ Jero pashini aisati icantajeitaqueri Jesoshi:

—Iro cantaincha yora ashitaarantincari, iquimoshirementaro yashijetari: moncarataca, iroashinoncayea irinti. ²⁵ Aisati iroashinoncayea quemarori yoari meeca: coajica inquemero itashe. Iroashinoncayea shirontajeitachari meeca: coajica incavintsaaajeitea aisati iriraajeitea. ²⁶ Ariorica irineacameetsajeitempi maaroni atiripee, pashinoncayea coajica: tempa yora intacarori ineacameetsajeitashitari yora amatavijeitiriri.

Icoaque Jesoshi aninteri quisajeiteeri.

(Mt. 5.38-48; 7.12)

²⁷ Aisati icantajeitaqueri:

—Pinquemisantajeitavaquena: pininteri avinti quisajeitimp, pincavintsayeri. ²⁸ Pincanteri Tasorents iramitacojeiteri maaroni cantimajeitimp, aisati maaroni quisajeitimp. ²⁹ Ariorica impasavorotemp pampatevoroqui, pishineteri impasavorotemp acaqueroca aisati. Ariorica iraapitsatemp poicoro, pimperita pashini piitsaare aisati. ³⁰ Ariorica iramanempiro paitapeerica, ari pimperi. Ariorica iraapitsatemp pivaararo, eiro picoacotiritsi aisati. ³¹ Ariorica picoaque incavintsayempi itsipapee, ari pincavintsayeri avirori. ³² Ariorica pinintajeitiri maaroni nintajeitimp, tempa moncarataca: tecatsi incantea impinatempi Tasorents. Tempa ioti caari quemisantatsi inintiri nintiriri iriori. ³³ Aisati oquempetaca: ariorica picavintsairi cavintsaaajeitimp avirori, tempa aisati moncarataca. ¿Paita picoiri impinatempi Tasorents? Aisati iriori caari quemisantatsi, icavintsairi cavintsaaajeitiriri iriori. ³⁴ Ariorica picoaque iroimpiajemp pipaqueriri pishaninca, tempa moncarataca: ¿Arimpa picoaque impajemp aisati Tasorents? Tempa aisati ipavaca iriori caari quemisantatsi paitapeerica, aisati icoaque irovanayeneri iroimpiajeneri. ³⁵ Irootaque nocantantimp pincavintsayeri avinti quisajeitaquemp, pincavintsante, pimpashiyeteari ashinoncaincari: eiro piquenqueshiretirotsi irimaterorica iroimpiajemp. Ariorica pantero oca, cameetsa: impinatasanotemp Tasorents, aisati intomintasanojeitempi. Cameetsa ipincatsariven-tanti anta jenoqui. Queario icavintsairi piatsajeitariri, yora caari cameetsajeitatsi. ³⁶ Icavintsantanot Apa: pinquempejeiteari. ³⁷ Eiro paamaashitaritsi pishaninca, aisati

eiro picantitsi: "Ainiro irantane", impoiji eiro icantimpitsi Tasorentsi: "Ainiro pantane avirori". Eiro piquishimentiritsi pishaninca yantayetiri, irointi pincavintsayeri: impoiji eiro iquishimentimprotsi Tasorentsi pantayetiri avirori, irointi incavintsayempi. ³⁸ Ariorica pimpayeteri ashinoncaincari coiteimoyetariri, aisati inquempetajempi iriori Tasorentsi: impayetempiro maaroni coiteimoyetaquempi avirori. Te irimashitsateji: impasanotempi. Ariorica capichaji pincavintsante, aisati capichaji incavintsayempi avirori. Ariorica oshequi pincavintsantasano, ari oshequi incavintsaasanotempi avirori.

Irootaque icantiriri Jesoshi.

Icoaque Jesoshi ancavintsayeri quisajeiteeri.

(Mt. 7.1-6, 15-23)

³⁹ Jeroca ishiacaaventiniriri aisati Jesoshi:

—¿Arimpa irimatero camarajaquiri irancatsatanaqueri iamarajaquiririnte? Eiro imatirotsi: tempa ari imparajeitaque omoroqui. ⁴⁰ Aisati iquempeta, yora iroamere te iranaacoteriji oametiriri ioti. Iro cantaincha ariorica irishitoriatasanote, ariorica irimoncarateari. ⁴¹ ¿Paita piquishimentantariri pishaninca yantayetiri? Panaacotasanoliticari avirori. Oquempetaca picantiri pishaninca: "Pitijaquitaca ovane quipatsi", iro cantaincha ainiro avirori pitijaquitacaro antearo inchato. ⁴² Arimpa pincanteri: "Jentsite, noshaninca, naajempiro pitijaquiro". Tempa pioti otimi inchato pashicajaquitaquempi avirori. Jaoca pincanteari paantajeanariri itijaquiro pishaninca? Pamatavitanti, pinquempetearime cameetsatasanotatsiri. Pamene, pijivate pojoquero antearora inchatora pashicajaquitaquempirira, impoiji pamenasanotanaje paantajeanariri itijaquiro pishaninca iriori.

⁴³ Jero oca pashini ishiacantiniriri Jesoshi:

—Arriorica ocameetsati inchato, ocameetsati oitsoqui iroori. Aisati terica oncameetsateji inchato, te oncameetsateji oitsoqui iroori. ⁴⁴ Arriorica aneero oitsoqui inchato ayoti jaoca ocantari inchato iroori. Arriorica pincoaque chochoqui, ¿arimpa pijatashitero anta manitincanamashiqui? Eiro pijatitsi, tempa piotiro te oitsoquitantearoji chochoqui, iyera, ova, tecatsi catsini. ⁴⁵ Arriorica anquenqueshiretero cameetsatatsiri, antayetero cameetsayetatsiri. Arriorica anquenqueshiretero caari cameetsatatsi, antayetero caari cameetsatatsi. Queario, aneanatantaro aquenqueshireyetiri. ⁴⁶ ¿Paita picantashitantanetanari: "Novincatsarite"? Te pinquemisantenaji.

Ivecarataquero icantajeitiriri.

(Mt. 7.24-29)

⁴⁷ Aisati icantiri Jesoshi:

—Meeca noshiacantempi jaoca icantari quemisantanari. Iquemiro noneane, iquemisantanotaquero: yantajeitaquero maaroni nocantaqueriri. ⁴⁸ Ishiaqueri shirampari vetsiquirori ivanco. Iquiajitaquero tsompoina, irosati mapiqui aitaque yovecarataquerori. Ari oniri ominca mapiqui, oquisotantacari. Opariasánotaque incani, ooncanaca eni. Antearo catsini otatsincavetapaacaro, iro cantaincha te aaveeroji: quisoataque onaque mapi. ⁴⁹ Iro cantaincha yora caari quemisantana ishiaqueri shirampari vetsicavetarori ivanco, te intijacotasanoterojo. Impoiji ooncanaca, aanaquero ivanco. Ojaraanaque, aanaquero, te aneajeroji.

Irootaque icantajeitiriri Jesoshi.

Yoavisacotiri Jesoshi inampire capitano.

(Mt. 8.5-13)

¹ Impoiji ipianaja Jesoshi anta Caperenaoqui. ² Itimi anta nampitsiqui aparo capitano. Oromasati ini, caari ini jorio. Ijoquuitaca inampire, irotaintsi income. Inintasanotiri capitano inampire. ³ Iquemacotaqueri Jesoshi, itasoncantaque, irosati itiancantacariri jivatacaajeitiriri joriopee;

—Pincamantaiteri Jesoshi impocanaqueta iroavisacotenari nonampire.

⁴⁻⁵ Ari yareejeitapaacari, icantasanojeitapaaqueri:

—Pijatashiteri. Icameetsatasanoti yora capitanonta, oshequi intintajeitaquee arori. Yovetsicacantaqueenero pancotsi apatojeitantarri. Cameetsa poavisacoteneri inampire.

⁶⁻⁷ Ari yojajetaqueraueri. Quempeji inapaaque, ineajeitavaqueri pashini ishanincaphee capitano, itianquiri. Icamantapaaqueri:

—Jero oca icantauquerau noyapitanote: “Nopincatsatasanotaqueri Jesoshi, iro caari notonquitantavacari. Notseenaja narosati, irootaque caari nocoanta impoque novancoquica. Niotaque incoaquerica iroavisacoteri nonampire, ari iravisacotaje. ⁸ Timatsi cantanari paitarica nanteri, aisati timatsi soraro notiancapinitiri. Noncanteririca: ‘Pijate’, ari irijataque. Noncanteririca: ‘Pimpoque’, ari impocanaque. Aisati noquempetiri nonampire iriori, ariorica noncanteri: ‘Jero oca panteri’, ari irantaquero”.

⁹ Iquemavaitiiri Jesoshi, yoanaque cavaco. Ari ipitsocashijeitacari oijajeitiriri, icantauquerau:

—¿Piquemaquerompa oca icantiri oromasati? Oshequi ishiretaquena, te inquempejeiteariji ashinanincaphee arori.

¹⁰ Ari impoiji ipiajeitanaja ishanincaphee capitano. Ineapaaqueri inampire, avisacotaji.

Yoitinaajiri Jesoshi camaintsiri anta Naiqui.

¹¹ Pashini quitaiteri ijatanaque Jesoshi anta Naiqui, icarajeitaqueri inampirepee aisati oshequi pashini oijajeitiriri. ¹² Iquempejijeitapaacaro nampitsi, ineavaitiiri icompitacotapaaqueri camatsiri, intijerime. Iro iriniro camaintsiri camajimentaaro, aisati te intimeji pashini otomi. Oijatacoventiri otomini, ocarajeitiri oshequi oshaninca.

¹³ Ineantavacarori Avincatsarite, oshequi icavintsairo, icantauquero:

—Eiro piraacotiritsi pitomi.

¹⁴ Ari ijatashitaquero cajo yoantacariri, ipamitaquero. Icatiacaapaacari compitacotiriri. Icantiri Jesoshi camaintsiri:

—Evancari, pintinaaje.

¹⁵ Irosati itinaantanaja, isavicaji; ineanatanaji. Impoiji icantiro Jesoshi:

—Jerica pitomi, aneanaji.

¹⁶ Yoajeitanaque cavaco catsini neajeitaqueriri, icantajeiti:

—Tempa icameetsati Tasorentsi. Itiancaqueeri oamejeiteerori irineane. Queario, itasoncaventaquee Tasorentsi, icavintsajaeitiri quemisantajeitiriri.

¹⁷ Irosati iquemacojeitantarcariri maaroni joreasati, aisati otsoteanaca neantsi pashinipeequi nampitsi.

Yora Joa Vaotisatantatsiri itianquiri iroamere Jesoshiqui.

(Mt. 11.2-6)

¹⁸ Ari iquemacotaqueri Jesoshi iroamerepee Joa, yora vaotisatantatsiri. Ijatashijeitaqueri, icamantapaaqueri yantayetaqueri Jesoshi. Yora Joa, icajemiri iroamere apite,

¹⁹ itiancaqueri Avincatsaritequi, icantauquerau:

—Pijajeite Jesoshiqui, pisampitapeeri: “¿Avirompa Quirishito namenaajeivetari? ¿Pashinimpa naamaajeitea?”

²⁰ Ari yareejeitapaacari, icantauquerau:

—Itiancaquena Joa, icantana: “Pisampitaiteri Jesoshi: ‘¿Avirompa Quirishito naamaajeivetari? ¿Pashinimpa naamaajeitea?’ ”

²¹ Tecatsi incantea Jesoshi iranqueri, irointita yanti yoavisacoyetiri oshequi mantsiayetatsiri, aisati yoavisacoyetiri oshequi yatajeoncayetiri camaari. Aisati yamenacaayetajiri oshequi caari amenayetatsi. ²² Impoiji icantiri:

—Meeca pijajeitaje, pincamantapeeri Joa aitaquenea pineacojeitaquenari aisati piquemacojeitaquenari. Pincamantapaajeri amenanaji yora caari amenaveitachani, aniitanaji yora caari aniiveitachani, avisacojeitanaji patsaayeveitachaniri, iquemayetanaji yora caari quemaveitachani, itinaayetanaja camayevetainchari. Aisati nocamantajeitiri ashinoncaajeivetachari jaoca incanteari irijate inquitequi.

²³ Iquimoshireventajeitaquena maaroni quemisantasanotanari.

Icanti Jesoshi: “Icameetsatasanotaque Joa”.
(Mt. 11.7-15)

²⁴ Ari ipiajeitanaja itiancane Joa, impoiji iquenquetsatacaajeitiri Jesoshi apatotimenteriri. Iquenquetsatacotiri Joa, icantiri:

—¿Paita pijatashijetantariri Joa anta caaraiteriqui? ¿Pijitimpa itsataashita Joa, iquenquetsatashita? Te inquenquetsatashiteaji. ¿Pijivetrimpa icomitapinita, te irioteji paitarica iquenqueshiretiri? Tempa ioti. ²⁵ ¿Paita pijatashitasanotantariri? ¿Irompa pijijeitaqueri ashitaarantincari ini, quitsaatarori cameetsamaori? Caari ini. Pamene, yora quitsaatarori cameetsamaori ishanincatacari pincatsari, aisati iquempetaca: iveshireimentaro irovaararo timatsiri ivancoqui pincatsari. Te inquempeteariji irinti Joa.

²⁶ Jentsite, pincamantena: ¿paita pijatashitiri? ¿Irimpa pijitiri quenquetsatirori irineane Tasorentsi pijatashitantariri? Tempa queario, iquenquetsatiro, iro cantaincha yanaacojeitiri itsipapee quenquetsatacantantsiri. ²⁷ Tempa piojeitiro sanquenarentsi cantatsiri: “Notiomi, nontianqueri jivatempineri, inquenquetsatacotempi. Incamantajeiteri atiri incameetsashirejeitanaque, inquemisantajeitempi”. Queario, oca sanquenarentsi oquenquetsatacotiri Joa Vaotisatantatsiri. ²⁸ Yanaacojeitaqueri maaroni itsipapee quenquetsatacantantsiri: imataquero maaroni icoacaqueriri Tasorentsi, irootaque ineacameetsatantariri. Iro cantaincha ineacameetsatasanotiri catsini Tasorentsi maaroni ipincatsariventasanojeitiri.

Yora saserotepee itseenajeitiri Joa, aisati Jesoshi.
(Mt. 11.16-19)

²⁹ Ari iquemajeitaqueri oshequi atiri icantaquerirri Jesoshi. Iquemantacariri, icantajeiti:

—Queario, icameetsataque Tasorentsi.

Aisati icarajeitaqueri quemajeitaquerirri yora ivaotisayetiri Joa, aisati apatoyetiniriri oromasati quirequi. ³⁰ Irintiquea yora variseo aisati yora oametantirori sanquenarentsi te irinintajeiteji iranteneri Tasorentsi icoacaavetariri, aisati te irijatashiteriji Joa irivao-tisateri. Te iriveshireimentearo irinti icantiri Jesoshi. ³¹ Icanti Jesoshi aisati:

—¿Paitaquea? ¿Jaoca icantari yocapee? ¿Paitaniquea caari iquemisantantana yoca? Te inquenqueshiretimateaji. ¿Paita noshiacanteri? ³² Irio noshiacanteri jananequi, isavicajeiti nampitsiqui nianqui, icanti aparo: “Apaniro nosoncavetaca, iro cantaincha te pojatacotenaji, te pimaninquetteji. Noashiretacovetari camaintsiniri, iro cantaincha te poashireteaji avirori”. ³³ Pamene, yora Joa ititapinita, te iririmateroji cachojari, jero picantajeiti: “Irio camaari pincacairiri, caari yoasanotanta, aisati caari irantaro cachojari”. ³⁴ Iro cantaincha noponeaca nainti inquitequi, natiritapaaque: noapinita aisati nirapiniti. Aiquero picantajeiti: “Jerinta oashenti, shinquinarinti. Ishanincatacari apatotapinitiniriri oromasati quirequi, icarajeitapinitiri caari cameetsajeitatsi”. ³⁵ Ontimimotaquempricame piotantari, piotaqueme te ontampaticateji picantajeitiri.

Yoavisacotiro Jesoshi tsinane antapinivetarori caari cameetsatatsi.

³⁶ Ari aparoni variseo icantiri Jesoshi:

—Caate novancoqui, avajeitea.

Yacanaqueri:

—Jaa, ari.

Ari ijajeitanaque, yoajeitaca. ³⁷ Otimi anta nampitsiqui tsinane antapinivetarori caari cameetsatatsi. Oquemacotaqueri Jesoshi, yoa anta ivancoquinta variseo, ojatashitiri oneeri. Aacotanaqueneri casancajari. Iro aacotantanacanariri mapi quitamarori imoqueetiri. ³⁸ Ocatiapaaca itapiiqui Jesoshi, quempeji. Iraasanotapaaca, ovitejantacari ojaqui iitiqui, iro oshetantajanariri oishi. Impoiji onintiri iitiqui, aisati osaitantacari iitiqui casancajari. ³⁹ Ineantavacarori yora variseo, iquenqueshiretanaca: “Iriome itiancane Tasorentsi, iriotavaquerome oca tsinane. Oshequi antapinitiro caari cameetsatatsi, eirome ishinetarome antiterime iiti”. Ipajita variseo Shimo. ⁴⁰ Iotaqueri Jesoshi iquenqueshiretiri, icantiri:

—Shimo, timatsi noncamantempi.

Yacanaqueri:

—¿Paita pincamantenari oametanari?

⁴¹ —Noshiacantempiro. Itimi shirampari irevitiriri 5,000 soles, itimi pashini irevitiriri 500 soles. ⁴² Iro cantaincha te irimaterojo yora apitetatsiri iroimpiajeneri iirequite, irootaque icantantariri: “Aitanaji, eiro pipinatanatsi. Nopashitimpiri”. Tempa icavint-sairi apite. Aparo irevivetacari capichaji, irinti itsipa irevitasanovetacari. Pincaman-tena: ¿janica neacameetsatasanoterineri?

⁴³ Yacanaqueri:

—Naamaaca yora irevitasanovetariri, tempa irootaque icavintaasasanotiri catsini.

Icantiri:

—Queario picantaque.

⁴⁴ Impoiji yamenaqueri Jesoshi tsinane, icantiri Shimo:

—Pamene, incaranqui noqueapaaque aca pivancoquica, iro cantaincha te paacameetsatavaquenaji: te pimpavaquenaji nija nonquivantapeemparomeri noiti. Pinequero irooti oca tsinaneca. Oquivantapaaquenaro ojaqui noiti, aisati oshetantaquenaro oishi. ⁴⁵ Te pinintavorotenaji, irooti oca, onintapinitaquero noiti. ⁴⁶ Te pisaitantenaro noitoqui quejitsi, irooti oca, osaitantaquenaro noiti casancajari. ⁴⁷ Pamene, ainiro antayevetari oshequi, iro cantaincha nocavintsaquiero, eiro noquenqueshireacotajirotsi antayetiri: tempa oshequi onintasanotaquena. Ariorica noncavintsayeri antayevetarori capichaji, capichaji irinintavaquena iriori.

⁴⁸ (v 48, 50) Ari icantiro tsinane:

—Ainiro onaveta pantayevetari, iro cantaincha eiro noquishimentimpirotsi, eiro noquenqueshireacotimpirotsi aisati. Pishiretaquena, irootaque pavisacotantajari. Cameetsaya pijataje, piveshireasanotanaquea.

⁴⁹ Ainiro inaveta oacojeitacariri, isampinatavacaaca:

—¿Paitampa ijita yoca, icavintsantarori antirori caari cameetsatatsi? ⁵⁰ (-)

8

Oijajeitiri Jesoshi tsinane amitacotapinijeitiriri.

¹ Pashini quitaiteri iquenaquenayetanaque nampitsipeequi Jesoshi. Iquenquetsata-aajectiri atiri, icamantajeitiri:

—Irotaintsi impincatsariventajeitempi Tasorentsi.

Quiso yoanajiri iroamerepee, yora carajeitatsiri 12, ² aisati oijajeitiri tsinanepee. Peerani yoitsaviantaveitaroni camaari, aisati ojoquiveitani, iro cantaincha yoavisaco-jeitajiro Jesoshi. Opajita aparoni tsinane Maria Maquitarasato. Icaraveitani camaari oitsaviantaveitaroniri 7. ³ Iro oijatiriri pashini, opajita Joana, ijina Cosa. Yora Cosa, irootaque amitacotiriri pincatsari Eroreshi. Aisati iroori oijatiri Sosana, aisati otsipapee tsinanepee. Oca tsinanepee amitacotapinijeitiri Jesoshi, opapinijeitiri coiteimotacariri.

Ishiacantiniri jocaitirori oitsoqui tirico.

(Mt. 13.1-9; Mr. 4.1-9)

⁴ Yapatotimentajeitacari Jesoshi oshequi atiri, ari ishiacantajeitiniri, icantiri:

⁵ —Ari ijataque shirampari yojocaitiro oitsoqui tirico oaantsiqui. Aparopee pari-itapaintsi avotsiqui: yaaticayefiquerero aniyetatsiri, impoiji yoajeitacaro contsaropee, itsoncaquero. ⁶ Pashinipee pariitapaintsi mapiqui. Oparitsavetanaca capichaji, iro cantaincha te oncajavatsatimateji, irootaque oshimpantanacari, ocamajeitanaque.

⁷ Pashini pariitapaintsi quitotseequimashiqui: oshiocavetanaca, iro cantaincha anaana-quero quitotseequi, irootaque ociamantacari. ⁸ Iro pashini pariitapaintsiri cameetsariqui quipatsi: oshiocanaque, otimasanotanaque oitsoqui oshequi.

Irootaque ishiacantajeitiniri, impoiji antearojenca icantajeitiri:

—Otimirica piquemantari, pinquemasanotavaquero.

Yoametiri Jesoshi iroamere oshiacaaventiri oitsoqui.

(Mt. 13.10-23; Mr. 4.10-20)

⁹ Isampijkeitiri iroamerepee:

—¿Paita pishiacantiri incaranqui?

¹⁰ Yacanaqueri:

—Icoacaquempi Apa Tasorentsi piojeitro caari iojeiti itsipapee atiri. Avintiquea niotacaquempi jaoca icanta Apa ipincatsariventajeitaquempi. Irio noshiacantajeitiniri yoranqui: iramenajeivetea, iro cantaincha eiro ineasanotitsi; inquemajeivetea, iro cantaincha eiro iojeitavaquerotsi. ¹¹ Jero oca noshiaacaaventimpiri: oca oitsoqui oshiaacaaventiro irineane Tasorentsi. ¹² Oca avotsi opariantavetapaacari oitsoqui oshiaacaaventiri quemajeivetavacarori irineane Tasorentsi: ipocapaaque camaari, yojocacaajiri iquenqueshirevetacaro irineane. Te irinintacayeriji inquemisante aisati iroavisacotea. ¹³ Orari mapitantsiri opariantavetapaacari oitsoqui, oshiaacaaventiri veshireimentavetarori irineane Tasorentsi, ineacameetsavetacaro. Iquemisantaveta, iro cantaincha te inquearioventeroji: ariorica opomerentsitimotacari iquemisantaveta, ari yojocanajiro. ¹⁴ Aisati oquempetaca quitotseequimashi opariantavetapaacari: oshiaacaaventiri quemajeivetacarori irineane Tasorentsi, iro cantaincha iquenqueshiretasanotiro yantapinitiri, iveshireimentaro yashiyetari, aisati icoaque inquimoshiretashitea. Yatsipetashitaro iquemavetaro irineane Tasorentsi: te inquemisantasanoteroji, te iranteneriji Tasorentsi icoacaavetacariri. ¹⁵ Ocari cameetsataintsiri quipatsi oshiaacaaventiri quemasanotavaquerori irineane Tasorentsi. Iquearioventaquero iquemisantasanotaque, icameetsashiretanaque. Iriotaque matasanotirori maaroni icoacaqueriri Tasorentsi.

Icantiri Jesoshi: “Piotasanojeitavaquero jaoca icanta Tasorentsi ipincatsariventajeitaquempi”.

(Mr. 4.21-25)

¹⁶ Jero aisati yoamejeitiriri Jesoshi iroamere:

—Arriorica antsiotero tsiomentotsi amenajeitanteari, ¿arimpa antatacoterocantiriqui? ¿Arimpa amanaquero jaocarica ara? Tempa ocameetsati avanqueterijenioquiji onconijajeitanteari paitapeerica. Irootaque noamejeitantaquempi: nocoaque piotasanojeite. ¹⁷ Tequera piojeite jaoca icantari Tasorentsi ipincatsariventajeitaquempi, iro cantaincha coajica piotasanojeitajero. ¹⁸ Pinquemasanojeitavaquena piojeitantajeari. Capichaji piotaque meeca, iro cantaincha ariorica pinquemisantasanotena, nontsoteajeittempiro, niotacaasanojeitempi. Arriorica pijiveta pioti, eiro piquemisantanatsi, impoiji icomitacaasanotimpicari Tasorentsi: tecatsi piotimataje.

Ijatashijeitiri ishanincasanori Jesoshi irineeri.

(Mt. 12.46-50; Mr. 3.31-35)

¹⁹ Impoiji ojatashitiri Jesoshi iriniro, otsipajeitari irirentipee. Yareejitapaaca pantsiqui anta isaviquinta, iro cantaincha tecatsi incantajeitea intsipajeitapeempari: yojocajajeitavaqueri oshequi atiripee. ²⁰ Icamanteetiri:

—Ocoapaaquempi piniro, jeri parentipee. Osavicapaaque anta saiteriqui.

²¹ Iro cantaincha yacanaqueri:

—Nonirontacaro maaroni quemisantasanajeitiriri Tasorentsi, maaroni antasanotiniriri icoacaquerori. Aisati nirentjeitacari maaroni quemisantiriri.

Yoimajerentaquero Jesoshi tampea aisati omotoncane incajare.

(Mt. 8.23-27; Mr. 4.35-41)

²² Pashini quitaiteri itetajaro Jesoshi pitotsi, icarajeitaqueri iroamerepee. Icantiri:

—Tsame amonteajeitanaje intatiquero incajare.

²³ Ari ijatacojeivetanaca, aacotanaqueri tampea. Ari ijatacotaque nianquiaqui, imaanaque Jesoshi. Impoiji omapocajeitaqueri antearo tampea, otejatapaacaro nija pitotsiqui, irotaintsi intsitacajojeite. ²⁴ Icaocaqueri iroamerepee:

—Pintinaye, oametanari, irotaintsive antsitiacojeite.

Ari itinaanaca, impoiji ipeajiro tampea, ipeajiro omotoncane: opeasanotanaja.

²⁵ Icantiri:

—¿Paita caari pishirejeitantanana?

Itsaroacaajeitanacari, aisati yoajeitanaqueri cavaco. Icantavacaajeitanaca:

—¿Janicampa yoca? Imataquero tampea, aisati omotoncane: ipeajiro. Te aneapiniteroji oca.

Yoavisacotiri Jesoshi neiriri camaari.
(Mt. 8.28-34; Mr. 5.1-20)

²⁶ Ari iponeanajari Jesoshi Carireaqui, meeca yareetapaaca intatiquero: anta Jerasequi. ²⁷ Yaatacotapaaque, yamatsecajeitanaque quipatsiqui. Ineapaaqueri neiriri camaari: peerani, te inquitsaateaji. Te irisaviqueji pancotsiqui, irointi iquenaquenatsemepequiyeti anta tijaariqui. ²⁸ Ineantavacariri Jesoshi, itiyeroashitavacari, icajemanaque: —¿Jaoca pincantenari? Niotavaquempi: avirotaque itomi Tasorentsisanori savicatsiri inquitequi. Eiro piquematsitacaanatsi.

²⁹ Iro icajemantacari, itsaroacaavacari Jesoshi, iotaque camaari intianqueri. Yora shirampari ineapinitiri camaari, iquenacaapinitiri. Yoisotapiniyeevetari iracoqui aisati iitiqui carenatsa, iro cantaincha ishuntsitacairi camaari, ipesantarori carenatsa yoisotanteetevacariri. Ariorica ipesanaquero, ishiacaanacari camaari caaraiteriqui. ³⁰ Icantiri Jesoshi:

—¿Jaoca pipajitari?

Yacanaqueri:

—Nopajita Oshequianti.

Iro ipajitantacari Oshequianti ineakeri oshequi camaari. ³¹⁻³² Ari itimi anta tioncaiquiji oshequi chancho yoajeita. Yora camaari icantiri Jesoshi:

—Eiro pitiancajeitanatsi Sharincaveniqui, ainti pintiancajeitenamanta chanchoqui, nonijaapeemparita iriori.

Ari icantiri:

—Pijajeite.

³³ Ari yojocajeitanajiri shirampari, inijaajeitapaacari chanclopee, irosati ishiajeitananaca, ipariajeitanaque imperitaqui, ipiincajeitanaque incajarequi, pocn, pocn, pocn, itsitiaeitanaque.

³⁴ Ari ineantavacariri, ishiajeitanaca shentajeivtariri chancho, icamantajeitaqueri ishaninca anta nampitsiqui aisati oantsiqui. ³⁵ Ari ipocajeitaque irameneri yora neaveitariniri camaari, jaocarica icantajari. Ineapaaqueri, tecatsitaji inaji; tecatsi oajerine, isavicaji Jesoshiqui. Iquitsaataja, otimanaji iquenqueshirentari. Itsaroacaajeitapaacari. ³⁶ Yora neasanotaqueriri icamantajeitavaqueri maaroni ishaninca yantiri Jesoshi, itsoteaqueneri. ³⁷ Ari itsaroajeitanaque catsini maaroni timajeitatsiri ara. Itiancajeitajiri Jesoshi:

—Pijataje, eiro pipocajitsi aisati.

³⁸ Irintiquea yora neaveitariniri camaari icantavetari:

—Nocoaque noijatanaquempi.

Iro cantaincha icantiri:

³⁹ —Eiro pojatanatsi, ainti pijataje pivacoqui. Pincamantajeitapeeri pishaninca oshequi icavintsaquempi Tasorentsi.

Ari ijatanaque, iquenaquenayetanaque nampitsiqui, icamantajeitiri ishaninca:

—Pine aquena: oshequi icavintsaajana Jesoshi.

Yoavisaciro Jesoshi irajatatsiri aisati yoitinaajiro irishinto Jairo.

(Mt. 9.18-26; Mr. 5.21-43)

⁴⁰ Impoiji ipianaja Jesoshi, imonteanajaro incajare. Yoyeajeitaqueri oshequi atiri, yaacameetsajeitavaqueri. ⁴¹⁻⁴² Itonquitavacari shirampari pajitachari Jairo: iriotaque jivatacaantatsiri anta pancotsiqui yapatojeitantzari. Itiyeroashitapaacari iitiqui Jesoshi, icantapaaqueri:

—Tsame novancoqui, irotaintsi oncame nishintio.

Apaniro oni irishinto, ocarataque osarintsite 12. Ari yojatanaqueri, itsitacajeitanacari oijajeitanaqueriri. ⁴³ Oijatanaqueri aisati tsinane irajashetatsiri: ocarataque 12 osarintsi intantanacari irajashetanaque. Tecatsi materoneri iroavisacotajero.

⁴⁴ Oquenapaaque itapiiqui antitaqueri iitsaare ocaratapaaque, irosati opeantananjaro iraja. ⁴⁵ Ari icanti Jesoshi:

—Janica antitaquenarori noitsaare?

Icantajeitanaque:

- Te nantitempiro piitsaare.
 Impoiji icanti Petero:
 —Oametanari, icarajeiti atiri oshequi ishoncajeitaquempi, itsitacajeitaquempi. Ai-
 quero picantanaitii: “Janica antitaquenarori noitsaare?”
- ⁴⁶ Iro cantaincha yacanaqueri iriori:
 —Ainiro antitaquenarori. Ocamantaquena notasorenca: timatsi notasoncacoventa-
 jiri.
- ⁴⁷ Iotaque tsinane tecatsi oncantea omanapitsateri antitaqueri iitsaare. Opi-
 oncanaque, ojatashitiri, otiyeroashitacari, ocantiri:
 —Narotaque antitaquempirori piitsaare, irootaque navisacotantajari nirajaveitani.
 Iquemajeitavaquero maaroni atiripee. ⁴⁸ Aisati icantaquero Jesoshi:
 —Noshaninca, pishiretaquena, irootaque paviscotantajari. Cameetsa pijataje pivan-
 coqui, pinquimoshiretanaje.
- ⁴⁹ Ari pashini pocapaintsi ishaninca Jairo camantapairiri:
 —Camanaque pishinto. Eiro picantiritsi meeca oametantatsiri irijate avancoqui.
- ⁵⁰ Iquemavaqueri Jesoshi, icantiri:
 —Eiro picantashiretitsi. Ariorica pishiretena, ari avisacotanaje pishinto.
- ⁵¹ Ari yareejitapaaca pancotsiqui. Icanti Jesoshi:
 —Eiro avinti piqueajeitapaiti: irintiquea queapaintsine Petero, Joa, Santiaco, iri,
 aisati iniro, aitapaaaji.
- ⁵² Ainiro iraacojeitacaro oshanincani, yoashiretacojeitacaro. Icantajeitaqueri Jesoshi:
 —Eiro piraacojeitarotsi: te oncamasanoteji, irointi omai.
- ⁵³ Ishirontimentajeitacari, iojeitaque ocamasanotaque. ⁵⁴ Ari yajiricavacotaquero,
 antearojenca icanti:
 —Evancaro, pintinaanaje.
- ⁵⁵ Irosati otinaantanaja. Icanti:
 —Pimpero oyeari.
- ⁵⁶ Ari yoajeitanaque cavaco maaroni oshaninca, iro cantaincha icanti Jesoshi:
 —Eiro meeca picamantitsi.

9

Itianquiri Jesoshi iroamere inquenquetsatacayeteri atiri.

(Mt. 9.35-38; 10.5-15; Mr. 6.7-13)

- ¹ Impoiji yapatojeitiri Jesoshi iroamere, imatacaaajeitaqueri itasoncacaqueri itsipapee, icantajeitiri:
 —Nocoaque pojocacoventajeiteri atiripee camaari, pimateri maaroni camaaripee, aisati poavisacojeiteri maaroni mantsiayetatsiri. ² Meeca pijajeite. Pinque-
 naquenayetanaque, pincamantajeiteri atiri: “Irotaintsi impincatsariventajeitempi Tasorentsi”. Aisati poavisacyeteri mantsiayetatsiri. ³ Noncantempi, tecatsiya paanaque: eiro paanaquerotsi pioquiro, pitsarate, poyeari, piirequite, poicoro, tecatsi catsini. ⁴ Jaocarica pareetapaaqueari, ari pisavicapaaque. ⁵ Eirorica iquemisantajeitavaquempitsi savicajeitatsiri, povaanajea. Ariorica povaanajea pincantajeitanaque: “Meeca te pinquemisantenaji, ari iroasanquetempi Tasorentsi”.

⁶ Ari ijajeitanaque, iquenayetanaque nampitsipeequi. Icamantajeitaqueri atiri jaoca incantajeiteari iravisacotantajeari. Aisati yoavisacyetajiri mantsiayetatsiri.

Yora Eroreshi icoaque irineeri Jesoshi.

(Mt. 14.1-12; Mr. 6.14-29)

- ⁷ Ari yora pincatsari Eroreshi iquemacotaqueri yantayetaqueri Jesoshi, itasoncanta-
 tayetaque. Te irioteji pitarica inquenqueshireteri. Icantayeti: “Irio Jesoshitajantsiri Joani: itinaanaja”. ⁸ Icantayeti itsipapee: “Yonijaantaja aisati Iriashi”. Pashini cantayetatsi: “Itinaanaja camantantatsiniri”. ⁹ Iro cantaincha icanti Eroreshi:
 —Nopesacantaqueri Joani: camaque inaque. Iro cantaincha, Janica yoca aquemaco-
 jeitaqueri itasoncacoventajeitaqueri atiripee? Nocoaque noneeri.

Itasonquiro Jesoshi tanta, yoshequiaquer.
(Mt. 14.13-23; Mr. 6.30-46; Joa 6.1-15)

¹⁰ Ari ipiajeitanaja itiancajeitaqueri Jesoshi, icamantajeitapaaqueri imayetaqueri. Impoiji itsataajeitanajiri yaajeitanajiri iroamere anta Vetsairaqui. ¹¹ Iro cantaincha iojeitaqueri atiri ijatanaque, yoijajeitanajiri oshequi. Ari yovetsajeitavacari Jesoshi, yoamejeitavaqueri jaoca icanta Tasorentsi ipincatsariventajeitaqueri. Aisati yoavisacojeitaqueri mantsiaripee. ¹² Ari ishaavijiiteanaque, ipocashitiri iroamerepee, icantajeitiri:
—Pamenerote, caaraiteaque aca. Pintiancajeiteri meeca nampitsipeequi: otiminta irimaajeitanteari aisati iroajeitanteari.

¹³ Iro cantaincha icantavaqueri:
—Pimpajeiteri avinti iroajeiteari.

Icanti:

—Tecatsi nompajeiteriri. Pamene, ocarataque tantajaniqui apapacoroni. Jeri apite shima. ¿Picoaquempa nojajeite namananteneri iroajeiteari maaroni yocapee? Oshequi ini catsini.

¹⁴ Aamaaca icarajeiti shirampari 5,000 yapatojeitaca. Icantiri Jesoshi:
—Poisavicajeiteri maaroni: pimoncarajeiteri incarayetaque yora 50 irampatojeitaquea, aisati iriori yonta 50. Aisati inquempejeitaqueari maaroni.

¹⁵ Ari imajeitaqueri, yapatojeitaqueri. Yoisavicajeitaqueri. ¹⁶ Impoiji yajiricaquero Jesoshi tanta, jeri aisati shima. Yamenanaque inquitequi, icantiri iriri: “Ariove, Apa, pipaquerenaro noyeari”. Impoiji ipaqueri iroamere, icantajeitaqueri:

—Jeri, povaaejiteneri yora apatojeitaincharira.

¹⁷ Ari yoajeitaca maaroni, iquemajeitaca. Impoiji yaajeitajiro timaarantapaajantsiri, yapatotajiro. Ocarataque cantiriqui fjaajiri 12.

Icantiri Petero Jesoshi: “Avirotaque Quirishito naamaajeitacari”.
(Mt. 16.13-23; Mr. 8.27-33)

¹⁸ Pashini quitaiteri ijatanaque apaniro Jesoshi iquenquetsatacairy iriri. Iotanajiri yaanajiri iroameresanori. Impoiji isampitiri:

—¿Janica ijitaquenari ashinanca? ¿Paita icantajeitiri?

¹⁹ Yacanaqueri:

—Icantayeti aparopee: “Irioitatsi Joani vaotisatantaveitachaniri, itinaanaja”. Irio pashini icanti: “Irioitatsi Iriashi, yonijaantaja aisati”. Irio pashini icanti: “Irioitatsi camantantatsiniri, itinaanaja”.

²⁰ Isampitiri:

—Avintiquea, ¿paita picantajeitiri?

Yacanaqueri Petero:

—Avirotaque Quirishito naamaajeitacari. Itiancaquempi Tasorentsi.

²¹ Iro cantaincha icantasanojeitiri:

—Eiroyea picamantitsi. ²² Queario, noponeaca inquitequi, natiritapaaque, iro cantaincha oshequi nonquematsicateari. Intseenajeitena savicacantajeitatsiri, jivatacaajeitiriri saserotepee, oametantirori sanquenarentsi, maaroni. Incantajeite: “Caari ini Quirishito”. Iroyeetena, oncarataque quitaiteri mava, nontinaanaje.

Icantiri Jesoshi: “Pojatasanojeitanaquena: eiro piperaventarotsi”.
(Mt. 16.22-28; Mr. 8.32-38)

²³ Impoiji icantajeitiri Jesoshi:

—¿Picoajeitaquempa pojatasanojeitanaquena? Ari eiro picavintsaajatsi avisati, eiro pantanontatsi avisati. Maaroni quitaiteri pimpomerentsiventenaro nocooacaquemperi: ariorica iroimenteetempiro, ariorica inquishimenteetempiro. Iro cantaincha quiso poyena, pojatasanojeitanaquena. ²⁴ Ariorica pantanontea pincavintsayea avisati meeca, eiro piotasnotiritsi meeca Tasorentsi, aisati eiro pisaviquimotiritsi coajica. Ariorica pinintena narori, aisati pimpomerentsiventayetenaro meeca nocooacaajeitimpipi, eiro patsipetarotsi, irointi piveshireimenteari meeca Tasorentsi, aisati pisaviquimoteri coajica. ²⁵ Ariorica pimpotasanojeitero vaararontsi catsini, iro cantaincha pintseenqueri Tasorentsi; impoiji pijate Sharincaveniqui. Tempa pantsipetashijeitearo maaroni

pashijeiveteari. ²⁶ Eiro pipashiventacaanatsi; aisati noneane, eiro pipashiventacaarotsi. Tempa naro poneachari inquitequi, natiritapaaque. Coajica nojatanaje jenoqui. Impoiji nompiapaaje aisati aca quipatsiqui, nompincatsaritasanotapaaque, nontasorentsitasanotapaaque: nonquempeteari Apa aisati maaroni inampirepee. Iro cantaincha pinquenqueshirejeitea: ariorica pimpashiventacayena meeca, nompashiventacaquempi coajica avirori. ²⁷ Iro cantaincha queario oca noncamantempiri, eiro namatavitimpitsi: eirotsitarica picamajeiti, pineajeitavaquero jaoca icanta Tasorentsi ipincatsariventanti.

Ineaqueri iroamere ipashinitanaque Jesoshi.

(Mt. 17.1-8; Mr. 9.2-8)

²⁸ Ari ocarataque quitaiteri 8, ijataque Jesoshi toncaariqui, inquenquetsatacayeri iriri. Yaanajiri aisati Petero, Santiaco, jeri Joa. ²⁹ Ari iquenquetsatacaaapaaqueri iriri, imapocanaca ipashinivorotanaque, aisati oshipaquireasanotaque iitsaare, atsioquintaqueri yora amenajeitaqueriri. ³⁰ Imapocapaaqueri aisati apite shirampari, inquenquetsatacaaapaaqueri Jesoshi. Irio pocantsiri Moishishini aisati Iriashini; ³¹ te inquempeteeji aquempejeita arori, icameetsatasanotaque: iquempejeitacari inquitesati. Ari inquenquetsatavacaajeitaca mava: inquenquetsatacetro incame coajica Jesoshi anta Jerosarequi. ³² Oshequi ipochoquivetanaca Petero aisati itsipajeitari, iro cantaincha te irimayeji. Yamenashejeitaqueri Jesoshi, ishipaquireaque, iquempetacaro quitaiteri. Aisati yamenashejeitaqueri yora itsipajeitari Jesoshi. ³³ Irotaintsi impianaje yora apitetaintsiri, icantiri Petero Jesoshi:

—Oametanari, aitaquempa nopoque narori aca, noneajeitaquempi. Nocoaque novetsiquempiro mava pancotsijaniqui: aparo pashi, aparo irashi Moishishi, aparo irashi Iriashi.

Ari ineaveetashitaca Petero, te inquenqueshireteaji. ³⁴ Ari omapocanaca men-cori, omaaroncajeitapaacari, irosati itsaroajeitantanaca. ³⁵ Impoiji iquemajeitaqueri Tasorentsi, inaque mencoriqui:

—Iriotaque yoca notomi nonintasanotiri: pinquemisantajeitavaqueri.

³⁶ Impoiji yamenajeivetanaca: tecatsi irinee, apaniro irinti Jesoshi. Ari imanajeitaqueru: peerani, tecatsi incamantajeite. Impoiji, icamantaquee.

Yoavisacotiri Jesoshi jananequi yampitsiitacaari camaari.

(Mt. 17.14-21; Mr. 9.14-29)

³⁷ Oquitaitetamanaji, yoirincajeitamanaja, itonquiojeitavacari oshequi atiri. ³⁸ Icantavaqueri aparoni:

—Oametanari, pincavintsayeri notomi, te intimeji pashini. ³⁹ Yatajeaoncaqueri camaari, icajemacaapinitiri. Yampitsiitacaapinitari, ishimoretacaapinitari. Yoashinon-caapinitaqueri: te irinjantareempariji. ⁴⁰ Nocantavetacari poamerepee iroavisacoteri, iro cantaincha te irimateriji.

⁴¹ Yacanaqueri Jesoshi:

—Eiro imatiritsi: tempa irinti pitseencaririnte, irootaque caari imatantari camaari; te pinquenqueshirejeitempa. ¿Arimpa noshinetempi pintseencantapinite? Jentsite pamaquenari.

⁴² Jeri inianquitacaavetapaacari itomi, imapocanaca camaari ipishoncaqueri quipatsiqui, yampitsiitacaanajari aisati. Ari itiancrajiri Jesoshi camaari, yoavisacotajiri jananequi. Icantiri iriri:

—Jerica pitomi: avisacotaji inaji.

⁴³ Yoajeitanaqueri cavaco maaroni atiripee icantavacaajeitanaca:

—Tempa itasorentsitasanoti catsini Tasorentsi.

Icamantavetari Jesoshi iroamere irayeeteri.

(Mt. 17.21-23; Mr. 9.29-32)

Ainiroquaera icantavacaajeitaca, icantiri Jesoshi iroamere:

⁴⁴ —Pinquenqueshiretasanotero oca noncamantempiri. Eiro pipeacotarotsi. Nonponeaca inquitequi, natiritapaaque, iro cantaincha irayeetenra.

⁴⁵ Iro cantaincha te inquemajeitavaqueroji icantavetacariri. Te irishineteriji Tasorentsi inquemajeitavaquero. Itsaroacaajeitacari irisampiterime: “¿Paita picantqueri?”

Icantiri Jesoshi iroamere jaoca incanteari impincatsaritantzajeari.

(Mt. 18:1-5; Mr. 9:33-37)

⁴⁶ Impoiji icantavacaajeitanaca iroamerepee Jesoshi, yaamaajeitaca:
—Aca acarajeitica: coajica, ¿janica anaacotantajantsine impincatsaritaje? ¿Narompa pimpincatsajeite?

⁴⁷ Iotashitacari Jesoshi iquenqueshirejeitiri. Icajemiri jananequi:
—Caatanaque aca nonampinaqui.
⁴⁸ Impoiji icantajeitiri iroamerepee:
—Pameneri jananequica, quemisantanari. Ariorica pincavintsayeri yoca, pincavintsayena narori. Ariorica pincavintsayena, aisati pincavintsayeri tiancaquenari. Ariorica pincavintsayeri itsipapee, ari pimpincatsaritanaque.

Yoavisacotanti pashini quemisantiriri Jesoshi.

(Mr. 9:38-40)

⁴⁹ Impoiji icantiri Joa:
—Oametanari, chapinqui noneaqueri shirampari oavisacoyeririri neiriri camaari. Icamantavetana iquemisantimpi, irootaque imatantariri yoavisacotiri. Iro cantaincha te quiso iroajeitee, irootaque notsaneacotantacariri iroavisacoteri neiriri camaari.

⁵⁰ Yacanaqueri Jesoshi:
—Eiro pitsaneapitsataritsi. Te inquisajeiteeji, irootaque ayotantacari iquempejeitaquee.

Yora samariasati te iraacameetsateriji Jesoshi.

⁵¹ Te osamaniteji meeca: irotaintsi irijataje Jesoshi inquitequi. Ari iquenqueshiretaca irijate Jerosarequi. ⁵² Itiancaqueri iroamere:

—Pijivatanaque anta Samariaqui, pamenapeero asavicantajeitapeempari.
⁵³ Ari ijavetanaca, iro cantaincha iojeitaque samariasati irijate Jesoshi Jerosarequi, irootaque itsaneapitsatantavacariri irisavicantapeempameri inampiqui. Ari ipianaja, icamantapaajiri Jesoshi:

—Eiro ishineteetsi amaye inampiqui.
⁵⁴ Ari iquemantacariri Santiago aisati Joa, icantiri:
—¿Novincatsarite, picoaquempa noncanteri Tasorentsi intaajeiteri maaroni samari-asati? Nonquempeteari Iriashini peerani: itaacantaqueri soraro quisajeitaqueriri.
⁵⁵ Yamenashetaqueri Jesoshi, icantiri:

—Te oncameetsateji anquisher. Te piojeiteji jaoca picantacari: te pincameetsashireteji. ⁵⁶ Noponeaca narori inquitequi, natiritapaaque. Te iro nompocantea noayeteri atiri, irointi nopocantaca noavisacojeiteri.

Impoiji yovaajeitanaja pashini nampsiqui.

Icantayetiri Jesoshi itsipapee atiri.

(Mt. 8:18-22)

⁵⁷ Ari iquenajeitanaque avotsiqui, itonquitavacari shirampari, icantavaqueri Jesoshi:
—Novincatsarite, nocoaque noiijatasanotanaquempi, jaocarica pijateri.
⁵⁸ Icantiri:
—Natiritapaaque noavisacotanteariri atiri. Pinquemisantavaquero oca noncamantempiri: yora otsitiniro timatsi imoro imaanpitantari, yora tsimeripee timatsi itsiyetari; iro cantaincha nainti, tecatsi nomaateari.

⁵⁹ Impoiji icantiri pashini:
—Pojatanaquena avinti.
Yacanaqueri iriori:
—Novincatsarite, nocoveta, iro cantaincha incamavaquetsita apa. Ariorica nontijeri, impoiji noiijatanaquempi.
⁶⁰ Ipiatacari Jesoshi:

—Ainiro itseencaririnte, irioataque tijerine ariorica incamaque. Aviroquea avinti, pincamantajeiteri atiri jaoca icanta Tasorentsi ipincatsariventajeitiri.

⁶¹ Icantiri pashini shirampari:

—Aitaque, novincatsarite, noijatasanotanaquempi: iro cantaincha nojivajeita-painterita novetsajeitapainteari noshanincapee.

⁶² Iro cantaincha icantiri Jesoshi:

—Arriorica pitsapatiro piquiyo quipatsi pimpanquitantearori pivanquire, te pamena-menayetero paitapeerica, caari otipitantayeta piquiaqueri. Aisati oquempetaca: pincoa-querica impincatsariventempi Tasorentsi, pojatasanotena, eiro piquenqueshiretirotsi pantajero aisati pantapiniveitaniri.

10

Itianquiri Jesoshi oshequi quenquetsatacaajeitantzatsiri.

¹ Impoiji itiancajeitaqueri oshequi iroamere irijivajeitanaqueri, icarajeiti 70. Icantava-queri:

—Pijajeite, apitepee pincantayetanaquea. Pijivajeite nampitsipeequi nocamanta-jeitaquempi, nimpitanaje narori. ² Oquempetaca ocarataque oshequi oitsoqui pan-quires, aparaitanaca: te iroshequiteji aviiteroneri. Pincanteri Avincatsarite intianca-jeitantzeariri oshequi amitacotempineri pinquenquetsatacaajeiteri atiri, irijajeitantzeari iriori inquitequi. ³ Pamene, oshequi ompomerentsitimojeitempi, oshequi irantanatempi tseencantsiri: pinquempeteari ovisha, itsoncaqueri maniti. Meecaquea, pijajeite pinquenquetsajeite. ⁴ Eiro paanaquerotsi pitsarate, piirequite, pisapatote. Arriorica pintonquiotavaqueari atiri nianqui, eiro piquenquetsataavaqueritsi, irointi pavisan-queri: apatiro povaanaquero onta nocantaquempi. ⁵ Jaocarica pisavicapaaqueri, pincanteri Tasorentsi iramitacoteri ashitarori ivanco inquemisantanteari. ⁶ Arriorica inquemisantaque, iravisacotaje. Irompa eirorica iquemisanti, iro cantaincha eiro patsipetarotsi pinquenquetsatacayeri Tasorentsi: tempa pimataqueneri oca nocantaquempi. ⁷ Jaocarica anta pisavicateeri, aitaque pisavicavaquetsita. Eiro piquenaque-nayetitsi pancotsipeequi. Poyearo paitarica impavaquempi, aisati pirero, maaroni. Ocemeetsati impavaquempi paitapeerica coiteimotaquempi: tempa ocemeetsati imp-inateri shirampari antaveetiniriri. ⁸ Jaocarica pijateri, arriorica iraacameetsatavaquempi, poapaaquearo paitarica impavaquempi. ⁹ Intimerica mantsiariee, poavisacojeit-eri. Pincamantajeiteri maaroni: “Irotantsi impincatsariventajeitempi Tasorentsi”. ¹⁰ Iro cantaincha terica iraacameetsatempa itsipapee ashaninca, pincamantajeiteri: ¹¹ “Pinquemajeitavaquena: icoaveta Tasorentsi impincatsariventempime, iro cantaincha te pincoyeji. Te paacameetsajeitavaquenaji, aisati oquempetaca, te paacameetsatava-queriji Tasorentsi. Meeca pashinoncaitatiyempani”. ¹² Irootaque nocoaqueri pinca-manteriri. Pineaquero, peerani itseencajeitaqueri Tasorentsi soromasatini, irootaque ipoyereajeitantzacariri. Iro cantaincha eirorica inquemisantajeitavaquempi ashaninca meeca, iranaacoteri soromasatini, irashinoncaasanojeitanaquea catsini.

Iquenquetsacotaqueri Jesoshi tseencajeitaqueriri.

(Mt. 11.20-24)

¹³ Aisati icanti Jesoshi:

—Irashinoncaasanojeitanaquea corasesati aisati vetsairasati: oshequi ineacojeive-taquena notasoncantapiniti, iro cantaincha te inquemisantajeitavaquenaji catsini. Irineajeitaquenaricame tirosatini aisati shirosatini, inquenqueshirejeitanajeame, iro-jocajeitajerome caari cameetsatatsi yantajeitiniri. ¹⁴ Queariotaque iroasanquejeiteri Tasorentsi coajica tirosatini aisati shirosatini, iroashinoncaajeiteri, iro cantaincha iroashinoncaasanojeiteri catsini corasesati aisati vetsairasati. ¹⁵ Aisati icoajeiveta caperenaosati irijajeiteme anta inquitequi, iro cantaincha ainti irijajeite Sharincaveniqui.

¹⁶ Noamere, pinquemajeitena. Arriorica inquemisantajeitavaquempi atiripee, aisati narori inquemisantajeitena. Arriorica intseencajeitavaquempi, intseencajeitavaquena narori. Aisati oquempetaca, arriorica intseencajeitena, intseencajeiteri aisati yora tiancaquenari. Meecaquea, pijatasanojeite.

Ijajeitaque iroamere Jesoshi, iquenquetsatacaa jeitiri itsipapee, impoiji ipiajeitapaaja.

¹⁷ Ari ipiajeitapaaja itiancane Jesoshi, iquimoshirejeitapaaque. Icamantajeitapaaqueri:

—Novincatsarite, iotantacari camaari noquemisantaquempi, iquemisantaquena narori. Nomataqueriquea notiancajeitaqueri.

¹⁸ Yacanaqueri:

—Queario yora Satanashi ipincatsariventavetacari iamaaririnte, iro cantaincha noneajeitaquempi pimajeitaqueri pitiancaqueri camaari avirori: meeca niotaque eiro ipincatsaritasanotiritsi meeca Satanashi, tempa yanaacotaqueri Tasorentsi irinti. ¹⁹ Meeca oshequi notasoncaventaquempi: oquempvetaca ariorica paatiqueru maranke, eiro yoamaimpitsi; aisati yora quitoniro, tecatsi incantempi. Aisati inquisavetempi yora camaari, iro cantaincha tecatsi incantempi, tempa notasoncacoventimpi. ²⁰ Queario pitiancaqueri camaari, iro cantaincha eiro piveshireimentarotsi. Irointiquea pinquimoshireventasanojeitanaque pijajeite inquitequi.

Te iriojeiteroji irineane Tasorentsi, te irineajeiteriji Jesoshi itasoncanti.

(Mt. 11.25-27; 13.16-17)

²¹ Impoiji oquimoshiretacaasanotaqueri Ishire Tasorentsi, icantiri iriri:

—Oshequi, apa, picameetsati. Pipincatsariventajeitiri maaroni inquitesati aisati maaroni quipatsisati. Itimaveta atiri iovetachari, ioyevetaro paitapeerica, iro cantaincha pimanapitsataqueri pineane: te iriojeiteroji jaoca incanteari iravisacotantajeari. Irintiquea poametasanojeitaqueri caari iotasanolvetacha: itseencajeivetacari ishaninca, iro cantaincha picoacaquaqueri iriote iriori.

²² Impoiniji icantajeitaqueri apatotimentajeitacariri:

—Iriotaque Apa matacaaquenarori maaroni catsini. Apaniro iotasanolana Apa, tecatsi pashini iotasanoltenane. Aisati noquempeta narori, apaniro niotasanoliri, te intimeji pashini iotasanolterineri: irintiquea yora noamejeitiri, iojeitiri iriori.

²³ Ari ipitsocashitanacari iriori iroamere, apaniro yoamejeitaqueri:

—Pineajeitaquena avinti nomataquero caari ineapinijeiti itsipapee atiri. Ocemeetsati pinquimoshireventena, aisati inquimoshireventena pashini neenaneri. ²⁴ Icoajeiveitani peerani yora quenquetsatacantaveitachaniri irineename nontasoncantayete, iro cantaincha te irineenaji notasoncantayeti. Aisati icoajeiveitani irineename yora pincatsariyeveitachaniri. Aisati icoajeiveitani inquemajeitename, iro cantaincha, te. Avirojei avinti, pineajeitaquena, piquemajeitaquena.

Icoasanotaque Tasorentsi aninteri, aisati aninteri ashanincapée.

(Mt. 22.34-40; Mr. 12.28-34)

²⁵ Pashini quitaiteri ijatashitaqueri iotasanolirori isanquenaren Moishishi. Icoave-taca incomitacayearime Jesoshi; icantapaaqueri:

—Oametanari, ¿paita nanteri nosavicanteari inquitequi, noncantaitatiyempani?

²⁶ Yacanaqueri:

—¿Paita ocantiri isanquenare Moishishi?

²⁷ Icantiri:

—Ocanti isanquenare: “Ocemeetsati anintasanoteri Tasorentsi: tempa iriotaque Avincatsarite. Cameetsa anintasanajeiteri catsini. Aisati oquempetaca arosati nintajancha, anintasanajeiteri itsipapee ashanincapée, impoiji antime inquitequi”.

²⁸ Icantiri:

—Queario picantaque: ariorica pimatero avinti, ari pincantaitatiyempani pintime inquitequi.

²⁹ Iotaque iriori te irintasanoteriji maaroni ishaninca, iro cantaincha icoaveta irimanerome. Irootaque isampitantariri:

—¿Jaoca itimirri noshaninca noninteri?

Iquenquetsatacotiri samariasati, neshinoncatiriri jorio.

³⁰ Yacanaqueri Jesoshi:

—Noshiacantempiro. Iquenanaque jorio avotsiqui. Iponeaca Jerosarequi, irijateme nampitsiqui pajitachari Jerico. Nianqui avotsiqui imapocaqueri coshitantatsiri, yaavajiri, tapi. Isapocajiri, yaitaqueri iitsaare, oshequi ipasanataqueri, tac, tac, tac. Impoiji yojoquitsempequitaqueri avotsiqui, irotantsi incame. ³¹ Ari impoiji iquenanaque avotsiqui saserote; jorio ini aisati. Ineavetapaacari ishaninca yoashinonqueetaqueri, iro cantaincha yanampitanquaqueri, te irineshiloncateriji. ³² Aisati iquempetaca aparoni Irevita, iquenapaaque avotsiqui. Ineavetapaacari ishaninca, iro cantaincha aisati yanampitanquaqueri, te irineshiloncatimateriji. ³³ Impoiji, ari iquenapaaque iriori aparoni samari-asati. Inashita irinti, te irishanincateariji jorio. Iro cantaincha ineantapaacariri yora ashinoncaincari, ineshinoncatapaaqueri. ³⁴ Ijatashitaqueri, yaavintapaaqueri, aisati ipashicaqueri ora itoyeetaqueri. Ainiro yamaqueri aisati samariasati imorane. Ari yaajiri ashinoncaincari, yoanquetaqueri imoranequi, yaanajiri anta otiminta pancotsi. Anta cameetsa ineshinoncatapaaajiri aisati, yaavintapaaajiri. ³⁵ Ari oquitaitetamanaque icoaque samariasati irovaanajea. Icantiri ashitarori ivanco: “Jerica quirequi. Nocoaque pincavintsayeri yoca shirampari. Terica irimoncarateaji quirequi, ari nompjempcoajica pashini”. ³⁶ Ari itimi mava neaqueriri ashinoncaincari avotsiqui. Jaoca itimirishiyaninca nintasanotiriri?

³⁷ Yacanaqueri:

—Tempa yora neshinoncatiriri.

Icantiri Jesoshi:

—Aisati pinquempeteri, pineshinoncajeiteri pishaninca, maaroni.

Iquenquetsatacero Marita aisati Maria.

³⁸ Impoiji iquenanaque avotsiqui Jesoshi, icarajeitiri iroamerepee. Yareejeitapaaca nampitsiqui. Oneavajiri tsinane pajitachari Marita, ocantavaqueri:

—Tsame, pijajeite novancoqui.

³⁹ Otimi anta ovancoqui ireento, opajita Maria. Osaviquimotaqueri Avincatsarite itiqui, oquemisantavaqueri icamantaqueror. ⁴⁰ Iroori Marita, oshintsishintsiyetaque, ovetsicayetiniri paitaricapee. Impoiji ojatashitaqueri, ocantaqueri:

—Novincatsarite, pamene apaniro novetsicayetimpido poyeari. Orari eentio, te amitacotenaji. Pincantero amitacotenata.

⁴¹ Yacanaquero:

—Oshequi piquenqueshiretaquero povetsicaquero ayeari, poameetsayetaquero paitapeerica. Oshequi piquenqueshireyetaquero. Ocameetsayeveta, iro cantaincha timatsi aparoni cameetsasanotatsiri: ⁴² irootaque ocoaqueri pireento, tecatsi cantimenterone.

11

Yora Jesoshi yoamejeitiri iroamere iquenquetsatacaya jeitiri Tasorentsi.

(Mt. 6.9-15; 7.7-11)

¹ Pashini quitaiteri iquenquetsatacairy Jesoshi iriri. Ari ivecaratantacarori, icantiri iroamere:

—Novincatsarite, yora Joani yoamejeitaqueri iroamereni iquenquetsatacaya jeitaqueri Tasorentsi. Nocoaque meeca pinquempetajeari avirori: poamejeitena nonquenquetsatacayeri narori.

² Icantakeri:

—Arriorica pinquenquetsatacayeri, jero oca, pinquempeterori:

Apa jenoquisati, oshequi picameetsati catsini,
nocoajeitaque pimpincatsariventajeari, maaroni.

Ocameetsati nomajeitimpido maaroni picoacaajeitaquenari,
nonquempeteari iriori inquitesati yantajeitimpido iriori maaroni picoacaajeitiriri.

³ Pimpapinitenaro maaroni quitaiteri noyeari coiteimotanari.

⁴ Eiro piquishimentanarotsi caari cameetsatatsi nantiri, irointi picavintsayena:
tempa nocavintsaajeitiri noshanincapee.

Eiro pishinetiritsi camaari irantacayena caari cameetsatatsi.

Icanti Jesoshi: “Arriorica pincoacotasano teri Tasorentsi coiteimotaquempi, impasanotem-piro”.

⁵ Aisati icantquaqueri Jesoshi:

—Pamene, noshiacantempiro aisati. Oquempetaca arriorica pijatashiteri pishaninca nianquiite pamanapeeri itantane. Pincantapaqueri: ⁶ “Nocoi pimpema mava pitantane noacaajeiteariri noshaninca. Iroquera yareetapaaca, tecatsi nompavaquerir”. ⁷ Aamaaca ari incantavaquempime: “Eiro pashereanatsi, novochoquineni. Maajeive-taquena: narori, notomipee, maaroni. Yavitaca oni ashitacorontsi. Tecatsi noncantea nontinaye aca nompantempiro notantane”. ⁸ Pishaninca inaveta, iro cantaincha eior-rica icoitsi intinaye impantempiro notantane. Iro cantaincha te incoyeji aisati pampiitapini-teri, irootaque intinaantajeari, tinare, impaquempiro picoacotaquerir. ⁹ Aisati oquem-petaca: arriorica pamanapiniteri Tasorentsi, impapinitempiro pincoacoteriri. Arriorica pincoapiniyetero paitarica, ari paajero. Arriorica pinquenquetsatacapiniteri Tasorentsi, ari inquemisantempi. ¹⁰ Queario, ipasanotee Tasorentsi maaroni coiteimojeitaqueeri: te irimashitsateji, intacojeitaquee. ¹¹ Pamene, incoacotempirica pitomi tanta iroyeari, ¿arimpa pampaqueri mapi? Incoacotempirica shima iroyeari, ¿arimpa pampaqueri maranke? ¹² Arriorica incoacotempi iitsoqui teapa, ¿arimpa pampaqueri quitoniro? Eiro pipiritsi, irointi pampasanoteri yoyeyetari. ¹³ Pineaquero, te pincameetsajeiveteaji, iro cantaincha piojeiti picavintsaajeitiri pitomipee. Tempa aisati iotasanolri irinti Apa jenoquiniri icavintsaajeitaquee arori. Arriorica pincoacojeiteri, intiancajeitempiro Ishire iriori amitacojeitempine.

Icantayeti atiripee: “Irio Jesoshi camaari”.

(Mt. 12.22-32; 12.43-45; Mr. 3.20-30)

¹⁴ Pashini quitaiteri inequeri Jesoshi shirampari imasontitacairi camaari. Itasonca-coventajiri Jesoshi, yoavisacotajiri, irosati ineaveetantanaja aisati. Yoajeitanaque cavaco maaroni neajeitaquerir. ¹⁵ Iro cantaincha icantayeti aparopee:

—Ishanincatacari Jesoshi Satanashi: yora ivincatsarite camaari, irootaque imatantarori yoavisacotiri neiriri camaari.

¹⁶ Itimi pashini tseenquiriri Jesoshi, icantiri:

—Intsite, pintasonante, niotantempiro queariorica piponeaca inquitequi.

¹⁷ Iro cantaincha iotaque iriori iquenqueshirejeitiri. Icantiri:

—Arriorica irimanatavacaajeitea atiri, tempa aitaque impoyereavacaajeitaquea. Aisati arriorica inquisavacaajeitea ashaninca, tempa ari irinijantareajeitanajeri. ¹⁸ Aisati oquempetaca, arriorica inquisajeiterime Satanashi iamaaririnte, ¿jaoca incanteari im-pincatsajeitanteiarime? ¹⁹ Aisati picantayeti: “Irio Satanashi amitacotiriri Jesoshi yoavisacotiri neiriri camaari”. Iriome amitacotenaneme noavisacotantariri, ¿janica amitacotiriri pishanicajei yoavisacotantariri neiriri camaari? ¿Irisatimpa camaari pis-haninca? ²⁰ Iro cantaincha itasoncacaquena Tasorentsi noavisacotantariri neayetiriri camaari, piojeitanteari meeca quiso yoajeitaquempi Tasorentsi, icoaque impincat-sariventajeitempi.

Jero aisati ishiacantiniriri Jesoshi:

²¹ —Pamene, oquempetaca oca: ontimerica shintsitsirsiri shirampari ivesamento, ichacopite, maaroni, tempa irishentasanoteri ivanco. Eiro ishinetiritsi incoshiyeteri irovaararo. ²² Iro cantaincha impoquerica anaacotiriri ishintsitasano, iranaacota-paaqueri irinti irantapaaqueri, impoiji iraapitsatapaaqueri yoantamento. Impoiji in-coshiteri irovaararo, impajeiteri ishanincaepe iriori. ²³ Iquisajeitaquena maaroni caari oijajeitana, itseencajeitaquena maaroni caari amitacotana. ²⁴ Arriorica iroavisacotajea neavetariri camaari, ocameetsati iraamaventajeari: yapiitajircari aisati. Ishiaquero oca: iquenayeti camaari caaraiteriqui, icoayevetaro pancotsi irisavicanteameri. Tecatsi irinee, irootaque iquenqueshiretanta: “Nompijanajeta anta pancotsiui nopone-a-canta”. ²⁵ Arriorica impiaje, irineapaajero pancotsi, opishitaca. Vetsicayetaca irisavi-cantapeempari aisati. ²⁶ Impoiji irijataque incajemeru itsipapee iyamaaririnte, incarate

oshequi. Eiro icameetsatitsi camaari catsini, yora incajemerri. Pineaquero, oca pancotsi oshiaqueri neiriri camaari. Ariorica iravisacotaje, ocameetsati iraamaventajeari camaari: yapiitajiricari irineajeri aisati. Ariorica irampiitajeri irineajeri, catsiqueti iroasanoteri.

Icanti Jesoshi: “Iquimoshirejeitaque maaroni quemisantatsiri”.

²⁷ Ari itimi oshequi quemajeitaqueriri Jesoshi. Antearojenca ocanti aparoni tsinane:
—Tempa ocameetsati oquimoshireventiri Jesoshi iriniro.

²⁸ Iro cantaincha icanti:

—Je, queario, iro cantaincha iquimoshiretasanojeitaque maaroni quemajeitirori irineane Tasorentsi, aisati maaroni quemisantajeitiriri Tasorentsi.

Icantiri Jesoshi atiri: “Ioti Tasorentsi pitseencajeitaquena”.

(Mt. 12.38-42; Mr. 8.12)

²⁹ Ari yapatotimentajeitari Jesoshi itsipapee atiri aisati. Impoiji yoamejeitajiri:

—Te pincameetsajeiteji. Picoajeiveta pineajeitename nontasoncantajeme aisati, iro cantaincha eiro pineajirotsi aisati. Pinquenqueshireteri Jonashini piotanteari: ³⁰ peerani iniaqueri anteari omani. Ocarati mava imaacotaque tsompoina, impoiji isoquijanaji ivantequi, iotantacari ninivesati itiancaqueri Tasorentsi. Nonquempetajea coajica piojeitanteari itiancaquena Tasorentsi: tempa natiritapaaque nainti, noponeaca inquitequi.

³¹ Aisati ora ivincatsaroten savasati, oponeaca arejiqui catsini, pashiniqui quipatsi. Oponeaca paricoti oquemisantantariri Saromoni, peerani. Ocoaque iriotacaasanotero. Pamene, nanaacotiri Saromoni nioti, iro cantaincha pitseencajeitaquena. Coajica, ariorica irampatojeiteri Tasorentsi maaroni camajeitatsiri, incantajeitempi: “Ainiro pantane: pitseencaqueri notiancane. Irompa irointi oca ivincatsarote savasati te aneeroji antane: tempa oquemisantiri Saromoni”. ³² Aisati iquempeta yora ninivesatini: iquemisantirini Jonashini. Iquenqueshirejeitanaca, yoipacaajeitajiro caari cameetsatatsi yantajeitiri. Nanaacotiri nainti Jonashini, iro cantaincha te pinquemisantajeitenaji. Coajica incantempi Tasorentsi: “Iquemisantirini ninivesatini Jonashini: avintiquea, ¿paita caari piquemisantantari notiancane?”

Icanti Jesoshi: “Ariorica piquemisanti pishiaquero tsiomentotsi”.

(Mt. 5.15; 6.22-23)

³³ Aisati icantajeitiri Jesoshi:

—Ariorica pitsiotiro tsiomentotsi, ¿arimpa pimanaquero jaocarica? ¿Pitetirompa cantiriqui? Tempa poapinitiro onantariqui, pitsiojeitantari. ³⁴ Oca aqui oquempevetaro tsiomentotsi. Ocameetsatirica aqui, amenajeitanaque paitapeerica. Iro cantaincha terica oncemeetsateji aqui, tecatsi amenanteari, oquempetaca aqueni tsiteniriqui, te ay- ojeiteji jaocarica aqueniri. ³⁵⁻³⁶ Ocameetsati piotacotea avisati piquemisantasanotaque- rica. Ariorica piquemisantasanoti, ari piotasanotanaque, eiro pitseenquimatantajitsi. Impoiji pinquempetearo tsiomentotsi tsiotasanotachari.

Irootaque icantajeitaqueriri Jesoshi.

Yora Jesoshi icantaqueri variseo aisati oametantirori Sanquenarentsi: “Ainiro pantaneji, iroasanquejeitempi Tasorentsi”.

(Mt. 23.1-36; Mr. 12.38-40; Ir. 20.45-47)

³⁷ Impoiji icantaqueri variseo Jesoshi:

—Tsame ajate novancoqui, noacayempi.

Ari yojatanaqueri, yoacaapaacari. ³⁸ Te inquivacoteaji Jesoshi, irootaque yoan- tanacariri cavaco variseo. ³⁹ Icantiri Avincatsarite:

—Queario, pamejeitacaro piquivapinitiro pajo aisati piveratote: iro cantaincha apatiro otapiiqui. Te pojoqueroji caari cameetsayetatsi timatsiri osantequi. Piquempetacaro avirori: piquenqueshiretapinitiro picoshiyeti aisati pantapiniyetiro caari cameetsatatsi. ⁴⁰ Te pinquenqueshireniroteaji. ¿Apatirotimpa yovetsiquiro Tasorentsi paco? Tempa aisati yovetsiquiro piquenqueshireantari. ⁴¹ Pipashiyevetari ashinoncaincari coiteimovetariri, iro cantaincha te pincavintsaasanoterji. Ariorica pincavintsaasanoteri itsipapee pishaninca, ari pincameetsataque. ⁴² Pashinoncaajeitea avirojei. Queario

pipaarantapiniveti Tasorentsi piirequite capichaji, iro cantaincha tequera omoncarateaji. Timatsi pineacameetsatiri avirori aisati caari pineacameetsati. Iro cantaincha te omoncaratearoji icoacaquempi Tasorentsi. Te pininteriji Tasorentsi aisati te pininteriji pishanincaphee. Ocemeetsati pimperi Tasorentsi quirequi, iro cantaincha eiro pipeacotirotsi pininteri aisati panteneri icoacaquempi. ⁴³ Pashinoncaajeitea avirojei. Ariorica irampatojeitea ashaninca inquemisantanteeariri Tasorentsi, picoanirojeiti impincatsajeitempi avinti. Ariorica pinquenayetanaque nampitsiqui, picoaque cameetsa iraacameetsajeitempi atiripee. ⁴⁴ Queario, iroashinoncaajeitempi Tasorentsi. Piquempetacari camatsiri tijachari quipatsiqui, imanaca; iro cantaincha yavisajeitanaque atiripee, te iriojeiteji irotaintsi iratiquerime camayetatsiri patsatsiri. Aisati avirori, pimanayevetaro caari cameetsayetatsi pantayetiri.

Irootaque icantaqueriri Jesoshi variseopee. ⁴⁵ Ari icantiri oamentantirori isanquenaren Moishishini:

—Oametantsiri, aisati narorije piquisaquena.

⁴⁶ Icantiri Jesoshi:

—Je, aisati avirori iroashinoncaajeitempi Tasorentsi. Oshequi piperanayetacari ashanincaphee, iro cantaincha te pintacoteariji. ⁴⁷ Queario, pashinoncaajeitea. Pimoncarajeitacari pishanincani oajeitiriniri camantantsiniri. ⁴⁸ Avirojei oayeri. Pintimitaquearicame peerani avirori, poajeitaquerime aisati yora camantantsiniri. ⁴⁹ Iotacojeitaquempi Tasorentsi, icanti: “Nontianqueneri atiri quenquetsatacayerineri, iro cantaincha iroayetavaqueri aparopee, irio itsipapee inquisavaqueri, intiancaarantajeri”. ⁵⁰ Ainiro pantajeitiri maaroni: pashi poajeitiro poanti. Yora peeraniniri poajeiterime, irosati picanta meeca poajeitiri quemisantajeitiriri Tasorentsi. ⁵¹ Pishanincajeitacari oaqueriniri Averini. Aisati pishanincajeitacari oaqueriniri yora Sacariashini: yoyeetaqueri iriori anta ivancoqui Tasorentsi. Ainiro pantajeitiri maaroni, irootaque iroashinoncaimentempi Tasorentsi. ⁵² Poametantavetaro isanquenaren Moishishini, iro cantaincha pashinoncaajeitea: tempa pamatavijeitiri ashanincaphee. Te pincoajeiteji pioteri Tasorentsi, aisati te pincoacaajeiteriji iriojeitajeri iriori ashanincaphee.

⁵³ Irootaque icantajeitaqueriri maaroni, impoiji isoquijanaji. Iquisajeitaqueri yora variseopee aisati yora oametantirori sanquenarentsi, aisati iquenquejaajeitaqueri. Aisati isampiyevetacari paitapeerica, ⁵⁴ icoajeiveta incomitacayearime. Icoaveta incomitacayearime iraacantanteearimeri.

12

Yora Jesoshi yoamejeitiri iroamerepee.

(Mt. 10.28-33; 12.32; 10.19-20)

¹ Ari yapatotimentajeitari Jesoshi oshequi catsini atiri, itsitacaavacaajeitanaca. Irosati icantantari iroamerepee:

—Paamayeariya variseopee, yamatavijeitimpicari. Oshequi yamatavitanti.

² Ijijeivetaca tecatsi iotatsine yamatavijeivetacari, iro cantaincha coajica iriotacojeitanaqueri maaroni atiri yashi yoiro yamatavitanti. ³ Aisati avirripee, pitarica pimanavetacari picantiri meeca, inquemajeitero coajica. Pitarica pincanteri apaniro anta pivancoqui, irovaayetajero anta yapatojeitanta atiripee. ⁴ Meeca, noshaninca, noncamantempi: eiro pitsaroacaaritsi yora atiri coatsiri iroyempi. Ariorica iroyempi, iro cantaincha irointi iroyeete pivatsa. Tecatsi incantero pishire. ⁵ Irinti Tasorentsi pimpincatsate: incoaquerica, iroyempi. Iro cantaincha aisati icoaquerica, irimatero intianquempi Sharincaveniqui. Irooqua pintsaroacayeari irointi pijate Sharincaveniqui. ⁶ ¿Ivinaronimpa tsimeripee? Te impinatasanoteaji, iro cantaincha iojeitiri Tasorentsi: te impeacojeiteariji. ⁷ Aisati oquempetaca, iotasanojeitaquempi: ioti jaoca ocaratiri piishipee. Iquempoyeajeitaqueri tsimeripee, iro cantaincha avirojei iquempoyeasanojeitaquempi. Eiro picantashiretitsi, irointi piveshireimenteari Tasorentsi. ⁸ Aisati piojeitavaquero oca noncamtempiri: eiro pipashiventacaanatsi, ariorica pincamantajeiteri itsipapee atiri piquemisantaquena, aitaque noncamanteri

Apa anta inquitequi pishanincataquena. Tempa noponeaca inquitequi, natiritapaaque.
⁹ Iro cantaincha ariorica pimpashiventacayena aca quipatsiqui, aisati avirori nompashiventacayempi anta inquitequi. ¹⁰ Ariorica incantimatena atiri, ariorica incavintsayeri Tasorentsi, eiro iquenqueshiretajirotsi yantajeitiri. Iro cantaincha ariorica incantimajeitero Ishire Tasorentsi, eiro icavintsairitsi Tasorentsi catsini. ¹¹ Ariorica irayeetempi anta yapatotapinijetanta, aisati anta joeshiqui, aisati anta pincatsariqui, eiro pitsaroacaajeitaritsi. Eiro piquenqueshiretitsi: “¿Paita noncanteriri?” ¹² Ariorica irayeetempi, oametempi Ishire Tasorentsi paitarica pincanteriri.

Icantajeitiri Jesoshi: “Pinevetarocari vaararontsi”.

¹³ Impoiji icantiri aparoni shirampari:

—Oametanari, ipanaquerini apani iyeca maaroni timimojeiveitariniri. Tecatsi impena nainti. Pincanteri iye impaarantajena narori irovaararo.

¹⁴ Yacanaqueri:

—Eiro nocantiritsi. ¿Narompa joeshi, noncantanteariri?

¹⁵ Icantajeitiri maaroni apatotimentajeitariri:

—Queariomphia: pinevetarocari yashiyetari itsipapee, eiro oveshireacaasanotimpitsi.

¹⁶ Impoiji ishiacaventiniri oca:

—Otimi iipatsite ashitaarantincari. Oshequi onintiro panquirentsí quipatsi, cameetsa oshiocayetanaque ivanquirepee. ¹⁷ Yaayetajiro oitsoquipee, inquempoyeantearori ovancopeequi iroori, iro cantaincha opiojeitaca pancotsiqui. Te onajeitearoji maaroni. Iquenqueshiretaca: ¹⁸ “¿Jaocasa noncanterori? Tecatsi noantearori maaroni. Jaa, niotaque meeca: noshoveajero pancotsijaniqui, nantacantajero antearo pancotsi noantearori maaroni novanquirepee, aisati maaroni novaararo. ¹⁹ Oshequitaque meeca maaroni, tecatsi coiteimotajenaneri. Peerani catsini, eirota otsonquitatsi; meeca nomaoree oshequi osarintsi. Cameetsa noapinitea, noshinquitapinitea, noveshireimentearo maaroni timimotanari”. ²⁰ Iro cantaincha icantiri Tasorentsi: “Te piotacoteaji. Meeca tsiteniri noyempi; impoiji, ¿janica ashitajearoneri maaroni timimojeivetimpiri?” ²¹ Pineaquero, te irioteji maaroni coatsiri iroshequiyero irovaararo. Oncameetsateme irovetsiquerome irisavican tearime inquitequi.

Icantiri Jesoshi: “Pincanteri Tasorentsi inquempoyeaventempi”.

(Mt. 6.25-34)

²² Aisati icantiri Jesoshi iroamere:

—Eiro piquenqueshiretatsi jaoca payerori poyeari aisati pinquitsaateari. ²³ Tempa Tasorentsi oaneaquempi. ¿Opomerentsitimotarimpa meeca impaquaempi poyeari aisati piitsaare? ²⁴ Pinquenqueshireteri jaoca icantari tsimerepee: te impanquitanonteaji aisati te inquempoyeanteaji iroyeari pancotsiqui, iro cantaincha ipapinitiri Tasorentsi yoari. Pamene, iquempoyeaventajeitiri Tasorentsi tsimeripee iriori, tempa aisati avirori iquempoyeaventasanojeitimi. ²⁵ ¿Paita patsipetashitarorri picantashireti? ¿Pijitimpá ariorica pincantashirete aiquero pijatatiye pantearitasanaque? ²⁶ Pineaquero, patsipetashitacaro picantashireti. Tecatsi paye.

²⁷ Pinquenqueshiretero jaoca ocantari oteaquipee tojari. Te ontsameetanonteaji, aisati te ontajanonteaji oitsaare, iro cantaincha ocameetsatasanotaque. Peerani oshequi yoaneencani Saromoni, iro cantaincha te inquempetearoji oteaquipee: ocameetsatasanotaque irointi. ²⁸ Pineaquero, yoaneencaquero Tasorentsi oteaquipee. Otimaveta, impoiji oshintsiti oshimpetanaji. Peerani pintime avirojei: tempa pijiti iquenqueshiretaquempi avirori. ¿Paitasa pitseencantacariri? ²⁹ Eiro piquenqueshiretirotsi paitarica poyeari, aisati paitarica pireri: inquemacayempi Tasorentsi. ³⁰ Tempa icoajeitaque atiri iroapinijeitea. Iro cantaincha iotaque Tasorentsi maaroni coiteimotaquempi. ³¹ Ariorica pimpincatsatasanoteri, impaquaempi maaroni coiteimotaquempi. ³² Noamere, oshequi inintaquempi Apa Tasorentsi: icoasanotaque impincatsariventajeitempi, incavintsaasanojeitempi. ³³ Pimpimantero pashiyetari, pimpayeteri ashinoncaincari ovinaro.

Impoiji impinatempi Tasorentsi anta inquitequi. Ontimasanote pivaararo anta: eiro opatsajitsi, eiro opitsititsi, eiro icoshiyeetajimpitsi, eiro yapeajirotsi cajiro. ³⁴ Ariorica otimi pivaararo aca quipatsiqui, oshequi piquenqueshiretaquero timayetatsiri quipatsiqui. Ariorica otimi pivaararo inquitequi, ari piquenqueshiretapinitiri Tasorentsi.

Icantiri Jesoshi: “Pivetsicajeitea, te pioteji jaoca oncarate impocashijeitempi Tasorentsi”.
(Mt. 24.45-51; 25.1-13; Mr. 13.33-35)

³⁵⁻³⁶ Jeroca icantaqueriri Jesoshi iroamere:

—Paamaajeiteari pivincatsarite, pivetsicasanojeitea. Pinquempeteari yora inampire ashitarori ivanco. Ijataque yora ashitarori irineeri ishaninca irayero ijina. Yaamaajeitari inampire anta ivancoequi. Ariorica irareetapaaaje incoapaaje irashitareavajeneri, aisati incoapaaje irineapaajero ovetsicayetaca ivanco. Ariorica ontsitenitanaje, icoaque ontsiotea ivanco. Aisati icoaque intinaye inampirepee, inquitsaajeitea. ³⁷ Ariorica irineapaajeri yovetsicajeitaca, inquimoshirejeitaque maaroni. Yora ashitarori ivanco irisavacacaajeiteri maaroni inampirepee, iroacaajeiteari. ³⁸ Iro cantaincha te iriojeiteji jaocarica oncarate impocantajeari: ariorica iroaquera imaaajeiti, ariorica nianquiite. Iro cantaincha ariorica irineapaakeri inampire yovetsicajeitaca, ari inquimoshirejeitanaque, maaroni. ³⁹ Piojeitavaquero oca noncamantempi: arioricame pioteme impoque tsiteniriqui coshitantatsiri, tempa pisaaquiteme poimpiantavajearimeri, eiro pishinetirime incoshitempime. Iro cantaincha te pioteji jaocarica oncarate impocanteari. ⁴⁰ Aisati noquempevetari coshinti, te noncamantempiji jaocarica oncarate nompocantajeari. Peerani noponeaca inquitequi, natiritapaaque. Coajica nompiaje. Pinquenqueshirejeitenai, paamaajeitajena: nomapocapaimpicari.

⁴¹ Ari isampitiri Petero:

—Novincatsarite, ¿apanirompa poamejeitenai naroripee? Irompa tericampa, ¿pi-coaquempa iriojeitanaque maaroni atiri?

⁴² Yacanaqueri:

—Noquenquetsatacaaajeitiri maaroni quearioventirori nocooacaajeitiriri. Iquempetaca ivatorote atiripee, icoacaakeri aparoni iratirite iroacaapiniteari itsipapee. Impoiji ijataque ivatorote jaocarica. ⁴³ Ariorica iroacaapiniteari cameetsa, ariorica impocaje ivatorote, iroveshireimentapaajeri. ⁴⁴ Incantapaajeri: “Cameetsa piquemisantaquena. Meeca aviro amenajeitenarone maaroni timimojeitanari”. ⁴⁵ Iro cantaincha, incanterica yora iratirite: “Eirotsita ipoqui novatorote”. Icoacaavetari ivatorote incavintsayerime itsipapee, iro cantaincha imapocaqueri iquisajeitaqueri, ipasajeitaqueri: shirampari, tsinane, maaroni. Oshequi iperataca, oshequi ishinquitaca. ⁴⁶ Ari pashini quitaiteri impocaje ivatorote, irimapocapajeri. Iroasanquetapaaqueri, inquempetacaanteri itsipapee caari quemisantiri. ⁴⁷ Pinequiero, iovetacaro icoacaavetacariri ivatorote, iro cantaincha te incoyeji irimatero. Irootaque impasatacantanteariri, aiquero catsini impasatacantasanoteri. ⁴⁸ Iro cantaincha eiro yoasanquetasanotiritsi caari iotaatsi. Eiro icoacotasasanotiritsi oshequi yora caari iotaatsi. Irintiquea iotaasanotatsiri, incoacotasasanoteri irinti.

Icantiri Jesoshi iroamere: “Coajica oshequi inquisavacainmentajeitenai atiripee”.

(Mt. 10.34-36)

⁴⁹ Aisati icanti Jesoshi:

—Nopocaque quipatsiquica inquisavacainmentantenari atiripee, nocooasanotaque nomamajeitero maaroni nopocashitiri. ⁵⁰ Oshequi noquenqueshireaca: irotaintsi oshequi nonquematsicatearo. ⁵¹ ¿Pijitashijeivetampa nopocashijeitiri atiri noimajerentajeiteri, cameetsa iraacameetsatavacanteeari? Teve, irointi inquisavacainmentajeitenai. ⁵² Ariorica incarate apapacoronai savigatsineri pancotsiqui, inquisavacajaitea. Incarate mava quisherineri yora apite ishaninca. ⁵³ Ariorica yora ashitariri inquishereri itomi, aisati itomi inquishereri iriri. Ariorica onquisherero airo evatayero, onquisherero iroori airo.

Pinquenqueshiretea piotanteari iroametempiro Tasorentsi.

(Mt. 16.1-4; Mr. 8.11-13)

⁵⁴ Impoiji icantajeitiri apatotimentajeitariri:

—Ariorica pineaquero antearo tampea amaquero mencori otsitenishaanaque, picantajeiti: “Coraqueve incani”. Tempa piojeitaque ompoquerica incani. ⁵⁵ Ariorica oquitamaroitetanaji, picantajeiti: “Eiro oparii incani, ari osarianaje”. Tempa aisati piojeiti, ⁵⁶ irointi pimanaquero piojeitiri. Piojeitaque ompariaquerica incani. Iro cantaincha te pincoajeiteji piojeite oshequi ompomerentsitimojeitempi coajica. ⁵⁷ ¿Paita caari picoanta piojeitero queariosanotatsiri? ⁵⁸ Ariorica inquishimentempiri pishaninca quirequi pireviteriri, incoquerica iraanajempi joeshiqui. Ari tequeratsitarica irareetacayempi, pincantanaqueri: “Eiro piquisanatsi, coajica nompinatajempi”. Yoiminqueimpicari caravosoqui. ⁵⁹ Ariorica iroiminqueaquejemp, incoacotasanoltempi maaroni quirequi pirevitiriri. Eirorica pipiritsi, eiro yoimisoquijimpitsi.

13

Icantiri Jesoshi atiri: “Pinquenqueshireajeitea, pojocajero caari cameetsatatsi pantapini-jeitiri”.

¹ Impoiji ipoqui pashini atiri, icamantapaqueri Jesoshi:

—Ijajeivetaca carireasatipee anta Jerosarequi iroajeitenerime Tasorentsi ivira. Jeriniro yora Piratoniro yoacantanirojeitaqueri carireasatipee anta ivancoqui Tasorentsi. Oconoajatacaro irirajani ashaninca irirajani ivira yoajeitiniriri Tasorentsi.

² Yacanaqueri Jesoshi:

—¿Pijitirimpa yora carireasati antasanojeitironiri caari cameetsatatsi ishinetantirri Tasorentsi yoacantaqueri Pirato? ³ Noncamantempi: te iro incamantea. Iro cantaincha queariompiyea: eiorica piquenqueshiretajatsi, aisati eiorica pojocajirotsi caari cameetsatatsi pantapinitiri, pinquempejeiteari yora yoyeetiri. Yoajeitimpicari, maaroni. ⁴ Aisati peerani otireanaji antearo mapipanco anta Shiroequi, otsinacapaaqueri 18 shirampari, icamajeitaque. ¿Paita icamajeitantacari? ¿Iriompa antasanotirori caari cameetsatatsi icamantacari? Te. Iquempejeitacari maaroni ishiramparirinte. ⁵ Pinquenqueshireajeitea avirori, pojocajero caari cameetsatatsi pantapinijeitiri. Eirorica piquenqueshirejeitatsi, aisati pincamajeite avirorijei.

⁶ Impoiji ishiacaventajeitirinri oca:

—Ipanquitaquero shirampari iyera anta irovamashitequi. Ocarataque peerani oshioque, impoiji yamenapinivetaro oitsoqui, irayerome: iro cantaincha te oitsoquiteji.

⁷ Impoiji aisati icantiri yora tsameetiniriri iipatsite: “Pamene, ocarataque mava osarintsi nopocapiniveta nayerome oitsoquipee. Te ontameji catsini. Atsipetashitaca otimi. Pimpesajero nompanquitantearori paitapeerica cameetsatatsiri”. ⁸ Yacanaqueri tsameetiniriri ivatorote: “Ari onavaquetsita meeca osarintsiqica. Nonquiyetero quipatsi ometsoitetanteari, aisati noapinitenero itia pivira, cameetsa ontimanteari oitsoqui. ⁹ Impoiji ariorica ontimanaque oitsoqui pashini osarintsi, tempa cameetsa, eiro apeshirotsi. Iro cantaincha eiorica otimitsi oitsoqui, nompesajero”.

Yoavisacotiro saavarouqui Jesoshi yatajeaonquiri camaari.

¹⁰ Pashiniqui saavarouqui yoametanti Jesoshi anta yapatotapinijeitanta joriopee. ¹¹ Otimi anta pancotsiqui aparoni tsinane yatajeaonquiri peerani camaari. Ocarataque meeca 18 osarintsi omitiaque, irosati ocanta omitiaque: tecatsi oncantagea oncatiaje.

¹² Ineantacarori Jesoshi, icajemaquero:

—Caatanaque, meeca noavisacotajempi.

¹³ Ipamitaquero, irosati avisacotantanaja. Cameetsatanaji, ocatianaja. Ocantanaque: —Yoavisacotajana Tasorentsi, tempa icameetsati.

¹⁴ Yora jivatacantantatsiri anta ivancoqui Tasorentsi iquisaqueri Jesoshi. Icantajeitiri apatojeitainchari:

—Ocameetsati antaveejeite 6 quitaiteri, iro cantaincha ariorica omoncaratapaaquea quitaiteri 7 ocameetsati amaoreasanojeitanaque. Eiro antaveetitsi catsini. Ariorica picoaque pavisacojeitaje, pimpoque pashiniqui quitaiteri, eiroquea pipouqtsi saavarouqui.

¹⁵ Ipiatanacari Avincatsarite, icantanaqueri:

—Oshequi pamatavinirotanti. Pantaveejeiti avirori saavarouqui. Pamene, ariorica airi pivatec imire saavarouqui, tempa pitsatacoreiri paantanacariri anta otiminta nija. Aisati

piquempetiri pimorane, maaroni. Queario, picavintsaajeitiri pivirapee saavarroqui. ¹⁶ Iro cantaincha caari oni pivira oca tsinane, irointi pishaninca. Peerani omantsiataque: tempa ocameetsataque ancavintsayero saavarroqui.

¹⁷ Iquemantarori oca, ipashiventajeitanaca maaroni quisajeitaqueriri Jesoshi. Iranti itsipapee atiri iveshireimentajeitacari Jesoshi, icantajeiti:

—Ocameetsajeitaque yantayetiri Jesoshi.

Icamantiri Jesoshi iroamere paita oshiacaventiri moshitasa aisati tapiacairori tanta.

(Mt. 13.31-34; Mr. 4.30-32)

¹⁸ Impoiji icanti Jesoshi:

—¿Piojeitimpa jaoca icanta Tasorentsi ipincatsariventanti? ¿Jaoca noncanterori noshiacaaventantempiroi? ¹⁹ Oshiaquero oitsoqui moshitasa ipanquitiri shirampari iroanequi. Oshiocanaque, oquimotanaque, oshiatetacaro inchato. Ipocapiniti tsimeri, yaatapinitiro ojempequi.

²⁰ Yapiitajiro, icanti:

—¿Jaoca noncanterori noshiacaaventantempiroi? ²¹ Oquempetacaro tsinane, airo tapiacairori tanta capichaji. Oconoiro oshequi tircopane otapiantanacari. Otapiaquero maaroni, ometsontacari. Aisati iquempetaca ashinanca. Intimerica aparoni antirori caari cameetsatatsi, irantacaajeiteri ishaninca, maaroni.

Icantiri Jesoshi ishaninca: “Pimpomerentsiventearo pareetanteari inquitequi”.

(Mt. 7.13-14, 21-23)

²² Ari iquenaquenayeti Jesoshi nampitsipeequi, yoametantayeti. Icoaque irijate Jerosarequi. ²³ Isampiyeetiri:

—¿Jaoca incarajeiteri oavisacojeitajanchane? ¿Arimpa incarate aparopee?

Yacanaqueri:

²⁴ —Noshiacantempiro. Oquempetaca orijaniqui omorojaniqui anqueanteari inquitequi. Intime oshequi coavetachane irijateme inquitequi, iro cantaincha eiro imatirotsi irareetearo. Pimpomerentsiventearo pareetanteari inquitequi. ²⁵ Aisati oquempetacaro yantiri ashitarori ivanco. Itimi tsompoina iriori, yashitacotaca, iyavitiro ashitacorontsi. Impoiji pimpocajeivetea avirorije, pincantavetaqueari: “Novincatsarite, pashitareenaro, nonqueanaque”. Iro cantaincha incantavaquempi: “Te niojeitempi jaocarica piponeari”. ²⁶ Impoiji pincantajeiveteari: “Peerani aitaque pitsipajeitaquena nonampiqui avajeitaca, aisati poamejeitaquena”. ²⁷ Ari incantempi: “Te niotempiji. Pijataje, pimpianaje. Oshequi pantayetiro caari cameetsatatsi. Te pincameetsateji”. ²⁸ Impoiji oshequi poashiretasanotanaquea catsini, piraasanotanaquea aisati. Pineaueri Avarama, Isaca, Jacovo, maaroni yora quenquetsatacantatsiniri itimi jenoqui, iro cantaincha avirojei, eiro pimajeitirotsi pijate: iroimpiavajempi Tasorentsi. ²⁹ Imponeajeitaquea quemisantatsiri intatiquero, acaqueroca, catonco, quirinca, maaroni quipatsipeequi. Irisavacajeitapaaque anta ipincatsaritinta Tasorentsi. ³⁰ Irareetasanotaquea yora pitseenajeitaqueri. Eiro yareetatsi iranti pipincatsajeitiri.

Yora Eroeshi iramataviterime Jesoshi.

(Mt. 23.37-39)

³¹ Irosati ipocantaca aparopee variseo. Icantapaaqueri Jesoshi:

—Pijate pashiniqui quipatsi. Icoaque Eroeshi iroacantempi.

³² Yacanaqueri:

—Pincamantanirotaiteri yora amatavitantsiri: “Icanti Jesoshi: ‘Eiro noshiatsi. Noncanteani noavisaocojeiteri neiriri camaari aisati mantsiaripee: meeca, osaitequera, aisati otsipa quitaiteri. Impoiji nomoncarataquero maaroni’ ”. Irootaque pincanteriri. ³³ Aitaque nonquenaquenayete meeca, osaitequera, aisati otsipaniqui quitaiteri. Aisati ocameetsati noncarme Jerosarequi: tempa anta icamapiniti quenquetsatapinitirori irineane Tasorentsi.

Icanti Jesoshi: “Iroashinoncaajeitea jerosaresati”.

³⁴ Aisati icantiri Jesoshi:

—Yora jerosaresati oshequi yoayetaqueri quenquetsatirori irineane Tasorentsi. Ipichaapinitaqueri itiancane Tasorentsi. Oquempetaca teapa osaramonquitiri orijanipee, oshequi nocoaveta nampatojeiterime jerosaresati: nonquemisantacayerime, iro cantaincha te incoajeiteji. ³⁵ Pamene, tecatsi amitacoterineri meeca, yojocajeitiri Tasorentsi, icantiri: “Incanteata”. Eiro ineapinitajanatsi meeca. Jaocarica intimeri pincatsatenaneri, ari irineajena aisati.

14

Yoavisacotiri saavarroqui Jesoshi eereyetatsiri.

¹ Pashiniqui saavarro itimi Jesoshi anta ivancoqui jivatacaajeitiriri variseo. Yamenasanojeitiri Jesoshi, icoaque irantero paitarica inquishimentanteariri. ² Itimi anta aparoni mantsiari, yeereyetanaque, yenoncayetanaque maaroni. ³ Isampitiri Jesoshi variseopee:

—¿Ocameetsatimpa avavisacoteri mantsiaripee quitaiterica amaoreajeitantarri?

⁴ Iro cantaincha imajerejeitanaque, te irancaniroteji. Ari yacatsavacotaqueri Jesoshi mantsiari, yoavisacotiri, impoiji itiancajiri ivancoqui. ⁵ Ari icantaqueri yora amenashejeitaqueriri:

—Tempa pantaveejeiti avirojei saavarroqui. Ariorica impariaque pivacate omoroqui, tempa ari paavajeri aisati.

⁶ Aisati, imajerenirojeitanaque.

Yoamejeitiri Jesoshi atiri: “Eiro pishemejeititsi”.

⁷ Impoiji yamenajeitaqueri Jesoshi yora oajeitainchari yoacaajeitacari yora jivatacaajeitiriri. Icoajeiveta irisaviqueme quempeji yora pincatsari irineacameetsatantearimeri. Ari icantajeitaqueri Jesoshi:

⁸ —Ariorica iroacayempi pishaninca, eiro pisavicashitatsi quempeji yora pincatsaritatsiri. Pamene, ipoquicari pashini ivincatsaririnte, ⁹ impoiji ipoquicari yora cajemacantimpiri, icantimpicari: “Eiro pisaviquimotirtsitsi pincatsarica. Irisaviqueta aca irinti ivincatsaririnte”. Isavicacaimpicari anta nijantiaji, impoiji pimpashiventanaquea.

¹⁰ Irointiquea ocameetsati pisavicapaaque anta nijantiaji. Impoiji ariorica irineajempi yora cajemacantimpiri, incantempi: “Caatanaque, noshaninca, pisaviquimoteri aca pincatsari”. Irineajeitempi maaroni oajeitainchari ishanincataquempi pincatsari.

¹¹ Ariorica pincoaque irineapincatsajeitempi itsipapee, pishematicari; impoiji ipashiventacaimpicari Tasorentsi: tecatsi neapincatsatempineri. Iro cantaincha yora caari shemetatsi incarajeiteri Tasorentsi impicatsariventante.

Jesoshi iquenquetsatacotiri cajemacantavetariri ishaninca iroacaajeitearime.

(Mt. 22.2-14)

¹² Aisati icantiri Jesoshi yora cajemacantiriri:

—Ariorica pincajemacanteri atiri poacantajeiteariri, eiro picajemapinijeitirtsipishanincasanori aisati yora ashitaarantincari. Ariorica poacaqueari, ari iriori impiatempi, iroacaajempi. ¹³ Iro cantaincha ocameetsatasanoti pincajemacanteri irinti yora caari ashitaarantayetacha, yora choriyetatsiri, jempayetatsiri, caari amenayetatsi, maaroni. ¹⁴ Tecatsi incantajeitea irinti impiajeitajempi iroacaajeittempi. Iro cantaincha coajica irointinaajeitajeri Tasorentsi maaroni quemisantajeitiriri. Impoiji impinatempi irinti. Te pantsipetashiteji picavintsanti.

¹⁵ Iquemantacariri aparoni oainchari, icanti:

—Tempa oncemeetsatasanotaque antime anta ipincatsaritinta Tasorentsi.

¹⁶ Icantaqueri Jesoshi:

—Oquempetaca aparoni shirampari. Yovetsicacantaquero oshequi yoari, impoiji icajemacantaqueri ishaninca iriori iroyea. ¹⁷ Ovetsicajeitaca maaroni. Itiancaqueri inampire: “Pijate, pincamantaiteri: ‘Moncarataca, vetsicajeitaca maaroni, pimpoque meeca’”. ¹⁸ Iro cantaincha te incoajeiteji irijajeite. Icanti aparoni: “Iroaquera namanantaquero noipatsite. Nojate meeca namenaiterota, ocameetsataquerica. Pincamantajeri: ‘Eiro ipoquitsi’”. ¹⁹ Icanti pashini icajemacantiri: “Iroaquera namanantaqueri 10

vaca. Nocoaque namenaiteri icameetsataquerica. Pincamantapaajeri: ‘Eiro ipoquitsi iroyea’”. ²⁰ Icantiri pashini: “Iroquera naque nojina. Tecatsi noncantea nojate”. ²¹ Ari ipianaja yora inampire camantavetariri ishaninca. Icamantapaajiri: “Icantajeiti: ‘Eiro nojatitsi noyea’”. Ari iquisanaca yora ivatorote, icantiri inampire: “Incanteata noshaninca. Meeca pijate anta nampsiqui, pinquenayetanaque pincoacoayeteri yora caari ashitaarantayetachane, choriyetatsiri, jempayetatsiri, caari amenayetatsi, maa-roni”. Ari ijataque, icajemajeitaqueri, ipocajeitaque. ²² Ari ipiajaro aisati, icantapaajiri ivatorote: “Nojaiti, nocamantajeitaqueri. Ipocajeitaque, iro cantaincha tequerata omon-carateaji”. ²³ Ari icantiri aisati: “Ari pijate anta aisati, pinquenayetanaque avotsipeequi, pincantajeiteri itsipapee impoque, nocoaque irijaasanojeitapeemparo novanco. ²⁴ Irinti yora noshaninca nojivavetacari nocajemacantavetacari, eiro catsini yoimatarotsi oca novetsicavetanariri”.

Irootaque iquenquetsatacaaajeitiriri Jesoshi anta ivancoqui variseo.

Icanti Jesoshi: “Pimpomerentsiventasanotenaro nocoacaajeitaquemperi”.

(Mt. 5.13; 10.37-39; Mr. 9.50)

²⁵ Ari iquenanaque Jesoshi avotsiqui aisati, yojajeteitanaqueri oshequi atiri. Ipitso-cashijetanacari, icantajeitiri:

²⁶ —Niotaque pinintajeitiri piripee, piniropee, pijinapee, pitomipee, parentipee, pit-siropee, maaroni. Aisati avisati nintajeitacha avirori. Iro cantaincha pincoajeiterica pojajaeiten, ocamsatsi nainti pinintasanajeitena catsini. Eirorica pinintasanotanatsi, tecatsi pincantea pimpeajea noamere. ²⁷ Aisati eirorica pipomerentsiventasanota-narotsi nocoacaajeitaquemperi, aisati eirorica pojatasanotanatsi, tecatsi pincantea pimpeajea noamere. Pinquenqueshirejeitea jaocarica oncanteari. ²⁸ Oquempetaca ariorica icoaque irantacantero shirampari ivanco, irijivataque irisampiteri yora vesi-quenerine jaoca oncarate ompinatea. Impoiji irimoncarateri iirequite iriotanteari moncaratacarica. ²⁹ Eirorica ijivati iriote irimoncaratearica, icomitarocari. Ariorica irimoncaratearo ominca, ari ocarati. Impoiji tecatsi pashini iranteneri yora vescavetanariri. Impoiji irishirontimenteari ishaninca. ³⁰ Incantajeite: “Pineaqueri, irovetsi-cacanterome pancotsi, iro cantaincha te intsoncacanteroji. Te intimeji iirequite, iji, iji, iji”. ³¹ Aisati yora pincatsari, ariorica inquemacoteri itsipapee atiri itiancaqueri 20,000 soraro inquisanteariri. Ariorica intime isorarote pincatsari 10,000. Te irioteji ocameet-satirica irimanatavaqueri yora pocatsineri. Tempa irijivate incajemajeiteri ishanin-capée iroametatacanteari: impoiji iriote ocameetsatirica irimanátea iroimpanteariri yora pocashiterineri. ³² Ariorica incantajeite ishaninca: “Yanaacojeitaquee, ishe-quitasanotaque. Tecatsi ancantea aimpiavajeri”. Ari incanteri: “Tequera iraree-jeitea, tsame antianqueri aparopee ashaninca irisampiteri paitarica incoacojeitaqueeri eiroquea imanatantapeetsi”. ³³ Aisati pinquempetea avirorije: ariorica pincoaque pojatena, pijivate pinquenqueshirete jaoca ocantajeitari maaroni timimojeitimpri. Piotasanojeitero: impoiji pojocajeitajero, pojatasanajeitanaquena. ³⁴⁻³⁵ Nocoaque yora quemisantanari iroameteri itsipapee atiri intime cameetsa, irompa eirorica yoametiritsi, te irimateroji nocoacaavetacariri, yatsipetashitaca itimi. Iquempetacaro tivi caari poteatatsine: tempa ajocajero. Pinquenqueshiresanotero oca nocantajeitaquemperi piotasanolantearori.

Irootaque icantajeitaqueriri Jesoshi oijajeitiriri.

15

Iquenquetsatacotiri Jesoshi yora ovisha peachari.

(Mt. 18.10-14; Joa 10.1-18)

¹ Itimi anta oshequi jorio aitiriri iirequite ishaninca impanteariri yora oromasati, aisati icoshitaqueri ishaninca. Iro cantaincha yamejeitaca iriori yapatotimentapinitari Jesoshi, icarajeitaqueri itsipapee antapinitirori caari cameetsatatsi. Iquemisantapini-jeitaqueri Jesoshi iquenquetsati. ² Ari icantajeiti yora variseopee aisati yora oametan-tirori Sanquenarentsi:

—Te oncameetsateji oca yantapinitiri Jesoshi: icarajeitapinitiri caari cameetsayetatsi, itsipajeitacari yoajeita.

³ Impoiji, jero oca ishiacantiniriri Jesoshi:

⁴ —Aamaaca intimerica povishate 100. Impeaquearica aparoni, tempa ari poanaqueri yora 99 anta queshiiqui, impoiji pijatanaque anta caaraiteriqui, pincoacoanteariri peainchari. Pincoacoayetajeri irosati pineantajeariri. ⁵ Ariorica pineapaajeri, tempa oshequi pinquimoshireventajeari. Tempa pinquijajeri, paanajeri, poajateri anta itimajeitinta ishaninca. ⁶ Aisati, ariorica pareetae pinampiqui, tempa pincajemejeteri pishaninca, pincantajeiteri: “Tsame anquimoshirejeite: ipeavetaca novishate, naajiri aisati”. ⁷ Aisati iquempeta Tasorentsi. Ariorica inquenqueshiretaja aparoni antirori caari cameetsatatsi irojocantearori, incanteri maaroni savicajeitatsiri inquitequi: “Tsame anquimoshireventajeari”. Te irio incantacote yora itsipapee cameetsajeitatsiri.

Iquenquetsatacotiri Jesoshi quirequi peachari.

⁸ Jero pashini icantiriri Jesoshi:

—Pashini aisati noshiacaventempiro: otimi tsinane oirequite, icarati iitsoqui 10. Ariorica impeaquea aparoni, oncoacoayetajeri. Ariorica ontsitenitanaque, ontsiotero otsiomento, oneanteariri, aisati ompishitasanotero pancotsi amenayetajeri otijaqueririca quipatsi. Ari oncoacoayetajeri irosati oneantajeariri. ⁹ Ariorica oneajeri, oncajemerri oshanincajei, oncanteri: “Tsame pintsipajeitena, anquimoshirejeitanaque. Noneajiri aisati noirequite peavetainchari”. ¹⁰ Aisati noncamantajeitempi: aisati iquempetaca Tasorentsi. Ariorica inquenqueshiretaja aparoni antirori caari cameetsatatsi irojocantajearori yantayetiri, inquimoshiretanaque Tasorentsi, irineaajeiteri inampirepee.

Iquenquetsatacotiri Jesoshi evancari jatapitsavetariri iriri.

¹¹ Pashini aisati ishiacantiniriri Jesoshi:

—Itimi shirampari itomi apite. ¹² Yora imoitatsiri itimi icantiri iriri: “Apa, nocoaque pishinetenaro nayerota maaroni novaararo aisati maaroni noirequite. Pimpenaro meeca maaroni”. Ari ipajeitaqueri. ¹³ Pashini quitaiteri yapatojeitaquero irovaararo, maaroni. Ijataque arejiqui, pashiniqui nampitsi, yaanaquero maaroni timimojeitiriri. Anta te irisavique cameetsa, irootaque yaparatantacarori maaroni irovaararo aisati iirequite. ¹⁴ Ari tecatsi timimotajerine, aisati te ontimasanoteji iroajeiteari atiri. Oshequi yashinoncaaca evancari, iquemasanotaquero itashe. ¹⁵ Impoiji iquenaquenayetanaque iramenayeteri tsameetacayerineri. Ineapaaqueri aparoni ashitariri ichanchote, icantapaaqueri: “¿Picoaquempa nontsameetempi?” Icantiri: “Je, nocoaque pamenenari nochanchote”. ¹⁶ Ari yamenavetacanari ichanchote, ipapinitiri yoari: ora shiavetarori otaqui intsipa. Iro cantaincha tecatsi oacayearine yora evancari, icoavetanaca iroacotearime yoari chancho. ¹⁷ Impoiji iquenqueshiretanaja: “Icarajeitaque iratirite apa oshequi. Timatsi yoajeitari maaroni, iquemapinijeitaca, timatsi timaarantapaintsiri aisati. Naintiquea, aasanotaquena notashe. ¹⁸ Meeca nompianaje anta apaqui, noncantapaajeri: ‘Apa, te nonquemisanteriji, aisati te nonquemisanteriji Tasorentsi. Ainiro nantane oshequi. ¹⁹ Eiro meeca pitomintajanatsi, ainti pinampitajena. Nontsameetempiro piipatsite’”. ²⁰ Impoiji ipianaja, iquenanaji avotsiqui. Icaantanaja, irotapajantsi ivanco iriri. Ari iniitavajari iriri anta paricoti, iquenapaaji. Oshequi iquimoshiretanaque, icavintsaasanotavajiri. Ishiashitavajari iquempejitavaajari, yavitsanotavajiri, inintavorotavajiri. ²¹ Ari icantapaaqueri itomi: “Apa, te nonquemisanteriji Tasorentsi, aisati te nonquemisanteriji avirori. Ainiro nantaneve. Te oncameetsateji pintomintajena”. ²² Iro cantaincha icajemiri iriri inampirepee, icantajeitiri: “Pishintsijete, paitero quitsaarentsi cameetsari, pinquitsaateri notomi. Aisati paiteneri anijo, pisatevacoteneri iracotsapaquiqui. Paiteneri aisati sapato, irisapatotapaajeari. ²³ Aisati paiteneri vacajaniqui, timasanotatsiri ireji, moyeneri. Tsame maaroni anquimoshireventavajeri notomi, avacaajeitavajeari, maaroni. ²⁴ Nojivetaca eiro noneajiritsi, oquempetimotaquena icamaque. Iro cantaincha meeca oquempetaca yaneanajji aisati, meeca noneajiri. Ipeavetaca, meeca ipocaji, aneajeitajiri aisati”. Ari

iquimoshirejeitanaque, yoacaajeitajari. ²⁵ Ari itsameeti itomi pashini anta oantsiqui: te irineavajeriji irirenti. Impoiji yareetapaaja iriori, iquempejitaquaji iquemapaaquero moshica, aisati ivairajeitaque. ²⁶ Icajemapaaqueri aparoni nampirents, isampitiri: “¿Paita pivairajeitantari?” ²⁷ Yacanaqueri: “Areetapaaja pirenti. Yoacantaqueri piri vacajaniqui, yoacaajeitacari maaroni. Oshequi iquimoshireeventavajiri pirenti ipocaji, cameetsa yareetaja, tecatsi oyerine”. ²⁸ Irosati iquisantanaca irirenti, te incoyeji inqueapaaaje pancotsiqui. Isoquijanaque iriri, icantavetavajari: “Caate, notiom, pinqueapee. Piveshireimentavajeari pirenti”. ²⁹ Iro cantaincha yacanaqueri: “Peerani nantaveetaquempiro paitapeerica picantaqueunari, te nompiatsatimatempiji. Iro cantaincha tecatsi pimprena nainti catsini noacayearimeri noshanincaphee. Te pimprenariji chivo, tecatsi catsini. ³⁰ Jeri iyeniro, ijatanaque arejiqui itsonquitaquempiro piirequite: ipinajeitaquero tsinaneppee ineavintsaajeitaquero. Meeca ipianirotaja, ari poaqueneri cameetsari vaca”. ³¹ Ari icantiri: “Notiom, acantani quiso avavacaaca. Avirotaque ashitearoneri maaroni vaararontsi oca avancoquinirica. ³² Iro cantaincha ocameetsati aveshireimenteari pirenti. Oquempevetaca icamaque, ajijeivetaca eiro anejiritsi aisati. Meeca oquempetaca yaneanaji aisati, aneajeitajiri. Ipeavetaca, meeca aneajeitajiri aisati. Tsame aveshireimentajeiteari”.

16

Iquenquetsatacotaqueri Jesoshi amatavitiriri ivatorote.

¹ Aisati icantiri Jesoshi iroamere:

—Itimi ashitaarantincari quempoyejiniriri iirequite, maaroni. Impoiji icanteetiri: “Icoshitaquempi yora quempoyeavetimpiriri piirequite”. ² Impoiji icajemaqueri, isampitiri: “¿Paita ojita oca icanteetaquenari? ¿Paita picoshinirotantanari? Meeca poimpiajenari maaroni noirequite, pisanquenatenaro ivajiropee maaroni irevitanari. Meeca eiro noshinetajimpirts aisati noirequite”. ³ Ari iquenqueshiretanaca iriori: “Eiro meeca ishinetajanatsi novatorote nonquempoyejeneri iirequite. ¿Paita nanteri meeca? Te noshintsiteji nontsameetanteari. Aisati nopashiventaca noncanterime atiri impashitename quirequi. ⁴ Ja, je niotaque meeca. Noncavintsaajeiteri maaroni irevijeitiriri novatorote. Impoiji, iraacameetsajeitena anta ivancoqui: eiro ishinetantana nashinoncaaveetea”. ⁵ Ari icajemajeitaqueri maaroni irevijeitiriri ivatorote. Isampitiri yora jivatatsiri yareetapaaja: “¿Jaoca icaratiri pirevitiri novatorote?” ⁶ Yacanaqueri: “Nirevitiri oshequi oja orivo. Ocarati nirevitiri jaachari virojaniqui 100”. Icantiri: “Je, queario. Jeroca paperi osanquenataca pirevitiriri. Payero paperica, pisanquenateneri otsipa, pincante: ‘Nirevitimpi 50 virojaniqui jachari oja orivo’. Amataviterita novatorote”. Icantiri: “Je, ari”. ⁷ Ari ijataque jivatatsiri, ipocaque itsipa. Isampitiri: “¿Jaoca ocaratiri pirevitiri novatorote?” Yacanaqueri: “Oshequi nirevitiri tirico, ocarati Jainchari coshitariqui 100”. Ari icantiri: “Jeroca paperica pisanquenatiniri peerani novatorote. Queario, ocarati pirevitiri 100. Tsame amataviterita. Payero oca paperica, pojocajero; pisanquenateneri otsipa, pincanteri: ‘Nirevitimpi 80 coshitari, Jainchari tirico’”. Ari isanquenataquero. ⁸ Impoiji iotanaque yora ivatorote yamatavitaqueri. Icantaque: “Te oncameetsateji yamatavitaquena, iro cantaincha otimi ionirotantari irayero coiteimotacariri”. Queario yora tseencantatsiri ioniroti iomparitavacaajeita. Irintiquea yora quemisantatsiri te iriotasanoteji. ⁹ Meeca noncamantajeitempi: intimerica piirequite, pincavintsaajeiteri pishaninca, pimpajeiteri coiteimotariri iriori. Eiro ipeacotarotsi. Impoiji pincamajeitanaque, pojocajetero timimojeitimpiri, iro cantaincha iraacameetsajeittempi anta inquitequi yora picavintsaajeitaqueri. Tempa anta otimi pisavancateari caari tsoncanetachane. ¹⁰ Eivorica picoshittsi capichaji, eiro picoshittsi aisati antearoite. Iro cantaincha pincoshiterica capichaji, picoshiticari aisati antearoite. ¹¹ Ariorica pincoshiyete quirequi, iriotanaque Tasorents te pinquenqueshireteriji iriori: impoiji eiro ishanincatimpitsi, eiro pineirotsi inampi. ¹² Ariorica pincoshiteri iirequite itsipapee, ¿paitaquea impashitantempiri Tasorents piirequite avirori? ¹³ Tecatsi pincantea pantaveeteneri apite pivotorote. Ariorica pinintasanoteri

aparoni, eiro piquempetaritsi itsipa. Piveshireimenteari aparoni, irinti itsipa, eiro. Aisati ariorica pishintsiventeri quirequi, eiro pimatirotsi pishintsiventeri Tasorentsi.

Yora Jesoshi yoametaqueri variseopee icoacaqueriri Tasorentsi.

¹⁴ Ari iquemajeitaqueri variseopee icantaqueriri Jesoshi, irosati ishirontimentajeitancari. Icoaque irashitaarantea oshequi, irootaque ishirontimentantariri Jesoshi. ¹⁵ Ari icantiri:

—Picoajeitaque irijijeitempi atiri picameetsajeitaque, iro cantaincha iojeitaquempi Tasorentsi. Ineacameetsavetimpi atiri, iro cantaincha iotaque Tasorentsi te pincameetsajeiteji. ¹⁶ Peerani ocameetsatini piquemisantironi isanquenaren Moishishini aisati yora camantantatsiniri paviscotantajari. Iro cantaincha areetapaaca meeca Joa, yora vaotisatantatsiri. Onashita meeca icoacaajeitaquempi Tasorentsi. Yora Joa intanacaro icamantajeitaquempi cameetsatatsiri: irotaintsi impincatsariventajeitempi Tasorentsi. Icoasanojeiveta atiri irineeri. ¹⁷ Coajica ompeanajea quipatsi aisati inquite, iro cantaincha eiro opeatsi irointi isanquenare Moishishi: icoi Tasorentsi pincanteani pinquemisantero piotanteari cameetsa pisavique. ¹⁸ Tempa ocanti: “Eiro paimentarotsi pijina”. Ariorica pojoquero pijinasanori paantearori otsipa tsinane, paimentearo pijina. Aisati te oncameetsateji payero tsinane joquiriri ojime.

Yora Jesoshi iquenquetsatacotiri ashitaarantincari aisati Irasaro iriori.

(Mt. 19.1-12; Mr. 10.1-12)

¹⁹ Ari icantajeitiri Jesoshi:

—Itimi aparoni shirampari ashitaarantincari, oshequi iiitsaare cameetsamaotatsiri, oshequi yoaneencaca. Maaroni quitaiteriqui yoacaajeitacari ishaninca yoari pinatasanotachari. ²⁰ Itimi aisati ashinoncaasanotachari pajitachari Irasaro. Osoncayetanaque isompopee opatsaayetanaqueri. Ari isavicapiniveta anta iqueapinitinta ashitaarantincari ivancoqui. ²¹ Oshequi yashinoncaaca, aasanotaqueri itashe. Icoaveta iroajearome yoari yoariyetaqueri ashitaarantincari quipatsiqui. Aisati yora otsitipee yatsoyeta-paqueri ivatsaaropeequi. ²² Impoiji icamaque iriori. Ijatashitaqueri inampireepe Tasorentsi, yaavajiri, impoiji yaanajiri anta itiminta Avaramani. Ocameetsaitetinta catsini. Aisati icamaque yora ashitaarantincari. ²³ Oshequi yashinoncaaca meeca yora ashitaarantaveitachaniri anta Sharincaveniqui, oshequi ineacatsitacaro. Yamenanaque anta osamani itiminta Avarama. Ineaqueri Avarama, jeri aisati yora Irasaro.

²⁴ Icjamacotaqueri: “Apa Avarama, pineshinoncatajena. Pincanteri yora Irasaro irovinquerota iracotsapaqui nijaqui, impoqueta aca nantsotantearori nija. Oshequi catsini nashinoncaaca aca paamariqui”. ²⁵ Iro cantaincha icantaqueri Avarama: “Notiom, pinquenqueshiretea jaoca ocantani peerani pitimaveitani quipatsiqui. Cameetsa pisaviquini catsini, irintquea Irasaroca oshequi yashinoncaaveitani. Meeca cameetsa isavicapaaque irinti, irompa avinti oshequi pashinoncaaca. ²⁶ Aisati pineaquero nijantaitetacotaquempi, tecatsi inquenashitantempi Irasaro. Aisati avirori, tecatsi pinquenashitantenari”. ²⁷ Ari icantiri: “Eirorica pimatirotsi pincavintsayena. Iro cantaincha pintianqueri Irasaro quipatsiqui: anta ivanconiqui apani. ²⁸ Aneatsiquera anta iyepee, icarati apapacoron. Nocoaque inquemisantacaapajeri, ipoquicari aca. Pamene meeca narori, oshequi noquematsicatacaro catsini”. ²⁹ Iro cantaincha icantiri Avarama: “Otomi isanquenare Moishishi aisati isanquenare itsipapee quenquetsatacantantatsiniri. Irootaque inquemisantajeiteri irointi”. ³⁰ Ari yacanaqueri: “Je, ainiro onaveta. Iro cantaincha ariorica irineajeri camaintsiri intinaanaje, aitaque inquenqueshirejeitanajea, irojocajero caari cameetsatatsi yantajeitiri”. ³¹ Icantiri Avarama: “Terica inquemisantero sanquenarentsi, eiro aisati iquemisantiritsi tinaajantsineri”.

Icantiri Jesoshi iroamerepee: “Pantacairicari pishaninca caari cameetsatatsi”.

(Mt. 18.6-7; Mr. 9.42)

¹ Icantajeitiri Jesoshi iroamerepee:

—Noncamantempi: incanteani intime atiri antacaajeiterineri ishaninca caari cameetsatatsi. Iro cantaincha iroashinoncaajeiteri Tasorentsi yora antacairiri ishaninca caari cameetsatatsi. ² Aitaque iroashinoncaasanoteri antacaajeitiriri jananequipee caari cameetsatatsi. Oncameetsateme irijivataqueme iroisoyeeterime mapiqui antearo, irovincanteetearirime. Irovunqueeterime, eiro yantacairime jananequi caari cameetsatatsi. ³ Queariompia, pantacairicari pishaninca caari cameetsatatsi.

Icantiri Jesoshi: “Pincavintsaapiniteri antitapinitimpiori paitapeerica”.

(Mt. 18.21-22)

Aisati icantiri:

—Arriorica pineacotaqueri pishaninca yantiro caari cameetsatatsi, pinquenqueshire-tacayeari. Arriorica irojocajero yantiri, pincavintsayeri, paacameetsatajeri. ⁴ Arriorica inquishemi pishaninca, incoshitempi, incantimatempi, paitarica. Iro cantaincha arriorica incantempi: “Te oncameetsateji nantitaquemperi, pincavintsayena”, ari no-coaque pincavintsayeri. Arriorica oshequi irampiitajero irantitajempiro, aisati oshequi incantempi: “Pincavintsayena”. Ari nocoaque oshequi pincavintsayeri aisati, eiro piquishimentiritsi.

Icantiri Jesoshi: “Arriorica pinquemisante, oshequi irimatempiro Tasorentsi paitarica pincoacoteriri”.

(Mt. 21.22; Mr. 11.22-26)

⁵ Yora iroamerepee icantaqueri Avincatsarite:

—Noquemisantaveta. Nocoaque poametena nonquemisantasnotantajeari.

⁶ Ari yacanaqueri:

—Pinquemisanteme capichaji, pincoaquericame, pincanterime Tasorentsi impon-quitireajero inchatora, iroviincaitero anta incajarequi. Ari inquemisantempime, irovi-incaiterome.

Icanti Jesoshi: “Avirojei piquempejeitacari iratirite Tasorentsi”.

⁷ Aisati icantajeitiri Jesoshi:

—Oquempetaca itimi shirampari iratirite. Itsameetapinitiniri aisati yamenapinitiniri ivira. Arriorica impocaje iratirite pancotsiqui, ¿paita incantavaqueriri ivatorote? ¿In-canterimpa: “Caate, pisavicaree, poapeempa”? Eiro icantiritsi. ⁸ Tempa incanteri ivatorote: “Meeca povetsiquenarota noyeari, aisati nireri. Pamaquenaro. Arriorica nonquemanaquea, ari poyea avirori, aisati pire”. ⁹ Aisati eiro icantavetaritsi: “Ariove, pimataquenaro”; tempa yametacaro yantaveetapinitiniri ivatorote. ¹⁰ Aisati aviror-ijei, ocameetsati pimatapinijeiteneri maaroni icoacaaquemperi Tasorentsi. Impoiji oncameetsate pincante: “Apatiro nomataqueneri icoacaaquenari. ¿Paita noshemetan-teari? Te noncoyeji noncoacoteri Tasorentsi impinatena”.

Yoavisacojeitiri Jesoshi 10 patsaajeitatsiri.

¹¹ Ari yovaanaja Jesoshi, iquenayetanaque Samariaqui aisati Carireaqui. Ishiretaca irareetea Jerosarequi. ¹² Ari yareetapaaca pashiniqui nampitsi, ineajeitavaqueri patsaa-jeitatsiri, icarajeiti 10. Icatiajeitaca aquietiji ara. ¹³ Icajemacojeitaqueri:

—Jesoshi, aviro nopincatsajeitiri, pincavintsaajeitena, poavisacojeitena.

¹⁴ Ari ineantacariri Jesoshi, icantajeitiri:

—Pijajeite anta itiminta saserote, pinijapeempari.

Ari iquemisantajeitaqueri, ijajeitanaque. Anta nianqui avotsi yavisacojeitanaji. ¹⁵ Ari iojeitaque yavisacojeitaji, iro cantaincha ipianaja aparoni anta Jesoshiqui. Antearojenca icantaque:

—Tempa icameetsataque Tasorentsi, yoavisacotaquena.

¹⁶ Itiyeroashitapaacari Jesoshi, yoivotasanotashitacari, ipincatsatasanotaqueri, ipa-sonquitasanotaqueri. Iponeaca yoca shirampari Samariaqui. ¹⁷ Ari icanti Jesoshi:

—Tempa icarajeiti noavisacojeitiri 10. ¿Jaoca itsipapee noavisacojeitiri?

¹⁸ Ipiashitajana yoca pashinisati atiri, ipasonquitaquena, aisati ineacameetsatiri Tasorentsi. Irintipee ashancasanoripee, ¿paita caari ipiantaja impasonquitanteariri Tasorentsi?

¹⁹ Impoiji icantiri tiyeroashitacariri:

—Meeca pincatiaje, ocameetsati pijataje. Pishiretacari Tasorentsi, irootaque pavisacotantajari.

Yoamejeitiri Jesoshi atiri jaoca icantari Tasorentsi ipincatsariventanti.

(Mt. 24.23-28, 36-41)

²⁰ Ari yora variseopee isampijeitiri Jesoshi:

—¿Jaoca oncarate impoque Tasorentsi impincatsariventajeitajee?

Ari yacanaqueri:

—Ariorica impincatsariventante Tasorentsi, iro cantaincha eiro pineasanotiritsi.

²¹ Eiro pimatirotsi pincante: “Jeri yoca”, aisati: “Jeri yonta”. Queario, eiro iconijatasanotitsi: ocameetsataque pimpincatsashireajeiteri maaroni.

²² Aisati icantajeitiri iroamerepee:

—Tempa noponeaca inquitequi, natiritapaaque, iro cantaincha eiro nocantani quiso noajempi. Coajica pincoajeivetanaquea pineajename aisati, iro cantaincha eiro pineajanatsi. ²³ Impoiji incanteetempi: “Ipiaja Jesoshi, itimi anta”, pashini incanteete: “Jeri yora”. Iro cantaincha caarina. Eiro patsipetashitatsi pijatashitena. ²⁴ Ariorica omoncaratasanotaquea nompocanteeari, ari piotasnotavaquena. Iquempetaca te irimaneaji itirei, aisati iporequi; aisati nonquempetajea narori, nompocajerica. Eiro nomanapaatsi, eiro picomitavaquena. ²⁵ Nojivatavaqueta nonquematsicatavaquearota oshequi, aisati intseencajeitavaquenata savicajeitatsiri. ²⁶ Oquempetaca peerani itimantacari Noeni itseencajeitaqueri Tasorentsi, aisati inquempejeitea ariorica nompiaje narori, intseencajeite atiri maaroni. ²⁷ Yoapinijeita peerani, irapinijeiti, yaapinijeitiro ijinapee, yaacaayetiro irishintopee, paitapeerica. Icantajeitani, irosati itetantanaca Noe ivitoqui. Impoiji opoqui antearo incani, incajaretanaque maaroni. Icamajetanaque maaroni tseencajeitantsiri. ²⁸ Aisati iquempejeitacani ishaninca Oroti, savi-cajeitatsiniri Soromaqui: yoapinijeita, irapinijeiti, iquenayetanaque iyompariyetanaca, ipanquiyetiro yoari, yovetsicanontayeta ivancopee. ²⁹ Iro cantaincha ijatantanacari Oroti, itiancaquero Tasorentsi oshequi paamari, itaajeitaqueri maaroni soromasatini. Itseencajeitini, irootaque ipoyereajeitantaracariri Tasorentsi maaroni, poyere. ³⁰ Aitaque oncanteari ariorica nompiaje. Intime oshequi tseencantatsineri, eiro iquenqueshiretiritsi Tasorentsi. ³¹ Pamene, ariorica omoncarataquea nompocantajeari, pintimerica saiteriqui, eiro piqueapanajantitsi pancotsiqui paantapanajantearori pivaararo. Aisati, pintimerica oantsiqui, eiro pipiapanajantatsi nampitsiqui paantapanajantearori pivaararo. ³² Piquempetarocari ijinani Oroti, pipitsoquicari. ³³ Picoicari poavisacotajea avisati, impoiji pijaticari Sharincaveniqui. Iro cantaincha ariorica pincamiento narori, pincantaitatiyempani pisaviquimotena inquitequi. ³⁴ Ariorica nompocaje, intime apite maatsineri imaamentoqui. Aparo naanajeri nontsipatanaqueari, irinti itsipa, eiro naanajiritsi. ³⁵ Ontime apite tsinane ontsipatavacaquea ontononquero tirico. Aparo naanajero nontsipatanaquearo, irointi otsipa, eiro naanajirotsi. ³⁶ Intime apite shiram-pari anta oantsiqui, intsipatavacayea intsameete. Aparo naanajeri nontsipatanaqueari, irinti itsipa, eiro naanajiritsi.

³⁷ Ari iquemajeitantaracariri iroamerepee, isampitiri:

—Novincatsarite, ¿jaocampa pinijantajeari oca picantaquenari?

Yacanaqueri:

—Jaocarica anta intimeri tseencantatsiri, yora iroashinoncayeri Tasorentsi.

18

Yora Jesoshi iquenquetsatacotiri yora joeshi caari cameetsatatsi.

¹ Pashiniqui quitaiteri iquenquetsatacaajeitiri aisati Jesoshi iroamere. Icoaque iroameteri inquenquetsatacapinteri Tasorentsi, inquearioventajeitiero, eiro yoipacaa-jirotsi. ² Icantajeitiri:

—Itimini anta nampitsiqui yora joeshitatsiri, caari pincatsatiri Tasorentsi. Aisati te irioteniji incavintsayeri ishanincaphee. ³ Otimi anta inampiqui aparoni tsinane, camajimentaaro. Ojatashitapinivetari yora joeshi, ocantapinivetari: “Pamitacotena,

te oncameetsateji iquisapinitana yora itsipa shirampari". ⁴ Te incoaveteji yoranqui iramitacotero, iro cantaincha iquenqueshiretanaca: "Te nompincatsateriji Tasorentsi, aisati te nonintejji noncavintsayeri itsipapee noshaninca. ⁵ Iro cantaincha oshequi asherequena oca tsinane. Namitacoterota, impoiji eiro opocashitapinitajanatsi, eiro ashereapinitajanatsi aisati".

⁶ Ari icanti Avincatsarite:

—Pamene, te incameetsateji yora joeshi noquenquetsatacotiri, iro cantaincha yamita-cotaquero oca tsinane cantapinitiriri. ⁷ Irintquea Tasorentsi, icameetsataque. Ariorica incanteani incantapiniteri quemisantatsiri, tempa iramitacoteri. ⁸ Queariotaque oca noncamantempi: intsipaite iramitacojeiteri Tasorentsi maaroni quenquetsatacaa jeiterineri. Iro cantaincha ariorica nompiaje aca quipatsiquica ḡarimpa noneapeempi piquemisantajeiti, piquenquetsatacaa jeitiri Tasorentsi?

Yora Jesoshi iquenquetsatacotiri yora variseo aisati yora apatotiniriri oromasati quirequi.

⁹ Pashini aisati iquenquetsati Jesoshi. Iquenquetsatacotiri yora shemetatsiri, yora tseencajeitiriri itsipapee ishaninca. Icantiri:

¹⁰ —Ijataque apite shirampari ivancoqui Tasorentsi, inquenquetsatacayeri Tasorentsi. Variseo ini aparo, irinti itsipa yapatotiniri oromasati iirequite joriopee. ¹¹ Ari icatiapaaca yora variseo, icantavetapaacari: "Tasorentsi, ariove, oshequi nocameetsataque nainti. Tecatsi nante, te nonquempeteariji yora coshitantatsiri, yora amatavitantatsiri, aavion-catsiri ijina. Aisati te nonquempeteariji yora aitiriri noshaninca iirequite. ¹² Nametacaro maaroni tominco notitapinita apite quitaiteri, aisati nopaarantapiniyetimpilo maaroni naayetiri. Naaquerica 10, aparoni nopaquempi". ¹³ Irinti yora apatotapinitiniriri oromasati iirequite ishaninca, icatiapaaca irinti nijanteaji. Te irishemeteji irinti, irointi oshequi ipashiventacaacaro yantayetiri, irootaque caari yamenanta jenoqui, irointi iposanejitaca. Icanti: "Tasorentsi, pincavintsaajena narori, te noncameetsateji catsini, ainiro oshequi nantane". ¹⁴ Ari noncamantempi, oshequi onaveta irantane yora shirampari, iro cantaincha icavintsairi Tasorentsi. Ariorica impiaje ivancoqui iriotanaque ineacameetsatiri Tasorentsi. Irintquea yora variseo, te inquempeteariji. Eiro ineacameetsatiritsi Tasorentsi shemetatsiri. Irinti yora caari shemetatsi impeajeri pincatsaritajantsine.

Icoaque Jesoshi impocashijeiteri jananequipee.

(Mt. 19.13-15; Mr. 10.13-16)

¹⁵ Impoiji tsinaneppee amajeitiniri Jesoshi otomipee, ocoaque impamijeiteri aisati incanteri Tasorentsi iramitacoteri. Iro cantaincha ineantacarori iroamere, itsane-acovetacari impocashiteri. ¹⁶ Iro cantaincha icajemiri Jesoshi jananequipee, icantiri iroamere:

—Eiro pitsaneacotanaritsi, aitaque nocoaque impocashijeitena. Pineajeitaqueri irior-ijeji: te intseencajeitenaji, irointi ishirejeitaquena. Maaroni quempejeitaririri irineajeiteri Tasorentsi impincatsariventajeiteri. ¹⁷ Aisati, queariotaque oca noncamantempi: maaroni caari quempetari jananequi iriori, eiro ineiritsi Tasorentsi impincatsariventajeiteri.

Iquenquetsatacairy Jesoshi ashitaarantincari.

(Mt. 19.16-30; Mr. 10.17-31)

¹⁸ Pashini quitaiteri ijatashitaqueri Jesoshi aparoni ivincatsarite jorio. Icantapaaqueri:

—Oametanari, oshequi picameetsati. Pincamantena: ḡpaita nanteri nojatanteari anta inquitequi, noncantaitatiyempani?

¹⁹ Icantiri Jesoshi:

—᠁paita picantanari: "Picameetsati"? Itimi aparo cameetsatsiri, yora Tasorentsi.

²⁰ Piojeitiro maaroni icantiri Tasorentsi: "Eiro paimentarotsi pijina, eiro paimentaritsi pijime, eiro picoshitsi, eiro pitseeyacotaritsi pishaninca, pimpincatsateri piri, aisati pimpincatsatero piniro".

²¹ Yacanaqueri:

—Aitaque nocantani nomoncarataqueroni: nevancaritapaini, irosati meeca.

²² Iquemantacarori oca, icantiri Jesoshi:

—Apanivaniji pimatero aisati: pimpimantajeitero maaroni timimojeitimpiri, pimpa-jeiteri ashinoncaincari ovinaro. Ariorica pimatero oca ontine oshequi timimojeita-jempineri anta inquitequi. Ariorica pimpimantero pivaararo, pimpoque, pojatasano-tanaquena.

²³ Iquemantacarori oca, oshequi yoashiretanaca. Ashitaarantincari ini, te incoyeji impimantero irovaararo, iointi yompetanacaro. ²⁴ Ineaqueri Jesoshi yoashiretanaca, impoiji icanti:

—Opomerentsitimotacari ashitaarantincari irijate anta ipincatsaritinta Tasorentsi.

²⁵ Tempa opomerentsitimotari cameyo inqueero omoro quitsapi, iravisantanajeari. Irio-quea ompomerentsitimotasanoteari catsini irijate ashitaarantincari anta Tasorentsi.

²⁶ Ari isampitiri yora quemavaqueriri:

—¿Ariompa? Pomerentsitaca. ¿Janicampa meeca avisacotajantsineri?

²⁷ Yacanaqueri Jesoshi:

—Oca caari imatapiniti atiri, imataquero Tasorentsi irinti.

²⁸ Ari icantiri Petero:

—Oametanari, nojocajeitaquero maaroni noijajeitantaquempi.

²⁹ Yacanaqueri:

—Queariotaque oca noncamantempiri: te pantsipetashitearoji. Ariorica pojocajeitajero pivancopee, pijinapee, pirenipee, pitsiropee, piripee, piniropee, pitomipee, pishintopee: iro cantaincha irootaque pojocajeitanteeariri picoasanotaque impincat-sariventempi Tasorentsi, eiro patsipetashitarotsi. ³⁰ Aitaque impinataquempi Tasorentsi meeca aca quipatsiquica, aisati impinataquempi anta inquitequi: paneantasano-tajeari anta, pincantaitatiyempani.

Icamantajeitiri Jesoshi iroamere: “Noncame”.

(Mt. 20.17-19; Mr. 10.32-34)

³¹ Impoiji icajemaqueri Jesoshi iroamerepee, icantaqueri:

—Tsame ajajeite meeca Jerosarequi. Timatsi isanquenatacotaquenaniri peerani yora quenquetsatacantantatsiniri. Noponeaca inquitequi, natiritapaaque. Meeca anta Jerosarequi omoncarataquea maaroni isanquenatacotaquenaniri. ³² Iraacantena ashaninca arori, irayena itsipapee atiri. Irishirontimentajeitena, iroashinoncaajeitena, inquitiojena, ³³ impasanatena, iroyena. Oncaratapaaque mava quitateri, nontinaanaje aisati.

³⁴ Iro cantaincha te inquemajeitavaqueroji icantajeivetacariri, icomijeitavacaro.

Yoavisacotiri Jesoshi caari amenatsi.

(Mt. 20.29-34; Mr. 10.46-52)

³⁵ Ari icaantanaca Jesoshi, iquenanaque avotsiqui, irotaintsi irareetea nampitsiqui pa-jitachari Jerico. Itimi anta avotsinampiqui shirampari caari amenatsi, icoacotapinijeitiri avisayetatsiri irineshinocatanaqueri, impayetanaqueri quirequi. ³⁶ Ari iquemavaque caari amenatsi ipocajeitapaaque oshequi atiri. Isampitiri itsipa:

—¿Janica pocatsineri?

³⁷ Yacanaqueri:

—Coraque Jesoshi, yora nasaretesati, yojajeitiri oshequi atiri. Iravisanaje aca.

³⁸ Ari icajemacotavaqueri:

—Jesoshi, aviro ishanincani Iravirini. Pincavintsaanaquenave.

³⁹ Ari icantajeitiri jivajeitiriri Jesoshi:

—Pimajerete.

Iro cantaincha, aiquero icantanaitii:

—Jesoshi, pincavintsaanaquenave.

⁴⁰ Ari icatiapaaca Jesoshi, icantanaque:

—Pamaqueri aca.

Ari yameetaqueri. Impoiji isampitiri:

⁴¹ —¿Paita picoaqueri?

Yacanaqueri:

—Novincatsarite, nocoaque namenaje narori.

⁴² Icantiri:

—Ari, aitaque pamenaje meeca. Pishiretaquena, irootaque pavisacotantajeari.

⁴³ Irosati yamenantanaja. Ari yojatanaqueri Jesoshi, icantanaque:

—Yamenacaajana Tasorentsi, tempa icameetsataque.

Aisati iquempejeitacari maaroni amenajeitaqueri, icantajeitaque:

—Tempa icameetsataque Tasorentsi.

19

Yora Saqueo ineaqueri Jesoshi.

¹ Impoiji iquenanaque Jesoshi nampitsiqui, pajitachari Jerico. ² Itimi anta ashitaarantincari pajitachari Saqueo. Iriotaque iriori jivatacaajeitiriri yora apatotapinitiniriri oromasati iirequite jorio. ³ Icoaveta Saqueo irineerime Jesoshi, iro cantaincha te iranteariteji, icaajaniquitiji. Icarati oshequi atiri, yojocaaajeitavaqueri. ⁴ Ari ishianaca, ijivatanaque anta avotsiqui. Yataitapaquero inchato anta otsapiqui, anta inquenanaquenta Jesoshi. Iramenavaqueri inquenapaaque ishaaviji. ⁵ Ari yareetantapaacari Jesoshi, yamenapaaque jenoqui, ineapaaqueri, icantiri:

—Saqueo, pishintsite paniireapaaaje. Nocoaque meeca nosavique pivancoqui.

⁶ Ari ishitsuque yaniireapaaaji, icantaqueri:

—Tsamequeti novancoqui.

Ari oshequi iquimoshiretanaque Saqueo, ⁷ iro cantaincha iquisajeitanaca amenajeitaqueriri. Icantajeiti:

—Te incameetsanirotejive yora. ¿Paita ijatashitaririri Jesoshi anta ivancoqui?

⁸ Ari iquempejitasanotapaacari Saqueo Jesoshi, icantiri:

—Novincatsarite, meeca nompaarantajeitajeri ashinoncaincari cashetani timimojetanari. Itimirica atiri namatavitiri nocoshitancariri, noimpajeneri maaroni, aisati nompajeri aisati. Ocaratirica aparo nocoshitaqueri, nompajeri 4.

⁹⁻¹⁰ Ari icantiri Jesoshi:

—Meeca quitaiteri pavisacotaji, aisati iravisacotaje pishaninca aca pivancoqui. Nonponeaca narori inquitequi, natiritapaaque: nocoaque namenacaajeitajeri ashinoncaajeitachari, nocoaque noavisacojeitempi maaroni. Tempa aviro ishanincani Avaramani.

Yora Jesoshi iquenquetsatacotiri pincatsari paqueriri ishaninca quirequi.

(Mt. 25.14-30)

¹¹ Ari iquemajeitaquero atiripee icantaqueri Jesoshi. Aisati iojeitaque irotaintsi irareetea Jerosarequi. Ijitalshijetaca irotaintsi meeca impoque Tasorentsi impincatsariventante aca quipatsiqui, ¹² irootaque ishiacantiniriri oca:

—Itimini aparoni shirampari, pincatsarivetachari. Impoiji icajemaqueri pashini pincatsari anta pashiniqui quipatsi. Ari irijatanaque, impeaqueri pincatsarisanori impincatsariventantejiriri ishaninca anta inampiqui. ¹³ Ari irotaintsi irijate, icajemaqueri iratirite caratatsiri 10, ipajeitaqueri oshequi quirequi. Icantaqueri: “Jerica aparoni quirequi, ipinataca oshequi. Nocoaque piomparijeitea. Ariorica nompajie, namenapaajeri jaoca incarate quirequi pampatotenari”. ¹⁴ Ari ijatanaque impeantajeari pincatsari. Iro cantaincha te impincatsajeiteriji ishaninca, oshequi iquisajeitaqueri. Itiancayevetacari aparopee ishaninca, icantavetacari yora itsipapee pincatsari: “Te nonintajeiteji impincatsariventajeitena yoranqui, te incameetsateji”. ¹⁵ Iro cantaincha ipeaqueri pincatsari, impoiji ipianaja impincatsariventantejiriri. Icajemaqueraqueri iratiritepee: yora ipajeivetari iirequite. Isampijetaqueri: “¿Pishequiaquenarimpa noirequite?” ¹⁶ Ari icantiri yora jivatatsiri: “Pamene, meeca noshequiasanotaaqueri quirequi. Aparo ishequiasanotanaque, icarataque meeca 10”. ¹⁷ Ari icantiri pincatsari: “Cameetsataque. Oshequi piotaque. Piquearioventanaro capichaji. Meeca nonpeaumpi pincatsariventeroneli oshequi nampitsi, oncarate 10. Pinquearioventanaro pimpincatsate”. ¹⁸ Ari ipocapaaque itsipapee, icantajeitapaaqueri: “Jerica piirequite. Pipaquenari aparo, meeca icarati apapacoroni”. ¹⁹ Icanti: “Ari pimpincatsariventeri

atiri savicatsiri apapacoroni nampitsi". ²⁰ Impoiji ipocaque itsipa aisati, icanti: "Novincatsarite, jerica piirequite pipaquetari chapinqui. Noquempoyeaquempi novaniotequi. ²¹ Oshequi notsaroacaquempi, niotaque oshequi pipincatsaritaque. Paapitsatiri itsipapee yashiyetari, aisati paayetiro oitsoqui caari pipanquiti". ²² Impoiji icantaqueri: "Te pincameetsateji, te pimatenaroji noocoacaavetaquempi. Picantavetana: 'Oshequi pipincatsariti, paapitsatiri itsipapee yashiyevetari, paayetiro oitsoqui caari pipanquiti'. Ari pioveta, irootaque noquisantaquempi meeca. ²³ ¿Paita caari poantari noirequite vaancoqui? Poquerime anta, ari intimeme meeca noirequite, aisati itsipa quirequi impaquetarime yora quempoyeajananiri". ²⁴ Irosati icantantari yora catiajeitainchari: "Paapitsatajeli noirequite. Pimperi yora ashitariri 10". ²⁵ Ari icantajeivetari: "Novincatsarite, oshequi iirequite meeca. ¿Paitaquea pimpashitanteeariri itsipa aisati?" ²⁶ Yacanaqueri: "Noncamantempi, intimerica ashitaarantayetachari, nompajeri aisati. Iranti yora caari ashitaarantacha, naapitsatajeli ora capichaji timimovetariri. ²⁷ Aisati itimi quisaqueunari caari coatsine impincatsajeitena. Pamajeitaquenari, namenacojetempi poajeiteri".

Irootaque iquenquetsatacaajeitiriri Jesoshi atiripee.

Yareetapaaja Jesoshi Jerosarequi.

(Mt. 21.1-11; Mr. 11.1-11; Joa 12.12-19)

²⁸ Impoiji yovaanaja aisati Jesoshi, irijate Jerosarequi. ²⁹ Irotapaintsi irareetearo nampitsi pajitachari Vetajaje aisati Vetania. Otimi anta toncaariqui pajitachari Orivomashi. Impoiji itianquiri iroamere apite, ³⁰ icantaqueri:

—Pijate anta nampitsiqui, pineapaaqueri voro itsatacotaca anta. Tequera inquijacoyeeteari. Pintsatacoreapaaqueri, pamaquenari. ³¹ Ariorica irisampiyeetempi: "¿Paita pitsatacoreantariri?" Ari pincanteri: "Icoqueri Avincatsarite".

³² Ari ijajeitanaque apite, ineapaaqueri icantaqueririri Jesoshi. ³³ Ari itsatacoreapaaqueri. Irosati isampitantacari ashitariri:

—¿Paita pitsatacoreantariri novorote?

³⁴ Yacanaqueri:

—Icoqueri Avincatsarite.

—Ari, paanaqueneri.

³⁵ Ari yaanaqueri anta Jesoshiqui. Yoanquetaqueneri imititsaqui iitsaarepee irisavicantereji Jesoshi, impoiji inquijacotanacari. ³⁶ Ari yovaacotanaja anta avotsiqui, yoajeitiniri atiripee iitsaarepee avotsiqui, iraniantanaqueari voro. ³⁷ Ari intanacaro meeca yoirincacotanaja. Yojajeitanaqueri oshequi quemisantajeitatsiri, iveshireimentajetanacari, icajemajeitanaque. Icantajeitanaque:

—Tempa icameetsataque Tasorentsi. Aneajeitaqueri itasoncaventapinijeitaquee.

³⁸ Icameetsataque Avincatsarite itianqueerri Tasorentsi. Cameetsa isavicajeitaque maaroni inquitesati, ineacameetsajeitaqueri Tasorentsi.

³⁹ Ari itimaiti anta variseopee, icarajeitaqueri atiripee. Icantavetari Jesoshi:

—Oametantatsiri, poimajerentajeiteri yora oijajeitimpiri.

⁴⁰ Yacanaqueri:

—¿Paita noimajerentanteariri? Ocameetsataque icantajeitaqueri. Irimajerejeiteme yocapee, iointi irineanatacaqueme Tasorentsi mapipee ompincatsatantenameri.

⁴¹ Ari iquempejijeitapaaque, meeca oconijatapaaque Jerosare. Iraacojeitaqueri Jesoshi savicajeitatsiri, ⁴² icanti:

—Nocoavetaca nosavicacaajeitimpime cameetsa catsini, iro cantaincha te pincoajeiteji. Pitseencajeitaqueña, meeca eiro pineanatsi nompincatsariventajeitimpire.

⁴³ Coajica intime quisasanojeitimpineri, inticasanojeitapaaquempi, irishoncajeitapaaquempi soraropee, eiro ishinejeitimpitsi pinquenanaje jaocarica. Irimajerejeitempi,

⁴⁴ intireajeitajero pivancopee, intireasanojeitajero catsini. Irovaaranteri savicajeitatsiri. Nopocashijeivetaquempi, nompincatsariventajeitimpime, iro cantaincha te pimpincatsajeitavaquenaji, iointi pitseencajeitavaquena. Irootaque inquisajeitantempiri coajica soraropee.

*Yora Jesoshi iquisajeitaqueri pimantayetatsiri anta ivancoqui Tasorentsi.
(Mt. 21.12-17; Mr. 11.15-19; Joa 2.13-22)*

⁴⁵ Ari yareetapaaca Jesoshi ivancoqui Tasorentsi, yaajeitapaaqueri pimantayetatsiri aisati amanantayetatsiri, yojocajeitaqueri saiteriqui. Itsoncajeitaqueri maaroni, ⁴⁶ icantaqueri:

—Tempa osanquenataca irineane Tasorentsi: “Nocoaque inquenquetsatacapinijeitena atiri aca novancoquica, irootaque novetsicacantantarori”. Iro cantaincha avirojeitaque amatavitantatsiri, pipeaquero pivanco avirori.

⁴⁷ Impoiji ipiapinita maaroni quitaiteri ivancoqui Tasorentsi, yoametantapinitaque. Iro cantaincha iquisajeitaqueri yora jivatacaa jeitiriri saserotepee, yora oametantirori isanquenareni Moishishi, aisati yora pincatsariventajeitiriri savicajeitatsiri. Isampitavaa jeitaca:

—Jaoca ancanteriri Jesoshi, avacantanteeariri?

⁴⁸ Iro cantaincha te iriojeiteji jaoca ancanteriri, tempa itimi oshequi atiri pincat-sajeitiriri, quemisantajeitiriri.

20

Isampitiri Jesoshi: “¿Janica tiancaquemperi?”

(Mt. 21.23-27; Mr. 11.27-33)

¹ Ari pashini quitaiteri itimi Jesoshi anta ivancoqui Tasorentsi yoamejeitaqueri atiripee, icamantaqueri jaoca incantajeiteari iroavisacotantajeari. Ari ipocajeitaque yora jivatacaa jeitiriri saserotepee, yora oametantirori sanquenarentsi, yora jivatacaa jeitantsiri, maaroni. ² Icantajeitapaquaqueri:

—Pincamantajeitena janica peaquemperi pincatsari: ¿janica tiancaquemperi pantayetantarori oca?

³ Yacanaqueri:

—Aisati narori, timatsi nosampijeitempiri. Pincamantajeitena: ⁴ ¿janicampa tiancaqueririjoia ivaotisatanti? ¿Iriompa Tasorentsi tiancaqueririjoia? Terica, ¿iriompa tianquiririjoia?

⁵ Te irancajeiteriji, irointi icantavacaajeitanaca:

—¿Paita ancanteriri? Ancanteririca: “Irio Tasorentsi tianquiririjoia”, icantajeiteecari: “¿Paita caari piquemisantantari?” ⁶ Irompa ancanteririca: “Irio atiri tiancaqueririjoia”, tempa inquisajeitaquee atiripee. Ipitseecari. Icantajeitaque iriori itiancaqueri Tasorentsi Joa ivaotisatanti.

⁷ Ari impoiji icantajeiti:

—Te niojeiteji janicarica tiancaqueririjoia Joa.

⁸ Irosati icantantari Jesoshi:

—Aisati narori, eiro nocamantimpitsi janica tiancaquenari.

Yora Jesoshi iquenquetsatacotiri yora panquitirori ova.

(Mt. 21.33-44; Mr. 12.1-11)

⁹ Impoiji aisati iquenquetsatacaajeitiri Jesoshi atiri, jero oca ishiacantiniri:

—Itimini panquitirori ova anta iipatsitequi. Impoiji icantaqueri iratirite: “Pamenenarorica, coajica ariorica oitsoquitanaque, paaqueyea avirori cashetani oitsoqui, cashetani pimprena narori”. Icantajeiti: “Ari cameetsa”. Impoiji ijatanaque pashiniqui quipatsi, peerani ipeaca. ¹⁰ Impoiji omoncarataca irayetero oitsoqui. Yora ashitarori irovate itianque yora inampire: “Pijataite anta otiminta novate, picoacotaiteri yora amenanarori imhaarantena cashetani”. Ari ijavetaca, iro cantaincha iquisajeitaqueri, ipasanatavaqueri, yoipiavajiri. Tecatsi impavaqueri. ¹¹ Impoiji itiancavetacari pashini inampire, iro cantaincha ishirontimentavacari, ipasanatavaqueri, yoipiavajiri. Tecatsi impavaqueri. ¹² Impoiji itiancavetacari pashini aisati, iro cantaincha ipasanayetavaqueri, tac, tac, oshequi irirajanive. Yojocanajiri aisati. ¹³ Iotantacari yora ashitarori, icanti: “¿Paita nanteri meeca? Irioyeata nontianqueri notomi nonintasanotiri. Ariorica irineajeitaqueri irinti, impincatsatavaqueri”. Ari itiancavetacari iriori.

¹⁴ Ineantajeitavacariri, icantavacaajeitanaca: “Pamenerite itomi ashitarori iipatsite.

Ariorica incame iriri, iriotaque ashitajearoneri. Tsame avavaqueri, impoiji ashijejitajearo ainti quipatsi". ¹⁵ Ari yaajeitavaqueri, shepi. Yaajeitanaqueri anta ocaratapaaque iipatsite, yoajeitaqueri, shemi.

Irootaque iquenquetsatacaajeitaqueriri Jesoshi. Impoiji isampijeitiri:

—Aamaaca, *¿jaoca incanteriri yora ashitarori iipatsite?* ¹⁶ Tempa irijate iriori, inquisasanojeitaqueri tsameevetanariri iipatsite, iroapaaqueri. Impoiji iramenaje pashini tsameetajenerine.

Ari icantajeiti quemajeitaqueriri:

—Te oncameetsateji irimajeitero oca, eiro ishinetiritsi Tasorentsi.

¹⁷ Yamenajeitaqueri Jesoshi, icanti:

—*¿Pijivetacampa eiro imatirotsi?* *¿Paitampa otimantacari oca sanquenarentsi?* Tempa ocanti: "Itseencaquero yora vetcicavetarori pancotsi otincami, yojocajiro. Iro cantaincha ipeaquero Tasorentsi antearo otincami pancotsi". *¿Paita oshiacantiri?* ¹⁸ Incarajaque maaroni pariatsiri mapiqui, ariorica ontsinacapaaqueri atiri oca mapi, ompeaqueri ovane quipatsi, ontsoncaqueri. Narotaque shiaquerori mapi: nompoyereajetaqueri maaroni quisajeitaquenari.

Yoametiri Jesoshi atiri inquemisanteri pincatsari aisati inquemisanteri Tasorentsi.

(Mt. 21.45-46; 22.15-22; Mr. 12.12-17)

¹⁹ Yora jivatacaaajeitiriri saserotepee, aisati yora oametantirori Sanquenarentsi icoajeiveta irayerime meeca Jesoshi, tempa iojeitaque ishiacaventiri iriori. Irayerime, iro cantaincha itsaroacaajeitacari atiripee, icanti: "Eiro airitsi, iquisacoventaricari ashanincapee". ²⁰ Impoiji itiancaqueri saserote ishaninca:

—Meeca pijate pamatavitateri yora Jesoshi. Pishiacantamempeapeempa picoaque pinquemisanteri, iro cantaincha, pincomitacayeari irineane. Ariorica incomitanaquearo incanteri, pishintsite pimpoque pincamantapeena. Impoiji ancamanteri pincatsari icantaqueri.

²¹ Ari ijatashitaqueri Jesoshi, icantapaaqueri:

—Oametanari, niojeitaque oqueariotasanoque maaroni picantaquenari aisati maaroni poametaquenari. Te pamenashiteariji ashaninca piotanteari icameetsatirica, irointi piotasanoquaqueri iquenqueshiretiri. Aisati cameetsa poamejeitaquenaro icoacaajeitaquenari Tasorentsi. ²² Meeca pincamantena: *¿ocameetsatimpa ampajejiteri yora ivincatsarite oromasati airequite icoacotaqueeri?* *¿Eirompa apiritsi?*

²³ Ari iotaqueri Jesoshi icoajeiveta iramataviterime. Icantiri:

—*¿Pataquea picoantari pincomitacayenaro noneane?* ²⁴ Poniajayenari iitsoqui piirequite. *¿Janica ishiavorotaqueri aca quirequipi?* *¿Janica ashitarori ivajiro isanquenataqueri?*

Yacanaqueri:

—Iro ivoro ivincatsarite oromasati, aisati osanquenataca ivajiro: yora Sesari.

²⁵ Ari icantiri Jesoshi:

—Ocameetsataque pimpincatsateri yora Sesari, iro cantaincha ocameetsataque aisati pimpincatsatasanoteri Tasorentsi.

²⁶ Tecatsi icantajeitea incomitacayeari irineane Jesoshi, cameetsa yoametantasanoque. Yoajeitanaqueri cavaco yora amataviterinemerri, irootaque imajerejeitancacari. Tecatsi incantajeri aisati.

Yoamejeitiri Jesoshi saroseo: "Queario intinaajeitaje camayetainchari".

(Mt. 22.23-33; Mr. 12.18-27)

²⁷ Impoiji ijatashitaqueri saroseo Jesoshi. Icantaque iriori saroseo eiro itinaajeitajatsi camayetatsiri, eiro ijajeititsi inquitequi. Ari icantapaaqueri:

²⁸ —Oametanari, peerani isanquenataqueroni Moishishi. Icanti ariorica iraavetearo shirampari ijina, impoiji incamaque. Eirorica itimacairo ijananequite, cameetsataque irajero irirentini. Impoiji intimerica otomi irishiacantajeri itomini irirentini.

²⁹ Ariorica itimi shirampari irirenti 6. Yaavetaro ijina, impoiji icamaque. Te intimeji itomi. ³⁰ Impoiji yaavetajaro iriori irirentini. Aisati te intimacayeroji ijina itomi, impoiji

icamaque iriori, toren. ³¹ Aisati iquempetaca pashini irirentini. Yaavetajaro tsinane, impoiji aisati icamaque. Aisati iquempejeitaca maaroni irirentini. Tecatsi timacayerone otomi. ³² Ari impoitanaque iroori tsinane, ocamaque. ³³ Meeca pincamantena: queari-orica intinaajeitanaje maaroni camajeivetainchari, *¿janica jinantajearone oca tsinane?* Tempa icarajeiveta aayevetaroniri 7.

³⁴ Ari yacanaqueri Jesoshi:

—Queario, aca quipatsiqui yamejeitacaro shirampari yairo ijina. Aisati tsinanepee aajeiti ojime. ³⁵ Ari irointinaajeitajeri Tasorentsi maaroni atiri ineacameetsatiri, iro cantaincha anta inquitequi eiro yaajitsi ijina. Aisati tsinane, eiro aaajitsi ojime. ³⁶ Aisati eiro anta icamajitsi aisati, inquempejeiteari maaroni inampirepee Tasorentsi, sav-iquimojeitiriri: te incamajeiteji iriori. Icantani yaneajeiti. Aisati intomintasanojeiteari maaroni atiri yora irointinaajeitajeri. ³⁷ Peerani iotitani Moishishini intinaajeitanaje camayetatsiri. Iquenquetsatacotantarori totseequi otaavetaca, iquenquetsatacotiri aisati Avincatsarite. Icantini: “Iquemisantiri Avarama Tasorentsi. Aisati Isaca iquemisantaqueri, jeri aisati Jacovo”. ³⁸ Pineaquero, te incanteji: “Iquemisantaveitarini Avaramani”. Yaneanaji Avarama aisati itsipapee, irootaque icantantacari: “Iquemisantiri”.

³⁹ Impoiji icantayetiri aparopee oametantirori sanquenarents:

—Oametanari, cameetsa oca picantaqueriri.

⁴⁰ Ari itsaroacaajeitacari irisampitajerime aisati.

Yora Quirishito irio ishanincani Iravirini.

(Mt. 22.41-46; Mr. 12.35-37)

⁴¹ Pashini aisati icantaqueri Jesoshi:

—*¿Paita picantajeitantzari: “Iriotaque Quirishito ishanincani Iravirini”?*

⁴² Tempa peerani ipampoyeaventirini Iravirini Tasorentsi, isanquenataquero oca: “*Yora Tasorentsi, icantaqueri novincatsarite: ‘Notomi, pisavique aca nacosanoriqui, pincaratena ampicatsarijeite, ⁴³ irosati impincatsajeitantempi maaroni quisajeivetaquempi’*”. ⁴⁴ *¿Iriompa Quirishito ishanincani Iravirini? Iriorica ishanincani, ¿paita icantantariri peerani: “Novincatsarite”?* Te pamejeivetearoji pimpincatsajeiteri impoitatsiri itimi.

Icanti Jesoshi: “Paamayeariyea oametantirori sanquenarents, yamatavitimpicari”.

(Mt. 23.1-36; Mr. 12.38-40; Ir. 11.37-54)

⁴⁵ Impoiji iquemajeitaqueri atiri Jesoshi, yoamejeitaqueri iroamerepee, icantaqueri:

⁴⁶ —Paamayeariyea yora oametantajeitirori sanquenarents. Oshequi icoaque in-quenaquenatsantsanayete. Icoaque aisati cameetsa iraacameetsajeitavaqueri ishan-inca anta nampitsiqui. Aisati anta pancotsiqui apatojeitantapinitari, icoaque irisav-iquimotapiniteri pincatsaripee. Aisati ariorica yampatojeita atiri yoajeita, icoaque quiso iroapiniteri pincatsaripee. ⁴⁷ Oshequi ishiacantanirota. Osamani iquenquetsata-caamempeacari Tasorentsi. Icoaque irijitashijetanteariri ishaninca iquemisantasanoti. Iro cantaincha yamatavitapinitiro camajimentaaro, icoshitantarori timimojeivetarori. Queariotaque oca noncamantempi: iroasanquetaasanojeitaqueri Tasorentsi, catsini.

21

Iquenquetsataciro Jesoshi tsinane paqueriri Tasorentsi maaroni timimovetarori.

(Mr. 12.41-44)

¹ Ari isavicaque Jesoshi anta ivancoqui Tasorentsi. Yamenayetavaqueri ashitarantin-cari yamayetaqueri iirequite anta inantariqui quirequi. ² Aisati ineaquero camajimen-taaro amaqueri apite iitsoqui quirequi, caari pinatacha. ³ Icanti:

—Queario oca noncamantempi: pitseenquitirocari yoca amaqueri oca camajimen-taaro. Oshequi ineacameetsatitacaro Tasorentsi yoca amaqueri, anaacotaqueri yama-jeivetacari yora ashitarantincari. ⁴ Oshequi ivinaro yamavetacari iriori, iro cantaincha itimaarantaque oshequi catsini iquempoyeanontavajari iriori. Irompa oca, amaqueri maaroni timimovetarori, te aneajeriji timaarantajantsine, tecatsi amanantantearori oyeari.

Icanti Jesoshi: “Coajica intireetajero ivanco Tasorentsi”.

(Mt. 24.1-3; Mr. 13.1-4)

⁵ Ari iquenquetsatavacaajeitaca iroamerepee, icantajeiti:

—Tempa ocameetsatasanotaque ivancoca Tasorentsi. Aisati maaroni mapipee yovetsicantacarori, ocameetsajeitaque, aisati maaroni yoaneencajeitantarori anta otantoqui.

Iquemantajeitacariri, icantiri Jesoshi:

⁶ —Coajica intireetajero maaroni oca pineacameetsajeitiri meeca. Irojoqueetajero mapipeeca arejiqui.

⁷ Ari isampipeitaqueri:

—Jaoca oncarate omoncaratanteari oca picantaquenari? Aisati, ¿paita iota-caayenaneri irotaintsi omoncaratea?

Icantiri Jesoshi: “Coajica ompomerentsitimoteari atiripee”.

(Mt. 24.4-14; Mr. 13.5-8)

⁸ Icantaqueri:

—Paamayea, yamataviyeetimpicari. Impoche oshequi atiri cantempineri: “Naro nainti Quirishito”. Pashini incante: “Itiancaquena Quirishito noncamantempi irotaintsi impoche”. Iro cantaincha eiro piquemisantiritsi. ⁹ Pinquemapiniteri atiri incante irimanatavacaajeitea atiripee, aisati irojocajeiteri ivincatsarite. Iro cantaincha eiro pitsaroajeititsi. Aitaque incanteari inquisavacaapinijeitea, iro cantaincha tequera omoncarateaji.

¹⁰ Jero pashini icantaqueriri aisati:

—Yora atiripee irimanayeteri itsipapee atiri. Yora savicayetatsiri aparopeequi nampitsi irimanateri yora savicayetsiri pashinipeequi nampitsi. ¹¹ Aisati oshequi onicasanotanaquea quipatsi. Aajeiteri atiripee itashe, oshequi incamajeitanaque; aisati irojouijieitea itsipapee atiri, incamaarantayetanaque iriori. Aisati, anta inquitequi pineaquero caari pineapinijeiti, oshequi pintsaroacayearo.

Yora Jesoshi icantaqueri iroamere: “Coajica iraajeitanaquempi, inquisajeitempi atiripee”.

(Mt. 24.9-14; Mr. 13.9-13)

¹² Aisati icantajeitiri:

—Iro cantaincha irijivayeetempi inquisanayeetempi. Iraajeitanaquempi anta pancotsiqui yapatojeitantarri, aisati iroiminqueayetempi caravosoqui. Iraajeitanaquempi aisati anta pincatsaripeequivi, inquisatsajeitempi: “¿Paita piquemisantanirotantariri Quirishito?” ¹³ Iro cantaincha eiro pitsaroacaaritsi yora quisavetempineri, irointi pincamantajeiteri jaoca nocanta noavisacojeitaquempi. ¹⁴ Eiro piquenqueshiretitsi: “Ariorica irayeeten, ¿paita noncanteriri?” ¹⁵ Ariorica iraanajempi noamejeitempi nainti paitarica pincanteriri. Eiro imatirotsi yora quishempineri impiatsatempi. ¹⁶ Noncamantempi: iraacantempi piripee, piniropee, parentipee, pitsiropee, pishanincapee, maaroni. Iroaarantempi aparopee. ¹⁷ Iriojeitanaque atiri piquemisantaquena, irootaque inquisajeitatempi. ¹⁸⁻¹⁹ Iro cantaincha ariorica quiso poyena aisati pinquearioventenaro maaroni nocantajeitaquempi, nonquempoyeasanojeitaquempi. Tecatsi catsini incantajeitempi yora quishempineri, eiro yaapitsatimpirotsi aparoni piishi. Aisati pincantaitatiyempani pintime inquitequi.

Icanti Jesoshi: “Yora soraro intsoncajeiteri jerosaresati”.

(Mt. 24.15-22; Mr. 13.14-20)

²⁰ Aisati icanti Jesoshi:

—Ariorica pineajeitavaqueri soraro irishoncajeitaquearo Jerosare, ari piojeitanaque irotaintsi intsoncajeitajero pinampi. ²¹ Ocameetsati irishiajeitanaque toncaariqui maaroni savicajeitatsineri. Aisati maaroni savicatsineri Jore aqui, irishiajeitanaque. Aisati yora jayetatsineri oantsipeequi, eiro ipiajeitanaja nampitsiqui. ²² Aitaque omoncarataquea maaroni oca isanquenatiniri peerani: “Iroasanquetaasanojeiteri Tasorentsi maaroni tseencajeitaqueriri”. ²³ Ashinoncajeitanaquea maaroni tsinane tsomonteyetatsineri, aisati maaroni antsotaayeterineri ojananequite. Oshequi irineacatsiyetearo yora savicajeitatsiri. Oshequi iroasanquetaajeiteri Tasorentsi.

²⁴ Irimanajeiteri oshequi atiri, incamaarantayetanaque. Itsipapee iroisoyeteri, iraanajeri otsipapeequi quipatsi. Intime pashinipee atiri Jerosarequi peerani, irosati incantanteari Tasorentsi: "Moncarataca".

Iquenquetsatacotaja irisati Jesoshi, jaoca oncanteari ariorica impiaje.

(Mt. 24.23-31; Mr. 13.21-27)

²⁵ Jeroca icantiriri aisati Jesoshi:

—Pineajeitavaqueri impashinijeitanaque inquitesati: yora catsirincaiteri, cashiri, impoquiropee, maaroni. Pineero caari pineapinijeiti. Aisati intsaroajeitanaque maaroni atiri, inquemajetavaquero oneajatanaque antearoja incajare, soooo. Aisati irineavaquero antearoja otavoncrajare. Iramenajeitavaquero, sorererere. ²⁶ Eiro iojeitsitsi atiri jaocarica incanteeteriri, irootaque intsaroasanojeitantaqueeari catsini. Irishevayetanaquea impoquiro. ²⁷ Impoiji pineajeitavaquena, nompiaje aisati. Tempa noponeaca peerani inquitequi, natiritapaaque. Arriorica nompiaje aisati, nonquenapaaqe mencoriqui, nontasorentsitasanotapaaque, nompincatsaritasanotapaaque.

²⁸ Arriorica pineajeitavaquero oca nocantajeitaquempi, piveshireajeitanaquea, pame-najeitavaquena: irotantsi noavisacotasanojeitempi.

Icanti Jesoshi: "Irotantsi impoque Tasorentsi".

(Mt. 24.32-35; Mr. 13.28-32)

²⁹ Impoiji ishiacanticiniri oca:

—Ari pamenero iyera, jaoca ocantari. Terica iyera, ari pashini inchato pamenero. ³⁰ Arriorica ontimayetanaje oshi, eereshitanaje, ari piojeitaque irootimata-jantsi onquimojantsitaje. ³¹ Aisati oquempetaca, arriorica pineaquero omoncarataquea maaroni nocamantitanaqueempiri, piojeitaque irotantsi impincatsariventasanojeitempi Tasorentsi. ³² Arriorica pineajeitavaquero intanaquea oca nocamantaquempi, ari eirotsitarica picamitsi, aitaque pineajeitaquero omoncarataquea maaroni. ³³ Coajica, peerani, ompeanaquea quipatsi aisati impeajeitanajea maaroni inquitequiniri: cashiri, catsirincaiteri, impoquiropee, maaroni. Iro cantaincha eiro opeimatatsi irointi noneane catsini.

Icanti Jesoshi: "Paamaasanojeitajena".

(Mt. 24.36-44; Mr. 13.33-37)

³⁴ Aisati icantiri:

—Paamaasanojeitajena: nomapocapaimpicari. Piquenqueshiretirocari caari cameetsatatsi. Pishinquejeitacari. Piquenqueshiretapinitirocari timajeitatsiri aca quipatsiqui.

³⁵ Aitaque nomapocapaaqueri maaroni savicajeitatsiri quipatsiqui. Iroashinoncaajeitea maaroni caari aamaventajeitachane. ³⁶ Paamaventea. Aisati pincanteri Tasorentsi iramitacotempi cameetsa pareejitantaquenari, eirota piquematsicatarotsi maaroni oca nocamantaquempi.

³⁷ Ari maaroni quitaiteriqui yoametantaque Jesoshi anta ivancoqui Tasorentsi. Maaroni tsiteniriqui ijatapiniti anta toncaariqui ipajiyetiri Orivomashi. ³⁸ Aisati maaroni quitaiteriqui ijajeteitamanaji atiripee ivancoqui Tasorentsi iquemisantapinijeitiri.

22

Yoametavacaajeitaca saserotepee jaoca incantajeiteriri iraacantajeitanteeariri Jesoshi.

(Mt. 26.1-5, 14-16; Mr. 14.1-2, 10-11; Joa 11.45-53)

¹ Irotantsi quitaiteri yoapinijeitantarori tanta caari iconoyeeti tapiacairori. Yapi-itapinijeitiro joriopee maaroni osarintsi iquenqueshireanttarori peerani anta Ejipitoqui yavisajeitanajiro oantatsiri ivancopee. ² Ari yoametavacaajeitaca yora jivatacaajeitiriri saserotepee aisati yora oametantajeitirori sanquenarentsi:

—Jaocasa ancanteriri Jesoshi avanteariri? Aamaaca ari inquisacotanaqueeari atiripee.

³ Impoiji yora Satanashi ishinsinataqueri Jorashi Ishicariote, yora yoamevetacari Jesoshi: yoametaqueri iraacanteri. ⁴ Ari ijatashitaqueri yora saserotepee, icantapaaqueri:

—Namitacotempi paacanteri Jesoshi.

⁵ Iquemantavarcariri, iquimoshirejeitanaque, icantajeitavaqueri:

—Ari, cameetsa. Arriorica ayeri, ari nompinatempi quirequi.

⁶ Icanti:

—Ari. Namanasanoteri, impoiji noncamantempi jaoca pincanteari pimanacanteariri paacanteri. Eiroquea ineajeitiritsi atiripee.

Yora Avincatsarite yoacaacari iroamerepee.

(Mt. 26.17-19; Mr. 14.12-16)

⁷ Ari moncarataca meeca vieshita. Meeca yoacaajeitacari atiripee ovisha, iquem-petacari ishaninca peerani anta Ejipitoqui. ⁸ Ari Jesoshi itiancaqueri Petero aisati Joa, icantavaqueri:

—Pijate povetsicajeitapee avajeiteari, anquenqueshirejeiterota yavisantanacari peerani oamaantatsiri.

⁹ Isampitiri:

—¿Jaoca picoaqueri novetsiquerori?

¹⁰ Yacanaqueri:

—Ariorica pareeta nampitsiqui, pineapaaqueri shirampari yaacotanajiro nija. Poi-jatanaqueri anta pancotsiqui, jaocarica inqueapaajeri. ¹¹ Pincantapaaqueri yora ashitarori ivanco: “Icanti Avincatsarite: ‘¿Jaoca noacayeariri noamerepee?’ ” ¹² Ari ironijayempiro anta oshitamencotanta jenoqui. Ovetsicajeitaca asavicajeitanteeari. Ari povetsicajeitiero avirori avajeiteari.

¹³ Irosati ijajeitantanaca, ineajeitapaaquero icantaquerirri Jesoshi. Yovetsicajeitapaa-quero yoari.

Yora Jesoshi yoamejeitaqueri iroamerepee iroimentapiniteari tanta.

(Mt. 26.20-29; Mr. 14.17-25; Joa 13.18-30; 1 Cor. 11.23-26)

¹⁴ Impoiji yareejitapaaca maaroni, yoajeitapaaca. ¹⁵ Impoiji icantajeitaqueri Jesoshi:

—Oshequi nocoitacani tequeratani noncame, nontsipajeitanajempita meeca tsiteniriquica noacaajeitanajempita tanta. ¹⁶ Noncamantempi, eiro napiitajirotsi noajearo aisati aca quipatsiqui. Aintiquea noapaajero anta ipincatsaritinta Tasorentsí.

¹⁷ Ari yaaquero tsota, ipasonquitaqueri Iriri, impoiji icanti:

—Paacojeitavaquero oca, pirajeitiero. ¹⁸ Noncamantempi: eiro nirajirotsi ovaja aca quipatsiquica. Aintiquea nirapaajero aisati anta ipincatsaritinta Tasorentsí.

¹⁹ Impoiji yaaquero tanta, ipasonquitiri Iriri. Icarajaquero, ipajeitaqueri iroamere, icantiri:

—Jero oca tanta, poajeitearo. Narotaque camimentajeitelpineri. Nocoaque poap-initearo tanta pinquenqueshiretapinitantenari nocamimentajeitaquempi.

²⁰ Ari yoajeitaca, maaroni. Impoiji ipacojeitaqueri ovaja aisati. Icantajeitaqueri:

—Ariorica pirero oca, nocoaque piojeite nocamantajeitaquempi noavisacojeitempi. Irootaque niraja amparajatimentajeitelpineri, noncamimentajeitempi noavisacojei-tantempi.

²¹ Impoiji icantajeitaqueri:

—Timatsi acarajeitaqueri meeca avajeitaca yora aacantenaneri iroacantantenari.

²² Noponeaca inquitequi, natiritapaaque noncamimentajeiteri maaroni atiri, iro can-taincha irashinoncaasanoitaquea yora aacantenaneri iroacantena.

²³ Iquemantajeitaqueri, isampitavacaajeitaca:

—¿Janicampa aacantaniroterineri?

Yoamejeitaqueri Jesoshi iroamerepee jaoca incanteari impincatsaritanteeari.

(Mr. 10.42-45)

²⁴ Ari anta icantavacaajeitanaca iroamerepee:

—¿Janica coajica jivatacaajeiteeneri? ¿Janica anaacojeiteeneri impincatsaritasanote? ¿Naroitatsimpa jivatacaajeitajempine?

²⁵ Ari icantiri Jesoshi:

—Yamejeitaro yora atiripee ipincatsajeitaqueri ivincatsaritepee, iro cantaincha iper-anatapinijeitacari pincatsari ishanincapee. Jero icantashijeitaca: “Nintacojeitacari natiritepee”. ²⁶ Iro cantaincha eiro piquempejeitaritsi. Ariorica picoaque pimpincat-sariventante, eiro pishemetitsi, irointi pamitacotapiniteri itsipapee. ²⁷ ¿Janica ipincat-satasanotiri atiri? ¿Yorampa vetsicapinitiniriri yoari? Teve. Tempa ipincatsayeetiri

yora peranajeitariri inampirepee. Iro cantaincha te nomperanajeitempiji nainti, irointi nintacojeitaquempi. ²⁸ Quiso poajeitaquena peerani, piojeitaque opomerentsitimo-tapinijeitaquee. ²⁹ Irootaque nocantantimpíri meeca: oquempetaca incantena Apa nompincatsaritante, aisati noncantajeitempi pimpincatsarijeite. ³⁰ Pincaratapinijeitena avapinijeitea aisati irapinijeite anta nompincatsaritenta, aisati ampincatsariventajeiteri maaroni jorioppee.

Icantiri Jesoshi Petero: “Meeca tsiteniriquica pincantapinite: “Te noneeriji Jesoshi” ”.

(Mt. 26.31-33; Mr. 14.27-31; Joa 13.36-38)

³¹ Aisati icantiri Avincatsarite:

—Shimo, yora Satanashi icantaqueri Tasorentsi icoaque irineantempi, iriotanteari piquemisantsanotirica. Queariompa, icoaque irantacayempiro caari cameetsatatsi.

³² Iro cantaincha noncanteri Tasorentsi iramitacotempi eiroquea pojocasanotantarotsi piquemisanti. Coajica, ariorica pinquenqueshirereempa aisati pinquemisantajena, pinquenqueshiretacaajeiteri maaroni piyemisantaririnte, pinquemisantacaasanojeiteri.

³³ Yacanaqueri Shimo:

—Tempa aviro novincatsarite, quiso noanaquempi; ariorica iroiminqueetempi, eiro nojoquimpitsi. Iroiminqueetenata narori. Arriorica iroyeetempi, nontsipatasanotanaquempi. Iroyeetenata narori.

³⁴ Icantaqueri:

—Noncamantempi: meeca tsiteniriquica, eirotsitarica ineaji teapa, oncarate mava pincante: “Te noneeriji Jesoshi”.

Icantiri Jesoshi: “Irotaintsi omoncaratea isanquenatacotaquenaniri peerani”.

³⁵ Impoiji icantajeitiri Jesoshi iroamerepee:

—Peerani notianajeitaquempi piquenquetsatacotaquera atiripee. Nocantajeitaquempi: “Eiro paanajirotsi pitsarate, piirequite, aisati otsipa piitsaare”. Meeca nosampijeitempi: “¿Pashinoncaajeitanacampa? ¿Otimaquempa coiteimojeitaquempi?”

Yacajeitanaqueri:

—Te. Tecatsi.

³⁶ Impoiji icantajeitaqueri:

—Meeca noncantajeitempi: ontimerica pitsarate, paanajero. Intimerica piirequite, paanajeri. Terica ontive pivesamento, pimpimantero poicoro pamanantantearori aparoni. ³⁷ Aitaque omoncarataquea isanquenatacotaquenaniri peerani Isayashini: “Iroyeeteri, inquempetacanteeteri oayeri”. Queario, ontsataajeitaquea maaroni isanquenatacotaquenaniri peerani yora quenquetsatacantantatsiniri.

³⁸ Impoiji icantajeitiri:

—Jero oca, Novincatsarite: apite ocarati avesamento.

Yacanaqueri:

—Ari, moncarataca.

Ari anta Jetsemaniqui iquenquetsatacairy Jesoshi Iriri.

(Mt. 26.36-46; Mr. 14.32-42)

³⁹ Impoiji isoquijanaji Jesoshi, ijatanaji anta ijatapinitinta: anta toncaariqui pajitachari Orivomashi. Yojajeitanaqueri iroamerepee. ⁴⁰ Ari yareejitapaaca, icantajeitaqueri:

—Meeca pincantajeiteri Tasorentsi iramitacoejtantempíri: pantirocari caari cameetsatatsi.

⁴¹ Impoiji ari ijataque Jesoshi apaniro aquietiji ara. Itiyeroapaaca, iquenquetsatacairy Iriri:

⁴² —Apa, pincoaquerica, poavisacotenaro oca nonquematsicataqueari. Iro cantaincha eiro pantirotsi nocoqueri narori, irointi picoacaquenari avirori.

⁴³ Impoiji ipocaqueri aparoni inampire Tasorentsi, intacotapaacari Jesoshi, ishindsighttantacari. ⁴⁴ Oshequi iquematsicatacaro, aiquero ijatatii iquenquetsatacairy Iriri. Oshequi imasavitanaque, ovitejatanaque quipatsiqui, oquempetaca iriraja. ⁴⁵ Ari itsoncanaqueri iquenquetsatacairy iriri, ijatanaji anta yoisavicanquerinta iroamerepee, ineajeitapaatiiri maajeitaque ini. Oshequi yoashirejeitanaca incaranqui, irootaque imaojeitancacari. ⁴⁶ Icantajeitapairi:

—¿Paita pimaajeitacari? Pintinaajeitanaje. Pincantajeiteri Tasorentsi eiroquea pantantarotsi caari cameeetsatatsi.

Yayeetaqueri Jesoshi.

(Mt. 26.47-56; Mr. 14.43-50; Joa 18.2-11)

⁴⁷ Ainiroquera iquenquetsatacaajeitiri Jesoshi iroamere, yareejeitapaaca oshequi atiri, ijivajeitapaaqueri Jorashi. Iroamere Jesoshi inaveta, iro cantaincha icoaque iraacantajeri meeca. Ijatashitaqueri, inintavoronirotapaaqueri. ⁴⁸ Icantavaqueri:

—Iro pinintavoronirotantanari, paacantena. Tempa piotaque naro poneainchari inquitequi, natiritapaaque.

⁴⁹ Ari ineajeitavaqueri itsipajeitari Jesoshi. Isampijeitiri:

—Novincatsarite, ¿picoaquempa nompesheri?

⁵⁰ Ari ipeshitavaqueri iyempitasanori aparoni inampire yora ivincatsarite saserote, peti. ⁵¹ Icantiri Jesoshi:

—Ari inaji, eiro pantiritsi.

Impoiji yoipiajiniri iyempita, yoavisacotajiri. ⁵² Irio itsipajeitapaacari Jorashi yora jivatacaajeitiriri saserotepee, jeri aisati yora jivatacaantatsiri anta ivancoqui Tasorentsi, jeri aisati savicacaantajeitatsiri. Icantavaqueri Jesoshi:

—¿Paita pamashitantanari pivesamentopee aisati inchaquipee? ¿Narompa coshinti?

⁵³ Tempa nocaratapinijeitaquempi anta ivancoqui Tasorentsi, iro cantaincha te payenaji. Ja, moncarataca meeca paantaquenari: meeca ipincatsaritanti camaari.

Icanti Petero: “Te noneeriji Jesoshi”.

(Mt. 26.57-75; Mr. 14.53-72; Joa 18.15-27)

⁵⁴ Impoiji yaasanotaqueri Jesoshi, shepi. Yaajeitanaqueri anta ivancoqui ivincatsarite saserote. Osamanitanaque Petero, yojatacoventavetanacari. ⁵⁵ Anta pancotsiqui, ocaraiteti, yoisheetiro paamari. Isavicajeitapaaque, icotsitajeitapaaca yora aajeitaqueriri Jesoshi. Impoiji itsipajeitapaacari Petero. ⁵⁶ Impoiji aisati, opoqui aparoni inampire saserote. Ocatiapaaca, amenapaaqueri Petero, sorerere. Impoiji ocanti:

—Jeri yoca oijatiriri Jesoshi.

⁵⁷ Icanti:

—Te nioteriji.

⁵⁸ Impoiji pashini amenaqueriri, icantiri:

—Aviro oijatiriri Jesoshi.

Icantiri:

—Teve. Te nojateriji.

⁵⁹ Ari osamanitapainti aisati, icantiri pashini:

—Queario yojavetacari yoca shirampari, tempa aisati iponeaca iriori Carireaqui.

⁶⁰ Icantiri:

—Te nioteji paitarica picantaqueri.

Irosati ineantanaca teapa. ⁶¹ Yora Jesoshi ipitsocashitanacari Petero, yamenanaqueri. Irosati iquenqueshiretantanacaro icantaqueriri incaranqui: “Tequeratsitarica irineaje teapa, mava pincante: ‘Te nioteriji Jesoshi’ ”. ⁶² Ari ijatanaque Petero, iraasanotanaca, jii, jii. Oshequi yoashiretanaca, catsini.

Ishirontimentajeitacari Jesoshi.

(Mt. 26.67-68; Mr. 14.65)

⁶³ Yora shentajeitaqueriri Jesoshi ishirontimentajeitacari, aisati ipasanataqueri, tac, tac, tac. ⁶⁴ Impoiji ipashicajaquitaqueri aisati ipasavorotaqueri, icantaqueri:

—Pincamantenate janica pasavorotaquempi. Iji, iji, iji.

⁶⁵ Icantani, oshequi yoashinoncaaqueri, ishirontimentacari.

Iquisajeitaqueri Jesoshi yora oametavacainchari.

(Mt. 26.59-66; Mr. 14.55-64; Joa 18.19-24)

⁶⁶ Ari meeca oquitaitetamanaji. Yapatojeitamanaja yora savicacantajeitatsiri, yora jivatacaajeitiriri saserotepee, yora oametantirori sanquenarentsi, maaroni. Yaajeitanqueri Jesoshi anta yoametavacaapinijeitanta. ⁶⁷ Isampijeitaqueri:

—Pincamantenate: ¿avirompa Quirishitotatsiri naamaajeitacari?

Yacanaqueri:

—Noncantempiricame: “Je, narotaque Quirishito”, eiro pishiretarotsi. ⁶⁸ Aisati, nosampitempiricame paitapeerica, eiro pacanatsi. ⁶⁹ Noponeaca nainti inquietqui, natiritapaaque. Irotaintsi nompianaje jenoqui, nosaviquimotapaajeri Apa iracosanoriqui, noncaratapaajeri nontasoncantajeitaje.

⁷⁰ Isampijeitaqueri:

—¿Avirompa Itomi Tasorentsi?

Yacanaqueri:

—Je, narotaque.

⁷¹ Impoiji icanti:

—¿Paita ancoanteari itsipa camantacoterineri? Tempa aquemajeitaqueri, ijitasorentsinirotacateem. Ainiro yantane.

23

Yaanaqueri Jesoshi anta Piratoqui, icantapaaqueri: “Ainiro yantane yoca namaquerica”.

(Mt. 27.1-14; Mr. 15.1-5; Joa 18.28-38)

¹ Ari ijajeitanaque, yaajeitanqueri Jesoshi anta Piratoqui. Oromasati ini iriori, ipincatsariventajeitiri joriopee. ² Icantapaaqueri:

—Ainiro yantanirotaqueri yoca. Yamatavijeitaqueri noshanincapee, icantajeivetacari: “Eiro pipiritsi pincatsari piirequite”. Aisati icantapiniti: “Narotaque Quirishito, pimpincatsajeitena nainti”.

³ Ari isampitiri Pirato:

—¿Queariompa? ¿Avirompa ivcatsarite jorio?

Yacanaqueri:

—Je, narotaque.

⁴ Impoiji yora Pirato icantajeitavaqueri:

—Te aneroji irantane yoca.

⁵ Aiquero icantajeiti:

—Iquisacaajeitacari atiripee, icantajeitaqueri atiri: “Tsame ajocajeri avincatsarite”. Intanacaro anta Carireaqui, meeca iquenaquenayeti aca Joreaqui, yamatavijeitaqueri maaroni.

Yaanaqueri Jesoshi anta Eroreshiqui.

⁶ Iquemantacarori Pirato icantajeitaqueririri, isampitaqueri:

—¿Iriompa carireasati yoca?

⁷ Yacanaqueri:

—Je, iriotaque.

Icantiri:

—Ari, paanajeri anta Eroreshiqui. Iriotaque pincatsariventajeitiriri carireasati. Savicatsi meeca aca Jerosarequi. Ipoqui chapinqui.

⁸ Ari yaajeitanajiri anta. Ineantavacariri Eroreshi Jesoshi, iquimoshiretanaque. Oshequi iquemacotapinitaqueri, itasoncantayetaque, irootaque icoantavetacaniri irineeri. Icoaveta irineerime intasoncantayeteme. ⁹ Oshequi isampiyevetacari paitapeerica, iro cantaincha te iranqueriji Jesoshi. ¹⁰ Oshequi yapiitapinitiniri yora amaqueriri:

—Te incameetsateji. Ainiro irantane.

¹¹ Impoiji ishirontimentajeitacari Jesoshi yora Eroreshi aisati maaroni soraropee. Impoiji iquitsaataqueri cameetsari quitsaarentsi, ishiacantamempeacari pincatsari, irishirontimentajeitanteeariri aisati. Impoiji itianquiri aisati anta Piratoqui. ¹² Ari peerani iquisavacaapinita Eroreshi aisati Pirato, iro cantaincha meeca intanacaro yaacameetsatavacaaja. Yojocajiro iquisavacaaveitani.

Yoacantaqueri Pirato Jesoshi, irinti Varavashi yoipacaajiri.

(Mt. 27.15-26; Mr. 15.6-15; Joa 18.39-19.16)

¹³ Impoiji yapatojeitacari Pirato yora jivatacaajeitiriri saserotepee, pincatsaripee, aisati oshequi atiripee pashini.

¹⁴ Ari icantavaqueri:

—Pamene, incaranqui pamavetaquenari yoca, picantajeivetaquena yoamejeitaqueri atiri irojocajeitenarori, aisati iriori novincatsarinteppee. Pineajeitaquena nosampitaqueri paitaricapee, iro cantaincha noneacameetsatiri: te aneeroji irantane. ¹⁵ Aisati iriori Eroreshi, ineacameetsataqueri, irootaque yoipiantacariri aca. Pineaquero, tecatsi irante noacantanteariri. ¹⁶ Meeca nompasatacanteri, impoiji noimpacajeri.

¹⁷ Ari maaroni osarintsi ariorica omoncarataca oca vieshita iquenqueshirentarori yavisantaniri peerani inampire Tasorentsi, yora oantatsiri, yora Pirato yoipacaajiri aparoni shirampari yoiminqueetaqueri. ¹⁸ Ari itsipatavacaajeitaca icantajeitaqueri:

—Poacanteri yoca, irinti Varavashi poimpacajeri.

¹⁹ Ari yora Varavashi peerani icantajeitaqueri ishaninca anta Jerosarequi: “Tsame ajocajeri yora pincatsari”. Impoiji yoqueri ishaninca, irootaque yoiminqueantacariri caravosoqui. ²⁰ Icoaveta Pirato iroimpacajerime Jesoshi, irootaque icoantavetacari iroimajerentajerime atiripee, iro cantaincha ²¹ aquiero icantajeitanajatiiri:

—Pimpajacotacanteri. Pimpajacotacanteri.

²² Yapiivetajari aisati Pirato:

—¿Paita nompajacotacantanteariri? ¿Paita yantaqueri? Nosampijeivetaquempi, iro cantaincha tecatsi piotacaasanotena noacantanteariri. Nompasanatacanteri, impoiji noimpacajeri.

²³ Icantani icajemajeitanaque:

—Pimpajacotacanterive. Pimpajacotacanterive.

Aquiero icantanaitii, irosati iquemisantantacariri Pirato, ²⁴ icantiri:

—Ari nomajeitempiro oca picoacaajeitaquenari.

²⁵ Yoipacaacantajiri Varavashi, aisati icantajeitaqueri:

—Paajeitanaqueriqueti Jesoshica, jaocarica pincanteriri.

Ijatacaajeitaqueri anta impajacoterinta.

(Mt. 27.31-32; Mr. 15.21-23; Joa 19.16-17)

²⁶ Ari yaajeitanaqueri Jesoshi anta impajacoterinta, iquenanaque avotsiqui. Jeri itonquiojeitavacari shirenesati pajitachari Shimo. Iponeanaca oantsiqui. Ari iperanatavacari soraro yanatanaqueneri Jesoshi coroshi, ora impajacotanteariri. Yojata-pairi itapiiqui Jesoshi. ²⁷ Yojajetanaqueri oshequi atiri. Otimi aisati oshequi tsinane iraacojeitaqueriri. Oshequi oashiretacotacari, irootaque ocajemacojeitancariri aisati. Jerosaresato onajeiti. ²⁸ Iro cantaincha yamenanaquero Jesoshi, icantajeitanaquero:

—Eiro piracojeitanatsi, avisati iracojeitajanchane, aisati piracojeiteri pitomipee.

²⁹ Coajica ompomerentsitimojeitempi, pashinoncaajeitanaquea. Pincantajeite: “Oquimoshiretaque caari timatsi otomi”. ³⁰ Incoajeivetea atiri ontijerime imperita.

³¹ Pamene, tecatsi nanteni nainti, iro cantaincha iroashinoncayena. Tempa coajica irashinoncaasanotaquea maaroni antirori caari cameetsatatsi.

³² Aisati anta yaayeetanajiri apite coshitantatsiri, intsipajeiteari iriori Jesoshi, impajacojeiteri.

Ipajacotaqueri Jesoshi coroshiqui.

(Mt. 27.33-38; Mr. 15.22-32; Joa 19.18-24)

³³ Ari yareetacaajeitapaaacari anta Caraveraqui, ipajacojeitapaaqueri coroshiqui, tac, tac, tac. Irinti yora coshitantatsiri, ipajacotaqueri pashiniqui coroshi anta iracosanoriqui Jesoshi. Irio itsipa ipajacotaqueri anta irampatequi. ³⁴ Impoiji iquenquet-satacairy Jesoshi iriri:

—Apa, pincavintsayeri yocapee, eiro poasanquetaimentiritsi yoquena. Te irioteji paitarica yantiri.

Ari icoajeitaque soraropee iraajeitero iitsaareni Jesoshi. Icanti:

—Tsame ampishonquero mapijaniqui ayojeitanteari janicarica aitajerine iitsaareni.
Icanti itsipa:

—Jaa, jentsiqueti, aneantearo.

³⁵ Ari itimi anta oshequi atiri, amenajeitaqueriri, aisati itimi yora pincatsaripee, ishirontimentajeitacari Jesoshi, iji, iji, iji; icanti:

—Yoavisacovetacari itsipapee, jentsite amenavaquerita ariorica irimatajea iroavisacotajea irisati. Iriotasanothaquerica Quirishito, itiancane Tasorentsi, ari irimatajea irisati iroavisacotajea.

³⁶ Aisati iriori soraropee, ishirontimentajeitacari. Ijatashitaqueri, imperime ovaja, quepishijari. ³⁷ Icantiqueru:

—Avirorica ivincatsarite jorio, jentsite poavisacotajea avisati: iji, iji, iji.

³⁸ Ainiro ipajacoyetaquero anta coroshiqui sanquenarentsi, otimi iitoqui Jesoshi, jenioquiji. Osanquenataca irineanequi quereshiasati, aisati irineanequi oromasati, aisati irineanequi jorio. Osanquenataca, ocanti: “Jeri yoca ivincatsarite jorio”.

Iquenquetsatacairy Jesoshi coshitantatsiri ipajacoyeetiri.

(Mt. 27.39-53; Mr. 15.33-38; Joa 19.28-30)

³⁹ Aisati yora coshitantatsiri ipajacoyeetaqueri, ishirontimentacari iriori.

—Avirorica Quirishito, poavisacotajea avisati, aisati poavisacotena narori.

⁴⁰ Iro cantaincha iquisatsataqueri itsipa coshitantatsiri:

—Tempa pimpincatsateri Tasorentsi. Aisati avirori, irotaintsi pincame. ⁴¹ Ainiro antaneppee arori ancamajeitanteari, irintiquea yoca, tecatsi irante incamanteari.

⁴² Aisati icantiri:

—Jesoshi, ariorica pareetea anta pimpincatsaritenta, pinquenqueshiretapeena narori, poavisacotena.

⁴³ Yacanaqueri:

—Queario oca noncantempi: meeca quitaiteri pintsipatanaquena anta ocameetsaitetinta.

⁴⁴ Itampaticatapaaque meeca catsirincaiteri. Omapocashitanaca antearo otsitenitanaque. Ari otsitenitanaque irosati ishaaviniji. ⁴⁵ Aisati itsitenitanaque catsirincaiteri. Aisati otimi anta ivancoqui Tasorentsi oticaashiro nianqui. Ari omapocashitanaca, otseranaque, tserererere, tsati; apitemaotanaque. Impoiji antearojenca icantanaque Jesoshi:

⁴⁶ —Apa, meeca noncame. Aviro quempoyeajenaneri.

Irosati icamantanaca, toren.

Yoashirejeitanaca maaroni neaqueriri Jesoshi icamaque.

(Mt. 27.54-56; Mr. 15.39-41)

⁴⁷ Ineantavacariri iyapitanote soraro, icanti:

—Tempa icameetsataque Tasorentsi. Queario icameetsatasanotini yoca shiramparini. Te ontimeniji irantane.

⁴⁸ Aisati yora amenajeitiriri, iquenqueshirejeitanaca maaroni. Ipiajeitanaja nampitsiqui, yoashirejeitanaca catsini. ⁴⁹ Irintiquea yora iojeitiriniri Jesoshi, icatiajeitaca ara aquietiji, yamenajeitanaque. Ocarajeitiri oca tsinaneppee poneachari Carireaqui, tsipatapaacariri chapinqui Jesoshi.

Yoiminqueetaqueri Jesoshi omoroqui.

(Mt. 27.57-61; Mr. 15.42-47; Joa 19.38-42)

⁵⁰⁻⁵¹ Ari itimi anta cameetsari shirampari, pajitachari Jose, arimateasati. Otimi Arimatea anta Joreaqui. Ari icarajeitaqueri Jose yora itsipapee pincatsariyetatsiri, yoametavacaapinijeita, iro cantaincha te incoaveteaji irinti impajacotacanteri Jesoshi. Ipincatsataqueri irinti Tasorentsi, yaamaajeitacari impoique impincatsariventajeiteri maaroni atiri. ⁵² Ari ijataque iriori, yameniri Pirato, icantaqueri:

—Nocoaque pishinetenari Jesoshini, naanajeri.

Icantiri:

—Ari, pijatequeti, paanajeri.

⁵³ Impoiji yoaniireajiri, yapinaicacotaqueri tocoyaqui, cameetsamaotatsiri. Yaanajiri anta oninta mapi, ora iroaquera imoqueeti, yominqueapaaqueri tsompoinaqui. Tecatsi itsipa iroyeete anta omoroquinta. ⁵⁴ Tempa irootaque Viereneshi icamantacari Jesoshi. Yovetsicajeitaquero atiri paitapeerica, tempa irotaintsi saavarlo imaoreajeitantarli. ⁵⁵ Ora tsinanepoo oijatacojeitiri Jesoshi, amenacojeitaqueri yaajeitanaque omoroqui, anta yoajeitaqueri tsompoina. ⁵⁶ Impoiji opiajeitanaja anta ovancoqui. Ovetsicapaaquero casancajari aisati pashini casancatatsiri. Impoiji saavarlo omaoreajeitanaque, omoncarataquero isanquenare Moishishi.

24

Itinaanaja Jesoshi.

(Mt. 28.1-10; Mr. 16.1-8; Joa 20.1-10)

¹ Ari otomincotamanaji, tsiteniquera ojatamanaque tsinane anta yoyeetaquerinta Jesoshi. Aanaquero casancajari ovetsicaqueri. Oijatanaquero otsipapee tsinane. ² Ari yoyeetaqueri chapinqui omoroqui antearo mapi, itsinacacoyeetanaqueri omoroqui. Iro cantaincha areevetapaacaro oneapaatiiro tivironcaja oni. ³ Oqueashivetapaacari Jesoshi omoroqui, iro cantaincha te oneapeeriji Avincatsarite. ⁴ Te iojeiteji pitarica onquenqueshirejeiteri. Impoiji imapocashitapaacaro apite shirampari, icatiimotapaacaro quempeji. Oshipaquireamaotanaque iitsaare. ⁵ Oshequi otsaroacaavacari, oivotasano-tanaca. Isampitapaaquero:

—¿Paita picoantariri aneatsiri aca? Aca yoyeetapinitiri camasanoyetatsiri. ⁶ Te aneajeriji Jesoshi aca, tempa tinaanaja ini. Pinquenqueshiretero icamantitaquemperi anta Carireaqui. ⁷ Tempa icamantitaquempi: “Noponeaca inquitequi, natiritapaaque. Coajica irayena caari quemisantatsi, impajacotena coroshiqui. Oncarate mava quitaiteri ari nontinaanaje aisati”. Meeca omoncarataca icamantitaquempiniri.

⁸ Impoiji oquenqueshiretasanotaquero icamantitacaroniri Jesoshi. ⁹ Opianaja nampitsiqui, ocamantapaqueri iroamerepee aisati itsipapee quemisantatsiri. ¹⁰ Opajita oca tsinanepoo Maria ora maquitarasato, Joana, Maria iriniro Santiacos; aisati otimi otsipapee tsinane. ¹¹ Iro cantaincha te irishiretearoji yora quemisantatsiri oca ocamantaveta-paaceriri, ijitashijeiveta te ioteji. ¹² Iro cantaincha iriori Petero ishianaca anta omoroqui yoajeivetacarinta chapinqui Jesoshi. Yamenapaaquero tsompoina, ineapaaquero tocoya yapinaicacotantavetacariri. Impoiji ipianaja pancotsiqui, oshequi iquenqueshiretanaca.

Anta avotsiqui ineajiri iroamere Jesoshi.

(Mr. 16.12-13)

¹³ Impoiji ijatanaque apite iroamere Jesoshi anta Emaoshiqui. Ariorica imponeaquea Jerosarequi, ocarati 11 quirometoro irareetanteari nampitsiqui. ¹⁴ Ari iquenanaque, iquenquetsatavacaajeitaca. Iquenquetsatacotaqueri jaoca icanteetiri Jesoshi, aisati maaroni yantayetiri iriori. ¹⁵ Ari iquenanaque, icantavacaanaca, irosati itsipajeitancari Jesoshi, quiso yoanaqueri anta avotsiqui. ¹⁶ Ineajeivetacari, iro cantaincha te irishineteriji Tasorentsi iriojeitajeri. ¹⁷ Ari isampitiri Jesoshi:

—Incaranqui, piquenantacari avotsiqui, ¿paita picantavacamentacari? ¿Paita poashirejeitancari?

¹⁸ Ari ipajita aparoni Quereoashi, yacanaqueri iriori:

—Ioejataque maaroni jerosaresati: ¿paita caari piotanta avirori?

¹⁹ Isampitiri:

—¿Paitaquea?

Yacanaqueri:

—¿Tempa pinquemacoteri Jesoshini, yora nasaretesati? Iquenquetsatacapinijeitanaroni irineane Tasorentsi aisati oshequi itasoncantapiniyetini. Ineacameetsataqueri Tasorentsi aisati noneacameetsajeitaqueri narori. ²⁰ Yaajeitaqueri yora jivatacaajeitiriri saserote aisati avincatsaritepee. Icantajeiti te incameetsateji, ipajacotacantaqueri, icamaque toren. ²¹ Nojijeivetaca irio oavisacojeiteenemer, pincatsariventajeiteeneri. Meeca ocarataque mava quitaiteri icamantacari. ²² Ocarajeitaquena aparopee

tsinane jatamanatsiri incaranqui anta noavetacarinta. Opiaja, omapocapaaquena,²³ ocamantapaaquena: “Te noneapaajeriji Jesoshini, te aneajeriji. Irintquea noneapaaque inampiree Tasorentsi, icantaquena iriori: ‘Tinaanaja Jesoshi’ ”. Irootaque ocantaquenari.²⁴ Impoiji ishiayetanaca aparopee anta, inequiero ocantaquenari tsinaneppee: irintquea Jesoshi, te irineeriji.

²⁵ Impoiji icantaqueri Jesoshi:

—Te aneajeroji piojeitancari, pitseencaqueri yora quenquetsatirori irineane Tasorentsi. Te pinquemisantajeiteriji.²⁶ Tempa icantajeiti irijivate Quirishito inquematsicataquearo maaroni oca, impoijiquea impincatsaritasanotanaque.

²⁷ Ari yoametasanojeitanacaqueri Sanquenarentsi, itsoteaquero maaroni quenquetsatacotiriri iriori. Ijivataqueneri isanquenare Moishishini, impoiji yoamejeitiri isanquenare itsipapee quenquetsatacantajeitatsiniri.²⁸ Ari yareejitapaaca nampitsiqui, iravisana-jeme Jesoshi,²⁹ iro cantaincha icantaqueri itsipapee:

—Eirota pijatita, pisavicapee novancoqui. Ishaaviiiteanaji, irotaintsi ontsitenijen-caitete.

Ari ijatapainti ivancoqui iriori.³⁰ Impoiji itsipatavacaajeitaca, yoajeitaca. Impoiji yaquero Jesoshi tanta, ipasonquitiri Tasorentsi, impoiji ipajeitaqueri itsipapee.

³¹ Irosati iquenqueshireantanaja, iojeitavajiri. Impoiji imapocanaja Jesoshi, ipeanaja.

³² Icantavacaajeitanaca:

—Tempa ocameetsatasanotaque icantaqueeri anta avotsiqui. Oshequi aquenqueshire-taquero, aquimoshireeventasanotaquero.

³³ Irosati ijajetantanaja, ipajetananaja Jerosarequi. Ineapaaqueri yora iroamereni Jesoshi, icarataji 11, itsipajeitacari itsipapee quemisantsiri, yapatojeitaca.

³⁴ Icantajeitavaqueri yora savicajeitatsiri:

—Quearioteemi: itinaasanotanaja Avincatsarite. Ineaqueri Shimo.

³⁵ Irosati icamantantapaacari:

—Aisati narori, noneajeitaqueri anta avotsiqui, cameetsa catsini yoametaquena, iro cantaincha te nioveteariji. Impoiji anta novancoqui icarajaquero tanta, ipaquenaro, irosati niotantajari.

Ineajeitajiri iroamere Jesoshi.

(Mt. 28.16-20; Mr. 16.14-18; Joa 20.19-23)

³⁶ Ari ainirojeitatsi iriori anta pancotsiqui, iquenquetsatavacaajeitaca, irosati imapoc-antapajari Jesoshi, icatiimojeitapajari nianqui. Icantapaajiri:

—Pinquimoshirejeitanaque, maaroni.

³⁷ Yoajeitanaqueri cavaco, te iriojeitavaqueriji, ijitashijeivetavacari camaari. Itsaro-a-jeitanaque.³⁸ Isampitapaaqueri:

—¿Paita pitsaroacantanari? ¿Paita pitseencajeitananari?³⁹ Pamenajeitero naco aisati noiti oqueanaquena quiravo. Narotaque pocajantsiri. Jentsite, pimpamijeitena pi-jeitanenari. Pineaquena, otimi novatsa aisati notonqui, te nonquempeteariji camaari.

⁴⁰ Irosati yonijantajeitacari iraco aisati iiti.⁴¹ Iro cantaincha tequera irishiretasan-oteari itinaanaja. Iquimoshirejeivetaca, iro cantaincha itseencashirejeitaque. Icantiri Jesoshi:

—¿Timatsimpa avajeiteari?

⁴² Ari ipavaqueri shima shincorentsi,⁴³ yoacari. Irriorijei yamenashejeitaqueri, sorererere.

Ari yovecarataquero Jesoshi yoamejeitaqueri iroamerepee.

(Yan. 1.4-8)

⁴⁴ Impoiji icantajeitaqueri:

—Tempa chapinqui nocamantaquempi: “Oshequi nonquematsicataquearo, iroy-eeten. Aitaque omoncarataquea maaroni isanquenatacqitaquenaniri Moishishini, aisati yora quenquetsatacantatsiniri, aisati yora pampoyeaventajeitiriniri Tasorentsi”. Meeca moncarataca.

⁴⁵ Impoiji yoametasanojeitaqueri ocantayetiri Sanquenarentsi,⁴⁶ icantajeitaqueri:

—Tempa ocanti Sanquenarentsi: “Incamaque Quirishito, oncarate mava quitaiteri ari intinaanaje aisati.⁴⁷ Inquenquetsatacyeeteri maaroni quipatsipeequi, irijivate aca Jerosarequi: inquemacojeitaqueri maaroni atiri. Incamantajeiteri atiri: ‘Pinquenqueshirejeitanaquea, pojocajeitajero caari cameetsatatsi pantajeitiri. Paventeari Tasorentsi iroavisacotantempiri’ ”.⁴⁸ Ari pineajeitaquero meeca omoncarataca isanquenatacotitaquenaniri peerani.⁴⁹ Meeca nontianquempiro icashiacaquempiro Apa: ompocashitempi Ishire, quiso oajeitantempiri. Pisavicavaqueta aca nampitsiqui irosati ompocanteari. Impoiji irimatacaajeitempi Tasorentsi pantajeitantarori paitapeerica incoacaayempi.

Ijatanaji Jesoshi inquitequi jenoqui.

(Mr. 16.19-20; Yan. 1.9-12)

⁵⁰ Impoiji yora Jesoshi yaajeitanaqueri iroamerepee anta Vetaniaqui. Ari anta nianqui, yacotanaque Jesoshi, iquenquetsatacairy iriri, icantiri:

—Apa, jeri yoca noamereca: pintasoncaventajeiteri, poveshireacaajeiteari.

⁵¹ Irosati yovancantanaja inquitequi, ipeanaja.⁵² Oshequi ipincatsajeitaqueri, impoiji ipiajeitanaja Jerosarequi, iquimoshirejeitanaque catsini.⁵³ Ijatapinitaque anta ivancoqui Tasorentsi icantapinijeitaque:

—Tempa icameetsataque Tasorentsi.

Ari ocarati. Narotaque sanquenatirori: *Irocashi*

YORA JOA ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

Intanacaro Joa iquenquetsataque.

¹ Iriotaque Quirishito intasanotarori itimi: irio Ashitarori Irineane oamejeitaqueri. Itsipatarini Tasorentsi, tempa Tasorentsi ini iriori. ² Itsipatarini peerani iriori. ³ Iriotaque vetsicajeitirori maaroni, paitaricapee. Tecatsi imashiyetachane: eirome itimime eiro ovetsicayetame timayetaintsiri. ⁴ Iriotaque oaneajeitaqueeri, quitaite-tacojeitaqueeri: tempa iotacaajeitaquee jaoca icantari Tasorentsi. ⁵ Peerani te ayo-jeiveitearini, oquempetimoveiteeni atimini tsiteniriqui; impoiji ipocapaaque, iotacaajeitapaaquee, meeca oquempetimotaquee iquitaitetacojeitaquee. Meeca eiro atimajitsi aisati tsiteniriqui.

⁶ Ari itimaveitani aparoni shirampari pajitachari Joa, itiancane Tasorentsi. ⁷⁻⁸ Iquenayetanaque, icamantacoyetapaquaqueri yora quitaitetacojeitaqueeri, iquemisantajeitantariri maaroni atiri. Yora Joa caari ini quitaitetacotantatsi, irootiquea inequaqueri aisati iquenquetsataquaqueri. Irootaque itiancantacariri Tasorentsi.

⁹ Ari impoiji ipocapaaque aca quipatsiqui yora quitaitetacotasano-tantsiri irinti, iotacaajeitaquee arori, aisati iriori maaroni savicajeitatsiri. ¹⁰ Ari itimapaaque quipatsiqui, oca yovetsicaqueri peerani, iro cantaincha te iriojeitavaqueriji atiri, yora yovetsica-jeivetacari. ¹¹ Ipocavetapaaca inampiqui, ishanincavetapaacari joriopee, iro cantaincha te iraacameetsajeitavaqueriji. ¹² Irintiquea aacameetsatavaqueriri, yora quemisanta-jeitavaqueriri: itasoncacoventajeitaqueri, ipeajeitajiri itomi Tasorentsi. ¹³ Iriotaque Tasorentsi tomintajeitaqueeri arori, aisati maaroni quemisantajeitiriri iriori. Te in-quempeteariji ashijeitaqueeri aca quipatsiquica, itimacaajeitiro irinti ijina itomi. Aisati tecatsi ancantajeite arori: “Nompeajeata nainti itomi Tasorentsi”, eiro amatirotsi. Tempa icoashita irinti, irootaque itomintajeitaqueeri, maaroni.

¹⁴ Tempa Tasorentsi ini yora Ashitarori Irineane: iponeanaca inquitequi, yatirata-paaque, itimimojeitapaaquee aca quipatsiqui. Yashi yoiro ineshinoncajeitaquee, quear-iota-sano-taque oca yoamejeitaqueeri. Noneajeitavaqueri narori ipincatsaritasano-taque, iquempetacari Tasorentsi; tempa iriotaque itomi irapintite.

¹⁵ Yora Joa icamantacotaqueri Quirishito, icantajeitaqueri atiri:

—Jeri yoca nocamantacotaqueri chapinqui: “Yanaacotaquena impoitapeenaneri, ipincatsaritasanoti irinti. Te nompincatsariteji narori. Tequerani nontimeni narori, itimitani irinti”.

¹⁶ Yashi yoiro ineshinoncatantaque Quirishito, irootaque ineshinoncatanteeri arori. Aiquero ijatatii ineshinoncajeitaquee. ¹⁷ Peerani yora Moishishini, isanquenatironi oca peranajeitaqueeri; irintiquea Quirishito ineshinoncajeitaquee, queariotasa-notaque maaroni yoamejeitaqueeri. ¹⁸ Tecatsi atiri neerine Tasorentsi, apaniro irinti ineiri itomi irapintite. Iquempetacari iriri, tempa quiso yoitarini, irootaque iotantacariri: meeca yoamejeitaquee jaoca icantari.

Intanacaro Joa icamantacotaqueri Jesoshi.

(Mt. 3.11-12; Mr. 1.7-8; Ir. 3.15-17)

¹⁹ Yora joriopee jerosaresati itiancayetaqueri saserotepee, jeri ishanin capeeni Irevi. Itiancaqueneri Joa, ari ijataque. Isampitapaquaqueri:

—¿Janicampima? ¿Avirompa Quirishito naamaajeivetacari?

²⁰ Ari te irimanacoteaji. Icamantasanotavaqueri:

—Caarina noni Quirishito.

²¹ Yapiitajiri:

—¿Queariompa? ¿Avirompa Iriashini?

—Caarina.

—¿Avirompa camantantatsineri naamaajeitacari?

—Caarina.

²² Isampitajiri aisati:

—¿Janicampimpa? ¿Paitampa noncamantapeeriri tiancaquenari? ¿Pita pantiri?

²³ Icantiri:

—Narotaque iquenquetsatacotiniri peerani Isayashini, tempa isanquenatini: “Coajica impoche camantantatsineri, inquenquetsatapinite anta caaraiteriqui, incante: ‘Pinquenqueshireempa, pinquemisanteri Avincatsarite iroameetsatantempiri’ ”.

²⁴⁻²⁵ Ari isampitaqueri:

—¿Queariompa? ¿Caaimpimpa Quirishito? ¿Caaimpimpa Iriashini? ¿Caaimpimpa yora camantantatsineri naamaajeitacari impoche? ¿Paitampa pivaotisatantariri ashancaphee?

²⁶ Yacanaqueri Joa:

—Iro novaotisatantariri nija. Timatsi meeca pashini shirampari caari piojeiti.

²⁷ Iriotaque impoitapeenaneri, pincatsaritasanotatsiri ini. Oshequi nopincatsataqueri, te nompincatsateji narori.

²⁸ Aitaque icantapinita Joa anta Vetaniaqui. Otimi Vetania intatiqueronta Jorirani. Anta ivaotisatantapinitinta.

Yapiitajiro Joa iquenquetsatacotajiri Jesoshi.

²⁹ Otsipani quitaiteri yamenanaque Joa, ineavaqueri Jesoshi, ipocapaaque. Icantiri atiripee:

—Jeritapaaque ovishatatsiri itiancaqueeneri Tasorentsi. Iriotaque oavisacojeiterineri maaroni atiri caari cameetsatatsi. ³⁰ Iriotaque noquenquetsatacotaqueri chapinqui: “Yanaacotaquena impoitapeenaneri, ipincatsaritasanoti irinti. Te nompincatsariteji nainti. Tequerani nontimeni narori, itimitani irinti”. ³¹ Te niovetearini narori, iro cantaincha meeca icoaque Tasorentsi iriojeiteri maaroni ajorioririnte. Irootaque nopocantacari narori novaotisatantayeti.

³²⁻³³ Icamantantaji Joa aisati:

—Te niovetearini narori. Iro cantaincha itiancaquena Tasorentsi, icantaquena: “Pi-vaotisatapiniteri pishaninca nijaqui, poamejeiteri inquenqueshirejeitanaquea. Coajica pineavaquero aniireapee noshire. Janicarica aatapaaqueri, iriotaque yora pajeiterineri atiripee noshire”. Ari impoiji noneavaquero aniireapaaque Ishire Tasorentsi, oponeanaca inquitequi. Oshavetapaacari sampaquiti: aatapaaqueri Jesoshi. ³⁴ Queario noneasanotaquero. Irootaque nocamantacotantacariri: “Iriotaque Itomi Tasorentsi”.

Intanacaro Jesoshi icoyeaqueri iroamerepee.

³⁵ Oquitaitetamani icatiaja Joa aisati ara, itsipatacari iroamere apite.

³⁶ Ipampoyeaqueri Jesoshi yaniiti anta avotsiqui. Icantiri:

—Jeri yonta ovishatatsiri itiancaqueeri Tasorentsi, iriotaque camimentajeiteeneri oameetsajeitajeeneri.

³⁷ Iquemantavaracariri iroamere apite, yojajeitanaqueri Jesoshi. ³⁸ Ipitsocashitanacari iriori, ineavaqueri yojatapaaqueri. Icantavaqueri:

—¿Pita picoiri?

Icantanaqueri:

—Jaoca pisaviquiri maishitoro?

Acantiri maishitoro aneanequi arori: oametantatsiri. ³⁹ Ari icantiri:

—Pojatanaquena, nonijayempiro.

Irosati yojajeitantanacari, ineapaquero ivanco isavicanteri. Ari ishavijiiteanaque catsirinaciteri, irosati isaviquimojeitantanacari. ⁴⁰ Ari ipajita aparoni savicapaintsiri Antirishi, iriotaque irirenti Shimo Petero. ⁴¹ Impoiji ijatanaque Antirishi, icoapaaqueri irirenti. Ineantapaacariri, icantapaqueri:

—Noneaqueri Meshashi.

Acanti Meshashi aneanequi arori: Quirishito. ⁴² Icantiri:

—Tsame, pojatanaquena, pineapeeri.

—Tsame.

Ari yareetacaacari Jesoshiqui. Yamenavaqueri, icantavaqueri:

—Tempa aviro Shimo, itomi Jonashi. Coajica impajiyetajempi: Sejashi.

Acantajeitiri Sejashi aneanequi arori: Petero, mapitatsiri. ⁴³ Otsipaniqui quitaiteri ijataque Jesoshi pashiniqui quipatsi. Opajita quipatsi Carirea. Ari ineapaaqueri Jeripi, icantapaquaqueri.

—Pojatanaquena.

⁴⁴ Yora Jeripi vetsairasati ini. Vetsaira irootaque inampi Antirishi, jeri Petero. ⁴⁵ Jeripi ineapaaqueri Natanaeri. Icamantapaquaqueri:

—Noneaqueriyea yora isanquenatacotacaniri peerani Moishishini. Aisati camantatatsiniri isanquenatacotajetacarini iriori. Iriotaque Jesoshi, itomi Jose nasaretesati.

⁴⁶ Icantanaquera Natanaeri:

—Te incameetsajeiteji nasaretesati. ¿Icameetsatimpa iriori?

Yacanajiri Jeripi:

—Tsame, pamenaiteri, piotanteariri icameetsatirica.

⁴⁷ Ari iquempejijeitapaacari Jesoshi, ineavaqueri ipocapaaque, icantiri itsipajeitari:

—Pamenerite yora Natanaeri. Iriotaque quempetasanotariri Ishiraeri: icameetsataque, te iriojeji iramatavitanteri.

⁴⁸ Isampitapaaqueri Natanaeri:

—¿Jaoca picantacari piotantavaquenari nocameetsati?

Yacanaqueri Jesoshi:

—Noneitaquempi anta pitsititaro iyera, tequerata incamantempi Jeripi.

⁴⁹ Icantaqueri:

—Tempa aviro itomi Tasorentsi: pitsoteaquero maaroni, pioyetiro. Avirotaque pincatsariventerineri joriopee.

⁵⁰ Icantiri Jesoshi:

—Pamene, incaranqui nocantaquempi: “Noneitaquempi pitsititaro iyera”. ¿Irootaquempa piquemisantantaquenari? Ari pineaquero coajicani nontasoncantasanoyetanaque, impoijiquea pinquemisantasanoquena. ⁵¹ Queario oca nocantimpiri. Aitaque pineaquero coajica inquite tsompoina. Pineaqueri inampire Tasorentsi iraniireashiten, iroancanajea aisati. Tempa naro poneachari inquitequi, natiritapaaque.

2

Ijivataque Jesoshi itasoncantaque.

¹ Avisanaque mava quitaiteri, aitaque iquimoshirejeitanaque canasati. Otimi Cana Carireaqui. Yoveshireimentajeitacari aparoni shirampari aatsiri ijina. Ainiro iroori iriniro Jesoshi. ² Ari icajemacanteetaqueri aisati Jesoshi, aisati narori, jeri aisati itsipapee iroamerepee. ³ Ari nirajeitapaaque ovaja; nocarajeitaqueri itsipapee pocajeitatsiri. Otsaatapaaca, te ontameji aisati. Iriniro Jesoshi ocantiri otomi:

—Te anejeroji ovaja: ¿arimpa pimataquero pamitacoteri?

⁴ Icantiro:

—¿Paita, ina, picantanarari? Tequeratsita omoncarateaji nontasoncantayete.

⁵ Iro cantaincha ocantiri nampirentsi:

—Pinquemisanteriyea paitarica imperanataquempi.

⁶ Onaque ara chomo, ocarati 6. Yovetsqueetiro mapi, antearo oni. Irootaque onantari nije iquivapinitantari joriopee. ⁷ Jesoshi icantajeitiri nampirentsi:

—Pisaje nije chomoquira.

Isajeitanaque, ijaajeitaquero. ⁸ Irosati icantantanacariri:

—Pinquite meeca. Paacotanaqueneri peranatimpiri.

Yaacojeitanaqueneri. ⁹ Ineantavacarori, opeanaja ovaja aisati. Te iriojeji peranatariri nampirentsi jaoca oquenacotapajiri. Irinti iointantsi nampirentsi quitaquerori nije. Irosati icajemantacariri aatsiri ijina. ¹⁰ Icantiri:

—Tempa iro ajivatapinitiri cameetsajari ovaja. Ariorica ashinquijeitanaquea omnipocacotapee masancajari. Aitaque ocantari amejetari. Aviroyeata quempoyeaquerori cameetsajari. Iroaquera meeca pamacantajiro aisati.

¹¹ Otimi Cana anta Carireaqui. Ijivataque Jesoshi anta itasoncantaque. Nocarajeitaqueri itsipapee iroamerepee noneajeitaquero, irosati noshirejeitantanacariri.

Isavicaque Jesoshi Caperenaoqui.

¹² Irosati noirincantajeitanaca Caperenaoqui. Itsipatanacaro Jesoshi iriniro, iriren-tipee, narori, itsipapee iroamerepee aisati. Nomaajeitanaque anta aparopee quitaiteri.

Yoimisoquijaqueri pimantatsiri anta ivancoqui Tasorentsi.

(Mt. 21.12-13; Mr. 11.15-18; Ir. 19.45-46)

¹³ Irotimataintsi quitaiteri iquimoshirejeitantzinitari joriopee, ipajiyeetiro: yavisantaniri. Iro iquenqueshiretiri quitaiteri peerani yavisantaniri inampire Tasorentsi anta Ejipitoqui: te iroyeriji itomipee jorio, irinti yoaque itomipee ejipitosati. Ari iton-caanaque Jesoshi Jerosarequi. Nocarajeitanaqueri itsipapee iroamerepee, noijajeitanaqueri. ¹⁴ Noneajeitapairi ivancoqui Tasorentsi pimantajeitiriri vaca, ovisha, sampaquiti, maaroni. Isavicaque ara pinavacaayetariri atiri iirequite. ¹⁵ Ari yampsitsataquero Jesoshi iviritsa impasatanteariri vaca. Irosati yoimisoquijacantajeitariri ovisha, vaca, maaroni. Ipitamonquitaqueri imesatepee pinavacaariri iirequite, itequitaqueri iirequite. ¹⁶ Icantiri pimantajeitiriri sampaquiti:

—Poimisoquijajetajeri yoca. Eiro pipimantayetitsi aca ivancoquica Apa.

¹⁷ Irosati noquenqueshireantajeitanajarori isanquenatitacaniri: “Icanti Quirishito: ‘Nontsaneacotearo, Apa, pivanco; irootaque iroimenteetenari coajicani’ ”.

¹⁸ Icantanaque jorio:

—¿Paita pantantarori oca? ¿Paita pinijayenari niojeitantzempiri avirorica Tasorentsi?

¹⁹ Yacanaqueri Jesoshi:

—Pintireajerorica oca ivancoca Tasorentsi, ari oncarate mava quitaiteri novetsicajero aisati.

²⁰ Irosati icantantanacari:

—Ocarati 46 osarintsi yovetsicanteetacarori pancotsica. ¿Ariompa oncarate mava quitaiteri povetsicantajearori avinti?

²¹ Ja, irisati shiacantaincha. Tempa irootaque shiaquerori ivanco Tasorentsi, tempa quiso yoqueri. ²² Icamanaque, ocarataque mava quitaiteri itinaantanajari aisati. Impoiji, aitaque noquenqueshireajeitanajiro oca ishiacantaqueri. Aisati niotana-quero oquenquetsatacotaqueniri peerani sanquenarentsi, moncarataca meeca maaroni oquenquetsatacotaqueriniri.

Intayetanaca iquemisantajeitaqueri Jesoshi.

²³ Areetapaaja aisati yavisantaniri, iquimoshirejeitantzari. Itimapaaaji Jesoshi Jerosarequi, oshequi itasoncantayetapaaque. Ineayetaqueri atiri, irootaque iquemisantanta-jeitariri oshequi. ²⁴ Yora Jesoshi ioti jaoca icantashirejeitariri maaroni atiri, irootaque yaamaventantanacari: “Yayeetanacari”. ²⁵ Ioeitaqueri atiri jaoca ocantajeitariri iquenqueshirejeitiri. Iotashitaca, tecatsi camanterineri.

3

Yora Nicoremo yanancashitanaqueri Jesoshi.

¹ Itimini aparoni shirampari pincatsariventiriri joriopee, ipajita Nicoremo. Variseo ini. ² Ari yanancashitanaqueri Jesoshi, icantapairi:

—Niotaquempi, oametanari, piponeaca Tasorentsiqui; irootaque pipocantacari, poamejiteapeena. Eirome itsipatimpime Tasorentsi, eirome pitasoncantime.

³ Icantiri Jesoshi:

—Queariotaque oca noncamantempiri: yora caari apiitajanchane intimaje, tecatsi incantea irijate anta ipincatsaritinta Tasorentsi.

⁴ Icantiri iriori Nicoremo:

—Ariorica anteashiparitanaje, ¿jaoca ancantajeari antimaje aisati? ¿Arimpa amata-jearo ampianajero otsomontequi anironi ontimacotantajeeri aisati?

⁵ Yacanajiri:

—Queariotaque oca noncamantempiri. Maaroni caari vaotisatajachane nijaqui, aisati maaroni caari ontimaje Ishire Tasorentsi, tecatsi incantea irareetea anta ipincatsaritinta Tasorentsi. ⁶ Tsinane, ariorica ontimeri otomi, irishanincatajeari iriri. Aisati oquem-pevetaca Ishire Tasorentsi: ariorica ontimajeri atiri, irishanincatajeari Tasorentsi.

⁷ Ariorica noncantempi: “Pampiitajea pintimaje”, eiro poanatsi cavaco. ⁸ Jaocarica oninti, ojeaoncaque tampea, piquemavaquero opoimatapaaque, sooo. Iro cantaincha te pioteji jaoca oquenapaaqueri, aisati te pioteji jaocarica ojateri. Aisati iquempeyevetaro maaroni otimajiri Ishire Tasorents.

⁹ Icantajiri Nicoremo:

—Jaoca ocantari oca pishiacantanari?

¹⁰ Yacanajiri iriori Jesoshi:

—¿Caarimpimpa oamejeitiriri ajorioririntepee? ¿Paita caari piotantavacaro oca nocantimpiri? ¹¹ Queariotaque oca noncamantempi: nocamantacotiro nioyetiri aisati noneayetiri, iro cantaincha te pinquemisanteroji nocamantayevetimpiri. ¹² Jero no-quenquetsavetimpido ineyetiri aca quipatsiquica, iro cantaincha te pinquemisanteraj. Nonquenquetsatemprome timayetatsiri inquitequi, ¿arimpa pinquemisantaquename?

¹³ Aitaque noponeari narori inquitequi, natiritapaaque; coajica nompianaje aisati. No-quenquetsatacotirorica inquite, niotaquero nocantaqueri. ¹⁴ Peerani anta caaraiteriqui yatsicajeitaqueri ashanincani oshequi maranquepee. Ari icantirini Tasorents: “Pishi-acanteri maranque, poatiacoteri inchaquiiqui iramenajeitanteeariri atiripee, eiroquea icamajeitantzmaaroni amenajeiterineri”. Ari yoatiacotaqueri Moishishi, yavisacojeit-tantajari oshequi atiri. Aisati narori iroatiacoyeetaquena, coajica. ¹⁵ Maaroni quemisan-tenaneri incantaitatiyempani iraneajeitanaje anta inquitequi. ¹⁶ Inintasanojeitiri Tasorents maaroni atiri, irootaque itiancantaquenari aca quipatsiqui. Narotaque itomi irapintite. Incantaitatiyempani iraneajeitapaaje inquitequi maaroni quemisan-tajeitanari; eiro catsini ijatitsi ishaaviji maaroni quemisantajeitanari. ¹⁷ Te iro inti-ancantena Apa noasanquetaajeiteri atiripee, irootinti itiancantaquena noavisacojeiteri.

¹⁸ Eiro yashinoncaajeitatsi maaroni quemisantanari. Iro cantaincha iroasanqueta-jeitaqueri Apa maaroni caari quemisantana. Iro iroasanquetaanteariri, itseencajeitana.

¹⁹ Nopoqui noamejeiteri atiri jaoca icantari Tasorents aisati iriotanteari intimajeite cameetsa: oquempevetaca noquitaitetacovetacari atiri. Iro cantaincha yantapinijeitiro caari cameetsatatsi, te incoajeiteji iriojeitero oca noamejeivetacariri; oquempetaca inintasanojeitiro tsiteniri irootinti. Te incoajeiteji intimajeite quitaitequivi, icantajeiti: “Ineiteerocari Tasorents antayetiri, yoasanquetayeecari”. ²⁰ Yora antajeitirori caari cameetsatsi iquisajeitana. Te incoajeiteji impocashitena: iotaque nonijaantiteri caari cameetsatatsi yantajeitiri, irootaque caari ipocashitantana inquemisantana. ²¹ Antirori cameetsayetatsiri, irootaque pocashitanari irinti. Nonijayetiri ocameetsajeitaque yan-tayetaqueri. Tempa irio Tasorents antacaajeitiriri cameetsayetatsiri, irootaque caari ipashiventanta ipocashitana.

Irootaque icantaqueri Jesoshi Nicoremo.

Mavatanaque iquenquetsatacotiri Joa Jesoshi.

²² Irosati ijatantanaja Jesoshi Joreaqui, nocarajeitanaqueri itsipapee iroamerepee, noijajeitanaqueri. Nosavicajeitapaaji anta, novaotisatantapaaji. ²³ Aisati iriori Joa, ivaotisatanti aisati Ainoqui, oquempejitaro Sarimi. Oshequitapai njia anta. Ijatashijie-tanaqueri oshequi atiri iravaotisatanteariri. ²⁴⁻²⁵ Tequeratsita iroiminqueeteriji Joa. Yora iroamere, ipiatsatavacamentari jaoca ancantajeitajeari ancameetsajeitantzmaaroni. ²⁶ Irosati ipocashitantapaacari Joa iroamere, icantapaqueri:

—Oametanari, jerí ivaotisatanti yoranqui pitsipatariranqui chapinqui intatiqueronta Jorirani. Yoranqui picantiri Quirishito. Irootaque ijatashijieitantanacariri maaroni atiri, meeca yojocajeitanaquee arori. ¿Paitaquea?

²⁷ Yacanaqueri Joa:

—Tecatsi amatashitea arori, irintiquea Tasorents jenoquisati matacayeerori maaroni cameetsayetatsiri. ²⁸ Piquemajeitaquena nocantaqueri chapinqui: “Caarina noni Quirishito. Itiancaquena Tasorents nojivataqueri”. ²⁹ Yora aintsiri ijina, irootaque aasanotirori. Yora ishaninca icarajeitiri inquimoshireimenteari inquemavaqueririca irineanate. Aisati meeca noquempetari narori. Oshequi noquimoshireimentasano-tanaqueri iriori Jesoshi. ³⁰ Aiquero ijatatii ipincatsaritasanotanaque irinti. Narori, te:

³¹ eiro nopincatsarititsi. Yoraquea poneachari jenoqui ipincatsariventasanotanti irinti. Aroquea quipatsisati ashanincatasanojeitaro savicajeitatsiri quipatsiqui, te ampincatsarijeiteji. Aquenquetsatacoti oca aneayetiri aca quipatsiqui. ³² Yora poneachari inquitequi icamantacoyetiro paitarica ineayetiri aisati iquemayetiri anta. Iro cantaincha te intimasanoveteaji quemisantasanotavaqueroneri icantaqueri. ³³ Irintiquea maaroni quemisantavaquerori, ioti irinti otampaticatasanotaque maaroni icantiriri Tasorentsi. ³⁴ Iriotaque Tasorentsi tianquiriri Jesoshi, meeca yoametapaaqueero irineane. Yora Tasorentsi te intsaneemparoji Ishire, quiso oajeitaquee. ³⁵ Apa jenoquisati inintiri Itomi, itiancaqueeri ipincatsariventajeitee maaroni. ³⁶ Maaroni quemisantajeiterineri Itomi Tasorentsi incantatatiyempani iranee inquitequi. Eiro ijatitsi inquitequi caari quemisanterine irinti, irosati incantatiyempani Tasorentsi inquisheri irinti.

4

*Ijati Jesoshi Carireaqi.**(Mt. 4.12; Mr. 1.14; Ir. 4.14)*

¹⁻² Yora variseopee iquemacotaqueri Jesoshi, icantajeitiri atiri:

—Jesoshi yanaacotiri Joa yoametanti. Oshequi iquemisantacaqueri atiri, oshequi ivaotisatanti.

Te iri Jesoshi vaotisaterine atiri, narojeitaque nainti iroamerepee vaotisatantatsiri. Iotaque Avincatsarite icantaqueri variseopee, ³ yojocanajiro Jorea, ipianaja aisati Carireaqi.

Iquenquetsatacaaqueri Jesoshi samariasato.

⁴⁻⁵ Iquenanaji Jesoshi Samariaqui, noijatanaqueri narori. Nareejitapaacaro nampitsi samariaquiniri pajitachari Shicari. Oquempejitaro iipatsiteni Jacovoni: oca ipaqueriniri itomini Jose. ⁶ Otimi ara iiyanareni Jacovoni. Imaotapaaque Jesoshi, tempa noponeajeitaca arejiqui. Isaviquimotapaqueri iriori iiyanareni. Irotimataintsintampaticate catsirincaiteri. ⁷ (-) ⁸ Notsipatacari itsipapee iroamerepee, nojajeitapainti nampitsiqui namanantapaintiro noyeari. (v 7) Irosati opocantapaaca tsinane samariasato, onquitaate nija. Icantavaqueri Jesoshi:

—Pimpacotena nire.

⁹ Ocantiri:

—¿Caarimpimpa jorio? ¿Paita pamanantanari nija? Samariasato noni.

Te iraacameetsajeiteriji jorio samariasati, irootaque ocantantacariri. ¹⁰ Yacanaqueri Jesoshi:

—Te pioteji paitarica inintacaquempi Tasorentsi nomatempiri. Aisati te piotenaji narori, janicanarica. Nocantaquempi: “Pimpacotena nireta”. Iro cantaincha piotaquename, pincantaquename avinti: “Aviro avinti penaneri nireri”. Irosati nompashtan-tempirome nija oaneantatsiri.

¹¹ Ocantanaqueri:

—Tecatsi pinquitaatanteari. Tsompoina oni nija. ¿Jaoca payerori oca nija ovaneantatsiri? ¹² ¿Panaacotirimpia yora Jacovoni, quianatironiri oca iiyanareni? Irironi nijaca, irajetironi itomipee iriori, aisati ivira. Irosati meeca nirajeitiro narori. Ocameetsajataque nijaca: ¿pijitimpia ari pimpajena nija anaacoteroneri oca ocameetsajati?

¹³ Yacanajiro aisati:

—Irimirejeitanaje aisati maaroni irapinitirori oca nija. ¹⁴ Irintiquea yora iraqueroneri nija nompaquerirri nainti: eiro imiretajitsi aisati. Ora nija nomperiri amotoapaaque ishirequi, irootaque aneacaajerine incantatatiyempani.

¹⁵ Ocantanajiri tsinane:

—Pimpeneroqueti meeca ora nija picantaquenari, eiroquea nomiretantajatsi. Eiro natsipetajatsi nompocaje nonquitaataje aisati.

¹⁶ Icantanajiro:

—Pijate meeca, pincajemaitenari pijime, pimpiaje aisati.

¹⁷ Acanajiri:

—Te intimeji nojime.

Icantanajiro:

—Queariotaque picantaquenari: “Te intimeji nojime”. ¹⁸ Icarajeitaque pijime paavetacari apapacoroní. Yora pitsipatari meeca caari ini pijime. Queario picantaquena.

¹⁹ Ocantanajiri:

—Aviroyeata camantantatsiri: aparo meeca nosampitempi. ²⁰ Aca toncaariqui iquemisantapinijeitiri noshaninca Tasorentsi. Avirojei jorio, picantajeiti avirori cameetsa anquemisantajeite Jerosarequi. ¿Paitaquea anashitavacantacari?

²¹ Icantanajiro:

—Pinquemisantero oca noncamantempi meeca. Coajica eiro piquenqueshiretajirotsi jaocarica pinquemisanteriri Tasorentsi. Atsipetashita aquenqueshiretashitaro jaoca anquemisanteri, irointi cameetsatasanotatsiri anquenqueshiretero janica aquemisantiri. ²² Avirojei samariasati te piojeiveteariji yora piquemisantajeivetari. Narojei, jorio, niojeitiri nainti janica noquemisantajeitiri. Jorio irine oavisacotantatsineri. ²³ Moncarataca pinquemisantasanojeiteri Apa: pincoaquerica, ari amitacojeitempi Ishire Tasorentsi, oametempiro quearioyetatsiri. Aitaque icoaque Apa inquemisantajeiteri maaroni coyeroneri Ishire oamejeiteri. ²⁴ Te ontimeti ivatsa Tasorentsi, irointi Ishire. Coatsiri inquemisanteri Tasorentsi inquemisantasanotero Ishire iriotantearori quearioyetatsiri.

²⁵ Ocantanajiri:

—Niotaque impoque Meshiashi, yora icanteetiri Quirishito. Irareetapeemparica iriotacaajeitapaajee maaroni.

²⁶ Icantanaquero:

—Narotaque nainti Quirishito neanataquempirica.

²⁷ Irootaque icantaquerori Jesoshi. Irosati narori, nocarajeitiri itsipapee iroamerepee, nareejeitapaaja. Noneapaaqueri iquenquetsatacairo tsinane, noajeitapaaque cavaco. Iro cantaincha te nosampitapeeri: “¿Paita picantirori tsinane? ¿Paita piquenquetsatacantarori?” Namenashitapaacari.

²⁸ Irosati ojocantanacaro ochomone, ojatanaque nampitsiqui. Ocamantapairi onampquiniri:

²⁹ —Tsame, pojajeitanaquena. Nonijayempi shirampari cantaquenari maaroni, pitarica nantayetiniri. Irioyeata Quirishito.

³⁰ Irosati yojajaitantacaro irameneri Jesoshi. ³¹ Irosatiquera nonajeitaque iiyanareniqui, nocantavetari Jesoshi:

—Oametanari, poyea.

³² Icantana:

—Timatsi noari narori caari piojeiti avinti.

³³ Irosati nocantavacaajeitantanaca:

—¿Yameetinirimpa yoari?

³⁴ Icantanaquena:

—Nantiniri tiancaquenari inintacaanari: oquempetimotaquena noaca, te meeca nonquemeroji notashe. ³⁵ Ariorica pipanquitiro pivanquire, tempa picantavacaajeita: “Itsipasatinivani cashiri aajeitanteearori avanquire”. Pinquemisantajeitero noncamantajeitempi meeca: piotavaquero noshiacantempi. Pamenajeitero panquiresi: sampatanaque, ³⁶ moncarataca iraanteetearori. Impinateri ashitarori, impoiji inquimoshirejeitanaque: yora ashitarori, aisati iratritepee, maaroni. Aviro noshiacantiriaayetirori, irio Tasorentsi ashitarori. Ariorica pinquemisantacayeri atiri impinatempi, aisati incantaitatiyempani iranee maaroni pinquemisantaceaajeiteri. Irampatojeiteri Tasorentsi maaroni irioriqui, anquimoshirejeitantajeari, maaroni. ³⁷ Queariotaque oca icantapiniyeetiri: “Yora panquitaquerori, eiro yaayetirotsi; irinti pashini aajeroneri”. ³⁸ Notiancajeitaquempi nainti paajeitanteearori caari pipanquitii avirori. Timatsi pashini panquitaquerori, pimpojeitajeri avirori. Ari pimoncaratavacaajeitaca pantajeitaquero nocoacaajeitaquempi.

³⁹ Irosati areetantajari tsinane aisati maaroni oijajeitaquerori. Iro ipocajaitantacari ishirejeitavacaro ocantapaaqueriri tsinane. Ocantapaaqueri onampipeequiniri incaranqui: “Icantanaquena Jesoshi maaroni, pitarica nantayetiri: iriroyeata Quirishito”.

Irootaque iquemisantajeitantanacariri Jesoshi oshequi. ⁴⁰ Irosati ipocashijetantacari, icantapairi:

—Pisaviquimotanaquenatsita.

Ari isavicanaque apite quitaiteri, ⁴¹ iquenquetsatacaanaqueri. Iquemisantasanojeitananqueri oshequi. ⁴² Icantajeitaquero tsinane:

—Noquemisantavetacaro picantaquenari, iro cantaincha meecaquea noquemasanotaqueri iriori Jesoshi, irootaque niojeitantanacari queario oni picantaquenari. Iriotaque oavisacojeiteeneri. Iriotaque yoca Quirishito.

⁴³ Ari apite imaaque Jesoshi anta, irosati ijatananjari. Ijatanaji aisati Carireaqui. Narori, noijajeitananqueri. ⁴⁴ Jero oca icantapinitiri Jesoshi: “Te impincatsatasanoteriji yora inampipeequiniri camantantatsiri, irointi itseencapinitiri ishanincasanori”.

⁴⁵ Ari nareejeitapaaja Carireaqui. Yaacameetsajeitavaqueri carireasati irinti. Ijajeitanaque chapinqui iriori anta Jerosarequi, iquimoshirejeitinta. Aitaque anta ineayetaquero yantayetiri Jesoshi. Irootaque meeca ineacameetsajeitantanacariri.

Ipianaja Jesoshi Carireaqui, yoavisacotiri itomi pincatsari.

⁴⁶ Ipianaja aisati Jesoshi Canaqui: ora carirequiniri. Anta chapinqui ipeaquero nija ovaja. Itimaiti Caperenaoqui pincatsari, yojoquiitaca itomi. ⁴⁷ Iquemacotavaqueri Jesoshi, iponeanaja Joreaque, yareetapaaja Carireaqui. Ari ijatashitanaqueri, icantapairi: —Irotantsi incame notomi. Tsame poavisacotajantenari.

⁴⁸ Icantaqueri Jesoshi atiripee:

—Eirorica notasoncantayeti, ¿ariompa pinquemisantajeitena? Aitaque picantajeitari avirori, pitseencajeiti.

⁴⁹ Icantanajiri aisati:

—Intsipaite apa, pijate novancoqui. Icamicari notomi.

⁵⁰ Icantanaqueri:

—Pijataje meeca. Eiro icamitsi pitomi, aitaque iravisacotaje.

Iquemisantaqueri icantaquerirri, ijatanaji. ⁵¹ Nianqui itonquiotavacari inampirepee, icantavajiri:

—Avisacotanaji pitomi.

⁵² Irosati isampitantavacari:

—¿Jaoca ocaratiri yavisacotantajari?

Yacanajiri:

—Oshaiteji, itaanaji catsirincaiteri, aitaque opeanaja iyatsiire.

⁵³ Iquenqueshireeanajiro aitaque icaratiri catsirincaiteri icantantanacariri Jesoshi: “Eiro icamitsi pitomi”. Ari iquemisantanaque iriori. Aisati iquempejeitaja maaroni ishaninca, iquemisantajeitaji. ⁵⁴ Ari meeca isaviqui Jesoshi Carireaqui, iponeanaja chapinqui Joreaque. Ocarati meeca apite itasoncantaque Jesoshi anta.

Yoavisacotiri mantiari anta incajarequi.

¹ Irosati iquimoshirejeitantanaja aisati joriopee. Itoncaanaji Jesoshi Jerosarequi, tonca, tonca. ² Otsapiqui nampitsi otimi yoiminqueantapinitariri ovisha. Otimi anta quempeji incajare. Irineanequi Evereo opajita Vetsata. Otimi anta pancotsipee apapacoroni. ³ Irootaque inariantajeitari joquijjeitachari oshequi. Yapatojeita quitapoajari, mayempi, choriveetatsiri. Yoyeajeitiro nija oshevajatajea. ⁴ Yaniireashitapinitiro incajare inampire Tasorentsi. Ishevajatacapinitaro nija, irosati iqueajatantarori yora joquijjeitachari. Jaocarica itimiri jivatasanotatsiri iqueajataque, yavisacotaji; opeanaja paitarica oavetariri. ⁵ Itimaiti ara aparoni shirampari joquittachari: ocarati 38 osarintsi yojoquitantacari. ⁶ Ineapaaqueri Jesoshi inariaita. Iotacotapaaqueri aitaque ocaratiri yoshequitaquero osarintsi. Icantiri:

—¿Picoimpa paviscotaje?

⁷ Yacanaqueri:

—Tecatsi queajatacayenane ariorica oshevajaveta nije. Irointita nopomerentsita narori, irosati yanaacotantanari itsipapee: iqueajatanaque irinti.

⁸ Icantanaqueri Jesoshi:

—Pintinaanaje, pajiricajero pinariantaveitari, paniitanaje.

⁹ Irosati yavisacotantanaja. Yajiricanajiro inariantaveitaniri, irosati yaniitantanaja.

Icantavacaimentaro quitaiteri imaoresentari.

Irootaque saavarro, quitaiteri imaoresenteeetari. ¹⁰ Irootaque icantajeitancariri joriopee yora avisacotajantsiri:

—Irootaque meeca quitaiteri amaoresentajeitari. Te oshinetanteaji paanajero meeca pinariantari.

¹¹ Yacanaqueri:

—Yora oavisacotajanari irio cantanari: “Paanajero pinariantaitari, paniitanaje”.

¹² Irosati icantantanajari:

—¿Janicampa cantaquemperi?

¹³ Te irioteji iriori janicarica oavisacotajiriri. Itimaiti ara oshequi atiri, ipeimotanacari Jesoshi. ¹⁴ Impoiji ineajiri aisati anta ivancoqui Tasorents. Icantiri:

—Pineaquero, avisacotajimpi meeca. Eiro pantajirotsi aisati caari cameetsatatsi. Apitajimpicari, omatasanoticari catsini.

¹⁵ Irosati ijatantanaja shirampari. Icamantapaajiri joriopee:

—Irro oavisacotajanari Jesoshi.

¹⁶ Irootaque iquisajeitantanacariri joriopee Jesoshi. Iro icoantacari iroyerime, inequeri yoavisacotantaque quitaiteriqui imaoresentajeitari. ¹⁷ Iro cantaincha icantanaqueri:

—Irosati icantani Apa yantayetiro cameetsatatsiri. Aisati noquempetacari narori: ¿paitampa noimpacaantearori saavarroqui?

¹⁸ Aquiero catsini icoasanotanaiti iroyerime. Ineaqueri Jesoshi yantaveetantaro quitaiteri imaoresentajeitari. Iquemaqueri aisati icanti: “Iriotaque Apa Tasorents”. Irosati icantantanaca joriopee:

—Ijitasorentsitacateemi, te incameetsateji.

Yora Jesoshi imoncarayetacari iriri, pitarica yantayetiri.

¹⁹ Yacanajiri Jesoshi:

—Queariotaque oca noncamantemperi. Naro itomi Tasorents. Te nantaveetashiteaji, irointiquea nomoncarayetaquero pitarica noneacotiriri yantiri Apa. ²⁰ Inintaquea iriori, yoameyetaquenaro maaroni nantayetiri. Coajica irimatacayena nomatasanoyetero catsini nontasoncantayete, poantenari cavaco. ²¹ Tempa yoitinaapiniyetiri Apa camayetatsiri, yoaneajiri. Aisati nonquempetea narori, noaneajeri janicarica noncoacayeri.

²² Eiro icantacoventiritsi Apa atiri, eiro catsini; irootaque itiancantaqueunari nainti noncantacoventanteariri. ²³ Icoaque Apa impincatsajeiteri maaroni atiri. Aisati icoacaaquena narori, impincatsajeitenmaaroni. Yora caari pincatsatana narori, te impincatsateriji aisati Apa, yora tiancaquenari. ²⁴ Queariotaque oca noncamantemperi. Maaroni quemeroneri noneane, ariorica inquemisanteri tiancanari, incantaitatiyempani iraneajeitanaje inquitequi. Eiro yoasanquetairitsi Apa. Incamavetaquea, iro cantaincha iraneanaje aisati. ²⁵ Queariotaque oca nocantimpiri. Irotimataints yora camavetainchari inquemajeitenmaaroni noneanate: tempa naro Itomi Tasorents. Icantaitatiyempani iraneajeitanaje maaroni quemajeitenaneri. Aitaquequea meeca moncarataca inquemajeitanenari.

²⁶ Irisati aneashitacha Apa. Aisati icoacaaquena narori nomoncaratacari, narosati aneashitacha narori. ²⁷ Tempa noponeanaca inquitequi, natiritatapaaque. Irootaque itiancantanari noncantacoventeri maaroni atiri. ²⁸ Eiro poajeititsi cavaco. Coajica inquemajeitenmaaroni yora tijajeivetainchari.

²⁹ Aitaque intinaajeitanaje antirori cameetsayetsiri, iraneajeitanaje aisati. Aisati iriori antayetirori caari cameetsatatsi: intinaajeivetanajea, iro cantaincha noashinoncaasanojeiteri irinti.

³⁰ Tecatsi noncantea nantashitearo. Nocantacoventantirica, nomoncarataquero icantanari Apa. Tampatica nocantacoventanti. Te nantashitearoji pitarica nonintiri narori, irointi nantiniri Apa tiancanari inintacaquenari iriori.

Apa icamantacotaqueri Itomi.

³¹ Aisati icantajeitiri Jesoshi:

—Narosatirica camantacotachaneme apaniro pincanteme: “Te ontampaticateji ican-tiri”. ³² Iro cantaincha ainiro pashini camantacotitananiri: yora Joani. Nioti queario oni icamantacotanari iriori. ³³ Pitiancayetaqueri pishaninca, pisampitacantaqueri. Ari icamantacotasanoquero queariotasanotatsiri, icamantaquempi: “Iriotaque Jesoshi Quirishitotatsiri, Itomi Tasorentsi”. ³⁴ Te oncantimoneentenaji incanterica atiri: “Icameetsati Jesoshi”, iro cantaincha nocoaque pavisacojeitaje, irootaque nocaman-tantimpiori oca. ³⁵ Yora Joa iquempevetacaro tsiomentotsi amorecasanotatsiri. Pineajeitavaqueri itsiojeitapaaquempi: tempa oshequi iotacaajeitaquempi. Piquimoshireven-tajeivetavacari osamani. ³⁶ Timatsi aisati otsipa iotacaaqueempiri, ora anaacotiriri Joa, piotasnotantenari. Apa itiancaquena. Meeca nontsoteeneri icantaquenari. Paitarica nantayetiri narori, irootaque piotantenari itiancaquena Apa. ³⁷ Aisati ica-mantacotaquena Apa tiancaquenari. Queario, te pinquemapiniteriji irineanate, aisati te pineapiniteriji jaoca icantari. ³⁸ Iro cantaincha te pinquemisanteriji itiancane, irootaque caari pishiretantaro irineane. ³⁹ Pineanatapinijeitaquero Sanquenarentsi, tempa pijitashijeivetaca ariorica pineanatero, pincantaitatiyempani paneajeitanaje. Tempa irootaque camantacotanari. ⁴⁰ Iro cantaincha te pincoyeji paventena noanean-tajeitajempiri. ⁴¹ Te oncantimoneentenaji pineacameetsajeitanarica. ⁴² Niojeitimpi nainti, te pininteriji Tasorentsi. ⁴³ Itiancana Apa, irootaque nopalntacari. Iro cantaincha te pineacameetsajeitenaji. Ariorica impocashitempi irinti yora caari itian-cane, irioquea pineacameetsajeitaqueri irinti. ⁴⁴ Avisati neacameetsatavacaajeitacha. Aitaque picantajeitari. Iro cantaincha te pincoyeji irineacameetsajeitempi Tasorentsi. Iriotaque Tasorentsi apaniro. ¿Jaoca pincanteari meeca pinquemisanteri? ⁴⁵ Eiro pijitashitatsi naro camantacotempineri Apaqui: “Ainiro, Apa, yantajeitiri yocapee”. Timatsi pashini camantacotempineri: irootaque yora Moishishini, incanteri Apa: “Te inquemisanteroji yocapee ora pisanquenatacaquenari”. ¿Pijivetacampa ari iran-cacoventaqueMPI? ⁴⁶ Arime pinquemisanteroji yocapee ora pisanquenatacaquenari. Isanquenatacaquena iriori peerani. ⁴⁷ Niotaque te pinquemisanteroji isanquenatiniri. ¿Ariompa pinquemisantereo nocantimpiri narori?

Irootaque icantajeitiriri Jesoshi joropee.

6

Yoshequiacaquero Jesoshi tanta, jeri shivajaniqui.

(Mt. 14.13-23; Mr. 6.30-46; Ir. 9.10-17)

¹ Irosati imonteantanajaro Jesoshi incajare pajitachari Tiveriashi, onta carirequiniri; noijajeitanaqueri. ² Oshequi catsini oijajeitiriri. Ineacojeitaqueri itasoncacoven-tajiri joquittachari, irootaque yojajeitantanacariri. ³ Itoncaanaque Jesoshi ton-caariqui. Isavicapaque anta, nocarajeitaqueri itsipapee iroamerepee, notsipajei-tanacari. ⁴ Irotimataintsu inquimoshirejeitantanajeari joropee. Ipajyeetiro quitaiteri “Yavisantaniri”. ⁵ Yamenanaque Jesoshi. Ineavaqueri oshequi atiri pocashijeitaqueriri, isampitiri Jeripi:

—Jeripi, ¿jaoca amananterori meeca tanta iroajeitare ashaincapee?

⁶ Iro icantashitancariri, icoaque Jesoshi irineanteari Jeripi. Irinti Jesoshi, iotaque jaoca incanteriri. ⁷ Ari yacanaqueri:

—Amanantavetearorica tanta oshequi, ampinaventavetaquearorica 200 tenario, eiro inajeitarotsi. Ariorica ampayevetaqueari capichaji, eiro inajeitarotsi.

⁸ Ari itimi anta pashini iroamere, yora Antirishi. Iriotaque irirenti Shimo Petero. Icantiri:

⁹ —Oametanari, jerica aparoni evancari, timatsi itantane apapacoroni. Timatsi aisati ishivajaniquite apite. Iro cantaincha notseencaqueri: tempa oshequi catsini atiri.

¹⁰ Irosati icantantanacari Jesoshi:

—Poisavicajeiteri maaroni atiri.

Ocasaveshiiteaquera. Icarajeitaque 5,000 shirampari savicajeitantsiri. ¹¹ Irosati yaantacaro Jesoshi tanta. Ipasonquitacotaquero. Ipajeitaqueri savicajeitantsiri. Aisati iquempetaqueri shivajaniqui, ipajeitaqueri. Aitaque ocarati icoajeitaqueri aitaque ocarati ipaqueriri. ¹² Iquemajeitanaca maaroni. Irosati icantajeitantzari Jesoshi iroamerepee:

—Paajeitajero timaarantapajantsiri, aparatacari.

¹³ Iquemajeitacaro oca tanta apapacoroni. Yaajeitajiro timaarantapajantsiri. Itetajiro cantiriqui. Ijaajeitajiro ocarati 12. ¹⁴ Noneajeitaqueri itasoncaquero tanta, irosati nocantajeitantañacari:

—Iriotsanotaque yoca camantantatsiri aquemacotaqueri, aamaajeiveitaniri peerani.

¹⁵ Iotavaque Jesoshi impocashijeiterime oajeitainchari iraanaquerime, impeajerime ivincatsarite. Irosati ipeapitsatantanajari. Ijatanaji toncaariqui apaniro.

Ipianaja Jesoshi Caperenaoqui.

(Mt. 14.24-33; Mr. 6.47-52)

¹⁶ Ishavijiiteanaque, nocarajeitanajiri itsipapee iroamere, noirincajeitanaja incajarequi, ¹⁷ notejeitapajaro pitotsi. Notianajiro nomonteanaje intatiquero, anta Capernaoqui. Tsitenitasanotanaji, tequeratsita intsipajeitajena Jesoshi. ¹⁸ Opocaque antearo tampea, oquisaatanaca incajare, soooo, irootaque otimantacari antearo omotoncane. ¹⁹ Aitaque nonajeitaque nianquijaqui. Osamani quipatsi, aamaaca ari ocarati 5 quirometero, arioricampa 6 nareetantajeari. Aiquero nocomajeivetaca. Irosati noneantavajari Jesoshi yanijatapaaji incajarequi, te intsitiaquiteji. Iquempejitarapajaro pitotsi.

²⁰ Notsaroajeitanaque. Icantapajana iriori Jesoshi:

—Narotaque, eiro pitsaroacaajeitanatsi.

²¹ Nocoajeivetanaca nontetavajerime, iro cantaincha noneacotashitapaaca naatacojeitapaaque otsapijaqui, anta nojajeitenta.

Icoajeitajiri Jesoshi.

²² Oshaiteji icatiajeitaca atiri intatiqueronta. Ineajeitavajana narori notejeitanaja novitoqui. Te intsipajeitanajena Jesoshi, nainti jajeitajantsi. Tecatsi pashini pitotsi vaatachane anta. ²³ Meeca yareejivetapaaca tiverashisati, iquenacotapaaque ivitoqui. Yaatacojeitapaaque quempeji yoacaajeitacarinta oshaiteji tanta. Icoavetapaacari:

—¿Jaocame Jesoshi? ¿Jaoca iroamerepee?

²⁴ Te irineajeitapajeri Jesoshi; aisati narorije iroamerejei, te irineajeitapajenaji. Ari impoiji itejeitanaja atiripee ivitopeequi, ijatacojeitanaji Caperenaoqui, icoajeitapajiri Jesoshi.

Iriotaque Jesoshi shiirori oanarontsi aneacaqueriri quemisantatsiri.

²⁵ Aitaque ineajeitapajiriri intatiquero. Icantajeitapajiri:

—Oametanari, ¿jaoca ocaratiri pareetantajari aca?

²⁶ Yacanajiri:

—¿Paitasa picoantanari? Queariotaque oca noncamantempiri: te iro pincoimentena pimpincatsatena, irointiquea picoimentana noacaaquempi oshaiteniji tanta. Meeca picoajeiveta noacaajeitajempi aisati. ²⁷ Ora ayeari ario ontsoncanaquea. Eiro piquenqueshiretapinitirotsi. Naintiquea pinquenqueshiretasanote nainti, naro materone noaneasanojeitempi pincantaitatiyempani paneasanojeitantanajari anta inquitequi. Notimitani inquitequi, itiancaquena Apa quipatsiquica, natritapaaque noaneajeitantajempi.

²⁸ Isampitiri jorio:

—¿Jaoca noncanteari nantanteinariri inintacaanari Tasorentsi?

²⁹ Yacanajiri Jesoshi:

—Pinquemisantajeitena: irootaque inintacaajeitimpri Apa.

³⁰ Irosati isampitantanajari:

—¿Paita ponijayenari nonquemisantempiri? Ariorica noneaquempi pintasoncante, ari niotaque queario picantaqueri. ³¹ Peerani yora ashancani yoajeitaro mana anta caaraiteriqui. Ocanti sanquenarentsi: “Ipeetaqueri yoari yoajeitaror. Oponeaca

inquitequi". Tempa irio Moishishi pajeitaqueriri, irootaque iojeitantanacaniri ashanincani ocameetsati iroijajeiteri.

³² Icantanajiri Jesoshi:

—Queariotaque oca noncamantempi. Te irio Moishishini perineri yoajeitari poneainchari inquitequi. Iranti Apa pajeivetacariniri. Meeca icoaveta impempi pashini poajeiteari, cameetsatasanotatsiri, poneachari inquitequi. ³³ Noponeaca narori inquitequi, naniireapaaque quipatsiqui noaneajeiteri maaroni atiri: noshiaquero poyeamerimimpempimeri Tasorentsi.

³⁴ Icantanajiri:

—Irosati pincanteani, novincatsarite, pimpapinitenaro ora noyeari picamantaquenari. Aiquero pimpapinitenaro.

³⁵ Icantanajiri iriori:

—Narotaque shiirori oanarontsi aneacantatsiri. Pocashitanari eiro aajiritsi itashe. Quemisantanari eiro imiretajitsi. ³⁶ Aitaque nocantajeivetaquempi. Pineajeivetaquena, iro cantaincha te pinquemisantenaji. ³⁷ Yora icantanari Apa: "Pinquempoyeajeitenari", iriojeitaque pocashitajenaneri. Pocashitapajenneri eiro noiapiavajiritsi. ³⁸ Te iro naniireantapeempa nantapeero nonintiri narori, irointi nante inintacaanari tiancanari. Irootaque naniireantapaacari. ³⁹ Yontapee noquempoyeaqueneri Apa, eiro ipeatsi aparoni. Nontinaajeitajeri omoncaratapeemparica quitaiteri. Irootaque inintacaanari Apa tiancaquenari. ⁴⁰ Maaroni neenaneri, ariorica inquemisantena, incantaitatiyempani iraneanaje inquitequi. Nontinaajeitajeri coajicani, omoncaratapeemparica quitaiteri. Irootaque inintacaanari Apa tiancaquenari.

⁴¹ Irosati icantimajeitantanacariri joriopee. Iquemaqueri icantaqueri: "Narotaque shiirori oanarontsi, poneachari inquitequi", irosati icantimajeitantanacari.

⁴² Icantajeiti:

—Tempa iriotaque Jesoshi, itomi Jose. Tempa aneapinijeitiri iriri, iriniro aisati. ¿Paita icantanari: "Noponeaca inquitequi"?

⁴³ Icantanaqueri iriori Jesoshi:

⁴⁴ —Eiro picantimajeitanatsi. Eirome inintacairime Apa tiancaquenari, tecatsi pocashitimatenaneme. Iriotaque nontinaajjeri coajicani omoncaratapeemparica quitaiteri. ⁴⁵ Isanquenatacoticacarini peerani camantantatsiniri: "Tasorentsi iroamejeitajeri maaroni". Maaroni quemavaqueror icantiri Apa, iriotavaquerorica, impocashitena noavisacotanteariri. ⁴⁶ Noponeanaca Tasorentsiqui, irootaque noneantariri Apa. Tecatsi pashini neerine. ⁴⁷ Queariotaque oca nocantimpiri. Yora quemisantanari incantaitatiyempani iraneajeitanaje inquitequi.

Iriotaque Jesoshi shiirori oanarontsi aneacantatsiri.

⁴⁸ Jero oca icantajeitiri aisati:

—Narotaque oanarontsi aneacaantatsiri. ⁴⁹ Yoajeivetacaroni pishanincani mana peerani anta caaraiteriqui, iro cantaincha yanteashipajejitanaque, icamajeitanaque.

⁵⁰ Oca oanarontsi noquenquetsatacotiri oponeaca inquitequi. Eiro icamanetajitsi oaqueronteri iranti. ⁵¹ Narotaque shiirori oanarontsi aneatsiri, noponeaca inquitequi. Maaroni oyearoneri oca oanarontsi incantaitatiyempani iraneajeitaje inquitequi. Nompajeiteri maaroni atiri iraneajeitajeari: irootaque novatsa.

⁵² Irosati icantavacaajeitantanacari joriopee. Icantajeiti:

—¿Jaoca incanteari yoca impanteerori ivatsa avantearori?

⁵³ Icantajeitiri Jesoshi:

—Queariotaque oca noncamantempi. Noponeaca inquitequi, natiritapaaque. Eirorica poarotsi novatsa, aisati eirorica pirirotsi niraja, eiro paneajitsi. ⁵⁴ Maaroni oyearoneri novatsa, aisati ireroneri niraja, incantaitatiyempani iraneaje inquitequi iriori. Nontinaajjeri coajicani omoncaratapeemparica quitaiteri. ⁵⁵ Novatsa irootaque oanarontsisanori. Niraja irootaque ireetasanoyeetiri. ⁵⁶ Oyearoneri novatsa aisati ireroneri niraja irosati incantea, quiso iroajena. Aisati nonquempetea narori, quiso noajeiteri. ⁵⁷ Aneatsiri ini Apa tiancaquenari: irootaque oaneaqueunari narori. Aisati inquempejeitea iriori oyearoneri novatsa, noaneajeiteri maaroni. ⁵⁸ Irootaque oca oanarontsi aniireapaintsiri

inquitequi. Te onquempetearoji ora yoajeivetacaniri peerani pishanincani. Tempa ica-majeitaque irinti. Yora oyeanerori oanarontsica nocantaquempi incantaitatiyempani iraneajitanaje irinti inquitequi.

⁵⁹ Aitaque ocanta icantajeitaquerirri Jesoshi anta pancotsiqui yapatojeitantari. Otimi anta Caperenaoqui.

Jero oca icantiriri Jesoshi quemajeivetacariri.

⁶⁰ Oshequi catsini quemajeivetavacarori yoamejeivetacariri, irosati icantajeitantanaja:

—Te oncameetsate oca icantiri, tecatsi ancantea anquemisantero.

⁶¹ Iotashitaca Jesoshi icantimentavacaajeitacaro yora yoamejeivetacari. Icantanajiri:

⁶² —Terica oncameetsatimotempi oca nocantaquempi. Peerani noponeanaca narori inquitequi, natiritapaaque. Coajica pineajeitavajena nompianaje aisati jenoqui. Impoiji, ¿paita pinquenqueshirejeiteri? ⁶³ Ishire Tasorentsi, irootaque oaneajeitajerineri maaroni savicajeitatsiri inquitequi. Eiro isavicajeitsi maaroni atiri. Oca nocaman-taquempi oshiyavetaro Ishire Tasorentsi: ariorica pinquemisantero, ari oaneaquempi inquitequi. ⁶⁴ Niotacojeitimpi: timatsi picarajeitica caari quemisantatsine.

Peerani iotitari Jesoshi caari quemisantajeitatsine. Aisati iotitacari aacanterineri coajicani. ⁶⁵ Icantanaqueri:

—Niotaque te pinquemisantajeitenaji maaroni, irootaque nocantantaquempi incaranqui: “Eirome inintacairime Apa, tecatsi pocashitenaneme narori”.

⁶⁶ Irosati yojocaarantantanajari oshequi yora yoamejeivetacari. Te meeca iroijajeitajeriji. ⁶⁷ Irosati icantajeitantanajari Jesoshi:

—Noamerepee, ¿aisatimpa pojocajeitanajena avirori?

⁶⁸ Yacanaqueri Shimo Petero:

—Novincatsarite, eiorica noijatimpitsi, ¿janicampa noijatanajeri? Incantai-tatiyempani iraneajitanaje inquitequi maaroni quemisantajeitirori pineane.

⁶⁹ Noquemisantajeitimpi, niojeitanaqueMPI; aviotaque itiancane Tasorentsi, picameetsataque.

⁷⁰ Yacanajiri Jesoshi:

—Tempa nocoyeajeitaquempi. Picarajeiti aca 12, iro cantaincha aparo picarajeitica, irootaque camaaritajantsineri.

⁷¹ Iquenquetsatacotaqueri Jorashi Ishicariote, yora itomi Shimo. Ainiroquera icarajeivetana maaroni. Iriotaque aacanterineri Jesoshi coajicani.

Jero oca icantayetiriri carireasati, jeri jerosaresati.

¹ Irosati iquenantanaca Jesoshi Carireaqui. Icoaveta joriopee iroyerime, irootaque caari icoanta irijate Joreaqui. ² Irotimataints iinquimoshirejeitanteeari joriopee. Irotaintsi irovetsicajeitero pancotsijaniqui inquenqueshirejeitanteearori iquenajeitanaque ishanincani caaraiteriqui. ³ Iriventipee Jesoshi icantajeitiri:

—Pijate meeca Joreaqui. Pinjajayetaapeeri poamerepee anta pitarica pantayetiri.

⁴ Pincoaquerica iriojeitempi maaroni atiripee pinquenaquenayetanaque irineajeitan-tempiri. Eiro pimanirotsi pitarica pantayeteri. Arriorica pintasoncantayete, pini-jayeteri maaroni atiri.

⁵ Te inquemisantajeiteji iriventipee iriori, ⁶ irootaque icantantacariri. Icantajeitanajiri Jesoshi:

—Tequerata omoncarateaji nomatantearori. ⁷ Avirojei, pijajeite avinti. Tecatsi incantea atiri inquisajeitempi avinti. Irompa nainti, iquisajeitaquena. Nocaman-tajeitaqueri: “Te oncameetsateji oca pantayetiri”, irootaque iquishimentaqueri.

⁸ Pintoncaajeitanaquetsita avinti Joreaqui. Eirotsita nojatita narori, tequeratsita omon-carateaji nojatanteeari.

⁹ Aitaque icantajeitaqueriri Jesoshi. Isavicanaji Carireaqui. ¹⁰ Iranti irirentipee jajeitaintsi Joreaqi, itoncaajeitanaque, tonca, tonca. Iquimoshirejeitapaaque. Impoitaniyajiri oriori Jesoshi, itoncaanaji, iro cantaincha te irinijaantapeempaji: te incoyeji irineyeteri. ¹¹ Icanta joriopee iquimoshirejeitanaque. Icoajeivetacari Jesoshi Jerosarequi, icantajeiti:

—Jaoca meeca yoranqui Jesoshi?

¹² Apatojeitainchari anta icantavacaajeitanaca. Icantacoyetiri Jesoshi:

—Cameetsari ini.

Pashini cantayetaintsi:

—Te incameetsateji, iointi yamatavitiri atiri.

¹³ Iro cantaincha itsaroacaajeitacari atiripee yora jivatacaa jeitiriri, irootaque imanacojeitantarori icantacoyetiriri Jesoshi.

Yoametantaque Jesoshi anta ivancoqui Tasorentsi.

¹⁴ Yovaanajiro aisati iquimoshirejeitanaji. Itoncaanaque Jesoshi oriori ivancoqui Tasorentsi, yoametantapaaji. ¹⁵ Yoajeitanaque cavaco joriopee. Icanti:

—Jaoca icantari iotantarori paitapeerica? Tecatsi oameterine.

¹⁶ Yacanaqueri Jesoshi:

—Te naro iotashitearone oca noametimpire, iranti iotacaanaro yora tiancaquenari.

¹⁷ Pincoasanoterica panteneri inintacaaquemppiri, aitaque piotanaque. Piotanaque itiancaquenarica Tasorentsi. Piotanaque noneaveetashitarica. ¹⁸ Yora neaveetashitaraci icoi impincatsayeeyeteri oriori. Intimerica coatsiri impincatsayeeyeteri tiancaqueriri, icameetsati oriori; te iriojeji iramatavitante. ¹⁹ Tempa irootaque icantajeitimpiniri Moishishini peerani: “Jeroa pantayeteri”. Iro cantaincha tecatsi aca matasanojeiteroneri oca icantaquemppiniri. ¿Paita pisareantanari poyena narori?

²⁰ Yacajeitanqueri apatojeitainchari:

—Yoitsaviantaquempi camaari. ¿Janica sareimpire iroyempi?

²¹ Yacanaqueri:

—Jero aparo notasoncataque saavaroqui, meeca poajeitanaquena cavaco maaroni.

²² Icantimpiniri Moishishini: “Pintoyeantea”. Iro cantaincha caari ini Moishishini cantasanotatsine, irintquea yora intasanotaroniri. Irootaque meeca pitoyeantantacari. Pitoyeantapinita aisati saavaroqui amoireantari. ²³ Tempa pitoyeantapinita saavaroqui, pimoncaratantarori isanquenatiniri. Irosati saavaroqui noavisacotantariri yora shirampari. Aiquero piquisanaitiana. ¿Pataquea? ²⁴ Ariorica pamenavoroteri pishaninca, eiro picantashitatsi: “Cameetsari ini. Yora pashini te incameetsateji”. Pijivateta piotasanoteri, impoijiquea piotanaque paitarica pinquenquetsatacoteriri. Aisati onquempetea, pinquenqueshiretasanotero nocantimpire piotasanolantenari.

Iponeanaca Quirishito Tasorentsiqui.

²⁵ Irosati icantayetantanaca jerosaresati aparopee:

—¿Caarimpa yoca icoyeetiri iroyeeteri? ²⁶ Pameneri meeca, yoametantayeti, te irimaneroji. Tecatsi cantimenterine: “Pimajerete”. ¿Yaamaajeitarimpa avincatsarite iriosanotaque yoca Quirishito? ²⁷ Iro cantaincha ayotacojeitaqueri arori jaoca iponeacari yoca. Impocasanotapaajerica Quirishito, tecatsi iotacoterine jaoca imponeempari oriori.

²⁸ Yoametanti Jesoshi ivancoqui Tasorentsi, icanti:

—¿Piojeitanampa? ¿Piotimpa jaoca noponeacari? Te nompocashiteaji, timatsi tiancaquenari: icameetsatasanotaque catsini. Te pioteriji avinti, ²⁹ narori niotiri nainti. Iriotaque tiancaquenari, iriotaque noponeimotacari.

³⁰ Irosati icoajeitavetacari iraayerime. Iro cantaincha tecatsi ayerine. Tequeratsita moncarateaji íraanteeteariri.

Irotaintsi irijataje Jesoshi.

³¹ Oshequi apatojeitainchari quemisantajeitaqueriri. Icantayeti:

—¿Ariorica impocapaaque Quirishito, iranaacotapeerimpa Jesoshi intasoncanyetapee?

³² Yora variseopee iquemajeitavaqueri atiri iquenquetsatacojeitaqueri Jesoshi. Irosati itiancantacari variria iraayerime. Iriojeitaque tiancaqueriri jivatacaaajeitiriri saserotepee, variseopee aisati. ³³ Irosati icantantanacari Jesoshi atiri:

—Capichanivaniji nontsipajeitanajempi. Irotaintsi nompianaje tiancanariqui.

³⁴ Pincoajeivetajenarica, iro cantaincha eiro pineajanatsi. Jaocarica nosavicapaaje eiro pimatirotsi pijataje avirori.

³⁵ Icantanaque jorio:

—Jaocampa irijateri yoca eiro aneantajaritsi? ¿Ariompa irijatashiteri ashaninca savicayetatsiri pashinipeequi nampitsi? Irioyeata oamejeitapeerine itsipapee atiri.

³⁶ Jero icantaque: “Pincoajeivetajenarica eiro pineajanatsi. Jaocarica nosavicapaaje eiro pimatirotsi pijataje avirori”. ¿Paita icantantari?

Nija oaneantatsiri.

³⁷ Irootaque quitaiteri ivecaratantarori iquimoshirejeitanaque. Irosati icatiantanaca Jesoshi. Icajemanaque:

—Maaroni miretatsiri impocashitenata irirapeeta, ³⁸ ontimanteari ishirequi quemisanteri njia oaneantatsiri, oncontejatapaaqueri. Aitaque oquenquetsatacotiro Sanquenarentsi njia nocantaquemperi.

³⁹ Iro ishiacantaqueri nijatatsiri Ishire Tasorentsi, quiso oajeiterine quemisantajeiterine corajicani. Iro cantaincha tequeratsita iroancajeaji Jesoshi jenoqui, irootaque caariquera opocashitantari quemisantajeitatsiri.

Icantavacaimentajeitari Jesoshi.

⁴⁰ Apatojeitainchari ara iquemajeitavaqueri icantaqueriri Jesoshi, irosati icantayetanacara aparopee:

—Iriotasanotaque yoca camantantatsiri aamaajeitacari.

⁴¹ Pashini cantayetatsi:

—Iriotaque Quirishito.

Pashini cantatsi:

—¿Ariompa imponeempari Quirishito Carireaqui? ⁴² Tempa ocanti Sanquenarentsi: “Quirishito irio irishanincatajeari Iravirini. Imponeaquea Verequi, anta isavicaveitani Iravirini peerani”.

⁴³ Impoiji icantavacaimentajeitacari Jesoshi. ⁴⁴ Timatsi aparopee coayevetachari irayerime, iro cantaincha te irimateroji. ⁴⁵ Ipiajeitanaja variria. Yareetapaajari jivatacaaajeitiriri saserotepee, jeri variseopee. Icantajeitavajiri:

—¿Paitasa caari pamantanari aca? Nocantavetimpi incaranqui: “Pamaquenari”.

⁴⁶ Yacanaqueri:

—Cameetsa ineanati yonta shiramparinta. Cameetsa yoametanti, tecatsi pashini quempetearine.

⁴⁷ Icantavaqueri:

—¿Yamatavitajimpimpa aisati avirori? ⁴⁸ ¿Iquemisantaquerimpa jivatacainri ashaninca arori? Te inquemisanteri. ¿Iquemisantaquerimpa variseo? Te. ⁴⁹ Yonta atirinta te irionirojeiteroji Sanquenarentsi. Te oncameetsateji impincatsajeiteri Jesoshi: iroasanquejeiteri Tasorentsi.

⁵⁰ Itimaiti ara Nicoremo, ananincashitanaqueriri Jesoshi chapinqui. Itsipatavacaajeitaivariseoririnte, icantanaqueri:

⁵¹ —¿Paita ocantiri Sanquenarentsi? ¿Oshinetantampa ancantashitea: “Te incameetsateji Jesoshi”? Tempa ocameetsati ajivatavaqueri anquemisanteri incantaqueeri. Tempa ocameetsati aisati ajivataque ayote pitarica yantayetaqueri.

⁵² Yacanajiri:

—Aviroyeata avirori carireasati. Pineanatasanotero Sanquenarentsi piotanteari te imponeempaji Carireaqui camantantatsiri.

⁵³ Irosati ijajeitantanaja maaroni ivancopeequi.

¹ Yora Jesoshi ijatanaque toncaariqui, ipajyeetironta Orivomashi.
² Oquitaitetamaque ipiapaaja ivancoqui Tasorentsi. Maaroni atiri ijatashijejitajiri. Isavicapaaji, yoametapaajiri. ³ Yamajeitapaaqueneri aparoni tsinane, ineetaquero aimentacari ojime. Irio amirori oametantirori Sanquenarentsi, jeri variseopee. Isatecaquero nianqui, ⁴ icantapaaqueri:

—Oametantatsiri, ineetaquero oca aimentacari ojime. ⁵ Peerani icantini Moishishini ocameetsati ampichanatero aimentariri ojime. ¿Paita picantiri avirori?

⁶ Ineantavetari, icoajeiveta incomitacayearime, irootaque icantantajeivetariri. Itsentetanaque Jesoshi, isanquenatantanacaro iracotsapaqui quipatsi. ⁷ Yapiivetajari:

—¿Paita picantiri?

Icatianaja Jesoshi. Icantajeitiri:

—Timatsirica picarajeitica meeca caari antiro caari cameetsatatsi, irijivaterota impicheero; impoiji ari pimpichaajeitero maaroni.

⁸ Yoivotanaja aisati. Isanquenatanaji aisati quipatsiqui. ⁹ Maaroni quemajeitavaqueriri, ijajeitanaji. Ijivajeitanaji yora anteashiparipee, impojeitanajiri iriori maaroni evancaripee, ijajeitanaji. Apanivaniji irinti Jesoshi, jero iroori tsinane. Irosati ocatia ara.

¹⁰ Icatianaja aisati. Tecatsi irineaje, irointi tsinane apaniro. Icantiro:

—¿Jaoca meeca yoranqui quisajeitaquemperiranqui? ¿Tempa intimeji quishimentempirone pantiri?

¹¹ Ocantanaqueri iroori:

—Te aneajeriji, novincatsarite, jajeitanaji inaji.

Irosati icantantajaro:

—Aisati narori, eiro noquishimentimpirotsi. Pijataje meeca, eiro papiitajirotsi caari cameetsatatsi.

Irio Tasorentsi camantacotiriri Jesoshi.

¹² Ineanatajiri aisati Jesoshi atiri, icantajiri:

—Narotaque iotacaajeitiriri atiripee, oquempetaca noquitaitacojeitiri. Eiro iquenashiyetanajatsi tsiteniriqui oijajeitenaneri. Queario, naro iotacaajeitiriri atiripee, aisati oaneajeiterineri.

¹³ Irosati icantantanacari variseopee:

—Avisati camantacotashitacha. Irootaque caari otampaticatanta picantayetaqueri.

¹⁴ Yacanajiri Jesoshi:

—Je, narosati camantacotacha, iro cantaincha otampaticati nocantaqueri. Iro otampaticatantanacari nioti nainti jaoca noponeacari. Aisati nioti jaoca nojatajeri. Te piojeiteji avinti jaoca noponeacari, aisati te piojeiteji jaoca nojatajeri. ¹⁵ Piquempejeitacari pashinisati atiri: te piojeitenaji, iro cantaincha picantacoventashijetaquena. Naintiquea, te meeca noncantacoventempiji. ¹⁶ Iro cantaincha, noncantacoventempime meeca, ontampaticateme noncantacoventempime. Niotaquempi; aisati quiso yoaquena Apa tiancaquenari, iotaquempi aisati. Nocarataque apite iotasanojeitimpiri. ¹⁷ Tempa ocanti Sanquenarentsi pineanatapinitiri: “Apiterica incarate camantacoterineri ashaninka, ari paamayea queariotaque incanteri”. ¹⁸ Ari nocamantacotaja narosati, icamantacotana Apa tiancaquenari iriori; apite nocanta.

¹⁹ Icantanaqueri:

—¿Jaoca meeca piri?

Yacanajiri Jesoshi:

—Te piotenaji. Te piojeiteriji aisati Apa. Arriorica piojeitaquename piotaquerime aisati Apa iriori.

²⁰ Irootaque icantajeitaqueriri Jesoshi anta ivancoqui Tasorentsi. Icatianaja anta ipapinijeitirinta Tasorentsi quirequi. Tequera omoncarateaji incamanteari Jesoshi, irootaque caari imatanteetari irayeeteri.

Yora caari quemisantatsi, incanteani irantapinitero caari cameetsatatsi yantayetiri.

²¹ Yapiitajiri aisati:

—Irotimataintsni nojataje. Pincoacoajeivetajena pineajename aisati, iro cantaincha eiro pineajanatsi. Irotaintsi nojataje. Pincoajeivetea pojajeitena, iro cantaincha eiro

pimajeitirotsi pijajeitaje nojatajenta narori. Irosati pincanteani pantapinijeitero caari cameetsatatsi irosati pincamanteari, irootaque pijajeitanteari Sharincaveniqui.

²² Icantajeitanaque jorio:

—Irisatiyeata oajanchane. Piquemaquerinea icantantari: “Irotantsi nojataje, eiro pimajeitirotsi pijajeitaje nojatajenta narori”.

²³ Icantajiri Jesoshi:

—Avirojeitaque timajeitatsiri quipatsiquica. Noponeaca nanti jenoqui. Aca quipatsiquica irootaque pisavicantajeitari avirori. Te nosavicasanote narori quipatsiquica.

²⁴ Irootaque nocantantaquempi incaranqui: “Irosati pincanteani pantapinijeitero caari cameetsatatsi irosati pincamanteari”. Eirorica piquemisantirotsi nocantaquempi, irootaque pijatanteari Sharincaveniqui.

²⁵ Isampitajiri:

—¿Janicampimpa?

Icantanajiri iriori:

—Aitaque nocamantasanovetaquempi. ²⁶ Timatsi oshequi noncamantempimeri; otimi aisati pantayetiri noncantacoventantempimeri. Iro cantaincha icameetsataque tiancaquenari, timatsi icamantaquenari iriori: irootaque oca novaqueneriri atiri.

²⁷ Te iriojeiteriji joriopee irio iquenquetsatacotaqueri Jesoshi Iriri. ²⁸ Icantanajiri Jesoshi:

—Arriorica poatiacotaquena, aitaque piojeitanaquenari. Piojeiten aponaneaca inquitequi, natiritapaaque. Aisati piojeitanaque tecatsi nantashitea nanti. Noneanatiro oca yoametaquenari Apa tiancaquenari, ²⁹ quiso yoana iriori. Irosati nantiniri narori paitarica inintacaquaenari iriori, irootaque caari yojocantana.

³⁰ Aitaque ocantari icantaqueriri. Icarati oshequi quemisantajeitanaqueriri.

Yora camaari iririntajeitacari caari quemisantajeitatsi.

³¹ Irosati Jesoshi icantajeitantanajari joriopee quemisantajeivetacariri:

—Arriorica pincantaitatiyempani pishiretearo noneane, avirosanojeitaque noamere.

³² Aitaque piotavaquero queariotatsiri. Irootaque oipacaacoventajempineri. Eiro itimajitsi peranatajempineri aisati.

³³ Yacanaqueri:

—Narojeitaque ishanincani Avaramani. Tecatsi peranatenane. ¿Paitasa picantanta-nari: “Oimpacaacoventajempi queariotatsiri”?

³⁴ Yacanajiri Jesoshi:

—Queariotaque oca noncamantempiri. Timatsi peranajeitariri maaroni antajeitirori caari cameetsatatsi. Ora caari cameetsatatsi yantapinijeitiri, oshiyavetacari peranajeitariri. ³⁵ Yora peranarontsi eiro icantatiani irisavicasanote ivancoqui peranatariri. Irintiquea itomi ashitarori ivanco incantatiyempani irisavicasanote irinti. ³⁶ Narotaque itomi Tasorentsi. Arriorica noimpacaacoventajempi, eiro yapiyeetajimpitsi iromper-anayeetajempi. ³⁷ Niotasanojeitaquempi, avirojeivetaca ishaniincani Avaramani. Iro cantaincha te pinquemisanteroji noneane. Irootaque pisareantanari poyena. ³⁸ Ora icamantaquenari Apa, irootaque nocamantajeitimpiri. Ora icantimpiri pirintajeitari irootaque pantapinijeitiri avirori.

³⁹ Yacanaqueri:

—Nirintajeitacari Avaramani.

Icantanajiri Jesoshi:

—Avirome ishanincani Avaramani, aitaque pinquempejeitajearime. Iquemisantini peerani iriori; pishanincataquepearime, pinquempejeitaquepearime avirori, pinquemisantajeitaquename. ⁴⁰ Narotaque neanavetarori queariotatsiri noquemiriri Tasorentsi. Iro cantaincha pisareajeitana poyena. Te inquempeteaniji irinti Avaramani.

⁴¹ Pantapinijeitiro avinti yantayetiri pirintasanotari.

Irosati icantajeitantanacari:

—¿Pashinimpa ashitana? Apaniro ini nirintajeitari. Iriotaque Tasorentsi.

⁴² Icantajeitaqueri Jesoshi:

—Irrioricame pirintajeiteame Tasorentsi aitaque pinintajeitaquename narori. Te nompocashiteaji; aitaque noponeacari Tasorentsiqui, iriotaque tiancaquenari.⁴³ ¿Paita caari piotantavacaro nocantimpiri? Te pimateroji pinquemisantero noneane.⁴⁴ Camaari ini pirintajeitacari. Irootaque picoantajeitacari pantapinijeitiniri inintacaajeitimpri. Oantatsiri ini peerani: irio nijantirori yoanti. Te inquenqueshireteroji quearioyetatsiri, irootaque caari icameetsatanta. Tseyari ini, irootaque itseeyantacari. Yashi yoiro itseeya. Iriotaque tseyacaayetariri atiri.⁴⁵ Irompa nainti nocamantavetaquempiro queariotatsiri, te pinquemisanteraji.⁴⁶ ¿Timatsimpa aca neaquerenari narori nantiro caari cameetsatatsi? Tempa otampaticati nocantajeitaquempiro. ¿Paitampa caari piquemisantantana?⁴⁷ Maaroni itomintajeitariri Tasorentsi, iriojeitaque quemisanta-jeitirori irineane. Te intomintajeitempiji avirori. Irootaque caari piquemisantantaro irineane.

⁴⁸ Irosati yacantanajari jorio:

—Queariotaque nocantaquempiro. Avirotaque samariasati, yoitsaviantaquempi camaari.

⁴⁹ Yacanajiri:

—Te nontsaviateji. Nopincatsatiri Apa. Irompa avinti te pimpicatsajeiteriji; pit-seencajeitiri avinti.⁵⁰ Te noncoyeji impincatsayeetena nainti. Irintiquea Apa coantsi impincatsayeetena. Aisati iriotaque cantacoventajeiterineri maaroni tseencajeitanari.

⁵¹ Queariotaque oca nocantimpiri. Quemisantavaquerori noneane eiro icamanetajitsi.

⁵² Irosati icantantanajari jorioopee:

—Meecaquea niotasanojeitaquempi pitsaviataque. Camaque Avaramani. Aisati camantantatsiniri, camajeitaque iriori. Aiquero picanti: “Eiro icamitsi quemisantajeitirori noneane”.⁵³ Camaque ashanincani Avaramani. Camajeitaque iriori camantantatsiniri. ¿Arimpa pijipincatsaritashitaca? ¿Pijivetampa panaacojeitiri maaroni peeraniniri pip-incatsaritasanotaque avinti?

⁵⁴ Yacanajiri Jesoshi:

—Narosatiricame jitashitachaneme nopincatsaritaque, tempa nantsipetearome. Apa, yora picantajeitiri avirori: “Notasorentsite”, iriotaque pincatsaritacaquenari.⁵⁵ Te piojeiteriji. Nainti niotiri. Ariorica noncantaqueume narori: “Te nioteriji”, aitaque nonquempetaquempime, nontseeyaqueame narori. Irompa niotiri. Noquemisantiro irineane.⁵⁶ Icamantacotaquenani pishanincani Avaramani, icantini: “Coajica ontine quitaiteri noneanteariri Quirishito, irootaque noquimoshiretantaacari”. Ari inequena, irosati iquimoshiretasanotantanacari aisati.

⁵⁷ Icantanaqueri jorio:

—Tequeratsita oncarate pisarintsite 50. ¿Piniirimpa Avaramani?

⁵⁸ Icantanajiri Jesoshi:

—Queariotaque oca noncamantempiri. Tequeratsitani intimeni iriori Avaramani, notimitani nainti. Je, noneiri.

⁵⁹ Irosati yaantajeivetanaca mapi, impichaajeiterime. Iro cantaincha ipeapitsajeitana-jari ivancoqui Tasorentsi, ineacotashitapaaja jaocarica anta.

9

Yoavisacotiri Jesoshi quitapoajari.

¹ Ari iquenanaque anta Jesoshi. Ineapaaqueri aparoni shirampari quitapoajari. Aitaque icantitapaani iroaqera itimapaaque. ² Nocarajeitiri iroamerepee nosampi-jeitiri:

—Oametanari, ¿paitampa itimantapaari quitapoajari? ¿Irompa yantayetiro caari cameetsatatsi ashitariri iquitapoajatantacari itomi? ¿Irrioricampa yoca antaquerori caari cameetsatatsi iquitapoajatantacari?

³ Yacanaqueri Jesoshi:

—Tecatsi irante, iquitapoajatashitaca. Aisati ashitariri, tecatsi irante. Iro iquitapoajatantacari yoca intasoncacoventantajeariri Tasorentsi. Icoacaajeitaqueri atiri iriojeitaque queario itasorentsitaque. Ainiroquera meeca oquitaiteti.⁴ Ocamente satimotana

nanteneri meeca tiancanari inintacaanari. Ariorica ontsitenitanaje, tecatsi matajerone irantaveetaje.⁵ Ainiroqueratatsina quipatsiquica narotaque iotacaajeitaqueriri atiri.

⁶ Irootaque icantaqueririri, irosati iquitiojantanacaro quipatsi. Ocajavatsatanaque oca iquitiojaqueri quipatsi, irosati ipatsancajaquitantacari quitapoajari.⁷ Icantajiri:

—Pijate anta Shiroequi, pinquivajaquitajantea.

Incajare oni Shiroe. Acanti aneanequi arori: Itianqueetiri. Irosati ijatantanaca, iquivajaquitapaaca. Ipiaja, amenanaji ini.⁸ Itimi ara inampiquiniri, aisati yora neapinitiriri yamanantapiniti quirequi. Icantajeitanaque:

—¿Caarimpa yoca yoranqui savicapinitatsiri amanantapinitatsiri quirequi?

⁹ Aparopee cantayetanaintsi:

—Iriotaque.

Pashini cantayetatsi:

—Caari ini. Shiavetariri ini.

Icantanaque iriori:

—Narotaque.

¹⁰ Icantaqueri:

—¿Jaoca icanteetajimpiri pamenantajari?

¹¹ Yacanaqueri iriori:

—Yora shiramparinta pajitachari Jesoshi icajavatsataquero quipatsi, ipatsancajaquitantajanaro noquiqui. Icantajana: “Pijate Shiroequi, pinquivajaquitajantea”. Nojatanaque, noquivapaja; irosati namenantanaja.

¹² Irosati icantantanajari:

—¿Jaocariqueame iriori?

Yacanajiri:

—Jaocarica, te nioteji.

Icantavacaimentajeitanacari Jesoshi.

¹³⁻¹⁴ Irootaque saavarro icajavatsatantacarori Jesoshi quipatsi yamenacantajariri quitapoajaveitachaniri. Iro saavarro imaoresenteevetari. Ari yayeetanaqueneri variseopee,¹⁵ isampitavaqueri:

—¿Jaoca icantajimpiri?

Icantiri:

—Ipatsancajaquitaquena quipatsi noquiqui, irosati nojatantanaca noquivajaquitaja. Meeca namenanaji.

¹⁶ Irosati icantantanaca variseo aparopee:

—Yora shirampari yantaveetantaro saavarro. Te imponeempaji Tasorentsiqui.

Pashini cantayetatsi:

—Irioricame antayetirori caari cameetsatatsi, eiro imatirome intasoncantayeteme.

Irosati icantavacaimentantajeitanacari.¹⁷ Yapiitajiri isampitajiri:

—¿Paita pijitiri avirori yora amenacaajimpiri?

Icantanaqueri:

—Nojitiri itiancane Tasorentsi.

¹⁸ Yora joriopee te irishiretearoji iquitapoajaveitani. Icajemacantaqueri iriri, jero iriniro,¹⁹ isampitavaqueri:

—¿Iriotaquempa yoca pitomi picantiriranqui: “Itimapaaque quitapoajari”? ¿Jaoca icantajari yamenantajari meeca?

²⁰ Yacanaqueri:

—Je, iriotaque notomi. Noneasanotiri yashi yoiro iquitapoajatapaaque.²¹ Jaocarica icantajari yamenantajari, te nioteji narori. Te nioteji aisati janicarica amenacaajiriri. Te irijananequitajeji meeca. Pisampiteri iriori. Irisati camantacotajanchane.

²² Yora ashitariri itsaroacaacari joriopee, iotaque aitaque yapatotimentajeitacari Jesoshi. Icantajeititaca: “Intimerica cantatsine: ‘Iriotaque Jesoshi Quirishito’, eiro ashinetajiritsi irinti intsipajeitee anquemisantajeite”. Irootaque itsaroajeitantanacari ashitariri,²³ irootaque icantantanacariri: “Te irijananequitaje meeca notomi. Irio pisampite”.²⁴ Ari yapiitajiri icajemajiri. Icantavaqueri:

—Tasorentsi pimpincatsate. Yora shirampari niojeitiri irio antayetirori caari cameetsatatsi.

²⁵ Irosati yacantanacari iriori:

—Irioricampa antayetirori caari cameetsatatsi, te nioteji narori. Apatiro niotaque noquitapoajaveitani, meeca namenanaji.

²⁶ Icantanajiri aisati:

—Jaoca icantajimpiri yamenacantajimpiri?

²⁷ Yacanajiri iriori:

—Aitaque nocamantavetaquempi incaranqui, iro cantaincha te pinquemisanteroji piquemavetaquenari. ¿Paita picoantari aisati pinquemajero? ¿Picoajeitajimpa avirori pimpeajeitajeja iroamere?

²⁸ Irosati iquisatsatantanacariri, icantanaqueri:

—Avironirotaque avinti iroamere. Naro nainti iroamerepeeni Moishishini. ²⁹ Niojeiti iquenquetsatacaquerini Tasorentsi Moishishini peerani. Irompa yoranqui, te niojeiteriji jaocarica iponeacari iriori.

³⁰ Yacanajiri iriori:

—Iriotaque amenacaajanari. Piojeiteriquetite avirori jaocarica iponeacari, irootaque noantanaquempi cavaco. ³¹ Ayotacojeitiri Tasorentsi, te inquemeriji antayetirori caari cameetsatatsi. Yora quemisantiriri Tasorentsi, antirori inintacaqueriri, iquemapinitiri irinti. ³² Te anquemacotapiniteriji amenacayerine timapaatsiri quitapoajari. ³³ Eirome iponeame Tasorentsiqui, tecatsi irimateme.

³⁴ Yacanajiri:

—Peerani pitimantapaacari te pincameetsataapeeni. ¿Arimpa picoaque meeca poamejeiten?

Irosati yojocantanajari.

Iquemisantaque quitapoajaveitachaniri.

³⁵ Iquemacotajiri Jesoshi yojocajeitaqueri quitapoajaveitachaniri. Impoiji ineapaajiri aisati, icantapaajiri:

—¿Piquemisantirimpma Atiritapaintsiri?

³⁶ Ari yacanaqueri:

—Jaoca itimirí, apa? Nonquemisanteri.

Yacanaqueri:

³⁷ —Tempa narotaque: noponeanaca inquitequi, natiritapaaque. Pinequena, meeca noneanataquempi.

³⁸ Icantanaqueri:

—Noquemisantimpi, Novincatsarite.

Itiyeroashitanacari. ³⁹ Icantiri Jesoshi:

—Irootaque nopalntacari quipatsiqui noncantajeitanteeariri atiri jaoca incantajeiteari. Namenacaajeitajeri quitapoajavetachari. Yora amenajeivetachari nonquempeta-cantajeri quitapoajatatsiri. Pinequero, niotacaajeiteri caari iojeitatsi; irinti iovetachari nompeapitsajeri iotantavetari.

⁴⁰ Yora variseopee itsipajeitacari, iquemajeitavaquero icantaqueriri. Irosati icantajeitantanaca aparopee:

—Jaocampa nocantajeitari narori? ¿Noquitapoajatimpma?

⁴¹ Yacanajiri Jesoshi:

—Pinquitapoajateme, eiro otimime pantane; iro cantaincha picantajeiveta: “Namena-jeiti”, irosati picantani pantapinijeitiro caari cameetsatatsi.

Yora Jesoshi iquenquetsatacotiri ashitariri irovishate.

¹ Aisati yoametanti Jesoshi, icanti:

—Queariotaque oca noncamantempri. Tempa yoiminqueapinitiri ashitariri irovishate itantoqui iquempoyeantariri. Yora coshitiriri irovishate, te inqueapeeji omorouqui, ainti yataitashitapaaqueri araquerora. Icanti: “Ineanacari ashitariri”. ²⁻³ Intimerica

iratirite shentiniriri omoro, ariorica impocapaaque irinti ashitariri, ari irashireavaqueneri, irishineteri iravisanaje. Ariorica inqueashitapaajeri, incajemapeeri ivajiropee, ari impocashijeiteri, eiro itsaroacaavacaritsi. Impoiji iraajeitanajeri anta paashitomashiqui,⁴ irijivatanaqueri. Ari iotsajeititiri irineane, irootaque yojajeitantariri.⁵ Ariorica incajamaveteari caari ineapiniti, eiro iotsajeititavaqueritsi irineane. Eiro yojajeitiritsi, aintuea irishiapitsajeitanaqueri.

⁶ Aitaque ocantari ishiacaaventaqueneriri Jesoshi, iro cantaincha te iriojeitavaqueroji icantavetacariri. ⁷ Icantajeitaqueri aisati:

—Queariotaque oca noncamantempiri. Narotaque shiacaventachari omoro tantorentsi iqueapinitantari ovisha. ⁸ Maaroni jivajeitaquenari, coshinti ini irinti, coshitantsiri; irootaque caari iquemisantajeitantzari ovishapee. ⁹ Narotaque iqueapinitantari, nareetacaajeiteari maaroni pocashijeitenane. Irriojeitaque avisacotajantsine. Inqueap-injeite, aisati irijatashitapinitero iroyeari. ¹⁰ Ipocashitiri coshinti icoshiteri ovisha, iroyeri, impoyereeri. Irompa nainti, nopocashitiri naneacaajeiteri oijajeitenaneri, naneacaasanojeitajeri inquitequi. ¹¹ Narotaque ashitariri cameetsari, irootaque nocoantacari noncamimenteri novishate. ¹² Te nonquempeteariji oisantiniriri ashitariri. Caari ini ashitariri ovisha. Ariorica irineavaqueri maniti impocapaaque, intsaroanaque, irishi-apitsatanaqueri; irojocanaqueri ovishapee. Irosati iraantapeempariri maniti ovisha, irovarayetapeeri. ¹³ Aitaque icantari oisantiniriri irovishate. Te inquenqueshireteriji ovisha, irinti iquenqueshireti quirequi impinayeeteri, irootaque ishiantanacari. ¹⁴ Narotaque ashitariri cameetsatatsiri. Niotiri novishate. Yora nashijetacari iojeitaquena iriori. ¹⁵ Aisati iquempeta Apa, iotaquena; aisati niotiri narori. Coajica noncamimentajeiteri novishate noavisacotanteariri. ¹⁶ Ainiro aisati pashini, tequerata noviratajeari aca. Irriojeitaque nampatojeitajeri. Ariorica noneanateri irlotsatavaquena, inquempeavacantajeitajeari novishatepee maaroni. Apaniro nashijetajeari maaroni.

Inciamenteri Jesoshi irovishate.

¹⁷ Aisati icanti Jesoshi:

—Noncamimenteri novishate, irosati naneantajeari. Irootaque inintacaanari Apa.

¹⁸ Tecatsi matashitenaneme iroyename, iointuea nocoasanotaque noncamimenteri novishate. Noncamavetaquea, aisati nontinaanaje: irootaque inintacaquenari Apa.

Icantavacaimentajeitacari Jesoshi.

¹⁹ Aitaque ocantari icantaqueririri Jesoshi. Irosati icantavacaimentajeitanacari joriopee. ²⁰ Timatsi icarajeiti oshequi cantayetatsiri:

—Yoitsaviantaqueri camaari. Ishinquiventaitia. ¿Paita piquemisantantariri?

²¹ Icanti itsipapee:

—Te intsaviateji: tempa cameetsa yoametanti. Caari ini camaari: tempa icavintsaajiri quitapoajari, irootaque yamenacantajariri.

Iquempetasanotacari Jesoshi iriri.

²² Iquimoshirejeitaji aisati joriopee Jerosarequi. Iquenqueshiretajiro yoameetsayee-tantajaroniri peerani ivanco Tasorentsi. Opariantsitapaaji. ²³ Yaniiveeti Jesoshi anta oveshinstsayetacanta otincamipee pancotsi. Iro yovetsicacantiniri peerani Saromoni.

²⁴ Yapatojeitashitapaacari joriopee. Icantapaaqueri:

—Peerani pimanapitsataquenaro. Pincamantasanozena: ¿avirompa Quirishito?

²⁵ Yacanajiri:

—Aitaque nocamantajeivetaquempi. Iro cantaincha te pinquemisantavaquenaji. Paitarica nomayetaqueri, irootaque Apa tiancanari matacaquenarori. Oca nomayetaqueri, irootaque iotacayetempineri narotaque Quirishito. ²⁶ Aitaque nocantaquempi: “Avirojeitaque caari novishate, irootaque caari piquemisantantana”. ²⁷ Novishate iquemisantiro noneane. Niojeitiri, aisati iriori, yojajeitana. ²⁸ Aitaque naneacaajeitajiri. Incantaitatiyempani iraneanaje inquitequi. Eiro yashinoncaajatsi. Noquempoyeasano-taqueri, oquempetimotaquena najiricaqueri. Tecatsi aapitsatajenarine. ²⁹ Icantauena

Apa: “Pinquempoyeajenari”. Yanaacojeitiri maaroni itasoncantasanoti, tecatsi aapitsatayerine aisati iriori Apa. ³⁰ Nomoncaratasanotacari Apa, imoncarataquena iriori.

³¹ Irosati yaantajeivetanaca mapi impichaaajeiterime. ³² Icantanajiri Jesoshi:

—Iriotaque Apa tasoncacaquenari. Oshequi nonijayetaquempiro. ¿Paita pimpitseimentenari?

³³ Icantanajiri:

—Te iro nompitseimentempi pantiri cameetsatatsiri. Aviro shirampari, iro cantaincha pijitasorentsitashitaca, irootaque nompitseimentempi.

³⁴ Yacanajiri Jesoshi:

—Tempa isanquenayeetinirini atiri: “Noncamantajeitempi: ‘Avirojeitaque tasorentsitatsiri’ ”. ³⁵ Yora isanquenatiniri irineane Tasorentsi, icanteetiri: “Tasorentsitatsiri”. Tecatsi ancantero ampashinitajero Sanquenarentsi. ³⁶ Inintacaquena Apa, irootaque itiancantaqueunari aca quipatsiquica. Incaranqui nocantaquempi: “Narotaque Itomi Tasorentsi”. ¿Paita meeca picantanaran: “Pijitasorentsitashitaca”? Itasoncantaque Apa. ³⁷ Terica nonquempeteari eiro piquemisantanatsi. ³⁸ Irompa noquempetacaririca, pinquemisantajeitena. Eiro piquemisantashitanatsi narori, irointi pinquemisantimentenaro nomayetaqueri. Pinquemisante, piotanteari iquempetaquena Apa. Aisati narori noquempetacari Apa. Piotasanotavaquero.

³⁹ Icoasanojeivetanaja aisati irayerime, iro cantaincha ipeimotanacari Jesoshi.

Imonteanajaro Jesoshi Jorirani.

⁴⁰ Ari imonteanajaro aisati Jesoshi Jorirani. Ijataji anta intacaronta peerani Joani ivaotisatantaqueni. Aitaque itimapaaajiri anta. ⁴¹ Oshequi pocashijeitajiriri aisati. Icantajeitapaaji:

—Te intasoncanteji irinti Joani, iro cantaincha queario oni maaroni icantacotaqueriri Jesoshica.

⁴² Oshequi quemisantajeitavaqueriri Jesoshi anta.

11

Ipianaja aisati Jesoshi Vetaniaqui.

¹ Isaviqui Vetaniaqui shirampari pajitachari Irasaro, yojoquuitaca. Osaviqui aisati ivancoqui iritsiropee: jero Maria, jero Marita. ² Chapinqui osaitiri Maria Avincatsarite iitiqui. Iro osaitantari casancajari. Oshetantajari oishi aisati. Ari yojoquuitaca ojariri, ³ irootaque otiancantacariri camanterine Jesoshi. Arejiqui ijatashitaqueri. Ineantapaacariri icantapaquaqueri:

—Novincatsarite, yora Irasaro pinintasanotiri, yojoquuitaca.

⁴ Iquemavaqueri Jesoshi, icantavaqueri:

—Yojoquivietaca, iro cantaincha eiro icamasanotitsi. Iro yojoquittacari, icoaque Tasorentsi impincatsatanteeteariri, aisati impincatsatanteetenari narori.

⁵ Jesoshi inintiro iroori Marita, ireento, jeri ojariri. ⁶ Ari iquemacotitacari yojoquuitaca, iro cantaincha apite quitaiteri isavicanaque. ⁷ Irosati icantantajana aisati icantajeitiri itsipapee iroamerepee:

—Tsame ampiajeitanaje aisati Joreaqui.

⁸ Nocantanaqueri narori:

—Chapinqui, oametanari, anta impichaaquempime ashanincapee. ⁹ Ariompa pimpiashitanajeri aisati anta? Eiro ajatitsi: yoicari.

⁹ Yacanaquena:

—Noshiacantempiro. Icontetapaaque catsirincaiteri, iquitaitetacotapaajee. Ariorica inquianaje, ari ontsiteniiteanaje. Yora anitatsiri quitaiteriqui, iniilo oquitaiteti quipatsiqui, irootaque caari itsitincanta. ¹⁰ Iro cantaincha itsitincajeita anitatsiri tsiteniriqui. Iro itsitincantacari, tecatsi quitaitetacoterine.

¹¹ Aitaque icantaqueunari. Irosati icantantanari:

—Maanaqueyea Irasaro. Nojate meeca noncaocapaajeri.

¹² Nocantanaqueri:

—Maanaquerica, Novincatsarite, aitaque iravisacotaje.

¹³ Iro cantaincha, irointi iquenquetsatacovetacari Irasaro, icamaque. Narori, nojitashivetaca iro icantauenari: "Imaashita, irimaoreanteeari". ¹⁴ Irosati icamantasano-tantajanari:

—Camanaque Irasaroni. ¹⁵ Te nontsipatavaqueariji narori. Meeca pinquemisantajeitanaquena, irootaque noquimoshiretantanacari. Tsame amenajeitaiteri.

¹⁶ Yora Tomashi ipajiyetiri Tcipari, icantajeitana:

—Tsame aijajeitanaqueri, iroavaqueeta arori.

Quenquetsatacairy Marita Jesoshi.

¹⁷ Irotimataintsai inampini Irasaro. Niojeitaque icaratacotaque otsipasati quitaiter yoiminqueantacariri Irasaroni omoroqui imperita. ¹⁸ Ora Vetania oquempejitaro Jerosare, ocarati 3 quirometero. ¹⁹ Iponeanaca Jerosarequi oshequi joriopee pocashitirori Marita, jero Maria. Icantapaaquero:

—Eiro poashiretacoshirearitsi pijaririni.

²⁰ Oquemacotavaqueri Marita quempejitapaaque Jesoshi. Osoquijanaque, ojataque otonquiotavacari. Irointi Maria, ainiro osaviqui pancotsiqui. ²¹ Ocantavaqueri Marita Jesoshi:

—Arriorica pintimaiteme aca, Novincatsarite, eiro icamime jaijini. ²² Niotaque meeca pitarica pincanteriri Tasorentsi aitaque inquemisantaquempi.

²³ Icantanaquero Jesoshi:

—Aitaque intinaaje pijaririni.

²⁴ Ocantanajiri aisati:

—Arriorica omoncaratapaaquea intinaajeitantanajeari camajeitaintsiri, aitaque intinaanaje iriori jaijini. Niotaquero.

²⁵ Icantanajiro:

—Narotaque tinaajeitajerineri camajeitaintsiri, oaneajeitajerineri aisati. Incamajeive-quea quemisantanari, iro cantaincha iraneanaje aisati. ²⁶ Maaroni aneajeitatsiri, inquemisantenarica iriori, eiro icamasanotitsi. ¿Pishiretacarompa oca nocantaquem-pirica?

²⁷ Ocantanajiri:

—Je, Novincatsarite, niotaquempi, avirotaque Quirishito, Itomi Tasorentsi pocaintsiri quipatsiquica.

²⁸ Irosati opiantanaja ocajemiyo ireento. Ocamantatsatapaquero:

—Areetapaaca Oametantsiri, icajemacantaquempi.

²⁹ Ocantiro:

—Ari.

Intsipaite ocatianaca, ojatashitanaqueri Jesoshi. ³⁰ Tequeratsita irareetea iriori nampitsiqui. Ainiroqueratatsi anta oneaitirinta Marita. ³¹ Ari ineajeitavaquero quiv-antajeitirori ojatanaque, irosati yojajeyitananacaro. Ijijeivetaca ario ojateri omoroqui yoiminqueetaquerinta ojaririni. Aisati ijijeitiro ojate iraacotajeari aisati anta. ³² Ari oneapaquieri Jesoshi, ojatashitiri, otiyeroashitapaacari. Ocantapaaquero:

—Arriorica pintimaiteme aca, Novincatsarite, eiro icamime jaijini.

Itinaanaja Irasaro.

³³ Ineavaquero Jesoshi iraimotapaacari. Iraajeitaca joriopee tsipajeitarori. Irosati icantashiretantanacari iriori Jesoshi, yoashiretanaca. ³⁴ Icantanaque:

—¿Jaoca poaqueriri?

Icantanaquero:

—Anta, Novincatsarite, noaqueri omoroqui. Tsame pamenaiteri.

³⁵⁻³⁶ Iraapaaca Jesoshi iriori. Irosati icantantanaca jorio:

—Pineaqueri, oshequi inintasanovetarini.

³⁷ Timatsi aparopee cantatsiri:

—¿Caarimpa yoca amenacaajiriri quitapoajari? Intimeme aca, ¿eirompa aisati yoav-isacotajirime Irasaroni, eiro icamime?

³⁸ Icantashiretasanotanaji Jesoshi aisati. Iquempejitapaaacaro omoro, ora imorotashiy-eetaqueriri imperitaqui. Yashitacoyeetantacari mapi. ³⁹ Icantapaaque Jesoshi:

—Pintivironcajero mapica.

Ocantanaqueri Marita:

—Novincatsarite, otsipasatitanaque quitaiteri icamantacari. Shititanaque.

⁴⁰ Icantanajiro:

—Tempa nocantaquempi: “Pinquemisantaquenarica aitaque pineaquero intasoncante Tasorentsi”.

⁴¹ Irosati itivironcanteetajaro mapi. Yamenanaque Jesoshi jenoqui, icantanaque:

—Ariveo, Apa, niotaque piquemaquena. ⁴² Niotaque irosati picanta piquemapinitana. Jeri oshequi catimojeitanari. Nocoaque iriojeite pitiancaquena, irootaque noquenquet-satacantimpiri.

⁴³ Irosati icajemasanotantanaca:

—Irasaro, pintinaanaje, pimpocaje.

⁴⁴ Irosati isoquijantanaja camavetainchari. Ora chapinqui yoisotanteetavacariri tocoyatsa: iracoqui, iitiqui, maaroni. Ipashicavoranteetavacariri paanio. Icantiri Jesoshi:

—Poisoreajeri, pishineteri irijataje.

Icantayetiri oametavacainchari.

(Mt. 26.1-5; Mr. 14.1-2; Ir. 22.1-2)

⁴⁵ Jorioppee, yora tsipajeitarori Maria, ineacojeitaqueri Jesoshi. Oshequi quemisan-tajeitanquerir; ⁴⁶ itsipapee ijatashitaqueri variseopee, icamantacotapaaqueri Jesoshi.

⁴⁷ Yora jivatacaajeitiriri saserotepee, jeri aisati variseo, yapatojeitaqueri pincatsaripee oametavacaajeitainchari. Icantavacaajeitaca:

—¿Paita antajeiteri? Yora shirampari oshequi itasoncantapinitaque. ⁴⁸ Ariorica ashinetajeri aisati, ario inquemisantajeitanqueri maaroni atiri; impoiji ipocashijeit-eecari oromasati, itireayetirocari ivanco Tasorentsi. Ipoyereajeiteecari, maaroni.

⁴⁹ Itsipajeitari anta Cajashi iriori. Meeca osarintsi ipincatsariventiri saserotepee. Icantanaque iriori:

⁵⁰ —Tecatsi piojeite avinti. Te pinquenqueshireempaji. Pamenajeite: ocameetsatimo-jeitee incameta shiramparinta aparoni, iroavisacojeitajerri eiro apoyereajeitantzatsi.

⁵¹ Te incantashitearoji oca. Iriotaque pincatsariventajeitiriri maaroni saserotepee. Yoametiri Tasorentsi, iotantacari incamimentajeiteri Jesoshi maaroni jorioppee. ⁵² Te apaniro incamimentajeiteri jorioppee, irointi incamimenteri maaroni atiri intominta-jeiteari Tasorentsi. Inashijeiveta, isavicajeiti nampitsipeequi arejipeequiniri, iro can-taincha incamimenteri irampatojeitantarir maaroni. ⁵³ Irosati isareajeitantacariri iroyeri Jesoshi. ⁵⁴ Irootaque caari meeca iquenapinitantaja Jesoshi anta yoshequitinta jorioppee, te ironijaapeempariji. Ijatanaji quipatsiqui pajitachari Ejera, otsapitapaacanta caaraiteri. Aitaque isavicapaajiri, icarajeitana, aisati maaroni itsipapee iroamerepee.

⁵⁵ Irotimataintsi Yavisantaniri, inquimoshirejeitanaque noshanincapee. Meeca itoncaa-jeitanaque Jerosarequi iroameetsatantajeari, inquemisantanteariri Tasorentsi. Ijajei-tanaque maaroni savicajeitatsiri jaocarica, ⁵⁶ icoajeitapajiri Jesoshi. Iqueajeitapaaque ivancoqui Tasorentsi, icantavacaajeitapaja:

—Paamaaca, ¿ari imoque Jesoshi? Eirorica ipoquitsi iriori inquemisante.

⁵⁷ Aitaque icantacantaque jivatacaajeitiriri saserotepee, jeri variseopee:

—Piotaqueririca jaocarica inaqueri Jesoshi, pincamantenata.

Icoajeitanaque iraacanteri.

12

Anta Vetaniaqui osaitiri tsinane Jesoshi.

(Mt. 26.6-13; Mr. 14.3-9)

¹ Ocaranivani 6 quitaiteri inquimoshireventearo Yavisantaniri. Yareetaja Jesoshi Ve-taniaqui, anta isaviquinta Irasaro camavetainchari: yora yoitinaajiri Jesoshi, yoaneajiri.

² Aitaque icarajeitiri Irasaro Jesoshi, yoajeita. Marita irootaque amacoyetiniriri yoari.

³ Maria amagueneri Jesoshi casancajari, cameetsajatasanotatsiri. Opinatasanotaca. Que-jitsi oni, ojaacaro voteyajaniqui. Osaitiri iitiqui, irosati oshetantajari oishi. Otimanaque

ojencaare, otsoteanaquero maaroni pancotsi. ⁴ Ari itimaiti ara Jorashi Ishicariote. Iroamere Jesoshi inaveta, iriotaque aacanterine coajicani. Icantanaque:

⁵—¿Paitampa caari pipimantataro casancajarica? Opinaveta 300 tenario, ampayetajerimeri iriori ashinoncaincari. Paparajatashitacaro maaroni.

⁶ Icantashita: te irineshiloncateriji ashinoncaincari. Iquempoyeajeivetanari noire-quite maaroni, iro cantaincha coshinti ini. Ari icoshitaarantitavajanari, irootaque iquishimentantarori te omperiji ovinaro casancajari. ⁷ Icantiri Jesoshi:

—Oncanteata. Iotaque noncame, irootaque osaitantanari tequeratsita noncame.

⁸ Incantaitatiyempani incarajeitempi ashinoncaincari, ari pineshilononcatapinitatiyerini. Irompa nainti eiro nocantatiani noncarajeitempi. Eiro osamanitajitsi pineshilononcatan-tajenari aisati.

Oshequi quemisantajeitiriri Jesoshi.

⁹ Oshequi jorio quemacojeitajiriri Jesoshi itimapaaaji anta, ijatashijeitanaqueri. Aisati ijatashijeitanaqueri irineeri Irasaro, yora camavetainchari yoitinaajiri. ¹⁰ Isareajeitacari jivatacaajeitiriri saserotepee iroyeri aisati Irasaro. ¹¹ Oshequi joriopee neacojeita-queriri Jesoshi yoitinaajiri Irasaro, irootaque yojocajeitantanajarori iquemisantavetari saserotepee, iquemisantajeitantarjiriri Jesoshi irinti.

Yora jerosaresati ipincatsajeitavaqueri Jesoshi.

(Mt. 21.1-11; Mr. 11.1-11; Ir. 19.28-40)

¹² Oquitaitetamanaji aisati. Oshequi catsini pocantsiri inquimoshirejeite. Iquema-cojeitajiri Jesoshi impoche Jerosarequi. ¹³ Ari ijajeitanaque itonquiojeitavacari. Ya-a-jeitaqueneri tsiaroshi. IcAjemajeiti:

—Jeri yoca oavisacotajejeneri, icameetsatasanoti. Iriotaque itiancane Avincatsarite. Iriotaque yoca pincatsariventajeitajerine ashanincaphee, maaroni.

¹⁴ Ineapaaqueri Jesoshi aparo voro caariquera iquijacoyeeta. Iriotaque iquijaco-tapaacari. Aitaque peerani isanquenatacotitari: ¹⁵ “Savicajeitatsiri Sioniqui, eiro pitsaroashitatsi. Jeri yoca pocantsiri, iriotaque pincatsariventajeitempine; iquijaco-tapaacari vorojaniqui”. ¹⁶ Tequeratsita niotacojeiteri oca isanquenatacotitacariniri peerani: ijatanaji Jesoshi jenoqui, impojiquea noquenqueshireajeitanaquer. Aitaque-quea imoncarataquero maaroni isanquenatacotitacariniri. ¹⁷ Ari chapinqui icajemiri Irasaro: “Pincontetapaaje”, ari icontetapaaji. Camasanovetainchari, iro cantaincha yoitinaajiri: nocarajeiti oshequi neacojeitiriri, impoji nocamantacojeitaquero ora noneajeitaqueri. ¹⁸ Ari iquemacojeitaqueri atiri itasoncantayeti Jesoshi, irootaque ijatashijeitacariri itonquiojeitavacari. ¹⁹ Icantavacaajeitanaca variseo:

—Pinequiero, tecatsi ancantanirojeiteri. Yojajeitaqueri maaroni atiri.

Icoajeiti pashinisatipee atiri irineeri Jesoshi.

²⁰ Itoncaajeitanaque Jerosarequi oshequi atiri inquimoshirejeite, inquemisantajeite. Icarajeitiri pashinisatipee atiri, iroquera peajancha jorio. ²¹ Ijatashijeitapaaqueri iriori Jeripi, yora vetsairasati. Otimi Vetsaira Carireaqui. Icantapaaqueri:

—Apa, nocoi noneeri Jesoshi.

²² Jeripi ijatashitanaqueri icamantaitiri Antirishi. Irosati ijatantanaja apite, icamantiri Jesoshi.

Incamaque Jesoshi, intinaanaje.

²³ Icantavaqueri:

—Noponeanaca inquitequi, natiritapaaque; irotaintsi meeca impincatsayeetena.

²⁴ Queariotaque oca noncamantempiri. Arriorica ompariye quipatsiqui apaitsquoiro tirico, eirorica otijatsu, irosati oncantea: apaitsquoiro onapaaque. Irompa ontijaquearica, ari oshiocanaque, oshequiasanotanaque aisati oitsoqui. ²⁵ Timatsi atiri quempoyeavetachari irisati, te incoyeji irashinoncaya, yatsipetashitaca iquempoyeaca irisati; eiro yaneasanotajitsi inquitequi iriori. Irintiquea caari quempoyeacha irisati meeca, incantaitatiyempani iraneanaje irinti inquitequi. ²⁶ Maaroni coatsiri irantayete-naro nocoacairiri, iroijatenata; incarajeitenaya jaocarica nontimeri narori. ²⁷⁻²⁸ Aisati

impinateri Apa. Meeca noquenqueshiretanaca. ¿Paita noncanteriri meeca Apa? ¿Noncanterimpa: “Apa, irotaintsi iroashinonqueetena, poavisacotena”? Eiro nocantiritsi. Irootaque nopocantacari quipatsiqui nonquematsicatearo meeca.

Irosati iquenquetsatacantacariri iriri:

—Apa, nocoaque impincatsajeitempita atiripee, irineacameetsajeitempita.

Irosati noquemajeitancatariri Apa anta inquitequi, icanti:

—Aitanaque niotacaajeitiri nopincatsaritasanotaque. Coajica niotacaajeitajeri aisati.

²⁹ Ari iquemajeivetavacari catiajeivetainchari, iro cantaincha te iriotasanotavaqueroji.

Icantashijeitanaca:

—Otirei.

Pashini cantayetanantsi:

—Ineanatiri inampire Tasorentsi.

³⁰ Icantiri Jesoshi:

—Te naro iroamete: avirojeivetaca avinti yoamejeivetaca. ³¹ Meeca quea incantacoventajeiteri maaroni tseencantayetatsiri: “Ainiro pantane, aitaque noasanquetimentempiro”. Meeca aisati irojoqueri Apa yora pincatsariventajeitiriri tseencantatsiri. ³² Irotaintsi iroatiacoyeetena, irosatiquea nampatojeitanteeariri maaroni atiri, impocashijeitena.

³³ Irootaque icantaqueriri Jesoshi. Icamantitacari jaoca incanteari incamanteari coajicani.

Ipiatsayetacari Jesoshi.

³⁴ Yacanaqueri atiri:

—Oamejeitee Sanquenarentsi: “Irosati incantaitatiyempani Quirishito iranee”. ¿Paita picantiri? ¿Paita picantarori avirori: “Iroatiacoyeetaqueri Atiritapaintsiri”? ¿Janicampa yora Atiritapaintsiri camatsineri?

³⁵ Yacanajiri Jesoshi:

—Ainiroquera oquitaiteti, iro cantaincha eiro meeca osamanitajitsi ontsitenitanta-jeari. Paniitanaque meeca, omapoquimpicari tsiteniri. Ariorica paniitanaje tsiteniriqui, eiro piotitsi jaocarica pinquenanajeri. ³⁶ Ainiroquera noquitaitetacotimpi, niotacaimpi; picoaquerica pinquemisantena, pinquemisanenata meeca. Impoiji pinquempejeiteri pishanincapee: pinquitaitetacoteri, piotacaajeiteri iriori.

Irosati ijatantanaja, imanapitsatanajari.

Caari iquemisantanta joriopee.

³⁷ Ineajeivetacari oshequi atiri itasoncantayeti Jesoshi, iro cantaincha te inquemisantajeitavaqueriji. ³⁸ Imoncarajeitaquero isanquenatacotacaniri peerani Isayashini: “Novincatsarite, eiro ishequitasnotitsi quemisantavaqueroneri ora ancamanteriri. Irineajeivetempi pintasoncante, iro cantaincha eiro iquemisantimpitsi”. Camantatatsiniri inaveitani Isayashini. ³⁹⁻⁴⁰ Icantitacani aisati: “Yora Tasorentsi inquitapoajatayayeli tseencajeitiriri, impeitaqueri iquenqueshireantavetari. Icanti: ‘Ineicari. Ioticari. Yaventanacari. Noavisacotiricari’ ”. Irootaque caari imajeitantarao tseencantatsiri inquenqueshireempa. ⁴¹ Peerani ineakeri Isayashini ishipaquireaque Avincatsarite, impoiji iquenquetsatacotiri. ⁴² Aisati oshequi jivatacaaajeitiriri joriopee, iquemisantajeivetanacari Jesoshi. Iro cantaincha itsaroacaajeitacari variseopee, irootaque caari icamantantari ishaninca: “Noquemisantiri Jesoshi”. Iquenqueshireti: “Iquishimentanaricari noquemisantiri Jesoshi, eiro ishinetanatsi nampatojeiteari noshaninca nonquemisantajeite”. ⁴³ Yora variseopee icoapinijeiti irineacameetsajeiteri atiri, te irio incoye irineacameetsateri Tasorentsi irinti.

Cameetsa anquemisanteri Jesoshi.

⁴⁴ Irosati icajemantanaca Jesoshi:

—Maaroni quemisantanari, te naro inquemisantanote, irintiquea iquemisan-tasanotaque tiancaquenari. ⁴⁵ Maaroni neaquinari, irinti ineaque aisati tiancaquenari. ⁴⁶ Irootaque nopocantacari nonquitaitetacoteri atiri, niotacaasanojeiteri. Yora quemisantanari, eiro yatsipetajaro intimaje tsiteniriqui; tempa ioyetaque. ⁴⁷ Yora quemayevetacarori noneane: eirorica iquemisantiro, eiro noasanquetiritsi nainti. Te iro

nompocantea quipatsiquica noasanquetaayeteri atiri, irointi nopoocanta noavisacojeteri. ⁴⁸ Maaroni tseencaquenari, caari quemisantiro noyenquetsare, timatsi oasanquetajeiterineri coajicani. Jero oca noneane nocantavetacari: coajica omoncarataapeemparica, iroasanquetimenteri itseenquiro noneane. Te noneaveetashiteaji. ⁴⁹ Apa tiancaquenari, iriotaque cantavaquenari: “Iroyea oca pineanataapeeri. Jero oca pincantapeeriri”. ⁵⁰ Yora quemisantavaquerori irineane Apa, incantaitatiyempani iraneanaje inquitequi. Niotaquero oca. Oca nocantaquempi, nomoncarataquero icantaquenari Apa.

13

Yora Jesoshi iquiviniri iroamerepee iiti.

¹ Tequeratsita inquimoshireventajearo Yavisantaniri. Aitaque iotaque Jesoshi omoncarataca irojocantanajearori quipatsica, impiantanajeari iririqui. Icantatiani inintajeitaqueri yashijeitacari quipatsiquiniri. Meeca inintasanojeitiri. ² Ari noajeitaca, notsipajeitacari Jorashi Ishicariote, yora itomi Shimo. Iquenqueshireacaacari camaari iraacanteri Jesoshi coajicani. ³ Iotaque Jesoshi itiancaqueri Iriri impincatsariventajeteri maaroni atiri. Iotaque aisati iponeaca Tasorentsiqui, impiashitanajeri aisati. ⁴ Ari yoacaajeitaquena Jesoshi, impoiji icatianaca. Yojoquireaquero yoicoro. Ishiticat-saquitancaro ishevrotantari. ⁵ Irosati isantacaro nije metaroqui, irosati iquivanta-jeitaquenarori noitipee: narori, aisati itsipapee iroamerepee. Iro ishetantajanarori noiti ishevrotantari. ⁶ Irovetainchia inquivaquittapeerime iriori Petero, icantavaqueri: —Tempa aviotaque Novincatsarite, te oncameetsateji pinquivenaro noiti narori. Oncameetsateme nonquivempirome piiti avinti.

⁷ Yacanaqueri Jesoshi:

—Te piotacoteroji meeca oca nantaquempi. Aitaque piotajero coajicani.

⁸ Icantanaqueri:

—Eiro piquivanarotsi noiti catsini.

Yacanaqueri:

—Eirorica noquivimpirotsi piiti, eiro aquempeavacaatsi coajicani.

⁹ Irosati icantantacariri:

—Jentsite, Novincatsarite, pinquivenaro noitipee, naco, noito, maaroni.

¹⁰ Icantanajiri Jesoshi:

—Eiro yapiitajatsi inquivajea caajeitantsiri. Quitejeivetaquempi avinti, iro cantaincha te pinquitejeiteji maaroni.

¹¹ Iotaque Jesoshi janica aacanterineri. Irootaque icantantacari: “Te pinquitejeiteji maaroni”. ¹² Itsoncajeitaquena inquivajetaquenaro noiti maaroni. Iquitsaatajaro aisati yoicoro. Aisati isaviquimojeitajana, icantana:

—¿Piojeitaquempa meeca paita nantantaytarori ocapee? ¹³ Tempa picantapinijietana: Oametantatsiri, aisati Pincatsari. Queariotaque oca picantaquenari. Narotaque oamejeitimpipi, pincatsariventajetimpipi. ¹⁴ Pinequena meeca, noquivajetaquempiro piiti. Aitaque pinquempetavacaajeiteari avirori, pinquivavacayea piitiqui. ¹⁵ Naro onijaaquempirori. Aitaque meeca pinquempejeitavacayea avirori, pinquivavacajitea.

¹⁶ Queariotaque oca nocantimpipi. Inampire te iranaacoteriji nampitariri impincatsarite. Aisati itiancane eiro yanaacotirtsii impincatsarite yora tianquiriri. ¹⁷ Ariorica piquemavaquero oca noametimpipi, pimataquero nocooacaimpiri pinquimoshirejeitanteari. ¹⁸ Timatsi meeca aparoni nocamantacotasanotiri, te maaroni nonquenquetsatacotempiji. Nocoyeajeitaquempi, tempa niojeitaquempi. Ainiro Sanquenarentsi caari-quera moncaratacha, ocanti: “Yora oacotaquenari notantane, iraacantena”. ¹⁹ Aitaque nocamantajetaquempi tequeratsita irayeeten. Ariorica piotaque omoncarataca nocantimpipi, aitaque pishiretearo naro nainti isanquenatacotitaniri. ²⁰ Queariotaque oca nocantimpipi. Ariorica iraacameetsayetavaqueri notiancane, aisati narori, iraacameetsatena. Ariorica iraacameetsatavaquena narori, aisati inquempeteri iriori tiancanari, iraacameetsateri.

Icanti Jesoshi: “Iraacanteetena”.

(Mt. 26.20-25; Mr. 14.17-21; Jr. 22.21-23)

²¹ Irosati yoashiretantanaca Jesoshi, icamantajeitana:

—Queariotaque oca noncamantajeitempi. Timatsi aca aacantenaneri.

²² Ari namenavacaajeitanaca, te nioteji janicarica icantacotaqueri. ²³ Narotaque iroamere intintasanotiri Jesoshi, ainirona narori, notiinatacari inejiqui. ²⁴ Ijicotauquena Shimo Petero, icantana:

—Pisampiteri. ¿Janica iquenquetsatacotiri?

²⁵ Irosati notiinatasanotantanacariri aisati inejiqui Jesoshi. Nosampitaqueri:

—Novincatsarite, ¿janicampa aacantempine?

²⁶ Yacanaquena:

—Ariorica novincaquero tantaca, yoca nompaqueri, iriotaque aacantenaneri.

Irosati yovincantanacaro tanta, ipaqueri. ²⁷ Irosati iquenqueshiretacaantacariri Satanashi Jorashi iraacaanteri Jesoshi. Icantanaqueri Jesoshi:

—Ora piquenqueshiretiri panteri, pimateroqueti.

²⁸ Yora oajeitainchari ara te iriotavaqueroji icantquerir. ²⁹⁻³⁰ Ari yaanirotavaquero tanta, irosati ijatantanaca iraacaantanteariri. Yora Jorashi iriotaque quempoyeaque-nariri noirequite maaroni. Ijatantacari, yaamaanaca aparopee icantiri Jesoshi: “Panamanataite ayeari anquimoshireventearo Yavisantaniri”. Pashini yaamaaca icantiri: “Pijate pimpashiyetaiteari ashinoncayetachari”. Ari ijatantanacari, otsitenitanaji.

Icamantajiri iroamere irijataje.

³¹ Impoiji icantanaquena Jesoshi:

—Noponeanaca narori inquitequi, natiritapaaque. Irotantsi meeca impincatsajeitena atiripee, aisati niotacaajeiteri impincatsajeiteri Apa. ³² Aisati inquempetea Apa iriori, iriotacaajeiteri atiri impincatsajeitena narori. Meeca irimatero, eiro isamanitirotsi.

³³ Meeca, noamerejei, eiro osamanititsi nojocajeitantanajempiri. Aitaque nocaman-titacari joriopee, aisati meeca noncamantajeitempi avirori: anta nojatajenta, eiro pimatirotsi pijataje avirori. ³⁴ Pashini noncantajeitempi meeca: pinintavacaajeitea maaroni. Oquempetaca narori nonintajeitimp, aisati pinquempetavacaajeitea avirori, pinintavacaajeitea. ³⁵ Ariorica pinintavacaajeitea, aitaque iriojeitaquempi maaroni atiri: avirojeitaque noamere.

Incante Petero: “Te noneeriji Jesoshi”.

(Mt. 26.31-35; Mr. 14.27-31; Ir. 22.31-38)

³⁶ Icantanaqueri Shimo Petero:

—¿Jaoca pijatajeri, Novincatsarite?

Yacanaqueri:

—Anta nojatajenta, eiro pimatirotsi pojatanaquena meeca. Coajicaquea aitaque pojatanajena.

³⁷ Icantanaqueri Avincatsarite:

—¿Paitampa caari nomatantearo nojatanaquempi meeca? Iroyeeteerica, iro cantain-chia nintacotanaquempi.

³⁸ Yacanajiri Jesoshi:

—¿Ariompa pintacotasanoquena? Queariotaque oca noncamantempire: eiroti-sitarica inei teapa, pincantaque: “Te noneeriji Jesoshi”. Oncarate mava pincantaque.

14

Iraanajeri Jesoshi quemisantatsiri Apaqui.

¹ Aisati icantajeitana Jesoshi:

—Eiro picantashirejeitsi, irointi pishireteari Tasorentsi. Aisati narori, pishiretena.

² Anta inampiqui Apa otimi oshequi pancotsipee. Eiro oshequitime, aitaque noncamantauquempime te oshequiteji. Nojate anta novetsicanontapeempi pisavicanajeiteari avirori coajicani. ³ Ariorica nomatempiro pisavicanente, nompiashijejantempi aisati, naajeitajantempi. Aitaque pintsipajepataajena nosaviquinta narori. ⁴ Piojeitaque jaoca nojatajeri. Piojeitaque aisati jaoca nonquehanajeri.

⁵ Icantanaqueri Tomashi:

—Te niojeiteji jaocarica pijatajeri. ¿Jaoca noncanteari niotanteari jaoca pinquenana-
jeri?

⁶ Icantanajiri Jesoshi:

—Tempa narotaque nijaanajempironeri pinquenantanajeari, aisati narotaque oametapinijeitaquempiro queariotasanotatsiri, aneacaajeitaquempi. Tecatsi pincantea pijatashiteri Apa, narotaque aajeitanajempine. ⁷ Piojeitaquenaricame, aisati piojeitaquerime Apa iriori. Meeca piojeitaqueri. Aitaque pineajeitaqueri.

⁸ Icantanaqueri Jeripi:

—Novincatsarite, ponijayenari piri; irootaque aparoni nocantimpire, aitapaji.

⁹ Icantanajiri Jesoshi:

—Peeranitaque notsipajeitaquempi. ¿Tequerampa piotimatena? Maaroni neaque-
nari, ineakeri Apa iriori. ¿Paita picantantanari meeca: “Ponijayenari piri”? ¹⁰ ¿Tequerampa piotimateji noquempetacari Apa? Aisati iquempetana iriori. Te non-
cantashiteaji. Iquempetaquena Apa, iriotaque matacaanarori notasoncanti. ¹¹ Tempa
nocamantimpi noquempetacari Apa. Aisati iquempetaquena iriori. Pishiretearo oca
nocamantaquempi. Pineasanojeitaquena notasoncantaque, pinquemisantimentasan-
otenaro.

Ariorica irijataje Jesoshi, oshequi irimateneri quemisantatsiri.

¹² Jero aisati icantajeitana Jesoshi:

—Queariotaque oca noncamantempire. Maaroni quemisantanari inquempejeitena,
intasoncante iriori. Nompianaje Apaqui, irootaque iranaacojeitantenari intason-
cantasanojeite iriori. ¹³ Ariorica pishiretaquena, aitaque nomataquempiro paitar-
ica pincoacoteriri Apa. Oca nomatempire irineapincatsatanteeteariri Apa. Tempa
narotaque Itomi. ¹⁴ Pishiretenarica, aitaque nomataquempiro paitarica pincanteriri.
¹⁵ Pinintanarica, pinquemisantajeitena paitarica noncamantajeitempire. ¹⁶ Narotaque
quenquetsatacayerine Apa. Noncanteri, irootaque intiancantajeitempire pashini
Amitacotajempineri. Irosati oncanteani ontsipajeitempi irointi: ¹⁷ irootaque Ishire
Tasorentsí, oamejeitempironeri maaroni queariroyetatsiri. Te iriojeiterozi irinti tseen-
cantatsiri, irootaque caari opocashijeitantzari ontsipajeiteari. Aitaque quiso oajeitaque-
mpi, oncantaitatiyempani. Irootaque piojeitancarori avinti. ¹⁸ Eiro nojoquimpitsi
apaniro, aitaque nompiashijeitajempi. ¹⁹ Irotaintsi nojataje. Eiro ineajeitajanatsi tseen-
cantatsiri, avintiquea neajeitajenane. Nashi noiro nanei, irootaque paneantajeitana-
jeari avirori: pincantaitatiyempani inquitequi. ²⁰ Ariorica nontinaanaje, impoijiquea
piojeitanaque noquempetacari Apa. Piquempejeitaquena avirori, aisati noquempe-
jeitaquempi narori: aacameetsatavacaajeitaca. ²¹ Maaroni iotavaquerori nocantiriri,
inquemisantaquerorica aisati, iriotaque nintanari. Apa ario irinintaqueri nintaquenari.
Aisati narori ario nonintaqueri. Niotacaasanojeiteri jaoca nocanta.

²² Ainiro anta pashini Jorashi, caari ini yora Ishicariote. Isampitiri:

—Novincatsarite, piotacaasanotaquena narori jaoca picanta. ¿Paita caari piotacantari
tseencantatsiri iriori?

²³ Yacanaque Jesoshi:

—Ariorica pinintena, pinquemisantero noneane, irosati irinintantempire Apa iri-
ori. Impoiji nompocashijeitajempi quiso noantempire. ²⁴ Irintiquea caari nintana,
eiro iquemisantirotsi noneane. Oca nocantaquempirica, caari nashi noneane, irointi
irineane Apa tiancaquenari. ²⁵ Ainiroqueratatsi nocarajeitimpi, aitaque nocamanti-
taquempiro. ²⁶ Ioti Apa pishiretaquena, irootaque intiancantempire Ishire, Amita-
cojeitajempineri. Oamejeitapaaajempi maaroni. Irootaque quenqueshireacaajeitajem-
pironeri maaroni nocantajeitaquempi.

Icamantajeititajari Jesoshi iroamere: “Nojataje”.

²⁷ Aisati icantajeitana Jesoshi:

—Noquimoshiretanaque narori, te noncantashireteji. Noninti pinquempetena, pin-
quimoshirejeitanaque avirori. Eiro imatirotsi atiri iroimoshirenquempi. Eiro meeca

picantashiretitsi, irointi piveshireajeitanaquea. ²⁸ Aitaque piquemaque nocantajeitaquempi. Nojatanaje, coajica nompiashijeitajantempi aisati. Yanaacotana Apa itasorentsitasanoti. Arioricame pinintajeitaquename pinquimoshireimentajeitakearome nocamantaquempi: "Nojatanaje Apaqui". ²⁹ Meeca nocamantitaquempi tequeratsita nojataje. Ariorica piotaque omoncarataca nocamantaquempi, pinquemisantajeitaque. ³⁰ Eiro osamanitajitsi nonquenquetsatacaaajempi aisati. Quempejitapaaque pincatsariventajeitiriri tseencantatsiri. Tecatsi incantea iriori impincatsariventena. ³¹ Meeca iriojeitanaquero atiri nonintiri Apa, tempa nantapinitiniri pitarica inintacaquenari. Ari, pincatiaeitanaje. Tsame avaajeitanajea.

15

Yora Jesoshi irisati shiacantajancha ovorents ova.

¹ Jero aisati ishiacantaquenari Jesoshi:

—Narotaque quempetarori ovorentsasanori ova. Iriotaque Apa tsameetacotirori. ² Ipesayetiro ojempequi caari oitsoquitatsi. Irompa irointi oitsoquitatsiri yoameetsataquero oitsoquitasanotantanaqueari. ³ Oca noamejeitaquempi, aitaque oameetsashirejeitaquempi. ⁴ Quiso poajeiten. Aisati narori, quiso noajeitempi. Ojempequi ova, ariorica onchaoareanaque ovorents, eiro omatajatsi oitsoquitaje, tempa oncamaque. Aitaque piquempejeitarori avirori. Eivorica quiso poajeitanatsi, eiro pimatirotsi cameetsayetasiri. ⁵ Narotaque quempetarori ovorents. Avirojeitaque quempejeitarori ojempequi. Maaroni quiso oanari irio majeitajerone pitarica noncoacaayeteriri. Quiso noyeri narori. Ariorica pintentareajeitanajena, tecatsi pimatimataje. ⁶ Yora caari quiso oana, inquempetacaanteeri ojempequi ova, impesheetero, peti. Impoiji ompirijatanaque, irampatoyeetajero coajican, irojoqueetero paamariqui, ontaya, pomein. ⁷ Irosatirica quiso poajeiten, aisati ariorica pishiretearo noneane, pincantena pitarica picoayetiri: aitaque nomataquempi. ⁸ Ariorica pimayetaquero pitarica noncoacayempi, impincatsayeetanteariri Apa. Impoiji iriotasanojeitempi avirotasanotaque noamere.

Yora Jesoshi ishanincatacari maaroni iroamerepee.

⁹ Jero aisati icantajeitanari Jesoshi:

—Inintana Apa. Aisati noquempejtimpi narori, nonintajeitimpi. Quiso poajeiten, anintavacaajeitanteeri. ¹⁰ Pinquemisanterorica nocantajeitimpire, irosati noncanteani nonintajeitempi narori. Noquemisantiro icantaquenari Apa, irosati icantani iriori, inintana. ¹¹ Noquimoshiretanaque narori. Iro nocamantantimpiori oca pinquempetantenari, pinquimoshirejeitanteeri avirori. Nocoaque pinquimoshiretasanojeitanaque maaroni. ¹² Jero oca noncamantempire: tempa nonintajeitimpi narori. Aisati pinquempetea avirori, pinintavacaajeitea. ¹³ Yora intacotariri ishaninca, incamimentaqueririca, iriotaque nintasanotiriri. ¹⁴ Ariorica pimajeitaquero nocantajeimpire, avirotasanotaque noshaninca. ¹⁵ Eiro meeca nocantajeitajimpitsi nonampire, te irioteji namparentsi pitarica yantiri nampitariri. Iro cantaincha niotacaajeitajimpi pitarica icantaquenari Apa, irootaque noshanincatasanotantajimpire. ¹⁶ Te aviro coyeajeitenane; naro nainti coyeajeitimpi. Nontianquempi pimatantearori pitarica noncoacaayetempire. Eiro patsipetarotsi pitarica pantayetenari. Pishiretenarica, aitaque irimatempire Apa pitarica pincanteriri. ¹⁷ Nampiitajempire oca noncamantajeitajempi: pinintavacaajeitea maaroni.

Yora tseencantatsiri iquishiri Jesoshi aisati inquisajeitaqueri maaroni quemisantajeitiriri.

¹⁸ Pashini aisati icantaquena Jesoshi:

—Arioricame inquisajeitaquempi tseencantatsiri, piotasanote naro ijivataque iquisaquea peerani. ¹⁹ Yora tseencantatsiri inintavacaaca. Arioricame pinquempetearime avirori, aitaque irinintajeitaquempime. Iro cantaincha te pinquempejeitajeari. Nocoyeajeitaquempi, irootaque iquisajeitantaquempi. ²⁰ Pinquenqueshireajero nocantajeimpire chapinqui: "Yora inampire te iranaacoteriji nampitariri impincatsarite". Ari iquisajeitaquena. Aisati inquempejeitempi avirori, inquisajeitempi. Te inquemisanteroji nocantajeivetacariri. Aisati avirori, eiro iquemisantajeitrotsi pincamantajeiveteariri. ²¹ Iriotaque Tasorents

tiancaquenari. Iro cantaincha te iriojeiteriji iriori, irootaque inquisajeitantempi. ²² Ari nopocashivetacari, noquenquetsatacaavetacari. Eirome nopocashitirime, eiro otimimotirime meeca irantane. Iro cantaincha meeca tecatsi incantajeite incante: “Te aneroji nantane”. ²³ Yora quisauenari iquisaqueri Apa iriori. ²⁴ Tempa ineajeivetaquena notasoncantayeti. Nomayetaquero caari imayeti atiri iriori. Eirome ineajeivetaquename, eirome otimimotirime irantane. Aiquero ineavetaquena, iquisaquena. Aisati iquisaqueri Apa iriori. ²⁵ Aitaque icantajeitari. Moncaratapaaca oca isanquenayeetiniri: “Iquisashijeitaquena, tecatsi nantavetea”. ²⁶ Ari nontiancajeitajempi Amitacotempineri, ora Ishire Tasorentsi. Omponeaquea Apaqui, cameetsa oamejeitapeempi. Arriorica ompocaque oncamantacotapaaajena narori. ²⁷ Aisati avirori, pincamantacojeitajena narori. Tempa avirojeitaque tsipatapiniyeitaquenari peerani.

16

Icantiri Jesoshi: “Coajica inquisajeitempi”.

¹ Aisati icantana:

—Nocoi eiro pojocajirotsi piquemisanti, irootaque nocamantantajeitimpiori oca. ² Coajica pincoajeivetea pincarajeiterime arioririnte anta apatojeitapinitanta, iro cantaincha iroimpiavajempi. Coajica iroyempi aisati. Aiquero yora quisajeitaqueempineri iraamaya yantiniri Tasorentsi inintacaaquerir. ³ Te iriojeiteriji Apa, aisati narori te iriojeitenaji, irootaque inquisajeitantempi. ⁴ Arriorica omoncarataquea oca nocamantaquempi, aitaque pinquenqueshireanaquero nocamantitaquempiniri, irootaque meeca nocamantantimpiori. Peerani notsipatimpini, irootaque caari nocamantantimpini peerani, meecari meeca irootaji nojataje, irootaque nocamantasano-tantimpiri.

Ompocapaaque Ishire Tasorentsi.

⁵ Aisati icantana Jesoshi:

—Meeca nojatanaje tiancaquenariqui. Iro cantaincha te pisampijeitenaji: “¿Jaoca pijatajeri?” ⁶ Meeca quea, meeca, nocamantaquempi, irootaque poashiretasanojeitan-tanacari. ⁷ Tampatica nocamantaquempiro oca. Ocamente satimotimpi nojataje. Eirorica nojatajitsi, eiro opocashijeitimpitsi Amitacojeitelpineri. Arriorica nojatanaje, aitaque nontiancajeitapaaquempiro. ⁸ Areetapeemparica, iotacaajeitapaaqueri tseencantatsiri te oncameetsateji yantayetiri. Iotacaajeitapaaqueri aisati jaoca incantajeitajeari in-cameetsatantajeari. Aisati iotacaajeitapaaqueri jaoca incanteeari Tasorentsi iroasanque-tanteariri maaroni tseenquirir. ⁹ Te inquemisantajeitenaji, irootaque iroasanqueti-mentanteariri caari cameetsatatsi. ¹⁰ Coajica nompeimotanajempi, nojatanaje Apaqui, irootaque iotacantajeitapeempariri atiri nocameetsataque. ¹¹ Iotacaajeitapeeri iroasan-quejeiteri Tasorentsi. Tempa irisati oasanquejeiterineri yora pincatsariventajeitiriri tseencantatsiri. ¹² Ainiroquera oshequi noncamantajeitimpimeri, iro cantaincha eiro pimajeitirotsi piojeitavaquero meeca. ¹³ Queariotasanotaque maaroni oamejeitimpiri Ishire Tasorentsi. Arriorica ompocapaaque, iotacaapeempiro maaroni queariotatsiri. Eiro oametantashitapaatsi. Paitarica oquemaqueri irootaque oamejeitapeempi. Oame-tempi jaoca incanteeteari coajicani. ¹⁴ Oca nocantajeitimpiri, irootaque oametempineri; iotacantempiri nopincatsaritaque. Maaroni icantayetanari Apa, nocamantayetajim-piro aisati narori, ¹⁵ irootaque nocantajeitantaquempi: “Oca nocantayetaquempi, irootaque oametempineri”.

Icantiri Jesoshi: “Poashirejeivetaquea, impoji pinquimoshirejeitanaje”.

¹⁶ Aisati icantana Jesoshi:

—Capichanivaniji eiro pineajanatsi. Osamanitimataque capichaji, ario pineajena aisati.

¹⁷ Irosati nocantavacaarantantanacari:

—¿Jaoca ocantari oca icantaqueeri? “Capichanivaniji eiro pineajanatsi. Osamaniti-mataque capichaji, ario pineajena aisati”. Icanti aisati: “Nojataje Apaqui”. ¹⁸ ¿Paitasa icantantari: “Capichanivaniji”? Te ayotacotavaqueri icantaqueeri.

¹⁹ Iotaque Jesoshi nocoajeiveta nosampiterime. Icantanaquena:

—¿Pisampitimentavacaarompa nocantaquempi? “Capichanivaniji eiro pineajanatsi. Osamanitimataque capichaji pineajena aisati”. ²⁰ Queariotaque oca noncamantajeitempi. Ario piraacojeitanaquea, maaroni, poashirejeitanaquea. Iranti quimoshirejeivetachane tseencantatsiri. Poashirejeivetaquea, iro cantaincha pinquimoshirejeitanaje aisati. ²¹ Ariorica omoncarataca otimiri tsinane otomi, oquemaatsitacari. Itimanaquerica ojananequite, te onquenqueshireajeroji oquemaatsitacari, irointi oquimoshireimen-tiri yora timaintsiri. ²² Aitaque pinquempejeitaqueari meeca avirori, poashirejeivetanaquea. Iro cantaincha aitaque noneajeitajempi aisati. Pinquimoshirejeitanaque, tecatsi oashiretacaajempine aisati. ²³ Meeca, eiro pisampijetajanatsi paitarica. Queariotaque oca nocantimpipi. Ariorica pishiretaquena, impaquiempi Apa paitarica pincanta-jeiteriri. ²⁴ Peerani te pishirejeitenani, te pinquenquetsatacacjeiterini Apa. Meeca quea pinquenquetsatacaponiteri. Paitarica pincanteriri, aitaque inquemisantaquempi, pin-quimoshirejeitasanotantanaqueari.

Jesoshi icamantacotasano

²⁵ Aisati icantaquena:

—Ari noshiacaventapinitimpironi paitarica, iro cantaincha coajica eiro noshiacaven-tajimpirotsi aisati. Aitaque tampatica noncamantacotasano Apa, eiro nomanapitsa-tajimpirotsi. ²⁶⁻²⁷ Impoiji pishiretanaquena, pinquenquetsatacayeri Apa. Avirojeitaque nintaquenari. Pishiretacaro noponeaca Tasorentsiqui, irootaque inintajeitantzimpipi Apa. Ari inintasanojeitaquempi, irootaque impajeitantzimpiori maaroni coiteimo-jeitimpipi. Natsipetashitarocari namanacoventajeitajempi aisati. ²⁸ Nosavicaveitani irioriqui, irosati nopolcantacari quipatsiquica. Meeca nojocanajero quipatsica, nom-piashitanajeri Apa.

²⁹ Nocantiri:

—Meeca quea picamantasanotaquenaro. Te pishiacaventajenaroji. ³⁰ Meeca nio-jeitaque pitsotencajeitiro piojeitiro maaroni, irootaque noquemisantantacari piponeaca Tasorentsiqui. Tecatsi meeca nosampitajempi.

³¹ Yacanajana Jesoshi:

³² —¿Ariompa piquemisantasanotaque meeca? Irotaintsi iroimishiyeetempi, pijajeitanaje pinampipeequi. Pojocajeitanajena apaniro. Aitaque irotaintsi omoncarat-apeempa meeca. Iro cantaincha te apaniro none, quiso yoana Apa iranti. ³³ Iro nocamantantzimpiori oca piveshireanteari. Aitaque piveshireimentajena. Aca quipat-siquica iroashinonqueetempi, iro cantaincha piveshireajeitanaquea. Nanaacojeitaqueri maaroni timajeitatsiri quipatsiquica, nopolcantacari nainti.

17

Irisati cantacoventashitacha Jesoshi.

¹ Irootaque icantajeitanari Jesoshi, irosati yamenantanaca jenoqui. Icanti:

—Apa, moncaratapaaca. Meeca piotacaajeiteri atiri nopolcatsaritasanoti: tempa narotaque pitomi. Aisati nonquempetea, niotacaajeiteri pipincatsaritasanoti avirori.

² Tempa aitaque pitianaquea nopolcatsariventajeiteri maaroni atiri, irootaque nomafantarori naneacaajeitajiri maaroni picoyeaquenari. Iro picoyeantacariri incantaitatiyempani iraneajeitanaje iriori aviroriqui. ³ Aviro Tasorentsi, apaniro pini. Cameetsa iriojeitimpilo maaroni atiri. Cameetsa iriote naro pitiancane, naro Jeso-quirishito. Maaroni iotanari incantaitatiyempani iranee inquieequi. ⁴ Aca quipatsiqui nomajeitaquempi maaroni pinintacaaquenari, irootaque ipincatsatantzimpiri atiri.

⁵ Peerani, Apa, tequeratani avetsiqueroni quipatsi, notsipatimpini, nopolcatsaritaqueni. Meeca pinquempetacaajena aisati, nopolcatsaritaque, nontsipatajempi.

Icantacoventiri Jesoshi iroamerepee.

⁶ Ari yovaajiro aisati, icantiri Iriri:

—Jeri yoca atiripee quipatsiquiniri pashijeitacari. Picantaquena: “Pinquempoyean-jenari”. Ari niotacaajeitaqueri jaoca picantari. Iquemisantajeitavaquero pineane.

⁷ Meeca iojeitanaque aviro avinti intasanotarori maaroni poamejeitaquenari. ⁸ Maaroni

poametaquenari, novaaqueneri noamerepee, noametasanojeitaqueri maaroni. Iojitavaquero. Iotasanolavaque aviro tiancaquenari. Ainiro ishire iriori iquemisantatarori aviro tiancaquenari.⁹ Iriojeitaque nocantacoventaque. Te noncantacoven-teriji irinti tseencantatsiri, irintiquea yoca noquempoyejimpiri. Tempa avirotaque ashijeitariri,¹⁰ aisati nashijeitacari narori. Aisati nashijei narori, pashijeitacari avirori. Iquemisantajeitana, irootaque ineapincatsajeitantanari.¹¹ Eiro notimanajitsi aisati quipatsiquica, irioquea irinti timajeitanajantsine, naintiquea nanti piashitanajempine. Aviro, Apa, cameetsari. Tempa picantani pitasoncanti. Meeca aviro quempoye-jeitajerine yoca noquempoyeaquemppiri, inquemppeavacaanteari. Nocoaque irimoncar-ajeitajeeta aquemppeavacaajeita arori.¹² Nocarajeitantacariri, tempa pimatacaquaena, irootaque nomatantarori noquempoyeantacariri. Nojocacoventajeitaqueri: tecatsi ashinoncachane, apaniro irashinoncayea Jorashi, irootaque jatatsineri Sharincaveniqui. Aitaque omoncarataquea ocamantacotitarini sanquenatachaniri peerani.¹³ Meeca nom-piashitanajempi. Ainiroqueratatsina quipatsiquica, nocamantajeitiri oca, inquimoshire-jeitasanotanteari, inquempetena narori noquimoshireti.¹⁴ Noametaqueri pineane, meeca iquisajeitanaqueri tseencantatsiri. Iro iquisantacariri, te inquemppeempariji. Iquempetana narori, te nonquemppeempariji tseencantatsiri.¹⁵ Jeri itimajeiti noquempoyeaquemppiri quipatsiquica. Te noncantempiji: "Paanajeri". Apatiroti nocantimpi: "Pojocacoventeri. Yantiricari camaari".¹⁶ Te inquemppeempariji tseencantatsiri. Iquempetana narori, te nonquemppeempariji.¹⁷ Piotacaajeiteri queariotasanotatsiri, inquearioventantempirori maaroni picoacairiri. Ora pineane, irootaque queariotasan-otatsiri.¹⁸ Pitiancaquena nojatashitantariri atiri noquenquetsatacaaajeitiri. Aisati narori noquempetaqueri, notiancajeitaqueri irijatashitantariri atiri inquenquetsatacaaajeiteri.¹⁹ Noquearioventimpido maaroni, iojeitantarori queariotatsiri, irosati inqueariovent-ajitantempirori iriori.

Icantacoventajeitiri Jesoshi maaroni quemisantiriri.

²⁰ Jero aisati icantiriri Jesoshi iriri:

—Nocantacoventajeitiri noamereca. Aisati noncantacoventajeiteri yora iquemisan-taaajeitiri: yora quemisantajeitanari, maaroni.²¹ Nocoaque inquemppeavacaajei-tanajea maaroni. Tempa aquemppeavacaaca, Apa, arori. Aisati nocoaque inquem-pejeitjee iriori quemisantajeitanari, irosati inquemisantanteari atiri pitiancasano-taquena.²² Pitasoncacoventaquea noquempetantaquemppiri avirori, aisati notasonca-coventajeitaqueri iriori, inquempetavacaajeitajeari. Irimoncarajeitajee arori, aque-mpeavacaaca.²³ Iquempetaquena narori. Noquempetaquempi avirori. Irootaque inquempetavacaasanojeitanteeari, irosati iriojeitanteeari atiri pitiancaquena. Irio-jeitanaque pinintaquena, aisati piquempejeitaqueri, pinintasanojeitaqueri maaroni.²⁴ Tequerani ontimeni quipatsi, tempa pinintitanani, irootaque pipeantaquenari pin-catsari. Meeca, Apa, nocoaque intsipajeitena iriori irineantenari nompincatsari-tasanotanaque. Tempa picantana: "Pinquempoyeajeitenari", aitaque nomataquem-piri.²⁵ Picameetsatasanotaque, Apa. Te iriojeitimpiji tseencantatsiri, iro cantaincha niotimpi nanti. Aisati iojeitaquempi yocapee pitiancaquenari,²⁶ niotacaajeitaqueri jaoca picantari avirori. Aitaque nampiitajeri niotacaasanoteri, pinintasanojeitanteeari, pinquempetacanteri narori pinintasanotana. Aisati inquemppeajeitena.

Irootaque icantiriri Jesoshi Iriri.

Yaantanacariri Jesoshi.

(Mt. 26.36-56; Mr. 14.32-52; Ir. 22.39-53)

¹ Ari yovecarataquero Jesoshi iquenquetsatacairy iriri, irosati nojajeitantanaja: Je-soshi, aisati maaroni iroamerepee. Nomonteanajaro pirijavinteni pajitachari Seroni. Nojajeitanaji panquiveerentsiqui anta.² Aitaque anta ijatacaapinijeitanari Jesoshi, irootaque iotantarori iriori Jorashi, yora aacanterineri.³ Yora jivatacaaajeitiriri saserote-pee, jeri variseopee itiancajeitavaque soraro, jeri variria. Ijivajeitapaaqueri Jorashi. Yamajeitapaaque tsionmentotsi, sampi, yoantamento aisati;⁴⁻⁵ ipocashijeitapaaqueri

Jesoshi. Iotaque iriori Jesoshi jaoca incanteriri. Ijatanaque itonquiotavacari, icantavaqueri:

—¿Janica picoiri?

Yacanaqueri:

—Yora Jesoshi nasaretesati.

Icantavaqueri:

—Narotaque.

⁶ Icantantavacariri Jesoshi: “Narotaque”, irosati ipiantanaca itapiiqui. Ipariajeitanaque quipatsiqui, tiriquin. ⁷ Yapiitajiri:

—¿Janica picoasanotiri?

Yacanajiri iriori:

—Yora Jesoshi nasaretisati.

⁸ Icantajiri:

—Aitaque nocantajeivetaquempi: “Narotaque Jesoshi”. Naroricampa picoiri, pishinejeiteri irijajeiteta yoca notsipajeitacarica.

⁹ Moncaratapaaca icantaqueriri Jesoshi Iriri: “Yoca picantaquenari: ‘Pinquempoyenari’, tecatsi ashinoncachane”. ¹⁰ Irosati Shimo Petero yaantanacaro isavirite. Ipsaqueri inampire ivincatsarite saserotepee: ipeshitaqueri iyempita iracosanoriquiniri. Ipajita nampirentsi Marico. ¹¹ Irosati icantantanacari Jesoshi Petero:

—Poimpajero pisavirite poantaroriqui. Irootaque inintacaquenari Apa irayeetena. ¿Nontsaneapitsatearimpa?

Yayeetanaqueri Jesoshi Anashiqui.

(Mt. 26.57-58; Mr. 14.53-54; Ir. 22.54)

¹² Irosati yaajeitantanacari Jesoshi. Irio aajeitanaqueriri soraropee, iyapitanote, variria. Ari yoisojeitaqueri. ¹³ Ijivatapainti yaanaqueneri Anashi. Iriotaque iriconquiri Caijashi. Ari iquenquetsatacairy Jesoshi. (v 24) Impoiji icanti yora Anashi:

—Paanajeri anta Caijashiqui, irisampitavaquerita iriori paitapeerica.

Yora Caijashi, iriotaque meeca ivincatsarite saserotepee, ¹⁴ cantaqueriri jorioppee: “Ocameetsatimotimpi incameta shiramparinta aparoni, iravisacojeitantanajeari ashanincapee”.

Irisati manacotaincha Petero.

(Mt. 26.58-70; Mr. 14.66-68; Ir. 22.55-57)

¹⁵ Shimo Petero iriotaque oijatacoventavetanacariri Jesoshi, itsipatari pashini iroamere. Yora ivincatsarite saserote iotiri yora tsipatariri Shimo, irootaque ishinetantacariri iriori ipocaque ivancoqui, itsipatapaacari Jesoshi. ¹⁶ Irinti Petero icatiapaaca ashitacorontsiqui araquerora. Isoquijanaji yora itsipatapaacari, icantapaaquero shentirori ashitacorontsi:

—Pishineteri inqueapee iriori.

Ocantiri:

—Ari.

Irosati iqueantapaacari Petero iriori. ¹⁷ Ora nampirentsi ocantavaqueri:

—¿Caarimpimpa avirori iroamere Jesoshi?

Icantiro:

—Caarina.

¹⁸ Ocatsincaiteaque. Yoisajeitaquero paamari nampirentsipee, jeri soraropee. Yaquisiantajetaca paamariqui. Aisati iriori Petero itsipajeitapaacari yaquitsiantapaaca.

Yaanajiri aisati Jesoshi Caijashiqui.

(Mt. 26.59-66; Mr. 14.55-64; Ir. 22.66-71)

¹⁹ Yora ivincatsarite saserote isampitaqueri Jesoshi:

—¿Janica poametapinitiri? ¿Paita poametapinijeitiriri?

²⁰ Yacanaqueri Jesoshi:

—Iquemajeitaquena maaroni atiri noametantiri. Noametantapiniti anta yapatojeitancari. Aisati noametapinitantaque ivancoqui Tasorentsi. Tecatsi nomanapitsateri

ashaninca. ²¹ ¿Paita pisampitantanari narori? Pisampijeiteri irinti quemajeitaquenari pitarica nocantaqueriri. Iojeitaquero iriori.

²² Irosati ipasavorotantanacari aparoni soraro catiainchari ara. Icantiri:

—¿Arimpa ampiatsateari ivincatsarite saserote?

²³ Yacanaqueri:

—Terica oncameetsate nocantaqueriri, piotacayenaro. Irompa ocameetsatirica nocantaqueriri, ¿paita pipasavorotantanari? ²⁴ (-)

Yapiitaja Petero imanacotaja irisati.

(Mt. 26.71-75; Mr. 14.69-72; Ir. 22.58-62)

²⁵ Ainiroquera Shimo Petero yaquitsiantaca. Irosati icantanteetacariri:

—Tempa aviro iroamere Jesoshi.

Irisati manacotanaincha, icantanaque:

—Caarina.

²⁶ Itsipajeitari aparo inampire Caijashi. Iriotaque ishaninca yora ipesaquempitavetacari Petero. Icantakeri:

—Tempa noniimpi panquirentsiqui, pitsipatari Jesoshi.

²⁷ Yapiitajiro Petero imanacotaja. Irosati ineantanaca teapa.

Yaanajiri Jesoshi Piratoqui.

(Mt. 27.11-14; Mr. 15.1-5; Ir. 23.1-5)

²⁸ Capichaji quitaiteri yojocajeitanaquero ivanco Caijashi. Yayeetanaqueri Jesoshi ivancoqui Pirato, yora pincatsaritatsiri. Caari ini jorio, irootaque caari icoajeitanta joriopee inqueajeitapee ivancoqui. Icantiri:

—Irotaintsi avajeitimentearo Yavisantanir. Ariorica ajate ivancoqui Pirato, eiro amatirotsi avajeitea, eiro ineacameetsajeiteetsi Tasorentsi.

²⁹ Irosati isoquijashijbeitantanacariri Pirato. Icantajeitavaqueri:

—¿Paitampa yantaqueri yoca shiramparica pamantaquenariri?

³⁰ Yacanaqueri iriori:

—Ainiro yantayetiri. Eirome yantirome caari cameetsatatsi, eiro namimpirime.

³¹ Irosati icantantavetacari Pirato:

—Paajeitanajeri avinti. Tempa otimi sanquenarentsi oametimpiri poasanquejeitanteeariri. Pimamateriquetite avinti poasanquetayeri.

Icantanaqueri iriori:

—Te irishineyeetenariji noyeri.

³² Irootaque icantaqueri omoncaratantacari icantitacari Jesoshi. Tempa icantitani: “Impajacoyeetena”. ³³ Irosati ipiantanaja Pirato ivancoqui. Icajemicantajiri Jesoshi aisati. Icantiri:

—¿Avirompa ivincatsarite joriopee?

³⁴ Yacanaqueri Jesoshi:

—¿Piovetaquenampa? ¿Paita pisampitantanari? ¿Timatsimpa pashini camantaquem-piri?

³⁵ Yacanaqueri Pirato:

—¿Narompa meeca jorio? Iriotaque pishaninca amajeitaquempi aca, jeri jivatacaa-jeitiriri saserotepee iriori. ¿Paita pantasperi quisajeitantaquempi?

³⁶ Yacanaqueri Jesoshi:

—Te nompincatsariventante aca quipatsiqui. Nompincatsariventanteme aca, aitaque inquisacoventajeitaquename nonampire. Eirome ishinetirime joriopee iramenname. Iro cantaincha te aca nompincatsariventante.

³⁷ Irosati icantantacari:

—¿Ariompa? ¿Aviotaquempa pincatsari?

—Je, narotaque Pincatsari. Queario picantaquena. Nocamantajeitiri atiripee queari-otasanotatsiri. Irootaque notimantacari, irootaque nopolcantacari quipatsiquica. Maaroni yora iotavaquerori queariotasanotatsiri, iriojeitaque quemisantanari.

³⁸ Icantiri iriori Pirato:

—¿Paita ojita oca picantiri: “Queariotasanotatsiri”?

Irosati isoquijashitantanajari joriopee, icantajeitiri:

—Nosampivetaquempi incaranqui, te pincamantenaji paita yantasanotaqueri noamaanteariri.

Iroimpacajerime Pirato Jesoshi.

(Mt. 27.15-31; Mr. 15.6-20; Ir. 23.13-25)

³⁹ Pashini icanti aisati:

—Ariorica omونcaratapaaja Yavisantaniri, noimisoquijapinitimpri aparo yoimin-queetiri. Tempa aitaque ocantari amejeitari. ¿Picoimpa noimpacajempiri pivincatsariteca?

⁴⁰ Irosati icajemantajeitanaca maaroni:

—Eiro poipacanaritsi yora. Irio poimisoquijajenari Varavashi irinti.

Yora Varavashi coshinti ini.

19

¹ Irosati yaacantantacariri Pirato Jesoshi, ipasatacantaqueri. ² Yora soraro itapoyetaqueneri iramatseere quemariiti. Yamatseetacaacari. Iquitsaataqueri quitioncari. ³ Ipocashitapinijeitaqueri, icantamempeashijeteacari:

—¿Avirompa pincatsariventiriri jorio? Iji, iji, iji.

⁴ Ipasavorotantapaacari iraco. Isoquijashitanajiri Pirato joriopee aisati. Icantajeitiri:

—Jeri yoca, namajimpri aisati. Nosampivetaquempi, iro cantaincha tecatsi pincaman-tajeitena niotanteari paita piquisantacariri.

⁵ Isoquijanaji Jesoshi iriori. Yamatseetacaro quemariiti, iquitsaataca quitioncari. Icantajeitiri Pirato:

—Jerica.

⁶ Yamenajeitavaqueri jivatacaaajeitiriri saserotepee, soraro aisati. Icajemeitanaji:

—Pimpajacotacanteri, pimpajacotacanteri.

Icantiri Pirato:

—Paajeitanaqueri avinti, pimpajacojeiteri. Nosampitacovetacari, tecatsi nonquema-coteri irante.

⁷ Yacanajiri jorio:

—Timatsi sanquenarentsi oametanari ocameetsati incame jitasonentsitachari. Tempa icanti iriori: “Narotaque Itomi Tasorentsi”, irootaque ocameetsatantacari incame.

Yapiitajiri Jesoshi, isampitajiri aisati.

⁸ Iquemantavaracari Pirato icantajeitaqueririri, aiquero ijatatii itsaroasanotanaque.

⁹ Iopianaja, iqueanaji ivancoqui. Icantapajiri Jesoshi:

—¿Jaoca piponeari avirori?

¹⁰ Te iranqueji Jesoshi iriori. Irosati icantantanacari Pirato:

—¿Paita caari pacantana? Naro pincatsari. Noncoquerica, ari nomatero noim-pacacoventajempi. Aisati oquempeta, noncoquerica, nomatero nompajacotacantempi. Tempa piotaquero.

¹¹ Yacanaqueri Jesoshi:

—Eirome ishinetimpime Tasorentsi, tecatsi pincantename. Yora amacantaquenari aca, irio antasanotaquerori caari cameetsatatsi irinti.

¹² Irosati icoantavetanaja Pirato iroimpacaajerime. Iro cantaincha icajemeitanaji joriopee aisati:

—Ariorica poimpacaajeri yora, te pishanicateariji Shisari. Jeri yora cantashitachari: “Narotaque pincatsari”. Tempa iriotaque quisaqueriri pivincatsarite.

Ipajacotacantaqueri Jesoshi.

¹³ Iquemantacari Pirato icantajeitaqueririri, isoquijacaanajiri Jesoshi. Isavicapaaque anta icantacoventantapinitinta. Anta yovetsiqueetironta mapi, ipampaiteyeetironta. Icanteetiro evereo “Cavata”. ¹⁴ Itampaticati meeca catsirincaiteri, irotaintsi quitaiteri iquenqueshiretarorri Yavisantaniri. Irosati icantajeitanacari Pirato:

—Jeri yoca pivincatsarite.

¹⁵ Icajemeitanaque iriori:

—Payeri. Paanaqueri anta. Pimpajacotacanteri.

Isampitiri:

—*¿Nompajacotacanterimpa pivincatsarite?*
Yacanaqueri jivatacaaajeitiriri saserotepee:
 —Te nompincatsateriji, apaniro irinti Shisari.
¹⁶ Irosati ipajacotacantantacari.

Ipajacotaqueri Jesoshi anta Coricotaqui.
 (*Mt. 27.24-50; Mr. 15.21-41; Ir. 23.25-49*)

¹⁷ Irio soraro aajeitanaqueriri. Irisati aanajiro Jesoshi coroshi. Yojocanajiro nampitsi, yareetapaaca toncaariqui pajitachari lítontsini. Evereo ipajitiro: “Coricota”.
¹⁸ Aitaque ipajacoyetaqueriri coroshiqui. Itsipatamacri apite shirampari. Ipajacoyetaqueri iriori coroshiqui pashini. Yoyeetaqueri Jesoshi nianqui. Aparo yoyeetaque iracosanoriqui Jesoshi, irio itsipa irampatequi. ¹⁹ Pirato isanquenatacantaque cantatsiri: “Jesoshi nasaretesati, iriotaque ivincatsarite jorio”. Ipatacacotacantacuero coroshiqui.
²⁰ Oquempejitaro nampitsi aitaque ipajacotaqueriri Jesoshi. Oshequi jorio neanataquerori isanquenatiri. Osanquenavetaca irineanequi jorio, oromasati, aisati irineanequi quireshiasati. ²¹ Yora jivatacaaajeitiriri saserotepee icantiri Pirato:

—Eiro pisanquenatiotsi: “Iriotaque ivincatsarite jorio”, irointi pisanquenate: “Irio cantashitachari: ‘Naro ivincatsarite jorio’”.

²² Yacanaqueri Pirato:

—Aitanaque, nomataquero: nosanquenatacantacuero.

²³ Ari ipajacotaqueri soraro. Yovojeaquero iitsaareni, otsipasatitapaaque, irosati ipavacaantacaro. Te orimpiteaji irocoroni, intani itijeetiro maaroni. ²⁴ Irootaque icantavacaantajetacari:

—Eiro atsereirotsi. Tsame antanatiteri, ayotanteari janica ashitajearone.

Aitaque icantari soraro. Imoncarataquero Sanquenarentsi cantatsiri: “Impavacayearo noitsaareni. Irantanatitajetaquenaro noicoroni”. ²⁵ Ora iriniro Jesoshi ocatapaaca quempeji ipajacotaca. Ainíro otimi ireento, aisati opajita iroori Maria. Irootaque ijina Quereojashi. Otimi ara aisati Maria maquitarasato. ²⁶ Ineajiro Jesoshi iriniro, aisati inequena narori. Narotaque iroamere inintasanotiri. Icantanaqueri:

—Ina, jeri yora, pintomintajeari.

²⁷ Icantanaquena:

—Jero ora, pinrontajearo.

Irosati naantanajaro novancoqui. ²⁸ Iotanaque Jesoshi aitaque moncarajetaca maaroni. Irosati icantantanaca:

—Nomireni.

Iro icantantari imoncarataquero ocantiri Sanquenarentsi. ²⁹ Otimi ara choncorina, ojaaca quepishijari. Yoviinqueetaquero atsimiicajatirori. Yoaueneri sataamentotsiqui. Ijicotacotaquereneri ivantequi Jesoshi. ³⁰ Yatsimiicavaquero, irosati icantantanaca:

—Aitaque meeca, nomoncarataquero icoacaanari Apa.

Irosati yoivotantanaca, icamanaque, toren.

Isataaqueri Jesoshi.

³¹ Meeca yovetsiquimentajeitiro jorio Yavisantaniri. Onquitaitetamaque, iro saavaror irimaoreantasanojeiteari. Te incoajeiteji jorio yora pajacojeitachari iroavisayero saavaror coroshiqui, irootaque icantajeitantaracari Pirato:

—Pincarajacantitajeiteri ivoripee, irosati pimpajacoreacantantajeariri.

³² Irosati ijatashijetantanajari soraro, icarajavoritaqueri yora itsipatamacri Jesoshi. Aisati icarajitaqueri iriori pashini. ³³ Yovaashivetapaacari iriori Jesoshi, incarajiterime iriori; iro cantaincha ineapaaqueri camaque irinti, irootaque caari icarajitantari irinti ivori. ³⁴ Iro cantaincha aparo soraro isataapaaqueri imerequiqui. Ocontejatapaaque iriraja, tsiquiririri. Nija aisati. ³⁵ Naro neacotaqueriri, meeca narotaque camantacotaqueriri. Nioti queario oni nocamantimpiri, pinquemisantantajeari avirori.

³⁶ Aitaque icanteetaqueriri, irootaque omoncaratantacari Sanquenarentsi cantatsiniri: “Eiro icarajiteeritsi itonqui aparoni”. ³⁷ Timatsi pashini isanquenayeetiniri: “Aitaque irameneeteri Quirishito, yora irisatayeeteri”.

Yoiminqueetaqueri Jesoshini omoroqui.

(Mt. 27.57-61; Mr. 15.42-47; Ir. 23.50-56)

³⁸ Itimi anta Jose arimateasati. Iroamere Jesoshi inaveta, iro cantaincha imanaquero. Iro imanantacarori, itsaroacaacari ivincatsaritepee jorio. Ijatashitaqueri meecca Pirato, icantapairi:

—Pishinetajenari Jesoshini, naanajerita.

Icantiri:

—Paanajeri.

Irosati ijatantanaca, yaanajiri. ³⁹ Ijatanaque iriori Nicoremo. Iriotaque jatashitiriniri peerani Jesoshi tsiteniriqui. Yaacotanaqueneri intiritanteariri. Iconoquero oyashi inchato pajitachari mira, ovane inchato pajitachari aroeshi. Aamaaca otenati 45 quiro.

⁴⁰ Yaajeitanaqueneri Jesoshini. Iro tocoyatsa yapinaicacotantacariri, itsipataquero casancajari. Irootaque yametari jorioppee, ariorica yovetsiquiri camatsiri. ⁴¹ Otiminta panquirentsi quempeji ipajacojeitaquerinta. Anta panquirentsiqui otiminta iroanteariri camatsiri, iroquera imoqueetiro. ⁴² Irotaintsi inquee catsirincaiteri, omoncaratanteari Yavisantaniri. Inequero Jose oquempejitaque omoro, irootaque yoantacariri Jesoshini anta.

20

Ocoavetari Maria Jesoshini.

(Mt. 28.1-10; Mr. 16.1-8; Ir. 24.1-11)

¹ Otomincotapaaque. Tsiteniquera ojatamanaque Maria maquitarasato anta omoroqui yoavetacarinta Jesoshini. Oneapaatiro jocanaja mapi yashitacotanteevetacariri.

² Narotaque iroamereni inintasanotiniri Jesoshi. Notsipatari anta Shimo Petero. Jero oshiashitapaaquena Maria. Ocantapaaquena:

—Yayeetajiri Avincatsariteni. Te aneajeriji yoavetacarinta. Te nioteji jaocarica yoyeetajiriri.

Yamenajeivetajari Petero, jeri Joa.

(Ir. 24.12)

³ Irosati nojatantanaca apite. Nojatanaque yoavetacarinta. ⁴ Noshianaca apite, nanaacotaqueri nainti Peterò. Naro anaacotaqueririri nareetapaaca anta yoavetacarinta.

⁵ Noivotapaaca, namenapaaque tsompoina. Noneajiro tocoyatsa ovaja omoroqui, iro cantaincha te nonqueapeeji. ⁶ Impoitapajji iriori Shimo Petero. Irinti queapaintsi tsompoina. Irosati ineapaaque iriori tocoyatsa. ⁷ Ora panio ipashicanteevetacariri iitoqui, te ontsipatearoji tocoyatsa. Apitivitaja, ovashitaja iroori. ⁸ Ari noqueanaque narori, noneapaaquero, irosati niotantanaca tinaanaja Jesoshi. ⁹ Tequerata nonquenqueshiretajeroji Sanquenarentsi cantatsiri: “Incamavetaquearica Quirishito, aitaque intinaanaje”. ¹⁰ Irosati nopiantanaja novancoqui.

Oneaqueri Maria Jesoshini.

(Mr. 16.9-11; Ir. 24.10)

¹¹ Irointi Maria catianinchay saiteriqui, iraacotaqueri. Oivotanaca, amenanaque tsompoina. ¹² Oneaqueri apite inampire Tasorentsi, iquitsaataro quitamarori. Isavicaque yoavetacarinta Jesoshini. Isavicaque aparoni iitoyeevetacari Jesoshini, irio itsipa iitiqui.

¹³ Icantiro:

—Tsinane, ¿paita piraantari?

Ocantajiri iroori:

—Yayeetanajiri novincatsariteni. Te nioteji jaocarica yoyeetajiriri.

¹⁴ Irosati opitsocantanaja. Oneaqueri Jesoshi icatiapaaca, iro cantaincha te iotavaque-riji. ¹⁵ Icantiro:

—Tsinane, ¿paita piraantari? ¿Janica picoiri?

Ojitalavaqueri irio tsameetacoyerirori panquirentsipee. Ocantiri:

—¿Avirompa aanajiriri novincatsariteni? Pincamantajenate jaocarica poajiriri. Aitaque naajanteri narori.

¹⁶ Icantanajiro iriori:

—Maria.

Opitsocanaca iroori, ocantanaqueri:

—Oametanari.

¹⁷ Irosati avitsanotantacariri. Icantanajiro:

—Poimpacajena: tequeratsita novajenoquea Apaqui. Meeca nocoaque pijatashijeiteri quemisantajeitanari, pincamantajeitapajeri meeca novajenocaja Apaqui. Tempa iriotaque Tasorentsi. Tempa irisati Piri avirori, piotiri Tasorentsi ini, irootaque pipincatsatantacariri avirori.

¹⁸ Irosati opocashitantajanari narori, aisati itsipapee iroamerepee, ocamantajeitapajana:

—Noneajiriyea Avincatsarite.

Ocamantapaaquena icamantayetaquerori Jesoshi.

Intapaajari Jesoshi, inijaapaaajari iroamereni.

(Mt. 28.16-20; Mr. 16.14-18; Ir. 24.36-49)

¹⁹ Ishaavijiiteanaji meeca, napatojeitaja, nocarajeitajiri itsipapee iroamere. Notsaroa-aa jeitanacari jivatacaajeitiriri noshanincae, yora oacantaqueriri Jesoshi, irootaque noyavitantacarori ashitacorontsi. Imapocashijeitapajana Jesoshi, icatiapaaja nianqui. Icantajeitapajana:

—Piveshireajeitanajea.

²⁰ Irosati inijantajeitapaaquenaro iraco, aisati imerequi. Noneajeitavajiri Novincatsarite, irosati noquimoshirejeitanajana. ²¹ Yapiitajana:

—Piveshireajeitanajea. Tempa irio tiancaquenari Apa peerani, aisati meeca nonquem-petacayempi avirori, nontianquempi.

²² Irosati itasoncantajeitanaquena, joo. Icanti:

—Meeca ompocashijeitempi Ishire Tasorentsi, quiso oajeitanaquempi. ²³ Ariorica pineaqueri ashaninca iquemisantasanotaquena, irosati pincantanteariri: “Incav-intsayempi Tasorentsi avirori, eiro iquishimentimprotsi pantayetiri”. Irootaque pincanteriri: tempa aitaque incavintsaasanoteri Apa yora pincanteri. Pincanterica itsipapee: “Te pinquemisanteji, irootaque inquishimentantempirori Tasorentsi pantayetiri”, aitaque inquishimentaqueri.

²⁴ Ipocashijeitantaquenari, te ameriji irinti Tomashi, yora ipajiyetiri Tsipari; aparoni peaincha. ²⁵ Ari ipocapaaji iriori, nocamantavajiri:

—Noneajeitajiriyea Avincatsarite.

Icantanaque:

—Nocoi noneero iraco, ora oqueaqueri quiravo, noninti noiminqueero nacotsapaqui. Aisati noninti noiminqueero naco imerequiqui. Eirorica noiminqueirotsi, eiro no-quemisantitsi.

Yapiitajiri inea jeitajiri Jesoshi iroamere.

²⁶ Avisanaque 8 quitateri, ari napatojeitanaja aisati pancotsiqui, itsipajeitajana iriori Tomashi. Oshequi catsini notsaroaacaajeitacari quisajeitanari, irootaque noyavitantacarori ashitacorontsi. Imapocapaajana aisati Jesoshi, icatiashitapajana nianqui. Icantajeitapajana:

—Piveshireajeitanajea.

²⁷ Irosati icantantanacari Tomashi:

—Pamenero naco. Pancote, poiminqueero pacotsapaqui aca. Pancote aisati, poiminqueero paco nomerequiquica. Eiro pitseencajanatsi aisati, pinquemisante irointi.

²⁸ Irosati yacantanacari Tomashi:

—Avirotasanotaque novincatsarite, avirotasanotaque notasorentsite.

²⁹ Icantanaqueri Jesoshi:

—Meeca pineajana, irootaque piquemisantajanari. Timatsi caari neenane, iro cantaincha inquemisantajeitena; inquimoshiretasanojeitanaque irinti.

³⁰ Oshequi catsini itasoncantayetaque Jesoshi. Narojeitaque iroamere, noneajeitaqueri, iro cantaincha te nosanquenajeiteroji maaroni aca. ³¹ Nosanquenajeitaquero oca pinquemisantantajeitariri Jesoshi irootaque Quirishito, yora Itomi Tasorentsi.

Ariorica pinquemisantajeitaqueri, aitaque iraneacaajeitajempi anta inquitequi, pincantatatiyempani.

21

Mavatanaque inijaajari Jesoshi iroamerepee.

¹ Irosati inijaantajeitajana aisati Jesoshi, aisati itsipapee iroamerepee. Noneajeitajiri otsapijaqui incajare Tiveriashi. Aitaque ocantari. ² Napatojeitaca, nocarajeitiri Shimo Petero, jeri iriori Tomashi: icanteetiri aisati Tsipari. Jeri Natanaeri poneachari Canaqui, onta carireaqueiniri. Narojeitaque itomipee Severeo. Jeri aisati apite pashini iroamere Jesoshi. Napatojeitaca maaroni. ³ Icantajeitana Shimo Petero:

—Nojate nonquitsate.

Nocantajeitanaqueri:

—Narosati, noijajeitanaquempi.

Ari nojajeitanaque. Notejeitapaaca pitotsiqui. Noquitsajeivetaca, irosati noquitaitetacotantacari. Tecatsi naye. ⁴ Oquitaitetamanaji, irosati icatiantapaaja Jesoshi otsapijaqui. Te niojeitavajeriji.

⁵ Icantajeitana:

—Ayompari. ¿Chorampa shima?

Nacajeitanaqueri:

—Te aneeriji.

⁶ Icantajeitana:

—Pinquitsataje aisati pacosanoriqui, aitaque paye.

Ari noquitsajeitanaji. Naajeitaque oshequi catsini shima, te naaveacoteriji nontetacoteri pitotsiqui. ⁷ Naro iroamere inintasanotiri Jesoshi. Nocantiri Petero:

—Ja, iriotaqueyeatsi Avincatsarite.

Ari isapocaquero Shimo iitsaare incaranqui, irointi itorosate. Iquemantaquenari, irosati iquitsaatantanajaro iitsaare. Ishiticatsaquitana. Ipiincacotanaquero iitsaare, pocn; yamaatashitanajiri, yaatapaaji. ⁸ Nimpoitacojeitapaaji narori, nonoshicacojeitiri shima. Quempejitarapaa otsapija, aamaaca ocarati 100 metero. ⁹ Nomitajajeitanaque quipatsiqui. Noneapaaque oparasheti paamari, itashitiri shima. Otimi aisati tanta.

¹⁰ Icantajeitavaquena Jesoshi:

—Pamaquenari meeca shima piquitsataqueri.

¹¹ Itetapaaja aisati Shimo Petero, inoshicacotajiri shima quipatsiqui. Jaasanotaca antearipee shima, icarati 153. Yoshequiasanovetaca catsini, iro cantaincha te ompe-sanaqueji noquitsatantariri. ¹² Icantajeitana Jesoshi:

—Pimpocajeite meeca poajeitapeempa.

Notsaroacaacari noncanterime: “¿Janicampimpa?” Maaroni niojeitaqueri Avincatsarite ini. ¹³ Irosati iquempejijeitantaquenari Jesoshi. Yaaquero tanta, ipajeitaquena. Aisati shima, ipajeitaquena maaroni. ¹⁴ Icamavetaca Jesoshi chapinqui, itinaanaja. Mavatanaque meecca inijaajana.

Icantiri Petero.

¹⁵ Noajeitaca. Irosati isampitantajari Jesoshi:

—Shimo, itomi Jonashi, ¿panaacojeitaquerimpa yocapee, pinintasanotana avinti?

Yacanaqueri iriori:

—Aviro, Novincatsarite, iotaatsiri nonintimpi.

Icanti:

—Pimperi novishajanique iroyea.

¹⁶ Yapiitajiri aisati isampitajiri:

—¿Pinintanampa?

Yacanajiri aisati:

—Je, Novincatsarite. Aviro iotaatsiri nonintimpi.

Icantiri:

—Pinquempoyeajeitenari novishate.

¹⁷ Mavatanaque isampitiri:

—¿Pinintasanotanampa?

Irosati iquenqueshireantanaca Petero. Iro iquenqueshireantanacari, mavatanaque isampitaqueri: “¿Pinintanampa?” Yacanajiri aisati:

—Avirotaque, Novincatsarite, iotirori maaroni. Piotana avinti nonintasanotimpirica. Icantiri:

¹⁸ —Pimperi novishate iroyea. Queariotaque oca noncamantempi: peerani, ainiro-quera pevancariveitani, piquitsaatapiniveitaroni piitsaare. Pijatapiniyetini jaocarica pinintiri: tecatsi tsaneempineri. Iro cantaincha ariorica panteashiparitasanotapaaque, pancotsaye pacoqui, iroisoyeetempi, inquitsaatajempi itsipapee. Iraanaquempi tenta pincoavetea pijate.

¹⁹ Aitaque icantaqueriri. Yoametaqueri jaoca incanteari incamanteari Petero iriori. Ariorica irineeteri incamaque, iroisoyeetanaque ipincatsaritasanoti Tasorentsi. Irosati icantantanajari:

—Tsame, pojatanaquena.

Inintane Jesoshi.

²⁰ Ipitsocanaca Petero. Inequena noijatanaqueri, tempa naro iroamere Jesoshi inintasanotiri. Chapinqui noacaajeitantaricari Jesoshi, naro sampitaqueriri: “Novincatsarite, ¿janicampa aacantempineri?” ²¹ Ineantaquenari Petero, ijicotana, aisati isampitiri Jesoshi:

—Novincatsarite, ¿jaoca incanteeteriri coajica yora?

²² Icantanaqueri:

—Noninterica intimavaqueta aca irosati nompiantajeari, eiro piquenqueshiretirotsi. Pojatenata nainti.

²³ Yovaajeitaquero maaroni quemisantsiri icantiriri Jesoshi. Ijijeivetaca eiro no-camitsi. Iro cantaincha te incanteriji Jesoshi: “Eiro icamitsi Joa”. Irointiquea ican-tavetari: “Noninterica intimavaqueta aca irosati nompiantajeari, eiro piquenqueshire-tirotsi”.

²⁴ Narosanotaque iroamereni Jesoshi, sanquenatirori oca. Ayojeitaque queariotasantaque oca nosanquenataqueri.

²⁵ Timatsi oshequi pashini yantayetaqueri Jesoshi. Ariorica nontsoteaquerome nosanquenatacotaquerome maaroni, eiro onarome quipatsiquica sanquenarentsi. *Joa*

YANTAYETINIRI ITIANCANENI JESOSHI

Icamantiri Irocashi jaoca ocantari inquenquetsatacayeriri.

¹ ¿Ainirompi Tiojiro? ¿Tecatsimpa oyempine? Peerani nintantacarori nosanquenatantaquemponiriri, noquenquetsatacaimpironi maaroni yantayetiniri Jesoshi. Aisati noquenquetsatacaimpido maaroni yoametantayetiniri. ²⁻³ Ari oshequi ineacatsitacaro, icamaque, itinaanaja aisati, irosati yonijaantapajariri iroamerepeeni. Oshequi inecotapinijeitajiri yantayetapajariri, irootaque iotasnotantajariri itinaanaja. Ocarati 40 quitaiteri yonijaapinitantajariri. Iquenquetsatacotaquero jaoca icantari Tasorentsi ipincatsariventanti. Itiancajeitaqueri iroamerepee, iriotaque yora icoyeajeitaqueri. Iro cantiriri Ishire Tasorentsi. Impoiji yoancajiri Tasorentsi inquitequi, irosati narori novecaratantacarori noyenquetsare peerani. Meeca novaajempiro: noncamantajeitempiro yantayetiri iriori iroamereni Jesoshi, yora itiancanaqueri peerani.

Yoverantasanotanacarori Jesoshi irineane.

⁴ Ari yoacaajeitajari Jesoshi. Icantasanotaqueri:

—Eirota pojoquitarotsi Jerosare; nocoaque poyeavaquerota icashiacaquempi Apa: ora piquemitaquenari peerani nocamantitaquempi. ⁵ Yora Joani ivaotisajeitaquempi nijaqui iojeitantacari atiri piquemisantajeitirini. Iro cantaincha eiro osamanititsi ompocashijeitempi Ishire Tasorentsi, quiso oajeitempi iriojeitanteari atiri queario piquemisantaquena narori.

⁶ Yora apatotimentacariri, isampijeitiri:

—Novincatsarite. Arojeitaque ishanincani yora intacaroniri Ishiraeri. Peerani itimaveitani pincatsariventaveitariniri ashanincani; meecampa, tecatsi. ¿Ariompa meeca pincanteri pashini impincatsariventajeitajena? Oshequi nocajeitaque.

Yacanaqueri:

⁷ —Te incoacyempiji Apa piojeitero jaoca oncarate. Osamanitatsirica, irompa jaocarica oncarate. Irintiquea Apa apaniro cantatsine. ⁸ Coajica intasoncaventajeitempi, aisati ompocashijeitempi Ishire. Nocoaque pinquenquetsatacojeitenra anta Jerosarequi, pintsoteaquero Jorea. Pinquenquetsajeite anta Samariaqui, aisati pintsoteanaquero anta pashinipeequi quipatsi.

Yoajenocantanajari Jesoshi.

⁹ Irootaque icantanaqueririri Jesoshi. Ari yamenajeitavajiri, irosati yoajenocantanaja jenoqui, ipeanaja mencoriqui. ¹⁰ Ari yamenajeitavajiri sorerere, ijatanaji. Ari imapocapaqueri apite shirampari, icatiimojeitapaacari. Quitamarori iitsaare. ¹¹ Icantapaqueri:

—¿Ainirompi, carireasati? ¿Paita pamenantarori inquite? Pineavajiri yora Jesoshi yoajenocanaja inquitequi. Iriotaque piajantsineri coajica aisati. Arriorica impiaje aisati, inquempetapaaaja meeca ijatantanajari.

¹² Ari ipiajeitanaja Jerosarequi iroamereni Jesoshi. Iponeanaja toncaariqui opajitanta Orivomashi. Oquempejitaro Jerosare, te arejiteji. ¹³ Ari yareejeitapajaa, yataijeitapajaa oshitamenconta jenoqui. Anta imaapinijeitinta yora Petero, jeri Joa, Santiaco, Antirishi, Jeripi, Tomashi, Varitorome, Mateyo, Santiaco itomi Arijeo, Shimo yora Shintsitsatsiri. Aisati imaapinitinta Jorashi, yora itomi Santiaco, maaroni. ¹⁴ Ari yapatojeitaja aisati iquenquetsatacaaajeitiri Tasorentsi. Itsipajeitari irirentipeeni Jesoshi, jero Maria irinironi, jero otsipapee tsinane. Aitaque icantani iquenquetsatacapinijeitiri Tasorentsi.

Icoyeantacariri Matiashi poyeetajariri Jorashi.

¹⁵ Ari pashini quitaiteri yora Petero icatiimojeitanacari iyemisantaririntepee. Aamaaca icarajeiti 120. Icanti:

¹⁶ —Noyemisantaririnte, moncarataca ocantiniri Sanquenarentsi. Peerani oametirini Ishire Tasorentsi Iravirini iquenquetsatacotantaririri Jorashini: yora jivajeitaqueriri aa-jeitaqueriri Jesoshi. ¹⁷ Aitaque acarajeiveitarini. Peerani itsipajeiveiteeni intacojeitan-tani, iro cantaincha ¹⁸ impoiji yaacantanirotaqueri Avincatsarite, ipinatashiyevetacari quirequi. Yaavetacari, impoiji yoipiajiniri, iriotaque quirequi yamanantanteetajarori quipatsi. Impoiji irisati shiticajancha, shiti; itsatanaca. Impoiji ipesacotanaque, peti; iquenaitaque tirin; ipitiancapaaca; irosati itsirajantapaaca imotijaqui, tsira, osoqui-janaque iramporetsa. ¹⁹ Iajeitaqueri maaroni jerosaresati. Irootaque ipajitanteetarori quipatsi yamananteetiri Asererama. Acantiri aneanequi arori: “Ivinaroni Jesoshi yoanteevetacariniri”. ²⁰ Aitaque isanquenayeetironi peerani pampoyeantsi cantatsiri: “Oncaarapancoitetaque ivanconi aacanterineri Avincatsarite, eiro itimajitsi timan-titajearine”. Aisati ocantini pampoyeantsi: “Ocameetsati intimaje poyeetajearineri quenquetsatacantajantsineri”. ²¹⁻²² Tsame meeca ancanteri itsipa: “Pimpoyeetajeari Jorashini”: tempa irootaque icoacaaqueeri Tasorentsi. Iriotaque ancanteri tsipati-tapinijeiteeniri peerani: neasanotiriri Joani ivaotisatantini, aisati neapinitiriri Jesoshi. Acoaque neaqueriri itinaanaja aisati ijatanaji jenoqui: ancanteri incarajeitee anquen-quetsatacojeiteri Jesoshi. ¿Janicampa meeca ancanteri?

²³ Ari icanti itsipa:

—Irriorica yoca Jose Varasavashi, ipajiyetiri aisati Joshito. Terica, irriorica yoca Matiashica.

Ari icajemiri apite:

—Caate aca nianqui.

²⁴ Impoiji iquenquetsatacairyi Tasorentsi, icantiri:

—Novincatsarite, aviro avinti iotirori jaoca icantajeitari maaroni atiri. Jeri yoca apite. Piotacayenari janicarica picoasanotaqueri avinti ²⁵ poyeetajearine Jorashini. Tecatis incantea meeca iriori inquenquetsataje aisati irintacotantajea: tempa camaque ini, janirotaque anta Sharincaveniqui.

²⁶ Impoiji ipishoncajeitiro mapijaniqui iriotanteari janicarica icoacaaqueri Tasorentsi, irio icoyeaque Matiashi. Ari icaraveita itiancane Jesoshi 11. Meeca icarajeitajiri aisati Matiashi.

2

Quitaiteri ipajiyetiri: “Pentecoshiteshi”.

¹ Ari omoncaratapaaja meeca quitaiteri ipajiyetiri: “Pentecoshiteshi”. Ari yap-atojeitaca Jerosarequi quemisantajeitatsiri. ² Omapocashitapaacari, iquemavaquero shiavetarori tampea antearo, oneapaaque, sooo. Oponeanaca jenoqui, otsoteapaaquero pancotsi isavicajeitanci. ³ Aisati oconijatimatashitapaacari shiavetacarori paamari, ovaraapaaca; opomencajeitapaaqueri iitopeequi maaroni savicajeitantsiri, pomein. ⁴ Otimantashirejeitapaacari Ishire Tasorentsi. Irosati ineanatantanacaro otsipapee neantsipee, imajetaquero ora oneaveetacaqueri Ishire Tasorentsi. ⁵ Ari isaviqui anta Jerosarequi joriopee, quemisantasnotatsiri, iponeayetaca pashinipeequi quipatsi, jaocaricapee. ⁶ Iquemantajeitavacariri ineanajeitanaque, irosati yapatojeitancaca oshe-qui atiri. Iquemajetapaaquero irineanesanori. Te iriotacotapeeriji. ⁷ Yoajeitapaaque cavaco, iquenqueshireajeitapaaca, isampitavacaajeitapaaca:

—Tempa carireasati inajeveta yoca neaveetantsirica. ⁸ ¿Jaoca icantacari iqueman-tajeitajarori maaroni aneanepee? ⁹ Meeca acarajeitaqueri paratosati, merosati, eramitasati. Jeri savicatsiri Mesopotamiaqui, Joreaqui, Caparoshiaqui, Pontoqui, Ashiaqui, ¹⁰ Jirijiaqui, Pampiriaqui, Ejipitoqui. Aisati acarajeitaqueri poneayetainchari otsapita-paaca Iriviaqui anta oquempejitatapai Shirene. Jeri aisati acarajeitaqueri quivantatsiri poneayetachari Oromaqui. ¹¹ Acarajeitaqueri joriosanotatsiri aisati peajanchari jorio. Acarajeitiri queretasati aisati aravesati. Iro cantaincha aquemajeitaqueri ineanajeitan-taro aneanesanoripee. Iquenquetsatacotiri Tasorentsi, jaoca icanta itasoncantayeti.

¹² Ari yoajeitanaque atiripee cavaco, te iriotacoteriji. Isampitavacaajeitana:

—¿Pitaquea iquemantarori aneane?

¹³ Irinti pashini, ishirontimentajeitanacari, icanti:
—Ishinquijeitaca yonta, iji, iji, iji.

¹⁴ Ari ainiro anta iriori Petero, icarajeitiri itsipapee itiancane Jesoshi. Quimojenca icamantaqueri:

—Nojorioririnte: maaroni aviro savicajeitatsiri aca Jerosarequi, piojeitavaquero oca noncamantempiri, pinquemisantajeitavaquena. ¹⁵ Pijitashijeivetacari ishinquijeitaca yocapee. Ja, te irishinquijeiteaji. Tempa ashinquitapinijeita tsiteniriqui, iro cantaincha oquitaitetamani meeca, tequera irijenoquitapeeji catsirincaiteri. Tequera omoncarateaji ishinquitapiniyeeta, ¹⁶ irointi oca piquemaqueri icamantacotiri camantantaveitachaniri peerani Joirini: ¹⁷ “Icanti Tasorentsi: ‘Coajica irineajeitero maaroni atiri nontianqueneri Noshire. Incamantantayete itomipee, irishintopee. Yora evancaripee irioshiretashitearo paitapeerica. Aisati irimishiveetashitea anteashiparipee. ¹⁸ Jeri quemisantajeitenane: shiramparipee, tsinaneppee, nontiancajeiteneri Noshire, inquenquetsatacotantenari. ¹⁹ Ari nomatero coajica caari pineapiniti inquitequinta jenoqui, aisati aca quipatsiqui: poajeitanaquero cavaco. Aitaque pineajeitero coajica irirajani camajeitatsineri, aisati pineavaquero ontaajeitanaquea pancotsipee: oshequi oncachaajencatanaque. ²⁰ Irijivate intsivacanaque catsirincaiteri; aisati yora cashiri, inquitioncatanaque, irishianaquero irajantsi. Impoijiquea omoncaratapaaquea quitaiteri irareetantapaa jeari Avincatsarite. Oshequi irimatapaaque, iriotacojeitaqueri maaroni atiri. ²¹ Iroavisacojeitea maaroni aventajeitearine’”. Irootaque isanquenatiniri Joirini.

²² Aisati icanti Petero:

—Noshaninca. Pinquemisantavaquero oca noncamantempiri, nonquenquetsatacoteri Jesoshi, yora nasaretesatini. Itasoncantayeti, imayetaquero caari aneapiniti. Aisati imayetaquero paitapeerica, ayotantariri itasorentsitasanotaque. Tempa pineapinijeitaqueri avirori, piotitacari. Tempa irio Tasorentsi matacaaqueriri. ²³ Peerani aitaque iotacotitarini, icantitani: “Aitaque oncanteari, impimanteeteri yora Jesoshi”. Irío caari cameetsatatsi oaqueriri, iro cantaincha pipajacotacantajeitaqueri avirori, poamaacantajeitaqueri. ²⁴ Ari oshequi iquematsicayetacaro, icamanaque, torein. Iro cantaincha yoitinaajiri Tasorentsi, te incoacayeriji incamasanote. ²⁵ Tempa isanquenatitacaroni peerani Iravirini irineane Jesoshi: “Niotaque quiso yoaquea Novincatsarite, isavicaque nacosanoriqui yamitacotapinitantanari, caari noashiretanta. ²⁶⁻²⁷ Oshequi noquimoshireventaque, otimantari nocantantariri: ‘Apa, oshequi noveshireaca. Niotaque eiro pojocanatsi anta ishaaviji. Aisati eiro pishinetanatsi nompatsaye, tempa pineacameetsatana. Niotaque pimataquenaro oca picantaquenari. ²⁸ Piotacaquenaro noncanteani naneasanotanaje, quiso avavacayea, noncanteani noveshireimentanaqueMPI’”. Irootaque irineane Jesoshi isanquenatiniri Iravirini.

²⁹ Ari yovaajiro aisati Petero:

—Meeca, noshaninca, noncamantasanotempi. Icamaque intacantaqueeri Iravirini, itijaca. Timatsiquera meeca itijacanta. ³⁰ Camantantatsiniri inaveitani. Iotasanolironi icantitariniri Tasorentsi: “Queariotaque oca noncamantasanotempi, eiro namatavitimpitsi. Coajica impincatsariventante pishanincasanori, poyetajempineri”.

³¹ Pineaquero, tequeratsitani intinaajeji Quirishito, iro cantaincha iotacotitarini Iravirini. Tempa isanquenatini: “Incante Quirishito: ‘Apa, niotaque eiro pojocanatsi anta ishaaviji, aisati eiro pishinetanatsi nompatsaye’”. ³² Iriotaque Jesoshi yoitinaajiri Tasorentsi. Aitaque noneajeitaqueri narori, meeca nocamantasanotaquempi.

³³ Impoiji yoancajiri anta iracosanoriqui, icaratantapaaajariri ipincatsariventanti. Irosati quiso oantacariri Jesoshi Ishire Tasorentsi, ora icashiacaqueriri Iriri. Meecaquea, itiancajeitaquenaro narori aca: irootaque pineantajeitaquenari aisati piquemajeitantaquenari. ³⁴ Pamene, te irio quenquetsatacotajanchane irisati Iravirini peerani, irintiquea iquenquetsatacotiri Quirishito. Te irovajenocajeoji irinti Iravirini jenoqui, irintiquea Quirishito. Tempa isanquenatitani peerani: “Tempa irio Tasorentsi cantiriri Avincatsarite Quirishito: ‘Pisavicatee aca nacosanoriqui, pincararena ampincatsariventante ³⁵ irosati impincatsajeitatempi maaroni quisajeivetimpiri’”.

³⁶ Aisati icantajeitiri Petero:

—Tempa arojeitaque ishanincani Ishiraerini. Cameetsa iriotasanojeitero ashanincaeji oca nocantaquempi: pipajacotacantavetacari Jesoshi, iro cantaincha yoitinaajiri Tasorentsi, ipeavajiri aisati Pincatsari, irisati Quirishito.

³⁷ Iquemantajeitavacarori oca, oshequi iquenqueshiretasanojeitanaca. Isampijetiri Petero:

—Noshaninca, ¿jaoca noncantajeiteari?

Yacanaqueri:

³⁸ —Pinquenqueshireajea, eiro piquempetajatsi peerani. Paventajeitajeari Jeso quirishito aisati pivaotisatimentajeitajeari, incavintsaaejitantempi Tasorentsi, eiro iquenqueshireacotajimpirotsi aisati caari cameetsatatsi pantajeiveitaniri. Irootaque quiso oajeitantempi aisati Ishire intianquempi. ³⁹ Irootaque icashiacaajeitaquempi avirori; aisati icashiacaajeitaqueri iriori pishanincatajeari coajicani, jeri aisati maaroni arejipeequiniri iriori. Irootaque icashiacaajeitaqueeri maaroni; irootaque icoacaajeitaqueeri Avincatsarite, ariorica anquemisanteri.

⁴⁰ Oshequi pashini icamantasanojeitiriri, icoaque inquemisantacayeri. Jero oca icantaqueriri aisati:

—Poavisacojeitea. Pishiajeitaricari timajeitatsiri meeca: yora caari cameetsajeitatsi.

⁴¹ Ivaotisajeitaca maaroni quemisantajeitaquerori irineane, aamaaca icarajeitaque 3,000. ⁴² Icantatiani iquemisantapinijeitiro oca yoamejeitiriri. Icantatiani cameetsa iquempeavacaajeitaca: itsipatavacaajeitaca icarajapinijeitiro tanta, iquenqueshirejeitancatariri yora camimentajeiteeri, aisati iquenquetsatacapinijeitiri Tasorentsi.

⁴³ Yora quemisantatsiri imatapinitaqueneri atiripee caari ineapinijeiti, aisati imayetaquero paitarica iotantacariri queario itsipatari Tasorentsi. Yoajeitanaqueri cavaco maaroni. ⁴⁴ Ari iquempeavacaajeitaca quemisantajeitatsiri. Te irimashitsajeiteji, irointi ipavacaapinijeita timimojeitiriri, paitaricapee. ⁴⁵ Ipmantajeitiro irovaararo, iipatsite aisati. Ipaarantajeitiri maaroni ishaninca coiteimojeitariri. ⁴⁶ Maaroni quitaiteri ijatapinijeiti anta ivancoqui Tasorentsi. Aisati icarajajeitaquero tanta ivancopeequi iriori, iquenqueshireantariri camimentajeitaqueeri. Arriorica yoajeita, iquimoshiretasanojeiti, aisati cameetsa ipashitavacaajeitaca. ⁴⁷ Icantajeiti:

—Cameetsa ini Tasorentsi.

Jeri yora maaroni timajeitatsiri ineacameetsajeitaqueri quemisantatsiri. Icantatiani maaroni quitaiteri iquemisantaque pashini atiri, yoshequiacaasanojeitaqueri Avincatsarite.

3

Icamantanti Petero anta ivancoqui Tasorentsi.

¹ Pashini quitaiteri, jenoquiquera catsirincaiteri, irotaintsi omoncaratea iquenquetsatacapinitariri jorio Tasorentsi. Itoncaanaque Petero, jeri Joa anta ivancoqui Tasorentsi. ² Ainiro isavicaque anta aparoni shirampari, choriveetatsiri iitiqui. Aitaque icantitapaa peerani, iroquera itimapaaque. Ari maaroni quitaiteri yameetapinitiri omoroqui pancotsi ipajiyetiri: “Cameetsari omoro”. Aitaque yoyeetapinitiriri omoroqui iramananteariri iirequite queayetatsiri. ³ Yora Petero, jeri Joa irovetainchainqueajeitapeeme pancotsiqui, iro cantaincha ineavaqueri, icantavetavacari:

—Pincavintsayena noshaninca, pimpena quirequi.

⁴ Ari yamenapaaqueri Petero, icantiri:

—Pamenenate.

⁵ Yamenasanovetavacari, ijitashivetaca ari impaquerime paitarica. ⁶ Iro cantaincha icantanaqueri:

—Tecatsi noirequite, iro cantaincha nocoaque noncavintsayempi. Noncanteri Jeso quirishito, yora nasaretesati iraniitacaajempi irinti, paniitantajeari.

⁷ Yajiricaqueri iracosanoriqui, yoatiaqueri. Intsipaite yavisacotaji, ishintsitanaji iitiqui. ⁸ Ishintsiti icatianaja, cati. Icatiasanotanaja, yaniitanaji. Itsipatanacari, iqueanaque pancotsiqui. Isapocasapocatanaque, icantanaque:

—Cameetsa ini Tasorentsi.

⁹ Ineajeitavaqueri maaroni atiri: yaniitanaji. Iquemajeitavaqueri icantanaji:

—Cameetsa ini Tasorentsi.

¹⁰ Ari iojeitavaqueri, iriotaque yoca savicaveitachaniri omoroqui, amananteitachaniri quirequi. Ineajeitaqueri yavisacotaji, irootaque yoajeitantanacariri cavaco. Te iriotacoteriji. ¹¹ Ari yajircasanotajiri Petero, jeri Joa. Inajeitaque anta yapatotapinijeitanta: irio Saromo vetsicacantironiri peerani pancotsi. Irosati ishiashitantapaacari maaroni atiri, yoajeitanqueri cavaco. ¹² Ineavaqueri Petero, icantavaqueri ijorioririnte:

—Noshaninca, ¿paita poajeitantanacari cavaco? ¿Paita pamenantajeitanari, sorerere? Eiro pijitashitanatsi naro Tasorentsi naniitacantajariri yoca choriveitachaniri. Eiro aisati pijitanatsi noquemisantsanoti nomatantajariri. ¹³⁻¹⁴ Iranti Tasorentsi oavisacotajiriri. Peerani iquemisantaveitarini Avarama, Isaca, Jacovo, jeri aisati maaroni intacantoniri. Ocameetsati pinquempejeiteari iriorini, pinquemisantajeiteri Tasorentsi. Irootaque neacameetsatasanotiriri Jesoshi, icanti: “Pineaqueri, icameetsatasanoti Notomi, yantaquenaro maaroni nocoacaqueririri”. Queario icameetsatasanoti Jesoshi, catsini. Iriotaque paacantaqueri. Iro iroimpacaajerime Pirato, aiquero picantacoventatiiri: “Te noncoyeji poimpacaajeri”, iranti picoaqueri yoipacajimpiri oantatsiri. ¹⁵ Poacantaqueri oaneajeitiriri atiri. Icamavetapainta, impoiji yoitinaajiri Tasorentsi. Aisatitapaaaji, noneajeitajiri. ¹⁶ Jeri yoca shirampari: iquemacotantavaracariri Jesoshi, iquemisantaque, irootaque yavisacotantajariri. Jerica pineaqueri. Tempa piojeitiri. Ari iquemisantaque, irootaque itecatsitajari. Pineaqueri meeca yaniitanaji.

Aisati icantajeitiri Petero:

¹⁷ —Ari noshaninca, meeca niotaque te piojeiveiteani avinti. Aisati iquemepeta avincatsaritepee, te iriojeiveiteani. ¹⁸ Imataquero Tasorentsi oca icantitaniri peerani: “Coajica oshequi inquematsicatearo Quirishito, incamimentajeiteri atiri iroav-isacotantajeariri”. Tempa iquenquetsatacotitarini Quirishito maaroni yora camantantatsiniri. ¹⁹ Pinquenqueshirejeitanaquea, eiro piquempejeitajatsi peerani, irointiquea pinquemisantajeite; impoiji incavintsayempi Tasorentsi: iroameetsajeitempi, eiro iquenqueshireacotajimprotsi aisati caari cameetsatasi pantaveitaniri. Irosati intspajeitantempiri Avincatsarite, iriveshireacaajeitempi. ²⁰ Aisati intianquemepiri Jesoshi, yora Quirishitotatsiri. Tempa peerani icamantasanotaquempini. ²¹ Incantaitatiyempani intimapaaje anta jenoqui, irosati iroameetsatantayetaquearori maaroni, paitapeerica. Tempa irootaque icantiniri peerani yora camantantatsiniri, yora yoameetsajeitiri Tasorentsi: irootaque neanatacaaajeitiriniri maaroni. ²² Icantini Moishishi: “Yora Avincatsarite Tasorentsi intianquemepiri camantajempineri, inquempetajena narori itiancaquena. Avirotaque irishanincatajeari. Paitarica incamantempiri, pinquemisantavaqueri. ²³ Iranti maaroni caari quemisantiri iriori, eiro quiso yoiritsi ishaninca, irointiquea intsoncajeitajeri”. ²⁴ Iquenquetsatacotitaroni peerani maaroni camantantajeitatsiniri oca pineayetaqueri meeca. Jeri yora Samoirini, intacaroniri, jeri aisati maaroni impojeitiriri. Iquenquetsatacojeitiro, maaroni. ²⁵ Aitaque ashanincajeitacari yora camantantatsiniri. Peerani icantirini Tasorentsi Avarama: “Coajica iriveshireimentajeiteari maaroni atiri pishanincani: yora Quirishito pocatsineri”. Moncarataca icantavacaanaca. Ocameetsati meeca piveshireimentajeiteari. ²⁶ Itiancaqueri aroriqui, ijivajeitaquee yoamejeitaquee. Ainiro pantajeitiro caari cameetsatasi, iro cantaincha ipocashijetimpi iroavisacojeitempi eiro pashinoncanta; icoaque iroveshireacaajeitempi.

Yora oametavacainchari, yapatotashijeitacari quemisantatsiri.

¹ Irosatiquera iquenquetsatacairy Petero ishaninca, ari ipocapaaque saserotepee. Jeri aisati jivatamaciriri atiri anta ivancoqui Tasorentsi. Jeri saroseopee.

² Icantashirejeitanaque, icantavacaanaca:

—Paitateemi yoametantariri atiri. Jero icamantaqueriri: “Intinaye camajeadtsiri: tempa itinaaja Jesoshi”. Te oncameetsateji oca yoamejeitiriri.

³ Ari ishaaviniji catsirincaiteri, irosati yaantacari, tapi. Yaajeitanaqueri, yoimin-queajeitapaqueri, ari iquitaitacojeitaque. ⁴ Iro cantaincha iquemisantaque oshequi quemajeitavaqueriri Petero, aamaaca icarajeiti 5,000 shirampari, quemisantajeitaintsiri.

⁵ Oquitaitetamanaji yapatojeitaja aisati anta Jerosarequi pincatsaritatsiri, savicabantatatsiri, oametantirori sanquenarentsi. ⁶ Icarajeitiri Anashi, yora ivincatsarite saserote. Aisati yapatotiri Caijashi, Joa, Arijantero, jeri maaroni ishaninca ivincatsarite saserote. ⁷ Ari icajemacantaqueri quemisantatsiri, isatecaqueri nianqui, isampijeitaqueri:

—¿Janica matacaquaempirori oca? ¿Janicampa cantaquaempiri?

⁸ Ari oametaqueri Ishire Tasorentsi Petero, omatacaasanotaqueri. Iquenquetsatacaa-jeitaqueri apatotimentajeitariri:

⁹⁻¹⁰ —¿Iriompa pisampitacoventiri yora choriveitachaniri ineshinoncatiri Tasorentsi? Pinequeri, avisacotanaji ini. ¿Picoaquempa piote jaoca icantacari yavisacotantajari? Pinquemajeitavaquero oca. Aisati ocameetsati iriojeitavaquero maaroni ashancaphee. Iriotaque Jeso quirishito, yora nasaretesati, oavisacotajiriri. Pipajacotacantavetacari, iro cantaincha yoitinaajiri Tasorentsi. ¹¹ Iriotaque Jesoshi shiacantachari mapitatsiri itseencaqueri vetsicavetarori pancotsi: iro cantaincha ipeaqueri Tasorentsi itincamitan-tarori. Avirojeitaque avinti shiaqueriri vetsicavetarori: pitseencaqueri Jesoshi. ¹² Iro cantaincha te intimeji pashini oavisacotantatsineri: te intimeji aca quipatsiqui pashini oavisacojeiteeneri: apaniro Jesoshi.

¹³ Ari yoajeitanaqueri cavaco yora pincatsaripee, icanti:

—Pineajeitaqueri, te intsaroajeitanaqueji iriori. ¿Paita caari itsaroacantajeitee? Aisati te intsoeteavetearoji sanquenarentsi, te irishitoriotasanovetearoji, iro cantaincha oshe-qui ioti. ¿Paitaquea iotacairiri? ¿Iriompa oametiriri Jesoshi, yora quiso yoaveitaniri?

¹⁴ Ari ineajeitaqueri itsipatamacari yora yoavisacoyeetajiri. Tecatsi incantea incanti-menteri. ¹⁵ Ari itiancrajiri:

—Pisoquijajeitanaje anta; ari coajica noncajemaempi aisati.

Ari isoquijajeitanaji. Impoiji icantavacaajeitanaca iriori pincatsaripee:

¹⁶ —¿Jaoca ancanteriri yonta? Iajeitanaqueri maaroni jerosaresati itasoncaventaqueri yora choriveitachaniri. Tecatsi ancante: “Te irimateroji”. ¹⁷ Te oncamenteateji inquenquetsatacaa-jeitajeri pashini atiri. Tsame ancantasanoterita: “Eiroyea meeca piquenquetsatacotajiritsi yora Jesoshi”.

¹⁸ Ari yapiitajiri, icajemajiri. Icantasanotiri:

—Eiroyea meeca piquenquetsatacotajiritsi Jesoshi. Eiroyea picamantacotajiritsi.

¹⁹ Yacanaqueri:

—Tempa ineajeitee Tasorentsi. Pincamantasanotenate: ¿cameetsampa nonquemisan-tempi? Tempa irio Tasorentsi nonquemisanteri. ²⁰ Tecatsi noncantea meeca nojocajero noquenquetsatacotiro oca noneasanotaqueri, aisati oca noquemasanotaqueri.

²¹ Ari yapiitajiri aisati icantasanovetajari, irosati itiancantajari. Tecatsi irante im-pasatimenteriri. Ineajeitaquero atiri oca imataqueri, icantapinijeitanaque: “Cameetsa ini Tasorentsi, oshequi imatacaajeitaqueri quemisantatsiri”, irootaque caari ipasa-tantari. ²² Peerani imoncarataquero 40 irosarintsite choriveitachaniri. Ari oshequi iquenqueshirejeitaquero atiri yoavisacotiri Jesoshi, iajeitantacari itasorentsitaque.

²³ Ari yoimpacaajeitajiri pincatsaripee, impoiji ijajeitanaji quemisantatsiri ishanincaqui. Icamantapaaqueri oca icantavetacariri yora cantavetacariri.

²⁴ Iquemantavacarori oca, iquenquetsatacaa-jeitaqueri Tasorentsi. Antearojenca icanti:

—Novincatsarite. Aviro vetsiquirori inquite, quipatsi, incajare, maaroni; aisati povet-sicajeitaqueri maaroni timantajeitarori. ²⁵ Aisati peerani poametaquerini noshanincani Iravirini, yora quemisantimpiri. Oametaqueri pishire, isanquenatantarori oca: “¿Paita itseencajeitacari yora pashinisatipee atiri? ¿Paita iquenqueshiretashitantarori caari cameetsayetatsi? ²⁶ Yora ivincatsaritepee iraimanajeiveteari Pincatsarisanori, aisati

yora Quirishitotatsiri; incoajeivetea intsoncajeiterime". ²⁷ Aca nampitsiquica yapatojeitaca yaimanajeivetacari pitomi Jesoshi, yora pineacameetsatiri. Tempa pipeaqueri Quirishitotasanotatsiri. Icarajeiti aimanajeitantzachari Eroreshi, Pontsio Pirato, joriopee, pashinisatipee atiri, maaroni. ²⁸ Peerani piotitani, picantitani: "Aitaque oncanteari". Ari meeca imataquero yocapee. ²⁹ Meeca, Novincatsarite, piotaquero oca icantasanovetaquena: "Eiro piquenquetsatacujiritsi Jesoshi". Tempa narotaque quemisantimpiri. Pimatacaasanotena eiro notsaroantatsi nonquenquetsatasanotero pineane. ³⁰ Pintasoncacoventante, poavisacotanteariri mantsiaripee; pimatapinitero caari ineapinijeiti, piotacaajeiteri atiri queario iringataque Jesoshi pitomi, aisati pineacameetsatiri.

³¹ Aitaque icantajeitiriri Tasorentsi. Impoiji onicanaca pancotsi isavicajeitantzari. Otasoncacoventajeitapaaqueri Ishire Tasorentsi, irosati cameetsa iquenquetsatantarori irineane Tasorentsi, te intsaroimateji.

Yaacameetsatavacaajeitaca yora quemisantatsiri.

³² Oshequi icarati meeca quemisantatsiri, cameetsa isavicajeitaque, aisati imoncaratavacaajeitaca: pitarica icoajeitiri aisati pitarica iquenqueshirejeitiri. Te irimashit-sajeiteji, irointi ipavacaajeitacaro maaroni coiteimojeitariri. ³³ Jeri iroamereni Jesoshi, icamantapinitiri atiripee:

—Itinaasanotaja Avincatsarite Jesoshi.

Aisati icantajeiti atiripee:

—Tempa icameetsajeiti quemisantajeitatsiri.

³⁴⁻³⁵ Yora maaroni ashietachari iipatsite aisati ivanco, ipimantajeitiro. Oca opinayetari, yamajeitaqueneri iroamereni Jesoshi, ipapaqueri. Irosati ipaaranta-queriri itsipapee iriori coiteimotariri, caari yashinoncaajeitanta quemisantajeitatsiri.

³⁶ Icarajeitiri quemisantatsiri ishanincani Irevi, pajitachari Jose. Pashini ipajitiri yora itianqueetiri: Verenave. Ocanti ivajiro aneanequi arori: "Veshireacaantachari". Iriotaque poneachari Tsipirequi. ³⁷ Yashivetaro quipatsi, impoiji ipimantiro. Yaanaque ovinaro, ari ipapaqueri yora iroamereni Jesoshi.

5

¹ Iro cantaincha itimi pashini shirampari pajitachari Ananiashi, iro ijina Sajira. Ipmantiro iipatsite, ² yaarantavaji ovinaro nianqui. Irointi cashetani aisati yaanaque, ipapaqueri iroamereni Jesoshi. Icantapairi:

—Jeri yoca quirequi, iringataque maaroni ovinaro noipatsiteni nopimantaqueri.

Iotaque aisati ijina iroori iramataviterime. ³ Iro cantaincha icantavaqueri Petero:

—Ananiashi, tempa paarantavaji ovinaro piipatsite. Yoametaquempi Satanashi, picoantavetacari pamataviterome Ishire Tasorentsi. ⁴ Tempa iro piipatsiteni onaveitani, tempa iringataque pashi ovinaro. Ocameetsati pinquempoyeri ovinaro. ¿Paita pican-tanirotantari: "Jeri yoca maaroni ovinaro noipatsiteni"? Pamatavivetaquena narori, iro cantaincha tecatsi pincanteri pamataviteri irinti Tasorentsi.

⁵ Iquemantavacariri Ananiashi, irosati itaantanaca, poron. Icamanaque, toren. Itsaroasanojeitanaque catsini maaroni neajeitaqueriri. ⁶ Impoiji yovetsicajeitaqueri evancaripee intijeri; yaanaqueri, itijiri. ⁷ Osamanitapainti capichaji, ari oqueapaaque ijinani iroori. Te ioteji camaque ojimeni. ⁸ Icantavaquero Petero:

—¿Pipaquerarimpa maaroni quirequi, ora ovinaro piipatsiteni pipimantaqueri?

Ari acanaqueri:

—Je, nopaquempi maaroni.

⁹ Irosati icantantacaro iroori:

—¿Paita piquempetantariri pijimeni, pamataviterome Ishire Avincatsarite? Jeritapaaji tijaitiriri pijimeni: irisati aanaquempine avirori.

¹⁰ Irosati oteimotantanacari, ocamanaque. Iqueapaaaji yora evancari, ineapaaqueri, camaque. Ari yaanaqueri, itijaitiro iroori, itsipatajantiro ojimeni. ¹¹ Ari itsaroajeitanaque maaroni yora quemisantajeitatsiri, aisati itsaroajeitanaque maaroni quemaco-jeitaqueriri.

Yora oametavacainchari, iquishimatiri iroamereni Jesoshi.

¹² Oshequi itasoncaventanti yora iroamereni Jesoshi. Oshequi imayetaqueneri atiri, irosati yoantajeitanacari cavaco. Ari yapatojeitaca anta pancotsiqui yovetsicacantiniri Saromoni. ¹³ Oshequi ipincatsajeitaqueri atiripee, irootaque itsaroacantajeitacariri intspipajeitajearime. Iro cantaincha icantajeiti atiripee:

—Icameetsatasanojeiti quemisantajeitiriri Jesoshi.

¹⁴ Aiquero ijatatii yoshequiasanotanaque quemisantiriri Avincatsarite. Oshequi icarajeiti shirampari, jero tsinane. ¹⁵ Yoapiniyetaqueri atiri mantsiaripee anta avotsiqui: yoiponaayetiri shitashintsiqui, oncanteata ariorica iravisanaque Petero, intsimancayetanaqueri iravisacotantajeari. ¹⁶ Aisati yapatotashitaca oshequi atiri, poneayetachari nampitsipeequi anta otsapiyetapaa Jerosare. Yamayetaqueneri mantsiaripee, jeri aisati neiriri camaari. Yoavisacojeitajiri maaroni.

¹⁷ Ari ocantimoneentanacari ivincatsarite saserote, jeri itsipapee: iriojeitaque saroseotatsiri. ¹⁸ Ari yaacantaqueri yora iroamereni Jesoshi, yoiminqueacantavetacari caravosoqui. ¹⁹ Iro cantaincha yananincae inampire Avincatsarite, yashitareapaajiniri ashitarontsi, yaanajiri saiteriqui. Icantiri:

²⁰ —Pijataje anta ivancoqui Tasorentsi, pincatiapaaje. Pincamantasanojeiteri atiri jaoca incantajeari intimantajeari inquitequi, incantaitatiyempani.

²¹ Yacanaqueri:

—Je, ari noncamantajeitaqueri.

Ari iroaquera oquitaitetamani ijatanaque ivancoqui Tasorentsi, yoametantapaaji.

Jeri ivincatsarite saserote, itsipajeitacari ishanincapee anta pashiniqui pancotsi. Yapatojeitiri oametavacainchari: yora ivincatsaritepee jorio. Ari icantiri variria:

—Pijajeite anta poiminqueaquerinta oshaiteji quemisantiriri Jesoshi, pamajeitenari.

²² Ari ijatashivetari, te irineapaajeriji. Irosati ipiantaja, icantapaaqueri:

²³ —Te aneajeriji. Noneapaaquero pancotsi, ashitasanovetaca ashitarontsi, oyaviveta. Ainiro icatiavetaca shentavetarori omoropee. Iro cantaincha nashitareavetapaacaro omoro, noquea vetapaaca; tecatsi noneapaaaje tsompoina.

²⁴ Iquemantavacariri, icantavacaanaca:

—¿Jaocaquea meeca iquenanajiri?

—Jaocateemi.

—¿Jaocaqueame ancanteriri?

²⁵ Irosati yareetantapaacari aparo camantapaaqueriri, icantapairi:

—Yora shirampari poiminqueacantavetacari, catiajeitapaaja anta ivancoqui Tasorentsi. Yoamejeitapaaajiri atiri.

²⁶ Irosati ijatashitantarajariri capitano, yaajeitanaqueri variriapee, iro cantaincha it-saroacaacari ashanincapee; icanti:

—Iquisacoventaricari atiripee quemisantatsiri, ipitseecari.

Irootaque cameetsa yaantanacariri, te inquisanatanaqueriji. ²⁷ Ari yaanaqueri, yoatiapaaqueri anta itiminta oametavacainchari. Icantavaqueri ivincatsarite saserote:

²⁸ —¿Paita piquenquetsatacantajariri aisati atiri? Tempa nocantasnovetimpi: “Eiro picamantacotajiritsi Jesoshi”. Meeca aiquero poamejeitatiiri maaroni jerosaresati. Jero oca picantacotaquena: “Irio saserotepee oacantaqueriri Jesoshi”. Te oncameetsateji picantajeitaqueri. Pimajerejeite, eiro picamantantajitsi aisati.

²⁹ Yacanaqueri Petero:

—Eiro noquemisantiritsi atiri, irintquea nonquemisantasanoteri Tasorentsi.

³⁰ Queario avirojeitaque oacantaqueriri Jesoshi. Pipajacotacantaqueri coroshiqui. Irinti oitinaajiriri Tasorentsi, yora iquemisantiniri ashanincani peerani. ³¹ Yoancajiri anta iracosanoriqui. Ipeajiri Jivatacaajeitaqueeri, aisati Oavisacojeitaqueeri. Icoacaajeitaqueri ajorioririnte inquenqueshirejeitanaquea, impoiji incavintsajaeiteri, eiro iquenqueshiretajirotsi aisati caari cameetsatatsi yantajeitaqueri. ³² Aitaque noneasanotaquero yantayetaqueri Jesoshi, aisati niotaque quiso oajeitiri Ishire Tasorentsi maaroni quemisantajeitiriri. Irootaque noquenquetsatacapinitiriri atiri. Tecatsi noncantea nomajerete.

Impoiji icantajeiti itsipapee iroamereni Jesoshi:
—Queario oca icantiri Petero.

³³ Ari iquemantajeitavacariri, iquisajeitanaqueri, icoajeivetanaca iroyerime. ³⁴ Ari icatianaca ishaninca pajitachari Camariyeri. Variseo ini, irisati oametantirori sanquenarentsi. Maaroni ineacameetsajeitiri atiri. Icant:

—Noshaninca, nocoaque irisoquijajeitanaque quemisantiriri Jesoshi, eiro iquemantaro noncantempi. Impoijiquea impiaje aisati.

Ari itiancajeitaqueri saiteriqui.

³⁵ Impoiji icantiri:

—Noshaninca. Quearioya, pantircari quemisantiriri Jesoshi. ³⁶ Jeri itimaveitani peerani yora Teorashi, oshequi ishemetaqueni. Ari yapatotashivetacari oshequi iratiritepee, naamaaca icarajeiti 400. Yoyeetaqueri, impoiji inijantareavacaajeitanaca oijajeivetariri. Ipeashijeitanaca, tecatsi anquemacotajeri aisati. ³⁷ Impoitiri aisati Jorashi, yora carireasati. Anta isanquenatacojeitanta, aisati ijivatanaqueri aparopee atiri. Aisati iriori, yoyeetaqueri. Yovaraanaca oijajeivetariri, tecatsi aisati anquemacotajeri. ³⁸ Ari meeca noncamantempi, eiro pineashirenquiritsi yocapee, incanteata. Irriorica tianquiririri atiri iquenquetsati, tempa aisati impeajeitanaja iriori. ³⁹ Irriorica tianquiririri Tasorentsi, tecatsi pincanteri poimajerenteri. Piquishimatiricari Tasorentsi.

⁴⁰ Ari onimojeitanaqueri iriori. Icajema jiri aisati, ipasanatacaantaqueri. Impoiji icantasanovetari:

—Eiro aisati piquenquetsatacotajiritsi Jesoshi.

Irosati itiancantajariri. ⁴¹ Ari ijajeitanaque, Iquimoshirejeitanaque, icantajeiti:

—Ineacameetsajeitee Jesoshi, irootaque ishinetantaqueeri aneacatsitimentajeitacari.

⁴² Maaroni quitaiteri yoametantapiniti anta ivancoqui Tasorentsi, aisati pancotsipeequi. Icantani: yoametantapiniti, icamantantapiniti. Icantapinitiri ishaninca:

—Iriotaque Jesoshi yora Quirishitotatsiri aamaajeitaniri peerani.

6

Icoyeaqueri intacotantachaneri.

¹ Yoshequiantacari quemisantatsiri, jeri iquisashireanaca yora iotirori quirieco. Icantavaacaanaca:

—Maaroni quitaiteri, ariorica intacotanta, te irintacotearoji ashaninca arori: oca camajimentaaro. Apaniro intacotaro irointi iotirori evereo.

² Ari yora iroamereni Jesoshi yapatojeitaqueri maaroni quemisantatsiri. Icantiri:

—Te oncameetsateji nojocajero noquenquetsatapinitiro irineane Tasorentsi, nompan-tayetempirori poyeari. ³ Meeca, noshaninca, pincoyeanontea 7 shirampari, yora pine-acameetsatasanotiri. Pincoyeaqueri timatsiri iotantari, quemisantasanotirori Ishire Tasorentsi. Noncanterita iriori irintacotantea. ⁴ Irompa nainti, apatiroti nonquenquet-satacoteri Tasorentsi, aisati noncanteani nonquenquetsatero irineane.

⁵ Onimojeitacari oca icantaqueriri. Icoyeaqueri Ishiteva: quemisantincari ini, quemisantasanotirori Ishire Tasorentsi. Icoyeaqueri Jeripi, Pirocoro, Nicanori, Timo, Parimenashi. Aisati icoyeaqueri Nicorashi, yora peajanchari jorio, poneachari Antioquiaqui. ⁶ Irosati yonijaantapaacari. Icantajeitiri Tasorentsi: “Pamitacojeiteri yocapee irintacotantea”, aisati yajiricainataqueri iitoqui.

⁷ Oshequi icarati quemajeitaquerori irineane Tasorentsi. Aiquero ijatatii yoshequiti quemisantatsiri anta Jerosarequi. Aisati oshequi catsini icarati saserote shiretacarori oca aquemisantiri.

Yora Ishiteva, iriotaque icoyeane Tasorentsi.

⁸ Catsini icameetsashiretaque Ishiteva. Oshequi itasoncacairi Tasorentsi. Imatasanoyetiniri atiri caari inepinijeti. Imataqueneri paitapeerica iojeitantacari Tasorentsi ini Jesoshi. ⁹ Ainiro yapatotapinijeitanta anta ivancoquinta Tasorentsi atiri yora ipimanteevetari peerani, iro cantaincha yoipacajiri amanantavetariri. Aisati anta yapatotanta shirenesati, arejantiriasati, poneachari Shirishaqui, Ashiaqui. Ijatashijeivetacari Ishiteva, iquisatsajeivetacari aisati ipiatsajeivetacari.

¹⁰ Iro cantaincha oshequi ioti Ishiteva yoametanti, tecatsi incantajeiteri impiatsatasanojeiteari. Ainiro iotantari, cameetsa ineanati aisati, tempa oametaqueri Ishire Tasorentsi. ¹¹ Ari oshequi iquisajeitaqueri yoranqui, icantiri pashini ishanincapee:

—Pamene, nocoaque pintseeyacoteari Ishiteva. Ariorica pimajeitero nocantaquem-piri, nompinatempa quirequi. Jero oca pincantacotashiteariri: “Noquemaqueri Ishiteva, itseenquimataqueri Moishishi. Aisati iquempetaqueri iriori Tasorentsi, icantimata-queri”.

Icantiri:

—Ari, noncamantajeiteri ashanincapee.

¹² Iquemantacariri atiripee, iquisajeitanaca: savicacantantatsiri, oametantirori san-quenarentsi, maaroni. Jentsipaite ijatashijeitaqueri Ishiteva, yaapaintiri, tapi; yaajei-tanaqueri anta yoametavacaapinijiteitanta pincatsaripee. ¹³ Yaanajiri aisati iriori yora tseeyachari, icantanirotapaaqueri:

—Aitaque icantani Ishiteva, icantapiniti: “Te oncameetsateji ivanco Tasorentsi”. Aisati iquempetiro isanquenare Moishishi, itseenencapinitiro. ¹⁴ Noquemaqueri, icanti: “Yora Jesoshi, nasaretesati, intireajero oca pancotsica. Impashinitero oca ameyetacari, aisati impashiniyetajero yoameyetaqueeniri Moishishi”.

¹⁵ Yamenajeitaqueri maaroni savicajeitantsiri, sorerere. Ishipaquireavorotanaque Ishiteva, iquempetanacari inampire Tasorentsi.

7

¹ Isampitiri ivincatsarite saserote:

—¿Queariompa oca icantaqueri?

² Yacanaqueri Ishiteva:

—Novincatsarite, pinquemisantajeitavaquena. Peerani isavicantaveitaniri anta Mesopotamiaqui intacantaqueeniri Avaramani, inijaapaacari Tasorentsi, yora cameetsa-tatsiri. ³ Ari icantapaaqueri: “Pojocanajero piipatsiteca, pijate anta pashiniqui quipatsi ora nonijayempiri”. ⁴ Irosati yojocantanajaro iipatsite careasati, yovaanaja anta Jaraqui. Aitaque icamapaaqueri iriri, irosati yovaacaantajariri Tasorentsi aca aipatsitequica.

⁵ Iro cantaincha, te imperiji iipatsite, te impimateriji capichaji irisavicanteri. Aisati tequerani intimeni itomi. Iro cantaincha icantitacari: “Intime pitomi, aisati nompempi piipatsite avirori. Aisati nompajeiteri maaroni impojeitempineri intimaje”. ⁶ Aisati icantaqueri Tasorentsi: “Coajica intimaje poyejetajempineri iipatsitequi pashinisati atiri. Peerani catsini iromperanatasanoteari, oncarate osarintsi 400 iroashinoncaasanoteri.

⁷ Impoijiniquea noasanquetaqueri yora peranavetearineri. Irintiquea pishanincani, noimpiajitetjeri aca quipatsiquica, impoiji inquemisantaquena aca. ⁸ Nocoaque meeca pintoyeantea riotanteari atiri piquemisantaquena aisati pinquenqueshirentearori nocantaquemppiri”. Ari impoiji itimanaque itomi, yora Isaca. Ocarataque quitaiteri 8, irosati itoyeantantacari. Itimanaque itomi iriori Isaca, ipajitaqueri Jacovo. Itomipee iriori Jacovo icarajeitaque 12. Tempa iriojeitaque intacantajeitaqueri.

⁹ Ari yovaajiniri Ishiteva, icantiri:

—Ari yan tearijeitanaque, iquisajeitaqueri irirenti, pajitachari Jose. Ipimantajeitaqueri, impoiji yayeetanaqueri Ejipitoqui. ¹⁰ Ari yoashinoncaajeivetacari savicajeitatsiri, iro cantaincha yoavisacotiri Tasorentsi. Itasoncacoventiri, irootaque ineacameetsa-tantariri ivincatsarite ejipitosati, pajitachari Jarao. Ineaqueri otimimotiri iotantari, irootaque ipeantajariri iriori ivincatsaririnte. Ipincatsariventajeitiri maaroni ejipi-tosati, aisati ishaninca Jarao. ¹¹ Impoiji otashentsiteanaque maaroni Ejipitoqui, aisati Cananaqui. Oshequi yashinoncaajeitaca, tecatsi iraanajero intacantaqueeri iroajeita-jeari. ¹² Irriori Jacovo iquemacotaquero ari otimaqueri tirico anta Ejipitoqui. Ijivataqueri itiancaqueri itomipee: “Pijajeite Ejipitoqui pamanantaitero ayeari”. Ari yamanantaiti, aisati ipianaja. ¹³ Impoiji otsoncaja, itiancrajiri aisati: “Pijajeite pamanantajante aisati”. Ari ijajeitanaji aisati, jeri ineajeitapaaajiri pincatsari. Icantavaqueri: “Narotaque Jose pipimantaqueri peerani”. Aisati icantiri Jarao: “Jeri yoca iyentisanoripee narori”.

¹⁴ Impoiji icantiri aisati: “Pincantaiteri apa impoque aca, aisati maaroni ishaninca”.

¹⁵ Irosati ijatantanacari Jacovo anta Ejipitoqui, yaajeitanaqueri ishaninca, icarajeiti 75. Ari icamapaaqueri. Aisati iquempejeitacari maaroni itomipee, icamajeitaque iriori.

¹⁶ Impoiji yaatonquijeitanajiro itonquini Jacovoni, itijapaajiro anta Shiquemiqui, ari opajitari quipatsi yamanantiniri Avarama. Irio pimantirori quipatsi itomipee Emori. Ipinataqueri quirequi.

¹⁷ Irosati yovaajiniriri Ishiteva, icantiri:

—Irotanaintsi omoncarataquea icantitacaniri Tasorentsi. Icarati oshequi ashaninca arori, yoshequianaque anta Ejipitoqui. ¹⁸ Impoiji ipincatsariventanti pashini, caari iota-cotiri Jose. ¹⁹ Yamatavijeitiri ashaninca. Ishintsitsanajeitiri, yaajeitaqueri itomipee, yoitajeitaqueri. ²⁰ Irosati itimantanaca Moishishi. Aitaque icanta Tasorentsi, inea-cameetsatiri. Icarati mava cashiri iqueveanaque anta ivancoqui iriri, imanapitsataqueri ejipitosati. ²¹ Te irimateroji irimaneri aisati ivancoqui, irootaque yovetsicantacanariri pitotsijaniqui, imanavetacari otsapijaqui eni. Iro cantaincha oneaqueri irishinto Jarao, aaqueri. Oyeveajiri onampiqui, oquempetacantajiri otomisanori. ²² Yoametasanotiri ejipitosati maaroni ocarayeti ioyeriri iriori. Cameetsa ineaaveeti. Imatasanoyetiro paitapeerica yantayetiri.

Jero aisati icantiriri Ishiteva:

²³ —Ari ocarati irosarintsite Moishishi 40, irosati ijatantanacari irineeri ishaninca: yora ijorioririnte. ²⁴ Ineapaaqueri aparo, yashinoncaaca: ipasanatiri ejipitosati. Ari quisacoventapaacari Moishishi ashaninca, irosati yoantapaacariri ejipitosati.

²⁵ Ijivetaca iriori Moishishi ari impincatsajeitavaquerime ishanincapee, aisati ijivetaca ari iriojeitavaqueri irootaque cavintsajaejtajerine. Ijivetaca irioteme itiancaqueri Tasorentsi, iro cantaincha te impincatsajeitavaqueriji. ²⁶ Oquitaitetanaji ineaqueri ishaninca apite, iquisatsatavacaanaca. Icoaveta iroimajerenterime. Icantiri: “Tempa pis-hanincatavacaaca. ¿Paita piquisavacantajeitacari?” ²⁷ Ari itatsincavaqueri yora quisas-anotainchari, icantiri: “¿Janicampa peaquempi meeca novincatsarite? ¿Picoaque-mpa pimperanajeitena? ²⁸ ¿Picoaque-mpa meeca poyena narori, pinquempetacantena yoranquini ejipitosati poaqueri oshaiteniji?” ²⁹ Iquemavaque icantaqueriri, irosati ishiantanaca Moishishi, itsaroanaque. Irosati isavanticapaaca nampitsineentsiqui anta iipatsitequi Matia. Yaapaaque ijina, impoiji itimanaque itomi apite.

³⁰ Ari yovaajiniriri Ishiteva iquenquetsatacacjeitiri:

—Ocarataque 40 osarintsi isaviquimotiri Moishishi iriconquiri. Irosati inijaantacari inampire Tasorentsi, anta amorequimotaqueri totseequishi. Ocaaraitetinta anta, oquempejitaro toncaari pajitachari Shinai. ³¹ Yamenanaquero, irosati yoantanacaro cavaco: “Otaavetaca totseequishi, iro cantaincha te ontsonqueaji. ¿Paitaquea?” Ari ijatashitaquero, icoaveta iramenasanoterome. Irosati iquemantacari Avincatsarite,

³² icantiri: “Narotaque Tasorentsi, icantani ipincatsajeitaquena pishaninca: yora Avarama, Isaca, jeri yora Jacovo, maaroni”. Jaa iriori Moishishi itsaroasanotanaque, te iramenanajeroji. ³³ Icantiri aisati Tasorentsi: “Pipincatsatanarica, pisapatoreempa, picatiantacaro meeca quipatsi noameetsantiri, oca nopashinitiri. ³⁴ Noneaqueri anta Ejipitoqui pishaninca nocoyaqueri, oshequi yashinoncaajeitaca. Noquemaqueri icav-intsaajeitaca, meeca nocavintsajaejtiri. Irootaque nopocashitantariri noimpacacoven-tajeri. Meeca, nontianquempi Ejipitoqui”. ³⁵ Tempa peerani itseenqueevetacari yora Moishishi, icantirini: “¿Janicampa peaquempi novincatsarite?” Iriotaque yoca itiancaqueri Tasorentsi. Ipeajiri pincatsaritatsiri, aisati oavisacojeitiriri ashaninca. Irio tiancaqueriri inampire Tasorentsi, yora ineaqueri peerani anta totseequishiqui.

³⁶ Yaajantiri ishaninca, imayetaquero caari inepinijeiti, aisati itasoncacoventanti. Imayetaquero anta Ejipitoqui, incajarequi Quitioncajaroni, jero aisati anta caaraiteriqui. Ocarati 40 osarintsi imatapiniyetaquero.

Aisati icanti Ishiteva:

³⁷ —Iriotaque yoca Moishishi cantiriri ajorioririnteni: “Oquempetaca narori itimacaquena Tasorentsi, aisati inquempeteri pashini ashaninca intimacayeri: camantan-tapaatsineri iriori”. ³⁸ Peerani iquenaquenajeitantaniri ashaninca anta caaraiteriqui, ijivajeitaqueri yora Moishishini. Anta toncaariqui pajitachari Shinai iquenquetsatacairy

inampire Tasorentsi. Iquemavaquero Moishishi irineane Tasorentsi, irosati yovaajeitantaqueriri intacantaqueeri, iotantacariri Tasorentsi. Irosati yovaajeitantaqueero meeca arori.³⁹ Iro cantaincha te incoyeji intacantaqueeri inquemisanteri Moishishi, irointiquea itseencaqueri. Icoajeiveta impianajeme Ejipitoqui.⁴⁰ Icantajeitiri Aaro: “Yora Moishishi iriovetaaca aajeitajanteeri anta Ejipitoqui, yamajeivetaquee aca. Iro cantaincha ijataque chapinqui Shinaiqui. Meeca te ayotacoteriji paitanirica oaqueriri caari ipocantaja. Povetsicajeitajena pashini atasorentsite, ampincatsajeitajero iroori”.⁴¹ Ari yovetsicajeitiro, ishiacantiri vacajaniqui. Icoi impeajerome itasorentsite. Yoquenero ovisha, yamashiyetacanaro, ipashiyetacaro. Iquimoshireventashivetacaro yovetsicane.⁴² Ishemanaca Tasorentsi, yojocanaqueri: ishinejeitiri ijitasorentsitashiyetari catsir-incaiteri, cashiri, impoquiropee, paitapeerica. Tempa irootaque isanquenatacotiniri peerani yora Amoshini. Jero oca isanquenatiniri: “Noshaninca, jero oca icantimpiri Tasorentsi: ‘Ishanincani Ishiraeri, anta ocaaraiteapaaquenta pisavicaveitani 40 osar-intsi. Iro cantaincha te poapinitenariji poshiniri, te pintaapinitenariji: te pimpincatsatimajeitenaji catsini.’⁴³ Irointi pipincatsatashitacaro ipajiyetiri Maroco. Aisati pipincatsatashitacari impoquiro pajitachari Ireja. Aisati pipincatsatashitacaro povetsicajeitiri. Irootaque nontiancanfeariri vavironiasati iraajeitanaquempi inampiqui, imperanajeitempi’”. Irootaque isanquenatiniri peerani Amoshini.

⁴⁴ Irosati yovaauqueneri aisati Ishiteva:

—Peerani anta caaraiteriqui otimimoveitarini ashanincani cajo, onantari isanquenare Moishishi. Irio vetsicacantirori Tasorentsi. Imoncarataqueneri Moishishi icantaque-ri. ⁴⁵ Impoiji yaajeitanaquero ashanincani jaocarica ijayetiri. Ijivajeitaqueri Josoe iipatsitequi pashinipee atiri. Itiancajeitiri Tasorentsi atiripee, otimantari isavacantari ashanincani. Quiso yoajeitiro cajo, irosati itimantacari Iravirini iriori.⁴⁶ Yora Tasorentsi ineacameetsatiri Iravirini. Icantavetarini iriori: “Apa, tempa aviro Tasorentsi, ipincatsatimpini Jacoboni. Nocoaque pishinetena meeca novetsiquempiro pinampitanteeari”.⁴⁷ Iro cantaincha irinti Saromoni vetsicasanotirori pancotsi.⁴⁸ Te irisavicanteroji Tasorentsi oca pancotsi yovetsicayetiri atiri. Tempa irio savicasanotatsiri inquitequinta jenoqui. Tempa aitaque icantita camantantatsiniri:⁴⁹ “Icanti Avincatsarite: ‘Irootaque inquite nosavicasanotantari. Ora quipatsi, te iro nonampi. ¿Jaoca pincanteari povetsicantenari pancotsi nosavicanteari? ¿Arimpa nonaquearo pancotsi?’⁵⁰ Tempa naro-taque vetsicajeitaquerori maaroni timayetatsiri’”.⁵¹ Noshaninca, te pincoyeji piote. Pishiajeitaqueri pashinisati atiri: te pinquenqueshireempa. Te pinquemisantajeiteji. Aitaque picantaitatiani pipiatsatashitacaro Ishire Tasorentsi. Pishiaqueri intacantimpiniri.⁵² ¿Timatsimpa camantantatsiniri caari iquishini pishanincani? Teve aneeriji, tempa iotaca iquisajeitaquerini. Yoajeitaquerini maaroni camantantajeivetachaniri; icantini: “Coajica impoque cameetsatasanotatsineri”. Ipocavetaca, iro cantaincha te pimpincatsajeitavaqueriji avinti, irointi paacantaqueri, poacantaqueri.⁵³ Piojeivetaro irineane Tasorentsi yoamevetimpiri inampire, iro cantaincha te pinquemisanteroji.

Irootaque icantiriri Ishiteva ishaninca.⁵⁴ Ari iquemajeitavaquero oca icantaqueriri, irosati iquisajeitantanaca. Oshequi iquisajeitanaqueri, yatsicanajitimentajeitanacari irajiqui, taquiririri.⁵⁵ Irompa irinti Ishiteva, iveshireimentashiretasanotacaro Ishire Tasorentsi. Yamenasanotanaque inquitequi, inequiero ishipaquireane Tasorentsi. Jeri inequieri Jesoshi aisati, icatiaca iracosanoriqui Tasorentsi.⁵⁶ Icantanaque:

—Jaa, yonta noneasanotaqueri inquitequi, icatiaca Atirivetapaintachaniri anta iracosanoriqui Tasorentsi.

⁵⁷ Shintsi icajemajeitanaque, yovijeitanaquero iyempita, ishiashijeitapaacari. Yaajeitaqueri, shepi;⁵⁸ yaajeitanaqueri anta ovecaratapaacanta nampitsi. Irosati ipichaana-jeitantaqueriri. Yora pichaaqueriri, isapocaqueri, yoicoro, yoquiero iitiqui Saoro, icantiri:

—Pamenenaro noicoro, nompichaavaquerita.

Icantiri:

—Ari.

Evancari ini Saoro iriori. ⁵⁹ Ari ipichaanataqueri Ishiteva, irosati iquenquetsatacantanacari Tasorentsi, icantanaque:

—Novincatsarite Jesoshi, paavajero noshire.

⁶⁰ Itiyeroanaca, antearojenca ineanatanaque, icanti:

—Novincatsarite, te oncameetsate oca yantajeitaqueri, iro cantaincha eiro piquishimentiritsi.

Irootaque icantaqueriri, irosati icamantanaca, torein. Icantanaque Saoro iriori:

—Ariove, camanirotaque ini; ineacarove.

8

Ijati quemisantatsiri anta Samariaqui.

¹ Irosatiquea intantanacari iquisajeitiri quemisantatsiri anta Jerosarequi. Itsoncajeitanaca maaroni, ishiaejeitanaca Joreaqui, aisati Samariaqui. Iranti timajeitanaintsi yora iroamerepeeni Jesoshini. ² Ari itijaqueri Ishitevani. Irio tijaqueriri quemisan-tasanotatsiri. Oshequi iraacojeitaqueri. ³ Iranti Saoro, icoaveta intsoncajeiterime yora quemisantatsiri. Ijatashijeitiri ivancopeequi, inoshicajeitiri shirampari, tsinane, maaroni. Yoiminqueajeitaqueri.

Iquemisantaque savicatsiri otsipapeequi nampitsi.

⁴ Yora shiajeitanainchari, iquenaquenayetanaque otsipapeequi nampitsi. Iquenquetsajeitaquero irineane Tasorentsi. ⁵ Yora Jeripi yareetapaaca nampitsiqui, onta Samariaquiniri. Icamantacotapaaqueri Quirishito. ⁶ Iquemajeitantacariri, aisati inea-jeitantacariri itasoncantayeti, iquemisantasanojeitavaqueri atiripee. ⁷ Yoavisacojeitiri oshequi neiriri camaari, antearojenca icajemajeitanaque camaaripee, irosati ijtanta-naja. Yoavisacojeitiri oshequi choriveetatsiri, aisati amashitachari iitiqui. ⁸ Irosati iquimoshirejeitantanaca yora savicajeitatsiri nampitsiquinta.

⁹⁻¹¹ Itimi aisati anta shirampari pajitachari Shimo. Peerani oshequi osarintsi isheripiariveitani. Yoajeivetarini cavaco maaroni samariasati, irootaque ishemetantacari oshequi. Ipincatsajeivetacari atiripee: pincatsripee, iratiritepee, maaroni. Icantajeiti:

—Tempa iriotaque Shimo yoca matirori itasorenca Tasorentsi. Tempa irio pincatsari-tatsiri. Tsame ampincatsajeiteri.

¹² Iro cantaincha impoiji yareetapaaca Jeripi, icamantacotaqueri Tasorentsi, jaoca icanta ipincatsariventanti. Aisati icamantacotaqueri Jesoquirishito. Ari ivaotisajeitaqueri quemisantajeitauntsiri: shirampari, tsinane, maaroni. ¹³ Aisati iquempetaja Shimo iriori, iquemisantaji, ivaotisataja. Impoiji quiso yoanaqueri Jeripi. Ineacoyetaqueri pitarica yantayetaqueri, aisati itasoncantasanoyeti. Irosati yoantanacari cavaco.

¹⁴ Yora iroamereni Jesoshi savicatsiri Jerosarequi iquemacojeitaqueri samariasati, iquemisantajeitaquero iriori irineane Tasorentsi, irosati itiancantacariri Petero, jeri Joa. ¹⁵ Ijajeitanaque anta. Icantiri Tasorentsi: “Pintasoncacoventajeiteri samari-asatipee, quiso oajeitanteeariri Pishire”. ¹⁶ Iro cantaincha tequerata quiso oajeiteri, apatiroquera ivaotisatimentajeitacari Avincatsarite Jesoshi. ¹⁷ Ari yajiricainatapaaqueri iitopeequi, irosati yaashirejeitacaro Ishire Tasorentsi, otasoncacaajeitaqueri. ¹⁸ Ineacotaqueri Shimo. Iotanaque ariorica yajiricainatapaaqueri, yaashirejeitaquero iriori Ishire Tasorentsi, irosati icantantacari:

¹⁹ —Jerica quirequi, nocoaque poametena nontasoncante narori, nonquempetempi avirori. Nocoaque ariorica najircainateri noshaninca, iraashirejeitanteorori Ishire Tasorentsi.

²⁰ Icantanaqueri Petero:

—Pijate Sharincaveniqui, paanajeri aisati piirequite. Pijitashivetaca avirori ari pamanantero itasorenca Tasorentsi: apaniro imatacanti Tasorentsi. ²¹ Tecatsi pin-cantea pinquempetena: ioti Tasorentsi te pincameetsashireteji. ²² Te oncameetsateji oca piquenqueshirevetacari. Pinquenqueshiretanaquea, pojoquero caari cameetsatatsi pantayetiri. Pincanteri Avincatsarite: “Pincavintsayena”. ²³ Niotaquempi, oshequi pishemeti, aisati pashi poiro te pincameetsateji.

²⁴ Yacanaqueri Shimo, icanti:

—Pincanterite Tasorentsi incavintsayena oncanteataquea eiro nojatantatsi Sharin-caveniqui.

²⁵ Yora Petero aisati Joa, icamantacotiro irineane Avincatsarite, iquenquetsatacotiro. Iquenayetanaque oshequi nampitsipeequi Samariaqui, icantajeitiri savicajeitatsiri:

—Ariorica pinquemisanteri Jesoshi, iroavisacotempi Tasorentsi, iraajeitanaqueemp*i*nquiteequi.

Irosati ipiajeitantanaja Jerosarequi.

Iquemisantaque etiopiasati.

²⁶ Ari ineanatiri inampire Avincatsarite, icantiri Jeripi:

—Meeca pijatanaque, pinquenanaque anta avotsiqui quenantachari caaraiteriqui: ora poneachari Jerosarequi, jatatsiri irosati Casaqui.

²⁷ Ari ijatanaque, iquenanaque avotsiqui. Itonquiotavacari shirampari poneachari Etiopiaqui. Aitsoquireari ini. Irisati ovincatsaririnte Cantasheshi, yora quempoyeinirori maaroni oirequite. Irootaque iroori ivincatsarote etiopiasati. Ari ijaiti anta Jerosarequi, iquemisantaitiri Tasorentsi. ²⁸ Meeca ipaja, isavicaque ishiacomentoqui, ineanatiro isanquenaren*i* Isayashini, camantantaveitachaniri. ²⁹ Iro Ishire Tasorentsi cantaqueriri Jeripi:

—Pijate anta, pintonquiotavaquearo shiacomentotsinta.

³⁰ Ishiashitanacari, iquemapaaqueri ineanatiro. Icantapaaqueri:

—¿Piotaquerompa oca pineanatiri?

³¹ Yacanaqueri:

—Teve niterojo. ¿Jaoca noncanteari niotantearori? Tecatsi oametenarone. Pintetaapeempa, pisaviquimotapeena aca.

³² Jero oca ocantiri sanquenarentsi ineanatapairi: “Ariorica yoyeetiri ovisha, imajere-tashitanaca. Ariorica yameyeetiri ovishajaniqui, imajeretashita. Aisati inquempeteari Quirishito iriori, irimajerete. ³³ Iroashiventeeteri, eiro otampaticatitsi incantacoyee-teriri. Impoiji iroyeeteri. Eiro itimitsi irinti itomipee”.

³⁴ Isampitiri:

—Pincamantenate. ¿Janicampa iquenquetsatacotiri yora camantantatsiniri?

¿Irisatimpa quenquetsatacoshitacha? ¿Pashinimpa iquenquetsatacotiri?

³⁵ Irosati icamantantanacari Jeripi, icamantacotiri Jesoshi. Ijivataqueneri ocantiri ora Sanquenarentsi, yoametasanotaqueri. ³⁶ Aiquero ijatacairiri avotsiqui, irosati ineantapaacaro nija. Icantaqueri:

—Jero oca nija. ¿Cameetsanimpa novaotisatea?

³⁷ Yacanaqueri:

—Piquemisantsanotiririca Quirishito, cameetsa pivaotisataquea.

Icantiri:

—Noquemisanti. Iriotaque Jesoquirishito Itomi Tasorentsi.

³⁸ Yoatiaquero shiacomentotsi. Ari yaniireajeitanaque, itsipatavacaanaca apite, yanijatanaquero nija, ivaotisataqueri. ³⁹ Ari yaatanaji, irosati quiso oantanacari Jeripi Ishire Avincatsarite. Te irineavajeriji aisati yora itsipavetacari. Apaniro yovaanaja iriori, iquimoshiretanaque. ⁴⁰ Irintiquea Jeripi ineacotashitapaaca nampitsiqui anta opajitanta Asoto. Ari yovaanaca, iquenquetsayetanaque nampitsipeequi:

—Pinquemisantajeiteri Quirishito pavisacojeitantajeari.

Irosati yareetantanaja anta Sesareaqui.

Ipashinitantajari Saoro.

¹ Ari yashi yoiro iquisa Saoro. Isareavetacari iroajeiterime maaroni quemisantajeitiriri Avincatsarite. Irosati ijatashitancari ivincatsarite saserote, icantiri:

² —Nocoaque pisanquenateneri yora quemisantacaajeitiriri ajorioririnte anta Tamashicoqui, pincanteri: “Pamitacojeiteri Saoro iraajeiteri maaroni quemisantajeitiriri Jesoshi. Nocoaque iraajeiteri: shirampari, tsinane, maaroni. Impoiji iroisojeiteri, iramajeiteri aca Jerosarequi”.

Ari isanquenatiniri, ipavaqueri. ³ Impoiji ijatanaque, icantanaca, icantanaca: irotapaintsi Tamashico. Omapocapaquaqueri amorecatsiri, amorecacotapaquaqueri, morec: oponeaca inquiteequi. ⁴ Iparianaque quipatsiqui, tiricn, iquematiiro irineane Jesoshi:

—Saoro, Saoro: ¿paita piquisantanari?

⁵ —¿Janicampi, Novincatsarite?

⁶ —Narotaque Jesoshi, piisane. Pijate, povaanaquea nampsiqui. Coajica incaman-teetempi pitarica panteri.

⁷ Ari icatiajeitaca yora shirampari itsipajeivetacari, yojeitaque cavaco. Iquemashitac-aro irineane, iro cantaincha tecatsi irinee. ⁸ Iriori Saoro, icatianaja. Yoquireavetanaja, te irimatajeoji iramenaje, irootaque yacatsatantanajariri, yareetacaacari Tamashicoqui.

⁹ Ocarati isavicashitaca mava quitaiteri. Te irineajeji, te iroajeji, te irirajeji.

¹⁰ Ari itimiri anta Tamashicoqui quemisantatsiri, pajitachari Ananiashi. In-eashitavacari Avincatsarite, icantapaaqueri:

—Ananiashi.

Yacanaqueri:

—¿Paita, Novincatsarite? Ainirona aca.

Icantiri:

¹¹ —Meeca pijate anta avotsiqui ipajyeetirinta: “Tampaticari”. Pincoapaaqueri shirampari pajitachari Saoro, yora tarisosati. Pincoapaaqueri anta ivancoqui Jorashi. Ainiro iriori, iquenquetsatacana. ¹² Nomishitacaacari, ineaquempi piqueashitapaaqueri, pajiricainatapaquaqueri; ineaca yamenanaji.

¹³ Yacanaqueri:

—Oshequi noquemacotiri, iquenquetsatacocyetiri yora picantaquenari. Oshequi yoashinoncaajeitiri quemisantajeitimpri anta Jerosarequi, icantirive. ¹⁴ Tempa itian-quiri aca yora jivatacaajeitiriri saserote iraajeitantaquenari, maaroni aventajeitimpri. Oshequi notsaroacaacari.

¹⁵ Iro cantaincha icantiri:

—Pijate. Tempa iriotaque nocoyeaqueri. Iriotaque quenquetsatacotentaneri. In-quenquetsatacajeiteri jorioppee, pashinisatipee atiri, pincatsaripee, maaroni. ¹⁶ Aisati nonijayeri jaoca oncarate irineacatsitimentena.

¹⁷ Ari ijatanaque Ananiashi, iqueapaaque pancotsiqui. Yajiricapaquaqueri, icantiri:

—Saoro, aviotaque noyemisantaririnte. Itiancaquena Avincatsarite Jesoshi, yora onijaaquempi anta avotsiqui piquenapaaquenta. Itiancana pamenantajeari, quiso oasanotantempiri Ishire iriori.

¹⁸ Irosati opariantanaja iroququiniri shiavtarori inventaqui shima, yamenasanotanaji. Ari ijatanaque, ivaotisataca. ¹⁹ Aisati yoja, ishintsitanaji. Aparopee quitaiteri itim-imovetanacari quemisantatsiri anta Tamashicoqui. ²⁰ Impoiji icamantantayeti anta pancotsiqui yapatojeitanta jorioppee. Icantapinijeitiri:

—Iriotasnotaqueyeata Jesoshi Itomi Tasorentsi.

²¹ Yoajeitanaquaqueri cavaco yora quemajeitavaquerir. Icantajeiti:

—Tempa iriotaque yora tsoncajeiterinemerri quemisantatsiri anta Jerosarequi. Tempa irootaque ipocashitantavetacariri aca iroisojeiterime quemisantiriri Jesoshi, iraajeitana-querime anta saserotepeequinta.

²² Aiquero ijatatiini Saoro iquenquetsati, tecatsi intsaroacaimateari. Yoajeitavaquaqueri cavaco yora joriotatsiri. Iotacaasanotaquaqueri, icanti:

—Yora Jesoshi, iriotaque Quirishitotatsiri.

²³ Ari avisanaque oshequi quitaiteri, irosati isareantajeivetacari iroyerime. ²⁴ Iro cantaincha iotacotaquaqueri Saoro isareacari. Maaroni quitaiteriqui, tsiteniriqui, yame-najeivetacaro jorioppee iqueantapinitari nampsitsi, icoajeivetaca iraavaquerime Saoro, iroyerime. ²⁵ Iro cantaincha, osaite yaanaquaqueri iroamerepee tantotsiqui, ora shoncarori nampsitsi; yataitacaanaquaqueri, impoiji yoaniireacojeitajiri cantiriqui araquerora. Irosati ishiantanaja, te irineajeitavajeriji oyerinemerri. ²⁶ Ari yareetapaaca Jerosarequi. Icoaveta intsipajeitapeemparime quemisantajeitatsiri, iro cantaincha itsaroacaajeitavacari. Iji-tashivetacari te inquemisanteji.

²⁷ Impoiji yaanaqueri Verenave, ijivatanaqueri anta itiminta iroamereni Jesoshi. Icamantapaaqueri:

—Queario, iraajeiterime Saoroca ayemisantaririnte anta Tamashicoqui, iro cantaincha anta avotsiqui inequeri Avincatsarite, iquenquetsatacaaqueri. Iquemisantaque, impoiji anta Tamashicoqui iquenquetsatacapinitiri Jesoshi, te intsaroacayeariji tseencantsiri.

²⁸ Ari yaacameetsajeitaqueri quemisantatsiri, cameetsa itimimotaqueri irlori anta Jerosarequi. Icantani Saoro, quiso yoajeitaqueri ayemisantaririnte. Cameetsa iquenquetsatacotasano notiri Avincatsarite. ²⁹ Iquenquetsatacaaajeivetacari joriopee iotirori quirieco, iro cantaincha ipiatsajeitavacari; icoajeivetanaca iroyerime, ³⁰ iro cantaincha iotacotaqueri iyemisantaririnte, irosati yaantanajari Saoro anta Sesareaqui. Impoiji itiancajeitaqueri Tarisoqui.

Itasoncantayeti Petero anta Iriraqui.

³¹ Cameetsa itimajeiti quemisantajeitatsiri anta Joreaqui, Carireaqui, Samariaqui. Aiquero ijatatii iquemisantajeitanaque. Yamejeitaca ipincatsajeitiri Avincatsarite. Aisati oshequi oveshireacaasanojeitacari Ishire Tasorentsi. ³² Ari iquenaquenayetanaque Petero iquivantayetiri quemisantayetatsiri, irosati yareetantacari Iriraqui. Anta isaviqui oshequi quemisantatsiri. ³³ Ineapaaqueri shirampari pajitachari Eneashi. Ocarati osarintsi 8, inareaca imaamentoqui, ichoritaque. ³⁴ Icantapaaqueri:

—Eneashi, irlotaque Jesoquirishito oavisacotajempine. Pincatianaje, povetsicajero pimaamento.

Jentsipaite itinaanaja. ³⁵ Ineajeitaqueri irirasati, jeri saronasati; irosati iquemisanta-jeitantanajari Avincatsarite.

³⁶ Otimaveta Jopequi quemisantatsiri pajitachari Tavita. Acanti aneanequi arori: Maniro. Cameetsa oca antayetiri: ashi oiro intacotantayeta. ³⁷ Omantsiatanaque, impoiji ocamaque, torein. Ari iquivatsempequieetaquero ovatsani, impoiji yoaquero anta shitamencotsiqui, onta jenioquijiniri. ³⁸ Jero Irira oquempejitaro Jope. Yora quemisan-ajeitatsiri, iquemacotaqueri Petero, inapaaque anta. Itiancaqueri apite shirampari:

—Pishintsite, pincantaiteri Petero impoque.

Ari ijataque, icantasanotapaaqueri:

—Pishintsite pojatanaquena pamenapeero tsinane, camaque oni.

³⁹ Ari ijatanaque Petero, yojatanaqueri. Yareetacaacari, yaanaqueri anta pancotsiqui jenioquiji. Oshonquimentajeitacaro maaroni camajimentaaro, iraajeitaca. Onijaayetiri oicoropee, aisati oitsaaresanoripee. Ocantajeitaque:

—Tequerani oncameni Tavita, otijayetanaroni maaroni ocapee.

⁴⁰ Ari yoimisoquijapaaqueri maaroni atiri. Itiyeroanaca, iquenquetsatacairy Tasorentsi. Ipitsocashitanacaro camaintsiri, icantiro:

—Tavita, pintinaanaje.

Oquireanaji, oneaqueri Petero, irosati osavicanja. ⁴¹ Yaavacotiro, yoatiajiro. Icajemejtiri aisati quemisantajeitatsiri, aisati iroori icajemejtiro camajimentaaro, maaroni. Icantajeitavaqueri:

—Jero, aneanaji.

⁴² Ari iquemacojeitaquero maaroni jopesati. Icarati oshequi quemisantayetanajiriri Avincatsarite. ⁴³ Oshequi quitaiteri isaviqui Petero Jopequi. Isaviqui ivancoqui Shimo, yora vetcicapinitiriri meshinantsi.

Iquemisanti Coronorio, yora capitanotatsiri.

¹ Ari itimaiti anta Sesareaqui shirampari pajitachari Coronorio. Iriotaque iyapitanote oshequi soraro, poneayetachari Itariaqui. ² Quemisantasanotatsiri ini, ipincatsatiri Tasorentsi. Aisati iquempejeitari maaroni ishanincapée irlori, saviquimojeitiriri. Oshequi icavintsaajeitiri atiripee. Icantani iquenquetsatacairy Tasorentsi. ³ Ishaavijitanaque catsirinaiteri ineashitavacari inampire Tasorentsi, iconijatasanotapaaque. Iquempejita-panacari, icantapaaqueri:

—Coronorio.

⁴ Yamenasanotavaqueri, sorerere. Itsaroasanotanaque catsini. Icantavaqueri:
—¿Paita, Novincatsarite?

Icantiri:

—Iquemaquempi Tasorentsi piquenquetsatacapinitaqueri, aisati ineaquempi pintacotapinijeitacari atiripee. ⁵ Icoaque meeca pintianque aparopee shirampari anta Jopequi. Pincajamacanteri yora Shimo, ipajiyetiri aisati Petero. ⁶ Irio isaviquimotiri pajitachari aisati Shimo, yora vetsicapinitiriri meshinantsi. Otimi ivanco otsapijaqui incajare.

⁷ Ari ipianaja inampire Tasorentsi, yora neanaitiriri. Icajemaqueri Coronero inampire apite, aisati soraro aparo. Quemisantasanotatsiri inii soraro. Icarajeitiri amitacojeitiriri Coronero. ⁸ Icamantajeitaqueri maaroni oca icantaqueriri inampire Tasorentsi, impoiji icantiri:

—Nocoaque pijajeite Jopequi, pamenaiteri yora Petero.

Ari ijajeitanaque. ⁹ Oquitaitamanaji, itampaticatapaaque catsirincaiteri. Iquenapaaque, irosati iquempejitantapaacaro nampitsi. Irriori Petero, yataitanaque jenoqui, iquenquetsatacairy Tasorentsi. ¹⁰ Itasheavetaca, icoaveta iroyeame. Ainiroquera ovetsquiniri iroyeari, omapocapaaqueri ineashitacaro. ¹¹ Ineaquero inquite tsom-poina. Oaniimaotapaaca quipatsiqui shiavetarori tocoya antearo. Yajiriqueetaquero anta ocaramaotapaaque. ¹² Iteyetaca yora caari yoyeeta; jeri iteyetaca maranquepee, vanquiyetachari, maaroni. ¹³ Iquemavaqueri Tasorentsi, icantiri:

—Petero. Jeri yoca, poyer, impoiji poyer.

¹⁴ Icantanaqueri:

—Novincatsarite, eiro noaritsi. Te nameteariji caari yoyeeta, caari icoacayeetana noyeari.

¹⁵ Yapiitajiri:

—Tempa narotaque Tasorentsi, nocamantimpi nainti: “Cameetsari ini, poyer”. Eiro picantashitaritsi avirori: “Te incameetsateji”.

¹⁶ Yapiitajiniri aisati:

—Poyer, poyer.

Irosati yoancacotanteetajariri jenoqui.

¹⁷ Te iriotacoteroji Petero oca ineakeri. Irosati yareetantapaaca pancotsiqui itiancane Coronero. Isampitacotapaqueri:

—¿Jaoca ivanco Shimo, yora vetsicapinitiriri meshinantsi?

Icamanteetiri:

—Irootaque oca ivanco.

¹⁸ Ari isampitajiri:

—¿Ariompa isaviquimotimpire yora Shimo Petero?

Icanteetiri:

—Je, aitaque isaviquiri.

¹⁹ Irosatiquera iquenqueshiretiro Petero ineakeri. Ari ocantaqueri Ishire Tasorentsi:

²⁰ —Jerijeitapaaque shirampari, coimpire. Pijate, paniireashitanaqueri. Eiro picantashiretitsi, pojajeitanaqueri. Tempa narotaque amajeitaqueriri.

²¹ Ari yaniireashitapaqueri, icantapaqueri:

—Narotaque picoiri. ¿Paita pipocashitantanari?

²² Ari yacanaqueri iriori:

—Itiancaquena Coronero, yora capitanotatsiri. Icameetsashiretasanoti, aisati ipincatsatiri Tasorentsi. Maaroni joriotatsiri ineacameetsajeitiri. Icantiri inampire Tasorentsi: “Pincajamacanteri Petero pivancoqui. Pinquemisantavaquero irineane”. Irootaque itiancantanari aca.

Ari icantavaqueri:

²³ —Pinqueapee.

Ari ineshinoncatavaqueri. Ari oquitaitamanaji yojatanaqueri, itsipajeitanacari iyemisantaririnte aparopee, yora jopesati. ²⁴ Aparo imaaajeitanaque nianqui, irosati yareetantamanaca anta Sesareaqui. Yoyeaqueri Coronero anta, yapatojeitaqueri maaroni ishaninca aisati itsipatapinijeitari. ²⁵ Iqueapaaque Petero. Yovetsatavacari Coronero, impoiji itiyoashitavacari iitiqui. ²⁶ Ari yoatiajiri Petero, icantiri:

—Pincatianaje. Te naro Tasorentsi, tempa narosati narori atiri, aquempetavacaaca.

²⁷ Ari iquenquetsatavacaaca, iqueapaaquero pancotsi. Ineapaatiiri oshequi apatojeitainchari, ²⁸ icantapaaqueri:

—Naro jorio. Piojeiti avirori te irishinetenaji noshaninca nontsipajeiteari pashinatisatee atiri. Aisati te irishinetenaji nonquivanteri. Iro cantaincha yoametaquena Tasorentsi te oncameetsateji nompinqueri pashini atiri, te oncameetsateji noncante: “Te incameetsateji”. ²⁹ Ari picajemacantaquena, irosati nopocantanaca, te nonquisotanaque. Meeca nosampitempi, ¿paita picajemacantantanari?

³⁰ Icantiri Coronero:

—Ocarati meeca 4 quitaiteri, ishaavijitanaque catsirincaiteri, iquempetaca meeca. Noquenquetsatacairy Tasorentsi aca novancoqui. Noneaqueri aparoni shirampari, icatiimotapaaquena. Iquitsaataro shipaquireatsiri iitsaare. ³¹ Icantapaaquena: “Coronero. Iquemavaquero Tasorentsi piquenquetsatacaaqueriri. Iotaquempi pintacotantayeta. ³² Pintianque anta Jopequi, pincajamacanteri Shimo, ipajiyetiri aisati Petero. Isaviquimotiri itsipa Shimo, yora vetsquiriri meshinantsi. Otimi ivanco otsapijaqui incajare”. ³³ Intsipaite nocajemacantaquempi, irosati pipocantacari. Meeca nocarajeitaqueri iriori Tasorentsi aca. Nocoajeitaque nonquemajeitero oca inintacaquaempiri Avincatsarite.

³⁴ Ari ineaveetanaque Petero iriori, icanti:

—Meeca niotasanoque te irinashitacaajeiteejii Tasorentsi, tempa icanti: “Piquempetavacaajeitaca, eiro pipincavacaajeitatsi”. ³⁵ Te inquenqueshiretacoteeroji onashiyetarica aneane aisati ameyetari, irointi ineacameetsajeitaqueri maaroni pincatsajeitiriri, aisati maaroni antapinitirori cameetsayetatsiri. ³⁶ Naro jorio. Piojeitavaquero irineane Tasorentsi ijivajeitaquena, iotacaajeitaquena. Cameetsa oca icamantaquenari: “Ariorica pinquemisantajeiteri Jeso quirishito, cameetsa nosavicacaajeitempi, pinquempetavacantajeiteari”. Tempa iriotaque Jesoshi Avincatsarite maaroni, ³⁷ piojeitaqueri. Ijivataque Joani iquenquetsatacotaqueri, icanti: “Cameetsa pivaotisatimentajeiteari Quirishito”. Impoiji iquenquetsatacotaqueri itsipapee, intanacaro anta Carireaqui. Yovaacaanacaro maaroni nampitsipeequi anta Joreaqui. ³⁸ Icamantajeitiri atiri jaoca icantaqueriri Tasorentsi Jesoshi, yora nasaretesati, itiancantacariri Ishire, aisati ipantacariri itasorenca; irootaque iquenaquenayetantacari, yantantayetacarori cameetsayetatsiri. Yoavisacojeitiri neajeitiriri camaari. Quiso yoiri Tasorentsi, irootaque imatantacariri. ³⁹ Noneajeitaqueri yantayetiri anta inampipeequi noshaninca, aisati anta Jerosarequi. Noneaqueri yoanteetacariri, ipajacotanteetacariri coroshipui. ⁴⁰ Omavatapaaque quitaiteri itinaajiri Tasorentsi, yonijaajanari. ⁴¹ Te ironijaajeiteriji maaroni, narojeitaque nainti, yonijaajiri. Icoyeaquena Tasorentsi, irootaque noneantavajariri. Icamasanovetaca, ifinaanaja aisati. Impoiji noacaavajari, aisati niracaavajiri. ⁴² Icantaquena: “Pincamantajeiteri atiri: ‘Inintacaquaqueri Tasorentsi Jesoshi incantacoventajeiteri maaroni atiri: aneatsiri aisati camaintsiri’ ”. ⁴³ Tempa peerani iquenquetsatacotirini Quirishito yora camantantatsiniri, icantajeitini: “Ainiro yantajeitaquero maaroni atiri caari cameetsatatsi; iro cantaincha ariorica inquemisanteri Quirishito, incavintsajaeiteri irinti, eiro iquishimentiritsi yantajeitiri, eiro iquenqueshireacotiritsi”.

⁴⁴ Ainiroquera iquenquetsati Petero, irosati opocashitancariri Ishire Tasorentsi. Aisati opocashijeitaqueri maaroni quemajeitavaquerori icantaqueriri. ⁴⁵ Ari yoajeitanaque cavaco yora jorio, quemisantatsiri: yora tsipatariri Petero. Ari iojeitaque itiancasanotaquero Tasorentsi Ishire, quiso oantacariri pashinisati atiri. Irootaque yoajeitantanacari cavaco. ⁴⁶ Iquemajeitavaqueri ishaninca Coronero ineanatantashitanacaro pashinipee neantsi, aisati icantajeiti:

—Cameetsa ini Tasorentsi.

Ari icantanaji Petero:

⁴⁷ —Iquempetaquee arori, yaashirejeitaquero Ishire Tasorentsi. Tempa ocameetsati irivaotisajeitea.

Icantiri itsipapee jorio:

—Je, cameetsataque.

⁴⁸ Irosati icantantariri Petero ishaninca Coronorio:
 —Pivaotisatimentajeiteari Jesoquirishito, iriojeitantempiri atiri pipincatsajeitaqueri.
 Icantajeitanquaqueri:
 —Jentsiqueti pivaotisatena.
 Ari ivaotisajeitaqueri. Impoiji icantajeitavaqueri:
 —Pisaviquimotanaquenatsita aparopee quitateri, poametasanotajena aisati.

11

Iquemajeitaque jerosaresati iquemisantaque itsipapee atiri.

¹ Iquemacojeitaqueri joreasati: jeri yora itiancaneppee Jesoshi, jeri maaroni quemisan-tajeitatsiri. Icamanteetiri:

—Iquemisantaqueri Jesoshi pashinisatipee atiri; irio quemisantacaajeitaquerirri Petero.

² Itoncantanajari Petero Jerosarequi, iquishimentajeitavaqueri ijorioririnte: quemisantatsiri inaveta. ³ Icantajeitavaqueri:

—¿Paita pijatashitariri pashinisati atiri? ¿Paita poimotantariri iriori? Te on-cameetsateji.

⁴ Itsoteasanotaqueneri Petero, icantiri:

⁵ —Meeca noncamantempi. Anta notimaitinta Jopequi, noquenquetsatacairy Tasorentsi. Noneashitavacaro, noneaquero shiavetarori tocoya antearamaronca. Yajiriqueetaquero anta ocaramaoyetapaaque, oponeaca inquitequinta, oaniimaotimota-paaquena. ⁶ Namenasanotavaquero sorerere: noneaquero caari avajeita: chancho, maranque, vanquiyetachari, maaroni. ⁷ Noquemaqueri Tasorentsi, icantauena: “Meeca poyer; poyer”. ⁸ Iro cantaincha nocantavetacari: “Novincatsarite, eiro noaritsi. Te nameteariji caari yoyeeta, caari icoacayeetana noyeari”. ⁹ Apitetaque Yapiitaquena, icantana: “Tempa narotaque Tasorentsi cantimpiri: ‘Cameetsari ini’. Eiro picantashitaritsi avirori: ‘Te incameetsateji’ ”. ¹⁰ Aitaque apitaca mava. Irosati ovancantanaja inquitequi. ¹¹ Irosati yareetantapaaca mava shirampari anta pancotsiqui notimaitinta. Iponeanaca Sesareaqui, itianqueetaquenari. ¹² Irosati ocantantaquena Ishire Tasorentsi: “Pojatanaqueri, eiro piquisotanaquetsi”. Ari noijatanaqueri. Aisati yoijatanaquena iriori ayemisantairinte, icarajeiti 6. Noqueajeitapaaque ivancoqui yora cajemacantaquenari. ¹³ Iquenquetsatacavaquena, icamantavaquena jaoca icantacari ineantacariri inampire Tasorentsi. Yonijantapaacariri, icantiri: “Pintianque anta Jopequi. Pincajemacanteri Shimo: ipajyeetiri aisati Petero. ¹⁴ Iriotaque oametapeempirone irineane Tasorentsi, paviscotantajeari. Aisati inquempejeitacea iriori maaroni pivan-coquiniri”. ¹⁵ Nintantacarori noquenquetsatacaaqueri, ari opocashijeitaqueri Ishire Tasorentsi. Oquempetacaajeitaquee intantaqueeri arori. ¹⁶ Noquenqueshiretanaquero irineane Avincatsarite icantitacari: “Yora Joa ivaotisatantaroni nija, irompa nainti nontianquempiro Ishire Tasorentsi”. ¹⁷ Peerani aquemisantajeitantariri Avincatsarite Jesoquirishito, itianqueero Tasorentsi Ishire. Meeca imoncaratajiniri iriori itsipapee atiri. ¿Arimpa nontsaneaqueari? Tempa irio Tasorentsi.

¹⁸ Iquemajeitasantavarorri oca, tecatsi incantanaqueri impiateari, irointi icantajeiti:

—Cameetsa ini Tasorentsi. Tempa icoacairi aisati pashinisatipee atiri iquenqueshire-jeitiri, irijajeitantajeari iriori anta jenoqui.

Icamantanti anta pashinipeequi nampsitsi.

¹⁹ Ari iquisacoyeetanacari Ishitevani. Meeca iquisheetanaqueri maaroni quemisanta-jeitatsiri, irosati ishiajeitantanaca pashinipeequi quipatsi: Jenishiaqui, Tsipirequi, An-tioquiaqui, maaroni. Anta te inquenquetsatacayeriji pashinisati atiri, irinti itsataayetiri ijorioririnte. ²⁰ Ainiro iconoayetacari itsipapee quemisantatsiri, poneayetanainchari Tsipirequi, jero Shirenequi. Yareetantanacari irinti anta Antioquiaqui, iquenquetsata-capaaqueri caari joroyetatsi. Icantajeitiri:

—Pinquemisantajeiteri Jesoquirishito paviscotantajeari.

²¹ Itasoncacoventapinitiri Avincatsarite, itimantacari oshequi catsini quemisanta-jeitavaqueriri, aventajeitariri. ²² Ari anta Jerosarequi iquemacojeitaqueri quemisantatsiri. Itiancaqueri Verenave anta Antioquiaqui. ²³ Yareetapaaca iriori, iotapaaqueri ineshinoncatiri Tasorentsi. Iquimoshiretapaaque, icantajeitiri:

—Quearioyea, quiso poajeiteri yora Avincatsarite, pinquearioventeneri maaroni ico-ccaajeitimpiri.

²⁴ Cameetsari ini iriori Verenave. Quiso yoasanotiro Ishire Tasorentsi, yashi yoiro iquemisantasani. Aisati aiquero ijatattii yoshequiajeitanaque quemisantajeitiriri Avincatsarite. ²⁵ Impoiji yovaanaca Verenave Tarisoqui, icoapaaqueri Saoro. Ineapaajiri, irosati yoijatantajariri Antioquiaqui. ²⁶ Anta yapatotapinitirinta quemisantatsiri. Icantanti, ocarati aparoni osarintsi. Yoametapaacaqueri oshequi catsini atiri. Aitaque anta intanacaro ipajiyetiri quemisantatsiri: “Quirishitianotatsiri”.

²⁷ Irosati yareejeitantaaca Antioquiaqui pashini camantantatsiri, iponeanaca iriori Jerosarequi. ²⁸ Icarataqueri aparoni, pajitachari Acavo. Icatiapaaca anta yapatojeitanta, oametaqueri Ishire Tasorentsi, icantantari:

—Coajica intasheajeitanaque atiripee anta Joreaqui.

Ainironi ipincatsariventanti Caraorio, omoncarataja icantitaniri Acavo. ²⁹ Icantajeiti quemisantatsiri:

—Tsame ancavintsaajeiteri ayemisantaririnte anta Joreaqui, ampacanteri paitarica icoajeitiri. ³⁰ Jaocarica ocarayetiri timimoyeteeri, aitaque oncarate ampacantayeteriri.

Aitaque imataquero icantaqueri. Yapatotaqueri quirequi, ipavaqueri Verenave, jeri Saoro. Icantaqueri:

—Jeri yoca quirequi: paajeitanaqueneri quenquetsatacantatsiri anta Jerosarequi, incavintsaajeitanteeariri ashinoncaajeitachari.

Ari yaanaqueneri jerosaresati, ipapaaqueri quenquetsatacantatsiri. Ari yova-jeitaqueneri iriori ashinoncaajeitachari.

12

Eroeshi Aquiripa, iriotaque quishiriri quemisantatsiri.

¹ Impoiji yora pincatsari Eroeshi iquisayetaqueri aparopee quemisantatsiri.

² Yoacantaqueri Santiaco, iro ipesanteetacariri saviri, peti. Irio irirentini Joa.

³ Ioniotaque Eroeshi onimojeitaqueri joriotatsiri, irootaque yaacantantavetacariri Petero aisati. ⁴ Iro yaacantantacariri quitaiteri yoantapiniyeetarori tanta caari tapiacha.

Ijitalshivetaca ariorica omoncarataquea quitaiteri Yavisantaniri, iramenacojeiteri joriopee iroyeri. Yaaqueri, impoiji ipaqueri 16 soraro, irishentanteeariri. ⁵ Ari yominqueaqueri. Yora quemisantatsiri iquenquetsatacasanojeitiri Tasorentsi, icantiri:

“Poavisacotajeri Petero”. ⁶ Ari otsitenitanaque, iro osaitequera iroisoquijerime Eroeshi, iroacaantanteearirime. Icoaveta iramenajeiterime atiri incamaque. Ainiro inaveta Petero caravosoqui, imaanaque; isatecaqueri apite soraro. Yoisotantacari apite carenatsa.

Ishentavetaro ashitacorontsi itsipapee soraro. ⁷ Ari imapocapaaqueri anta inampire Avincatsarite. Oconijaitashitimatotanacari. Itincapaaqueri imerequiqui, icaocapaaqueri.

Icantaqueri:

—Pishintsite pintinaanaje.

Irosati oisoreashitantanaja carenatsa iracoquiniri, yoisotantavetacariri. ⁸ Aisati icantiri:

—Pinquitsaatajea, pisapatotajea.

Ari iquitsaataja, isapototaja. Aisati icantajiri:

—Pampinaicajearo poicoro, pojatanaquena.

⁹ Isoquijanaji, yojatanaqueri. Te irioteji Petero queariosanotaquerica yoavisacotajiri inampire Tasorentsi. Yaamaaca imishitaca. ¹⁰ Yavisanaqueri shentavetariri aparo, jeri aisati itsipa yavisanaqueri. Yareetacaro onta ashitacorontsi, onta iquenantapinitari nampitsiqui. Ashitareimotashitanajari. Yavisanajiro, yovaanaca anta avotsiqui. Irosati inijantareantanajari inampire Tasorentsi. ¹¹ Iotacotaja Petero, icanti:

—Meeca niotasanoque itiancaquenari Novincatsarite inampire. Yojocaacoven-taquena iroyename Eroeshi. Aisati iquempetacoventaquena, yojocaacoventaquena

jaocarica incantenameri noshanincapee. ¹² Iquenqueshiretanaquero, irosati ijatantaca ovancoqui Maria, iriniro Joa. Ipajieetiri Joa aisati Maricoshi. Anta yapatojeitacanta oshequi quemisantatsiri, iquenquetsatacaajeitiri Tasorentsi. ¹³ Iposanavetapaaro Petero ashitaronksi, ora otsapiquiniri: toc, toc. Ari ocatiashivetanacari nampirentsji pajitachari Irore. ¹⁴ Iotsatavajiri irineane Petero, oquimoshiretasanotanaque. Iro cantaincha te ashitareanaqueneriji, ainti oshiashitanaaca. Ocamantajeitiri quenquetsatacaajeitiriri Tasorentsi:

—Jeritapaaji Petero omoroquinta.

¹⁵ Icantajeitavaquero:

—Pishinquiventacateemi.

Aiquero ocantanaitii:

—Queariosanotaque.

Icantaquero:

—Caari ini Petero, irintiata inampire Tasorentsi, amenacoventiriri.

¹⁶ Aiquero catsini iposanaitiiro, toc, toc, irosati yashitareantajanari. Ari ineajeitavajiri, yoajeitavaqueri cavaco, icantavacaajeitanaaja:

—Jaoca iquenapaajiri?

¹⁷ Ari yacotashitanaqueri, icantiri:

—Pimajerejeite.

Impoiji icamantajeitapaajiri jaoca icantajiriri Avincatsarite, yoimisoquijantajariri. Aisati icantiri:

—Pincamantaiteri Santiaco, aisati pincamantajeiteri ayemisantaririnte.

Irosati isoquijantanaja, ijatanaji imanapitsatacari soraropee. ¹⁸ Oquitaitetamani oshequi icantavacaimentajeitacari soraropee:

—Jaocaquea meeca icantanajari Petero?

¹⁹ Icoacantavetacari Eroreshi, te irineajeriji. Isampinatiri soraro shentavetariri:

—Jaocaqueame iquenanajiri?

Yacanaqueri:

—Caa, jaocarica, te nioteji; te noneavajeriji.

Ari iquisaqueri Eroreshi soraropee, yoacantajeitaqueri, shemi. Ari impoiji yojocanajiro Eroreshi Jorea, yovaanaja anta Sesareaqui, irosati isavicanipaaja.

²⁰ Ari anta Tiroqui aisati Shiroqui aajeitaqueri savicajeitatsiri itashe, te ontimasanoteji iroajeiteari. Peerani icantiri iriori Eroreshi:

—Pincavintsaajeitena, nocamicari. Pimpapinijeitenaro noyeari.

Ari ipapinijeivvetacari, iro cantaincha meeca iquisajeitaqueri. Oshequi iquenqueshireajeitanaca tirosati aisati shirosati. Icantavacaajeitaca:

—Itsaneapitsajeiteerocari avajeiteari. Tsame ancanteri Varashito iramitacojeitee ampitsimareacaajeari: tempa iriotaque inampire Eroreshi. Ariorica incanteri, iraacameetsajeitajee aisati, eiroquea itsaneapitsatanteerotsi ayeari.

Icantiri Varashito; impoiji icantiri iriori:

—Ari, namitacojeitempi. Noncanteri novincatsarite incajemajeitempi, iraacameetsajeitempi.

²¹ Ari pashini quitaiteri icajemajeitaqueri Eroreshi, yaacameetsajeitaqueri. Yoaneen-caro pincatsari iitsaare, isavicaque anta ivincatsarimentoqui. Oshequi ishemetaque, iquenquetsatacaajeitaqueri. Icantiri:

—Eiro piquenqueshirejeitatsi. Nompajeitempi maaroni coiteimojeitaquempiri.

²² Irosati iquimoshirejeitantanaca pocajeitantsiri, icantajeitaque:

—Te irio atiri aquemajeitaqueri, irinti Tasorentsi. Cameetsa ini.

²³ Ari oshequi ishemetaque Eroreshi, iveshireimentacaro icantajeitaqueriri atiri. Iro cantaincha ishemacari Avincatsarite, itiancaqueri inampire:

—Te impincatsatenaji Eroreshi. Pijate pojoquittacayeari.

Ari ijataque, yojoquitacaacari, impoiji icamanaque, toein, irosati yoantacari quenitsi.

²⁴ Irosati iquenacaantayetanacaro quemisantatsiri irineane Avincatsarite. Yoshequianaque quemisantajeitatsiri. ²⁵ Irriori Verenave, aisati Saoro intacotanta anta

Jerosarequi. Irosati ipiantanaja Antioquiaqui, itsipatanajari Joa, ipajiyeetiri aisati Maricoshi.

13

Ijati Saoro aisati Verenave anta Tsipirequi.

¹ Icarajeitiri quemisantatsiri anta Antioquiaqui camantantatsiri, aisati oametantatsiri: jeri Verenave, aisati Shimo Nijeri. Iroshio shrenesati, Manaemi ishaninca pincatsari Eroreshi, Saoro, maaroni. ² Ari pashini quitaiteri yapatojeita iquemisantajeitiri Avincatsarite, tecatsi iroajeiteari. Irosati icantantacari Ishire Tasorents:

—Pincantajeiteri Verenave aisati Saoro: “Pimateneri Tasorentsi pitarica incoacayempi”.

³ Ari impoiji yajiricainajeitaqueri iitoqui, irosati icantantariri:

⁴⁻⁵ —Pijate pantero icoacaimpiri Tasorentsi, naroquea canterineri Tasorentsi iramitacotempi.

Ari otiancaqueri Ishire Tasorentsi, irosati ijatantacari anta Sereoshiaqui. Yojatanaqueri Joa Maricoshi iramitacotanteariri. Ari itetapaaca pitotsiqui. Otiancacotiri tampea, iquenacotanaque Tsipirequi. Ottimi anta nampitsiqui pajitachari Saramina: yareejeitantaacari anta, iquenquetsatapaaquero irineane Tasorentsi anta pancotsiqui yapatotapinijeitantari joriopee. ⁶ Impoiji itsoteajeitanaquero maaroni nampitsipeequi anta Tsipirequi, maaroni. Impoiji yareejeitapaaca Pajoshiqui. Anta ineapaquaqueri sheripiaritatsiri, pajitachari Varijesoshi. Jorio ini. Irishiyerime camantantatsiri, icantapiniti:

—Naro quenquetsatirori irineane Tasorentsi.

Ja, itseeyani. ⁷ Itsipatapinitari pincatsaritsiri pajitachari Serijo Pavoro. Ainiro iotantari iriori. Icadjemacantaqueri Verenave, jeri Saoro: icoaque inquemero irineane Tasorentsi. ⁸ Iro cantaincha itsaneavetacari yora sheripiari: te irinintacaaveteariji inquemisante yora pincatsaritsiri. ⁹ Ari iotacotaqueri Saoro, pajitachari aisati Pavoro. Oametasanotiri Ishire Tasorentsi, yamenasanotanaqueri sheripiari, ¹⁰ icantanaqueri:

—Pamatavitantanotaque. Te catsni pincameetsateji: piquempetacari camaari. Te pininteroji cameetsayetatsiri, irointi picoasanotaque pamatavitante. Picoaque pamatavijeiteri maaroni coatsiri irioteri Novincatsarite. ¿Eirompa piquenqueshiretatsi?

¹¹ Meeca intasonquempi Novincatsarite pinquitapoajaquitanaque. Osamanitanaque, eiro pamenitajatsi.

Irosati icamarajatantanaca, otsiteniiteacotanaqueri. Ipamipamitanaque, pami, pami; icanti:

—Teve namenajeve. Pancatsatanajenave.

¹² Ari ineavaqueri yora pincatsaritsiri, aisati iquemiro irineane Avincatsarite, irosati iquemisantantanaca. Icanti:

—Cameetsave oca icamantacotiriri Avincatsarite.

Yovaanaja camantantatsiri anta Ashiaqui.

¹³ Iponeanaja Pavoro Pajoshiqui, itetanaja pitotsiqui, itejeitanaja aisati maaroni icarajeitiri. Iquenacotanaque anta Perejequi, ora Pampiriaquiniri. Irriori Joa yojocanajiri, ipianaja iriori Jerosarequi. ¹⁴ Impoiji itsipapee, yovaajeitanaja aisati. Yareejeitapaaca anta pashiniqui Antioquia: ora Pishiriaquiniri. Quitaiteri imaoresentajeitari iqueajeitapaaque pancotsiqui yapatojeitantari, ari isavicajeitapaaque. ¹⁵ Ineanayeetiro isanquenareni Moishishi, aisati isanquenareni camantantatsiniri. Yora jivatacantantatsiri anta pancotsiqui, icantavaqueri:

—Noshaninca, pincoaquerica avirori pinquemisantacayeri ashanincaphee aca, pinca蔓teriqueti.

¹⁶ Ari icatianaca Pavoro, yacotashitaqueri yoimajerentajeitaqueri. Icanti:

—Noshaninca, ariorica pipincatsataqueri Tasorentsi, pinquemisantajeitavaquena.

¹⁷ Meeca nonquenquetsatacotempi Tasorentsi iquemisantiniri Ishiraerini. Peerani icoyeaqueri intacantayetacariniri inquemisanteri. Impoiji, itimantacari ashanincani anta Ejipitoqui, yoshequiacaaqueri. Itasoncacoventajeitiri, irosati ishinetantacari peranavetariri ijajeitanaque. ¹⁸ Ocarati 40 osarintsi itimajeiveitani ashanincani anta

caaraiteriqui, iro cantaincha oshequi itseencajeitaqueri Tasorentsi. ¹⁹ Icoajeivetaca irareejeiteame Cananaqui, iro cantaincha isaviqui pashinisatipee atiri, ticaajeivetavacariri. Inashiyetaca iriori, ocarati irineanepee 7. Impoiji itasoncaventiniri Tasorentsi ashancani, itsonecajeitaqueri savicajeiveitachaniri. Impoiji ipaqueri ashancani iipatsite, icantiri: "Jero oca, pisavicajeitanteari". ²⁰ Ari ocarataque osarintsi isavicajeitaque 450. Te intimeji pincatsariventasanojeiterineri, irinti ijivatashijeivetacarini itsipapee savi-cacantayetatsiri. Impoiji ijivatacanti yora camantantatsiniri pajiveitachaniri Samoiri. ²¹ Impoiji icantaqueri ashancani Tasorentsi: "Nocoajeitaque pincatsariventasanojeitenaneri". Ari icoyeaqueneri Saoro, ipincatsariventantarinariri ashancani. Irio iriri iriori Saoro ipajita Shishi. Iriojeitaque ishanincapeeni Vejami. Ocarati 40 osarintsi ipincatsariventantaque Saoro, ²² impoiji icanti Tasorentsi: "Eiro ipincatsariventantajitsi aisati Saoro, te incameetsateji, irinti pincatsaritajantsine Iraviri, yora itomi Jese. Irio noneacameetsatasanotaqueri, irantenaro irinti maaroni nonintacayeriri". ²³ Iriotaque ishanincani Iravirini oavisacotajeeri: ipajita iriori Jesoshi. Tempa icantini Tasorentsi: "Irio ishanincani Iravirini oavisacojeiterineri atiri". Moncarataca meeca icantitacaniri. ²⁴ Ijivataqueri Joa iquenquetsatacajeitaquerini maaroni ashancina: "Pinquenqueshire-jeitajea, eiro piquempejeitajatsi peerani, impoiji novaotisajeitempi, aisati iroavisaco-jeitempi Tasorentsi". Impoijiquea iquenquetsatapaaque Jesoshi. ²⁵ Iriori Joa irotaintsi incame, ari icanti: "Te narosano yora piquenqueshirejeivetari. Te naro Quirishito oavisacojeitempineri, irintiquea impoitapeenaneri. Oshequi nopincatsatasanotaqueri narori; irompa nainti, te nompincatsatimateaji".

²⁶ Ari yovaajiniri aisati Pavoro, icantiri:

—Noshaninca, tempa ashancajeitarini Avaramani, tsame anquempetasanojeite-eari, ampincatsatasanojeiteri Tasorentsi. Meeca noncamantajeitempi: ariorica amp-incipatsatasanojeiteri Jesoshi, ari iroavisacojeitee. ²⁷ Te iriojeitavaqueriji jerosare-sati, itseencajeitavaqueri. Aisati iquempejeitaqueri ivincatsaritepee, te iriojeiter-iji Quirishito ini. Maaroni saavarro ineanatapinijeivetaro isanquenayetiniri caman-tantatsiniri, iro cantaincha te inquemasanotavaqueroji, irootaque caari iojeitantaro oquenquetsatacotiri Jesoshi. Iriotaque oquenquetsatacotiri Sanquenarentsi: "Iroy-eeteri Quirishito". Ari yoacantajeitaqueri ashancajei Quirishito, iro cantaincha te irioteriji. ²⁸ Tecatsi irantavetea, yoacantashitacari. Icantacoventashitacari Pirato: "Poacanteri". ²⁹ Moncarayetaca maaroni isanquenatacotacariniri: oshequi yoashinon-caaqueri, ipajacotaqueri coroshiqui, icamanaque, torein. Impoiji yoaniireajiri, yoqueri anta omoroqui imperita. ³⁰ Icamasanovetaca, iro cantaincha yoitinaajiri Tasorentsi. ³¹ Ari ocarataque oshequi quitaiteri inijaapinijeitajari iroamere, yora tsipajeitapajariri chapinqui Jerosarequi: yora poneachari Carireaqui. Iriojeitaque meeca camantajeitiriri atiri.

Jero aisati icantajeitiriri Pavoro:

³²⁻³³ —Ocameetsataque icamantaqueriniri peerani Tasorentsi ashancani. Isanque-natacaaqueri peeraniniri otimantacari pampoyeantsi, oca apitetaintsiri. Ocantini: "In-canteri Tasorentsi Quirishito: 'Ariorica nontinaajempi noncantajempi notomí' ". Meeca noncamantajeitempi: imataquero Tasorentsi icantaqueriniri ashancani: yoitinaajiri Jesoshi, ayojeitancatari Quirishito ini. ³⁴ Jerooca pashini icantaqueriniri Tasorentsi: "No-tiomí, nomoncaratasanotempiro maaroni nocantaqueriniri Iravirini: nontasoncacoven-tempi pimpincatsaritasanotanteari. Queariotasanaque: tempa narotaque cantaquem-piri". Irootaque, noshaninca, piojeitancariri yoitinaasanotajiri Tasorentsi Quirishito, irootaque ipincatsaritasanotantajari. Icamasanovetaca, yoitinaajiri, te impatsayeji quipatsiqui. ³⁵ Tempa irootaque oca isanquenataqueniri pashini pampoyeaveitachaniri: "Tasorentsi, niotaque eiro pishinetiritsi pitomi impatsaye quipatsiqui: tempa oshequi pineacameetsataqueri". ³⁶ Pinquenqueshireteri peerani Iravirini, imoncarataqueneri Tasorentsi maaroni icoacairiri. Impoiji icamaque iriori, torein. Itijeetaqueri, itsi-payeetaqueri ishanincapeeni, irosati ipatsaasanotantanaca. ³⁷ Irompa irinti Jesoshi itinaajiri Tasorentsi, te impatsayeji irinti. ³⁸⁻³⁹ Meeca, noshaninca, piojeitavaquero oca. Ainiro pantajeitaqueri caari cameetsatatsi, iro cantaincha aneatsi meeca irinti Jesoshi,

icavintsaajeitaquempi. Te incoacayempiji pijajeite Sharincaveniqui, irointi icoaque iroameetsajeitempi, iroavisacojeitempi. Ocari meeca isanquenare Moishishi, tecatsi oncantea oameetsajeitempi. ⁴⁰ Paamaventeayea, piquempetaricari yora iquenquetsatacotiniri camantantatsiniri icantini: ⁴¹ “Pamene, tseencantatsiri, pinquenqueshirejeitanaquea: pijajeiticari Sharincaveniqui. Coajica pineajeitena nontasoncantasanotanaque, nomayetero caari pineapinijeiti. Ariorica noncamantavetempi paitarica nanteri, eiro piquemisantanatsi”.

Irootaque icantaqueriri Pavoro ijorioririnte. ⁴² Ari isoquijajeitanaji, icantasanojeitavajiri:

—Coajica otsipani saavarō pimpocajanteya aisati. Pashini pinquenquetsatacaajeitenaro niotasanolanteari.

⁴³ Ari ijajeitanaji. Jeri Pavoro iquenanaji avotsiqui, itsipatanajari Verenave. Yoijajeitanaquei quemisantatsiri: jeri joriosanori aisati peajanchari jorio. Ari icantaqueri Pavoro:

—Pinquemisantasanoteri Jesoshi irineshiloncatantempi Tasorentsi.

⁴⁴ Ari otsipani saavarō yapatojeitaca oshequi nampitsiquiniri. Te irishequiteji caari apatotacha. Yapatotimentaro inquemisantero irineane Tasorentsi. ⁴⁵ Yora ivincatsaritepee jorio ineaqueri apatojeitainchari, irosati ocantimoneentantanacari. Icantajeiti:

—Te oncameetsateji oca icantiri Pavoro, aisati te incameetsateji iriori. Oshequi yamatavitanti.

⁴⁶ Cameetsa yacasanotanaqueri Pavoro, jeri Verenave. Te intsaroashiretanaqueji, icanti:

—Avirojeitaque nintavetacari nocamantajeivetaquempiro irineane Tasorentsi, iro cantaincha pitseencavaquero avinti. Meeca niotaque te pincoyeji pincantaitatiyempani paneasanotaje anta inuitequi. Meeca nojatashiteri irinti pashinisati atiri, niotaque inquemisante irinti. ⁴⁷ Irootaque nojatashitantarirī, tempa icantitaquena Novincatsarite: “Tempa avirotaque notiancaqueri pincamantayeteri pashinisatipee atiri, iravisacotantajeari iriori. Pinquenquetsatacaajeiteri maaroni, pintsoteajeitanaqueo maaroni nampitsipeequi”.

⁴⁸ Iquemantajeitavacari yora caari joriotatsi, iquimoshirejeitanaque. Icantajeiti:

—Cameetsa oni irineane Avincatsarite.

Ari itimi oshequi caari joriotatsi icoyeaqueri Tasorentsi intime inuitequi, incanteani: iriojeitaque quemisantajeitantsiri, maaroni. ⁴⁹ Otsoteayetanaca irineane Avincatsarite maaroni nampitsipeequi anta.

⁵⁰ Irinti ivincatsarite jorio, oshequi quisajeitanaca. Ijatashijeitiro quemisantincaro shanincatacariri savicacaantayetatsiri, aisati ijatashijeitaqueri savicacaantajeitatsiri iriori. Icantajeitiri:

—Tsame, anquisajeiteri yora Pavoro, jeri Verenave. Te incameetsateji.

Irosati itiācantajariri:

—Tsame pijajeitaje. Eiro pipocajitsi aisati aca nonampiquica.

⁵¹ Ari iriori, ipacaraanajiniri quipatsi iitquiniri, pacara, pacara. Icantiri:

—Meeca piojeitaquena eiro nopiajatsi. Te pincoajeiteji pinquemisante.

Irosati yovaantanaca Iconioqui. ⁵² Ari iquimoshiretasanojeitanaque quemisantatsiri anta. Quiso oasanojeitaqueri Ishire Tasorentsi.

14

Yovaanaja Pavoro anta Antioquiaqui.

¹ Anta Iconioqui iqueapaaque Pavoro, jeri Verenave, anta pancotsiqui yapatojeitancari jorio, iquenquetsatapaaque. Iquemisantavaque oshequi catsini jorio, aisati caari joriotatsi. ² Yora jorio, caari quemisantatsi, yoamejeitaqueri pashinisatipee atiri, quisajeitaqueri quemisantajeitatsiri. ³ Ari osamani isavicapaaque Pavoro, iquenquetsatacapinitiri Avincatsarite, te intsaroyeji. Yora Avincatsarite, imatacaaqueri quemisantatsiri itasoncantayeti, imatacaaqueri paitarica caari inepiniyeti. Iotacaaqueri atiri queariotasanotaque ineshiloncatasanotantaque. ⁴ Iro cantaincha icantavaaaajeitanaca nampitsiquiniri. Itimi aparopee quempeayetanacariri jorio. Irio itsipa quempeayetanacariri quemisantatsiri. ⁵ Jeri yora jorio, caari joriotatsi, pincatsaritatsiri:

icoajeivetaca iroatsinayerime, impichaanaterime Pavoro, jeri Verenave. ⁶ Ari iotanaque, irosati ishiajeitanaca anta Irishitaraqui. Impoiji yovaanaja Terevequi. Irootaque oca nampitsi Iricaoniaquiniri. Aisati ijati otsapiyetapaa, ⁷ icamantajeitapaaqueri atiri jaoca incanteari iravisacotantajeari.

⁸ Anta Irishitaraqui isavicaque shirampari yamashita iitiqui. Choritatsiri ini. Aitaque icantitapaani iroaqera itimapaaque. Te iraniitimateji capichaji. ⁹ Iquemisantavaqueri Pavoro. Ari yamenapaqaqueri iriori iotacotaqueri, iquenqueshiretiri Tasorents, iravisacotantajeari. ¹⁰ Antearojenca icantaqueri:

—Pincatiasanotaje.

Ari imitajaitanaque iriori, mita, irosati yaniitantanaja. ¹¹ Oshequi catsini icarati neaquerori oca imataqueri Pavoro. Ari ineanatantajeitaro irineane iricaoniasati, antearojenca icantajeitanaque:

—Yaniireashitapaaque tasorentsitsatsiri, iquempetapaacari shirampari.

¹² Irriori Verenave ipajitashitari Seoshi. Yora Pavoro quenquetsatacantatsiri, irootaque ipajitancariri iriori Eremeshi. ¹³ Anta oquempejitaro nampitsi ovanco Seoshi. Jeri yora saserotementarori Seoshi, yamajeitaqueri toropee, aisati inchateaqui. Yamayetaqueneri anta iqueapinitiro nampitsi, icarajeitaqueri oshequi ishanincaphee. Icoajeivetaca iroyenerime toropee; imperime Verenave, jeri Pavoro.

¹⁴ Iquemantavaitiari iriori, itsereanaquero iitsaare. Ishiashijeitanacari apatotimentariri. Icajemanaque, ¹⁵ icanti:

—Ashaninca. ¿Paita pantajeitiri? Aisati aquempeavacaajeita, atiri anajeiti. Iro nopolcantacari noncamantempiro pojocajero caari cameetsatatsi pantayetiri. Eiro meeca patsipetashitarotsi pimpincatsatashitajearo pivetsicayetiri. Pinquenqueshirejeiteri Tasorentsisanori irinti, yora aneasanotatsiri. Iriotaque vetsicajeitirori inquite, quipatsi, incajare, maaroni; yovetsicajeitiri aisati maaroni timantajeitarori. ¹⁶ Peerani ishinejeitimpi maaroni caari joriotatsi paitarica pameyetacari. ¹⁷ Iro cantaincha yovetsicaguempiro Tasorentsi iotacaajeitimpire. Ineshinoncajeitaquempi. Yoariajeitimpire incani. Itimacayetiro oitsoquitapinitantari inchatopee. Iquemacaapinitimpire poari. Yoimoshirencapinijeitimpire. Iriotaque yoca nocoacaquempiro pimpincatsateri: eiroquea pipincatsatanatsi nainti.

¹⁸ Oshequi icamantanavetacari, iro cantaincha irovetanaincha iroashiteanarime toro.

¹⁹ Jeri ipocapaaque joriopee, poneayetachari Antioquiaqui aisati Iconioqui. Yamatavitapaqueri oshequi atiri, icantiri:

—Oshequi yamatavitanti Pavoro: pinquisheri.

Ari ipichaajeitaqueri, ijijeivetacari camasanotaque. Inoshicanaqueri, yojocaitiri anta otsapitapaaca nampitsi. ²⁰ Ari ijatashijeitaqueri quemisantsatsiri, ishoncapaacari; irosati itinaantananja. Ipiajeitanaja nampitsiqui. Oquitaitetamanaji yovaanaja Pavoro Terevequi, itsipatanajari Verenave. ²¹ Iquenquetsatacotapaaqueri jaoca icantari Tasorentsi yoavisacotanti. Iquemisantacaqueri oshequi atiri. Impoiji ipianaja Irishitaraqui, Iconioqui, Antioquiaqui. ²² Aiquero ijatatiini iquemisantasotacairi quemisantsatsiri. Icantasanoitiri:

—Eiro pojapirotsi oca piquemisantaqueri. Oshequi anquematsicataquearo paitaricaapee, irosatiquea ajatantanaqueari anta ipincatsaritinta Tasorentsi; iro cantaincha eiro ashemarotsi.

²³ Jaocarica anta yapatotapinijeitari quemisantsatsiri, icoyeaqueneri jivatacaajeiterineri. Impoiji iquenquetsatacaajeitiri Tasorentsi, aisati itijeita. Impoiji aisati icantajeitiri Avincatsarite:

—Jerica quemisantajeitimpire. Pojocacoventajeiteri.

²⁴ Ari iquenanaque Pishiriaqui, irosati yareetantanaca Pampiriaqui. ²⁵ Icamantantiro irineane Tasorentsi anta Perejequi, irosati yovaatanaja anta Atarayaqui. ²⁶ Irosati itetantanaja pitotsiqui, iquenacotanaji Antioquiaqui. Aitaque anta itianqueetaquerinta peerani, icanteetirini Tasorentsi: “Jeri yoca, pineshinoncateri irimatantempirori paitanirica pincoacayeriri”. Tempa aitaque imataquero.

²⁷ Ari yareetapaaja. Yapatojeitaqueri quemisantajeitatsiri. Iquenquetsatacaajeitaqueri maaroni yantacaajeitaquerirri Tasorentsi iriori. Aisati icantiri jaoca icantari

ishinejeitajariri pashinisatipee atiri iquemisantajeitajari. ²⁸ Ari osamanitanaque itimimotaqueri iyemisantaririnte anta.

15

Icoaveta jorio inquempetearime itsipapee atiri yameyetacari iriori.

¹ Ari yareejitapaaca Antioquiaqui joriopee poneachari Joreaqui. Yoametapaaqueri ayemisantaririnte, icantapaaqueri:

—Isanquenatini Moishishi: “Pintoyeantea”. Eirorica piquemisantiri, eiro pavisacota-jitsi.

² Ari ipiatsatavacari Pavoro, itsipatari Verenave. Te capichaji incantavacayea: oshequi yoametavacaaca. Ari itianquiri Pavoro, Verenave, aisati aparopee pashini. Icantava-queri:

—Pijajeite Jerosarequi anta itiminta iroamereni Jesoshi, aisati yora quenquetsata-kaantsatsiri. Pisampitacoventapaaqueri icantiri yoca. ¿Queariompa icoacaajeitaquena nontoyeantajeitea?

³ Irio tianajeitiriri quemisantatsiri anta Antioquiaqui. Ari ijatanaque, iquenanaque Jenishiaqui. Yovaanaca, irosati Samariaqui. Icamantapiniyetiri joriopee quemisantatsiri:

—Oshequi iquemisantajeiti meeca pashinisatipee atiri, yojocajeitiro yamejeivetari peerani.

Ari iquimoshiretasanojeitavaque maaroni quemajeitavaqueriri.

⁴ Anta yareejitapaacanta Jerosarequi, yaacameetsajeitavaqueri quemisantajeitatsiri: iroamereni Jesoshi, quenquetsatacaantatsiri, maaroni. Icamantapaaqueri:

—Oshequi imatacaaquaquena Tasorentsi noquemisantacaajeitiri itsipapee atiri anta otsipapeequi nampitsi.

⁵ Ari icatiayetanaca aparopee variseo, quemisantatsiri inaveta iriori. Icanti:

—Aitaque incanteari intoyeantea itsipapee atiri. Ocemeetsati antsoteaquero isanquenarenai Moishishi, maaroni.

⁶ Ari impoiji yapatojeitanaja aisati iroamereni Quirishito, quenquetsatacaantatsiri, maaroni. Icoajeitaque iriotanaque paitarica incanteriri antioquiasati. ⁷ Oshequi yoametavacaajeitaca. Impoiji icatianaca Petero, icantajeitiri:

—Noyemisantaririnte. Peerani icoyeaquena Tasorentsi, piojeitaquero: tempa pineacojeitaquena. Aitaque icoyeaquena noncamantajeiteri pashinisati atiri jaoca incanteari inquemisantajeari, iravisacotantajeari. ⁸ Tempa irio Tasorentsi iotirori aquenqueshirejeitiri. Iriotaque tianquiniriri itsipapee atiri Ishire, ayojeitantacari yavisacojeitaji. Tempa meeca iquempejeitaquee arori. ⁹ Queario, aitaque amoncarajeitacari iriori. Tempa aisati icanti Tasorentsi: “Pimoncaratavacaajeitaca”. Iquemisantaque itsipapee atiri, irosati yoameetsashireantajariri. ¹⁰ Meeca, ¿picoaque pincanteri Tasorentsi: “Te pioteji”? Jero oca picoaque pimpomerentsitacaasanoteari ayemisantaririnte. Arojeitaque jorio, amejeivetaro, iro cantaincha te amateroji antsoteajeitero, aisati maaroni ashancani, te irimajeitero. Jaoca incanteari itsipapee atiri irimatan-tearori? Oshequi opomerentsitaca. ¹¹ Ineshinoncatajee Jeso quirishito, irootaque avavisacotantajari. Tempa maaroni ashirejeitaro oca. Aisati irishiaeitjee arori itsipapee atiri.

¹² Imajereitanaque maaroni apatojeitainchari. Iquemisantajeitavaqueri Verenave, aisati Pavoro. Icantiqueru:

—Imatacaaquaquena notasoncacoventiri itsipapee atiri. Imatacaaquaquena caari ineapini-jeiti, irootaque iojeitancacari queario Tasorentsi ini Jesoshi.

¹³ Impoiji imajeretanaque apatojeitachari. Impoiji aisati iquenquetsati Santiaco, icanti:

¹⁴ —Noyemisantaririnte, pinquemisantena. Iquenquetsatacaimpi Shimo jaoca icanta Tasorentsi intantajarori ineshinoncajeitajiri pashinisati atiri. Aitaque icoyeaqueri iquenquetsatacotantajeari. ¹⁵ Omoncarataca oca isanquenatitacaniri camantantatsiniri pajitachaniri Amoshi. Isanquenatini: ¹⁶⁻¹⁸ “Icanti Avincatsarite: ‘Coajica nompiapaa jequipatsiqui, novetsicapaajero aisati inampini Iravirini itireevetacari. Novetsicajero

aisati maaroni pancotsi. Nocoaque iraventajeitena maaroni itsipapee atiri, nocoaque inquemisantajeitena'. Irootaque icantiri Avincatsarite, vetsiquirori peerani maaroni timajeitatsiri".¹⁹ Irootaque nocantantacari nainti te oncameetsateji ampomerentsitacayeari yora pashinisatipee atiri. Iquemisantiririca Tasorentsi, moncarataca.²⁰ Iro cantaincha, tsame ampacanteri sanquenarentsi. Ancamanteri oca: "Paamaventearo yovetsicane atiri ijitasorentsitashitari: amatavashijeitimpicari. Eiro pineavintsatirotsi tsinane caari pai. Eiro poaritsi ampitsiitachari, poacotarocari ivatsa iriraja".²¹ Tempa maaroni saavarroqui, ariorica yapatotapinijeita ajorioririnte, icantani itsaneapinitacaro oca nocantimpiri: tempa itsaneajeitacaroni peerani Moishishi. Eirorica yantajeitiro oca, ari ocameetsati iraacameetsajeiteri ashanincapee.

Irootaque icantaqueriri Santiaco.²² Ari onimojeitaqueri maaroni quemisantajeitatsiri, icanti:

—Cameetsataque. Irootaque ancamanteriri antioquiasati.

Ari icoyeajeitaqueri apite jivatacaaajeitiriri quemisantatsiri: Jorashi Varasavashi, aisati Shirashi. Icantaqueri:

—Avirojei oijajeiterineri Pavoro aisati Verenave anta Antioquiaqui. Pincamantapaaqueri ayemisantaririnte nocantaqueri aisati pimpapeeri sanquenarentsica.

²³ Jero oca ocantiri sanquenarentsi isanquenatiniri: "¿Ainirompi noyemisantaririnte? ¿Tecatsimpa oyempine? Aca Jerosarequi nocarajeitiri iroamereni Jesoshi aisati itsipapee quenquetsatacaantatsiri. Meeca nosanquenajeitimpido caari joriotatsi, savicajeitatsiri anta Antioquiaqui, Shiriaqui, aisati Shirishaqui.²⁴ Noquemacotaqueri yora nocarajeivetari: oshequi iquenquetsatacaamempeaqueMPI, icomitacaaqueMPI. IcantashiretacaaqueMPI. Te naro tianquerine.²⁵ Aitaque onimojeitaquena maaroni narori nontianquempi yoca nocoyeaqueri. Intsipatanaqueari Verenave, jeri Pavoro: yoca nonintane.²⁶ Iriojeitaque caari tsaroatsi incamimenteri Avincatsarite Jeso quirishito.²⁷ Nontianquempi Jorashi, jeri Shirashi. Incamantasanoempreto iriori oca nosanquenatimpri.²⁸ Ari onimotaquero Ishire Tasorentsi, aisati onimotaquena narori noncamantempreto oca. Eiro noperanatimpitsi, irointi apatiroti pimatero oca.²⁹ Eiro poaritsi yora yoyevetacanariri yovetsicane atiri: caari oni Tasorentsi. Eiro poacotarotsi ivatsa iriraja. Eiro poaritsi ampitsiitachari. Ariorica poyeari, oshequi inquenqueshiretanaque joriopee. Eiro pineavintsatirotsi tsinane caari pai. Arriorica pimayetaquero oca, cameetsataque. Ari cameetsa pintimajeite". Irootaque isanquenatiniri antioquiasati.

³⁰ Ari ijajeitanaque Antioquiaqui yora itianquiri. Yapatojeitapaacari quemisantajeitatsiri, ipapaaqueri sanquenarentsi.³¹ Ineanajeitavaquero, irosati iquimoshirejeitanta naca.³² Irisati camantantatsiri iriori Jorashi, aisati Shirashi. Oshequi iquenquetsatacaapaaqueri iquimoshiretacaaapaaqueri, iquemisantacaasanojeitapaaaqueri.³³ Osamani isaviquimotaitiri, impoiji ipianaja aisati Jorashi. Yovetsatavajari yora iyemisantaririnteepe, icantavajiri:

—Cameetsaya ejataje.

Irosati ipiantanaja anta itiminta tiancaqueriri.

Yapiitajiro iquenaquenayetaji Pavoro.

³⁴ Irinti Shirashi icoaque irisavicanaje Antioquiaqui.³⁵ Irosati isavicanapaa Pavoro, jeri Verenave. Yoametantanaque, icamantantanajiro irineane Avincatsarite. Itsipajitacari aisati oshequi pashinipee, icamantantajeiti.³⁶ Pashini quitaiteri icanti Pavoro:

—Verenave. Tsame aneajanteri aisati ayemisantaririnte anta maaroni nampitsipeequi: yora peerani acamantajeitaitiri irineane Avincatsarite. Amenajanterita jaocarica icantajeitacari.

³⁷ Icoaveta Verenave iraanajerime aisati Joa. Ipajieetiri aisati Maricoshi.³⁸ Iro cantaincha Pavoro, icantaqueri:

—Peerani anta ajatantacari Pampiriaqui, yojocanaquee. Te intsipatanaqueeji anta aquenquetsatinta. Eiro meeca aanaajiritsi.

³⁹ Ari ipiatsatasanotavacaaca, irosati inijantareavacantanaca. Yora Verenave, yaana queri Maricoshi. Itetanaca pitotsiqui, ijataque Tsipirequi.⁴⁰ Irintiquea Pavoro, yaana queri iriori Shirashi. Icantajeiti quemisantatsiri:

—Novincatsarite, pineshinoncajeiteri yoca, quiso poanaqueri cameetsa.

⁴¹ Ari iquenanaque Shiriaqui, aisati Shirishiaqui. Anta quemisantacaasanojeitaqueri quemisantatsiri.

16

¹ Impoiji yareetapaaja Terevequi, aisati Irishitaraqui. Itimaiti anta quemisantatsiri pajitachari Timoteo. Irootaque irinirontari jorio. Irompa irinti iriri, te irijorioteji. Quemisantatsiri oni iriniro. ² Icantajeiti quemisantajeitatsiri anta Irishitaraqui aisati Iconioqui:

—Icameetsati Timoteo.

³ Icoaque Pavoro intsipatanaqueari. Iotacojeitiri joriopee iriri, caari ini jorio iriori, icantanariri Timoteo:

—Ariorica pintoyeantea, iraacameetsajeitempi jorio.

Icantiri:

—Ari.

Ari yaanaqueri, itoyeantimentanacari joriopee, timayetatsiri anta nampitsipeequi. ⁴ Impoiji iquenantanajari nampitsipeequi, yoamejeitaqueri maaroni icantayetiri jerosaresati: yora iroamere Jesoshi aisati jivatacaaajeitiriri quemisantatsiri. Icantiri:

—Ariorica inquemisanteri itsipapee atiri Quirishito, eiro acantiritsi: “Pimpeajea jorio”.

⁵ Ari quemisantacaasanotaqueri maaroni quemisantatsiri. Maaroni quitaiteripee aiquero ijatatiini yoshequiasanotanaque.

⁶ Iquenanaque Jirijiaqui, Carashiaqui. Tempa ocantitacari Ishire Tasorentsi:

—Eiro picamantantitsi anta Ashiaqui.

⁷ Yareetanaca Mishiaqui, ari icoavetaca irijateme Vitiniaqui. Iro cantaincha aisati te oshineteriji Ishire Jesoshi. ⁸ Iquenanaque Mishiaqui, irosati yoirincantanaja Toroarequi: ari noneavaqueriri narori. ⁹ Tsiteniriqui imishitacari Pavoro aparo maseroniasati. Icatiimotapaacari, icantasano tapaqueri:

—Pimpoque aca Maseroniaqui, pintacojeitenra.

¹⁰ Irosati nocoantanaca jaoca nonquenanteari nareetanteari Maseroniaqui. Niotanaque itiancaquena Tasorentsi anta noncamantanteariri savicajeitatsiri jaoca incantajeiteari iravisacojeitantzeari.

Ijati Pavoro Eoropaqui.

¹¹ Anta Toroarequi notejeitanaca pitotsiqui. Aacotanaquena tampea Samotorashiaqui. Oquitaitetamaque aisati novaamanaja Neaporishiqui. ¹² Novaanaja aisati Jiriposhiqui. Irootaque intapaarori nampitsi Maseroniaquiniri. Inampitapaaro meeca poneachari Oromaqqui. Ari notimajeitapai aparopee quitaiteri. ¹³ Ari saavaraoqui nosoquijanaji omoroqui tantorents shoncarori nampitsi, nojatanaque anta otsapijaqui eni. Naamaapaacari aitaque anta iquenquetsatacapaquiniri joriopee Tasorentsi. Nosavicapaaque, noquenquetsatacapaquiero tsinaneppee apatojeitainchari. ¹⁴ Otimaiti aparo quemavaquenari pajitachari Iriria. Oponeanaca peerani nampitsiqui anta Tiataraqqui. Irootaque quemisantiriri Tasorentsi. Opimantapiniyetiro tocoya quisaaripee. Iotacaaquero Avincatsarite oquemisantavaquero icantayetiri Pavoro. ¹⁵ Ovaotisataca, otsipajeitacari maaroni savicajeitatsiri ovancoqui. Ocantasanoquena:

—Ariorica piotaquena noquemisantasanotiri Avincatsarite, pijajeite novancoqui, pisaviquimotanaquenatsita.

Ari ocoacaquena, irosati nocantantacari:

—Tsamequeti.

¹⁶ Ari nojajeitanaque anta iquenquetsatacapiniyetirinta Tasorentsi. Otonquiotavaquena nampirentsi, iotacairo camaari. Iotashita, oquenquetsatacotitaro paitarica tequeratsita oneeroji. Irootaque yaantayetacari oshequi quirequi yora nampitarori. Icantapinitiri atiri:

—Pincoaquerica pinquemero, pimpinatena.

¹⁷ Ari oijajeitanaquena. Ocajemi, ocanti:

—Yoca shirampari, iriojeitaque quemisantiriri Tasorentsi, yora jenoquiniri catsini. Incamantajeitempi jaoca pincanteari paviscacotantajeari.

¹⁸ Aitaque ocantapinita maaroni quitaiteriqui. Ishemanacaro Pavoro, ipitso-cashitanacaro, icantanaqueri camaari:

—Iriotaque Jesoquirishito noquemisantiri, irootaque nocantantimpiri: pojocanajero.

Irosati yojocantanajaro. ¹⁹ Iotanaque yora nampitarori, icantaniroti:

—Eirove, tecatsi ancantajea meeca aantajeariri quirequi.

Irosati yaantacari Pavoro aisati Shirashi, tapi. Inoshicanaqueri nampitsiqui, nianqui: anta itiminta pincatsaritatsiri. ²⁰ Yaanaqueri pincatsariqui, icantapaquaqueri:

—Iquenqueshiretacaajeitaquena maaroni savicajeitatsiri aca anampiqui. Tempa jorio ini iriori. ²¹ Icamantacotiro oca yameyetacari iriori. Te oncameetsateji anquemisantaquero icantaqueeri, te oncameetsateji ameyetearo. Tempa ashanincajeitacari arori oromasati.

²² Iquisajeitanaca maaroni apatojeitainchari, irosati icantantari comantanti:

—Pisapoquiteri iitsaare Pavoroca, jeri Shirashica; pimpasatsempequijeiteri.

²³ Oshequi ipasanataqueri, impoiji yoiminqueaqueri caravosoqui. Icantasanotiri catsini yora shentiriri:

—Cameetsayea pishentasanoteri, ishiacari.

²⁴ Iquemaquero oca icantasanotaqueri, yoiminqueaqueri. Aisati itsinacaquitaqueri inchatoqui. ²⁵ Nianquiite tsiteniri, ari iquenquetsatacaajeitiri Tasorentsi, ipampoyeav-entajeitaqueri. Iquemisantajeitiri itsipapee yoiminqueeyetiri. ²⁶ Omapocashitanaca onicanaca quipatsi, aisati onicanaca pancotsi, jero maaroni otincamipee, nica, nica, nica. Intsipaite ashitareajeitanaca ashitacorontsipee. Irosati onijantareantanaca tsinacaquivetacariri iitiqui. ²⁷ Itinaanaca shentiriri. Inequero ashitacorontsi, ashitareajeitanaca. Ijitalshivetaca shiajeitanaca yora yoiminqueajeitiri, irosati yaantanacaro isavirite, irove-tanaincha iroashitanajeame irisati. ²⁸ Ari intspaita icajemacotanaqueri Pavoro:

—Eiro poashitajatsi avisati. Irosati nocantajeita maaroni aca, te noshiyeji.

²⁹ Icantiri variria inampire:

—Pamaquena tsiomentotsi.

Ari yamaqueneri, irosati iqueantanaca anta yoisovetacarinta. Ipioncanaque, itiyeroimotapaacari Pavoro, jeri aisati Shirashi. ³⁰ Impoiji yaanaqueri saiteriqui. Icantiri:

—Noshaninca, ¿jaoca noncanteari narori navisacotantajeari?

³¹ Yacanaqueri:

—Pinquemisanteri Novincatsarite Jesoshi, iroavisacotantajempiri. Aisati inquempe-jeiteari maaroni pishaninca.

³² Icamantasanotiri irineane Tasorentsi. Aisati ishanincapee iriori, icamantajeitiri.

³³ Irosati osaite yaantanacari, iquivayetajiniri oca yaaveaqueri ipasanataqueri, impoiji yaavintajiri. Irosati ivaotisatantaja, icarajeitaqueri maaroni ishaninca. ³⁴ Ari yaanaqueri ivancoqui, yoacaapaacari. Iquemisantajeitiri Tasorentsi, irootaque iquimoshirejeitantanacari maaroni ishaninca.

³⁵ Ari oquitaitetamanaji, jeri yora pincatsari itianquiri variria:

—Pijate caravosoqui, pincamantaiteri iroimisoquijajeri quemisantatsiri.

Ari ijataque, icamantapaquaqueri shentiriri:

—Pintiancajeitajeri irijatajeta.

³⁶ Irosati icantantajari iriori:

—Icantajana pincatsari nontiancajempri. Meeca pisoquijanaje, cameetsa pijataje.

³⁷ Iro cantaincha icantiri Pavoro:

—Jampa noshanincatacari oromasati. Te irisampitacoventenaji pincatsari, te irioteji ainirorica nantane. Ipasatacantashitaquena, aisati yoiminqueacantashitaquena. Tempa ineajeitaquena maaroni savicajeitatsiri yoashinoncaquena: ijijeiveta ainiro nantane. ¿Ariompa meeca irimanaqueri iroimisoquijacantajena? Tempa eiro. Impoqueta iriori, irotsitsaquea oimisoquijajantenane iriojeitanteari ashanincapee tecatsi nante.

³⁸ Ari ipianaja variria, icamantapaajiri. Iotantacari pincatsari ishanincatacari Pavoro oromasati, ari itsaroanaque. ³⁹ Ipocapaaque, cameetsa iquenquetsatacapaquaqueri. Irosati yoimisoquijantapajari:

—Meeca pijataje, pojocanajero nonampi.

⁴⁰ Ari isoquijanaji, iquenanaji ovancoqui Iriria. Ineapairi ayemisantaririnte, icantapaqueri:

—Cameetsayea pintimajeite.

Irosati yovaantanaja pashiniqui nampitsi.

17

¹ Iquenanaque Pavoro Antiporishiqui, Aporniaqui, irosati yareetantaca Tesaronicaqui. Ari anta otimi pancotsi yapatotantari jorio, ² irosati iqueantapaaca. Aitaque icantatiani yametapinitaro iquenquetsatacapinijeitiri jorio. Ocarati mava saavaro yoamejeitiri ocantayetiri Sanquenarentsi. ³ Ari yoametasanotapaaqueri. Iotacaasano-taqueri, icantiri:

—Aitaque ocantitani Sanquenarentsi: “Irineacatsitaquearo yora Quirishito. Incamaque, irosati intinaantajeari”. Irio nocamantacotiri Jesoshi, iriotaque Quirishito.

⁴ Iquemisantavaquero aparopee icantaqueriri, irosati yojajeitantanacariri Pavoro, jeri Shirashi. Aisati iquempejeitaca oshequi caari joriotatsi, quemisantsiri: yojajeitanaqueri Pavoro. Aisati oquempetaca iroori tsinane, ishanincabee pincatsar-itatsiri. Oquemisantajeitaque. Te aparopee one iroori. ⁵ Ari oshequi iquisanaca joriopee, yapatojeitaqueri caari cameetsajeitatsi, aisati perayetachari. Iquisacaajeitacari timajeitatsiri nampitsiqui. Ijajeitanaque ivancoqui Jaso, icoajeivetapaacari Pavoro, jeri Shirashi. Icoavetaca iraanaquerime anta yapatojeitacanta atiri, inquisajeiterime.

⁶ Te irineapeeriji, irinti inoshicashitanaca Jaso, jeri aparopee quemisantsiri aisati. Yaanaqueri anta savicacaantatsiri. Icajemejtapaaque:

—Jeri yoca quisacaantajeitaqueriri maaroni savicajeitatsiri. Jeri yoca Jaso aacameetsataqueriri. ⁷ Yoametantajeiti, icanti: “Eiro pimoncaratiniritsi Sesari icantimpiri. Timatsi pashini pincatsaritatsiri, yora Jesoshi”.

⁸ Ari iquemantavaror oca, iquisajeitanaca atiripee, aisati yora savicacaantatsiri.

⁹ Icantanaque Jaso, aisati itsipapee:

—Jerica quirequi: pinquempoyeajenari piotantenari eiro noshiapitsatimpitsi, tecatsi nante. Ontimerica nantane, ari paasanoterita noirequite.

¹⁰ Irosati itiancantajari. Ari otsitenitanaque. Itiancrajiri Pavoro aisati Shirashi. Irio tiancrajiri ayemisantaririnte. Yovaanaca Vereaqui. Yareetantapaacari, irosati ijatantapaaca yapatotapinitanta jorio. ¹¹ Irio irinti cameetsatasanotaintsiri, te irishiyeriji yora tesaronicasati. Icoasanotaque inquemisantero Sanquenarentsi. Ineanatapinitiro maaroni quitaiteriqui iriotanteari queariosanorica oca icantaqueriri. ¹² Oshequi iquemisantajeitaque iriori. Oquemisanti tsinanepee caari joriotatsi, ishanincabee pincatsaritatsiri, maaroni. Aisati iquemisanti shiramparipee, te aparo irine: oshequi catsini. ¹³ Ari icamantantiro Pavoro irineane Tasorentsi anta Vereaqui. Iotacotaqueri joriotatsiri, yora tesaronicasati. Ipocapaaque iriori, iquisacaapaacari atiri, icantashiretacaqueri. Icantiri:

—Eiro piquemisantajeitiritsi Pavoro, irointiquea pinquisajeiteri.

¹⁴ Yora quemisantsiri intsipaite itiancaqueri Pavoro anta incajarequi. Irinti savicanaintsi Shirashi, jeri Timoteo. ¹⁵ Ainiro aanaqueriri Pavoro anta Atenashiqui. Icantavajiri Pavoro:

—Ariorica pareetajea pinampiqui, pincamantapaajenari Shirashi aisati Timoteo intsipaite impocajeta.

Ari ijatanaque, icamantapaajiri.

Yantayetapairi Pavoro anta Atenashiqui.

¹⁶ Ari yoyeapaaajiri Pavoro anta Atenashiqui. Irio yoyeapaaajiri Shirashi aisati Timoteo. Ineapaaquero anta nampitsiqui oshequi catsini yovetsicashiyetari ijitasorents-tashiyetari, irosati yoashiretantanaca. ¹⁷ Aisati anta Atenashiqui oshequi yoamejeitiri joriopee aisati caari joriotatsi: yora quemisantajeitiriri Tasorentsi. Oshequi yoametava-caajeitaca. Aisati iquempetacaapinitacari maaroni atiri anta nampitsiqui nianqui.

¹⁸ Yoametapaaqueri coapinitatsiri iriote paitaricapee, icarajeitiri iroamereni Epecoreo. Aisati icarajeitiri caari intacotacha irisati: yora icanteetiri eshitoco. Yora Pavoro icamantacotiri Jesoshi, aisati icanti:

—Intinaaje camajeitatsiri.

Icanti aparopee quemavaqueriri:

—¿Paita icantlsrueri yoca neaveetashitachari?

Icanti pashini:

—Icamantacotiri pashinisati tasorentsitsatsiri.

¹⁹ Yajiricaqueri, yaanaqueri anta yapatotapinijeitanta, icantajeitiri:

—¿Cameetsampa niotero oca iroqueratatsiri poametantiri? ²⁰ Te nonquemap-initeroji oca picantaqueri. Nocoajeiti niotero jaoca ocantacotari oca.

²¹ Aitaque icantari atenashisati: te intsameeteji, irointi icoaque inquemisantashiteari quenquetsatacaciajeitiriri iroquerayetatsiri caari iquemapinijeiti. Aisati iquempejeita poneayetachari paricoti, iquenquetsatacota shiyetaro paitapeerica. ²² Anta icatiaca Pavoro nianqui, icantiri:

—Atenashisati. Niotacotaquempi avirori, pashi poiro piquemisantayeveta. ²³ Anta noquenaquenayetinta noneayetaquero oca piquemisantashiyetari. Aisati noneapaaquero anta poapinitiniri pitasorentsite paitaricapee. Ainiro osanquenataca, ocanti: “Anquemisantanteeariri tasorentsitsatsiri caari ioyeeti”. Yora caari pioti: piquemisantashitari, iriotaque yoca noncamantempiri. ²⁴ Yora Tasorentsisanori, iriotaque vetsiquirori quipatsi. Yovetsicajeitiri maaroni timantajeitarori. Iriotaque vetsicayetirori inquite aisati quipatsi. Te irisavicatearoji ora pancotsi yovetsiquiri atiri. ²⁵ Aroquea ainti, tecatsi ancanteri intacojeiteari. ¿Ariompa incoanaque intacotearine? Tempa iriotaque oaneajeiteeri, intacojeiteeri irinti. Tempa iriotaque paqueerori maaroni, paitaricapee. ²⁶ Aparoni yovetsicavetaca peerani, iriotaque intanacaroniri; meeca ashequiajeitanaque, atsoteajeitanaque maaroni quipatsipee. Iriotaque Tasorentsisanori cantatsiri jaocarica irisavicateiteri maaroni atiri, aisati jaocarica oncarate intsoncajeitanteeariri; iriotaque cantacantirori. ²⁷ Itimacaajeitaquee ancoanteari ayojeiteri, aisati aneanta-jeariri coajica. Iro cantaincha, te irarejiteji. ²⁸ Iriotaque ovaneajeiteeri. Iriotaque shevatacaajeiteeri. Iriotaque timacaajeiteeri. Tempa aitaque icantitani pishaninca pam-poyeapinitatsiri: “Arojeitaque itimacaane Tasorentsi”. ²⁹ Arojeitaquerica itimacaanepee Tasorentsi, te oncameetsateji meeca ashiajanteri oro, perata, mapi, yovetsicanepee atiri. Aisati eiro ashiajanteri paitarica iquenqueshiretiri atiri. ³⁰⁻³¹ Peerani te irioveiteani ashanincani, ari tecatsi incantimenteri Tasorentsi inquishimenterini yantajeitiniri. Iro cantaincha ioti irinti jaoca oncarate incantacoventanteeariri maaroni atiripee. Timatsi shirampari pajitachari Jesoshi, icamasanovetaca. Impoiji itinaajiri Tasorentsi, iotanta-jeitariri maaroni atiri. Ipeaqueri iriori cantacoventantatsineri. Cameetsa incantacoven-tante. Irootaque icantantajeitariri atiri meeca: “Pinquenqueshirejeitanaquea, paventa-jeiteari Tasorentsisanori”. Aitaque icantajeitiri maaroni atiri, jaocarica isavicateiteri. Irootaque icantiriri Pavoro.

³² Ari iquemantajeitavacariri icanti: “Itinaanaja camavetainchari”, ainiro shirontimentaarantacariri; iro cantaincha icantanaqueri pashinipee:

—Coajica pashini pampiitajenaro oca aisati.

Irosati ijatantanaja Pavoro. ³³⁻³⁴ Itimaarantaque quemisantavaqueriri, irosati yoi-jatantanacari iriori. Ipajita aparoni quemisantsatsiri Tionishio: iriotaque pincatsaritatsiri anta nampitsiqui, icarajeitiri ivincatsaririnte yoametavacaajeitaca. Aisati oquemisanti tsinane pajitachari Tamarishi. Icaratiri aisati itsipapee quemisantajeitatsiri.

Icamantanti Pavoro anta Corintoqui.

¹ Impoiji yojocanajiro Pavoro Atenashi, yovaanaja anta Corintoqui. ² Anta ineapaqueri joriotatsiri pajitachari Aquira. Pontosati inaveta, iponeanaca meeca Itari-aqui. Iroaqera yareetapaaca. Itsipatapaacaro ijina, Pirishira. Iro ipocantacari, yora pincatsari pajitachari Caraorio iquisajeitaqueri jorio savicajeivetachari Oromaqui, itiancajeitaqueri;

—Pijajeite pashiniqui quipatsi, eiro pisavicateititsi aca.

Ari isavicajeitapaaque Corintoqui. Impoiji yareetapaaca Pavoro, isaviquimota-paaqueri. ³ Aisati iquempetavacaajeitaca, iojeiti yantiro tocoyapanco. Irootaque isaviquimotantapaacariri, itsipatavacaaca anta yantaveejeiti. ⁴ Maaroni saavarroqui yoametavacaajeitaca anta pancotsiqui yapatojeitantzari. Iquemisantacaasanojeitaqueri joriotatsiri, caari joriotatsi aisati. ⁵ Impoijiquea iponeanaja Maseroniaqui Shirashi aisati Timoteo. Irosati yareetantapaajariri. Ineapajiri Pavoro, iquenquetsati iriori. Icamantapinivetacari joriotatsiri:

—Iriotaque Jesoshi yora Quirishitotatsiri aamaajeitaniri peerani.

⁶ Ipiatsajeitavacari aisati icantimajeitaqueri, irootaque itequimotantanajariri iitsaare iriojeitantzari irotajatsi irijataje. Icantanaqueri:

—Avisati jatacantajanchane anta Sharincaveniqui: te aneeroji nantane nainti, tempa nocamantavetaquempi. Meecaquea nojatashiteri irinti pashinisati atiri, nonquenquet-satacaajeiteri.

⁷ Ari yovaanaja anta, iquenanajiro ivancoqui Tishio Joshito: iriotaque quemisantiriri Tasorentsi. Isavicanampitiro pancotsi yapatotantapinitari.

⁸ Yora Quirishipo iriotaque quenquetsatacantatsiri anta pancotsiqui yapatotantari. Cameetsa iquemisantaqueri Avincatsarite. Aisati iquempejeitaca maaroni savicaje-tatsiri ivancoqui, iquemisantajeiti. Aisati iquempetaarantaca oshequi corintosati. Iquemavaquero irineane Tasorentsi, iquemisantavaquero, irosati ivaotisatantajeitaca.

⁹ Ari tsiteniriqui ineashitacari Pavoro yora Avincatsarite, iquemaqueri icantiri:

—Eiro pitsaroitsi. Pincamantante, eiro pimajeretitsi. ¹⁰ Quiso noaquempi. Aca nampitsiqui, tempa icarati oshequi quemisantanari. Tecatsi incanteetempi iroashinon-queetempi.

¹¹ Irosati isavicananaca aparo osarintsi, oquimojantsivetapaaja aisati. Yoamejeita-queri corintosati irineane Tasorentsi.

¹² Ipincatsariventanti meeca Cario acayasati. Irosati joriopee iquisantanacari Pavoro. Yaanaqueri anta itiminta oametavacainchari. ¹³ Icantapaaqueri:

—Jeri yoca shirampari, icantanirotiri atiri: “Pinquemisantajeiteri Tasorentsi”, iro cantaincha icantashitacaro irineane Tasorentsi.

¹⁴ Irovetanaincha irineaveetanaqueme Pavoro, ari yora Cario icantiri joriotatsiri:

—Aviro joriyotetsiri, pashereajeitaquena. Irooricame iranterome yoca caari cameet-satatsi, irooricame iroanteme, aitaquemequea oncamente sateme pamaquerime aca.

¹⁵ Jero meeca picantavacaimentacaro oca yoametantiri. Picantavacaimentacari atiripee. Picantavacaimentacaro Sanquenarentsi. Aviroyeate. Oshequi pashereajeitaquena: eiro pipocashitanatsi. ¹⁶ Pijanirojeitaje.

Ari ijajeitanaji. ¹⁷ Yora atiripee yaajeitaqueri Soshiteneshi, shepi; ipasanajeitaqueri, tac, tac. Yora ipasataqueri iriotaque quenquetsatacantatsiri anta pancotsiqui yapato-jeitantzari. Ineacovetacari Cario ipasajeitaqueri, iro cantaincha tecatsi oncantomoneen-tanaqueari, tecatsi incantajeiteri.

¹⁸ Oshequi quitaiteri isavicanaji Pavoro, impoiji ijatanaji, yojocanajiri ayemisan-tarinte. Itetapaaca pitotsiqui, aacotanaqueri tampea Shiriaqui, icantanaca, shiririri. Itsipatanacaro Pirishira, jeri ojime, Aquira. Timatsi icashiacaquerirri Pavoro Tasorentsi, irootaque yameetantarori iishi anta Senquereshiqui. ¹⁹ Yareejeitantanacari Ejesoqui, ari yojocanajiri itsipataniri. Yovaanaja apaniro Pavoro anta pancotsiqui yapatotapinitanta jorio, iquenquetsataapaaqueri. ²⁰ Icantajeivetavacari:

—Osamanita pisavicanaquetsita, poamejeitena.

Iro cantaincha te incoyeji iriori. ²¹ Icantanaqueri:

—Oshequi noshiretanaca meeca, iro cantaincha, ariorica incoacaaquena Tasorentsi, nompiae, coajica.

Irosati itetantanaja aisati pitotsiqui, aacotanaqueri tampea, icaantanaca aisati shiririri. ²² Yareetapaaca Sesareaqui, irosati yovaantanaca Jerosarequi, iquivantapaa-queri ayemisanttarinte. Impoiji yovaanaja aisati Antioquiaqui, iponeanaca peerani.

²³ Osamani isavicanaque Pavoro Antioquiaqui, impoji ijataji aisati. Iquenaquenayetanaque Carashiaqui, aisati Jirijiaqui. Yoametasanojeitaqueri maaroni quemisantatsiri.

²⁴ Yareetaca Ejesoqui jorio pajitachari Aporo, arejantiriasati ini. Cameetsa iquenquet-satapiniti, iotasanoliro Sanquenarentsi. ²⁵ Icamanteetiri jaoca icantaniri Joani, aisati jaoca ocantari maaroni iquenquetsatacotoriniri Jesoshi, iro cantaincha tequera inquemacotasanolero maaroni yantayetiri iriori Jesoshi. Itsoteasanotaquero yoametantiro maaroni ioyevetari. ²⁶ Ari iquenquetsatacotasanoliro anta pancotsiqui yapatojeitantzari. Te intsaroyeji, cameetsa iquenquetsati. Iquemantavacari Aquira, jero Pirishira, icantiri Aporo:

—Nocoaque nonquenquetsatacayempi apaniro.

Icanti:

—Ja, tsamequeti.

Ari apaniro itsoteaqueneri, yoamejeitaqueri jaoca icantari Jesoshi, aisati jaoca ancan-tajeiteari ajajeitantzari anta Tasorentsiqui.

²⁷ Impoji icanti Aporo quemisantajeitatziri:

—Nocoaque nojate meeca Acayaqui, noamejeiteri savicajetatziri anta.

Ari icantajeitavaqueri:

—Cameetsataque pijate, poamejeiteri cameetsa. Jeroca sanquenarentsi paajei-tanaqueneriri.

Jero oca isanquenatavaqueneriri iyemisantaririnte anta: “Paacameetsajeitavaque-riyea Aporo, pinquemisantajeitavaqueri”.

Ari peerani ineshinoncatitacari Tasorentsai acayasati, irootaque iquemisantajeitan-tajari. Meeca, yareetantacari Aporo, oshequi intacojeitapaacari. ²⁸ Yoametasanoliri iotasanolontajari. Iquemajeitiri atiri yoametantiro Sanquenarentsi, icanti:

—Iriotaque Jesoshi oquenquetsatacotori Sanquenarentsi, iriotaque Quirishitotatsiri.

19

Ijataque Pavoro Ejesoqui.

¹ Isavicaque Aporo Corintoqui, iriori Pavoro iquenanaque toncaariqui, yareetapaaca Ejesoqui. Ineapaaqueri aparopee quemisantatsiri. ² Icantapaaaqueri:

—Peerani, piquemisantajeitantzaci, ¿paashiretaquerompa Ishire Tasorentsii?

—Te. Te nonquemacoteroji.

³ —¿Paita pivaotisamentari?

—Novaotisamentari Joa.

⁴ Ari icantiri:

—Ariorica iquenqueshiretanaca atiri, ivaotisatiri Joa irlotanteariri atiri te incoyeji irampiitapinitero caari cameetsatatsi, irointi icoaque inquemisanteri Tasorentsai. Tempa icantitarini: “Pinquemisantajeiteri yora impoitapeenane, iriotaque Jesoshi”.

⁵ Ari iquemantajeitavacarori oca, ivaotisamentajeitanacari Avincatsarite Jesoshi.

⁶ Yajiricainataqueri Pavoro iitoqui, irosati opocashitancarori Ishire Tasorentsai, in-eaveetantajeitanacaro pashinipee neantsi, icamantantajeiti. ⁷ Aamaaca icarajeiti 12 shirampari vaotisajeitainchari.

⁸ Ari ijatapiniti Pavoro pancotsiqui yapatotantari, icarati mava cashiri iquenquetsata-cantayetaque. Te aneeriji tsaneacotearine. Oshequi icamantacotaqueri Tasorentsai, jaoca icanta ipincatsariventanti. Impoji oshequi yoametavacaajeitaca. ⁹ Aparopee, te aneeroji iquenqueshireantari, te incoyeji inquemisante. Icantajeitiri yora atripee:

—Te oncameetsateji oca yoametantiri Pavoro.

Irosati yojocantanajari Pavoro, yaanaqueri quemisantajeitatziri. Iquenquetsatacap-initiri maaroni quitaiteriqui anta yoametantapinitinta Tirano. ¹⁰ Icantatiani apite osarintsi, irootaque iquemantacarori maaroni ashiasati irineane Avincatsarite. Iquema-jeitaqueri: joropee, caari joriotatsi, maaroni.

¹¹ Itasoncantayeti Pavoro, imatantarori caari aneapiniti. Irio matacairiri Tasorentsai.

¹² Ipamititiri atiri ivaniote Pavoro, aisati yoicoro, irosati yavisacotantajari. Aisati iriori mantsiari, yaanaqueneri, yoavisacotajiri. Aisati yoavisacotajiri neiriri camaari.

¹³⁻¹⁴ Ainiro anta jorio, quenaquenayetatziri, oavisacotapinivtariri neiriri camaari:

iriojeitaque itomipee Esheva, icarajeiti 7. Jorio ini Esheva, ishanincatacari saserote. Ineajeivetacari Pavoro yoavisacotiri neiriri camaari. Icoajeiveta inquempetearime, icantashitantariri itsipa camaari:

—Ainiro Jesoshitatsiri iquenquetsatacotiri Pavoro. Iriotaque amitacotanari noav-isacoteri yoca neaquempi. Pojocanajeriqueti iravisacotantajeari.

¹⁵ Yacanaqueri camaari:

—Noneiri Jesoshi. Noneiri Pavoro. Irompa avinti, te noneanirotempiji. ¿Paita nonquemisantantempi?

¹⁶ Irosati imitajashitantanacari, mita; yantapaaqueri apitero. Imataqueri, irosati ishiatsempequijetantanaca, yojocanaquero pancotsi. Oshequi yoatsinaqueri.

¹⁷ Iquemacojeitaqueri maaroni ejesosati: jorio, caari joriotatsine, maaroni. Itsaroajeitanaque aisati icantajeitaque:

—Icameetsati Avincatsarite Jesoshi: imatacairy quemisantasanotiriri yoavisacotiri neiriri camaari. Irinti shemetatsiri, tecatsi matacayerine.

¹⁸ Impoiji ipocapaaque oshequi quemisantatsiri, icantajeitapaaque:

—Ainiro nantayetiro caari cameetsatatsi, nocoaque iroameetsatena Tasorentsi.

¹⁹ Oshequi sheripiaritsiri yamayetaquero sanquenarentsi yashiyetari: irootaque oamejeitiriri isheripiaritanci. Yapatojeitaquero, irosati itaimotantacari maaroni atiri. Icantajeiti:

—Te noncoyeji namatavijeitajeri aisati noshaninca.

Imoncarajeitaquero ovinaro sanquenarentsi, opinajeitaca S/.50,000. ²⁰ Oshequi iquenacayetanaquero irineane Avincatsarite, aisati itimi oshequi quemisantajeitavaquerori.

²¹ Impoiji ishiretaca Pavoro irijate Jerosarequi, irosati ijatantanaca. Iquenanaque Maseroniaqui, jero anta Acayaqui. Icantitaca:

—Nintanaquearo nojate Jerosarequi, impoiji nojatanaque Oromaqui.

²² Itiancaque apite amitacotapinitiriri maseroniasatipee: yora Timoteo, jeri Erashito. Irriori Pavoro, osamani itimanaque anta Ashiaqui.

Iquisajeitanaca ejesosati.

²³ Te meeca capichaji incantavacaimentearo oca acamantacotaqueriri Avincatsarite.

²⁴ Itiminta vetsicapinitirori perata pajitachari Irimitirio. Ishiacantapinitiro ovanco Aretemisa iquemisantapinijeitantarori ishaninca. Ora Aretemisa irootaque ijitasorentsi-jeitane. Ainiro yora amitacotiriri, vetsicapinitiniriri ora pancotsijaniqui; ari ipinat-apinitiri oshequi perata, yaajeitanci oshequi quirequi. Iro cantaincha te meeca iramanantajeroji quemisantajantsiri, irosati iquenqueshietantanaca Irimitirio. ²⁵ Ari yapatojeitiri maaroni iratritepee, icantajeitiri:

—Antapinijeitiro oca shiacaantsi aajeitanci airequite oshequi. ²⁶ Meeca pineaqueri Pavoro, aisati piquemacotaqueri: yamatavijeitiri oshequi atiri, ipashinijeitantajari. Icantanioti: “Caari oni Tasorentsi oca yovetsicayetiri atiri”. Te apatiro iroametante aca: irotaintsi intsoeteero Ashiaqui iroametantayete. ²⁷ Itseencajeitanaqueecari maaroni atiri, aisati itseencaquerocari maaroni avetsicajeitiri. Tempa opincatsarotasano Aretemisa: iquemisantajeivetacaro maaroni ashiasati, jeri maaroni atiri. Ipincatsajeivitaro meeca, iro cantaincha inquemisantajeiterica Pavoro, irojocacaajeiteri iquemisantiro.

²⁸ Iquemantajeitavacarori oca, iquisajeitanaca. Icajemajeitanaque:

—Opincatsarotasano Aretemisa, oca pincatsariventajeitiriri ejesosati.

²⁹ Icajemajeitanaque savicajeitatsiri nampitsiqui. Ishiajeitanaca maaroni anta yan-taveetapinijeitinta. Inoshicajeitanaquei Cayo, jeri Arishitaraco, sorororo. Maseroni-asati ini apite, tsipatapinitariri Pavoro. ³⁰ Icoaveta Pavoro irojatacoventanaquerime anta, iro cantaincha te irishineteriji quemisantatsiri. ³¹ Ainiro itimi aisati aparopee pincatsaritatsiri, poneachari Ashiaqui, nintiriri Pavoro. Itianquiri ishaninca, camanta-paaqueriri:

—Eiro catsini pojatiritsi anta: yoimpicari.

³² Icajemajeitanaque apatojeitainchari, onashiyetaca icantayetiri. Icajemashijkeitanaca. Te iriojeiteji oshequi paitarica yapatotimentari. ³³ Ainiro anta Arijantero,

itiancane jorio, isatecaqueri nianqui. Yacotashitanaqueri maaroni atiri, iriotanteari icoaque inquenquetsatacaajeiterime. ³⁴ Iro cantaincha iojeitancari irio jorio, ica-jemapinijeitanaque maaroni:

—Opincatsarotasanoti Aretemisa, oca pincatsariventiriri ejesosati.

Osamani icajemajeitanaque, ishirincanaca catsirincaiteri. ³⁵ Yoimajerentajeitaqueri yora sanquenatapinitatsiri anta nampitsiqui. Impoiji icantajeitiri:

—Noshaninca. Tempa arojeitaque pincatsajeitirori Aretemisa, aisati ashentapinitiro ovanco. Tempa aisati ashentapinitiro oca shiaquerori, pariapaintsiri jenoqui. Ayojeitanaque oca, ³⁶ tecatsi tseenquerone oca nocantaqueri. Cameetsa meeca pimajerejeitanaque. Eiro pishintsitsi panteri yoca shiramparipee. ³⁷ Jerica pamaqueri, tecatsi incantero ovanco, aisati te incantimateroji atasorentsite. ³⁸ Jeri aisati yoca Irimitirio, icarajeitiri pashini antirori perata. Incoaquerica incantacoteri, cameetsa iraanajeri anta savicacaantatsiriqui, impoiji iroametavacaajeitea anta. Irijatequeti anta incantacoventavacayea. ³⁹ Otimirica pashini picoaqueri piote, ari pincerteri coajica yora oametavacaachari, irampatojeitajearica. ⁴⁰ Jero aca meeca apatojeitaca, aquisatsatavacaajeitaca. Icamantacotashiteecari aquisajeitaqueri avincatsarite, impoiji tecatsi ancantea ancantacoventajea arosati.

⁴¹ Icantantarori oca, itiancajeitajiri maaroni apatojeitainchari:

—Meeca aitapaaji, pincatsimareajeitanaje, pijajeite pivancopeequi.

20

Ijatanaque Pavoro Jerosarequi.

¹ Ari imajerejeitanaque ejesosati. Impoiji iriori Pavoro icajemajeitiri quemisan-tajeitatsiri, yoametasanojeitiri. Impoiji ijatanaji, yovaanaja Maseroniaqui. ² Anta oshequi iquenaquenayetanaque, oshequi yoametantayetanaque. Irosati yareetantanaca Quireshiaqui. ³ Icarati mava cashiri isavicapaaque. Irovetainchia intetearome pitotsi irijatantameri Shiriaqui. Irosati iotacotantacariri jorio, yaimanavetacari iroyerime. Irosati iquenqueshiretantanaca:

—Nompianajeta anta Maseroniaqui.

⁴ Ari ijatanaque, icarajeitanaque Sopatoroshi itomi Piro vereasati, Arishitaraco, jeri Seconto tesaronicasati, Cayo terevesati, Timoteo, Tiquico, jeri Torojimo ashiasati, maaroni. ⁵ Ijivajeitanaquena Toroarequi, yoyeajeitaquena anta. ⁶ Avisanaque quitaiteri yoanteetapinitarori tanta caari tapiacha, impoiji noponeanaja Jiriposhiqui, noquenacotanaque pitotsiqui. Ocarati 5 quitaiteri nareetantajari Toroarequi, anta itiminta oyeajeitaquenari. Irosati nosavicanapaaca ocarati 7 quitaiteri.

⁷ Otomincotapaaque. Napatojeitaca nocarajajeitaquero tanta noquenqueshirejei-tantajariri Jesoshi icamimentajeitaquee. Iquenquetsatacaajeitan Pavoro. Ishiretaca irijataman, irootaque yosamanitantanacarori iquenquetsataque, vero, vero. Irosati nianquiieni. ⁸ Otimaque oshequi tsionmentotsi anta napatojeitacanta. Iro napatojei-tantacari shitamencotsi onta jenoquiniri; mavatapaintsiri, jenoqui anta. ⁹ Isavicaque omoroqui yora evancari pajitachari Eotico. Osamani iquenquetsataque Pavoro, irootaque aantapaacariri ivochoquine. Irosati ipariantanaca: iquenaitanaque, sheroo, tirin, anta quipatsiqui. Ari naniireashijeitanaque, itinayeevetapaacari; camaque ini, torein. ¹⁰ Ari yaniireapaaque Pavoro iriori. Itsentetashitapaaqueri, yavitsanotapaaqueri. Icanti:

—Eiro poashiretacotaritsi: aneatsi ini.

Ari itinaanaja, aisatitanaji.

¹¹ Ari nataijeitanaji, icarajapaaquiero Pavoro tanta, noajeitaca. Impoiji iquenquetsatacaajiri, irosati oquitaitetantanaja. Irosati ijatantanaja. ¹² Yayeetanajiri evancari ivancoqui, aneanaji. Te capichaji iroveshireajeitanaquea.

¹³ Nojivatanaque pitotsiqui, noquenacotanaque Asoqui; irinti Pavoro iquenanaque avotsiqui. ¹⁴ Ari ineapaajanari Asoqui, irosati notetantanajariri pitotsiqui. Novaajeitanaja Mitirenequi, nocaantanaca, shiririri. ¹⁵ Oquitaitetamanaji novaanaja aisati.

Nomontetacotanacaro Quio. Omavatanaque quitaiteri, irosati anta Samoshiqui. Quitaiteri pashini nareetanaca Miretoqui. ¹⁶ Iquenqueshiretaca Pavoro iravishitanaquearo Ejeso, eiro itimaanitapaajitsi Ashiaqui. Icoasanotaque irareetitajea Jerosarequi, irimoncaraapeemparo quitaiteri pajitachari Pentecoshiteshi.

¹⁷ Itiancaque Ejesoqui, icajemacantaqueri quenquetsatacaaquerir quenisantajeitatsiri anta. ¹⁸ Ari yareejeitapaaca ejesosati, irosati icantajeitantzavacari:

—Piotacotasanoquena jaoca nocantari notimimotantajeitaquempi. Iroquerani nareetaca Ashiaqui, aitaque nocantitapaaca, irosatitatsi meeca. ¹⁹ Anta oshequi nantaveetapinitiniri Avincatsarite, teyea iro noshemete. Niraacotapinitaquempi. Aisati ocantimoneentaquea anta yaimanavetaquena joriopee iroyename. ²⁰ Notsoteaquero, tempa aitaque nocamantajeitaquempi maaroni oca cameetsayetatsiri. Te nomajeretashiteaji. Noamejeitimi anta yapatojeitacanta atiripee aisati anta pivancopeequi. ²¹ Nocamantajeitiri jorio, jeri caari joriotatsi, maaroni: “Pinquenqueshirejeitanajea piojeitantzeariri Tasorentsi. Pinquemisanteri Novincatsarite Jesoshi”. ²² Ari meeca nojate Jerosarequi, ojatacaanaquena Ishire Tasorentsi. Te nioteji jaocarica incanteetenari anta. ²³ Apatiro niotaquero oca ocamantaquenari Ishire Tasorentsi. Maaroni nampitsiqui ocamantapinitana: “Queario iroisoyeetempi, iroashinoncayeetempi”. ²⁴ Te noncoasanoteji noncantaitatiyempani nontime aca quipatsiqui, irointiquea nocoasanotaque nomateneri Avincatsarite Jesoshi paitarica inintacaquenari. Aisati nocoasanotaque nontsoteeneri oca nantaveetapinitiniri. Ocemeetsati oca nocamantapinitaquempi: “Ineshinoncajeitaquee Tasorentsi”. ²⁵ Niotaque meeca eiro aneavacaajatsi aisati. Nocarajeivetaquempi, nocamantajeitaquempi jaoca icantari Tasorentsi ipincatsarivenanti. ²⁶ Irootaque meeca nocamantantimpiori oca. Ariorica iroasanquetaarantempi Tasorentsi, te naro oasanquetacantempine: tempa nocamantitaquempi peerani. ²⁷ Te nontsaroyeji, notsoteaquequempi maaroni icantayetiri Tasorentsi.

Irootaque icantajeitiriri Pavoro.

²⁸ Jero oca icamantajeitiriri aisati:

—Queariompia, pojocacooventajeiteri piyemisantaririnte anta. Tempa avirojeitaque ocoyeane Ishire Tasorentsi. Pamenacoventer maaroni quemisantajeitatsiri, pintacojeiteari. Tempa iriojeitaque yoavisacojeitaqueri Jesoshi, icamimentajeitaqueri, yaparajatimentajeitaqueri iriraja. ²⁹ Coajica, nojatanajerica, impocashitempi amatavitempineri: noshiacantaqueri catsimayetatsiri. Eiro ipeacotimpitsi, yoashinoncaimpicari. Niotaquero oca. ³⁰ Timatsi aca picarajeitica quenquetsatacaaavetempineri, iro cantaincha eiro otampaticatasanotitsi iroamejeittempi. Yojocacaimpiricari piyemisantaririnte, iroijatanteariri iriori. ³¹ Queariompia, pinquenqueshiretero. Ocarati mava osarintsi noametapinitaquempi. Nocantatiani: tsiteniriqui, quitaiteriqui. Aisati niraacotapinitaquempi. ³² Nocantiri Avincatsarite: “Pojocacooventajeiteri ejesosati, aisati pineshinoncatimenteri iquemisantiro pineane”. Aitaque omataca irineane oquemisantacaasantaquempi, oavisacojeitaquempi. Tempa picarajeitiri quemisantajeitiriri icoyeaqueri. ³³ Te noncoitayeteriji iirequite pashini atiri. Te noncoitayeteriji iitsaare. ³⁴ Piojeitaque narosatiquea antaveetanontacha, naantayetarori maaroni coiteimotanari, aisati nintacojeitaro notsipajeitaro. ³⁵ Nomayetaquero maaroni oca piojeitanteari avirori pintacotantajeitea. Pinquempejeitena narori, pantaveetasanojeite, pintacotantajeiteariri ashinoncaincari. Pinquenqueshiretero irineane Avincatsarite Jesoshi, icantitaniri: “Iro cameetsatasanotatsiri ampashitantea. Te iro cameetsatasanotatsine aashitearo paitarica impashiyeeteeri”.

³⁶ Irootaque icantajeitaqueri Pavoro ejesosati. Impoiji itiyeroanaca, icarajeitiri ejesosati maaroni, iquenquetsatacaaajeitiri Tasorentsi. ³⁷ Iraajeitanaca maaroni. Yavitsanojeitavajiri, inintavorojeitavajiri. ³⁸ Yoashiretacojeitanacari iquemaqueri icantanajiriri: “Eiro pineajanatsi aisati”. Yoajeitavajiri anta pitotsiqui, yamenavajiri ijatanajji.

21

¹ Irosati nojocajeitantanajari quemisantacaajeitiriri ejesosati. Notejeitanaca pitotsiqui, tampatica noquenacotanaque Coshiqui, nocantanaca shiririri. Oquitaitetamanaque novaamanaja Irorashiqui, irosati novaantanaja Pataraqui.

² Noneapaaquero anta pitotsi monteachaneri Jenishiaqui. Notetapaaca, noquenacotanaque. ³ Noneantanacarori Tsipire, noquenanampitanaquero nampatequi. Nanaanaquero, irosati Shiriaqui, naatapaaque Tiroqui. Anta nampitsiqui yoaniitanaquero marinero ovaararontsi. ⁴ Nocoayetapaaqueri narori quemisantatsiri. Noneantapaacariri nosaviquimotapaaqueri 7 quitaiteri. Oamejeitaqueri Ishire Tasorentsi, icantajeitantariri Pavoro:

—Eiro pijatitsi Jerosarequi: yoashinonqueetavaquempicari.

Iro cantaincha te inquemisanteriji Pavoro. ⁵ Ari omoncarataja notetantanajari aisati, nojajeitanaji. Itsipajeitanaquea quenisantajeitatsiri irosati otsapitapaa nampitsi, icarajeitanaqueo ijina, jeri itomipee. Notiyeroajeitanaca anta otsapijaqui, noquenquet-satacaajeitaqueri Tasorentsi. Impoiji novetsatavacaajeitanaja. ⁶ Notetanajaro pitotsi, ari ipiajeitanaja iriori ivancopeequi. ⁷ Ari noponeanaca Tiroqui, noquenacotanaque, novaanaja aisati Toremairaqui. Noquivantapaaqueri ayemisanttaririnte. Aparo nomaaque. ⁸ Oquitaitetamaque, novaamanaja aisati. Nareetantapaacari Sesareaqui, noquivantapaaqueri Jeripi, yora quenquetsatacaantatsiri. Ari oshequi nosaviquimotapaaqueri. Iriotaque icarajeitiri yora intacotantachari sietetatsiri. ⁹ Timatsi otsipasato irishinto, timashitachari; ocamantantajeiti iroori.

¹⁰ Oshequi nomaaque. Jeri yareetapaaca camantantatsiri pajitachari Acavo, iponeanaca iriori Joreaqui. ¹¹ Ipocashitapaaquena, yaapaaquero ishiticatsaquito Pavoro. Irisati oisotashitajancha itiqui, iracoqui. Icanti:

—Aitaque ocanti Ishire Tasorentsi: “Aisati inquempeyeetaqueri yora ashitarori ishiticatsaquito. Iroisoteri jorio, yora jerosaresati: oiso, oiso. Imperi pashinisati atiri, iraanaqueri”.

¹² Noquemantavacarori oca, nocarajeitaqueri maaroni ashaninca, nocantajeivetari Pavoro:

—Eiro pijatitsi Jerosarequi.

¹³ Yacanaquena:

—¿Paita piraantari? ¿Paita picantashiretacaantanari? Tempa naro quenisantiriri Avincatsarite Jesoshi. Iroisoyeenata anta Jerosarequi, iroyeenata: te nontsaroacayeariji.

¹⁴ Te inquemisantenaji, irosati nomajeretantanaca. Nocantajeiti:

—Aitaque oncanteata pitarica icoiri Avincatsarite.

Yareeitanaca Jerosarequi.

¹⁵ Impoiji novetsajeitanajari sesareasati, novaanaja Jerosarequi: noquenanaqui avotsiqui. ¹⁶ Itsipajeitanaquea aparopee quenisantatsiri, sesareasati. Yaanaquena anta ivancoqui Manaso, yora tsipiresati: iriotaque intacantarori iquemisanti. Nomaimotapaquaqueri iriori. ¹⁷ Nareetantapaacari Jerosarequi, yaacameetsajeitavaquena ayemisanttaririnte, iquimoshireventavaquena. ¹⁸ Oquitaitetamani iquivantajantiri Pavoro Santiago, noijatanaqueri narori. Anta yapatojeitacanta maaroni quenquetsatacaantatsiri.

¹⁹ Novetsatavacaajeitaca, impoiji itsoteaqueneri Pavoro, iquenquetsatacaapaaqueri:

—Itiancaquena Tasorentsi noquenquetsatacaajeitiri oshequi pashinisatipee atiri. Icarajeiti oshequi quenisantajeitiriri.

²⁰ Iquemantavacarori, icantajeiti:

—Cameetsa ini Tasorentsi.

Impoiji icantajeitiri:

—Pamene, Pavoro, amoncaratavacaajeitaca aquenisantajeitiri Jesoquirishito. Iquenisantajeitaque oshequi catsini ajorioririnte, iro cantaincha aisati iquenisantasanojeitaquero isanquenatiniri Moishishi. ²¹ Oshequi iquemacojeitaquero picantiriri ajorioririnte, saviquimotiriri pashinisati atiri: “Pojoquero isanquenare Moishishi. Eiro pitoyeantajeititsi pitomi. Pojocajeitajero oca amejeiveitaniri arori”. ²² ¿Jaoca pincanteari? Aitaque inquemacojeitaquempi, areetapaaquempi: inquisajeitavaquempi. ²³ Pinquemisantero oca noncantempiri: jerica itsipasati shirampari, timatsi icashiacaacariri Tasorentsi. ²⁴ Paanajeri maaroni ivancoqui Tasorentsi, pincanteri Tasorentsi iroameetsantajeitempi. Pimpinateneri yocapee

paitarica, irameetantearori iishi. Impoiji iriojeitanaque ajorioririnte te ontampaticateji oca iquemacotaquemperi. Iriotanaque pimoncarataquero isanquenare Moishishini.
²⁵ Ja meeca yora pashinisati atiri, yora quemisantatsiri: nopalantaqueri iriori sanquenarentsi. Jero oca nocantaqueriri: "Eiro poitaritsi ivatsa yoyeetaquenerori yovetsiqueetiri, caari oni Tasorentsi. Eiro poacotarotsi ivatsa iriraja. Eiro poaritsi ampitsiitachari. Eiro pineavintsatirotsi tsinane caari pai".

²⁶ Ari iquemisantaqueri Pavoro. Oquitaitetamaque yaanaqueri evancari, icantajeitaqueri iroameetsatanteariri, aisati iqueajeitapaaque ivancoqui. Icamantapaaqueri anta:

—Oncarate 7 quitaiteri nomoncaratantaquearori nantajeiteri iroameetsatantenari Tasorentsi, impoiji noajeiteneri virantsi, nompajeiteri.

Yoiminqeaque Pavoro.

²⁷ Irovetainchacha omoncarateame 7 quitaiteri. Ineajeitaqueri anta ivancoqui Tasorentsi joriopee, poneachari Ashiaqui. Iquisacaacari apatojeitainchari, impoiji yaajeitaqueri Pavoro, shepi. ²⁸ Icajemaiteitanaque:

—Noshaninca, pamitacojeiten. Iriotaque yoca quenaquenayetatsiri amatavijeitiriri atiri; icantanirotaqueri: "Te oncameetsateji joriopee. Te oncameetsateji isanquenare Moishishi. Te oncameetsateji ivanco Tasorentsi". Irootaque icantajeitiriri atiri. Pameneete meeca yamanirotaqueri aca pashinisati atiri, caari ocameetsatantanaja meeca oca pancotsica cameetsavetachari.

Irootaque icantajeitaqueri. ²⁹ Chapinqui ineavaqueri Pavoro anta nampitsiqui, itsipavetari Torojimo: yora ejesosati. Ijitalshijeitavacari iriotaque iqueacaapaaqueri ivancoqui Tasorentsi, irootaque icantantacari: "Yamanirotaqueri aca pashinisati atiri".

³⁰ Ari iquisajeitanaca maaroni nampitsiquiniri, yapatojeitanaca anta. Yaaqueri Pavoro shepi, inoshicanaqueri saiteriqui, sorororo. Irosati yashitantanacaro ivanco Tasorentsi.

³¹ Irovetainchacha iroyerime, iro cantaincha iquemacotaqueri yora iyomantantite sorraropee, carajeitaintsiri 600. Icamanteetiri:

—Iquisajeitanaca maaroni jerosaresati.

³² Ishintsiyaanajiri soraro, jeri capitano tatsiri, ishiashijkeitanacari. Ineanta-jeitavacariri atiri, yoipacaaajeitanaquero ipasajeitiri. ³³ Ari ipocapaaque comantanti, yaapaaqueri Pavoro. Yoisotacantaqueri. Iro yoisotantapaacariri apite carenatsa. Isampitacotiri:

—¿Janicampa yoca? ¿Paita yantaqueri piquisajeitantacariri?

³⁴ Ipashiniyetanaquero icantayetanaqueri. Icajemaiteitanaque, tecatsi incantea comantanti iriotacoteri, irootaque yaacantantanacariri anta ivancoqui soraro.

³⁵ Yareetapaacaro ataimentotsinta, oshequi itatsinacajeitanaqueri. Irosati yoancacaantapaacari soraro. ³⁶ Yojatanaqueri oshequi atiri, icajemaiteitanaque:

—Paanirotanaqueri.

³⁷ Irovetainchacha inqueacaapeerime Pavoro pancotsiqui. Icantiri yora comantanti:

—¿Cameetsampa nonquenquetsatacayempi?

Icantiri:

³⁸ —¿Piotirompa quirieco? ¿Tempa aviro ejipitosati, yora quisacaacariri atiri chapin-qui? ¿Tempa aviro aanajiriri chapinqui 4,000 oantatsiri anta caaraiteriqui?

³⁹ Yacanaqueri:

—Te. Nainti jorio. Noponeanaca Tarisoqui, ora shirishiaquiniri. Iotacojeitiro nonampi. Meeca noncamantempi: pishinetena nonquenquetsatacayeri atiri.

⁴⁰ Ari ishinetaqueri, icantiri:

—Jentsiqueti, pinquenquetsatacayeri.

Irosati icatiantapaaca ataimentotsiqui, cati. Impoiji yacotashitanaqueri atiri. Ima-jerejeitanaque, irosati iquenquetsatacaaajeitantacari. Iro iquenquetsatacantariri ev-ereo.

Iquenquetsatacaaqueri Pavoro joriopee.

¹ Jero oca icantajeitiriri Pavoro ijorioririnte:

—Noshaninca. Meeca narosati camantacotachane. Pinquemisantajeitavaquena.

² Iquemantavacariri ineanatantaro evereo, aiquero catsini imajeretasanojeitanaque. Ari icantanaque:

³ —Narotaque jorio. Ari otimaquenari ina anta Tarisoqui, onta shirishiaquiniri. Aca nampitsiquica ari nantearitaqueri. Yoametaquena Camariyeri, itsoteasanotaquenaro oca icantajeitiri intacantaqueeri. Nocoasanotaque noshintsiteneri Tasorentsi pitarica nantiniriri, noquempevetaquempi avirori meeca. ⁴ Noquisasanotiri oametantirori oca iroqueratatsiri, irootaque noantayetariri, noisotacantayetaqueri, aisati noiminqueacantayetaqueri shirampari, tsinane, maaroni. ⁵ Iotana ivincatsarite saserote quearotaque oca nocantaquempi. Aisati iquempejeitanaja maaroni savicacaantajeitatsiri: yora oametavacainchari, iojeiti. Irriojeitaque panarori sanquenarentsi isanquenatiniri tamashicosati. Itianquena nonquisajeitanteearirime quemisantajeitiriri Jesoshi. Nojavetaca Tamashicoqui naayeterime savicatsiri anta, noisoterime. Namaquerime aca iroasanquetanteearirime saserotepee. ⁶ Noquenanaque avotsiqui, noquempejitaacaro Tamashico. Ari icarataque tampatica catsirincaiteri. Omapocapaquena, amorecaco-tapaaquena amorecatsiri, oponeanaca inquitequi. ⁷ Notaanaque quipatsiqui, porocn. Noquemaqueri icantaquena: “Saoro. Saoro. ¿Paita piquisantaquenari?” ⁸ Nacanaqueri: “¿Janicampi Novincatsarite?” Icantaquena: “Narotaque nainti Jesoshi, nasaretesati: narotaque piquisaqueri”. ⁹ Ineajeitaquero notsipajeitari oca amorecatsiri, iro cantaincha te inquemajeitavaqueroji icantaquenari Jesoshi. ¹⁰ Nocantiri: “¿Paita picoacaquenari nanteri?” Icantana Pincatsari: “Pincatianaje, pijate Tamashicoqui. Anta incamanteetempi pitarica panteri”. ¹¹ Oshipaquireacotasanoquena amorecatsiri, irootaque caari noneantaja. Ari yacatsatanaquena notsipajeitari, irosati nareetapatapaaca Tamashicoqui. ¹² Itimi anta shirampari pajitachari Ananiashi. Iquemisan-tasanotiro isanquenare Moishishini. Ineacameetsajeitiri maaroni jorio, savicajeitatsiri anta. ¹³ Ipocashitaquena, iquempejitaquena, icantapaaquena: “Saoro, aviro noyemisantaririnte. Pamenanaje”. Irosati namenanantaja, noneaqueri. ¹⁴ Aisati icantana: “Icoyeaquempi Tasorentsi piotanteearori icoacaquempi iriori. Icoyeaquempi pineanteeariri yora Cameetsatasanotatsiri. Aisati icoyeaquempi pinquemasanotanteeariri iriori. ¹⁵ Aisati pinquenquetsatacoteri. Pincamanteri maaroni atiri oca pineaqueri aisati oca piquemaqueri. ¹⁶ ¿Paita poisamanincantacarori? Tsame, pivaotisatea. Ainiro caari cameetsatatsi pantayetiniri, iro cantaincha ariorica paventeari Tasorentsi, iroameetsantajempi”. ¹⁷ Ari impoiji nopianaja Jerosarequi. Noquenquetsatacavetacari Tasorentsi anta ivancoqui, impoiji te niotacoteaji, ¹⁸ irointi noneashitacari Avincatsarite. Icantaquena: “Pishintsite, pojocanajero Jerosare, pishianaque. Eiro iquemisanteetiroti oca piquenquetsatacotaquenari”. ¹⁹ Nocantiri: “Novincatsarite, iojeitaque notsotea-quero maaroni pancotsi yapatojeitantzari, naajeitaqueri quemisantimpire. Noiminqueacantayetaqueri, aisati nopasanatacantaqueri. ²⁰ Narotaque oacantaqueririri Ishitevani: yora camantacotimpire. Nocatiaca ocaaquivi, nocantiri: ‘Cameetsa incame’. Namenaqueneri oaqueriri iroicoropee”. ²¹ Iro cantaincha icantaquena: “Tsame pijate. Nocoaque nontianquempi arejiqui, anta itiminta pushinipee atiri”.

²² Iquemisantajeivetacari joriopee, iro cantaincha iquemajeitantavacarori oca, icaje-majeitanaque. Icantajeiti:

—Pojocanirotanajeri. Te oncameetsateji iranee: poyer, incameta.

²³ Icajemejtanaque, iquisajeitanaca, irootaque ipishoncajeitantanacarori iroicoropee aisati quipatsipane. ²⁴ Ineantajeitacariri comantanti iquisajeitaca, irosati icantantacari soraro:

—Paanaqueri, pinqueacaanaqueri anta; pimpasanateri incamantantempire pitarica yantaqueri iquisajeitancariri ishaninca.

²⁵ Ari yoisovetacari impasatanteearirime. Ari itimi anta capitanoatsiri, icantiri Pavoro:

—Narotaque shanincatariri oromasati. Tequera piotacojeitena otimirica nantane, ¿arimpa pimpasatashitena?

²⁶ Iquematiiri, ijatashitaqueri comantanti. Icantapaaqueri:

—¿Paita poyeriri? Irinti ashaninca arori.

²⁷ Ari ipocashitaqueri comantanti, icantiri:

—Pincamantasanotenate. ¿Pishanincatarimpa oromasati?

Icantiri:

—Je, noshanincajeitacari.

²⁸ Icantanaque comantanti:

—Oshequi nopolaventaqueri oromasati noshanincatantacariri.

Icanti Pavoro:

—Aitaque notimaqueri noshanincatantacariri.

²⁹ Intsipaitet itiancajiri yora pasaterinemeri. Iranti comantanti, itsaroanaque. Iotaque yoisotashitacari shanincatacariri oromasati: te oncameetsateji iroisotashiteari.

Yaanaqueri Pavoro anta inauenta oametavacainchari.

³⁰ Icoaque comantanti iriotasanote paita icantacotantariri joriopee Pavoro. Oquitaite-tamanaque yoisoreajiri. Yapatotacantaqueri jivatacaajeitiriri saserote, jeri maaroni oametavacaajeitainchari. Irosati yoirincacantanacari Pavoro, yaanaqueri anta.

23

¹ Yamenasanotapaaqueri maaroni oametavacainchari. Icantiri:

—Noshaninca. Nioti ineacameetsatasanotaquena Tasorents. Nocantatiani cameetsa nosaviquini, irosatitatsi meeca.

² Yora Ananiashi ivincatsarite saserote, icantiri tsipatariri anta:

—Pimpasavanteniroteri.

³ Icantanaque Pavoro:

—Avirotaque avinti inquishe Tasorents; ainiro pantane: oshequi pamatavitanti. Jero meeca pisaviqui aca, picoaque pimoncaraterome Sanquenarents, pincantacoventante-narime. Iro cantaincha pipasatacantaquena, te pimoncaraterojo Sanquenarents.

⁴ Icantanaque catiainchari ara:

—Iriotaque picantaqueri ivincatsarite saserote.

⁵ Yacanaqueri:

—Te nioteji iriorica ivincatsarite saserote. Ocanti Sanquenarents: “Eiro picantimatiritsi pincatsariventiriri pishaninca”. Niotaqueme, eiro nocantirime.

⁶ Iotaque Pavoro anta iconoayetacari saroseopee, jeri aisati variseopee. Icajemanaque:

—Noshaninca. Narotaque variseo. Narotaque itomi variseo. Niotaque intinaajeitaje maaroni camajeitaintsiri, irootaque iquishimentaquinari meeca yoca.

⁷ Iquemantajeitavacarori oca icantaqueri, iquisatsatavacaajeitanaca variseopee jeri saroseopee. Iquisavacaajeitanaca. ⁸ Icantapinijeiti saroseo: “Eiro itinaajatsi cama-jeitaintsiri. Te aneriji Tasorents inampire. Te aneroji ashire arori”. Iro cantaincha icantajeiti variseo: “Antinaajeitanaje. Timatsi inampire Tasorents. Timatsi ashire maaroni”. ⁹ Ari iquisatsatavacaajeitanaca. Icatianaca oametantirori sanquenarents, variseo ini. Icantasanotanaque:

—Tecatsi nonquemacoteri yoca, yantaquero caari cameetsatatsi. Ariorica yoameta-queri Tasorents. Ariorica yoametaqueri inampire.

¹⁰ Aquiero catsini iquisatsatavacaajeitanaca. Yaamaanaca comantanti ari impicharea-jeitanaqueri Pavoro. Itiancaqueri soraro:

—Pijate, paajanteri.

Ari yaniireajeitanaque, ijajeitanaque nianqui, yaapitsajeitavajiri. Yaanajiri anta pan-cotsiqui. ¹¹ Aparo imaaque, otsitenitanaji aisati, iconijatimotapaaqueri Avincatsarite. Icantapaaqueri:

—Piveshireanaquea. Piquenquetsatacotaquena aca Jerosarequi, aisati pinquempeta-jea coajica anta Oromaqi.

Yaanajiri Pavoro Sesareaqui.

¹² Ari oquitaitetamanaji, yora joriopee, isareajeivetacari Pavoro iroyerime. Icantava-jaajeitaca:

—Meeca, eirotsitarica airi, eiro avajatsi, aisati eiro irajitsi. Ariorica amatavitavaca-jeitea, tempa ari iroasanquetaquee Tasorents.

¹³⁻¹⁴ Yanaajeitaquero 40 shirampari sareavetacariri iroyerime. Ijatashjeitiri jivatacaa-jeitiriri saserotepee, jeri aisati savicacaantayetatsiri. Icantapaaqueri:

—Eirotsitarica noiri Pavoro, eiro noitajatsi, aisati eiro niritajatsi. Eirorica nomajeitiro, nocoajeitaque iroasanquejeitenas Tasorentsi. ¹⁵ Pincarajeiteri maaroni oametavacainchari, pincantaiteri yora comantanti: “Pamaquenari Pavoro, nocoaque niotacotasanoteri, paitarica yantiri”. Irootaque pincanteriri. Naroqua nainti, novetsicajeititaquea noantavaqueariri nianqui, tequeratsita irareetea.

¹⁶ Jeri otomi iritsiro Pavoro, iquemacoventaqueri iriconquiri isareacari iroyeeteri. Ari ijatanaque anta ivancoqui soraro, icamantapaaqueri Pavoro. ¹⁷ Irosati icajemacantanacari iriori aparo capitansonotsiri, icantiri:

—Paanaqueri yoca evancari anta itiminta comantanti. Timatsi incamanteriri.

¹⁸ Irosati yaantanacari anta. Icantapaaqueri:

—Icajemaquena Pavoro, yora aiminqueiri oshaiteji. Icantaquena: “Paanaqueneri comantanti yoca. Timatsi incamanteriri”.

¹⁹ Ari yacatsatanaqueri aquietiji ara. Imanacaacari, isampitaqueri:

—¿Paita ojita oca pincamantenari?

²⁰ Icantiri:

—Icantavacaaca joriopee, incoacojeitaquempi paanajeneri Pavoro anta yoametavaaajeitacanta. Icoaque iramatavitempi, incante icoaque irisampitacoventasanoteri coqui. ²¹ Iro cantaincha, eiro piquemisantiritsi. Timatsi shiramparipee, yavisajeitaquero 40 icarajeiti, sareacariri iroyeri. Icantajeitaque: “Eirotsitarica airi, eiro avajatsi, aisati eiro irajtsi. Eirorica airitsi, acoaque iroasanquetaajeiteeta Tasorentsi”. Meeca yovetsicajeitaca. Yoyeaquempi meeca, panteneri oca incoacotemperi.

²² Ari itianquiri comantanti yora evancari. Icantavaqueri:

—Eiro picamantiritsi ashanincaphee oca picamantaquenari.

²³ Impoiji icajemiri apite capitano. Icantiri:

—Arriorica onianquittimatanaque, povetsicajeiteri 200 soraro, 70 quijacotearineri cavayo, jeri 200 ajiriqueroneri isataamento. Irijajeite Sesareaqui. ²⁴ Povetsiqueneri Pavoro cavayo, inquijacotanaqueari. Cameetsa paajeitanaqueri anta itiminta pincatsari Virishi.

²⁵ Impoiji isanquenatiniri sanquenarentsi, iquempetaquero oca: ²⁶ “¿Ainirompi Virishi? ¿Tecatsimpa oyempine? Narotaque Caraorio Irishiashi sanquenatimpiori oca. Oshequi nopincatsatimpi. ²⁷ Pineavaqueriya yoca shirampari nontianquempi. Irovetailcha iroajeiterime chapinqui joriopee. Icamanteetana ishanincat-

acari oromasati, irosati nojatashitancariri, notsipatanacari soraro, noavisacotajiri. ²⁸ Nocoanaque niote paita incantacoteriri, naanaqueri anta yoametavacaajeitanta.

²⁹ Noquemapaaqueri, icantavacaimentajeitaro sanquenarentsi. Iro cantaincha tecatsi

incantacoteri aiminqueanteariri aisati avanteariri. ³⁰ Timatsi camantapaaquenari is-

areetacari iroyeeteri, irootaque nontiancantempiriri. Nontianquempi coajica yora

quisaqueriri irijatashitempi incamantacotanoteri Pavoro”. Irootaque isanquenatiniriri, impoiji ipavaqueri soraro:

—Jeroca paanajeneri Virishi, aisati paanajeri Pavoro.

³¹ Ari iquemisantaqueri soraro, yaanaqueri Pavoro. Tsiteniriqui yareetacaacari Antipatirishiqui. ³² Oquitaitetamanaque ipiajeitanaja soraro inampiqui. Irinti tsipatasanotanacariri Pavoro yora quijacojeitariri cavayo. ³³ Yareejitantapaacari Sesareaqui, ipapaaqueri pincatsari sanquenarentsi. Aisati iriori Pavoro, yonijaapaaqueri. ³⁴ Ineanatavaqueri sanquenarentsi, irosati isampitantavacari:

—Jaoca opajitari piipatsite piponeantacari?

Yacanaqueri Pavoro:

—Noponeanaca Shirishaqui.

³⁵ Icantiri pincatsari:

—Coajica impocavaquetsita camantacotempineri, ari nonquemisantanaquempi.

Impoiji icantiri soraro:

—Pashitacoteri anta ivancoqui Eroreshi, pamenasanoteriyea.

24

¹ Ocarataque quitaiteri apapacoroni, ari ijatanaque Ananiashi, yora ivincatsarite saserote, itsipatanacari aparopee savicacaajeitantzatsiri. Jeri aisati itsipatanacari amitacotiriri, pajitachari Teretoro. Ijatashijeitanaqueri pincatsari, incantacojeiteri Pavoro.
² Icajemeetaqueri, impoiji iquenquetsati Teretoro. Iquenquetsatacapaaqueri Virishi, ineshinoncatamempeacari, aisati icantacotashitacari Pavoro, icanti:

³ —Meeca, novincatsarite, nopasonquijeitimp. Cameetsa pipincatsariventajetaquena, irootaque cameetsa nosavicaajeitantzacari aca. Poameetsajeitaquenaro paitaricapee, irootaque nopasonquitimentaquempiri maaroni. ⁴ Meeca eiro nosamanitimprotsi. Aitaquenea pametaro pineshinoncatanti, capichaji nocoaque pinquemisantavaquena. ⁵ Noneaqueri yoca Pavoro, oshequi ineashirencanti. Iquisacaajeitacari joriopee maaroni nampitsipeequiniri. Iriotaque jivatamacairiri quemisantajeitiriri yora nasaretesati. ⁶ Irovetanaincha impincacayenarome ivanco Tasorentsi, irosati naajeitantzacari. Irovetanaincha nomoncaraterome isanquenajeitananiri Moishishini, noncantacoventantearirime yoca. ⁷ Iro cantaincha yareetapaaca Irishiashi, yora comantanti. Itatsinquimentayetapaaquenari, yaapitsatapaaquenari. Itiancaquena nopocantacari aca, noncantacoventantearirimi Pavoro. ⁸ Meeca, pisampiteri, piotanteari queariorica oca nocantacotaqueriri.

⁹ Icantajeitanaque joriopee:

—Queariotaque oca icantaqueri. Aitaque ocantacari.

¹⁰ Ari yora pincatsari icantaqueri Pavoro irineanate iriori. Ari icanti:

—Niotaque ocarati meeca oshequi osarintsi pipincatsariventajejitiri noshaninca, irootaque noquimoshiretantanacari. Meeca narosati camantacoventajanchane.

¹¹ Jentsite, pisampitacoventajeitena. Iroqueratatsiquera ocarati 12 quitaiteri nojatantaitari Jerosarequi. Nojaiti noquemisantaiti. ¹² Tecatsi neenaneri nompiatsatavacayempa anta ivancoqui Tasorentsi, aisati te nompiatsatavacayempa anta pancotsiqui napatotantari, nampitsiqui, tecatsi. Aisati te nampatojeiteri oshequi atiri. ¹³ Tecatsi incantea meeca iriotacaasanotempi oca icantacotashitaquenari. ¹⁴ Meeca noncamantasanoempi. Noquemisantiri yora Tasorentsi iquemisantiniri intacantanari. Noquemisantajeitiro isanquenareni Moishishi, aisati iroori isanquenareni camantantajeitatsiniri. Queario, ainiro yoametaquenari Jesoshi ayojeitantzeari ajajeitantzeari inquitequi, iro cantaincha icantashijeitaca yocapee te oncameetsateji anquemisanteri. ¹⁵ Noquempejeitacari iriori, niotaque iroointinaajeitajeri Tasorentsi maaroni camajeivetrainchari: cameetsatatsiri, caari cameetsatatsi, maaroni. ¹⁶ Irootaque nocoasanotantacari noncameetsashiretimoteri Tasorentsi, aisati atiri. Tempa ineajeitaquena. Nocoaque nontime cameetsa, niotanteari ineacameetsataquena.

¹⁷ Notimavetaca anta arejiqui oshequi osarintsi, meeca nopiaja. Namaqueneri noshaninca ipacantashiyetacariri savicayetatsiri otsipapeequi nampitsi. Aisati nopashitapaacari Tasorentsi paitarica. ¹⁸ Pamenete meeca, ineaquena yoca anta ivancoqui Tasorentsi, noquemisantaque. Tecatsi nampatotacayeari, aisati tecatsi nonquisacayeari. ¹⁹ Itimi anta ivancoqui Tasorentsi joriopee poneayetachari Ashiaqui, iriotaque quisacaajeitacariri atiripee. Ontimeme nantayetiri, tempa impoqueme iriori incantacoventena. ²⁰ Iro cantaincha ¿paita icantajeitiri yocapee? ¿Paita iotacotanari anta yoametavacaajeitacanta? ¿Timatsimpa nantaqueri? ²¹ Apatiroti nocantaqueri chapinqui: “Niotaque intinaajeitanaje maaroni camajeivetrainchari, irootaque picantacoventantaquenari meeca”.

²² Iotasanolni iriori Virishi oca acamantacotiriri Tasorentsi. Icantanaque:

—Aitapaajitsita meeca. Coajica impocavajetsita comantanti Irishiashi, ari noncantacoventempi.

²³ Icantiri capitano:

—Paanajeri Pavoro, poiminqueajeri: pamenasanoteri, iro cantaincha pishineteri paitanirica incoyer. Aisati pishineteri ishaninca irintacoteari.

²⁴ Pashini quitaiteri ipocapaaque Virishi. Itsipatapaaro ijina pajitachari Toroshia. Jorio oni. Icajamacantiri Pavoro iquemisantanteeariri. Iquenquetsatacotiro jaoca ancanteari anquemisanteri Jesoquirishito. ²⁵ Aisati iquenquetsatacotiro jaoca ancanteari ancameetsashiretanaje, aisati antime cameetsa. Aisati iquenquetsatacotiri Tasorentsi, jaoca incanteari coajicani incantacoventantanteeariri maaroni atiri. Ari itsaroanaque Virishi. Icant:

—Meeca pijataje. Coajica, tecatsirica nante, ari noncajamacantajempi aisati.

²⁶ Ari oshequitaque icajamacantapinitaqueri, ijitashitaca Virishi ari impashitana-jearime quirequi irishinetantearirime irijatantajeari. Ari iquenquetsatacapinitaqueri, iro cantaincha te imperiji quirequi. ²⁷ Apitetaque avisanaque osarintsi. Ipoyeetajari Virishi yora Porishio Jeshito. Icoaque inquimoshiretacayempari joriopee, irootaque caari ishinetantajari Pavoro irisoquijanaje.

25

Yaventacari Pavoro Sesari.

¹ Ari yareetanaca Jeshito anta impincatsariventantenta. Mava imaapaaque Sesareaqui, irosati yovaantanaja Jerosarequi. ² Jeri yora jivatacaajeitiriri saserotepee, jeri pincatsariventiriri jorio, icantacojeitiri Pavoro. Icantiri Jeshito:

—Pinquimoshiretacayena. Pamacantenari Pavoro aca Jerosarequi.

Ari isareavetacari irimapocavaquerime nianqui, iroavaquerime. ⁴ Icantiri Jeshito:

—Irisavicavaquetsita Sesareaqui. Eiro osamanititsi nompiaje. ⁵ Ari otimirica yantane, nocoaque intsipatanaquena pincatsariventimpiri, incantacotanteariri.

⁶ Ari aamaaca isavicaque anta 8 quitaiteri, ariorica 10. Te iroanayeroji 10. Irosati ipiantaja Sesareaqui. Oquitaitetamanaque isavicaque anta ivincatsarimentoqui. Icajamacantiri Pavoro. ⁷ Yareetapaaca, ari ishoncavacari yora poneachari Jerosarequi. Oshequi icantacotasanolvetacari, iro cantaincha tecatsi incante iriotacotasanolvanteariri Jeshito. ⁸ Irisati cantacoventavajancha Pavoro, icanti:

—Tecatsi noncantero Sanquenarentsi iquemisantiri joriopee. Tecatsi noncantero ivanco Tasorentsi. Aisati oquempetaca, tecatsi noncantimateri Sesari.

⁹ Iro cantaincha Jeshito icoaque inquimoshiretacajaeiteri joriopee. Icantiri Pavoro:

—Piquemaque meeca icantacojeitimpiri yocapee. ¿Picoimpa pijate Jerosarequi? Anta ari noncantacoventajempi.

¹⁰ Yacanaqueri Pavoro:

—Noshanincatacari nainti oromasati, aivetacanea aca pincantacoventenameri. Pio-tasanotaque tecatsi noncantero joriopee. ¹¹ Nantaquerorica caari cameetsatatsi, ainirorica nantane iroyeetantenari, ari. Cameetsataque iroyeetenata. Iro cantaincha ariorica icantacotashitejana, tecatsi pincantea pishinetacoventena. Nocoaque pintianquena meeca Sesariqui, incantacoventena irinti.

¹² Ari iquenquetsatacaaqueri Jeshito yora oametavacainchari. Impoiji icantiri Pavoro:

—Meeca picoaque nontianquempi Sesariqui. Aitaque nontianquempi irioriqui, incantacoventantempiri.

Iquenquetsatacaaqueri Pavoro Aquiripa.

¹³ Jaocarica ocarati imaaque. Jeri yareetaca pincatsari Aquiripa, itsipataro Verenise. Ipoqui iquivantiri Jeshito. ¹⁴ Isavicapaaque oshequi quitaiteri, ari iquenquetsatacaaqueri Pavoro:

—Timatsi aca shirampari yoiminqueaque Virishi. ¹⁵ Nojatantacari Jerosarequi, icantacotaqueri joriopee: yora jivatacaajeitiriri saserote, savicacaajeitantsiri, maaroni. Icoacotaquena noncantacoventashiteari Pavoro: “Ainiro yantane”. ¹⁶ Iro cantaincha nocantaqueri: “Naro oromasati. Te nameteaji noshinetacantashiteari tequeratsitarica incantacoyeeteri. Inquemavaquerotsita oca pincantacoteriri. Impoiji quea irisati cantacoventajanchane”. ¹⁷ Irosati yapatojeitancaca aca, ari te nosamaninquierojo. Oquitaitetamanaque nosavicaque aca novincatsarimentoqui, nocajemacantaqueri Pavoro. ¹⁸ Ari nojivetaca incantajeite yantasanoltiro caari cameetsatatsi. Iro cantaincha, tecatsi incantacotasanojeiteri. ¹⁹ Iquisatsatimentavacaacaro oca yaamaashiyetari iriori.

Aisati iquisatsatimentavacaacari Jesoshini. Icamaque, iro cantaincha icanti Pavoro: “Aneaji”. ²⁰ Te nioteji jaoca noncanterori nosampitacoventantearori oca icantayetiri. Nosampivetacari icoaquerica irijate Jerosarequi, anta noncantacoventantearirime. ²¹ Iro cantaincha icoanaque incantacoventeri inti Sesari, yora Aocoshito. Ari nocantaqueri soraro irishenteri, irosati nontiancanteariri anta Sesariqui.

²² Icanti Aquiripa:

—Nocoaque nonquemisanteri nainti.

Icantiri:

—Aitaque, osaitequera pinquemamaneri.

²³ Oquitaitetamaque ijataque Aquiripa, jero Verenishe. Ari yoaneencasanojeitanaca apite. Iqueanaque anta yapatotapiniyeetanta. Icarajeitaqueri comantantipee, aisati pincatsariyetatsiri: yora savicajeitatsiri anta. Yora Jeshito, icajemacantaqueri Pavoro. Ari yamapaaqueri soraropee. Icanti Jeshito:

²⁴ —Pincatsari Aquiripa. Maaroni aviro nocarajeitiriaca. Jeri yoca. Ipocashijeitaquena maaroni joriopee: jerosaresati, jeri yoca savicayetatsiriaca. Icantacovetari yoca: “Te oncameetsateji intime”. ²⁵ Iro cantaincha tecatsi niotacoteri noamaanteariri. Jero meeca yaventacari Sesari, ari meeca nocoi nontianqueri irioriqui. ²⁶ Iro cantaincha te nioteji paitarica noncamantasanoteriri avincatsarite. Irootaque nocajemacantantaquemperi avinti, asampitacoventanteariri. Impoijquea ontine nosanquenatacotanteariri. ²⁷ Jeri yoca noiminqueaqueri. Te oncameetsateji nontiancashiteari, tecatsirica noncamantacoteri.

26

¹ Yora Aquiripa icantiri Pavoro:

—Meeca noshinetempi avisati cantacoventachane.

Irosati yacotashitantanacari Pavoro, impoiji icantacoventaja irisati:

² —Pinequena, pincatsari Aquiripa. Meeca noncamantempi paita iquishimentantakenari nojorioririnte. NoquimoshireventaqueMPI, ³ piotasanoliro maaroni yameyetari noshaninca, aisati pioyetiro maaroni icantavacamentajeitari. Nocoaque pinquemisan-tasanotena, eiro pishemanatsi. ⁴ Iotacotitajeitaquena noshanincaphee, peerani ainironi nevancaritapaini. Nosaviquini Jerosarequi, nocarajeitaqueri noshaninca. Irosatitatsi meeca iotana. ⁵ Tempa quemisantincari variseotatsiri. Peerani novariseoveitani narori, noquempetasanoveitarini. Iotasanojeitaquena noshanincaphee, incoaquericame incamantajeitempime. ⁶ Nocoasanotaque noneeri icashiacaacariri Tasorentsi noshanincani, irootaque meeca picantacoventimentaqueunari. ⁷ Peerani itimini Jacovoni itomini 12, ijomriojeitini. Meeca icoajeitaque maaroni ishanincani irineeri yora Quirishitotatsiri iquen-quetsatacotiniri Tasorentsi. Coajicani iroitinaajeitajeri maaroni camajeitatsiri. Icantati-iani yaamaajeivetacari: quitariteriqui, tsiteniriqui. Meeca nocantaque ipocasanotaque, irootaque icantacotantanari meeca noshaninca. ⁸ ¿Pijitimpaa eiro imatirotsi Tasorentsi irootinayeri camajeitatsiri? ¿Paita pitseencantariri? ⁹ Nojitashiveitani narori peerani cameetsa nonquisheri yora quemisantajeitiriri Jesoshi nasaretesati. ¹⁰ Aitaque nomavetacaro anta Jerosarequi. Noiminqueayetaqueri oshequi icoyeanepee Tasorentsi. Irootaque tiancaquenari jivatacaajeitiriri saserote. Nocoaveitani incamajeiteme quemisantajeitiriri Jesoshi. ¹¹ Aitaque oshequi noashinoncaapiniveitarini anta maaroni pancotsipeequi yapatojeitancari. Nocoacaavetari incantimaterime Tasorentsi. Nocaantirive, noijajeitanaqueri pashinipeequi nampitsi, nonquisanteariri. ¹² Irootaque nojatashitan-tavetacariri tamashicosati, itiancana jivatacaajeitiriri saserote nayerime. ¹³ Ari nocaantanaca, itampaticataque catsirinaciteri. Ari noneavaquero anta avotsiqui amorecatsiri, oponeanaca inquitequi, morec. Oshipaquireasanoataque catsini, te oshiyeriji catsirinaciteri. Oshoncapaaquena, aisati iriori nocarajeitaqueri. ¹⁴ Notaajeitanaque quipatsiqui, porocn. Irosati noquemantacariri, iquenquetsatacaana evereoqui. Icantaqueuna: “Saoro, Saoro. ¿Paita piquisantanari? Aririca nonquenquetsatacayempime, ¿paita pipiatsatantanari? Tempa pashinoncaja avisati”. ¹⁵ Nacanaqueri: “¿Janicampi, Novincatsarite?” Icantaqueuna: “Narotaque Jesoshi, piisaneentane. ¹⁶ Pintinaaanajequeti, pincatianaje. Nocoaque nompeajempi intacojeitearine atiripee, camantajeiterineri;

irootaque noquenquetsatacantimpri meeca. Pincamanteri atiri oca pineaqueri, aisati oca nonijayempi, coajica. ¹⁷ Jaocarica incantavetempi pishaninca, jeri pashinisatipee atiri, ari noavisacotempi: eiro noshinejeitirts iroashinoncaajeitempi. Iro nontiancantaqueempri ¹⁸ iriojeitantzeari. Oquempetimovetacari otsitenitimovetacari: te iriojeitenaji, irinti Satanashi amatavijeitiriri. Pijatashijeiteri, poamejeiteri iraventantenari, impoiji onquempetimotajeari intime quitafteriqui. Impoiji noameetsajeiteri, eiro noquenqueshireacotajiritsi caari cameetsatatsi yantajeivetari; incarajeiteri maaroni quemisantajeitanari, aisati nosavicacaajeiteri cameetsa". ¹⁹ Irootaque noneaqueri aisati irootaque icantaquenari Jesoshi. Te nompiateariji, irooti notsoteaqueneri icantaquenari. ²⁰ Nintanacari yora tamashicosati, nocamantaqueri. Impoiji anta Jerosarequi nocamantantaque. Aisati notsoteajeitaqueri anta Joreaqui. Nocamantajeitaqueri yora pashinisatipee atiri, maaroni. Nocamantajeitiri: "Pinquenqueshirejeitanaquea, paventajeiteari Tasorents. Cameetsayea pisavicafeite, iriojeitantzeari atiri queario piquemisantasanojeitaque". ²¹ Ari noquenquetsatacotaqueri Jesoshi, irootaque yaajeitantaquenari joriopee anta ivancoqui Tasorents, iroyename. ²² Icantatiani Tasorents intacotana: peerani, irosatitatsi meeca. Irootaque nomatantarori noquenquetsatacaajeitiri pincatsaritatsiri, caari pincatsaritatsine, maaroni. Ari noametantapinitiro isanquenare camantantatsiniri, aisati isanquenaren Moishishi. Nocamantacotiri iquenquetsatacotiniri peerani: moncarataca iquenquetsatacotiniri, aneayetaquero. ²³ Tempa irootaque icantitaniri: "Irineacatsitearo Quirishito, incamaque. Impoiji irijivajeiteri maaroni camajeitauntsiri, intinaanaje. Incamantajeiteri jorio, jeri pashinisati atiri: 'Meeca piotasanojeiteri Tasorents'".

²⁴ Aitaque ocantari icantaquerir Pavoro. Antearojenca icajemanaque Jeshito:
—Pitsaviataqueteemi, piomempeavetaca.

²⁵ Yacanaqueri:

—Te nontsaviateji, niotasanoque. Queariotaque catsini oca nocamantaqueempri.

²⁶ Yoca Aquiripa ioejiriro oca nocantaqueri, irootaque cameetsa noquenquetsatacaasan-otantacariri. Tecatsi nomaneri, niotasanoque itsoteaquero, iotavaquero; te omaneaji.

²⁷ Pincatsari Aquiripa: tempa piquemisantiro isanquenajeitaqueniri camantantatsiniri. Niotaque piquemisantaquero.

²⁸ Yacanaqueri:

—Irovetailcha pinquemisantacayenarime Quirishito.

²⁹ Yacanaqueri:

—Irovetailcharica pinquemisante, irompa osamaniquerarica, te nioteji. Iro cantaincha nocantaqueri Tasorents pinquempetantajenari narori. Aisati noocoacaajeivetacari inquempejeitename maaroni quemajeitaquenari meeca: apatiro te noncoacayempi iroisotanteetempiro oca carenatsa.

³⁰ Icatianaca pincatsaritatsiri: yora Aquiripa, jeri Jeshito, aisati oquempetaca Verenise, ocatianaca iroori. Aisati iquempejeitanaca maaroni saviquimojeitiriri, icati-jeitanaca. ³¹ Ijajeitanaque, icantavacaajeitanaca:

—Tecatsi irante Pavoro incamanteari. Tecatsi irantavetea, yoiminqueashiyeetacari.

³² Yora Aquiripa icantiri Jeshito:

—Eirome yaventarime Sesari, antianquerime irijatajetame.

Ijataque Pavoro Oromaqui.

¹ Ainiro anta iyapitanote oshequi soraro, pajitachari Jorio. Ipajiyeyetiri soraropee Aocoshiba. Icanteeetiri:

—Ainiro meeca antearo pitotsi, paanajeri Pavoro Itariaqui, jeri yonta pashini yoisoy-eetiri.

Aisati icanteetana:

—Pincoaquerica pojatanaqueri Pavoro, pintetearo onta pitotsinta inquenanteari iriori.

² Ari notejeitanacaro pitotsi poneachari Ataramishiaqui, irovetailcha ojate nampitsipeequi anta otsapijaqui Ashia: anta oatapinitanta pitotsi. Ari noquenacoyetanaque,

notsipatanacari Arishitaraco. Iponeanaca iriori Tesaronicaqui, ora maseroniaquiniri. ³ Oquitaitetamaque nareetaca Shiroqui. Yora Jorio, ineshinoncataqueri Pavoro: ishinetaqueri ijati iquivantiri ishaninca anta, ari intacojeitavacari. ⁴ Irosati novaantanaja aisati. Iro oimpiaicotajename tampea, irootaque noquenantanacari Tsipirequi, antaqueronta. ⁵ Nomonteanajaro incajare oquempejitaro Shirishia, aisati Pampiria. Novaanaja, nareetanaca Miraqui, ora irishiaquiniri. ⁶ Ari ineapaaquero capitano pitotsi poneachari Arejantiriaqui: ojateme Itariaqui, irosati notejeitantanacaro. ⁷ Ocarati oshequi quitaiteri noquenacojeitanaque, jentsiquero. Opomerentsitimotaquena, iro cantaincha noquempejitaacaro Jeniro. Te oshinenetaji tampea, irootaque noshoncantanacarori Quereta. Noquenanaque antaqueronta, anta quempeji Saramona. ⁸ Opomerentsitimotaquena, iro cantaincha noshoncanacaro ora ovoyeja. Impoiji nareetanaca onta ipajieetiri: Cameetsajari. Oquempejitaro nampitsi pajitachari Irasea.

⁹ Meeca operaniitanaque, avisanaque meeca quitaiteri ititantapiniyeetari. Ari ocovencatasanotanaque noquenacotanaque: irotaintsi oshequi tampea, oshequi omotoncane. Icamantavetacari Pavoro:

¹⁰ —Noshaninca, niotaque ompomerentsitimotaquee anquenacojeitanaque meeca. Ayeecari antearo tampea. Otsitiicari pitotsi, otsoncacari vaararontsi, aisati atsitiaeitacari arori.

¹¹ Yora capitano, te inquemisanteriji Pavoro; iquemisasantotiri yora jivatiriri marinero, irinti. Aisati iquemisantiri yora ashitarori pitotsi. Icantajeiti iriori:

—Tsame avaajeitanajea.

¹² Irotajantsi ompocanteari antearo tampea, iro cantaincha te oncameetsatimoteriji nosavicasanojeite anta. Yora oshequiaintsiri icoajeitaque novajeitanajea. Icoavetaca nareeteame Jenishiaqui, onta queretaquiniri. Anta onapiniti pitotsi, onameetsatimoteitiri nosavicafeiteme anta. Icoaque anta iroyeavaquerotame tampea, ompeantajeari. Ocameetsati intsatacoterome pitotsi Jenishiaqui: te aneasanoteroji tampea anta.

¹³ Ari impoiji cameetsa ojeaoncaque tampea: ojati anta noshirejeivetacanta nojateme. Ijitalshijeiveta ari nareejeiteame Jenishiaqui, irosati novaantanaja. Noquenacotanaque otsapijaqui Quereta. ¹⁴ Iro cantaincha, te osamaniteji, ari omapocaquena antearo tampea, icanteetiro Noreshite. Oponeanaca quipatsiqui, ¹⁵ otiancasanotaquero pitotsi nianquijaqui; tecatsi oncatea ojate oquenapaaquenta tampea. Ari noshinetacotanaca, aiquero otiancasanotirori. ¹⁶ Noquenacotanaque anta ovoyejajaniquipi pajitachari Caora. Aisati oponeanaca tampea ovoyejaqui. Opomerentsitimajeivetaquena, iro cantaincha nomataquero naasanotavaquero pitotsijaniquipi: ora onoshicapinitiri opatiqui. ¹⁷ Impoiji yoancaquero marinero. Ari yaamaacaro ari ontsipareanaquea taaverapee yovetsicantarori antearo pitotsi, irosati yoisotantacarori. Aisati itsaroajeitanaque ojocacojeitename quipatsiqui, anta Shiritequi, irootaque yaajeitantanajarori maaroni tocoyatatsiri. Ishinetaquero pitotsi, icanti:

—Aanaquerota tampea, tecatsi ancantero.

¹⁸ Oquitaitetamaque, aiquero catsini otiancacotasanojeitaquena tampea. Ari yoviincajeitaquero vaararontsi, pocn, pocn, pocn. ¹⁹ Omavatapaaque quitaiteri yoviinchitacaro aisati ovaararo pitotsi, soocatsa, maaroni. ²⁰ Ari ocaratanaque oshequi quitaiteri: te inconijatajeji catsirincaiteri, aisati impoquiero, tecatsi. Ocantatiani tampea, antearo ojeaoncaque, sooo. Nojijeivetaca eiro navisacojeitajitsi.

²¹ Avisanaque oshequi quitaiteri, te noajeiteaji. Icatianaca Pavoro, icantaque:

—Noshaninca, pinquemisantaquename, oncameetsataqueme. Eirome ajoquirome Quereta, eiro otsitiime pitotsi, eiro otsoncame maaroni. ²² Iro cantaincha piveshireajeitanaquea meeca. Coajica ontsitianaque pitotsi, iro cantaincha eiro atsitiaeititsi ainti. ²³ Iriotaque Tasorentsi jocaacoventaquerenari. Noquemisantiri nainti. Osaite noneaqueri inampire, ²⁴ icantaquena: “Pavoro, eiro pitsaroitsi. Aitaque pareetaqueari Sesari. Picantaqueri Tasorentsi incavintsaajeiteri maaroni picarajeitaqueri acá: ari iquemisantaquempi”. ²⁵ Meeca, piveshireajeitanaquea. Noquemisantiri Tasorentsi, nioataque ontsataaquea maaroni icantayetaquenari. ²⁶ Ario coajica ojocacotaquee tampea ovoyejaqui, eiro acamajeititsi.

²⁷ Ocaratanaque meeca 14 quitaiteri, meeca otsitenitanaque. Noquenacotashitanaca incajarequi pajitachari Atiria. Onianquiitetanaque, yaamaaca marinero ari noquempejitanacaro otsapijaqui. ²⁸ Ineantacaro, osanajatirica. Ocarati 37 metero. Oshamaniji yapiitaquero. Ocarati meeca 28 metero niotantacari quempejitatapaque quipatsi.

²⁹ Itsaroajeitanaque, icanti:

—Queariyea, atsitincacotarocari mapi.

Anta opataquiqui yoviincaquero 4 otsatacotantari pitotsi, ortsatacojatantacari nianquiqui. Icoasanotanaque onquitaitetaje. ³⁰ Icoasanovetanaca yora marinero irav-isacotanaque, iroviinquerome pitotsijaniqui inquenacotanteameri ortsapijaqui. Icoaveta irijocajeitename narori. Icoajeivetaca iramatavijeitename, icantajeivetana:

—Noviinquerota ortsatacotantari pitotsi, onta otsoviquiniri. Iro naantajearori pitotsijaniqui, noviinquiero ara, onquisotanteari antearo pitotsi.

Ja, icoajeiveta irijocajeitename. ³¹ Yora Pavoro icantaqueri capitano, jeri soraropee:

—Eirorica quiso yoiro marinero pitotsi, tecatsi pincantea avirori pavisacojeitaje. Eiro pishinetirtsitsi irijocajeitee.

³² Irosati ipesantacaro soraro socatsa: oca ortsatacotantaveitaniri pitotsijaniqui. Yoviincaquero, pocn. ³³ Irotanajantsi onquitaitetaje, icantajeitaqueri Pavoro:

—Tsame, poajeitavaqueata. Ocarati meeca 14 quitaiteri pinashitaca, te poajeiteaji.

³⁴ Meeca nocantasanotaquempi, poajeitea. Oshintsitacaajempi. Piotasanotanaque: tecatsi oyempine catsini.

³⁵ Icantantarori oca, ipasonquitaqueri Tasorentsi, noneajeitaqueri. Icarajaquero tanta, ijivataque yoanaca. ³⁶ Yoveshireajeitanaja maaroni, yoajeitanaca.

³⁷ Nocarajeitaque maaroni tetarori pitotsi 276. ³⁸ Iquemajeitanaca, ari yoviincajeitaquero maaroni tirico, irosati opijoncatantanaja pitotsi.

³⁹ Ari oquitaitetasanotanaji, te iriojeitajeroji quipatsi. Iro cantaincha ineaquero ortsantsajatanaque irosati anta quipatsiqui, otiminta impanequi. Icoajeivetaca iraat-acotapeeme anta. ⁴⁰ Yojocajiro ortsatacotantaveitaniri incajarequi. Ari itsatacoreajiro soocatsa oisotantaveitaniri oomaro. Yovancajiro tocoya, ora otsoviquiniri. Aacotanaquena tampea, icoajeiveta iraatacotapeeme impanequiviqui. ⁴¹ Iro cantaincha navicacotapaaque nianquiqui, eentapaaca quiripequiriqui. Avicasanotapaaque otsoviqui. Oquisotasanotapaaque, te oshevatajeaji. Ora omotoncane ocarajaquero opataquiqui, patire. ⁴² Icoajeiveta soraro iroajeiterime maaroni yora yoimunqueajeitaqueri. Iquen-queshiretanaca:

—Yamaatanaquecari, ishiapitsatanaqueecari.

⁴³ Iro cantaincha icoaque capitano iroavisacoteri Pavoro. Te irishinejeiteriji iroajeiteli. Icantajeitaqueri maaroni iojeitatsiri yamaati:

—Pijivajeite pimitajajeitanaque, pamaajeitanaque irosati anta quipatsiqui. ⁴⁴ Avirojei caari fotatsi pamaate, jero oca taavera, aisati carajayetaintsiri: irootaque pamaatanta-naqueeari.

Aitaque ocantacari, navisacojeitaji. Naatajeitapaaji anta quipatsiquinta.

Isavicajeitapaque Marataqui.

¹⁻² Naajeitantapaacari, ineshinoncatasanojeitavaquena yora savicatsiri. Icamantavaquena:

—Opajita oca ovoyejaca Marata.

Ari yoisavaquenaro paamari, icajemajeitaquena:

—Caate pimpoque aca, pintatapee paamarica.

Opariaque incani, ocatsincaiteanaque. ³ Yaayetapaaque Pavoro inchajempequi, aripati. Yoisapaquero paamariqui. Ocatsirincatanaque, irosati isoquijantanaca maranque, irosati yatsicantapaacari iracoqui, shepi. ⁴ Ineajeitatiiri itsatanacari iracoqui, icantava-aaajeitanaca:

—Iriitatsi oantatsiri. Ineacarove. Te intsiaveteaji anta incajarequi, iro cantaincha irineashiihetearota meeca.

⁵ Iro cantaincha itecanaqueri maranque paamariqui, teca, pomein; te inquematsicatariji. ⁶ Ijitashijeivetaca ari irishintsitanaqueme ireeretacaanaquerime; irishintsite

intaanaqueme, incamanaqueme. Osamani yamenashejeitaqueri, sorerere. Ineaqueri tecatsi oaquerine. Impoiji iquenqueshirejeitanaja aisati, icantajeiti:

—Iriotaque tasorentsitsatsiri caari icamanta.

⁷ Ainiro quempeji ora iipatsite yora pincatsariventiriri savicajeitatsiri. Ipajita Povirio. Yaacameetsajeitavaquena. Ocarataque mava quitaiteri cameetsa ineshinon-cajeitaquena. ⁸ Ainiro iponaaca iriri iriori imaamentoqui. Icatsirincataque, ishijat-aca. Iquivantaqueri Pavoro, iquenquetsatacaaqueri Tasorentsi, aisati yajiriquiri, yoav-isacotaqueri. ⁹ Imatantarori oca, ipocashijeitaqueri maaroni pashini mantsiajeitatsiri. Yoavisacojeitajiri. ¹⁰ Oshequi ipincatsajeitaquena savicajeitatsiri. Irotaintsi nojate, ipajeitavaquena paitarica coiteimotaquenari.

¹¹ Ari icarati mava cashiri, irosati notejeitantanaca pitotsiqui poneachari Arejantiriaqui. Otimantacari chapinqui antearo tampea, ainiro onaque pitotsi anta ovoye-jaqui. Ainiro isheroncayetiri anta otsoviqui, ishiacantaqueri tsipari. ¹² Naatapaaque Shiracosaqui, ocarati mava nomanaaque. ¹³ Novaanaja aisati, noshoncanajaro anta otsapijaqui, irosati Irequio. Oquitaitetamaque oponeanaca tampea irampatequi catsirinaciteri. Irosati oquitaitetamaque nareetantacari Posoriqui. ¹⁴ Noneapaaqueri ayemisantaririnte. Icoaque nosaviquimotanaqueri 7 quitaiteri. Novaanaja, irosati nareetantanaca Oromaqui. ¹⁵ Ari iquemacojeitavaquena ayemisantaririnte, irosati ipocashijeitantaquena, intonquiojeitavaquena. Osamani iponeayetanaca. Iponeanaca Jororeapioqui, aisati Tireshi Taverinashiqui. Pavoro, ineantacariri, ipasonquitaqueri Tasorentsi aisati iveshireanaca. ¹⁶ Nareetantacari Oromaqui, ishineyeetaqueri Pavoro isavicapaque ivancoqui iriori. Itsipatacari aparo soraro, ameniriri.

¹⁷ Mava imAAPAAQUE, impoiji icajemacantaqueri jivayetiriri joriopee. Yapatojeitanacari, icantaqueri Pavoro:

—Noncamantajeitempi, noshaninca. Te noncantimateriji ashanincabee arori. Aisati tecatsi noncantacotero oca yamejeiveitaniri ashanincani peerani. ¹⁸ Iro cantaincha yoisoyeetaquena anta Jerosarequi, icantiri oromasati: “Payeri yoca”. Isampitacoven-taquena pincatsari, impoiji icoaveta iroimisoquijacantajename. Iotaque tecatsi nanteri noncamanteari. ¹⁹ Iro cantaincha ipiatsatavacari joriopee, irootaque naventantacariri Sesari. Tecatsi noncantimateri ashaninca. ²⁰ Irootaque nocajemacantantaquemperi, no-quenquetsatacaaajeitaquempi. Peerani aamaajeivetacari Quirishito impocanteari. Meeca nocamantajeitiri ashaninca yareetaita, irootaque yoisoyeetantaquenari carenatsaqui.

²¹ Yacajeitanaqueri:

—Tecatsi noneero sanquenarentsi poneachane Joreaqui, quenquetsatacotempineri. Aisati te intimeji ashaninca cantacotempineri. ²² Iro cantaincha nocoajeitaque pin-camantena paitarica piquenqueshireyetiri. Onashitaca oca piquemisantiri: niotaque oshequi iquishimentajeitacaro anta maaroni nampitsipeequi.

²³ Ari iotacaajeitaqueri jaoca oncarate quitaiteri incantavacaimentajeitanteorori. Ari oshequi ijajeitanaque ivancoqui. Icamantasnotavaqueri jaoca icanta Tasorentsi ipincatsariventanti. Intamanacaro, irosati itsitenitacotanaquero. Icoaque iriota-caasanotaqueri isanquenatacotiri Moishishini, jeri maaroni camantantatsiniri: tempa isanquenatacotiquer Jesoshi. ²⁴ Iquemisantaqueri aparopee, itseencaqueri pashini. ²⁵ Ipiatsatavacaanaca, impoiji iteentareavacaanaca. Icantaque Pavoro:

—Queario oca ocantaqueri Ishire Tasorentsi. Osanquenatacaaqueri Isayashini, camantantatsiniri. Isanquenataqueneri iriori ashanincani. ²⁶ Icantini: “Pijate anta joriopeeque, pincamantapeeri: ‘Otimaveta piyempita pinquemantameri, iro cantaincha te piotavaqueroji. Poquireavetanaja, pamenavetanaja, iro cantaincha te pamenasan-oteji’”. ²⁷ Te meeca aneeroji atiri iquenqueshireantari. Te inquemisanteji, te irameneji. Icantashirejeitaque: ‘Amenicari. Aquemisanticari. Ayotasanicoticari. Aquenqueshire-tacari. Avavisacotacari’”. ²⁸ Piojeitavaquero meeca: yoavisacotanti Tasorentsi. Meeca itianquiri quemisantatsiri iriotacaajeiteri pashinisati atiri. Inquemisantajeitavaque irinti.

²⁹ Iquemantavacarori joriopee oca icantaqueriri, ijajeitanaque, iquisatsatavacaajetanaca.

³⁰ Ocarati apite osarintsi isavicaque Pavoro pancotsineentsiqui, ipinataquero. Yaacameetsajeitaqueri maaroni quivantajeitiriri. ³¹ Icantani, icamantacotapinitiri Tasorentsi, jaoca ícantari iriori ipincatsariventanti. Icamantacotapinitaqueri Avincatsarite Jeso quirishito, te irimaneroji. Te intimeji tsaneacotearine iquenquetsati.

Narotaque sanquenatimpirori: *Irocashi*

YORA PAVORO ISANQUENATINIRI OROMASATI

Ivetsajeitari Pavoro quemisantajeitatsiri anta Oromaqi.

¹ እ Ainirompi oromasati? እ Tecatsimpa oajeitimpine? Narotaque Pavoro sanquenajeitimpiori oca. Itiancaquena Jesoquirishito nantaveetiniri. Icoacaaquena noncamantajeiteri atiri jaoca icantari Tasorentsi yoavisacotanti. Tecatsi pashini incoacayenari. ²⁻³ Tempa peerani icamantajeitaquerini Tasorentsi yora quenquetsatacotaqueriniri imponeaquea inquitequi Itomi, irantiritapaaque, iroavisacojeiteri maaroni caari cameetsajeitatsi. Icantiquerini irishanincatajeari Iravirini. Impoiji isanquenatacotaquerini yora quenquetsatacantatsiniri, irootaque otimantacari meeca irineane Tasorentsi. ⁴ Impoiji ipocaque Jesoquirishito aca quipatsiquica, yoyeetaqueri, impoiji itinaanaja. Ayojeitaque ainiro itasorenca, iriotaque itomi Tasorentsi, aisati quiso oaqueri Ishire Tasorentsi. Irootaque apincatsajeitantacariri. ⁵ Aquemisantaqueri, irootaque icavintsaajeitantaqueeri Tasorentsi, aisati itiancajeitantaqueeri anquemisantacaajeiteri maaroni itsipapee atiri. ⁶ Aisati avirorije, icoacaaquempi pishanincajeiteari Jesoquirishito. ⁷ Oshequi inintajeitaquempi Apa Tasorentsi, aisati maaroni itsipapee quemisantajeitiriri. Meeca nocoaque incanteani incavintsaasanojeitempi, aisati cameetsa irisavicacaajeitempi. Aisati inquempetacaajeitempi Avincatsarite Jesoquirishito.

Icantiri Pavoro: “Nocoaque nojate pinampiqui, noneempi”.

⁸ Meeca noncamantempi: jaocarica nojayetaqueri noquemacotapinitaquempi piquemisantasanojeitaque. Iquemacoeitaquempi maaroni atiripee, savicayetatsiri jaocaricapee, irootaque nopasonquitantacariri Tasorentsi, tempa narosati narori quemisantiriri Jesoquirishito. ⁹ Ioti Tasorentsi nocantapinitiri iramitacojeitempi. Noquearioventiniri nantaveetiniri, aisati nocantani noquenquetsatacotiri Itomi: nocamantajeitiri atiri jaoca icanta yoavisacotanti. ¹⁰ Aisati nocantiri Tasorentsi: “Nocoaque, Apa, pincoacayena nareejiteari oromasati”. ¹¹ Oshequi noquenqueshirejeitimpni noneajeitempi: nocoaque omatacaaajeitempi paitapeerica ora Ishire Tasorentsi, pinquemisantasanojeteariri. ¹² Aisati ariorica aneavacaajeitea aquemisantasanojeitaque, ari aveshireimentavacaajeitea. ¹³ Nocoaque piojeitero, noyemisantaririnte, oshequi nocoapiniveta nojatashijeitimpime, iro cantaincha te incoacayenaji Tasorentsi nojatashitempi. Nocoaveta namitacojeitempime, oquempetaca namitacojeitaqueri itsipapee ashaninca anta pashinipeequi nampitsi. ¹⁴ Nocoasanotaque nonquenquetsatacapinteri yora quereshiasati aisati yora itsipapee atiri; yora iovetachari aisati yora caari iotatsi. Tempa itiancaquena Tasorentsi nonquenquetsatacaajeiteri maaroni. ¹⁵ Irootaque nocoasanotantacari nonquenquetsatacaajeitempi ara Oromaqi aisati.

Icantiqueri pitarica inquenquetsatacoteri.

¹⁶ Te nompashiventeari nocamantajeitiri atiri jaoca icanta Quirishito icavintsaajeitaquee. Intasoncaventeri Tasorentsi maaroni quemisantajeiterineri, iroavisacojeiteri. Ijivataque iotaque jorio, iro cantaincha ocameetsati iriojeite meeca maaroni itsipapee atiri. ¹⁷ Pinequero, ariorica anquemisantasanoque, iroameetsajeitaquee Tasorentsi. Tempa peerani isanquenatacariri Tasorentsi yora Avacoconi: “Iroameetsajeiteri Tasorentsi maaroni quemisanterineri, cameetsa irisavicajitanteari anta inquitequi”.

Yora itsipapee atiri te iriojeiteriji Tasorentsi.

¹⁸ Itimi Tasorentsi inquitequi, iro cantaincha iotacaajeitaquee iquisaqueri maaroni caari quemisantiriri, aisati maaroni antapinitirori caari cameetsatatsi, aisati iriori yora maaroni caari coatsi inquemisantero oca cameetsatatsiri. ¹⁹ Incoajeitaquericame iriojeiteme jaoca icantari Tasorentsi, iriojeiteme. Te ompomerentsitimoveteariji, tempa yoamejeivetari. ²⁰ Peerani oconijataque maaroni yovetsicajetiriri, ayojeitancacari itimi

Tasorentsi, aisati otimi itasorenca. Conijatasanotaque. Tecatsi incantajeitea tseencantatsiri incantajeite: “Te niotacoteriji Tasorentsi”. ²¹ Tempa iojeivetari, iro cantaincha te impincatsajeiteriji. Icavintsaapinijeivetari, iro cantaincha te impasonquijeiteriji iriori. Te inquenqueshirejeiteaji: yatsipetashitacaro iquenqueshiretashitacaro paitapeerica; meeca te aneajeiteroji iotantari. ²² Icantajeiveta: “Oshequi nioti nainti”, iro cantaincha te iringotasanoteji. ²³ Icameetsatasanotaque inti Tasorentsi, icantani itimi inquitequi, iro cantaincha te impincatsajeiteriji atiripee. Jero ishiacantajeitaqueri tsimeripee, poshiniripee, maranquepee, maaroni: joo, irointi ipincatsatashitaro yovetsicashiyevertari.

Iroasanquetaajeiteri Tasorentsi yora caari joriotatsi.

²⁴ Oshequi icoajeitaque atiri iquenqueshiretapinijeitaquero caari cameetsatatsi, imayempitavacaapinijeita; icanti Tasorentsi: “Ari incanteata, eiro iquemitsi”. ²⁵ Ari peerani iosanojeivetari jaoca icanta Tasorentsi, iro cantaincha yamatavijeitaja irisati. Ipincatsatashijeitacaro maaroni yovetsicajeitiri Tasorentsi, iquemisantashijeitacaro. Irintuea yora vetcicajeitirori, te impincatsajeiteriji iriori. Tsame ainti aneacameetsajeiteri, ancantaitatiyempani. Tempa aitaque ancantajeiteari. ²⁶ Ari ishinetaqueri Tasorentsi yantanirojeitaquero paitarica icoajeitaqueri. Te oncoyeji tsinane aye ojime, irointi ocoaque otsinampairo otsinaneronte. ²⁷ Aisati iquempetaca shirampari: te incoyeji iraye ijina, irointi itsinampaapinitiri ishiramparirinte. Paitapeerica yantajeitaqueri, iro cantaincha te iringoteji impashiventea. Impoiji yoasanquejeitaqueri Tasorentsi, ineacarove.

²⁸ Ari te incoajeiteji impincatsajeiteri Tasorentsi, irootaque icantantari Tasorentsi: “Incanteata. Inquenqueshireterota caari cameetsatatsi, aisati eiro itimitsi cameetsa”.

²⁹ Imatapinijeitaquero caari cameetsayetatsi: yashi yoiro te incameetsajeiteji, ineveticari ishaninca yashiyetari, icoaque iroashinoncaayeteri itsipapee, iquisavacaajeitaca, yoavacaajeitaca, iquisatsatavacaajeitaca, yamatavitantapinijeiti, itsimaavacaajeitaca, yaamaacotavacaajeitaca, ³⁰ icantimatavacaajeitaca, iquisajeitaqueri Tasorentsi, icantimajeitaqueri ishaninca, inintajeitaja irisati, ishemejeiti, icoacoayetaque irantajeitero pashinipee caari cameetsayetatsi, ipiatsajeitacari ashijeitariri, ³¹ te aneajeiteroji iojeitantari, te inquemisantajeiteji, te irinintavacaajeiteji, te incavintsavacaajeiteji. ³² Iojeivetaro icantiri Tasorentsi: “Maaroni antapinijeitirori caari cameetsatatsi irijajeite Sharincaveniqui”, iro cantaincha itsataa yantashijeitacaro aisati yantacaajeitaqueri pashinipee.

2

Aisati iriori jorio, eiro yavisacotashijeitajatsi.

¹ Naamaaca itimi jorio cantatsiri: “Ineashiiteta carove intipee, te incameetsajeiteji”. Iro cantaincha noncamantempi; queariompa, ariorica pincantacoteri itsipapee atiri: “Ainiro yantane”, ainiro pantane avirori, piquempejeitacari yora picantacovetacari. ² Ayojeitaque ocameetsati iroasanquetaajeiteri Tasorentsi yora antirori caari cameetsatatsi. ³ Iro cantaincha avirori, picanti: “Ainiro irantanejei inti”, aisati piquempejeitacari, pantapinijeitiro avirori caari cameetsatatsi. ¿Pijitashitampa eiro yoasanquejeitimpitsi avirori Tasorentsi? ⁴ Pamene, oshequi ineshinoncajeitaquempi, icavintsaasanojeitaquempi, te intsipaite irishemempi: osamani icoavetaca pinquenqueshirejeitajeame, pojocajeitajerome caari cameetsatatsi pantajeitiri. Iro cantaincha, te pimajeiteroji.

⁵ Te pinquenqueshireteroji icantiri Tasorentsi, te pinquenqueshireempaji. Aiquero pijatati pantapinitaquero caari cameetsatatsi, irootaque iroasanquetimentempiri Tasorentsi. Queario, coajica inquisasanojeiteri maaroni antirori caari cameetsatatsi. Iro cantaincha ayojeitanaque icameetsatasanoti Tasorentsi, eiro iquisashitaritsi atiri, iotasanotaqueri maaroni, jaocarica icantajeitari. ⁶ Iroasanquejeiteri maaroni caari cameetsatatsi, irisavicacaajeiteri cameetsa anta inquitequi maaroni cameetsajeitatsiri.

⁷ Ariorica acoasanotaque aneajeiteri Tasorentsi aisati ancantaisatasanotanaque, aisati ancantaitatiyempani antime inquitequi, tsame anquearioventajeitero maaroni icoaaajeitaqueeri Tasorentsi. Impoiji irisavicacaajeitjee inquitequi, ancantaitatiyempani

asaviquimojeitajeri. ⁸ Iro cantaincha ainiro irinti caari cameetsatatsi, caari coatsi irittero icoacaavetariri Tasorentsi: icoashijeita irantapinitero caari cameetsatatsi. Ari inquisasanojeiteri Tasorentsi, iroasanquetasanojeiteri. ⁹ Irimoncaratavacaajeitea jorio aisati itsipapee atiri: ariorica incanteani irantero caari cameetsatatsi, ari irashinoncaajeitea, iroasanquejeiteri Tasorentsi. ¹⁰ Iro cantaincha maaroni antapinitirori cameetsatatsiri irineapajjeri Tasorentsi inquitequi, irineacameetsatavajeri iriori, irisavicacaa-jeiteri cameetsa: jorio, itsipapee atiri, maaroni. Amoncaratavacaajeitaquea. ¹¹ Yora Tasorentsi te irinashitacaajeitearij itsipasatipee atiri: ioti aquempetavacaajeitaca.

Timatsi iotaceaajeivetariri yora caari joriotatsi.

¹² Yora itsipapee atiri te irineeroji isanquenareni Moishishi, iro cantaincha ainiro yan-yetiri, aisati irijate Sharincaveniqui. Iro cantaincha eiro icantiritsi Tasorentsi: “¿Paita caari piquemisantantaro isanquenatiri Moishishi?” Iro cantaincha irinti iovetarori isanquenare ainiro yantayetiri, aisati irijate Sharincaveniqui; ari iroasanquetasanoteri Tasorentsi, incanteri: “Te pinquemisantasanojeroji oca isanquenatiniri Moishishini”. ¹³ Te irineacameetsatashteariji Tasorentsi quemashijeivetarori irineane, irintiquea ineacameetsatasanojeiti quemisantasanojirori. ¹⁴ Pameneri yora itsipapee atiri, piote jaoca icantajeitari. Te irineeroji Sanquenarentsi, iro cantaincha ainiro imayetaquero ocantayetiri. Pinequiero, iotashiyeta itimi cameetsa. ¹⁵ Ariorica irisavique cameetsa, ayojeitaque iovetaro iriori ocantiri Sanquenarentsi. Ainiro iquenqueshireantavetari: iojetaque ocameetsatirica yantajeitiri. ¹⁶ Coajica incanteri Tasorentsi yora Jesoquirishito: “Aviro iotirori jaocarica ocantari yantajeitaqueri atiripee, pitsotequiero maaroni iquenqueshirejtiri. Meeca aviro cantatsine jaocarica irijajeiteri. Aviro cantatsine ariorica aneacameetsateri, ariorica avashinoncayeri”. Irootaque nocamantajeitiriri narori, inquenqueshirejtanteari, iroavisacojeitantajeari.

Yora jorio iojeivetaro isanquenareni Moishishi: ariorica irantero caari cameetsatatsi, onti-masanote irantane.

¹⁷ Iro cantaincha, avirorica jorio, queariompa. Picanticari: “Niotiro nainti isanquenare Moishishi. Noshanincatasanotacari nanti Tasorentsi”. Pishematicari. ¹⁸ Piojetiro icoacaajeitaqueerri Tasorentsi. Peerani piovetacaroni Sanquenarentsi, irootaque piojeitasantavetacaroniri cameetsayetatsiri. ¹⁹ Meeca pijitashijeiveta pimatero piotacaajeiteri maaroni caari iojeitatsi. Oquempevetaca pintsiotacojeiterime maaroni timajeitatsiri tsiteniriqui. ²⁰ Piotacaajeiterime maaroni caari iojeitatsi, oquempevetaca poamejeiterime jananequipee. Queario piojeivetaro Sanquenarentsi, tempa cameetsa oamevetaqueMPI, te amatavitanteji. ²¹ Pamene, poamejeiterime itsipapee, iro cantaincha ¿paita caari piotanta avirori? Tempa oncameetsateme poametavacaajeiteame avirori. Jero picantajeitaqueri itsipapee: “Eiro picoshititsi”. Tempa picoshiti avirori. ²² Picantajeivetari: “Eiro paimentarotsi pijina”. Tempa paimentaro avirori pijina. Picantajeivetari: “Eiro picantirotsi povetsicane: ‘Irio Tasorentsi’. Caari oni”. Iro cantaincha ¿pipincatsatasanotirimpia avinti Tasorentsisanori? ²³ Pishemejeitaque, picantajeiveta: “Niotiro nanti irineane Tasorentsi”. Iro cantaincha terica pimoncarayeterojo ocan-tayetiri, tempa pitseencaqueri Tasorentsi. ²⁴ Jero oca isanquenayeetiniriri peeraniniri: “Ainiro yantayetiri ajorioririnte caari cameetsatatsi, irootaque icantimajeitantariri itsipapee atiri Tasorentsi, icantajeiti: ‘Te incameetsateji Tasorentsi, eiro aquemisantiritsi’”.

Jaoca icanta quemisantasanojatsiri.

²⁵ Pamene, ariorica piquemisantaquero irineane Tasorentsi, te pantsipetashiteaji pijoriotaque, tempa piotaqueri Tasorentsi. Iro cantaincha terica pinquemisanteri, patsipetashita pijoriotashiveta. ²⁶ Ariorica inquemisante caari joriotatsi, tempa irineacameetsateri Tasorentsi iriori. Inquempetacayeari jorio, quemisantatsiri iriori. ²⁷ Avirorica jorio, piovetarorica isanquenare Moishishi; iro cantaincha terica pinquemisantasanojero, ¿ocameetsatimpa? Teve, te oncameetsateji. Jeri yora caari joriotatsi: te irineeroji Sanquenarentsi, iro cantaincha ariorica irisavique cameetsa,

ari irimataquero icoacaaqueriri Tasorentsi. Tempa ocameetsatasanoti oca. ²⁸ ¿Jaoca icantari quemisantasanotatsiri? ¿Joriompa inajeiti? Teve. ¿Iriompa toyeantajeitachari? Teve, caari ini. ²⁹ Irinti quemisantincari yora quenqueshiretapinitiriri Tasorentsi. Te iro irineacameetsatimenteri itoyeanta, iointiquea ineacameetsatimentiri i quemisantiri. Eirorica ineacameetsatiritsi atiri, iointiquea Tasorentsi neacameetsaterine.

3

¹ Naamaaca picantaque: “¿Natsipetashitampa nojoriotaque? ¿Natsipetashitampa notoyeanta?” ² Te pantsipevetearoji pijoriotaque. Tempa irio jorio yoametiri Tasorentsi. ³ Queario, te inquemisantajeiteji maaroni, ainiro amatavyeterinemerri Tasorentsi. ¿Ar- iompa iramatavitaqueri Tasorentsi yora quemisantiriri? ⁴ Teve, eiro yamatavitiritsi. Ariorica iramatavitaquente maaroni atiri, iro cantaincha tecatsi incantea Tasorentsi iramatavijeitee inti. Tempa peerani isanquenatini Iravirini, icanti: “Otampaticatasan- otaque, Tasorentsi, pineane: te pintseeyaji. Tecatsi incantea atiri impiatsajeitempi”.

⁵ Naamaaca itimi cantashitachari: “Ariorica nantero caari cameetsatatsi, impoiji iriojeite noshaninca icameetsatasanotaque Tasorentsi, te inquempetenaji narori. Impoiji ariorica impincatsajeiteri. ¿Paita meeca inquisimentantearori Tasorentsi caari cameetsatatsi nantayetiri? Tempa irootaque irineacameetsatanteariri noshaninca”.

⁶ Teve. Te oncameetsateji oca yaamaayevetari. ¿Arimpa iramatavitaquee Tasorentsi? Icanti intianqueri antapinitirori caari cameetsatatsi Sharincaveniqui. ⁷ Pinequero, ¿ocameetsatimpa nontseeya niotacantearimeri atiri te intseeyaji Tasorentsi, impoiji impincatsateri? Impoiji oncameetsateme nontseeya, eirome iquishimentanarome Tasorentsi notseeya. Iro cantaincha, te oncameetsateji oca icantiri. ⁸ ¿Ocameetsatimpa antapinitero caari cameetsatatsi inquimoshiretanteeari Tasorentsi? Teve, eiro antirotsi. Ocameetsati intianqueri Tasorentsi Sharincaveniqui cantashiniroyetarori oca, aitanaquempaquea irineashiiteteartave coajicani. Iro cantaincha itimi cantacotashitarni: “Yoametiri Pavoro ashinanca yantiro caari cameetsatatsi”. Itseeyashita iriori.

⁹ Ari arojei jorio. ¿Ocameetsatimpa ancante: “Te incameetsajeiteji itsipapee atiri, aroquea ainti, acameetsajeiti”? Te oncameetsateji ancantero oca. Tempa amoncaratava- caajeitaca, ainiro antanejei maaroni: aroripee, aisati iriori itsipapee atiri. ¹⁰ Tempa aitaque ocanti Sanquenarentsi: “Te intimeji cameetsatatsineri, tecatsi catsini. ¹¹ Te intimeji coatsine iritoteri Tasorentsi, aisati te intimeji coatsine iritoteri icoacaaqueri. ¹² Iquishimanataqueri Tasorentsi, yantajeitiro caari cameetsatatsi. Te intimeji cameetsatatsine, tecatsi catsini. ¹³ Te oncameetsateji catsini iquenquetsatashiyetari. Oshequi itseeya. Oshequi catsini iquisatsajeitiri ishanincaphee. ¹⁴ Oshequi yoamaimanatiri ishaninca, iquisatsatapinijeitiri. ¹⁵ Aisati yoashiyetacari ishanincani, shemi, shemi. ¹⁶ Jaocarica ijayetaqueri, yoashinoncaayetaqueri ishaninca. ¹⁷ Te iritoteji catsini incavintsante, irineshinoncatante. ¹⁸ Te impincatsajeiteriji Tasorentsi”. Irootaque isanquenatacaaqueriniri Tasorentsi peeraniniri.

¹⁹ Ayojeitaque meeca irashinoncaasanotea maaroni iojeivtarori isanquenaren Moishishi. Iojeiveta paita icoacaaqueriri Tasorentsi, tecatsi incantajeite: “Te nioteji”. Tempa iroashinoncaajeiteri maaroni atiri antirori caari cameetsatatsi. ²⁰ Tecatsi incante atiri: “Nomajeitaquero maaroni ocantiri isanquenaren Moishishi, meeca irineacameetsatena Tasorentsi”. Teve, te irimateroji. Tempa irootaque Sanquenarentsi oamejeiteeri ainiro antane.

Yoavisacojeitaqueri Tasorentsi maaroni quemisantajeitaqueriri Quirishito.

²¹ Meeca noncamantempi: yora Moishishini aisati yora camantatatsiniri ica- mantajeitaquee jaoca ancanteari irineacameetsatanteeri Tasorentsi. Te incamanteeji amoncaratero Sanquenarentsi, ²² iointi icamanteeji ariorica aquemisantaqueri Jeso- quirishito, ineacameetsajeitaquee Tasorentsi. Aitaque amoncaratavacaajeitaca, aro- jeitaque jorio aisati itsipapee atiri: ²³ ainiro antajeitaqueri caari cameetsatatsi, maaroni. Te antajeiteroji cameetsayetatsiri icoacaajeitaqueerri Tasorentsi. ²⁴ Ariorica aque- misantaqueri Jeso quirishito, yoavisacojeitaquee Tasorentsi, ineacameetsajeitaquee.

Tempa ineshinoncajeitaquee: te inquenqueshireteroji aisati caari cameetsatatsi antajeitaqueri. ²⁵⁻²⁶ Itiancaqueri itomi, icamimentaquee, aparajatimentajeitaquee iriraja. Meeca, ariorica aquemisantaqueri, moncarataca, eiro iquenqueshiretajirotsi aisati antajeitaqueri. Aisati peerani, tequeratani impoqueni aca quipatsiqui Jesoshi, te iroasanquejeiterini Tasorentsi yora quemisantatsiniri. Iotitani coajica incamimentajeiteri iriori Jesoshi. Irootaque ayojeitancarai icameetsatasanotaque Tasorentsi aisati ineacameetsajeitaqueri maaroni quemisantajeitiriri Jesoshi.

Tecatsi ancantajeitea arori ashemete, te amateroji avavisacotajea arosati.

²⁷ Tecatsi meeca ancantea ashemete. Tecatsi ancantea aisati avavisacotajea arosati. ¿Paita caari amatantaro? Tempa irinti quemisantatsiri yoameetsatiri Tasorentsi. ²⁸ Pinequero, ariorica aquemisantaque, yoameetsataquee Tasorentsi. Te incantajeiteeji: “Pimoncarajeitero isanquenare Moishishi pavisacojeitajeari”. ²⁹ ¿Apanirompa yoavisacojeitiri Tasorentsi jorio? Tempa aisati yoavisacojeitaqueri pashinipee atiri aisati. ³⁰ Itimi aparoni Tasorentsi, icavintsaajeitaquee maaroni. Iotaque amoncaratavacaajeitaca. Ariorica inquemisante jorio, iroavisacoteri. Ariorica inquemisante itsipapee atiri, iroavisacoteri. ³¹ Ariorica aquemisantaqueri Jesoshi, ¿ocameetsatimpa ajocajero Sanquenarentsi? Teve, eiro ajocajirotsi. Ariorica aquemisantaque, irootaque amatantearori ocamantajeitaqueeri.

4

Ineacameetsataqueri Tasorentsi Avaramani.

¹ Piojeitaque jaoca icantaniri ashanincasanorini Avaramani. Meeca noncamantempi: ² te iroavisacotajeaji irisati. Iroavisacoteame irisati, irimaterome irishemeteme, incanteme: “Oshequi nocameetsataque, navisacotantajari”. Iro cantaincha tempa iotaque Tasorentsi te incameetsateji Avaramani. ³ ¿Paita ocantiri Sanquenarentsi? Tempa ocanti: “Iquemisantaqueri Avaramani Tasorentsi, irootaque ineacameetsatantarini”. ⁴ Noshiacantempiro: intimerica tsameetenerine ivatorote, tempa ocameetsati impinateri. ¿Ocameetsatimpa incanteri: “Jeri yoca, nompashitempuri”? Te oncameetsateji: tempa pomerentsitaca itsameetiniri. ⁵ Irinti Tasorentsi, inashita: eirorica amayetirotsi cameetsayetatsiri, iro cantaincha ashiretearirica, aitaque iroameetsajeitee. Eiro apomerentsivendaritsi ampinateri. ⁶ Pinequero, tecatsi antasanote iroameetsatanteeri Tasorentsi, iro cantaincha iriveshireacaajeitee, ariorica anquemisanteri. Tempa irootaque icantaqueniri Iravirini: ⁷ “Iquimoshirejeitaque maaroni atiri yora icavintsairi Avincatsarite. Eiro iquenqueshiretajirotsi aisati caari cameetsatatsi yantayetiri. ⁸ Queario, inquimoshiretasanotanaque, iotaque eiro iquishimentirtsii yantayetiri”.

⁹ Ari, ¿janica iquenquetsatacotiri Iravirini? ¿Apanirompa ajorioririnte? Tempa iquenquetsatacotiri aisati maaroni itsipapee atiri. Tempa ayojeiti inquemisantaque Avaramani, irootaque yoameetsatantariri Tasorentsi. ¹⁰ Iro cantaincha ¿jaoca icantacari yoameetsatantariri Tasorentsi? Tequerani irijorioteni, tequerani intoyeanteani. ¹¹ Pinequero, tequerani intoyeanteani ishiretarini Tasorentsi, yoameetsatantariri. Impojiquea itoyeantaca, iojeitancarai ishaninca ijivataque inquemisantaque. Meeca ayojeitaque aitaque inquempejeiteari iriori itsipapee atiri: eiro ijititsi ariorica intoyeantea irineacameetsatantariri Tasorentsi, irointiquea inquemisanteri. Tempa yora Avaramani iriotaque intasanotacarori inquemisanti. ¹² Aisati inquempejeiteari maaroni ashanicapee arori, ariorica inquemisante. Eiro ijititsi ariorica intoyeantaquea, ari iravisacotaje, irointi ocameetsati inquemisante iravisacotantajeari. Inquempeteari Avaramani, tequerani intoyeanteani peerani.

Jero oca icantiriniri Tasorentsi Avaramani.

¹³ Ari inquemisantaque Avaramani, irosati yoameetsatantariri Tasorentsi, impoiji icantacueri: “Nocoacaaquempi coajica pimpincatsaventajeiteri maaroni quipatsisati. Pincarajeiteri maaroni quempejeitineri piquemisanti, pimpincatsariventantajeari”. ¿Paita icantantarini oca? ¿Imoncarayetironimpa isanquenare Moishishi? Teve, tequerani ontimeni. Iro icantantarini, ishiretarini. ¹⁴ Irrioricame incanteme

yora coavetachari irimoncaraterome isanquenare Moishishi, iramataviterime Avara-mani. Tecatsime incanterime shiretariri. ¹⁵ Iroashinoncaajeiteri Tasorentsi maaroni caari moncaratiro isanquenare Moishishi, inquisaqueri. Iro cantaincha eiroricame otimime isanquenare, tecatsime inquishimenteemeri Tasorentsi. ¹⁶ Ariorica ashire-tacari Tasorentsi, tempa imoncarataquero icantaqueeri. Queario, ineshinoncajeita-queri maaroni quempejitariri Avarama. Te apaniro irineshinoncajeiteri jorio, irointi ineshinoncajeitaqueri maaroni quemisantatsiri. Tempa iriotaque Avarama intacarori iquemisantaque; ariorica aquemisantaque, aquempejitariri. ¹⁷ Tempa icantaquerini peerani Tasorentsi: "Aviotaque intasanotacarori, impoijiquea inquempejitempi oshe-qui itsipapee atiri". Iriotaque Tasorentsi quiso oaqueriri Avaramani. Aisati yoaneajiri camayevetainchari, tempa irisati timacaajeitirori maaroni aneajeitaqueri.

¹⁸⁻²⁰ Iotacotaca Avaramani yanteashipataque, irotimataintsai incame. Aamaaca ocarataque irosarintsite 100. Aisati iotiro ijina, shiravaro oni. Te intimeji itomi catsini, iro cantaincha icamantaqueri Tasorentsi: "Irishequianaje pishanincasanori". Te intseenqueriji Tasorentsi, irointi iquenqueshiretaquero icantaqueriri, iotaque queario icantaqueriri, irimoncarataquero maaroni. Tequerani intimeni ishanincani, iveshire-mentacari Tasorentsi, icanti: "Tempa icameetsataque Tasorentsi". ²¹ Iotasanolini ainiro itasorenca Tasorentsi, tecatsi pomerentsitimotearine; iotasanolini irimatero maaroni icantaqueriri. ²² Irootaque icantantacari Tasorentsi: "Ishiretaquena Avarama, irootaque noneacameetsatantariri". ²³⁻²⁴ Irootaque icantaqueriniri Avaramani, irosati meeca icantajeitaqueeri arori; ayojeitaque ariorica ashiretarri Tasorentsi, ineacameet-sajeitaquee, iquempetacaantajeitaquee te anteroji caari cameetsatatsi. Tempa iriotaque oitinaajiriri Avincatsarite Jesoshi. ²⁵ Otimi antajeitiri caari cameetsatatsi, irootaque icamimentantajeitaqueeri Jesoshi. Impoiji itinaanaja aisati, irootaque ayojeitancari maaroni ineacameetsajeitaquee, oquempetaca te antapiniteroji caari cameetsatatsi.

5

Ineacameetsajeitaquee Tasorentsi ayojeitancari antime inquitequi, ancantaitatiyempani.

¹ Ari icamimentajeitaquee Avincatsarite Jeso quirishito, yoavisacojeitaquee. Meeca ashirejeitacaro maaroni icantaqueeri Tasorentsi, irootaque ineacameetsajeitajeari, oquempetaca te anteroji caari cameetsatatsi; meeca yaacameetsajeitaquee, maaroni. ² Aquemisantaqueri Quirishito, irootaque icavintsantaqueeri Tasorentsi, icantatiani. Os-hequi aveshireimentacari, ayojeitaque aneajeitajeri anta ipincatsaritasanotinta. ³ Aisati, ariorica aquemaatsicatacaro paitapeerica, cameetsa aveshireimenteari Tasorentsi. Ay-jojeitaque ariorica aquemaatsicatacaro, yamitacotaquee amavetantarori, eiro asheman-tatsi. ⁴⁻⁵ Aisati ariorica ayoti amavetiro, yamitacotaquee Tasorentsi aquearioventaqueo antaveetiniri Tasorentsi. Ariorica aquearioventiniri paitapeerica, ayotanaque ashire-tacaro icantaqueeri, aisati ayotanaque te iramatavijeiteji. Tecatsi incantee iramatavi-jeitee, tempa quiso oajeitaquee Ishire, irootaque meeca inintasanojeitantaqueeri catsini. Aveshireimentacari.

⁶ Peerani ashinoncaasanojeitaca, tecatsi ancantea avavisacotajea arosati. Impoiji omoncaratantacari, ipocaque Quirishito. Te ampincatsaveteariji, iro cantaincha icamimentajeitaquee. ⁷ Ari te aneapiniteriji atiri coatsiri incamimenteri itsipapee cameetsatatsiri, iroavisacotanteariri. Iro cantaincha aamaaca itimi aparopee cami-mentiriri cameetsatatsiri. ⁸ Arojeiquea ainti, te ancemeetsajeiteji, iro cantaincha itiancaqueri Tasorentsi Itomi icamimentajeitaquee. Tempa irootaque ayojeitancari icavintsaasanojeitaquee, inintasanojeitaquee. ⁹ Aparajatimentaquee iriraja, icamimen-tajeitaquee. Meeca ineacameetsataquee Tasorentsi, oquempvetaca te anteroji caari cameetsatatsi. Coajica, inquisheri Tasorentsi maaroni antapinitirori caari cameetsatatsi, irompa ainti, aitaque iroavisacojeitaquee. ¹⁰ Peerani aquisaveitarini Tasorentsi, iro cantaincha icamimentajeitaquee Itomi, meeca aneacameetsataqueri Tasorentsi; aisati iriori, ineacameetsataquee. Meeca eiro icamajitsi aisati Jesoshi, irointi yaneasanotaji,

imatantarori itasoncaventapinijeitaquee meeca. ¹¹ Aisati ayojeitaque ariorica aque-misantaqueri Avincatsarite Jeso quirishito, ineacameetsajeitaquee Tasorentsi. Tempa irootaque aveshireimentantariri meeca.

Yantaqueri Aran aisati yantaqueri Jeso quirishito.

¹² Peerani intanacaro caari cameetsatatsi aparoni shirampari, yora Aran; irootaque icamantacari impoiji. Aisati aquempejeitacari arori, aisati iriori maaroni pashinipee atiri; antajeitaquero caari cameetsatatsi: ashi avajeitiro. Irootaque meeca acamane-jeitantari arori maaroni: ashi airo acamajeiti maaroni. ¹³ Peerani te ontimeni isan-quenareni Moishishi. Yantapinijeitaquero atirini caari cameetsatatsi, iro cantaincha te iritasanojeiteni paita icoacaasanotaqueriri Tasorentsi: pineaquero, te ontimeni irineane. ¹⁴ Iro cantaincha icamajeitaque maaroni atiri: yora Aran, iriotaque nijantaquerori, irootaque icamajeitacari maaroni impoitiriri itimi, irosati itimantacari Moishishi. Oamaajeitaqueri yantiniri Aran, te iro oamayerine yantayetiri iriori. Yora Aran ishiavetari pashini pocatsiri impoiji, ¹⁵ iro cantaincha inashita aisati. Otimi yantaqueri Aran icamajeitacari atiri. Iro cantaincha icavintsaasanojeitaquee Tasorentsi, te inquishimentasanoteeroji antayetiri, irootaque itiancantacariri yora impoitatsiri ipoqui: yora Jeso quirishito. ¹⁶⁻¹⁷ Oca yantaqueri Aran oamaajeitaqueri oshequi atiri, irointi oca yantaqueri Quirishito oaneajeitajiri oshequi atiri. Meeca icavintsaasano-jeitiri Tasorentsi oshequi atiri, te inquenqueshiretacotajeriji yantajeitaqueri, irointi ineacameetsajeitaqueri maaroni quemisantiriri Quirishito. Yoaneajeitaqueri maaroni, incantaitatiyempani irisavique inquitequi.

¹⁸ Yantaquero caari cameetsatatsi aparoni shirampari: yora Aran, irootaque aja-jeitanteameri Sharincaveniqui arori. Iro cantaincha ainiro yantaqueri pashini shirampari, yora Quirishito. Yoameetsajeitaquee irinti, asavicajeitajeari inquitequi, ancantaitatiyempani. ¹⁹ Te inquemisanteriji Aran Tasorentsi, irootaque caari acameet-sajeitanta. Iquemisantaqueri Quirishito iriri, irootaque yoameetsajeitaqueeri. ²⁰ Isanquenatacaaqueri peerani Tasorentsi Moishishi ayojeitacari te oncameetsateji catsini oca antajeitaqueri. Te ancameetsateji catsini, iro cantaincha oshequi catsini icavintsaajeitaquee Tasorentsi. ²¹ Ari te ancameetsajeiteji, irootaque acamajeitacari, iro cantaincha aquemisantajeitaqueri Avincatsarite Jeso quirishito, irootaque icavintsa-jeitajeriji Tasorentsi. Te inquishimenteeroji antajeitaqueri, irointi yoameetsajeitajee ancantaitatiyempani asaviquimojeitajeri anta inquitequi.

6

Ariorica avaotisajeitaja aquempetacantajeitaca atsipajeitacari Quirishito acamajeitaque aisati atinaajeitanaja.

¹ ¿Paita antajeiteri meeca? ¿Antapinijeitajerompa caari cameetsatatsi incavintsan-tapinijeiteeri Tasorentsi? ² Teve. Eiro catsini antapinitajirotsi aisati caari cameetsatatsi. Oquempetaca acamaque, eiro amatantaro antapinitajero aisati. ¿Paitasa, meeca, antapinitantajarori? ³ Ariorica aquemisantaqueri Quirishito aisati avaotisatimenta-jeitacari, oquempetaca acarajeitaqueri acamajeitaque. ⁴ Aisati oquempetaca acarajeita-queri atijajeitaca, aisati oquempetaca atinaajeitanaja. Meeca anashijeitaja, aquempe-jeitacari Jesoshi: icamaque, impoiji itasoncasanotajiri Apa Tasorentsi itinaantanajari aisati. Meeca inashitanaja, te inquempetajeoji peerani.

⁵ Ari piquempejeitacari Quirishito. Oquempetaca picarajeitaqueri picamajeitaque, aisati oquempetaca picarajeitaqueri pitinaajeitanaja: paneajeitanaji, iro cantaincha pinashijeitanaja maaroni. Te inquempeteoji Quirishito peerani; aisati avirorije, te pinquempejeiteoji peerani. ⁶ Peerani oshequi picoapinijeitini pantapinijeitironi caari cameetsatatsi, iro cantaincha oquempetaca pitsipatacari Quirishito pipajacojeitaca coroshipui, picamajeitaque: ¿paitampa pincoantajeari aisati pampiitajero caari cameet-satatsi? Peerani oquempetaca avirojei iratiritepee camaari, yantacaapinitaquempi caari cameetsatatsi; iro cantaincha meeca oquempetaca picamaque, tecatsi incantea

iromperanatajempi aisati. ⁷ Pinequiero, ariorica incamaque atiri, eiro itimitsi omperanajeitajearineri. Meeca avirori, eiro pantajirotsi meeca caari cameetsatatsi. ⁸ Ariorica picarajeitaqueri Quirishito picamajeitaque, ayojeiti pincarajeiteri aisati pisaviquimoteri anta isaviquinta iriori. ⁹ Ayojeitaque icamaque, aisati itinaanaja. Eiro icamajitsi aisati: tecatsi incantajea incamaque aisati. ¹⁰ Icamantacari Jesoshi, icamimentaqueero caari cameetsatatsi antajeitaqueri. Moncarataca: eiro icamajitsi aisati. Meeca aneanaji: quiso yoajiri meeca Tasorentsi, incantaitatiyempani. ¹¹ Aisati avirripee, piquempejeitaca picamasanojeitaque, eiro pantantajarotsi caari cameetsatatsi; iro cantaincha yoaneajitajimpi aisati Jeso quirishito, piojeitantajariri Tasorentsi.

Iquenquetsatacotiri pincatsatiriri camaari aisati pincatsatiriri Tasorentsi.

¹² Tempa oquempetaca picamaque: eiro meeca pantapinitajirotsi caari cameetsatatsi, eiro piquenqueshiretajirotsi. ¹³ Ari oquempetaca picamaque, eiro pishinetantajartsi meeca camaari irantacaapinitempiro caari cameetsatatsi. Aisati oquempetaca yoaneajimpi Tasorentsi, irootaque pishinetanteariri irantacayetempiro cameetsayetasiri. ¹⁴ Eiro meeca pantajirotsi caari cameetsatatsi. Te aneeroji peranatempsine pantero paitapeerica, irointi icavintsaajeitaquempi Tasorentsi, ineshinoncajeitaquempi. ¹⁵ ¿Paita anteri meeca? Ayojeitaque te ontameji peranajeiteene aisati ayojeitaque icavintsaapinijeitaquee Tasorentsi. ¿Ocameetsatimpa antashitapinitearo caari cameetsatatsi? Teve, te oncameetsateji. ¹⁶ ¿Janicampa pimpincatsatasanoteri? Ariorica pimpincatsateri camaari, irantacaapinitempiro caari cameetsatatsi, iro cantaincha impoiji pijate Sharincaveniqui. Iro cantaincha ariorica pimpincatsateri Tasorentsi, irantacaapinitempiro cameetsayetasiri. ¹⁷⁻¹⁸ Peerani pipincatsaveitarini camaari, meeca pipincatsatajiri Tasorentsi. Piquemisantajiro maaroni yoamejeitajimpiri iriori, irootaque nopasonquitantariri meeca. Pantapiniveitaroni caari cameetsatatsi, meeca pantapinitiro cameetsayetasiri.

¹⁹ Noncamantempiro piojeitanteorori, pinquemajeitanteorori. Oquempetaca peerani pipincatsaveitarini camaari pantantaroniri caari cameetsatatsi, ocameetsati meeca pimpincatsajeiteri Tasorentsi pantajeitanteorori cameetsayetasiri, pincameetsatasanojeitanteari. ²⁰ Peerani, pipincatsajeiveitarini camaari, te pimpincatsajeiterini Tasorentsi.

²¹ Iro cantaincha oshequi meeca pipashiventacaajaro pantajeiveitaniri: ¿paita impiatempimeri camaari? Pantajeiveitanarini, irootaque pijatanteameri Sharincaveniqui.

²² Meeca tecatsi incante camaari iromperanajeitajempi aisati: tempa meeca pipincatsajeitajiri Tasorentsi. Iroameetsajeitempi irinti, irisavicacaajeitempi inquitequi: pincantaitatiyempani. ²³ Pantapinijeivetacaro caari cameetsatatsi, pijajeitanteameri Sharincaveniqui. Iro cantaincha piquemisantaqueri Jeso quirishito, irootaque icavintsantaquemppiri Tasorentsi, irisavicacaajeitempi inquitequi, pincantaitatiyempani.

Ariorica aquemisanti, te omperanajeiteeji isanquenare Moishishi.

¹ Tequerarica, noyemisantaririnte, pinquemasanojeite. Avirojeitaque nojorioririnte, noquenquetsatacaaajeitiri. Ariorica incame ashaninca, tecatsi incantea inquemisantero icantavetacari Moishishimi. ² Noshiacantempiro oca. Ocanti Sanquenarentsi: "Ariorica aye tsinane ojime, quiso oanaqueri, irosati incamanteari. Te oncameetsateji ojocashitajeari". Iro cantaincha ariorica incamaque, te aneajeriji ojime. ³ Iro cantaincha ainirorica ojime, te oncameetsateji aimenteari. Ariorica incamaque ojime, ari ocameetsati aaje aisati pashini ojime, meeca quea te aimenteariji ojimeni. Tecatsi tsaneajearone aaje.

⁴ Aisati, noyemisantaririnte, icamaque Quirishito: aisati oquempetaca picarajeitaqueri, picamajeitaque. Meeca eiro operanatajimpitsi isanquenare Moishishi, tempa oquempetaca picamaque. Irointi yoaneajeitajimpi aisati Tasorentsi pimajeitanteorori maaroni icoacaajeitaquemppiri. ⁵ Peerani aquemisantaveitarini camaari. Acoapiniveitaroni antapinitironi caari cameetsayetasiri, ora itsaneapitsavetaqueeri Tasorentsi. Aitaque acantajeitaniri, antapinijeitironi, irootaque ajajeitanteameri Sharincaveniqui.

⁶ Iro cantaincha oquempetaca acamajeitaque. Eiro meeca aquenqueshirejeitajirotsi

icantajeitiri jorio, yamejeitari iriori. Meeca te antapiniteroji ocantiniri isanquenatiniri peerani, irointiquea antapinite ocoacaajeitaqueeri Ishire Tasorentsi.

Iquenquetsatacotaquero isanquenare Moishishi.

⁷ ¿Paita nocantajeitimpia? ¿Nocantimpima te oncameetsateji isanquenaren Moishishi? Teve, te noncantempiji. Eirome otimime, eiro niotime te oncameetsateji nantayetiri. Eirome ocantime: "Eiro pinevetarotsi yashiyetari itsipapee", eiro niotime te oncameetsateji. ⁸ Oamevetaquena te oncameetsateji nonevetearo paitapeerica, niovitaro; iro cantaincha aiquero nojatati nonevetasanotanacaro paitapeerica. Eirome otimime Sanquenarentsi, eiro niotime te oncameetsateji nonevetearo. ⁹ Peerani, tequerani nioteroni Sanquenarentsi, noquimoshiretashiveitani. Iro cantaincha impoiji oametaquena otimi nantane, irootaque noashiretacari. Niotanaque nojateme Sharincaveniqui. ¹⁰ Nojivetaca ariorica nanterome maaroni ocantiri Sanquenarentsi noncantaitatiyempani nontimeme inquitequi, iro cantaincha tecatsi noncantea nomatero. Oametaquena meeca otimi nantane, irootaque nojatanteameri Sharincaveniqui. ¹¹ Oshequi noquenqueshiretaquero caari cameetsatatsi, namatavitantajari narosati, irootaque caari nantantaro ocantiri Sanquenarentsi. Impoiji niotaque nojate Sharincaveniqui. ¹² Pineaquero, ocameetsataque isanquenaren Moishishi: irootaque irineane Tasorentsi, ocameetsatasanotaque.

Icantiri paita antapinitantarori caari cameetsatatsi.

¹³ Ari ocameetsati Sanquenarentsi, iro cantaincha ¿paita nojatanteameri Sharincaveniqui? ¿Irompa Sanquenarentsi jatacayenaneme? Teve, irointi nantaquero caari cameetsatatsi, irootaque nojatanteameri Sharincaveniqui. Tempa oametajana Sanquenarentsi te oncameetsateji catsini oca nantayetaqueri. ¹⁴ Ocameetsataque irointi, tempa irio sanquenatacantirori Tasorentsi; narori, te noncameetsateji nainti, catsini. ¹⁵ Te niotacoteaji narosati: nocoaveta nontimeme cameetsa, iro cantaincha, te nomatero. Nantapinitiro caari nocoasanoveta. ¹⁶ Niotaque te oncameetsateji oca nantayetaqueri, niotaque ocameetsati oca oametantiri Sanquenarentsi. ¹⁷ Te noncoaveteaji nantero paitapeerica, iro cantaincha nashi noiro te noncameetsateji, irootaque nantashitantarori. ¹⁸ Niotaque te noncameetsateji catsini. Ariorica nocoaveta nanterome cameetsayetatsiri, iro cantaincha te nomatero. ¹⁹ Te nantapiniteroji cameetsatatsiri nocoavetari nantemerri, irointi nantapinitiro caari cameetsatatsi caari nocoaveta nantero. ²⁰ ¿Paita nantashitantarori caari nocoaveta nantero? Aitaque nashi noiro te noncameetsateji, irootaque nantashitantarori.

²¹ Aitaque nocantani: nocoavetaca nosaviqueme cameetsa, iro cantaincha omapoc-aquena nantaquero caari cameetsatatsi. ²² Noquenqueshiretasanovetacaro irineane Tasorentsi, nocoasanovetaca nanterome icoacaquenari. ²³ Oshequi noashiretasanovetacaro catsini. Oshequi noquenqueshirevetacari Tasorentsi, nocoavetaca nanterome icoacaquenari. Iro cantaincha tecatsi noncantea nantero, irointi omapocaquena nantaquero caari cameetsatatsi. ²⁴⁻²⁵ Oshequi nashinoncaavetaca. Noquenqueshirevetacaro nanterome icantaquenari Tasorentsi, iro cantaincha nashi noiro te noncameetsateji. ¿Janica amitacotenaneri eiro nantapinitantajarotsi aisati caari cameetsatatsi? Iriotaque Avincatsarite Jesoquirishito amitacotenaneri. Irootaque meeca oshequi nopasonquitatariri Tasorentsi.

Amitacojeitaquee Ishire Tasorentsi.

¹ Ariorica anquemisantajeiteri Jesoquirishito, aisati antapinitero icoacaajeitaqueeri Tasorentsi, eiro yoasanquetaajeiteetsi. Eiro meeca antapinijetirotsi caari cameetsatatsi acoiri arori. ² Ari peerani nashi noironi nantapinitironi caari cameetsatatsi, nojateme Sharincaveniqui. Iro cantaincha noquemisantaqueri Jesoquirishito, oavisacotantanjanari Ishire Tasorentsi, oaneantajanari. Osavicacaajena coajica anta inquitequi, noncantaitatiyempani. ³ Pineaquero, tecatsi oncanterea oavisacojeitee isanquenare Moishishi: ashira te ancameetsateji. Te amajeiteroji ocantaqueeri. Iro cantaincha yoavisacojeitaquee

Tasorentsi, irinti. Itiancaqueri Itomi aca quipatsiqui, yatiritapaaque, iquempetasanota-paaquee arori, iro cantaincha te iranteroji caari cameetsatatsi. Icamimentaquee arori, ipashinitacaajee eiro aquempetantajatsi peerani. ⁴ Meeca, ariorica anquemisantero Ishire Tasorentsi, ari amataquero ocantaqueeri Sanquenarentsi. Peerani ashī aironi te ancameetsateji, te amateroni ocantaqueeri. ⁵ Yora caari cameetsajeitatsi iquen-queshiretapinitiro irantero caari cameetsatatsi. Iranti iotirori Ishire Tasorentsi icoaque irantero ocoacaqueriri iroori. ⁶ Ariorica anquenqueshiretero acoashiyetari arori, ajate Sharincaveniqui. Ariorica anquenqueshiretero Ishire Tasorentsi, ari cameetsa ancantaitatiyempani asaviquimojeiteri Tasorentsi. ⁷ Ariorica antayetero acoaqueri arori, atseencaqueri Tasorentsi: te ancoyeji antayetero icoacaajeivetaqueeri. Eiro amatirotsi.

Jaoca icanta yora caari cameetsayetatsi.

⁸ Te irineacameetsateriji Tasorentsi maaroni antayetirori caari cameetsatatsi. ⁹ Iro cantaincha avirojei avinti, te pinquempejiteariji iriori. Quiso oajeitaquempi avirori Ishire Tasorentsi. Yora caari quiso oi Ishire, te irioteriji Quirishito. ¹⁰ Oshequi pantaquero caari cameetsatatsi, irootaque pincamajeitanteeari, iro cantaincha pishan-incatacaririca Quirishito, yoameetsataquempi Tasorentsi, pincantaitatiyempani pisav-iquimoteri. ¹¹ Tempa yoitinaajiri Jesoshi. Meeca ariorica quiso oaquempi Ishire, irointi-naajeitajempi aisati, iroaneajeitajempi aisati. Iro irimatantajempiri pishiretacaro Ishire. ¹² Meeca, noyemisantaririnte, atsipetashitacaro aquemisantiri camaari, atsipetashitaro antiro caari cameetsatatsi. ¹³ Ariorica pantapinitero aisati, pijate Sharincaveniqui. Iro cantaincha ariorica pinquemisantero Ishire Tasorentsi, eiro pantajirotsi aisati caari cameetsatatsi, impoijiquea pisavique inquitequi, pincantaitatiyempani.

Itomintajeitari Tasorentsi maaroni quemisantiriri.

¹⁴ Maaroni quemisantirori Ishire Tasorentsi, iriojeitaque itomipee Tasorentsi. ¹⁵ Pamene, ariorica quiso oajeitaquee Ishire, arojeitaque Itomi. Te anquempeteariji iratiritepee, aisati eiro atsaroacaaritsi. Eiro aquempetajatsi peerani atsaroacaajeivatarini. Tempa queario, acantiri meeca: "Apa". ¹⁶ Ariorica ayotaque quiso oajeitaquee Ishire Tasorentsi, aisati oamejeitaquee, irootaque ayojeitancari itomintajeitaquee Tasorentsi. ¹⁷ Arojeitaquerica itomipee, ari impajeitaquee Tasorentsi maaroni ico-aaqueeri ontimimojeitee coajicani, anquempejiteari Quirishito. Meeca aitaque anquempejiteari aneacatsitaquearo paitapeerica, iro cantaincha coajica anquempejite-eari cameetsa asaviquimojeiteri Tasorentsi, aveshireimentajeiteari.

Coajica eiro aquenqueshiretajirotsi paitapeerica aquematsicavetacari meeca.

¹⁸ Coajica cameetsa catsini irisavicacaajeitee anta inampiqui, impoiji eiro aque-nqueshiretajirotsi paitapeerica aquematsicavetacari meeca. ¹⁹ Ayojeitaque maaroni catsini yovetsicajeitaquee Tasorentsi irisavicacaasanojeitaquee cameetsa, aisati im-peajeitajee pincatsaritajantsineri. Yaamaajeitacari maaroni catsini: "¿Jaoca oncarate intasoncaventajeitajeri maaroni itomipee?" ²⁰⁻²¹ Yatsipetashita itimayetaque maaroni yovetsicajeitiri Tasorentsi: icamapinijeitaque iriori poshiniripee, panquiresipee, maaroni; eiro anejajiritsi aisati coajicani. Tecatsi irantajeivetea icamajeitancari, irointi icamajeitancari otimi yantaqueri peerani Aran. Iotaque Tasorentsi coajica eiro oquempetajatsi meeca, irointi iroameetsatasanojeitajeri aisati, oquempetaca iroameetsatasanojeitajee arori: tempa arojeitaque itomipee maaroni. ²² Ayojeitaque icatsinatapinijeitini maaroni yovetsicane Tasorentsi, aisati icamajeitini: icantani, irosati meeca. ²³ Aisati arorijei quemisantatsiri, ashinoncaajeivetaca, ainiro aquemaatsica-jeitacari. Timatsi Ishire Tasorentsi, quiso oajeitaquee, amitacojeitaquee; iro cantaincha acoajeitaque inquempetacaantasanojeitee Tasorentsi itomi. Impoiji eiro aquematsi-catajarotsi paitapeerica, eiro acamajitsi. ²⁴ Ariorica ayotaque irimatero Tasorentsi icantaqueeri, aquemisantaqueri avavisacotantajari. Iro cantaincha tequera irimaterojo, tequera irimoncarajeiterojo maaroni icantaqueeri arori. Ommoncarataquearica, ¿arimpa ayeacotajero irimateero icantaqueeri? ²⁵ Ariorica ayotasanoque irimoncarateero icantaqueeri, cameetsa ayeacotero, eiro ashematsi.

Amitacojeitaquee Ishire Tasorentsi, ocantiri Tasorentsi iramitacojeitee.

²⁶ Te ayotasanojeiteji arori, iro cantaincha amitacojeitaquee Ishire Tasorentsi. Te ayotasanojeiteji anquenquetsatacayeri Tasorentsi cameetsa, iro cantaincha ioti irointi Ishire, ocantacoventajeitaquee; cameetsa catsini oquenquetsatacairy, eiro amatirotsi anquempetearo. ²⁷ Iotasanotaquee Tasorentsi, aisati iotaquero paitarica ocantiriri Ishire. Ariorica ocantacoventaquee, iotaque maaroni icoacaqueeri Tasorentsi.

Icoacaqueeri Tasorentsi.

²⁸ Ayojeitaque ariorica anintaqueri Tasorentsi, aisati ariorica antapinitaquero icoacaajeitaqueeri, irosati incanteani intasoncaventajeitaquee. Ariorica ompomerentsitimovetaquee, iro cantaincha eiro ishineteetsi avashinoncayea. ²⁹ Peerani catsini iotiteeni anquemisanteri, irootaque icantitananiri: “Incameetsatanaque quemisantenaneri, inquempejiteari Notomi”. Tempa iriotaque Itomi Tasorentsi yora Jesoquirishito. Iriotaque itomisanori peerani catsini, itimitani; impojeitajee itomintajeitajee arori, ashanincatavacaajeitajari. ³⁰ Peerani icantitani: “Nontomintajeitare”, impoiji itomintasanotaquee; impoiji aisati yoameetsataquee, iquempetacaantajee te anteroji caari cameetsatatsi. Aisati icanti: “Coajica cameetsa irisaviquimojeiten aca inquitequi”.

³¹ Tempa ocameetsajeitaque oca. Pinequero, itasoncaventasanojeitaquee Tasorentsi: ¿janica meeca oashinoncaajeitejene? Tecatsi catsini. ³² Te intsaneempariji Itomi, irointi itiancaqueri aca quipatsiqui icamimentajeitaquee. Tempa ayojeitaque aisati coajica impapinijeitee maaroni coiteimojeitaqueeri. ³³ Tempa icoyeajeitaquee Tasorentsi, iquempetacaantajee te anteroji caari cameetsatatsi: ¿janica meeca cantatsine ainiro antane? ³⁴ ¿Janicampa oashinoncaajeiteeneri? Tecatsi: tempa icamimentajeitaquee Jesoquirishito yoavisacojeitajee. Aisati itinaanaja, isaviquimotiri Iriri, icaratiri ipincatsariventajeitaquee, aisati icantacoventajeitaquee. ³⁵ ¿Janicampa jocacayerineri Quirishito inintajeitee? Tecatsi catsini. Intimerica oashinoncaajeiteeneri, quisajeiteneri; ariorica ompomerentsitimojeitee paitapeerica, ariorica ayee atashe, eirorica otimitsi anquitsaateari, ariorica antsaroacayearo paitapeerica, intimerica oayeteeneri; iro cantaincha icantani Quirishito, inintasanojeitaquee. ³⁶ Onquempetajea isanquenataqueroni peerani: “Noquemisantaquempi, Tasorentsi, irootaque isareantapiniyeetaquenari iroyeetena. Inquempetacaantena ovisha yoapiniyetiri”. ³⁷ Queario oshequi inintajeitaquee Quirishito, icantani: itasoncaventajeitaquee, irootaque aveshireimentasanojeitajacariri. ³⁸⁻³⁹ Queario, te intimeji jocacayerineri inintajeitaquee: eiro imatirotsi inampirepee Tasorentsi, camaaripee, pincatsaripee, jenoquisati, quipatsisati, maaroni yovetsicajeitaqueri Tasorentsi, eiro imatirotsi. Ariorica ancamaque, ariorica aneanaje, eiro imajeitirotsi meeca, aisati eiro imatirotsi coajica. Aquemisantaqueri Avincatsarite Jesoquirishito, meeca inintasanojeitaquee, aisati quiso yoajeitaquee maaroni.

9

Oshequi icavintsaaajeitaqueri Pavoro ijorioririnte.

¹⁻³ Oshequi noquenqueshireacotaqueri maaroni noshanincasanori, yora nojorioririnte. Queariotaque oca nocantaqueri, iotaque Quirishito te nontseeyaji. Aisati quiso o aquena Ishire, iotaquaquena queario nocantaque. Noashiretacotacari noshaninca, te inquemisanteri. Arioricame nomaterome noavisacoterime noshaninca, nojatetame Sharincaveniqui iravisacotantajeamer; nojatericame anta, eiro noneirime nainti Quirishito; pinequero, oshequi nocoaque iravisacojeitaje. ⁴ Ishanincajeitacari Ishirairini aisati itomintajeivetarini Tasorentsi. Ineajeitaqueri itasoncantaque, aisati iquemajeivetaroni icantavetariri, iojeivetaro Isanquenare Moishishi, iojeiveta jaoca incanteameri inquemisanterime, timatsi icashiacaajeitaqueriri, ⁵ iriojeitaque ishanincani yora intacaroniri peerani, iriojeitaque ishaninca Quirishito. Tempa iriotaque Quirishito Tasorentsi, ocameetsati ancantaitatiyempani aneacameetsajeiteri aisati ampincatsatasanojeiteri maaroni. Aitaque ancantajeiteari.

⁶ Iojeivetaro irineane Tasorentsi, iro cantaincha te inquemisantajeiteji. ¿Paita caari iquemisantajeitanta? ¿Yamatavitaquerimpas Tasorentsi? Teve, te iramataviteriji.

Pamene, maaroni ishanincani Ishirairi te inquempetasanojeiteariji: te inquemisantajeiteji maaroni.⁷ Aisati te inquempetasanojeiteariji Avaramani maaroni ishanincani. Tempa icantaquerini peerani Tasorentsi: “Irio pishanincatasanojeiteari maaroni ishanincani yora Isaca”.⁸ Meeca noncamantempiro oca ishiacantiri. Te intominteariji Tasorentsi maaroni ishanincani Avaramani. Apaniro ishanincajeitacari yora ishanincani Isaca. Tempa icantiri Tasorentsi:⁹ “Apanivaniji osarintsi ontimeri Sara otomi”.¹⁰ Otsipani osarintsi itimaque Isaca. Impoiji yantearitanaque, yaaque ijina, pajitachari Erevecia. Impoiji otsomontetaque, iriotaque tsipari.¹¹⁻¹³ Ainiroquera iriori otsomonteque iriniro, tequera iranterozi cameetsatatsiri aisati tequera iranterozi caari cameetsatatsi, iro cantaincha otimi icoacaitacariri Tasorentsi. Ari icantitaro Tasorentsi: “Yora jivatatsineri intime impincatsateri yora oijatapeerine”. Tempa irootaque oquenquetsatacotaquenir Sanquenarentsi: “Icanti Tasorentsi: ‘Nonintasanoteri Jacovo, irinti Esao eiro nonintasanotiritsi’”. Pineaquero, iotitani Tasorentsi icoacaitacariniri: impoiji imatacaqueri.

Jaoca icantiriri Tasorentsi jorio aisati itsipapee atiri.

¹⁴ ¿Arimpa ancante: “Te oncameetsateji oca yantiri Tasorentsi”? Teve, eiro acantis. ¹⁵ Tempa peerani icantirini Moishishi: “Tempa narotaque cantatsine janicarica noneshinoncateri, aisati janicarica noncavintsayeri”.¹⁶ Te irio atiri cantatsine, irinti Tasorentsi. Ioti irinti janicarica irineshinoncatasanoteri. ¹⁷ Tempa peerani osanquenatacani icantiriri yora ivincatsarite ejipitosati: “Nompeajempi pincatsaritajantsine, iriojeitanteari atiri oshequi notasorentsitaque, aisati oshequi impincatsajeitantenari maaroni savicajeitatsiri”.¹⁸ Pineaquero, tempa irootaque cantatsine janicarica irineshinoncateri. Tempa aisati irootaque cantatsineri janicarica impeajeri tseencantatsineri. ¹⁹ Naamaaca meeca pincantena: “¿Arimpa? Queariorica picantaqueri, ¿paita inquishimentantenerori nantayetiri? Tempa nantayetaquero icoacaaquenari iriori”.

²⁰ Pamene, aviro atiri: te oncameetsateji pimpiatsateari Tasorentsi, oshequi ipincatsariti irinti. Noshiacantempiro coviti. Ocantirompa vitseirori: “¿Paita caari povetsicantana narori cameetsa?”²¹ Ora vitseirori, tempa irootaque coatsiri jaoca oncanterori quipatsi. Tempa ocameetsati ovetsicaque aparo cameetsatasanotatsiri, irointi otsipa eiro oameetsantiro. ²² Ariorica incoaque Tasorentsi, tempa ocameetsati iroashinoncaayeteri iisane. Tempa ocameetsati irootacaajeiteri atiri ainiro itasorenca. Iro cantaincha te iroashinoncaajeiteriji yora caari cameetsajeitatsi, irointi yamavetiro yantayetiri, icavintsaqueri. ²³ Irio icavintsaasanotaqueri yora jatatsineri inquiequi; icoacaaqueri iriojeite oshequi icavintsanti, aisati oshequi ipincatsariti. ²⁴ Arojeitaque icoyeajeitaqueri, ayojeitajajariri: jorio, aisati caari joriotatsi. ²⁵ Tempa peerani isanquenatacojeitaqueeni yora Oseashi: “Icanti Tasorentsi: ‘Caari inaveitani noshaninca, iro cantaincha meeca noshanincatacarri. Caari inaveitani nonintasanotiri, iro cantaincha meeca nonintasanotajiri’”.²⁶ Jero icantini: “Caari inaveitani noshaninca”. Irio iquenquetsatacotaqueri yora peajanchaneri itemipee Tasorentsi; tempa irio Tasorentsi aneasanotatsiri.

²⁷ Jero aisati oca isanquenataquenir Isayashi. Iquenquetsatacotaqueri joriopee: “Incarajeitaque ishanincani Ishiraeri oshequi catsini. Oquempetaca eiro amatirotsi iotero jaoca ocaratiri ovane impanequi, aisati iriori joriopee, eiro amatiritsi ayojeiteri maaroni, jaocarica incarajeiteri. Iro cantaincha eiro yoshequitasanotitsi avisacotajantsine”.²⁸ Coajica irimatero Tasorentsi maaroni icantaqueri: irimapocajeiteri maaroni tseencantatsiri, iroashinoncaajeiteri. Intsoteasanojeiteri, maaroni”.

²⁹ Tempa aisati isanquenatinii: “Eirome icavintsaajeiteeme Tasorentsi, eirome ishanincajeiteeme, tempa intsoncajeiteeme maaroni, anquempejeitearime yora soromasatini aisati yora comorasatini”.

Icamantiri paita caari iquemisantanta joriopee.

³⁰ ¿Paita aisati noncamantempi? Yora itsipapee atiri te incoajeiveiteani iroameetsateri Tasorentsi, iro cantaincha meeca iquemisantajeitajiri, irootaque yoameetsajeitajajariri. ³¹ Irinti yora joriopee icoajeiveta iriori irimayeterome icantayetiriniri Moishishini incameetsatanteameri, iro cantaincha te irimajeiterozi. ³² ¿Paita caari

yoameetsatantari Tasorentsi? Te inquemisantajeiteriji, irointi icoajeiveta irantero paitapeerica. Oshequi icomitacaro, te iriojeiteji inquemisanteri Jesoshi. ³³ Peerani isanquenatironi oca icantaqueniri Tasorentsi: “Nontiancaveteanari joriopee notomi, iro cantaincha eiro iojeitavaqueritsi. Oquempevetaca ariorica intsitinquearo mapi, impariaque; te iriojeiteriji Quirishito ini, irootaque iroashiretanteeari. Iro cantaincha eiro yoashiretsi irinti quemisanterineri, irointi iriveshireimentasanojeiteari”.

10

¹ Noyemisantaririnte, oshequi catsini nocoaque iravisacojeite maaroni nojoriorinte, oshequi nocantapinitiri Tasorentsi: “Pinquemisantacaajeitajeri noshaninca, iravisacojeitajeari”. ² Niotaque oshequi icoajeiveta inquearioventenerime Tasorentsi paitapeerica yantiniriri, irishintsiventeneri maaroni. Iro cantaincha te iriojeiteji paitarica icoacaasanojeitaqueriri. ³ Te iriojeiteji jaoca icantajeeri Tasorentsi yoameetsatantajeitajeri. Icoajeiveta iroameetsajeiteame irisati, te incoyeji iroameetsajeiteri Tasorentsi, irinti. ⁴ Pamene, ipocaque Quirishito, icamimentajeitaquee. Meeca, ariorica anquemisanteri iriori, iroameetsajeitajee. Atsipetashitacaro meeca antayetaquero icantiniri Moishishi avavisacotanteameri.

Jaoca ancanteari avavisacojeitajeari.

⁵ Peerani yora Moishishi iquenquetsatacotaqueri yora coatsiri irimoncarayetero Sanquenarentsi: “Intimerica coavetachaneri irimoncarayeterome iroameetsatanteameri, oncameetsateme irimoncarajeiterome maaroni, incantaitatiyempani. Eirome icomitarome catsini”. ⁶ Iro cantaincha ariorica aquemisantaji irootaque acameetsatantajari, eiro acantitsi: “Pomerentsitaca avavisacotaja. Tsame ajatashiteri Quirishito anta jenoqui, ameri aca iroavisacojeitajeeta”. Teve, eiro acantashitatsi; ⁷ aisati eiro acantashitatsi catsini: “Tsame ajate Sharincaveniqui, aintinaajeri Quirishito, iroavisacojeitajeeta”. Teve, eiro acantitsi catsini. Jampa tinaanaja ini peerani. ⁸ Ariorica aquemisantaque, aitaque avavisacotaca: eiro acoitsi amayetero pomerentsiyetatsiri. Tempa timatsi aca irineane Tasorentsi: te ompomerentsiteaji pinquenquetsatacoteri aisati pishiretearo. Irootaque oca nocamantapinitimpiri: pinquemisante paviscotantajeari. ⁹ Ariorica pincamanteri itsipapee atiri pipincatsataqueri Jesoshi, aisati ariorica pishiretearo yoitinaajiri Tasorentsi, aitaque paviscotaje. ¹⁰ Pinequero, ariorica ashireteari Tasorentsi, irineacameetsajeitee; aisati ariorica ancamanteri itsipapee atiri aquemisantaqueri Jeso quirishito, aitaque avavisacotaja. ¹¹ Tempa ocantini Sanquenarentsi: “Eiro ipashiventatsi yora quemisantatsiri”. ¹² Amoncaratavacaajeitaca: jorio aisati itsipapee atiri. Icarati Avincatsarite apaniro. Aventajeitacari, irootaque ipincatsariventajanteaqueeri, ineshinoncajeitantaqueeri maaroni. ¹³ Tempa aisati ocantini Sanquenarentsi: “Iravisacojeitaje maaroni aventajeitearineri Avincatsarite”.

Oshequi itseencantajeiti joriopee.

¹⁴ Eirorica iquemisantiri Tasorentsi atiri, *jaoca* incanteari iraventanteariri? Eirorica iquemacotiri, *jaoca* incanteari inquemisantanteariri? Eirorica itimitsi camanterine, *jaoca* incanteari inquemacotanteariri? ¹⁵ Eirorica itimitsi tianquerine camantantatsineri, *jaoca* incanteari irijatanteari? Tempa ocantini Sanquenarentsi: “Tempa oshequi aveshirementacari yora camantajeiteerori irineane Tasorentsi, tempa aneacameetsajeitiri”. ¹⁶ Iro cantaincha te inquemisantajeiteji maaroni. Tempa irootaque icantaqueniri peerani Isayashi: “Novincatsarite, nocamantajeivetacari, iro cantaincha icarati oshequi caari quemisantatsi”. ¹⁷ Eirorica icamanteeteetsi, eiro amatirotsi anquemisante. Tempa icamanteetaquee icamimentaquee Quirishito, yoavisacotantajeari.

¹⁸ Tempa iquemajeitaque maaroni joriopee. Queario, iquemajeivetaca. Jero ocantini Sanquenarentsi: “Ijataque camantantatsiri maaroni quipatsiqui, iquemajeitaqueri maaroni savicajeitatsiri”. ¹⁹ Tempa iojeiveta jorio inquemisantajeite itsipapee atiri iriori. Aitaque icamantaquerini peerani Moishishi: “Icanti Tasorentsi: ‘Coajica pinquisaneenteri itsipapee atiri pitseencajeivetacari. Iro pinquisanteariri noavisacojeitajeri’”. ²⁰ Impoiji aisati isanquenatini Isayashi: “Icanti Tasorentsi: ‘Te incoavetenaji yora

atiripee, iro cantaincha iojeitaquena meeca: niotacaasanojeitaqueri. ²¹ Irinti yora jorioppee nocantapinivetacari, iro cantaincha ipiatsataquena, te incoyeji inquemisantena”. Irootaque isanquenatiniri.

11

Jaoca incanteari yora jorioppee.

¹ Naamaaca pisampitena meeca: “¿Ariompa? ¿Eirompa meeca yaacameetsatiritsi Tasorentsi maaroni jorioppee, yora itomintajeivetari?” Teve, eiro. Tempa narotaque narori jorio. Noshanincatacari Avaramani aisati Vejamini. ²⁻³ Narojeitaque jorio. Tempa peerani icoyeajeitaquena Tasorentsi, irosati meeca yaacameetsajeitantanjanari. Tempa piojeiti ocantini Sanquenarentsi. Oquenquetsatacotaquerini Iriashi peerani, iquenquetsatacairy Tasorentsi, icantiri: “Novincatsarite, teve incameetsajeiteji yoca nojorioririnte. Yoapinyetiri yora quenquetsatacotpimpri. Yojocacaayetajiri ishaninca inquemisantajeivetimpi. Meeca icoajeitaque iroyena narori. Apaniro noquemisantimpi nainti”. ⁴ Tempa piojeitaquero aisati ora yacanaqueriri, icantirini: “Timatsiquera 7,000 shirampari quemisantasananari. Te impincatsajeiteroji iriori ora Vari ijitasorentsiyeevetari”. ⁵ Aisati oquempetaca meeca. Timatsi aisati icoyeane Tasorentsi, ineshinoncajeitaqueri. ⁶ Pinequiero, ineshinoncajeitaqueri, te incanteriji irantero paitapeerica. Incanterime irantayeterome paitapeerica, te ireshinoncateriji.

⁷ Ari, ¿jaoca ocantari meeca? Icoajeivetaca irineacameetsajeiterime Tasorentsi, iro cantaincha, te. Ineacameetsayetaqueri aparopee: yora icoyeayetaqueri. Irintiquea itsipapee, te incoajeiteji inquemisante catsini. ⁸ Tempa aisati ocantini Sanquenarentsi: “Ipeapitsataqueri Tasorentsi iquenqueshireantavetari. Ineayevetacaro paitapeerica, inquemayevetacaro, iro cantaincha te inquemisanteji. Aitaque icantajeitani, irosati meeca”. ⁹ Aisati icantini Iraviri: “Iveshireimentavetacaro paitapeerica, iro cantaincha yamatavijetaja irisati. Impoiji incamajeite, irineacatsitimentajeitearo yantayetiri. ¹⁰ Eiro coajica otimitsi iotantari, eiro iojeitsi. Incanteani irashinoncayea”.

Jaoca icantari jorio aisati itsipapee atiri.

¹¹ Ari itseencajeitaque jorioppee: ¿inquisajeiterimpa meeca Tasorentsi? Teve, eiro iquishiritsi. Irointi yoavisacojeitaqueri itsipapee atiri incoanteari jorioppee inquempejeitajeari iriori, inquemisantaje. ¹² Itseencajeitaque, te incoajeiteji inquemisante, iro cantaincha yavisacojeitaji itsipapee. Coajica, ariorica inquemisantasanojeite jorioppee iriori, tempa aquiero irisatatiye inquemisantasanojeite aisati itsipapee iravisacojeitan-tajeari. ¹³ Te avirojei jorio. Piojeiti itiancaquena Tasorentsi noquenquetsatacajeitaque-mpi. Nocoasanataque nomajeitaquero icoacaquenari. ¹⁴ Nocoaque nonquenqueshire-tacaajeiteri aisati nojorioririnte, iravisacotaarantantajeari iriori. ¹⁵ Itseencajeitaque meeca, irootaque caari yaacameetsajeitantarri Tasorentsi; avintiquea yaacameetsajeitaquempi. Iro cantaincha coajica iraacameetsajeitajeri iriori, tempa oncameetsatasanotanaque. Irijajeiteme anta Sharincaveniqui oshequi, iro cantaincha coajica irija-jeite oshequi anta inquitequi. ¹⁶ Pamene, ineacameetsataquerini Tasorentsi Avaramani, tempa aisati irineacameetsateri ishanincani. Noshiacantempiro aisati inchato: ariorica ocameetsataque ovaritsa, tempa aisati ocameetsataque ojempequi iroori. Oquempetaca icameetsataqueni Avaramani, aisati inquempeteari coajica ishanincani, incameetsajeitanaque.

¹⁷ Meeca noshiacantempiro inchato pajitachari orivo. Ocameetsataque ovaritsa, iro cantaincha te ontameji oitsoqui ojempequiqui. Irootaque ipesanteetarori, yojoqueetajiro. Yaaque pashini ojempequi, irointi orivoniro. Ipatacaaqueri, irointiricampa timatsine oitsoqui. Iro ovaritsa shiocacayeroneri. Ora ojempequini oshiacantiri jorio; ora iroaquera ipatacaaqueri oshiacantaquempi avirorije, tempa avirotaque pashinisati atiri. ¹⁸ Meeca eiro pishemetitsi avirori: “Nocameetsati nainti, te nonquempeteariji yora jorio”. Pamene, te pintimashiteaji apaniro, eiro pimatirotsi apaniro. ¹⁹ Naamaaca picanti: “Yojocaqueri Tasorentsi jorio, quiso noyeri nainti. Tempa nocameetsatasanoti”. ²⁰ Queario, itseencaqueri, yojocantavetacariri. Piquemisantajeiti avinti, irootaque quiso

poajeitantzacariri. Pishematicari, pimpincatsatasanoteri. ²¹ Pamene, yojocaqueri iriori jivataintsiri, aisati avirori, yojocajimpicari.

²² Piojeitaque icavintsantaque Tasorentsi, iro cantaincha aisati yoasanquetaajeitaqueri yora antirori caari cameetsatatsi. Ariorica pincanteani pinquemisanteri, ari incanteani incavintsaajeittempi. Eirorica piquemisantasanotiri, irojocanajempi avirori.

²³ Aisati iriorije: ariorica inquemisantajeite, iraacameetsajeiteri Tasorentsi, tempa irlotaque Pincatsarisanori. Irlotaque cantacoventerineri jaocarica incantajeiteriri atiri.

²⁴ Peerani te piojeiveitearini, iro cantaincha meeca yaacameetsajeitaquempi. Ariorica inquemisante yora iojeivtariri, tempa aisati iraacameetsajeitajeri iriori.

²⁵ Noyemisantaririnte, timatsi noninti noncamantempiri caari piojeiveta. Iro noncamantantempirori te noninteji pishemete. Pamene, itseencajeiveta yora joriopee meeca, iro cantaincha eiro icantatiani. Ariorica omoncarataquea inquemisantajeite itsipapee atiri, ari omoncarataquea aisati inquemisantajeitaje aisati jorio. ²⁶ Queario iravisacojeitaje coajica, maaroni. Tempa peerani ocantini Sanquenarentsi: “Icanti Tasorentsi: ‘Irriorotaque yora oavisacojeiterineri, inquemisantacaajeiteri ishaninca, irojocacaajeiteri itseencanti. ²⁷ Nomoncarataquero coajica maaroni nocantitacariniri ishanincani peerani: noavisacojeiteri, eiro noquishimentiritsi caari cameetsatatsi yan-tajeitaqueri’”.

²⁸ Meeca iquisajeitaqueri, aisati itseencajeitaqueri; irootaque meecca yoavisacojeitan-taquempi Tasorentsi avinti. Iro cantaincha inintitarini yora intacantacariniri, aisati meeca inintajeitaqueri maaroni. ²⁹ Te iramatavitanteji Tasorentsi: eiro yaapitsata-jeerotsi paitarica ipajeitaqueeri, eiro yojocajiritsi yora icoyeaqueri. ³⁰ Peerani te pin-quemisanten, iro cantaincha itseencasanojeitaqueri jorio, irootaque icavintsaajeitan-taquempi avinti. ³¹ Meeca te inquemisanteji jorio, iro cantaincha coajica inquemisantaje aisati, inquempejeittempi avirori. Impoiji aisati incavintsaajeitajeri Tasorentsi, inquempetacaantajeitajempi avirori icavintsaajeitaquempi. ³² Icanti Tasorentsi: “Ainiro irantanejei maaroni atiri, iro cantaincha nocoaque noncavintsaajeiteri maaroni, noav-isacojeiteri”. ³³ Tempa oshequi icameetsataque catsini. Ainiro iotantari, oshequi ioti. Te amateroji ayotero iquenqueshiretiri iriori, te ayyeteroji yantayetiri. ³⁴ Tempa irootaque ocantiri Sanquenarentsi: “¿Timatsimpa iotirori iquenqueshiretiri Avincat-sarite? ¿Timatsimpa oametiriri yantayetantarori paitaricapee? ³⁵ ¿Timatsimpa pa-queriri paitaricapee ipinatantariri?” ³⁶ Pinequero, irlotaque vetsquirori maaroni. Itasoncaqueri maaroni, itimajeitantzacari. Tempa irlotaque ashijitariri maaroni tima-jeitatsiri. Tsame meeca maaroni ampincatsatasanojeiteri, ancantaitatiyempani. Aitaque ancantajeiteari.

12

Icantiri: “Pimpashinitanaje”.

¹ Noyemisantaririnte, tempa oshequi icavintsaasanojeitaquee Tasorentsi. Irootaque nocoacaasanotantaquempi eiro pantashitarotsi avirori paitapeerica, irointi pincanteri intianquempi irinti. Aneatsimpiquera, cameetsa pisavique iriveshireimentantempiri: irootaque icoacaaajeitaquerir maaroni quemisantajeitiriri. ² Eiro piquempejeitaritsi tseencantatsiri, irointi pushini pinquenqueshiretapinitaje. Piotasanotero icoacaaque-mpiri Tasorentsi: ocameetsatasanotaque. Ariorica pantapinitero oca, moncarataca: irineacameetsajeittempi Tasorentsi.

Icantiri: “Eiro pishemetitsi”.

³ Icantauena Tasorentsi: “Poamejeiteri oromasati”, irootaque nocamantajeitamtimpiori oca. Eiro pishemetitsi, eiro pijititsi panaacojeitaqueri itsipapee pipincatsariti. Pinquenqueshirejeitea jaoca picantari, piojeite imatacaaasanotimpircia Tasorentsi piquemisantiri. ⁴ Pamene jaoca acantajeitari: otimi aqui amenantari, ayempita aque-mantari, avante aneanatantari, aco ajiricantari, aiti anitantari, maaroni. ⁵ Aisati aquempejeitacari maaroni quemisantajeitiriri Quirishito: acarajeitaque oshequi, ashan-incatavacaajeitaca. Iro cantaincha onashiyetaca antajeitaqueri. ⁶ Tempa oshequi ineshi-noncajeitaquee maaroni. Imatacaaajeitaquee amayetaquero paitapeerica, iro cantaincha

onashiyetaca. Eiro aperaventarotsi amayetero. Ariorica irimatacaquempi pinquenquetsatacayeri pishaninca, pinquemisantasanote cameetsa pinquenquetsatacanteariri pishaninca.⁷ Ariorica irimatacaquempi pintacoteari itsipapee, ari pimatero cameetsa. Ariorica irimatacaquempi poametante, ari poametante cameetsa.⁸ Ariorica irimatacaquempi piveshireacaayeari itsipapee, ari cameetsa piveshireacaajeiteari. Aisati ariorica incantempi pimpashiyeteari ashinoncaincari paitapeerica, pimpasanoteri: eiro pimashitsatitsi. Ariorica pamitacoteri itsipapee, eiro piperataritsi. Ariorica pincavintsayeri, ari pinquimoshiretasanotanaque.

⁹ Pinintasanojeiteri pishaninca, eiro picantashitaritsi: “NonintaqueMPI”, irointi pinintasanoteri. Eiro catsini picoirotsi caari cameetsayetatsi, irointi pincoasano-taque pantayetero cameetsatasanotatsiri.¹⁰ Pinintasanotavacaajeitea maaroni: tempa piquempetavacaajeitaca, piquemisantajeiti. Pincoasanojeite piveshireacaajeiteari itsipapee.¹¹ Eiro piperatatsi, irointi pincoasanojeite pishintsiventeneri Avincatsarite maaroni incoacaajeitempi. ¹² Piojeitaque irimataquempiro Tasorentsi maaroni icantaquempi: meeca piveshireimentearo. Ariorica ompomerentsitimotempi paitapeerica, eiro pishemarotsi. Pincanteani pincanteri Tasorentsi: “Pamitacotena”.¹³ Pimpapiniteri piyemisantaririnte coiteimotariri. Pincavintaapiniteri neajeitim-piri.¹⁴ Pincanteri Tasorentsi incavintsaajeiteri quisajeitaquempi, eiro pipiataritsi.¹⁵ Ariorica inquimoshiretanaque pishaninca, pinquimoshiretasanotanaque avirori. Ariorica iroashiretea pishaninca, pinquenqueshireacoteri.

¹⁶ Paacameetsatavacaajeitea, maaroni. Eiro pitseencayetiritsi pishaninca. Eiro pipinquiritsi ashinoncaincari, irointi paacameetsateri. ¹⁷ Ariorica irantimotempi pishaninca caari pinintacairi, eiro piquishiritsi. Cameetsa pisavique iriojeitatem-piri atiri picameetsataque.¹⁸ Pincoasanojeite paacameetsajeiteri itsipapee, maaroni.¹⁹ Noshaninca, oshequi nonintajeitaquempi. Eiro pipiataritsi antanajeitaquempi. Irloquea irinti Tasorentsi oasanquetaajeiterineri. Tempa peerani icantini: “Noasanque-taajeiteri nainti, nompiaebari. Tempa naro pivincatsarite.²⁰ Ariorica ayeri quisaque-mpiri itashe, pimperi iroyea. Ariorica ayeri imire, pimpacoteri irire. Impoiji ariorica impashiventanaquea, eiroquea iquisantajimpitsi aisati”.²¹ Eiro pishinetaritsi caari cameetsayetatsi irantacayempiro paitapeerica, irointiquea pincavintsayeri, ponijayeri cameetsayetatsiri.

13

Ocameetsati ampincatsajeiteri pincatsariventajeiteeri.

¹ Pinquemisantajeiteri pincatsariventajeitiriri pishanincapee: tempa irio Tasorentsi nintacaquaqueriri ipincatsaritancari. Eirome inintacairime, eirome ipincatsariventan-time.² Yora piatariri ivincatsarite, aisati iquempetaqueri Tasorentsi, ipiatacari iriori. Tempa iriotaque nintacairiri ipincatsariventanti. Coajica iroasanquetaajeiteri maaroni piajeitaricari.³ Yora savicatsiri cameetsa te intsaroacayeariji pincatsari, irintiquea yora antapinitirori caari cameetsatatsi. Ari, eiorica picoitsi pintsaroacayeari pincatsari, pinte-time cameetsa; impoiji irineacameetsatemp. ⁴ Queario, inintacairi Tasorentsi ipincatsariventanti ontimanteari pisavicajeitanteari cameetsa. Iro cantaincha terica oncameet-sateji pantayetiri, ari pintsaroacaaqueari. Te irantsipetashiteaji ipincatsariventanti. Inintacairi Tasorentsi iroasanquetaajeiteri maaroni antirori caari cameetsatatsi.⁵ Te ancoyeji iroasanquetaajeitee Tasorentsi, aisati te ancoyeji anquenqueshirete, irootaque ocameetsatantari ampincatsateri avincatsarite.⁶ Irootaque aisati pipaarantantariri pincatsaripee pii requisite. Pipinataqueri irimatantearori inintacairiri Tasorentsi: ipin-catsariventajeitaquempi.⁷ Pimpajeiteri maaroni coiteimotacariri: pimperi quirequi, paitapeerica. Pinquemisantajeiteri aisati pimpincatsajeiteri.

Cameetsa anintavacaasanojeitea, maaroni.

⁸ Eiro pireviyetiritsi pishaninca paitapeerica, irointi pinintavacaajeitea. Ariorica anintavacaajeitea, ari amoncaratero isanquenayetiniri Moishishini, maaroni.⁹ Icantini: “Eiro paimentarotsi pijina, eiro paimentaritsi pijime, eiro poantitsi, eiro picoshititsi,

iero pinevetarotsi yashiyetari pishaninca". Oshequi aisati icantiniri. Impoiji aisati ican-tini: "Oquempetaca picavintsaaja avisati, pincavintsaajeiteri itsipapee, pinintajeiteri". Ariorica amajeitaquero oca, tempa amoncarataquero maaroni icantiniri. ¹⁰ Ariorica aninteri ashancapée, tecatsi ancantea ancantimajeiteri, amoncaratantearori maaroni icantiniri Moishishi.

Eiro osamanititsi impocashijiteajee Avincatsarite.

¹¹ Eiro osamanititsi impocashijiteajee Avincatsarite iraajeitanajee antsipajeitan-teariri. Peerani aquemisantacari, ajitashijieivetaca ari osamanitanaque. Meeca aamaajeitacari, irootaque ocameetsatantari antime cameetsa. ¹² Ariorica antapinitiro caari cameetsatatsi, oquempetaca ariorica atimaque tsiteniriqui, amanantarori antayetiri. Ariorica atimi cameetsa, oquempetaca atimaque quitaiteriqui, te am-pashiventacayearoji antayetiri. Ari meeca oshiyavetacaro irootajantsi quitaiteriri, tempa irotantsirica impocaje Avincatsarite iriori. Eiro antapinitirotsi meeca caari cameet-sayetatsi, irointi tsame antimajeite cameetsa. ¹³ Tsame meeca cameetsa antimajeite. Eiro antayetajirotsi caari cameetsayetatsi, eiro ashinquijeitajatsi, eiro antirotsi caari ai, eiro antiritsi caari ai, eiro aquisavacajatsi, eiro anevetasanotarotsi vaararontsi, ¹⁴ eiro antayetirotsi caari cameetsatatsi acoyetiri aisati aquenqueshireyetiri. Iroin-tiquea tsame ancanteri Avincatsarite Jesoquirishito intasoncaventajeteanteeri cameetsa asavicajitanteari.

14

Ocameetsati iraacameetsatavacaajeitea maaroni quemisantatsiri aisati caari quemisantajei-tatsi.

¹ Incoaquerica itsipapee quemisantatsiri incarajeitempi pinquemisantajeite, ari pa-a-cameetsajeitavaqueri. Tequerarica iriotasanoyetero maaroni icoacaajeitaqueeri Avincatsarite, iro cantaincha eiro picantavacaimenttarotsi ioyevetari iriori. ² Oquempetaca timatsi cantatsiri ocameetsati avajeiteari paitapeerica: ivatsa, maaroni. Iro cantaincha itimi caari iotasnotatsi: jivetachari te oncameetsateji ayeari ivatsa. ³ Ariorica pametari poapinitari ivatsa, eiro picantimatiritsi yora caari oari. Aisati, terica poapiniteari ivatsa, eiro picantitsi: "Te incameetsateji yora oariri ivatsa". Tempa iriojeitaque itomipee Tasorentsi, yaacameetsajeitaqueri iriori. ⁴ Tempa iriotaque Tasorentsi ivincatsarite. ¿Ocameetsatimpa pincante avirori: "Te incameetsateji yora, te inquemisanteriji ivincatsarite"? Tempa Tasorentsi cantatsineri irinti ocameetsatirica yantayetaqueri, aisati yamitacotaqueri imayetaquero cameetsayetatsiri. ⁵ Aisati itimi pashini cantat-siri: "Te omoncaratavacaajeiteaji quitaiteripee, anashitacaajeitearo aparopee quitaiterri anquemisantasanotanteariri Tasorentsi". Irio itsipa icanti: "Ocameetsajeiti maaroni quitaiteripee anquemisantanteariri, te onashiyeteaji". Ari ocameetsati piojite paitarica picoiri avirori, iro cantaincha eiro picantavacaimenttarotsi quitaiteripee. ⁶ Yora can-tatsiri: "Nonashitacaajaro aparopee quitaiterri noquemisantantajari", tempa icoaque impincatsateri Avincatsarite. ¿Paita antsaneacotanteariri? Yora pashini, yoari ivatsa, ipasonquitiri Avincatsarite, aisati ipincatsatiri. ¿Paita antsaneacotanteariri? Aisati yora caari oari ivatsa, ipasonquitiri Avincatsarite aisati ipincatsatiri iriori. Tempa aisati ocameetsati.

⁷ Te antimashijiteajji, eiro apincatsatajatsi arosati. Eiro acantitsi paitarica antayeteri meeca, aisati jaocarica oncarate anceme. ⁸ Meeca aneajeitatsee arori, cameetsa ampincatsajeiteri Avincatsarite, anteneri iriori maaroni icoacaajeitaqueeri. Iriotaque nintacayeeneri jaocarica oncarate anceme, iro cantaincha ancanteani ampincatsajei-teri. Icantani ipincatsariventajeteitiri aneatsiri aisati camaintsiri, maaroni. ⁹ Icoaque Quirishito impincatsariventajeteiteri aneajeitatsiri aisati camajeitatsiri, irootaque ica-mantacari aisati itinaantajari. ¹⁰ ¿Paita picantacotantacariri piyemisantaririnte: "Te incameetsateji"? ¿Paita pitseencantayetacariri? Eiro pipeacotarotsi oca: coajica ane-jeiteri Tasorentsi, impoiji incante irinti ocameetsatirica antajeitaqueri arori. ¹¹ Jeroca ocantiniri Sanquenarentsi: "Icantani Avincatsarite: 'Nocantani naneasanoti nainti, quear-iotaque oca noncamantemperi. Coajica intiyeroashijiteina atiri impincatsajeitena.

Incantajeitena: Picameetsataque' ". ¹² Queario, coajica aneajeiteri, aisati ancamanta-jeiteri maaroni antayetaqueri aca quipatsiqui, impoiji incantacojeitee ocameetsatirica antayetaqueri.

¹³ Ari meeca te oncameetsateji ancantacotashiteari ayemisantaririnte: "Te on-cameetsateji yantayetiri iriori". Queariompa, pantacairicari caari cameetsatatsi.

¹⁴ Yoametaquena Avincatsarite Jesoshi, irootaque niotantacari ocameetsataque maa-roni yoyeeyetari. Ocameetsati ayeari ivatsa. Iro cantaincha yora jitashitachari te oncameetsateji ayeari, ari eiro yoaritsi irinti; te oncameetsateji iroyeari. ¹⁵ Aisati avirori, ariorica poimoteari piyemisantaririnte ipinquiri iriori, aitaque poashireta-aaqueari: te oncameetsateji. Ariorica pinquenqueshiretacayeri, te pinintasanoteriji. Tempa icamimentaqueri Quirishito iriori, meeca eiro pitseencacairitsi. ¹⁶ Pijijeiveta ocameetsayetaque pantayetaqueri, iro cantaincha queariompa, icantimatimpicari itsi-papee. ¹⁷ Ariorica apincatsataqueri Tasorentsi, eiro aquenqueshireyetirotsi avayetari aisati irayetiri; irointi anquemisantero Ishire Tasorentsi ancameetsatanteari, asavi-canteari cameetsa, anquimoshirejeitanteari. ¹⁸ Ariorica cameetsa aquemisantaquero, ari cameetsa antaveeteneri Quirishito. Impoiji irineacameetsajeitee Tasorentsi aisati ashanincapee. ¹⁹ Tsame meeca aacameetsajeiteri ayemisantaririnte, maaroni; aisati in-quempetee iriori, iraacameetsajeitee. Aisati avametavacaajeitea cameetsa anquemisan-tasanojeitanteari.

²⁰ Pioterica ari pojocacayeri pishaninca iquemisanti, eiro poimotashitaritsi ivatsa. Queario ocameetsati ayeari paitapeerica, iro cantaincha te oncameetsateji ajocacayeri ashaninca iquemisanti. ²¹ Te oncameetsateji pantero paitapeerica pojocacanteariri pis-haninca iquemisanti: eiro poashitaritsi ivatsa, eiro pirashitarotsi cachojar, paitapeerica, maaroni. ²² Ariorica piotaque ishinetaquempi Tasorentsi paitapeerica, eiro picant-apinijeitirts i yora caari ametaro, eiro picantavacamentarotsi. Ariorica piotas-anotaque ocameetsataque pantayetaqueri, tempa pinquimoshiretasotanaque. ²³ Iro cantaincha pijiterica te oncameetsateji paitapeerica yantayetiri piyemisantaririnte, eiro pantashitarotsi, otimicari pantane. Terica piole inintacaquempiro Tasorentsi pantero, te oncameetsateji pantashitearo.

15

¹ Pinequero, ariorica aquemisantasanoque aisati ayojeitaque ocameetsayetaque oca noquenquetsatacotaqueri, iro cantaincha ocameetsati anquenqueshiretacajeiteri yora caari quemisantasanotatsi, caari iotasanotatsi. Eiro antashitarotsi acoayevetari arori, ² irointi anquenqueshireacojeiteri ayemisantaririnte, inquimoshirejeitanteari iriori. Aisati amitacojeiteri iriotasanotanteari, inquemisantasanotanteari. ³ Tempa aisati iriori Quirishito, te irantashitearoji icoavetari iriori. Tempa isanquenatacotirini peerani: "Yora Quirishito icantiri iriri: 'Iquisajeitaquena maaroni quisajeitaque-mpiri avirori' ". ⁴ Itimacaqueero Tasorentsi maaroni isanquenarenari peeraniniri ayojeitanteorori cameetsayetatsiri antayeteri, amavetanteorori anquematsicayetearo paitapeerica, aveshireimentanteeariri Tasorentsi, aisati ayotasanolanteari coajica antime cameetsa anta inampiqui. ⁵ Tempa yamitacotapinijeitaquee amavetantarori aquematsicayetacari paitapeerica, aisati yoveshireacaajeitaquee. Nocoaque meeca iramitacojeit-tempi paacameetsatavacaajeitea. Irootaque icoacaajeitaquempi aisati Jesoquirishito. ⁶ Impoiji amoncaratavacaajeitea ancantajeite: "Tempa icameetsataque Apa Tasorentsi aisati Avincatsarite Jesoquirishito". ⁷ Tempa yaacameetsajeitaquee Quirishito. Meeca pinquempejeiteari, paacameetsatavacaajeitea maaroni, impoiji irineacameetsajeiteri atiri Tasorentsi.

⁸ Peerani ipocantacari Quirishito aca quipatsiqui, intacojeitacari ijoriorintepee iojeitancari te iramatavijeiteriji Tasorentsi. Aisati iotacaajeitaqueri irimoncarajeit-ero maaroni icantaqueriniri ishanincani. ⁹ Aisati icoaque iriojeite itsipapee atiri ineshinoncaajeitaqueri, incantanteari iriori: "Tempa icameetsataque Tasorentsi". Irootaque ocantiniri Sanquenarentsi: "Noncamantajeiteri itsipapee atiri: 'Icameetsataque Tasorentsi, tsame ampampoyeaventajeiteri' ". ¹⁰ Otimi pashini Sanquenarentsi

cantatsiri: "Caarimpi pinajeiveta jorio, iro cantaincha pincarajeiteri iriori piveshireimentajeiteari Tasorentsi". ¹¹ Pashini aisati osanquenataca, ocanti: "Maaroni caari joriotatsi incantajeite: 'Tempa icameetsati Tasorentsi'. Irineacameetsajeiteri maaroni". ¹² Aisati yora Isayashini icantini: "Intime ishanincani Jese, impoque impincatsariventajeiteri itsipapee atiri, iriojeitanaque iroavisacojeiteri". ¹³ Tempa ayojeitaque irimoncarateenero Tasorentsi maaroni icantaqueeri. Piquemisantajeitaqueri, irootaque nocoantacari iroimoshirencajeitempi, cameetsa irisavicacaajeitempi. Impoiji ontasoncaventajeitempi Ishire Tasorentsi piotasanotanteari eiro yamatavitimpitsi Tasorentsi, intsoteaquempi maaroni icantaquempi.

Icantiri Pavoro: "Oshequi nocoaque nonquenquetsate".

¹⁴ Meeca, noyemisantarinte, niotaque picameetsajeitaque, aisati piotasanojeitaquero irineane Tasorentsi pimajeitantarori poametavacaajeitaca. ¹⁵ Meeca oshequi nosanquenajeitaquempi, noquenqueshiretacaquempi maaroni oca eiro pipeacotantarotsi. Queario, ineshinoncataquena Tasorentsi, ¹⁶ irootaque itiancantaque-nari nonquenquetsatacaajeiteri yora caari joriotatsi. Nocamantajeitaqueri atiri jaoca icanta Jesoquirishito yoavisacojeitantaqueeri. Impoiji oameetsatasanojeitaqueri Ishire Tasorentsi maaroni, aisati yaacameetsajeitaqueri Tasorentsi. ¹⁷ Irootaque noveshireimentantaquempi: icoyeaquena Jesoquirishito nocamantajeitaquempi jaoca icanta Tasorentsi. ¹⁸ Eiro noquenquetsatacoshiyetatsi paitapeerica, iotaquea nonquenquetsatacoteri imatacaaquenari. Ineajeitaquena itsipapee atiri, aisati iquemajeitaquena, irootaque iquemisantantaytariri Tasorentsi. ¹⁹ Otasoncacaquena Ishire Tasorentsi, nomayetantarori paitapeerica caari ineapiniti atiripee.

Ari noquenquetsatacaajeitaqueri atiripee anta Jerosarequi, osamani anta Iririaqui, maaroni nampitsipeequi. Nocamantajeitaqueri jaoca icanta Quirishito yoavisacotanti. ²⁰ Nocoasanotaque nonquenquetsatacaajeiteri yora caari iojeitiri Quirishito. Te noncoyeji nimpoitapeeri narori jivatatsiri iquenquetsatacairy. ²¹ Tempa ocanti Sanquenarentsi: "Inquemero yora caari quemaveitaroni; iringajeri yora caari ivoitarini". ²² Ari oshequi noquenquetsatacaajeitaqueri caari iotatsi, irootaque caari nareetanta aviroriqui. ²³ Iro cantaincha notsoteajeitaquero nampitsipee aca, noquenquetsatacaajeitaqueri savicayetatsiri, aisati oshequi osarintsi nocoaveta noneempime, ²⁴ irootaque nojatanteari coajica pinampiqui. Jaocarica oncarate nosaviquimojeitempi, impoiji nocoaque navisanaque anta Eshipaneaqui. Nocoaque aisati ponijayenaro jaocarica nonquenanteari.

²⁵ Iro cantaincha nintapaintearota nojatapainte Jerosarequi, naajeitajeneri ayemisantarinte ²⁶ iirequite ipacantiriri yora maseroniasati aisati yora acayasati. Yapatojeitiniriri ashinoncaincari quirequi. ²⁷ Aitaque icoaque irineshinoncajeiteri joriopee anta Jerosarequi. Te irishanincaveteariji, iro cantaincha tempa iriojeitaque intacariri icamantajeitaqueri jaoca incanteari iravisacotantajeari. Icantajeiti: "Tempa irio quemisantacaajeiteeri joriopee, irootaque ocameetsatantari meeca ancavintsaaajeiteri iriori. Ampajeiteri quirequi iramanantantearori coiteimotacariri". ²⁸ Ariorica nomappaqueri quirequi yapatojeitiniriri, ari nojate pinampiqui. Impoiji novaanajea, irosati Eshipaneaqui. ²⁹ Niotaque ariorica nareetapaaquempi nonquenquetsatacaapaaquempi piveshireimentasanotanteariri Quirishito.

³⁰ Meeca, noyemisantarinte, tempa aquempetavacaajeitaca aquemisantaqueri Avincatsarite Jesoquirishito, aisati oamejeitaquee Ishire Tasorentsi anintavacaajeitaca. Nocoaque meeca pincantajeiteri Tasorentsi intasoncaventantenari, ³¹ eiro yaantanatsi yora tseencantatsiri anta Joreaqui. Aisati pincanteri iroamejeiteri yora jerosaresati inquimoshireimentanteariri quirequi ipacantiriri iyemisantarinte. ³² Impoiji ariorica irinintacayena Tasorentsi, nareejitapaaquempi, oshequi nonquimoshiretapaaque. Impoiji oshequi aveshireacotavacaajeitea maaroni. ³³ Tempa isavicacaajeitaquee cameetsa Tasorentsi, maaroni. Nocoaque quiso iroajeitanaquempi. Aitaque incanteari.

¹ Meeca noncamantempi: coajica ojatashitempi oneempi ayemisantaroronte Jeve.

Oponeaca Senquereshiqui, anta oshequi intacojeitacari maaroni quemisantatsiri.

² Paacameetsajeitavaquero, tempa irootaque quemisantiriri Avincatsarite. Pintacojeitearo, pimpayetero maaroni coiteimotearoneri. Tempa intacojeitacari oshequi ayemisantaririnte; aisati narori, intacotapinitaquena. ³ Novetsajeitaro Pirishira aisati Aquira. Oshequi yamitacojeitaquena iriori nantaveejeitiniri Jeso quirishito. ⁴ Peerani irotaintsi iroyeetename, iro cantaincha oavisacotaquena Pirishira aisati iriori Aquira. Oavisacotantaquenari, irotaintsi iroyeeterome iroori, aisati ojime. Oshequi nopalsonquijetaquero: narori aisati maaroni ayemisantaririnte, yora caari joriojeitatsi.

⁵ Novetsajeitari maaroni quemisantapinitatsiri ara ovancoqui. Novetsatari aisati Epeneto, nonintasanotaqueri iriori. Peerani noquenquetsatacantariri yora acayasati, iriotaque jivataintsiri iquemisantaqueri Quirishito.

⁶ Novetsataro Maria, tempa oshequi intacojeitaquempi iroori. ⁷ Novetsajeitari noshaninca Antoronico aisati Joniashi. Peerani notsipajeitacari yoiminqueetaquena caravosouqui. Oshequi ineacameetsajeitaqueri yora itiancanepee Quirishito. Ijivajeitaquena narori, iquemisantitacani irinti peerani. ⁸ Novetsatari Ampiriashi, iquemisantaqueri Avincatsarite, oshequi nonintaqueri iriori. ⁹ Novetsatari Orovano, oshequi icara-jeitaquena noquenquetsatacotaqueri Jeso quirishito. Aisati iriori Eshitaquishi, novetsatari; oshequi nonintaqueri. ¹⁰ Aisati novetsatari Apereshi; yora Quirishito, oshequi ineacameetsataqueri. Novetsatari Arishitovoro, aisati ishaninca, maaroni. ¹¹ Novetsatari noshaninca Erorio. Novetsajeitari ishaninca Narishiso, yora quemisantiriri Avincatsarite.

¹² Novetsajeitari Tirijena, jeri Tirijosa, tempa irisati antaveetiniriri Avincatsarite. Aisati oquempetaca Pereshira, novetsataro. Oshequi nonintaqueri. ¹³ Novetsatari Irojo, yora quemisantasnotiriri Avincatsarite. Aisati novetsataro iriniro, oshequi intacotaquena noquempetacaantaquero iro ina. ¹⁴ Novetsajeitari Ashinquirito, Jereconte, Eremashi, Patorovashi, Eremeshi, jeri maaroni ayemisantaririnte tsipajeitariri. ¹⁵ Aisati novetsajeitari Jiroroco, Joria, Nereo, aisati iritsiro, ora Orimpashi, aisati maaroni quemisantajeitatsiri tsipajeitariri, maaroni. ¹⁶ Ariorica pineavacaajeitea, paacameetsatavacaajeitea, pinintavacaajeitea. Ivetsajeitimpi maaroni quemisantajeitiriri Quirishito savicajeitatsiri otsipapeequi nampitsi.

¹⁷ Meeca noncantempi, noyemisantaririnte: piojeiteri yora oamejeitiriri ayemisantaririnte icantavacaajeita, aisati piojeiteri antacairiri caari cameetsatatsi, jeri aisati cantimpipi: “Te oncameetsateji pinquemisantero oca yoamejeitaquempi”. Eiro pitsipajeitaritsi, eiro pojajeitiritsi. ¹⁸ Te iranteneriji irinti icoacaajeivetariri Avincatsarite Quirishito, irointi yantashijeitaro icoayetiri iriori. Cameetsa ineanaveta, iro cantaincha icoaque iramatavijeiteri caari timatsine iotantari.

¹⁹ Iojeti atiri piquemisantasnotaque, irootaque noveshireimentantaquempi. Iro cantaincha nocoaque piotasanojeite pantero maaroni cameetsayetatsiri; irointi caari cameetsatatsi, eiro pantimatirotsi catsini. ²⁰ Tempa Tasorentsi savicacaajeitimpipi cameetsa. Eiro osamanititsi iranaacotasanotaqueri Satanashi eiro yantacantajimpirotsi aisati caari cameetsatatsi. Nocoaque meeca irineshiloncaajeitempi Avincatsarite Jeso quirishito. ²¹ Ivetsajeitimpi Timoteo; itsipataquena nantaveejeitiniri Jesoshi. Aisati ivetsajeitimpi noshaninca Iroshio, Jaso, jeri Soshipatere. ²² Narotaque nainti Tereshio sanquenatiniriri Pavoro oca. Aisati narori, noquemisantiri Avincatsarite. Novetsajeitimpi narori. ²³ Aisati ivetsajeitaquempi iriori Cayo. Nosaviquimotiri aca ivancoqui. Aisati ipocapiniti quemisantayetsiri aca ivancoqui, oshequi yaacameetsajeitaquena, ineshiloncajeitaquena. ²⁴ Ivetsajeitimpi Erashito, yora quempoyeajeitiriri iirequite savicajeitatsiri aca. Aisati ivetsajeitimpi ayemisantaririnte pajitachari Coarato.

²⁵ Tsame meeca ampincatsajeiteri Tasorentsi. Iriotaque matacaaqueeri aquemisan-tasanotantacariri, ariorica ashiretasanojeitacaro oca noquenquetsatacotaqueriri Jeso-quirishito. Peerani catsini te iriojeiteni yora intacarori impoque Quirishito iroav-isacojeitee. Te incamanterini Tasorentsi, ²⁶ iro cantaincha meeca iotacaajeitaquee. Isanquenatacaaqueri yora camantantatsiniri peerani, aisati itiancajeitaquena narori nocamantajeitaqueri maaroni atiripee: “Ocameetsati pinquemisantajeiteri Tasorentsi”. Tempa ocameetsati anquemisanteri iriori, te incamaneteji irinti, icantatiani yanei.

²⁷ Oshequi ioti catsini irinti, apaniro ini. Tsame, maaroni quemisantajeitiriri Jeso-quirishito, ancantajeite: “Tempa icameetsatasanotaque Tasorentsi”. Aitaque ancanta-jeiteari, maaroni.

Narotaque sanquenajeitimpirori: *Pavoro*

IJIVATAQUE PAVORO ISANQUENAJEITAQUENERI CORINTOSATI

Yovetsajeitari Pavoro corintosati.

¹⁻² ¿Ainirompi, corintosati? ¿Tecatsimpa oajeitempine? Narotaque Pavoro sanquenajeitimpiori oca. Tempa icoyeaquena Tasorentsi, irootaque itiancantauenari Jesoquirishito, icoacaquena nonquenquetsatacoteri. Nocarataqueri aca Soshiteneshi nosanquenajeitimpido maaroni quemisantajeitatsiri ara. Piquemisantaqueri Jesoquirishito, irootaque yoameetsajeitantaquemppiri; meeca pishanincatacari Tasorentsi. Piquempejeitacari maaroni aventajeitacariri Avincatsarite Jesoquirishito, irootaque yoavisacotantacariri. Tempa meeca ashaincajeitacari maaroni quemisantajeitiriri, jaocarica isavicajeitiri. ³ Nocoaque irineshiloncajeitempi Apa Tasorentsi, aisati no-coaque cameetsa irisavicacaajeitempi. Aisati inquempejeitempi iriori Avincatsarite Jesoquirishito.

Iveshireimentajeitari Pavoro corintosati.

⁴ Piquemisantaqueri Jesoquirishito, irootaque ineshiloncajeitantaquemppiri Tasorentsi, irootaque meeca nocantantariri: “Ariove pimatacaajeitaqueri corintosati”. ⁵ Oshequi itasoncacoventajeitaquemppiri, cameetsa isavicacaajeitaquemppiri, iotacaasanojeitaquemppiro paitapeerica icoacaajeitaquemppiri. ⁶ Tempa moncarataca nocantajeitaquemppiri peerani: imajetaquemppiro Jesoquirishito maaroni. ⁷ Tempa iriotaque Avincatsarite: paamayeari, irosati impocantajeari. Tempa itasoncacoventajeitaquemppiri pimatantaracori pantiniri pitarica icoacaajeitaquemppiri, tecatsi coiteimotempine aisati. ⁸ Incantatatiyempani intasoncacoventasanojeitempi; impoiji, ariorica impocaje, irineacameetsajeitapajempipi. Eiro iquishimentapaimpirotsi pantayevetari. ⁹ Eiro yamatavijeitimpitsi Tasorentsi, tempa icoyeajeitaquemppiri pishanincatanteariri Itomi: tempa iriotaque Avincatsarite Jesoquirishito.

Icantiri: “Pinintavacaajeitea”.

¹⁰ Noyemisantaririnte, tempa apincatsajeitiri Jesoquirishito. Irootaque meeca nocantajeitantiempire cameetsa pinintavacaajeitea, eiroquea piquisavacaajeitatsi. Pinquempetavacaajeitea, eiro picantavacamentajeitarotsi paitapeerica. ¹¹ Irootaque nocantantimpiri oca icamantapaaquena atirite Coroe oshequi picantavacaajeitaca. ¹² Ainiro cantayetaintsiri: “Noquemisantiri narori Pavoro”. Pashini cantajeitantsi: “Irio noquemisantiri Aporo”. Pashini cantajeitantsi: “Irio noquemisantiri Sejashi”. Pashini cantajeitantsi aisati: “Noquemisantaqueri nanti Quirishito”. Irootaque nocantantimpiri: “Eiro picantavacaajeitatsi”. ¹³ ¿Itsipareacampa Quirishito? Te, apaniro ini. ¿Nopajacotimentaqueimpipa narori? ¿Pivaotisatimentaquinampa narori? Teve. ¹⁴ Meeca nopasonquitiri Tasorentsi te novaotisajeitempiji. Irinti apaniro novaotisataqueri Quirishipo, aisati Cayo. ¹⁵ Meeca tecatsi incantashiyeetea: “Novaotisatimentacari Pavoro”. ¹⁶ Aisati novaotisataqueri Eshitejana, aisati ishaninca. Te nonquenqueshireteri pashini novaotisataqueririca.

Iovetari atiri aisati ioyeriri Tasorentsi.

¹⁷ Te iro intiancantena Quirishito novaotisatante, irointiquea itiancantana nocamantacotiro cameetsatatsiri. Nocamantantirica, te noshemetsatacayeroji noneane. Noshemetsatacayerome, eiro ocameetsatime. Pijjeiticari icoacaquemppiri Tasorentsi piojeite oshequi paviscotantajeari. Tempa iriotaque Quirishito camimentajeitaqueeri, irootaque yoavisacojeitajeeri: irootaque irointi nocoaque niotacaajeitempi. ¹⁸ Ariorica acamantavetari yora jatatsineri Sharincaveniqui: “Icamimentaqueimpipi Quirishito coroshiqui, icoaveta iroavisacojeitajempime”, tempa ishirontimentajeitaquee. Iro cantaincha ainti, avavisacojeitaca, ayojeiti ainti ainiro itasorenca Tasorentsi imatantarori yoavisacojeitaquee. ¹⁹ Aitaque isanquenayeetini:

“Icanti Tasorentsi: ‘Nompeitajeri iotantavetari yora ioyevetachari. Nompeapitsatajera quenqueshireavetachari ora iquenqueshireantavetari’ ”.

Itsarojeitaqueri yora corintosati.

²⁰ ¿Jaoca incanteari meeca iotincari? Jaoca incanteari meeca oametantirori Sanquenarentsi? Jaoca incanteari aisati yora oametavacainchari? Tempa itseencaquero Tasorentsi maaroni iojeivetari atiripee. ²¹ Yatsipetashita atiri iojeivetaro paitapeerica: te iriojeiteriji Tasorentsi. Ioti irinti, irootaque icoantacari iroavisacojeiteri maaroni quemisantirori nocamantajeitaquerir. Iro cantaincha ishirontimentashitaquena tseencantsiri. ²² Icoaque jorio antasonqueneri paitapeerica iritanteari itsipataquee Tasorentsi. Yora caari joriotatsi yoametashitavacaapinitaro paitapeerica. ²³ Iro cantaincha nocamantiri atiri: “Icamimentaquee Quirishito coroshiqui yoavisacojeitaquee”, irootaque quisantaquenari jorio. Irinti caari joriotatsi, ishirontimentajeitaquena. ²⁴ Iro cantaincha itimi icoyeajeitaqueri Tasorentsi iroavisacoteri: jorio, aisati caari joriotatsi. Iotacaajeitaqueri iriori ainiro itasorenca Quirishito, iroavisacotantearir. ²⁵ ¿Paita itseencajeitantariri Tasorentsi? Tempa irio anaacotasanolantatsiri ioti. Tempa irisati anaacotasanolantatsiri ishuntsiti. Te aneeriji atiri quempetearine.

²⁶ Pinquenqueshireempa, noyemisantaririnte, jaoca picantajeitari. Oshequi itseencajeitaquempi pishaninca, icantajeiti: “Te irioteji quemisantatsiri”. Queario, te pimpincatsarijeiteji, aisati te pashitaranteaji, irootaque itseencajeitantzimpri. ²⁷ Ishirontimentajeivetaquempi atiri, te impincatsajeivetempiji, iro cantaincha icoyeaqueMPI Tasorentsi iroavisacojeitempi. Iriotacaasanojeitempi, impeajeitempi pincatsaritatsineri. Impoijiquea impashiventajeitaquea shirontimentajeivetimpiniri, tseencajeivetimpiniri. ²⁸ Icoyeasanotaqueri Tasorentsi yora caari pincatsatachane, yora ipiincayeevetari atiri, yora itseencajanayeevetari: irio itomintasanojeitari. Irintiquea yora pincatsarivetachari aisati iojeivetachari iroashinoncaajeiteri. ²⁹ Tecatsi meeca incantea atiri irishemetimoteari Tasorentsi. ³⁰ Piquemisantaqueri Jeso quirishito, irootaque yoaneajeitantaquempi Tasorentsi, irisavicaaajeitempi inampiqui. Tempa iriotaque Jesoshi iotacaajeitaqueeri, oameetsajeitaqueeri, shanincajeitaqueeri, oavisacojeitaqueeri. ³¹ Tempa aitaque isanquenayeetironi: “Eiro ashemetitsi, irointi aneacameetsatasanoteri Avincatsarite irinti”.

2

Jaoca icantari Pavoro icamantantapiniti.

¹ Nareetantapaquempi, noyemisantaririnte, nocamantacotapaquaqueri Tasorentsi. Te noshemetsataapeeroji noneane, te noametashiyetapeempiroji nioyerteri; apatiro noametapaimpiro icantiri Tasorentsi. ² Iotaca noquenquetsatacotapaquaqueri Jeso quirishito, icamimentajeitaquee coroshiqui. Tecatsi pashini nonquenquetsatacote. ³ Nopashiventashireavetapaaca, notsaroashireavetapaaca, nopioncapaaca. ⁴ Pamene, noquenquetsatacapaquaqueri aisati nocamantapaaquempi irineane Tasorentsi, iro cantaincha te noametashiyetapeempiroji nioyerteri. Iotacaasanoquempi Ishire Tasorentsi queariotaque irineane, aisati itasoncacoventajeitaquempi piotantarori queario noametaquempi. ⁵ Ora iojeitiri atiri, tecatsi oncantea oavisacojeitempi, irointi itasoncacoventaqueMPI Tasorentsi pavisacojeitantzacari.

⁶ Ariorica noametapinitiri quemisantasanolatsiri, queario notsoteaqueneri irinti noametasanojeitiri, niotaque iquemavaquero nocantaquerir. Iro cantaincha te noametashiteariji ioyerteri atiripee aisati ivincatsaritepee. Eiro oavisacojeitiritsi ora yoametavacaashiyetari. ⁷ Irointiquea noquenquetsatacoti ioyerteri Tasorentsi. Peerani imanavetacaro, te ayojeiveitearoni. Peerani, tequerani irovetsiqueroni paitapeerica, icantitani: “Nosavicaaajeiteri cameetsa aca nonampiqui maaroni yora pincatsajeitenaneri, coajica”. ⁸ Te iriojeiteroji peerani yora pincatsaripee. Iriojeitaquerome, eirome ipajacotirime Avincatsarite, yora cameetsatasanolatsiri. ⁹ Irootaque isanquenatacotitaqueeniri: “Timatsi yovetsicaqueri Tasorentsi. Te irineapiniteroji atiri, te inquemacotapiniteroji, te inquenqueshiretapiniteroji. Iro cantaincha yovetsiquiniri maaroni nintasanotiriri”.

¹⁰ Irootaque iotacaajeitaqueeri Tasorentsi ainti, iro vaajeerori Ishire. Iotasanojeitaquero maaroni Ishire, otsoteaquero maaroni iquenqueshiretaqueri Tasorentsi.
¹¹ ¿Janica iotirori iquenqueshiretiri ashaninca? Tempa apaniro iotiro irinti. Aisati oquempetaca, tecatsi ioterone iquenqueshiretiri Tasorentsi: apaniro ioti Ishire irointi.
¹² Pamene, te anquemisantashitearoji ioyetiri atiripee, irointi aquemisantaquero Ishire Tasorentsi. Irootaque ayotantacarori icoaque Tasorentsi irineshiloncajeitee, irisavacacaajeitee cameetsa. ¹³ ¿Piquemaquerompa nocantaquemperi? Te iriotojeri atiripee, aisati te iroamejeiteeroji, irointi oamejeiteerori Ishire Tasorentsi. Oamejeitaqueri yora otimantashiretari, iquemajeitantarori irinti. ¹⁴ Yora caari otimantashireta Ishire Tasorentsi, te inquemavaqueroji ocantayetiri, irointi ishirontimentacaro. Tecatsi incantea inquemero. Iro caari iquemantaro, te ontimantashireteariji. Apaniro iquemajeitiro otimantashiretasanotari, irinti. ¹⁵ Iquemajeitaquero iriori maaroni, iro cantaincha yora tseencantatsiri, tecatsi inquemasanote irinti. ¹⁶ Pamene, ¿timatsimpa iotirori iquenqueshiretiri Avincatsarite? ¿Timatsimpa materone iroameteri Tasorentsi? Te intimeji catsini. Iro cantaincha niotiro nainti iquenqueshiretiri Quirishito, tempa yoametaquena.

3

Iquisavacaajeitaca corintosati.

¹ Noyemisantaririnte, te noncantempiji quemisantirori Ishire Tasorentsi, ainti nocantaquempi caari quemisantiro. Piquempetaca iroaquera piquemisantaqueri Quirishito, piquempejeitaca jananequi. ² Irootaque noamejeitantimpiori peerani caari pomerentsitatsi: oquempetaca niraacaquempiro tsomitsi; te nompempiji ivatsa, tequera pimateroni. Irosati picanta meeca, te pimateroji. ³ Tequera pinquemisanteroji Ishire Tasorentsi. Ariorica pininatavacaajeitaca, aisati piquisavacaajeitaca, tequera pinquemisanteroji. Piquempetacari caari quemisantayetatsi. ⁴ Jero icanti aparo: “Noquemisantiri Pavoro”. Icanti pashini: “Noquemisantiri Aporo”. Tempa piquempejeitari caari quemisantatsi. ⁵ Pamene, ¿jaoca icantari Aporo? Aisati ¿jaoca nocantari narori picantavacamentantanari? Narojeitaque iveranaro Tasorentsi, quemisantacaquemperi. Nantiniri Avincatsarite icoacaquenari. ⁶ Oquempetaca nopenquitaquero narori oitsoqui. Irio saitacotirori Aporo. Irintiquea Tasorentsi shiocacaqueror. ⁷ Notsataaca nopenquitashitaro: tempa noquenquetsatacaajeitaquempi. Impoiji Aporo isaitacotashitaro: yoamejeitaquempi. Apaniro irinti Tasorentsi ishiocacairo: irio quemisantacaasanojeitaquemperi. ⁸ Aisati imoncararatavacaaca yora panquitirori aisati yora saitacotirori. Imoncaratiniri yora ashitarori panqurentsi ipinajeitiri. ⁹ Aisati oquempetaca, nomoncaratacari Aporo nantiniri Tasorentsi icoacaajeitaquenari. Avirojei pishiajeitaquero iroane Tasorentsi.

Aisati pishiacantaquero ivanco yovetsicaqueri. ¹⁰ Noshiacantaqueri iotasanolatsiri yovetsiqui pancotsi. Ineshiloncaquena Tasorentsi, irootaque ishinetantaquenari noatiaquero otincami. Ainiro pashini, ovaavaquerori. Ariorica yovaavaquero, iraamayearoya, icomitarocari. ¹¹ Iro otincami pancotsi oshiacantaqueri Quirishito, irio shiaquerori otincamisanori. Te intimeji pashini shiyerone otincami. ¹² Yora ovaavaquerori, ¿paita irovetsicantearori? Iroorica oro, iroorica perata, iroorica mapi maretatsiri; iroorica inchato, iroorica saveshi, iroorica compiroshi. ¿Ariompa onquisataque? ¿Eirompa quisotitsi? ¹³ Onconijatanaque coajicani yovetsicayetiri. Iriotaquero Tasorentsi, iriotasanotero. Ariorica ovetsicaquea pancotsi cameetsatasanotatsiri, eiro otaatsi; irompa ariorica ovetsicavetaquea caari quisotatsi, ario ontaaquea. Irineantearo Tasorentsi aisati maaroni antajeitaqueri, iriotanteari ocameetsatasanotirica. ¹⁴ Ariorica oncameetsatasanote antajeiteneriri, oshiaquero quisoyetatsiri avetsicantayetarori; ari cameetsa impinajeitee. ¹⁵ Terica oncameetsateji antayeteri, onquempetearo avetsican taro caari quisotatsi; ontaya irointi, oshiaquero tecatsi amatasanote. Ariorica avavisacotaja, iro cantaincha tecatsi timimoteeneri, onquempetimotaquee otaacojeitaque maaroni timimojeiteeri: apaniro ainti avavisacotaja.

¹⁶ Tempa arojeitaque shiaquerori pancotsi isavanticari Tasorentsi. Tempa aisati oquempetaca osavanticajeitaquee Ishire. ¹⁷ Eirorica picavintsairo isavanticari Tasorentsi, eiro aisati icavintsaimpitsi avirori. Ocameetsatasanoti isavanticari Tasorentsi: tempa avirojeitaque isavanticari. ¹⁸ Eiro pamatavitajatsi avisati. Ari picarajeitiri jivetachari iotasanolti paitapeerica. Te oncameetsateji irishemete. Ariorica irishemeventero ioyetiri, eiro iotacairitsi Tasorentsi. Iro cantaincha incanteririca: “Te nioteji, poametena”, ari iroametasanoteri. ¹⁹ Itseencaquero Tasorentsi maaroni ioyevetari atiripee. Tempa aitaque isanquenayeetini: “Yora tsimeripee ijivetaca tecatsi ayerineri, iro cantaincha omapocaqueri oashirentsii aavaqueri, oamaaqueri. Aisati iquempejeitaca maaroni shemetimentarori ioyetiri: irimapoqueri Tasorentsi, iroashinoncaajeiteri”. ²⁰ Aisati isanquenayeetini: “Ioti Avincatsarite te oncameetsateji iquenqueshireyetaqueri iotasanolvetachari”. ²¹ Eiro pishelementiritsi atiri, te oncameetsateji. Yovetsicajeitaquempiro Tasorentsi maaroni timayetatsiri poveshireimentantearori iroori. Irootaque nocantantimpri: ²² itiancaquena Tasorentsi namitacojeitantzempiri, aisati itiancaqueri Aporo, aisati Sejashi iriori, iramatacojeitantzempiri. Yovetsicajeitaquempiro maaroni timayetatsiri quipatsiqui, piveshireimentantearori. Aneatsimpirica, piveshireempa. Pincamaquerica, aisati piveshireanaquea. Piveshireimentearo timayetatsiri meeca, aisati timayetatsineri coajica. ²³ Aisati oquempetaca, pamitacojeitiri Quirishito, iveshireimentaqueMPI. Yamitacotiri iriori Tasorentsi, iveshireimentacari iriori.

4

¹ Meeca piojeitaquena narojeitaque iveranaro Quirishito. Itiancajeitaquena Tasorentsi novaaqueneri atiripee oca imanapitsaveitariniri peerani. ² Aitaque icoasanotaque ariorica novayempiro, eiro namatavijeitimpitsi. ³ Te oncanti-moneentimatenaji paitarica pincantacotashijeitenari, ainirorica nantane; aisati te oncanti-moneentimatenaji paitarica incantacotashijeitenari atiripee. Tecatsi nonantea noncantacotaja narosati: “Nocameetsati”. ⁴ Noquenqueshiretaca narori tecatsi nantane, iro cantaincha eiro nocantashitatsi: “Nocameetsataque”. Irintiquea Avincatsarite cantacotenneri irinti, nocameetsatirica. ⁵ Irootaque meeca noncamantantempirori: meeca te oncameetsateji ancantacotashiteari itsipapee: “Ainiro irantane”; coajicaquea ari ayotasanojeitanaque. Tempa impocaje Avincatsarite, inquitaitetacojeitapajero maaroni manavetachari meeca tsiteniriqui. Ironijayero paitarica acoasanojeitiri maaroni. Acameetsatirica, ari incantajeitee Tasorentsi: “Picameetsati”.

⁶ Pamene, noyemisantaririnte. Narosati quenquetsatacatacha, aisati noquenquet-satacotiri Aporo piojeitanteari eiro pipincatsatashitaritsi atiri. Ariorica pincante: “Nonintasanotiri aparo”, pitseenquicari itsipa. ⁷ ¿Paita pishelementiriri? Tempa Tasorentsi pashijeitimpiori maaroni timimojeitaquempiro. Meeca ¿paita pishelementatracari, oquempetaca te impashitempiro? ⁸ Piquempetacari ashitaarantachari: pijivetaca tecatsi coiteimotempine. Pijitashijeivetaca piotasanojeiti: te pincoyeji oamejeit-empineri. Pijitashijeivetaca pipincatsatasanotaque, pitseencaquena narori, piquempetacantaquena naro patirite. Ja, nocoavetaca pimpincatsaritasanojeiteme, antis-patavacyeame ampincatsariventantajeiteme. ⁹ Ari nocarajeitaqueri itsipapee itian-cane Tasorentsi, oquempetimotaquena ipeajeitaquena nampirentsii: itseencajeitaquena atiripee. Aisati oquempetaca isareetaquena iroyeetena; yamenashejeitaquena maaroni: inampirepee Tasorentsi, aisati atiripee. ¹⁰ Nopincatsataqueri Quirishito, irootaque picantajeitantanari: “Te pioteji”. Iro cantaincha piquemisantajeitaqueri avirori Quirishito, irootaque picantantari: “Niojeitaque narori”. Picantajeiti: “Tecatsi irimatimate iriori Pavoro, oshequi amajeitaque ainti”. Oshequi pineapincatsatashitaja avisati, nainti pitseencajeitaquena. ¹¹ Ari notasheapinitaqueri, nomiretapinitaqueri, noquitsaatsaratani nomaatsara, ipasanatapiniyeetanani, noquenaquenatapinitaqueri;

irosati meeca. ¹² Nocantatiani nopomerentsitapinitacaro nantaveeti. Ariorica iquisatsayeetaquena, nocantiri Tasorentsi: "Pineshinoncatajeri yora quisaqueunari". Ariorica iquisasanoyeetana, te nompiaeatariji. ¹³ Ariorica itseeyacoyeetaquena, cameetsa noneanatavaqueri. Queario, ipinqueetaquena, iquempetacanteetaquena cajara, ican-teeti: "Te incameetsateji Pavoro".

¹⁴ Te iro nosanquenatantempiro oca novashiventaa jeitempi, irointi noshiacantimpi notomipee nonintasanotiri; nocoaque noncavintsayempi, nonquenqueshiretacayempi.

¹⁵ Timatsi oshequi oamejeitimpri piquemisantiri Quirishito, iro cantaincha te intimeji oshequi ashitempineri. Pamene, nocamantajeitaquempiro oca cameetsatatsiri piquemisantacariri Jeso quirishito, irootaque apaniro nainti noshiacantantempi notomipee, nishintopee. ¹⁶ Irootaque nocantasanojeitantzimpri: "Pishiasanojeiten".

¹⁷ Notiancaquempi Timoteo, noshiacantaqueri iriori notomi nonintasanotiri. Iquearioventiniri Avincatsarite paitarica yantiniriri. Inquenqueshiretacayempiro jaoca ocantari nocamantacotapinitiri Quirishito, jaocarica anta yapatotimentariri.

¹⁸ Pishemetaarantaque, pijitaarantavetaca eiro nojatashitimpitsi narori. ¹⁹ Ariorica inintacaquaena Avincatsarite, nocoaque intsipaite nojatashijeitempi. Eiro noquemisan-tashitapaarotsi irineane yora shemetatsiri, irointi niotapaaque otimirica imatacaaqueri Tasorentsi. ²⁰ Ariorica ipincatsariventaquee Tasorentsi, eiro aneanatashiveeta, irointi amayetero icoacaaqueeri. ²¹ ¿Paita picoajeitaqueri? ¿Picoajeitaquempa non-quisatsajeitapeempi? ¿Irompa picoajeitiri nonintajeitapeempi, cameetsa noneshinon-cajeitapeempi?

5

Iconoayetacari quemisantatsiri caari cameetsatatsi.

¹ Icamanteetana picarajeitaqueri airori iashiane. Yaanirotajiro shirampari irinirotsori yaavetari iriri. Tecatsi quempetearineri: yora caari ioterine Tasorentsi te iraapiniteroji yaavetari iriri. ² Avintiquea pishemenirojeitaque. ¿Paita caari poashirejeitanta? Ariorica pampatotimentapiniteari Tasorentsi, eiro pishinetiritsi impocanirotapee iriori.

³ Te noncarajeivetempiji, iro cantaincha noquenqueshireacojeitaquempi. Oquempeti-motaquena ariorica nosaviquimojeitaquempime, nocantantempi te oncameetsateji

⁴ irantero iashiane. Itasorentsitaque Avincatsarite Jesoshi, irio matacaquaenorori nocantacoventantariri yoranqui. Ariorica pampatojeitea, piojeite noquenqueshire-jeitaquempi narori. ⁵ Pishineteri Satanashi iraanirotanajeri, iroasanquetayerita. Impoiji ariorica inquenqueshiretajea, ari iravisacotaje coajica impocajerica Avincatsarite Jeso-quirishito.

⁶ ¿Paita pishemenirojeitancari? Tempa piojeiti otimirica tapiacaarori tanta capichaji, omatasanotaquero maaroni tanta, otapiacaajeitacaro. ⁷ Pojocajeri yora noshiacantimpi tapiacaarori tanta, pinquempejeitleanorori tanta iroquerari, caari tapiacha. Eirorica pojoquiri, iquempejeitaricari iriori itsipapee quemisantatsiri. Pine-aquero, yoyeetaqueri Quirishito, ishiaqueri ovisha yoantapiniyeetariri ora quitaiteri Yavisantaniri. ⁸ Meeca, ariorica aveshireimenteari, tsame ancameetsatanaque: eiro amatavitantitsi. Eiro aquisatsi, eiro antapinitrotsi caari cameetsatatsi.

⁹ Nosanquenatantempiro peerani, nocantajeivetaquempi eiro piconoaritsi antirori tsinane caari yai. ¹⁰ Te nonquenquetsatacoteriji caari quemisantatsi antirori caari yai, yora coasanotirori yashiyetari ishaninca, amatavitantsiri incoshite, quenquetsata-caavetarori yovetsicaschietari. Te noncantempiji: "Eiro pitsipataritsi caari quemisan-tatsi". Tecatsi pincantajeite pojocavacaya, tempa pincanteani pineapiniteri irisavique.

¹¹ Iro cantaincha nosanquenatacotori yora cantatsiri: "Narotaque piyemisantairinte". Ariorica yantiro tsinane caari yai, eiro quiso poajeitiritsi. Aisati pinquempejeiteri yora coasanotirori yashiyetari itsipapee, aisati quenquetsatacavetarori yovetsicas-chietari impeemerit asorentsite, quisatsatashitariri ishaninca, aisati shinquitachari, aisati coshitantatsiri. Aitaque nocantajuempi, eiro poimotaritsi quempetariri nocan-tajuempi. ¹² ¿Arimpa pincante jaoca incanteari caari quemisantatsi? Eiro. Tempa

rinti pincante yora piyemisantaririnte. ¹³ Irintiquea Tasorentsi oasanquetayerineri caari quemisantatsi. Meeca pojocajeitajeri yora caari cameetsatatsi picarajeivetari: eiro pijitashitaritsi quemisantatsiri.

6

¹ Ariorica pinquisaqueri piyemisantaririnte, *¿ocameetsatimotimpampa* paventapeem-pari caari quemisantatsi incantantempiri jaocarica pincantajeiteari? Tempa oncameetsateme paventapeemparime piyemisantaririnte irinti. ² Tempa pioti yora quemisantatsiri yoameetsantiri Tasorentsi irimatero incantacoventajeiteri maaroni atiri, jaocarica incantajeiteari. Ariorica pincantacoventajeiteri coajica maaroni atiri, *¿paitaquea* caari pimatantaro meeca pincantacoventajeiteri piyemisantaririnte? ³ Tempa pioti pincantajeiteri coajicani inampire Tasorentsi jaocarica incantajeiteari. Pincantacoven-tajeiteririca iriori, *¿eirompa* pimatiri pincantacoventajeiteri meeca pishaninca avirori? ⁴ Otimirica meeca piquisavacamentari, *¿paita* paventantariri yora caari quemisantatsi incantantempiri jaocarica pincantajeiteari? *¿Paita* incantempiri iriori? ⁵ Iro nocan-tantempiri, nocoaque pimpashiventanaquea. *¿Tecatsimpa* quemisantatsiri ioterone in-canteri itsipapee jaocarica incanteari? ⁶ Iro cantaincha pinquisaqueri piyemisantaririnte, aisati paventacari caari quemisantatsi. ⁷ Patsipetashijeitacaro paventajeitacari joeshi, tecatsi incantea iramitacojeitempi. Te oncameetsateji paventeari. Iro cameetsave-tachari pishineteri incoshiyeetempita.

⁸ Te oncameetsateji pantavacaajeitea. Jero aisati picoshitavacaajeita. Pantapinijeitiri piyemisantaririnte. ⁹⁻¹⁰ Yora caari cameetsatatsi eiro yareetatsi anta ipincatsaritinta Tasorentsi. Tempa piotiro, eiro picomitarotsi. Eiro ijatitsi anta ipincatsaritinta yora antirori tsinane caari yai, aisati yora quenquetsatacashaitarori yovetsicashiyetari, aisati aimentarori ijina, aisati tsinampairiri ishiramparirinte, aisati coshitantatsiri, aisati coasanotirori yashiyetari itsipapee, aisati shinquitachari, quisatsatiriri ishaninca, aisati amatavitiriri ishaninca icoshitaroriri. Tecatsi catsini incantajeitea iriori irareetajea anta ipincatsaritinta Tasorentsi. ¹¹ Aitake piquempejeiveitaniri. Iro cantaincha yoameetsajeitaquempi Avincatsarite Jeso quirishito, aisati Ishire Tasorentsi: yaacameet-sataquempi, ipeaquempi itomi Tasorentsi.

¹² Icanteeti: “Ocameetsati nantero paitapeerica caari itsaneacotee Jesoshi”, iro can-taincha ariorica antashitearo paitapeerica, tecatsi amate: tempa antsipetashitaquearo. Te ancoyeji ametasanotearo caari ineacameetsata itsipapee quemisantatsiri. ¹³ Otimi avari aquemari. Aisati otimi asheito onantari avari. Iro cantaincha coajica eiro otimajitsi ayeari aisati asheito iroori. Impeajero Tasorentsi, eiro otimitsi inquitequi. Tempa atsipetashitaro anevetaro paitapeerica. Te iro irovetsicantee antero caari ai, irointi yovetsiquimentee Avincatsarite anquenqueshirejeitanteeariri iriori. Aisati iquempeta, iquenqueshiretapinijeitaquee arori. ¹⁴ Otimi itasorenca Tasorentsi, irootaque imatan-tarori yoitinaajiri Avincatsarite, aisati iramatantajeiteeri aroripee.

¹⁵ Avatsapee arori irootaque iraco Quirishito iriori: iyempita, iroqui, iiti, maaroni. Tempa piotiro oca. Arojeitaquerica ivatsa Jesoshi, *¿ocameetsatimpa* antero tsinane neayetiriri itsipapee shirampari? Tempa oquempevetaca antacaaqueri Jesoshi tsinane. Teve, te oncameetsateji. ¹⁶ Ariorica yantiro shirampari tsinane, oquempetimotacari Tasorentsi yaasanotaquero. Tempa piotiro. Isanquenayeeti: “Apite inaveitani shi-rampari aisati tsinane, iro cantaincha ariorica iraavacayea irampanirojeitanaque, te oncameetsateji irijocavacayea”. ¹⁷ Iro cantaincha ariorica quiso airi Avincatsarite, aquempetacari iriori.

¹⁸ Eiro pantirotsi catsini caari pai, eiro pantiritsi catsini caari pai. Paitapeerica pashini pantayetaqueri, poashinoncaaqueri itsipapee pishaninca; iro cantaincha yora antirori otsipapee tsinane, yashinoncaja irisati. ¹⁹ Tempa pioti otimantacaro pivatsa Ishire Tasorentsi. Itiancaquempiro Tasorentsi quiso oantaquempiro. Te meeca aviro pincat-sariventachane avisati, irinti Tasorentsi pincatsariventimpipi. ²⁰ Yoavisacotantajimpipi, oshequi opomerentsitimovetacari: tempa itianquiri itomi icamimentaquee. Meeca, paitapeerica pantayetaqueri, pimataqueneri Tasorentsi, irineacameetsatanteeteariri.

Iquenquetsatacotiri aatsinemerijina.

¹ Ari chapinqui pisanquenatantaquenari, timatsi pisampitaquenari. Meeca nancanaquempi. Queario ocameetsatasanoti eiro paitsi pijina. ² Iro cantaincha ariorica pintimashitea, pantirocari tsinane caari pai; aisati tsinane, antiricari shirampari caari ai. Irootaque ocameetsatantari paasanoteta pijina, aisati aasanoteta tsinane ojime. ³ Cameetsa irishinetearo ijina oneeri, aisati onquempeteri iroori, oshineteari irineero. ⁴ Ijina eiro opincatsatajatsi irosati, irointi ocameetsati ompincatsateri ojime. Aisati inquempetea iriori ojime, eiro ipincatsatashitajatsi irisati, irointi impincatsatero ijina. ⁵ Eiro pitsaneapitsatarotsi pijina; aisati tsinane, eiro pitsaneapitsataritsi pijime. Ariorica pincantavacayea: "Eirotsita aneavintsatavacaajatsi aparopee quitaiteri; iotea anquenquetsatacayeri Tasorentsi", ari cameetsa. Iro cantaincha impoiji pineavintsatavacayea aisati. Pamene, terica pimatero pimaashitea, yantacaimpicari Satanashi caari cameetsatasi. ⁶ Te noncantasanovetempiji: "Payero pijina", iro cantaincha pincoquerica paye, ocameetsati paye.

⁷ Nocoavetaca pinquempejeitename narori, iro cantaincha inashitacaajeitaquee Tasorentsi, te amoncaratavacaajeiteaji. Jeri aparo, timatsi imatacaaqueri. Jeri itsipa, onashita imatacaaqueriri iriori. ⁸ Yora caari aatsi ijina, aisati camajinantachari, noncamantajeitempi: cameetsa pinquempejeitenam narori, pintimashijeitea. Aisati onquempejeitea tsinane, cameetsa ontimashijeitea iroori. ⁹ Iro cantaincha eirorica pimatirotsi pintimashitea, cameetsa paajeta aisati. Cameetsa paye, te oncameetsateji pincoashiveetea paye. Aisati oquempeta tsinane, te oncameetsateji oncoashiveetea ayeta. ¹⁰ Meeca noncamantasanotero aatsiri ojime. Te naro camantasanotero, irintiquea Avincatsarite camantasanotero: te oncameetsateji pojoqueri pijime. ¹¹ Ariorica pojoqueri, ari pintimashitasanotanaquea. Eirorica pitimashitatsi, pampiitajeri paajeri aisati pijimentavetacari. Aisati, te oncameetsateji irojocajero shirampari ijina. ¹² Meeca noncamanteri itsipapee, te irio Avincatsarite camanterineri: otimirica ayemisantaririnte ijina caari quemisantatsi, ariorica ocoaque aasanoteri, te oncameetsateji irojocajero. ¹³ Aisati, tsinane, iriorica pijime caari quemisantatsi, ariorica icoaque quiso iroasanotempi, te oncameetsateji pojocajeri.

¹⁴ Otimirica tsinane quemisantatsiri, irinti ojime te inquemisante. Iro cantaincha te inquempeteariji itseencaririnte; inashitacaari Tasorentsi, icanti: "Irootaque ojime quemisantanari. Irootaque iriri otomipee. Nocoacaasanojeitaqueri inquemisantajeitajena maaroni". Aisati oquempetaca ijina quemisantatsiri, terica onquemisante. Te onquempetajearoji otseencaroronte; inashitacaacaro Tasorentsi, icanti: "Irootaque ijina quemisantanari. Irootaque iriniro itomipee. Nocoacaasanotaquero onquemisantajena, aisati nocoasanotaque inquemisantajeite itomipee quemisantanari". ¹⁵ Terica onquemisante ijina ayemisantaririnte, oncoquerica ojocajeri, ari ojocajerita. Aisati ojime ayemisantaririnte, terica inquemisante iriori: incoquerica irojocajero, ari irojocajerota. Tecatsi meeca canterine yora quemisantatsiri quiso iroantearori ora coatsiri ojocajeri. Aisati onquempeteari quemisantatsiri tsinane. Ariorica icoaque ojime irojocajero, tecatsi canterine quiso oanteariri. Te incoyeji Tasorentsi anquisavacaajeitea. ¹⁶ Tsinane, ariorica quiso poyerijijime caari quemisantatsi, tempa ariorica poavisacotacantajeri. Aisati oquempetaca avirori, shirampari: ariorica quiso poyerijijina caari quemisantatsi, tempa ariorica poavisacotacantero?

¹⁷ Aitaque icoyeajeitaquempi Tasorentsi. Cameetsa pantajeiteneri Avincatsarite pitarica icoacaimpíri avirori. Irootaque nocantajeitaqueriri quemisantatsiri jaocarica yapatojeitacari. ¹⁸ Peerani icoyeajeitaquempi Tasorentsi. ¿Pijivataquempa pitoyeantaca? Aitanaji, eiro pipeajirotsi. Avirori pashini, terica pintoyeantea, eiro picoitsi meeca pintoyeantea, aitanaji. ¹⁹ Ariorica pitoyeantani, tecatsi oncantempi oavisacotempi. Aisati oquempetaca, terica pintoyeantea, tecatsi oncantempi. Iro cameetsatasanotatsiri anquemisantero icantajeiteeri Tasorentsi. ²⁰ Jaocarica picantajeitaniri peerani icoyeantauquempi, aitaque pincanteari. ²¹ Icoyeantaquempi Tasorentsi, ¿aviroricapimantaari? Eiro piquenqueshiretirotsi. Iro cantaincha iroimpacajempirica amanantimpire, cameetsa pisoquijanaje. ²² Icoyeantaquempi Avincatsarite, aviroricapimantaari

pinaveitani, ari oquempetaca yoimpacacoventajimpi: eiro meeca iperanatimpitsi camaari. Avirorica caari pimantaari pinaveitani, meeca oquempetaca yamanantimpi Quirishito, meeca incantempi iriori paitapeerica pantayeteneriri. ²³ Oquempetaca yamanantaquempi iriori, oshequi pivinaro: tempa oshequi ipomerentsiventaqueMPI yoavisacotaquempi. Eiro pipeajatsi meeca ivimantane atiri. ²⁴ Irootaque, noyemisantaririnte, noncamantantempirori oca: jaocarica picantajeitaniri peerani icoyeantaqueMPI, aitaque pincanteari; iro cantaincha, quiso poanajeri Tasorentsi.

²⁵ Meeca nonquenquetsatacoteri caari neavintsatiri shirampari. Tecatsi incansanotena Avincatsarite, iro cantaincha noncamantempi noquenqueshiretiri narori. Ineshinoncataquena, irootaque caari namatavitantimpi. Piojeitiro oca. ²⁶ Irotaintsi ompomerentsitimotasanojeitee, irootaque noquenqueshiretacarori oca. Jaocarica picantajeitari meeca, aitaque pincanteari. ²⁷ Paaquerica pijina, eiro pojocajirotsi. Pitimashitarica meeca, eiro picoitsi paye pijina. ²⁸ Ariorica paye pijina, cameetsa. Aisati ariorica aye ojime ora caari neavintsatiri shirampari, cameetsa; iro cantaincha oshequi pinquematsicajeitaquearo. Ariorica paye, oshequi ompomerentsitimotasanojeitaquempi. Te nonintej iompomerentsitimotempi, irootaque nocantantimpri: “Eiro pai meeca”.

²⁹ Meeca noncamantempi, noyemisantaririnte: eiro osamanititsi irojocacaashiyetempiro pantayevetanariri Avincatsarite icoacaimpuri. Otimirica pijina, iro cantaincha pinquearioventeneri iriori Tasorentsi icoacaimpuri. ³⁰ Ariorica poashiretaquea, ariorica pinquimoshiretaque; iro cantaincha eiro piquenqueshiretirotsi, iointi pinquearioventero pantaveeteneri. Ariorica pamanantayete, iro cantaincha eirorica osamanititsi pineero pamanantayeveteari. ³¹ Eiro osamanititsi piveshireimentearo timayetatsiri quipatsiqui, impoiji eiro pimatirotsi piveshireimentearo. Cameetsa pisavicajeiveta meeca, ainiro pamejeitacari, iro cantaincha opashiniyetanaque maaroni aneayetiri quipatsiqui; coajica ompomerentsitimojeitempi. ³² Nocoaque eiro picantashiretapinitanaque. Yora timashitachari, iquenqueshiretapinitiro icoayetiri Avincatsarite, icoaque inquimoshiretacayeri. ³³ Irintiquea yora aatsiri ijina, iquenqueshiretapinitiro maaroni yantapinyetiri ishaninca: icoaque inquimoshiretacayero ijina, ³⁴ oshequi iquenqueshireyetaque paitapeerica. Ora tsinane timashitachari aisati caari neavintsatiri shirampari: oshequi oquenqueshirejeitiro icoayetiri Avincatsarite, ocamanataqueri: “Paitarica pincoacayenari, ari nomataquempiro. Paitarica pincoacayenari nonquenqueshireteri, ari nonquenqueshiretero”. Iro cantaincha ora aatsiri ojime oquenqueshiretiro maaroni yantapinijeitiri atiri, ocoaque onquimoshiretacayeri ojime. ³⁵ Iro nocamantajeitantimpiori oca, nocoaque namitacojeitempi, te nonintej iompomerentsitacayempi. Noninti cameetsa pisavicajeite, aisati piojeite pantasanojeiteneri Avincatsarite paitapeerica incoacayempi.

³⁶ Pamene, otimirica pishinto caari neavintsatiri shirampari. Ariorica pineaquero antearotaque, picoaque meeca paacayero; ari cameetsa. Ayeta, eiro otimitsi pantane.

³⁷ Ariorica pincoasanote pintsaneemparo, ari ocameetsatasanoti, eiro piquemisantashitaritsi yora ashereayetimpipi, iointi pantero picoasanotiri avirori, paitarica piquenqueshiretiri. ³⁸ Pineaquero, ariorica paacayero pishinto, ocameetsati; iro cantaincha ariorica pintsaneemparo, ocameetsatasanoti. ³⁹ Ariorica aye tsinane ojime, ari quiso oanaqueri, irosati incamanteari. Ariorica incamaque, ari oshinetantari aajeta pashini ojime onintasanotiri. Iro cantaincha apatiro aaje quemisantiriri Avincatsarite.

⁴⁰ Ariorica oncantatiyempani ontimashitea, naamaaca onquimoshiretasanotanaque. Ari naamaaca yoametaquenaro Ishire Tasorentsi oca nocamantaquempi.

icoacaasanotaquee anintavacaajeitea avametavacaasanotantanaqueari antimantajeiteeari cameetsa. ² Itimirica jivetachari ioti, irisati amatavitajancha: te iriotasanoteji. ³ Iro cantaincha ariorica aninteri Tasorentsi, iroamejeitee irinti. ⁴ Pisampitacoventaqueri ivatsa yoyetaquenero ijitasorentsitiri yovetsiqueetiri. Ari ayojeiti te ontasorentsiteji yovetsicashiyetari. Itimi apaniro Tasorentsisanori, te intimeji itsipa. ⁵ Ainiro timayetatsiri anta inquitequi aisati aca quipatsiqui ijitasorentsitashitari atiri. Ainiro onaveta oshequi ijitasorentsitashiyetari, oshequi ivincatsaritepee. ⁶ Ayojeiti ainti itimi apaniro Tasorentsi, yora Apa. Iriotaque timacaquerori maaroni aneayetiri, aisati yovetsicajeitaquee arori. Irisati vetsicanontaincha. Timatsi aisati Avincatsarite apaniro: yora Jesoquirishito, vetsicajeitirori maaroni timayetatsiri, vetsicajeitaqueeri aisati arori.

⁷ Iro cantaincha ainiro ayemisantaririnte caari iojeitiro oca nocamantaquem-piri. Peerani yameyetaroni aparopee iquenquetsatacapiniveitaroni yovetsicashiyetari atiripee. Ariorica yoarini ivatsa yoyeetinirori, ijivetacarini ashisanori yora ijitasorentsiveetiri. Te irioveteaji; ariorica iroashiteari meeca ivatsa yoyeetinirori yovetsiqueetiri, oshequi inquenqueshireanaquea, irijivetea te oncameetsateji iroyeari. ⁸ Ariorica ayeari ivatsa, tecatsi oncantimoneenteari Tasorentsi. Ayearirica, tecatsi incantee ivatsa. Antitearirica, eiro yoameetsashireteetsi. ⁹ Cameetsani poyeari, iro cantaincha pantacairicari caari cameetsatatsi yora caari iotatsi. ¹⁰ Irineempirica caari iotatsi poaca anta ovancoqui ijitasorentsiveetiri, icanticari: “Ioti irinti. Nonquempeteari, noyeari ivatsa yoyeetinirori ijitasorentsiveetiri”. ¹¹ Piotasanoti, ocameetsatantari poari. Irintiquea, te iriojeiti. Ariorica iroashiteari, oshequi inquenqueshiretanaquea: “Terica oncameetsateji nantaquerica. Otimi meeca nantane”. Iriotaque piyemisantaririnte, icamimentaqueri Quirishito. ¹² Te oncameetsateji pantacayeri caari cameetsatatsi. Te irioveteaji, piquenqueshiretacairicari. Aisati irineacotaquempi Quirishito, te oncameetsateji pantaqueri. Tempa icantaquee: “Pinintajeiteri pishaninca, eiro pantacairitsi caari cameetsatatsi”. ¹³ Irootaque nocantantimpipi: ariorica noaqueari ivatsa, irosati nantacanteariri noyemisantaririnte caari cameetsatatsi, eiro catsini noajaritsi ivatsa aisati. Nantacairicari caari cameetsatatsi.

9

Icantiri Pavoro: “Pinquempejeiten”.

¹ Tempa ishinetaquena Tasorentsi paitapeerica. Tempa itiancana. Tempa noneasanotaqueri Avincatsarite Jesoshi. Tempa iriotaque matacaquenorori noquemisantaquaquempi. ² Terica iriojeiteji itsipapee itiancaquena Tasorentsi, iro cantaincha piotasanojeitaque avinti itiancaquena. Avirojei iotacaajeiterine atiripee itiancana Avincatsarite. ³ Ainiro tseencaquenari, cantanari: “Te intianquempij Tasorentsi”. Jero oca nocantavaqueriri: ⁴ “Tempa ocameetsati ayea aisati ire. ⁵ Ariorica nonquenayetanaque nonquenquetsatacayeteri ashaninca; ontimeme nojina, tempa oncameetsateme nontsipatanaquearome. Aitaque imatapiniyetiro itsipapee itiancane Avincatsarite, aisati irirentipee, aisati Sejashi. ⁶ ¿Apanirompa nompomerentsiventearo nompinatero noyeari? Aisati iquempetana Verenave, ipomerentsiventearo iriori yoari. ⁷ Noshiacantempiro: tempa ipinatapiniyeetiri soraro. Ariorica apomerentsitaro apanquitiro ova, tempa aisati avaquearo. Ariorica ashentapinitiri avirapee, tempa irapinitiro otsomi”. Irootaque nocantaveriri yora tseencaquenari.

⁸ Noquenquetsatacotaquero aneapinijeitaqueri, iro cantaincha ¿paita ocantiri isanquenatiniri Moishishi? ⁹ Jero oca ocantiri: “Eiro pipashicavantetiritsi vaca aticaitirori tirico itaquireantarori”. ¿Apanirompa vaca iquenqueshiretiri Tasorentsi? Teve. ¹⁰ Tempa aisati arori oshiacantaquee isanquenaren. Oamejeitaquee paitarica antajeitaqueri. Ariorica inquivanetaquero quipatsi impanquitantearori, icoaque yora quiavaneteroneri iraarantayetajero oitsoqui, coajica. Aisati iquempetaca yora taquireeroneri, icoaque iraarantayetajero oitsoqui iriori. ¹¹ Pamene, oshiacantaca nopalquitiro pishirequi irineane Tasorentsi. ¿Opomerentsitimotimpimpa meeca pimpaaranteraro noyeari, noitsaare, paitapeerica? ¹² Ariorica pipaarantrashiyetari itsipapee, tempa oncameetsateme pimpaaranquename narori. Iro cantaincha tecatsi

pimpema. Piquemisantaquero peerani oca cameetsatatsiri nocamantacotiriri Quirishito. Oshequi opomerentsitimitaquetanani, iro cantaincha te noncoyeniji nojocacayempiro piquemisantaqueni, irootaque caari nocoacotantimpini paitapeerica.¹³ Pamene. Yora antaveetatsiri ivancoqui Tasorentsyaapinitiro yoari anta, yoaro. Aisati yora oaquereriri Tasorentsvirantsipee anta yoapinitinirinta, yoarantari ivatsa. Tempa piotiro.¹⁴ Aisati oquempetaca, icanti Avincatsarite: “Cameetsa impaaranteeteri coiteimotariri yora quenquetsatirori oca cameetsatatsiri”.

¹⁵ Oncameetsateme naarantitempirome paitapeerica, iro cantaincha tecatsi naitempi. Aisati te iro nosanquenatimentempi pampantenari paitapeerica. Noquimoshiretaque tecatsi noncoacotempini; arioricame ayename notashe, eiro nocantimpitsi: “Pimpema noyeari”. Ayenata, noncameta. ¹⁶ Ariorica nocamantacotiro oca cameetsatatsiri, tecatsi noncantea noshemete. Tecatsi noncantea nomajerete, aisati nonquenqueshiretea: “Te nomateneri Novincatsarite icoacaavetaquenari”. ¹⁷ Noncoasanotericame nocamantanti, impinatename Tasorentsya. Iro cantaincha te noncoaveteaji, tempa iperanataquena. ¹⁸ ¿Paita meeca impinatenari? Oncameetsataqueme noncoacojeitimpime, iro cantaincha te noncoyeji. Apatiro noveshireimentaquempi piquemisantajeiti.

¹⁹ Impinayeetename, nompeaqueame iratirite pinatenanemer, incantapinitename paitapeerica nantapinitenerimeri. Iro cantaincha nopomerentsiventashijeitacari oshequi atiri noquemisantacantajariri. ²⁰ Ariorica nocarajeitaqueri jorio, noquempejeitacari iriori, noquemisantacantajariri. Ariorica nocarajeitaqueri quemisantirori isanquenare Moishishi, noquempejeitacari iriori, noquemisantacantajariri. Iro cantaincha te nompincatsatearoji meeca isanquenare Moishishi, te nompomerentsiventearoji. ²¹ Ariorica nocarajeitaqueri caari quemisantiro isanquenare Moishishi, noquempejeitacari iriori, noquemisantacantajariri. Te noavisajeroji icantiri Tasorentsya; noquemisantajeitaquero icantiri Quirishito. ²² Aisati, ariorica nocarajeitaqueri caari matasanotiro inquemisante, noquempejeivetacari iriori, noquemisantacantasnotacariri. Aitaque noquempejeivetacari maaroni atiripee noquemisantajeitacariri. ²³ Iro noquempetapinijeitantariri irioripee inquemisantajeitanteearori oca cameetsatatsiri nocamantajeitiriri. Aisati narori, noveshireimentearo oca cameetsatatsiri.

²⁴ Pamene, tempa piojeiti ishiajeitanaca oshequi shirampari iriojeitanteari janicarica anaacotantaintsineri. Iranaacotantaque apaniro yora shiasanotanainchari, ari impeeteri icanteetiro premio. Aisati pishiyeri avirori, pishiasanotanaque, paantearori premio. Ariorica pishintsiventero icoacaimpiri Tasorentsya, ari paaque. ²⁵ Irisati cavintsaajancha maaroni coatsiri iranaacotante ariorica irishiye. Irootaque icavintsantari irisati irimatanteearori irishiasanote iraanteearori amatseerentsya. Oshintsiti opatsai, iro cantaincha oca amatseerentsya ayeri arori, eiro opatsaitsi irointi, irootaque ocameetsantari ashintsiventasanotero. ²⁶ Te nontipitipiyetanaque noshianaca, irointi catinca noshianaca nomatanteearori nanaacotante. Pashini noshiacantempiri capojavacaachari. Icapojavacaasanotaca iritanteari janicarica anaacotantaintsineri. Oquempvetaca aisati nocapojasanotiri itsipa, te noncapojaiteashiteaji; noquearioventiniri Tasorentsya icoacaanari,²⁷ noshintsiventasanotaqueneri; noperanataja narosati. Oshequi noquenquetsatacaajeitiri itsipapee, te noncoyeji incantena Tasorentsya coajica: “Te pimatasanotenaroji nocoacaavetimpiri”.

10

Iquenquetsatacotiri jorioni, peerani; aisati yoametaqueri quemisantatsiri.

¹ Meeca, noyemisantarinente, noncamantempi piotanteeari jaoca icantajeitari jorioni anta caarateriqui, peerani. Otsimancapinijeitanaquerini mencori; aisati otenceraejataqueneri incajare, nianqui yaniijeitanaque pirijapatsariqui. ² Anta mencoriqui aisati incajarequi yoamejeitiri Tasorentsya jojeitantacari iquemisantajeitaqueri peerani Moishishi. ³ Yoapinijeitacaro yoari ipapinijeitaqueriri Tasorentsya. ⁴ Irapinijeitanaquero nija ipapinitiriri, ora soquijatatsiri mapiqui. Yoqueneri Tasorentsya ora mapi, oshiaacaaventiri Quirishito, oijajeitanaqueriri. ⁵ Iro cantaincha te iriveshireempaji Tasorentsya. Te iriveshireimentajeiteariji oshequi yora atiripee, irootaque icamajeitantacari anta

caaraiteriqui. ⁶ Pinquenqueshireajeitero oca piojeitanteari icoacaimpiri Tasorentsi. Piquempejeitaricari jorioni: picirocari caari cameetsatatsi. ⁷ Eiro piquemisantirotsi ijitasorentsitsashiyetari. Aitaque imataarantaquero peerani. Osanquenatacani: “Isav-ícajeitaque atiri, yoajeitaca aisati iraajeitaque. Impoiji icatiajeitanaca, imaticajei-tanaque, omaninquejeitanaque”. ⁸ Queariyea, aquempejeitaricari arori: ineavintsa-taarantavacaaca caari yai, irootaque icamaarantantacari 23,000 atiri aparoni quitateri. ⁹ Ineantaarantacari Avincatsarite, iriotanteari inquisheririca, irosati itiancantacanari oshequi maranke. Ari yatsicajeitaqueri, icamajeitaque. Queariya, ashiiircari arori, aneantaricari Tasorentsi. ¹⁰ Aisati icantimataarantanaqueri, irootaque ipoyerearantancarirri yora inampire Tasorentsi. Queariya, aquempejeitaricari arori.

¹¹ Iro imatantayetacarori oca, anquenqueshireanteari. Isanquenayeetironi, ayojei-tantajari meeca. Irovetainchu omontaratajea impocantajeari Jesoquirishito. ¹² Meeca, ariorica picanti: “Noncantatiyempani nainti nonquearioventero nonquemisante”, no-cantimpi narori: “Paamaventea, pantirocari caari cameetsatatsi”. ¹³ Ainiro aquen-queshirejeitiro antero caari cameetsatatsi: ashi avajeitiro maaroni atiri. Iro cantaincha ariorica aventeari Tasorentsi, iramitacojeitee eiro antantarotsi. Eiro yamataviteetsi, iramitacotasanojeitee eiroquea antantarotsi caari cameetsatatsi aquenqueshirevetacari.

¹⁴ Irootaque, nonintane, noncamantantemprori oca: “Eiro catsini piquemisantirotsi yovetsicashiyeetari ijitasorentsitiri”. ¹⁵ Ainiro piotantari, meeca pinquenqueshirejeit-ero oca nocantimpi. ¹⁶ Ariorica ancanteri Tasorentsi: “Irove, Apa, aviro panarori oca nireri”, tempa aquempetavacaapinijeitaca, aveshireimentajeitaro iriraja Quirishito yaparajatimentaquee. Aisati, ariorica acarajapinitiro tanta, tempa aquempetavacaapini-jeitaca, aveshireimentajeitaro ivatsa, aquenqueshirejeitiri icamentajeitaquee. ¹⁷ Ari ocarati avapinijeitari tanta aparo. Aisati oquempeveta, oshequi anajeiveta, iro cantain-cha amoncaratavacaajeitaca, ashanincajeitacari Quirishito: tempa apaniro ini irinti.

¹⁸ Pinquenqueshirejeitiro yamejeitacari joropee. Ariorica yoajeitacari ivatsa yoiniriri Tasorentsi, tempa ishanincatavacaajeitaca iriori. ¹⁹ Jero oca nosampitempiri: ¿Tasorentsipa oca yovetsiqueeyetiri? Tempa yatsipetashita yoapinitinro ivatsa. ²⁰ Jero oca noncamantasanoempiri. Ainiro yoqueneri ivira. Iro cantaincha caari oni Tasorentsi yoqueneri, irinti camaari. Te nonintacayempi pishanincateari camaari. ²¹ Ariorica pirimenteri Avincatsarite, eiro pimatirotsi pirimenteri camaari aisati. Arior-ica poimenteari Avincatsarite, eiro pimatirotsi poimenteari camaari aisati. ²² ¿Arimpa picoaque inquisaquempi Avincatsarite? ¿Panaacojeitirimpa pishintsitasanoti?

²³ Icanteeti: “Ocameetsati nantero paitapeerica caari itsaneacotee Jesoshi”, iro cantaincha ariorica antashitearo paitapeerica, tecatsi amate, tempa antsipetashitearo. Eiro amitacojeiteetsi paitapeerica antashiyeveteari. ²⁴ Eiro piquenqueshireacotapini-tirotsi picoayevetari avirori, irointi pinquenqueshireacotapiniteri icoayetiri itsipapee. ²⁵ Ariorica ipimantayeti ivatsa, poyeari. Eiro pisampitacoventiritsi: “¿Jaoca pairiri? ¿Irampa yoyeetinirori ijitasorentsiseetiri?” Ariorica pamananteri ivatsa, eiro pisampi-tacoventiritsi, pijiticari ariorica poyeari eiro picameetsashiretanajitsi. ²⁶ Ocantini San-quenarentsi: “Irio Avincatsarite ashietarori quipatsi aisati maaroni timantajeitarori”.

²⁷ Ariorica incajemempi caari quemisantatsi iroacayempi. Ariorica picoaque pijate, poajeiteariyea maaroni impajeitavaquemprori. Eiro pisampitacoventiritsi ivatsa, eiro pijititsi ariorica poyeari, eiro picameetsashiretanajitsi. ²⁸⁻²⁹ Iro cantaincha incanteetem-pirica: “Jeri yoca ivatsa, yoyeetinirori ijitasorentsiseetiri”. Ari pinquenqueshireteri yora camantaquemprori: yaamaacari ariorica iroyeari, eiro icameetsashiretanajitsi. Iriliterica te oncameetsateji iroyeari, eiro poaritsi avirori. Avinti piovetaca tecatsi incantem-pi ivatsa, iro cantaincha pincavintsayeri yora caari iotatsi.

Naamaaca intime cantatsineri: “Ishinetana Tasorentsi noyeari paitapeerica, ¿paita itsaneacotashitantanariri yora caari iotatsi? ³⁰ Ariorica avapinijeitari, acantapinijeitiri: ‘Iriove, Apa, aviro panariri noayetari’. Ariorica ampasonquieri, ¿paita icantim-en-tanteeriri ayearirica?” ³¹ Ari noncamantempi. Ariorica poajeitea, aisati ariorica

pirajeite; iro cantaincha paitapeerica pantayeteri, panteneri Tasorentsi icoacaim-piri, iriveshireimentantempi. Impoijiquea incantajeite atiri: "Tempa icameetsati Tasorentsi. Cameetsa isavicacaajeitiri quemisantajeitiriri".³² Pantacairicari caari cameetsatatsi yora jorio, yora caari joriotatsi, aisati yora quemisantajeitiriri Tasorentsi.³³ Paitapeerica nantayetiri, noninti namitacojeiteri atiri. Te naro intacotajanchane narosati, irointi nintacotapinijeitari iriori itsipapee atiri. Iro nomatapinijeitantanariri iravisacojeitantzeari.

11

Antayetiri tsinane quemisantayetatsiri.

¹ Pimoncarajeitaquena, noquempetaca narori nomoncaratacari Quirishito. ² Piquenqueshiretapinitaquena, aisati piquenqueshiretiro maaroni noametaquempi, irootaque noneacameetsatantaquempi. ³ Jero oca, pioter: irio Quirishito cantajeitiriri atiri paitarica irantajeiteri; irio shirampari cantajeitirori ijina; aisati irio Tasorentsi cantiriri Quirishito. ⁴ Pamene yora shirampari, ariorica iquenquetsatacari Tasorentsi, aisati ariorica icamantanti, te irameteaji impashicainatea. Ariorica impashicainataquea, te impincatsateriji Quirishito. ⁵ Irointiquea tsinane, ariorica oquenquetsatacari Tasorentsi, aisati ariorica ocamantanti, opashicainatapinitaca. Terica ompashicainatea, te ompincatsateriji ojime: oquempetimotacaro ameetiro oishi. ⁶ Terica oncoyeji tsinane ompashicainatea, ari ocameetsati aisati ameeterota oishi. Iro cantaincha ariorica opashiventaca ameetero, cameetsa ompashicainatea.

⁷ Te oncameetsateji impashicainatea shirampari: iquempevetacari Tasorentsi, aisati ipincatsatiri. Aisati oquempetaca tsinane, opincatsatiri shirampari. ⁸ Ijivataqueri yovetsiqueetiri shirampari. Iro imerequi yovetsiqueeti tsinane; irointi omerequi tsinane, te irovetsiqueeteroji shirampari. ⁹ Yovetsiqueetiri peerani shirampari, impoiji yovetsiqueetiniri tsinane. Irointi tsinane, tecatsi irovetsiqueetene.

¹⁰ Ocameetsati ompashicainatea tsinane iriotantajeiteari inampire Tasorentsi opin-catsatiri ojime. ¹¹ Pamene, te ontimashiteaji tsinane, te intimashiteaji shirampari. Icoaque Avincatsarite ancoiteavacaye. ¹² Iro imerequi shirampari yovetsicaqueri tsinane, aisati meeca otimapinitiri tsinane otomi. Irinti Tasorentsi vetsicajeitiriri maaroni. ¹³ ¿Paita piquenqueshiretiri avirori? Ariorica onquenquetsatacayeri tsinane Tasorentsi, ¿cameetsampa ompashicainareaja? ¹⁴ Te amejeiteaji anquishipejeite arori shirampari. Eirome apashiventame intimeme quishipenti. ¹⁵ Irointi tsinane, tempa aneacameetsajeitiro oquishipetirica oishi: irootaque opashicainatari. ¹⁶ ¿Timatsimpa coatsiri impiatsatena? Noncamantempi: nametacaro oca nocamantaquempi, aisati yamejeitacaro maaroni quemisantajeitiriri Tasorentsi.

Yoametantiro yoimentapinijeitari Jesoshi.

¹⁷ Timatsi pashini noncamantempi. Te noneacameetsateroji oca pantajeitiri ariorica papatojeita: te oncameetsateji, te oameetsashirejeitimpji. ¹⁸ Nojivate noncamantempiro oca. Icamanteetana ariorica papatojeita piquemisantapinitari, picantavacaajeita. Naamaavetaca queario icamanteetana. ¹⁹ Picantavacaajeitaca piojeitantacariri janicarica quearioventasanotirori iquemisanti. ²⁰ Ariorica papatojeita, poajeveta, iro cantaincha te poimentajeiteariji Avincatsarite. ²¹ Ariorica poapinijeita, paanontajeitanaca poari avirori, poapitsajeitacari itsipapee. Te poyeavacaavaqueaji. Itasheanaque aparopee, ishinquitanca itsipapee. ²² ¿Paitasa pantajeitiri? Tempa otimi pivanco poanteari, piranteari. ¿Pipincaquerimpa yora pocashitiriri inquemisanteri Tasorentsi? ¿Pishirontimentarimpa yora caari ashitaarantacha? ¿Jaocampa noncantempi? ¿Ari-ompa noneacameetsatemp? Teve.

²³⁻²⁵ Irío Avincatsarite oametanarori oca novaaquempirica. Peerani, tsiteniriqui, ari yaaquero Avincatsarite Jesoshi tanta. Icantiri Iriri: "Irove, Apa, aviro panarori oca noyeari", impoiji icarajaquero. Icanti: "Jero oca tantaca: ariorica poapinitearo,

pinquenqueshiretapinijeitena. Tempa narotaque camimentajeitempineri". Ari yoajeitaca. Impoiji yaquiero aisati iramento. Icantajeitiri: "Jero oca oja, ariorica pirapinijeitero, pinquenqueshirejeitena, piotasanojeite amparajatimentajeitempi niraja pavisacojeitantzajeari. Ariorica noncamimentempi, piotanaque eiro namatavitimpitsi, nomatempo maaroni nocamantaquemperi". Irosati yanancantana ja tsiteniriqui, irosati yaanteetacari. ²⁶ Ari meeca poapinijeitearo, pirapinijeitero, poametantapiniteariri atiri icamimentajeitaquee Avincatsarite. Pimatapinijeitero, irosati impocantajeari. ²⁷ Ariorica poimenteari, ariorica pirimenteri, pinquenqueshireempsa: eiro pantashitarotsi. Ainiro irantane yora antashitarori: itseenquiro ivatsa Avincatsarite, itseenquiro iriraja. ²⁸ Pijivate piotacotea avisati, otimirica pantane. Piotacotearica te aneeroji pantane, ari poyearo, aisati pirero. ²⁹ Te oncameetsateji avashiveetearo, aisati irashiveetearo. Terica anquenqueshiretasanoteri Avincatsarite, tempa avamempeacaro, iramempeacaro: ontine antane.

³⁰ Irootaque pojoquiitaarantantacari, aisati caari pishintsiyetanta. Irootaque aisati icamaarantantacari pishanin capee. ³¹ Ariorica ayotacotea arosati otimirica antane, ocameetsati ajivate anquenqueshireempsa ancameetsatantajeari; impoijiquea, ariorica avajeitimenteari Quirishito, eiro yoasanqueteetsi Tasorentsi. ³² Tempa aisati ocameetsati incantacoventee Avincatsarite, aisati iroasanquetee, oncateataquea eiro ajantan-tatsi Sharincaveniqui. Te incoacaajeiteeji antsipajeteeari maaroni yora tseencantatsiri. ³³ Meeca, noyemisantaririnte, ariorica pampatojitea poimentajeiteeari Avincatsarite, poyeavacaavaqueatsita. ³⁴ Ariorica pintasheasanotaque, pijivate poyea anta pivanco-qui. Eiro papatotashijetatsi pinquemantearori poyeari: otimicari pantane. Ariorica nareetempi nontsoteapeempiro, noameyetempiro pashini.

12

Iquenquetsatacoti ro matacaajeitaqueeri Ishire Tasorentsi.

¹ Meeca, noyemisantaririnte, noamejeitempiro maaroni omatacaa jeitaquemperi Ishire Tasorentsi. Te noncoyeji pincomijeitearo, irointi nocoaque piojeitavaquero. ² Piojeiti peerani te pinquemisantajiveiteani. Piquemisantashiyeveitaroni povetsi-cashiyetari, pijitasorentsivetari. Tempa omasontijeitaque iroori. ³ Nocoaque piojeitavaquero oca. Ariorica oneaveetacaqueri Ishire Tasorentsi atiri, eiro icantitsi: "Te incameetsateji Jesoshi". Aisati oquempetaca, eirome oametirime, eiro icantime: "Irio novincatsarite Jesoshi".

⁴ Onashiyetaca omatacaa jeitaqueeri, iro cantaincha apaniro oni Ishire Tasorentsi. ⁵ Onashiyetanaca oca antajeitimiriri Avincatsarite, iro cantaincha apaniro ini irinti. ⁶ Onashiyetaca antajeitaqueneriri, iro cantaincha apaniro ini irinti Tasorentsi. Tempa irootaque matacaajeiteerori maaroni. ⁷ Oamejeitaquee Ishire intacotavacantajeitacari. ⁸ Iotacaayetaqueri aparopee, cameetsa iquenquetsatantacari; irio itsipapee oametaqueri, cameetsa yoametanta queerori ioyetiri. Ocarati oameyetiriri apaniro: ora Ishire Tasorentsi. ⁹ Irosati matacaayetiriri itsipapee ishirejeitacaro icantayetiri Tasorentsi; itsipapee omatacaaqueri yoavisacoyeriri mantsiaripee. ¹⁰ Irosati matacaayetiriri itsipapee itasoncantayeti. Pashini omatacaaqueri icamantantayeti. Pashinipee iotacaayetaqueri ioyetavaqueri quenquetsatacantatsiri: iriorica quenquetsatacairyri camaari, irompa terica irio. Pashini, omatacaaayetiri ineana tashiyetaro pashinipee neantsi. Pashini aisati omatacaaayetiri yovaajeenero ora icantaqueeri. ¹¹ Onashiyetaca oamejeitaqueri, iro cantaincha aparoni oni oamejeitiriri: irootaque Ishire Tasorentsi. Paitarica oninta-ccayetiriri, irootaque oameyetiriri, omatacaaqueri.

¹² Pamene: apaniro onaveta avatsa, iro cantaincha ainiro aiti, aco, aqui, ayem-pita, maaroni. Oshequi onaveta, iro cantaincha apaniro onaveta avatsa. Aisati iquempeta iriori Quirishito. ¹³ Apaniro onaveta Ishire Tasorentsi. Otasoncacoven-tajeitaquee, irootaque ashanincatavacaajeitantzacari, oquempetacaajeitaquee apaniro anajeiti. Acarajeitiri jorio, itsipapee caari joriotatsi; itsipapee pimantaari inaveta, pashinipee te impimanteeteriji. Quiso oajeitaquee Ishire Tasorentsi: apaniro oni.

¹⁴ Apaniro oni avatsa, iro cantaincha timatsi anitantari, ajircantari, amenantari, aquemantari, oshequi. ¹⁵ Te oncanjeji aiti: “Te naro iraco, te naro ivatsa iriori”. Tempa irootaque aiti avatsa, te onashiteaji. ¹⁶ Te oncanjeji ayempita: “Te naro iroqui, te naro ivatsa iriori”. Pinequero, tempa irootaque ayempita avatsa, te onashiteaji. ¹⁷ Ioteamerica avatsa apajaquironi, *¿jaoca ancanteameri anquemanteameri?* Ioteamerica aquemantari, *¿jaoca ancanteameri anquemeencatanteameri?* ¹⁸ Iro cantaincha cameetsa yovetsicayetaquero Tasorentsi avatsa: aquemantari, amenantari, anitantari, maaroni. Pitarica icori, imayetaquero. ¹⁹ Iotaquearicame aqui anaqueme, *¿jaoca ancanteameri?* ²⁰ Apaniro oni avatsa, iro cantaincha otimi aiti, aqui, ayempita, aco, maaroni. ²¹ Tecatsi oncantea aqui oncantero aco: “Te pincanteji”. Aisati aito, te oncanteroji aiti: “Te nonintempiji”. Teve, te oncanteroji.

²² Timatsi avatsapeequiniri paitapeerica, ajivetaro otimashita, iro cantaincha ocameetsatasanotaque otimayeti. ²³ Aisati oquempeta, ainiro apashiventacari, iro cantaincha ocameetsati ontme. Apashiquiro caari acoi onconijate. ²⁴ Te am-pashiqueroji caari apashiventaca. Iro cantaincha cameetsa yovetsicayetaquero avatsa yora Tasorentsi. Ocameetsati ontmajite ora caari aneacameetsaveta. ²⁵ Imataquero oca oncavintsavacaajeitanteeri aiti, aqui, maaroni. Tecatsi oncantajitea onquisavacaajeitea. ²⁶ Ariorica ocatsitaque aparo, ari aquemaquero maaroni avatsapeequi. Tecatsirica oyerone aparo, tempa aquimoshireventajeitaquero.

²⁷ Avirojeitaque ivatsa Quirishito. Avirojeitaque iiti, iraco, iroqui, iyempita, maaroni. ²⁸ Ari acarajeiti oshequi quemisantajeitiriri Tasorentsi. Ijivataque Tasorentsi itiancaqueri aparopee iquenquetsati. Pashini itiancaqueri icamantanti. Pashini itiancaqueri yoametanti. Impoiji pashini itiancayetaqueri itasoncantayetaque, pashini yoavisacoyetiri mantsiaripee, pashini intacotanta, pashini icantayetiri quemisantatsiri pitarica irantayeteri, pashini ineanatashiyetaro pashinipee neantsi. ²⁹ *¿Itiancajeitaqueempa anquenquetsate maaroni? ¿Acamantantajeitimpma maaroni? ¿Avametantajeitimpma maaroni? ¿Atasoncantajeitimpma maaroni?* ³⁰ *¿Avavisacojeitirimpma maaroni mantsiaripee? ¿Amajeitaquerompa maaroni ineanatashiyetaro otsipapee neantsi? ¿Amajeitaquerompa maaroni avaakueneri ashinanca oca icantiriri?* ³¹ Iro cantaincha cameetsa pincoacotasanofteri Tasorentsi irimatacayempiro cameetsatatsiri. Meeca noametasan-otempiro cameetsatasanotatsiri.

13

Cameetsa anintavacaajeitea.

¹ Ariorica amatero ineanatashitearo otsipapee neantsi, ariorica amatero anquemero irineane inampirepee Tasorentsi, iro cantaincha eirorica anintajeitiri itsipapee, tempa antsipetashijeitaquearo, ayotashiyevetearo aneaveete. Aquempetarocari campana, ocantashita, teein, teein. Aquempetarocari tamtempo ocantashita, tin, tin, tin. ² Ariorica ayotitayetearo caariqueru ineeti, ariorica ayotitayetearo maaroni imanayevetacari Tasorentsi, ariorica amayetero maaroni ioyeriri atiri, ariorica anquearioventero anquemisantasanoteri Tasorentsi, irootaque amatantearori avaayetajero toncaaripee: iro cantaincha eirorica anintasanotiri itsipapee, antsipetashijeitaquearo ayotashiyevetearo maaroni, eiro acameetsatitsi. ³ Ariorica ampashiyeteari ashinoncaincari maaroni timimojeiteeri, ariorica anquearioventeneri Tasorentsi anquenquetsatacoteri, irootaque inquisanteeri atiri, intamenteetanteerori; iro cantaincha eirorica anintasanotiri itsipapee, antsipetashijeitaquearo maaroni, tecatsi amatimateneri Tasorentsi.

⁴ Ariorica anintasanojeiteri itsipapee, eiro ashintsititsi anquisheri, irointi aneshinoncateri, eiro aquishimentirtsu imayetaqueri iriori, eiro ashemetitsi. ⁵ Ariorica anintasanoteri itsipapee, eiro antirotsi caari cameetsayetatsi apashiventacari, eiro antirotsi acoasanotiri arori, irointi anteneri inintacayeeri iriori; eiro ashemaritsi, eiro aquenqueshiretapinitrotsi caari cameetsatatsi yantayetiri. ⁶ Ariorica aninteri itsipapee,

iero aveshireimentarotsi caari cameetsatatsi, irointi aveshireimentea queariotasanotatsiri, ⁷ eiro aperataritsi, eiro aamaaritsi, eiro atseenquiritsi, irointi ancavintsayeri aisati intacoteari.

⁸ Eiro acantatiani ancamantante, eiro acantatiani aneaveetashitearo otsipapee neantsi. Eiro acantatiani ayotashivetearo paitapeerica, irointiquea ancantaitatiyempani anintavacaajeitea. ⁹ Te ayotasanojeiveteaji, te ancamantantasanojeiveteaji. ¹⁰ Coajica omoncarataquearica cameetsatasanotatsiri, eiro acoojirotsi oca cameetsayevetachari. ¹¹ Peerani ajananequivetani, aquempeveitani jananequi aneaveetashita, ayotashiveta capichaji, aquenqueshireaveta capichaji. Antearitantapaacari, ajocanaquero ajananequivetani. ¹² Meeca oquempetaca amenaatacotaqueri Tasorentsiamenaarontsiqui, te inconijatasanoteji. Coajica amenavorotasanotapeeri inquitequi. Meeca ayojeivetari capichaji, coajica ayotasanojeitapaajeri, oquempetaca iotasantaquee meeca. ¹³ Meeca acantatiani aquemisantajeitaqueri Tasorentsia, ayojeiti eiro yamataviteetsi, anintavacaajeitaca. Iro cameetsatasanotantsiri anintavacaajeitaca.

14

Iquenquetsatacotiri neanatashiyetarori otsipapee neantsi, aisati camantantatsiri.

¹ Pincoasanojeite pinintajeiteri itsipapee. Aisati pincoasanotero pimatero maaroni omatacaaqueri Ishire Tasorentsia, pincamantantajeiteariri itsipapee. ² Ainiro atiri omapocashitacari ineantanashitanacaro otsipapee neantsi. Te inquemavaqueriji atiri, irintiquea Tasorentsia. Tecatsi quemavaquerone icantiriri. Omanavetaca oca oneanat-acairi Ishire Tasorentsia. ³ Iro cantaincha yora oametantirori irineane Tasorentsia, yoametaqueri atiri, iveshireacaacari, iquimoshiretacaqueri. ⁴ Yora neanatashitarori pashinipee neantsi yoametaja irisati, iro cantaincha yora camantantatsiri yoamejeitiri maaroni iyemisantaririnte. ⁵ Nocoaveta pineanatero otsipapee neantsi, iro cantaincha nocoasanotaque poametantero irineane Tasorentsia. Oshequi imataque irinti camantantatsiri: iotacaajeitiri iyemisantaririnte. Intimerica ovaayeeroneri irineane yora neanatashitachari, ocameetsati aisati. Iriojeitavaquero quemisantatsiri, inquemavaquero.

⁶ Pamene, noyemisantaririnte: noneanatashitapeempirome otsipasato neantsi, tempa nantsipetashitaquearome. Nocoapinitaque namitacojeitimpi, tempa irootaque nocamantantimpiori caari pioti, irootaque niotacaantaquempi. Tempa nocamantimpiori irineane Tasorentsia. Tempa noametaquempi. ⁷ Te aneeji shiovirentsia, jaavuirentsia, caari oni atiri. Ariorica osamejencataque, joa, joa, joa, te ayoteji pitarica oncantemerri. ⁸ Pamene, itioyeetiniri soraro iriotanteari irimanatea, tiii, tiii. Iro cantaincha ariorica osamejencataque, ¿ariompa iriojeitaque irovetsicajeitaquea irimananteari? ⁹ Aisati piquempetacaro. Ariorica pineanatashitearo caari iquemeetavaque, vero, vero, ¿jaoca incanteari inquemanteetavaquearori pincanterimeri? Tempa ari pantsipetashitaquearome pineaveeteme. ¹⁰ Aca quipatsiqui ainiro oshequi neantsipee. Onashiyetanaca, iro cantaincha te incomijencatearoji yora ashitarori irineane. ¹¹ Iro cantaincha terica anquemavaquero irineane neanavetachari, te irishanincateeji, aisati te ashanincateariji iriori.

¹² Tempa picoajeitaque omatacaaajeitempi Ishire Tasorentsia, ari pincoasanotaque meeca omatacayempi poametasanoteri piyemisantaririnte. ¹³ Irootaque noncamantantimpiori oca: ariorica pineanatero neantsi caari iojeiti, iro cantaincha pincanteri Tasorentsia iramitacotempi pimatantearori povaayeneri piyemisantaririnte picantavetacariri. ¹⁴ Ariorica noneanatantari Tasorentsia neantsi caari noneanatapiniti, noquenquetsatacavetacari noshirequi, iro cantaincha te nioteroji noncantayeterimeri. ¹⁵ ¿Paita nanteri narori? Ariorica nonquenquetsatacayeri Tasorentsia, nonquenquetsatacayeri noshirequi, iro cantaincha oncameetsate aisati nonquenqueshiretero pitarica noncanteriri. Ariorica nompampoyeaventeri Tasorentsia, nompampoyeaventeri noshirequi, iro cantaincha ocameetsati aisati nonquenqueshiretero pitarica nompampoyeaventaaquerirri.

¹⁶ Pamene, ariorica pinquenqueshiretaquea: “Icameetsatasanoti Tasorentsi”, iro cantaincha pincomitsatearorica pineane, *¿jaoca incanteari inquemantajeitearori yora iroquera tsipajeitimpí?* Eiro iotavaquerotsi paitapeerica pincanterimeri. ¹⁷ Ariorica pimpasonquitasanoteri Tasorentsi, iro cantaincha terica onconijateji, tecatsi pincantea poameteri itsipapee. ¹⁸ Nanaacojeitaquempi noneanatashitaro neantsi caari ioyeeti, irootaque nopasonquitantariri Tasorentsi. ¹⁹ Iro cantaincha ariorica ampatotimentajeiteeari Tasorentsi, nonintasanotaque noneanatantearo noquemasanotaqueri, noametan-teariri itsipapee. Ariorica noneanatashitearome oshequi neantsi caari iquemeeti, eiro ocameetsatime. Nantsipetashitearome, vero, vero. Cameetsataque noneanatero aparopee neantsi iquemajeitaqueri. ²⁰ Meeca, noyemisantaririnte, eiro pishiiritsi jananequi: pinquenqueshiretasanotanaquea. Eiro catsini piquenqueshiretirotsi caari cameetsatatsi: pinquempetajeari iroquera timatsi, te inquenqueshireterojo iriori. Iro cantaincha ariorica pinquenqueshiretasanotanaquea, cameetsa pinquempeteari antearipee, timatsiri iotantari. ²¹ Jero oca ocantiniri Sanquenarentsi: “Ianti Avincatsarite: ‘Nocantavetacari joriopee, iro cantaincha te inquemisantenaji. Coajica nontianqueneri itsipapee atiri, nashitarori irineane, incamantaveteari, iro cantaincha aisati iriori, eiro iquemisantavaquenatsi’”. ²² Irootaque noncamantantemprori oca: ineanaatashiyeetacaro otsipapee neantsi iriojeitanteeari caariquera quemisantatsi yoametaquee Tasorentsi. Te irineanaatashiyeeteneri quemisantatsiri iroameteri. Ocameetsati avameteri quemisantatsiri irineane Tasorentsi. Tequera avameteriji irinti caari quemisantatsi: tequera inquemeroji.

²³ Pamene, noncamantempiro: pampatotimentajeitearirica Tasorentsi, ariorica pineanatashijeitaquearo otsipapee neantsi caari iojeiti: vero, vero. Jeri inqueapee itsipapee atiri, caari quemisantatsi; tempa incantapaaque: “Jo, pamenerite yoca, itsaviataque”. ²⁴ Iro cantaincha ariorica poametante aneanequi, ari inquemapaa-quero caari quemisantatsi, ariorica itsipapee atiri. Inquemapaaquempi, iriotanteari te incameetsateji, otimi irantane. Onquenqueshiretacayeri maaroni iquemajeitapaaqueri. ²⁵ Inquenqueshiretanajero maaroni imanavetacari ishirequi. Intiyeroashiteari Tasorentsi, impincatsateri. Incantempi: “Queario, itsipatasanojeitaquempi Tasorentsi”.

²⁶ Pinequero, noyemisantaririnte. Ariorica pampatojeitea, cameetsa impampoyee aparo, iroametante itsipa, incamantante pashini, itsipa irineanatero neantsi caari pique-majeiti, pashini irovajeneri quemisantatsiri icantaqueriri. Iro cantaincha, paitapeerica pantajeiteri, pantero poamejeitanteeari piyemisantaririnte. ²⁷ Intimerica neanatan-tearoneri neantsi caari iquemeeti, cameetsa irineanate ariorica apite, ariorica mava: eiroquea oshequi. Eiro itsipatavacaajeitatsi irineanajeite. Irijivate aparo, impoiteri itsipa. Cameetsa intime ovaajenerine pishaninca icantaqueriri. ²⁸ Terica intime ovaajenerine icantiriri, cameetsa irimajeretanaque, eiro ineanaatashiyeitatsi apatojeitain-chari, irointi cameetsa irineanashirete ishirequi, aisati irineanateri Tasorentsi ishirequi. ²⁹ Cameetsa iroametantero irineane Tasorentsi, incarataque camantantatsineri apite, ariorica mava. Irintiquea itsipapee, inquenqueshiretasanojeitero icamantayetaqueriri. ³⁰ Ariorica iroameteri Tasorentsi pashini savicatsiri caari iojeiveta, ocameetsati irimajeretanaque. Ariorica irivecarataquero yora jivatatsiri iquenquetsati, ari impoiji iriori iroametante. ³¹ Cameetsa incamantacotero irineane Tasorentsi apaniro, impoiji aparo pashini, iriojeitanteeari maaroni, inquimoshirejeitanteeari. ³² Yora camantantirori irineane Tasorentsi, cameetsa irimajerete, ariorica ijivataque ineanaataque itsipa. ³³ Te incoyeji Tasorentsi onconoanatavacaaya aneaneppee tecatsi anquemantavaquearori, irointi icoaque amajerejeitanaque anquemajeitanteearori.

Ariorica yapatotimentapinitari Tasorentsi maaroni yoameetsajeitiri, amejeitaca ³⁴ tsinane omajerejeitaque. Te oshinetanteaji oneanate. Cameetsa onquemisante, tempa aitaque ocanti Sanquenarentsi. ³⁵ Ocoirica iote paitapeerica, cameetsa osampiteri ojime anta ovancoqui. Te oncameetsateji oneanate pampatotimentajeitaririca Tasorentsi. ³⁶ Pamene, te avirojei intearone poametantajeitero irineane Tasorentsi. *¿Pijitaquempa apaniro piotiro?* ³⁷ *¿Picarajeitirimpa camantantatsiri?* *¿Picarajeitirimpa quemisantirori ishire Tasorentsi?* Nocoaque iriotavaquero iriori oca: oca nosanquenatimpri, irootaque

irineane Avincatsarite. ³⁸ Eirorica iquemisantirotsi pishaninca oca, eiro piquemisanta-jeitiritsi iriori. ³⁹ Meeca, noyemisantairinte, pincoasanojeite pincamanteri itsipapee irineane Tasorents. Iro cantaincha eiro pitsaneacotaritsi irineanayeetero neantsi caari piquemajeiti. ⁴⁰ Poameetsatero paitapeerica pantayeteri. Te oncameetsateji pineanaveete: pimajerejeite maaroni, pinquemisanteri aparo neanatatsineri.

15

Iquenquetsatacotaqueri Jesoshi, itinaantajari, aisati antinaantajeari arori.

¹ Meeca, noyemisantairinte, nonquenqueshiretacaajempiro aisati nocamantitaque-mpiri: tempa ocameetsataque, piquemisantitavacaro; irosati meeca picanta pio-tasanoti queariotaque, te ontseyantsiteaji. ² Irootaque oavisacojeitempineri, ar-iorica pincantatiyempani pinquemisantasanotero. Iro cantaincha ariorica pin-quemisantamempeashitearo, eiro oavisacotimpitsi. ³ Nojivati novaakuempiro oca icamantiteetaquenari: ainiro antajeitaqueri caari cameetsatatsi, irootaque icamimen-tantajeitaqueeri Quirishito. Imoncarataquero ocamantacotitariniri Sanquenarents. ⁴ Yoiminqueetaqueri omoroqui. Ocarataque mava quitaiteri itinaantanajari aisati. Imoncarataquero aisati ocamantacotitariniri Sanquenarents. ⁵ Inijaacari Sejashi, aisati inijaajeitajari yora iroamereni, icarataque 12. ⁶ Impoiji inijaajeitajari oshequi ayemisan-tarinte, yapatotavacaajeita. Yanaaquero 500 neajeitaqueriri. Aneatsiquera oshequi, iro cantaincha icamaarantaque aparopee.

⁷ Impoiji inijaajari Santiaco, aisati inijaajari maaroni itiancanepee. ⁸ Impoitajana narori, inijaajana. Oquempetetaca impoiji notimaque. ⁹ Itiancaquena, iro cantaincha te nonquempeteariji itsipapee itiancane, te noncameetsateji: tempa noquisaveitarini maaroni quemisantiriri Tasorents. ¹⁰ Ineshinoncataquena Tasorents, irootaque no-quempetantajari meeca. Te irantsipetashiteaji ineshinoncataquena. Ipomerentsiven-tajari Tasorents itsipapee yora itianquiri, iro cantaincha nanaacojeitajiri nainti, nopomerentsiventasanotajari. Te nomatashtearoji narori, irointi ineshinoncataquena, nomatantacarori. ¹¹ Ariorica noquenquetsatacayaajeitimpipi, iriorica itsipapee itiancane quenquetsatacayaajeitimpipi: te ompashiniteji. Aitaque omoncaratavacaaca nocamanta-jeitimpipi: ariorica piquemisantaquero, aitaque paviscotaje.

¹² Pamene, nocamantajeitaquempi: “Icamaque Quirishito, itinaanaja aisati”. Piquemisantajeitaquena. ¹³ Paitasa picantaarantantacari te intinaayeji camayetaintsiri? ¹⁴ Eirome itinaajame camaintsiri, eirome itinaajame iriori Quirishito. ¹⁵ Eiroricame itinaajame, natsipetashitacarome nocamantantayeti, patsipetashitacarome avirori piquemisantajeitaque. ¹⁶ Aisati piotaqueme notseyacotacari Tasorents. Pineaquero, tempa nocamantacotaqueri: “Yoitinaajiri Quirishito”, iro cantaincha eirome itinaajame camayetaintsiri, eirome yoitinaajirime iriori. ¹⁷ Eirome itinaajame camaintsiri, eirome itinaajame Quirishito iriori. ¹⁸ Eirome itinaajame, patsipetashijeitacarome piquemisantajeitaque; ainirome ontimimotempime caari cameetsatatsi, ¹⁹ aisati incanteanime irijatapiniteme Sharincaveniqui camajeitatsiri, aisatime iriori yora quemisantajeivetariri Quirishito. ²⁰ Aisati arori, eirome atinaajame, atsipetashitacarome aquemisantavetacari meeca Quirishito, avashinoncaasanotaqueame, anaacojeitaquerime maaroni atiri ashinoncaajeitachaneri.

²¹ Iro cantaincha itinaasanotaja Quirishito, ijivajeitaqueri maaroni pashini cama-jeitatsiri. ²² Timatsi yantaqueri yora Aran, irootaque acamajeitancacari meeca. Aisati iquempetacari, timatsi yantaqueri iriori itsipa shirampari, yora Quirishito, irootaque antinaajeitantajeari. ²³ Ashanincajeitacari Aran, irootaque acamajeitan-tacari. Aisati oquempetaca, ashinancajeitacari Quirishito, irootaque iroaneajeitan-tajeeri. ²⁴ Ijivajeitaquee iriori. Impoiji, ariorica impocaje, intinaajeitanaje maaroni quemisantajeitiriri. Aitaque oncanteari: ariorica omoncarataquea, antinaajeitanaje, maaroni. ²⁵ Impoiji irivecarayero maaroni, impoyereajeri Quirishito maaroni caari

pincatsatiri: pincatsarijeivetachari, jivatacantantavetachari, savicacaantatsiri, maaroni. Incanteri Tasorentsi: "Meeca, Apa, pimpincatsariventeri avinti maaroni timajeitatsiri".²⁵ Impincatsariventante Quirishito irosati intsoncajeitantajeari maaroni quisajeivetacariri.²⁶ Impoiji eiro icamajitsi aisati atiri.²⁷ Ocantini Sanquenarentsi: "Ipeaqueri Tasorentsi Quirishito pincatsariventiriri maaroni timajeitatsiri". Tempa ocanti: "Maaroni timajeitatsiri", iro cantaincha eiro ipincatsariventiritsi Iriri: tempa iriotaque peaqueriri pincatsari.²⁸ Coajica aitaque iranaacojeiteri Quirishito maaroni timajeitatsiri, impincatsariventajeiteri maaroni. Apaniro irinti Iriri, tecatsi incanteri impincatsariventeri irinti. Incanteri: "Apa, aviro nopincatsati, panaacojeitana maaroni, pipincatsaritasanotaque avinti". Queario, Tasorentsisanori ini irinti, pincatsarisanori ini.

²⁹ Pamene, timatsi vaotisatimentariri camaintsiri. Eirome itinaajame camaintsiri, tempa irantsipejeitearome.³⁰ Aisati, eirome atinaajame, tempa nantsipetashitearome nopomerentsiventapinitaro noquenquetsati.³¹ Piquemisantajeitaqueri Avincatsarite Jeso quirishito, irootaque noveshireimentantajequempi: queario oca nocantaquempi. Aisati oquempetaca, queario oca noncamantempiri: te nioteji jaocarica oncarate iroimenteetenaro noquenquetsati. Maaroni quitaiteri timatsi coavetachari iroimentenaro.³² Anta Ejesoqui iquisasanotaquena savicayetatsiri, oshequi opomerentsitimo-taquena. Oquempetimovetaquena noipiavajiri maniti oyenanemerri. Oshequi opomerentsitaca. Pamene, eirome atinaajame, tempa nantsipetashitaqueearome. Eirome atinaajame, eiro aquenqueshiretirime Tasorentsi: tsame avajeitea, tsame ashinquijeitea; impoiji ancamaque, ari acarati.³³ Eiro pishinetiritsi tseencantatsiri iramatavitempi. Tempa queario icanteeti: "Eiro quiso poiritsi tseencantatsiri: yantacaimpirocari caari cameetsatatsi".³⁴ Pinquenqueshireempa, eiro papiitajirotsi aisati caari cameetsatatsi. Picaratapinijeitiri caari iojeitiri Tasorentsi: ¿paita caari pipashiventanta?

³⁵ Ariorica irisampitee tseencantatsiri: "¿Jaoca incanteari intinaantanajeari camaintsiri? ¿Jaoca oncanteari ivatsa, ariorica intinaaje?"³⁶ Te inquenqueshireempa. Eirorica opanquitatsi oitsoqui quipatsiqui, eiro oshioquitsi.³⁷ Ariorica ampanquitero oitsoqui, te ampanquitacoteroji ovatsa, ominca, oshi, maaroni: atsatairo apanquitiro oitsoqui. Ariorica ampanquitero arori tirico, ariorica pashini oitsoqui,³⁸ iro cantaincha itimacaquero Tasorentsi ovatsa, ominca, oshi, maaroni; imataquero inintacaquerorri. Tirico oitsoquitacairo oitsoquisanori iroori. Caniri otimi ovatsasanori iroori. Aisati oquempetajaca maaroni shiocayetatsiri.³⁹ Te irimoncaratavacaajeiteaji maaroni timajeitatsiri. Ainiro atiri, inashita iriori poshiniri. Inashita aisati vanquitachari. Inashita aisati shima.⁴⁰ Ainiro timatsiri quipatsiqui, aisati timatsiri inquitequi. Icameetsajeitaque, iro cantaincha inashiyetaca, te irimoncaratavacaajeiteaji.⁴¹ Iporei catsirinaciteri. Inashita yora cashiri, iquitasanteti irinti. Inashita aisati yora impoquiero, iquitaporoquiti. Aisati inashijetaca impoquieropee: aparo quitasantevetachari, yorari pashini, te.

⁴² Aisati ashiaquero arori, ariorica antinaanaje: eiro aquempetajatsi meeca. Intijeetee, ari ampatsaajeitanaque. Antinaajerica, eiro apatsaajitsi aisati.⁴³ Te oncameetsateji oca intijeeterica, iro cantaincha oncameetsatasanotaque tinaajanchaneri. Meeca te ashintsiteji, irompa antinaanajerica, ashintstasanotanaje.⁴⁴ Oca avatsa itijeetiri, tempa ametacaro quipatsi atimajeititaro. Ariorica antinaanaje, onashitanajea avatsa, ametantapaajarori asavicajecitapaaje anta inquitequi. Otimi avatsa quipatsiquiniri, ontimaje coajica aisati savicajantsineri inquitequi.⁴⁵ Ocanti Sanquenarentsi: "Aneatsiri inaveitani yora jivataintsiri shirampari, yora Aran". Iranti yora impoitiriri, yora Quirishito, oaneantasanotatsiri ini, ainiro itasorenca irinti.⁴⁶ Tempa ojivataque meeca oca avatsa asavicantacari aca quipatsiqui; coajica ontimaje avatsa iroaqueratajantsineri, savicajantsineri inquitequi, irointi.⁴⁷ Iponeaca yora jivataintsiri Aran quipatsiqui, os-hanincataro ivatsa quipatsi. Yora apitetapaintsiri iponeaca inquitequi.⁴⁸ Isavicaveitani quipatsiqui Aran, aisati aquempejeitacari maaroni timajeitatsiri aca quipatsiqui. Isav-iqui inquitequi itsipa, aisati anquempejeiteari maaroni jatatsineri inquitequi.⁴⁹ Aisati

oquempetaca: ashiajeitaquero meeca ivatsa yora quipatsisati, coajica ashiapaajero ivatsa yora inquitesati.

⁵⁰ Irootaque, noyemisantaririnte, noncamantantempiro oca: tecatsi oncantea oca avatsaca ojate anta ipincatsaritinta Tasorentsi, tempa ompatsaye. Tecatsi oncantea ojate anta te impatsaajeitenta savicajeitatsiri. ⁵¹ Pamene, noncamantempiro oca manavetachari: eiro acamajeititsi maaroni, iro cantaincha ampashinijeitanaje maaroni. ⁵² Ari intioyeete, ayojeitanteari omoncarataca. Intsipaite ampashinijeitanaque, oquempetaca amatsioqui aparo, ari omataca, matsio. Intioyeete, irosati irointinaantajeitajeari Tasorentsi maaroni camajeivetainchari; eiro ipatsaajeitajitsi aisati. Aitaque, ampashinijeitanaque maaroni. ⁵³ Ashi airo apatsaajeiti, iro cantaincha eiro apatsaajeitajitsi aisati. Ashi airo acamajeiti, iro cantaincha eiro acamajeitajitsi aisati. ⁵⁴ Ompatsaajeitanaque oca avatsaca maaroni, iro cantaincha ontimaje avatsa caari patsaanetajantsine. Ancamajeitanaque maaroni, irompa coajica, eiro acamanejeitajitsi. Impoiji omoncarataquea oca isanquenayeetiri: ⁵⁵ “Ariove. Eiro apiitajatsi ancamajeitaje aisati. Eiro aquenqueshiretajatsi anceme. Cameetsave. Meeca eiro atsaroacaajeitarotsi anceme”.

⁵⁶ Ariorica antayetero caari cameetsatatsi, ari antsaroacaquearo anceme. Timatsi aisati isanquenare Moishishi, camantaqueeri: “Ainiro pantane”. ⁵⁷ Irio oavisaacojeitaqueeri Avincatsarite Jesoquirishito. Ariove. Cameetsa ini Tasorentsi. Eiro atsaroacaajeitarotsi anceme. ⁵⁸ Irootaque, noyemisantaririnte nonintasanotiri, noncamantantempiro oca: pinquearioventeneri Avincatsarite paitapeerica panteneriri, eiro piperashireatsi, pincantatiyempani pinquearioventero. Piojeitaque eiro pat-sipetashitarotsi pimpomerentsiventeari.

16

Yapatotiniri quemisantatsiri jerosaresati iirequite.

¹ Meeca nonquenquetsatacoteri quirequi pampatoteneri ayemisantaririnte ashinoncaajeitachari anta Jerosarequi. Oca nocamantimpipi, nocamantaqueri aisati quemisantatsiri anta Carashiaqui. ² Maaroni tomincoqui ocameetsati pampatotapiniteneri jerosaresati piirequite, pinquempoyeneri. Jaocarica incarate piirequite, pinquempoyearanteneri. Pintearo pampatotiteanari meeca, opomerentsitimotimpicari ariorica nareetapaaquea. ³ Aisati nocoaque pincoyeitea aanaajenerine. Ariorica nareetapeempa, nosanquenateneri jerosaresati, iriotantavaqueariri. Irosati antiancanteari Jerosarequi.

⁴ Pincoajeiterica nojate narori, ari nontsipajeitanaqueari.

⁵ Coajica nojate noneajeitempi, iro cantaincha nocoaque nojatapainte Maseroniaqui. ⁶ Ariorica osamani nosaviquimojeitempi, ariorica nosarintsitacotaque. Impoiji pin-cavintsaajeitavaquena, jaocarica nojateri aisati. ⁷ Ariorica noneapaajempi, te noninteqi noshintsitanaque navisanaquempi. Nocoaque osamani nosaviquimotanaquempi, irishinetenarica Avincatsarite. ⁸ Nosavicanaquetsita aca Ejesoqui, irosati omoncaratan-teari Pentecoshiteshi. ⁹ Icoacaajeitaquena oshequi nonquenquetsatacacjeitanaqueri. Oshequi iquemisantajeiti. Itimi aisati oshequi quisajeitaquenari.

Ivetsajeitacari iyemisantaririnte.

¹⁰ Irareetapeempirica Timoteo, pineshiloncajeitavaqueri. Tempa iquempetaquena narori, oshequi yantaveetiniri Avincatsarite. ¹¹ Eiro pitseencavaqueritsi. Ariorica omoncaratapaaquea impiaje aca, aisati cameetsa pineshiloncatavajeri, cameetsa irareetitan-tajeari aca. Noyeaqueri, aisati itsipapee ayemisantaririnte. ¹² Aisati nocantavetacari ayemisantaririnte, Aporo. Nocantasanovetacari irijateme irineempime, intspatearime itsipapee quemisantatsiri. Te incoyeji irijate meeca. Ariorica coajica irijatanaque.

¹³ Paamayeariya, yamatavitimpicari. Pinquearioventajeitero pinquemisantasano-jeite. Eiro pitsaroajeititsi. Pishintsiventeneri Tasorentsi maaroni. ¹⁴ Tsame anintajeiteri ashanincapee, paitapeerica anteneriri. ¹⁵ Piojeitiri, noyemisantaririnte, yora Eshitejana

aisati ishaninca iriori. Ijivajeitiri Acayasati iquemisantajeiti. Iquearioventaquero icav-intsaajeitiri maaroni ayemisantaririnte yoameetsantiri Tasorentsi. Tecatsi canterine, iotashitaca icavintsavacaajeitaca. ¹⁶ Ipomerentsitaca yamitacotasanojeitimpi, paitapeer-ica yantayetimpiri. Nocoaque pinquemisantajeitavaqueri iriori, aisati pinquemisanta-jeitavaqueri maaroni quempejeitarcariri. ¹⁷ Noveshireimentavacari yora areejeitachari: yora Eshitejana, Jorotonato, aisati Acaico. Ainirojeitatsi aca, oquempetimotaquena avirojeitaquerica tsipajeitaquenari aca. ¹⁸ Iquimoshiretacaaqueempchapinqui, meeca iquimoshiretacaapaaquena narori. Cameetsa pineacameetsajeitavaqueri iriori.

¹⁹ Yovetsatasanojeitaquempi maaroni apatotimentariri Tasorentsi aca Ashiaqui. Aisati yovetsajeitimpipi Aquira aisati iroori Pirishira, aisati maaroni apatotapini-jeitachari anta ivancoqui. Tempa iriojeitaque quemisantajeitiriri Avincatsarite. ²⁰ Yovetsajeitaquempi maaroni ayemisantaririnte. Ariorica povetsatavacaaquea, cameetsa paacameetsatavacaajeitea. ²¹ Narotaque Pavoro vetsajeitimpiri. Narotaque sanquenajeitimpirori. ²² Irijateta Sharincaveniqui maaroni caari ninterine Avincatsarite. Pishintsite, Novincatsarite, pimpocaje. ²³ Cameetsa irineshinoncajeitempi Avincatsarite Jesoshi. ²⁴ Tempa aquemisantajeitiri Jesoquirishito, irootaque meeca nonintasanojeitantzimpiri.

Narotaque sanquenajeitimpirori oca: *Pavoro*

YORA PAVORO YAPIITAJINIRI AISATI ISANQUENATAJINIRI CORINTOSATI

Yovetsajeitacari.

¹ ¿Ainirompi corintosati? Narotaque aca Pavoro sanquenajeitimpiori. Peerani itiancaquena Jesoquirishito noquenquetsatacotaqueri, irootaque intintacaquenari Tasorents. Notsipatari aca ayemisantaririnte Timoteo nosanquenajeitimp. Nosanquenajeitimpido maaroni quemisantajeitatsiri ara corintoqui aisati Acayaqui. ² Nocoaque irineshiloncajeitempi Apa Tasorents, aisati cameetsa irisavicacaajeitempi. Nocoaque aisati inquempetaquempi iriori Avincatsarite Jesoquirishito.

Tsame aveshireimentajeiteari Tasorents.

³ Tempa icameetsatasanotaque Tasorents, yora iriri Avincatsarite Jesoquirishito. Iriotaque neshinoncajeitaqueeri, veshireacaajeitaqueeri. ⁴ Ariorica ashinoncaajeivetaca tempa yoveshireacaajeitaquee. Pamene, intacaro yoveshireacaajeitaquee arori, ayojeitacari aveshireacaajeiteari yora itsipapee ayemisantaririnte, ariorica irashinoncaya iriori. ⁵ Ariorica oshequi anquematsicatamenteari Quirishito, oshequi aisati iroveshireacaajeitaquee. ⁶ Iro noquemaatsicatantacarori nocoaque oshequi piveshireimentajeiteari Tasorents, aisati poavisacojeitanteari. Ariorica noveshireimenteari, nocoaque aisati piveshireimenteari avirori: piojeitaque ariorica pinquematsicatearo paitapeerica, iroveshireacaajeitempi pamavetantearori. ⁷ Niotasanotaque ariorica pinquempejeitenia pinquematsicatearo avirori paitapeerica, aisati pinquempejeitenia piveshireimentajeiteari Tasorents.

⁸ Nocoaque piojeite, noyemisantaririnte, oshequi catsini noquematsicayetacaro anta Ashiaqui. Oshequi nashinoncaaca, te capichaji. Nojivetaca ari noncamaque.

⁹ Queario, niotaque tecatsi noncantea noavisacotajea narosati, irootaque naventantanacariri Tasorents. Apaniro irinti imataquero yoavisacotaquena: tempa aisati imatiyo yoitinairi camaintsiri. ¹⁰ Ari yoavisacotaquena, caari nocamanta; aitaque iroavisacotajena aisati, niotaque incanteani iroavisacotapinitena. ¹¹ Pamitacojeitenia, pincanteri Tasorents iramitacotena. Impoiji, ariorica iriojeite itsipapee iquemisantaquempi Tasorents, yoavisacotaquena, oshequi iroveshireimentajeiteari Tasorents iriori.

Yora Pavoro icantiri corintosati: "Tsame aveshireimentavacaajeitea".

¹² Ari yamitacotaquena Tasorents, ineshinoncataquena, irootaque noquearioventantanariri nantaveetiniri. Te niotashiteaji pitarica nantiniriri, iro cantaincha yoametaquena iriori ocameetsatantari nomayetaqueneri. Niotaque pineacameetsataquero nantayetaqueri, aisati iquempetaca itsipapee atiri, irootaque noquimoshiretan-tacari. ¹³ Te ompomerentsiteaji pineanatero oca nosanquenatimp, aisati te ompomerentsiteaji piojeitavaquero. Nocoaque piotasanojeitavaquero. ¹⁴ Capichaji piquemavetacaro nocamantaquempi peerani, aisati capichaji piquemisantavetaquena. Ariorica impiapaaje Avincatsarite Jesoshi, noveshireimentajeitempi, iro cantaincha nocoaque pinquemasanoteroc nocamantitaquempi piveshireimentajeitanenari meeca.

Irijateme Pavoro irineerime corintosati.

¹⁵⁻¹⁶ Ari niotaque piveshireimentavetaquena, pineacameetsavetaquena, irootaque noquenqueshireantavetacari noneajantempime. Nojivajeitimpime noneajeitanajempime, impoiji novaanaqueame anta Maseroniaqui. Impoiji noneapajempime aisati, impoijiquea novaanaqueame Joreaqui. Apite aveshireimentavacaajeiteame. ¹⁷ ¿Ariompa nocoaque namatavitempi? ¿Noquempetacarimpa amatavitantatsiri cantashitachari: "Ari", aisati: "Eiro"? Te nonquempeteariji. Te noncoyeji nainti namatavitempi.

¹⁸ Tempa queariotaque icantiri Tasorents, te iramatavitanteji. Aisati narori, te noncantapinitempiji: "Ari nomataquero", impoiji: "Eiro nomatirotsi". ¹⁹ Ari nocarataqueri Shirivano, jeri Timoteo nocamantajeitaquempi jaoca icantari Jesoquirishito, yora Itomi

Tasorentsi. Te incanteji iriori: "Ari nomataquero", impoiji: "Eiro nomatirotsi". Apatiro icantapiniti: "Ari nomatasanotero", impoiji imataquero. ²⁰ Queario imajeitaqueenero maaroni icantaqueeri Tasorentsi. Irootaque nocantajeitantariri maaroni atiri icameetsataque, impincatsajeitanteeari iriori. ²¹ Aquemissantajeitaqueri Quirishito, irootaque itasoncaventantaqueeri Tasorentsi ashanincatavacaajeitantacari. Aisati timatsi icoacaa-jeitaqueeri antajeiteri, maaroni. ²² Itasoncaventajeitaquee maaroni, aisati itiancaqueero Ishire quiso oajetantaqueeri. Meeca ayojeitaque eiro yojocajeiteetsi.

Icamantajiri paita caari ijatanta irineajeri.

²³ Iro caari nojatanta noneajempi peerani, te noncoyeji nonquenquejaimentempiro pantajeivetacari, te noncoyeji noashiretacaajeitempi. Ioti Tasorentsi te nontseeyaji. ²⁴ Te noncoyeji noncantapinijeitempi pinquemisantajeiten, tempa piquemisantasano-jeitaqueri Tasorentsi. Irointi nocoaque noveshireacaajeitempi, maaroni.

2

¹ Noquenqueshiretaque: "Eiro meeca nojatitsi noneeri yora corintosati. Napiita-caajircari noashiretacaajeari, aisati noashiretacotaricari narori". ² Arriorica noashire-tacayempi, tempa aisati narori noashiretacojeitempi. Impoiji, *janica veshireacaajei-tenaneri?* Arriorica noneajeitajempi piveshireajeitanaja, ari noveshireanaja narori. Irompa eirorica piveshireajatsi, eiro noveshireajatsi narori. ³ Peerani nosanque-natantimpiori noshintsitsajeitaquempi pojocajeitanteearori caari cameetsatatsi panta-jeitaqueri. Te noncoyeji noashiretacojeitempi, irointi ocameetsati noveshireacojeit-emp. Niotaque arriorica pineajeitavaquena nonquimoshiretapaaque, ari piveshireimen-tajeitavaquena avirori. ⁴ Peerani nosanquenajeitantaquemprironiri, oshequi noashireta-cojeitaquempi catsini, oshequi niracojeitaquempi. Iro cantaincha te noninteji noashire-tacaajeitempi, irointi nocoaqueni piojeite oshequi nocavintsaajeitaquempi catsini.

Icantiri Pavoro: "Pincavintsaajeri yora antaveitaroniri caari cameetsatatsi".

⁵ Queario noashiretacovetacari yora aavetarori iashiane, iro cantaincha tempa avirojeitaque oashiretasanotainchari. ⁶ Ari poasanquetajeitaqueri yora aavetarori iashiane, irootaque yojocantajarori yantaveitaniri, meeca moncarataca. ⁷ Meeca eiro piquisajiritsi aisati, irointi pincavintsaajeiteri. Piveshireacaajeiteari, te aninteji aquiero irijatatiyi iroashiretasanotanaquea catsini. ⁸ Nocoaque meeca piotacay-eri queario picavintsaasanojeitaqueri. ⁹ Irootaque nosanquenatantimpiori peerani: nocoaqueni noneantajeitaquempi. Nocoaque niote queariorica piquemisantasano-taquaena. ¹⁰ Janicarica picavintsaajeitiri, aisati narori noncavintsayeri. Arriorica irantimojeitaquee ashaninca caari cameetsatatsi, icoaque Quirishito eiro aquishimen-tiritsi, aisati icoaque ancavintsaajeiteri. Irootaque nocavintsantacariri. Aisati avirori, nocoaque paacameetsatavacaajeitea. ¹¹ Aisati te noncoyeji irantacaajeiteero Satanashi caari cameetsatatsi. Niotaque oshequi icoaveta iramatavijeiteeme.

Icamantaquee Pavoro paita ipasonquitantariri Tasorentsi.

¹² Ari chapinqui nareetaca Toroashiqui, nocamantajeitaqueri savicayetatsiri jaoca icanta Quirishito yoavisacotanti. Oshequi yamitacotaquena Avincatsarite, oshequi yaa-cameetsajeitaquena savicajeitatsiri, oshequi iquemisantajeiti. ¹³ Nocoavetapaacari Tito, iro cantaincha te noneeriji. Oshequi noquenqueshiretaqueri, irootaque novaantanajari Maseroniaqui. ¹⁴ Ari nocantani narori nopasonquitapinitiri Tasorentsi. Aquemisan-taqueri Quirishito, irootaque itasoncaventajeitaqueeri, imatacaaajeitantaqueerori maaroni icoacaa-jeitaqueeri. Meeca iotacojeitaqueri maaroni savicajeitatsiri. ¹⁵ Ari aquemissantajeitaqueri Quirishito, aisati ashanincajeitacari, irootaque ineacameetsajei-tantajeeri Tasorentsi. Acarajeitaqueri savicatsineri inquitequi, aisati jatatsineri Shar-incaveniqui. ¹⁶ Avamejeivetari aparopee, iro cantaincha itseencajeitaquee, irootaque irijatanteari iriori Sharincaveniqui. Yora itsipapee avamejeitaqueri, ari iquemisanta-jeitaquee irinti, irootaque irijajeitanteari inquitequi. Incantaitatiyempani irisavicajeite

cameetsa. Oshequi noquenqueshiretasanotaquerove: ashinetircari irijajeite Sharincaveniqui. Eirome yamitacotaname Tasorentsi, eiro nomatirome nonquemisantacaajeiteri itsipapee.¹⁷ Ainiro oshequi oametantashijeivetarori irineane Tasorentsi iraanteariri quirequi. Te nonquempeteajiri nainti. Itiancaquena Tasorentsi noametantero irineane, iotaque nocoasanotaque noametantero. Aisati yamitacotaquena Quirishito.

3

Iquenquetsatacotiri iotacairiri atiri cameetsa yoametanti.

¹ Ari pineanatavaquero nojivataquempi nosanquenataquempi. ¿Pijitaquempa meeca oshequi noshemeti narori? ¿Picoaquempa intime pashini sanquenatacetenaneri camantempineri nocameetsatirica? Aisati narori, te noncoacayempiji pisanquenatacota, pincamanteri pashini ashaninca nocameetsataque. ² ¿Paita noncoantearori? Iajeitaque atiri oshequi noquenqueshirejeitaquempi, oshequi nocavintsaajeitaquempi. Iajeitaque iriori te namatavijeitempiji. ³ Te pisanquenatacotenaji paperiqui, iro cantaincha nonquemisantacaajeitaquempi, aisati oameetsataquempi Ishire Tasorentsi, yora aneasanotatsiri. Meeca ioshirejeitaquena atiripee queario itiancaquena Quirishito, te namatavitanteji.

Yamitacotaqueri Tasorentsi Pavoro imayetaquero icantaqueriri.

⁴ Niotaque queario oca nocamantajeitaquempi. Noquemisantaqueri Quirishito, irootaque yamitacotantanari Tasorentsi nomayetaquero nocantaquempi. ⁵ Te nonmatashitearoji apaniro, irinti Tasorentsi matacaquenarori. ⁶ Iriotaque iotacaanari jaoca icanta meeca yoavisacotanti. Peerani otimini isanquenare Moishishi camantajeiteeri paita icoacaaqueeri. Iro cantaincha eirorica amoncarajeitiotsi, ajate Sharincaveniqui. Iro cantaincha iroquera meeca itiancajeiteero Tasorentsi Ishire, aajeitanajeeneri asav-icantajeari anta inquitequi. ⁷ Peerani intacaro Tasorentsi, isanquenataquero mapi. Ineantacariri Moishishi, oshipaquireanaque ivoro, shipaquirerere; impoiji yoirinca-paaja. Ari ineantajeitavajariri ishaninca opeavetanaja ishipaquirei, iro cantaincha te irimajeiteroji iramenavorojeitajeri: irosati icanta yatsioquintaqueri. Ari maaroni caari moncaratiro ocantiri isanquenare ijajeitaque Sharincaveniqui. ⁸ Ari isanquenatantarori Tasorentsi mapi, oshipaquireanaque ivoro Moishishini, yoanaque cavaco, aisati yoajeitanaque cavaco maaroni ishaninca. Meeca ainiro Ishire Tasorentsi, quiso oajeitaquee, aisati coajica osavicacaajeitajee anta inquitequi. Tempa aitaque avasanojeitapaaque cavaco, sorerere. ⁹ Yora caari moncaratiro ora sanquenarentsi yamaqueri Moishishi irijajeite irinti Sharincaveniqui, iro cantaincha ishipaquireacaquero Tasorentsi ivoro Moishishi. Iro cantaincha ayojeitaque meeca yoameetsajeitaqueri Tasorentsi maaroni quemisantajeitiriri, ayojeitaque corajica aneajeitajeri anta inquitequi irishipaquireacotasanojeitajee. ¹⁰ Peerani aneacameetsajeivetaro isanquenare Moishishi, iro cantaincha meeca te aneacameetsatasanotajearo. Timatsi meeca cameetsatasanotatsiri catsini: yoameetsajeitaquee Tasorentsi, asaviquimojeitapaajeri anta ocameetsaitetinta catsini. ¹¹ Ocameetsavetaca isanquenatiniri Moishishi, iro cantaincha eiro ocantaitatiani ontme. Irisavicacaasanojeitajee Tasorentsi inquitequi, ancantaitatiyempani: tempa ocameetsatasanotaque irointi, catsini.

Iotacaajeitaquee Avincatsarite, te incoyeji intime amatavijeiteeneri.

¹² Ari ayojeitaque queario asaviquimojeiteri Tasorentsi, irootaque caari apashiven-tanta aquenquetsatacaajeitaqueri atiri. ¹³ Te anquempejeiteariri Moishishini, ipashicavortaca irinti: te incoyeji irineajeiteri ishaninca ompeanajea ishipaquireavorovetaca. ¹⁴ Iro cantaincha te inquenqueshireajeiteaji joriopee. Icantani ineanatapinivetaro isanquenare Moishishi, iro cantaincha te iriotacoteroji. Apatiro Quirishito matirori iriotacajaeiteri. ¹⁵ Queario, irosati icantajeta meeca. Ariorica irineanatero isanquenare, te iriotacoteroji: tecatsi incantea inquemero. ¹⁶ Iro cantaincha ariorica iraventeari Avincatsarite, iriotacayeri eiro yamatavitajatsi irisati; irointi iriotasanotanaque. ¹⁷ Ainiro Avincatsarite Ishire, oamejeitaquee eiro apomerentsiventiro isanquenare Moishishi. ¹⁸ Meeca tecatsi amatavijeiteeneri, irointi timatsi ayojeitiri. Ayojeitaque

icameetsatasanotaque Avincatsarite. Otasoncaventajeitaquee Ishire anquempejeitanteeariri. Meeca aquempejeivetacari capichaji. Acantani apashinitapinitanaque. Coajica anquempetasanojeitapaajeari, ancameetsatasanojeitapaaje.

4

Cameetsa iquenquetsatacotiro Pavoro irineane Tasorentsi.

¹ Tempa icavintsaajeitaquee Tasorentsi, irootaque itiancantanari nonquenquetsatacayeri atiripee. Meeca eiro nojocajirotsi. ² Te noninteji namataviteri ashanincaphee: te incameetsateji yora pashini amatavijeitiriri. Te nompashiniteroji irineane Tasorentsi, aisati te noncamantashiteariji atiri ocameetsayetaque icoayetiri iriori: namatavitircari. Irointi queario noamejeitaqueri atiri. Piojeitaque, aisati iotaque Tasorentsi queario oca nocantaquempi. ³ Intimerica caari iotatsi jaoca incanteari iravisacotantajeari, irijojeitaque jatatsineri anta Sharincaveniqui. ⁴ Yamatavitaqueri Satanashi caari imantan-taro iriote. Tempa iriotaque ivincatsarite maaroni tseencantatsiri. Te incoacayeriji iriote jaoca incanteari iravisacotaje; te irinintacayeriji irijojeite oshequi ipincatsarit Quirishito, Tasorentsi ini. ⁵ Te naro quenquetsatacachane, irinti Avincatsarite Jesoquirishito noquenquetsatacotiri. Noquemisantaqueri irinti, irootaque nocon-tacari nintacojeitempi. ⁶ Peerani, yovetsicantarori Tasorentsi quipatsi, otsiteniveitani, iro cantaincha icanti: “Onquitaitetanaque”. Ari oquitaitetanaque, irootaque meeca amenajeitancari paitapeerica. Aisati meeca iotacaajeitaquee jaoca icantari Quirishito, ayotantacari oshequi ipincatsaritaque Tasorentsi.

Irio Tasorentsi matacaaqueeri aquenquetsati.

⁷ Te noshintsivatsateji narori, aisati nojouquitapinitaca piojeitancari tecatsi catsini nomate apaniro, irinti Tasorentsi matacaaqueranoroi noquenquetsatacotiri. Irootaque ocameetsatantari pimpincatsajeiteri, eiroquea pipincatsatashitanatsi narori. ⁸ Oshequi yoashinonqueetaquena, iro cantaincha te irojocacayeetenaroji noquenquetsati; oshequi noquenqueshiretaque, iro cantaincha te noashireteaji. ⁹ Oshequi iquisheetetaquena, iro cantaincha te irojoquenaji Tasorentsi; ipasanatapiniyeetaquena, iro cantaincha te iroyenaji. ¹⁰ Oquempetaca peerani itimi oshequi coapinivetachari iroyerime Jesoshi, aisati itimi oshequi coapinivetachari iroyename narori. Apaniro Jesoshi yoavisacotap-initaqua, iojeitancari atiri aneanaji ini. ¹¹ Queario, ariorica anquemisanteri Jesoshi, aitaque incantajeitaree, incoajeite iroajeitee. Coajica, ari ancamajeitaque, iro cantaincha maaroni neajeitaqueeri meeca iojeiti aneasanotaji ini Jesoshi. ¹² Noquenquetsati, irootaque icoanteetacari iroyena; iro cantaincha piquemisantajeitaque, irootaque pinta-majeitancari anta inquitequi, pincantaitatiyempani.

¹³ Tempa isanquenatini peerani yora ayemisantaririnteni: “Noquemisantaque, irootaque noquenquetsatacantariri noshaninca irineane Tasorentsi”. Aisati noquem-pejeitacari narori: noquemisantaque, irootaque noquenquetsatacanteitaquempi. ¹⁴ Ayojeitaque ainiro yora oitinaajiriri Avincatsarite Jesoshi. Coajica irointinaasano-jeitajee arori, antsipajeitaree Jesoshi. Impoiji quiso avajetanajeri iriori. ¹⁵ Oshequi noquematsicatimentajeitaquempi, ineshinoncajeitajimpipi Tasorentsi: aisati iri-neshinoncajeiteri itsipapee atiri. Impoiji pimpasonquijeiteri maaroni, pincantajeite: “Tempa icameetsati Tasorentsi”. ¹⁶ Meecari, meeca, oshequi amaojeitaque, coajica anteashipajeitanaque, ancamajeitanaque; iro cantaincha eiro aquenqueshireajeitirotsi. Tempa icantani Tasorentsi iveshireacaajeitaquee maaroni quitaiteriqui. ¹⁷ Meeca capichaji yoashinoncaajeitaquee tseencantatsiri, iro cantaincha te antsipetashiteaji ashinoncaaca. Capichaji aneaquero meeca, iro cantaincha ioti Tasorentsi, impoijiquea cameetsa irisavicacaajeitajee anta inampiqui. Ancantaitatiyempani asavique cameetsa, eiro oquempetajatsi aca. ¹⁸ Eiro aquenqueshiretasanojeitirotsi pomerentsiyetachari aisati timayetatsiri aca quipatsiqui. Coajica tempa ompeajeitanaaja maaroni aneajeita-queri aca. Irointi anquenqueshiretasanotero caari aneapiniti meeca: ora timajeitatsiri inquitequi. Eiro opeajatsi irointi.

Iquenquetsatacotiro aquimoshirejeitantzari.

¹ Ayojeitaque ariorica ancamajeite aca, antimajeite inquitequi. Ontime avatsa cameetsari irovetsicajeeneri Tasorentsi, te irio atiri vetsicajeerone. Ancantaitatiyempani asavique anta. ² Aca quipatsiqui oshequi meeca ashinoncaapinijeitaca aisati oshequi aquenqueshirejeitaque; oshequi acoajeitaque ontine avatsa iroquerarri anta inquitequi. ³ Eiro apatiro ontine ashire, irointi ontine aisati avatsa. ⁴ Meeca oshequi aquenqueshirejeitaque: te ancoajeiveteaji ajocajero oca avatsa, iro cantaincha acoasanotaque avatsa iroqueratajantsineri. Acoaque ampashinitanaje ontimanteari avatsa caari tsoncanetajanchane. ⁵ Iriotaque Tasorentsi tasoncaventajeitaeeneri ontimanteari pashini avatsa iroqueratajantsineri. Quiso oajeitaquee Ishire ayojeitantzacari queario intasoncaventaquee, ⁶ irootaque aquimoshirejeitantzacari. Ayojeitaque atimajeiti aca quipatsiqui, tequeratsita antsipatasanoteari Avincatsarite. ⁷ Tequera aneajeitero inampi, iro cantaincha aquemisantaque, ayojeitantzacari anejero coajica. ⁸ Aveshireimentajeivetari Avincatsarite aca quipatsiqui, iro cantaincha acoasanoveta antsipatasanoteari anta jenoqui, anampitasanotearo. ⁹ Ainirrotatsiquera asaviqui aca, acoasanotaque iriveshireimentajeitee. Aisati, ajaterica anta ancoaque iriveshireimentajeitee. ¹⁰ Coajica incantacoventajeitee Quirishito. Ariorica meeca antayetero cameetsatatsiri, incavintsaajeitee; ariorica antayetero meeca caari cameetsatatsi, iroasanquetaajeitee.

Iquenquetsatacota irisati Pavoro.

¹¹ Oshequi apincatsajeitaqueri Avincatsarite, irootaque aquemisantacaantajeitacariri atiri. Ioti Tasorentsi nopincatsatasanotaqueri, nocoaque piojeitero aisati avirori. ¹² Te noncoyeji noneatsatajea narosati, iro cantaincha te aisati noncoyeji pimpashiventacotena. Yora cantimataquenari, oshequi ishemetaque irinti, ishemetimentayetaquero yantayetiri, iro cantaincha te incameetsashireteji. Icantimataquena iriori, iro cantaincha nocoaque pimpiateari. ¹³ Icanti: “Te iriotacoteaji Pavoro”, iro cantaincha apatiro nantiniri Tasorentsi icoacaaquenari. Otimi niotantari nintacotantaquemperi. ¹⁴⁻¹⁵ Oshequi inintaquena Quirishito, icavintsaasanotaquena. Niotaque icamimentajeitaquee maaroni: meeca oquempivetaca acamajeitaque maaroni, eiro amatapinitantajarotsi aisati caari cameetsatatsi. Aisati icoacaaquee eiro antanontajatsi arosati, irointi anteneri iriori icoacaaqueeri: tempa icamimentajeitaquee arori, itinaanaja aisati.

¹⁶ Peerani nojivetacari Quirishito atiri ini, te niovetearini Tasorentsi ini. Iro cantaincha meeca niotasanaqueri, niotaque jaoca icanta. Aisati yora ayemistaririnte, eiro atseenquiritsi: tempa ineacameetsajeitaqueri Tasorentsi. ¹⁷ Ariorica iquemisantaqueri ashaninca Quirishito, ari inashitacaacari iriori; eiro yantapinitirotsi yantaveitaniri, irointi impashinitanaje. ¹⁸ Iriotaque intacarori Tasorentsi. Itiancaqueri Quirishito icamimentajeitaquee, yoameetsajeitaquee, yaacameetsatantaqueeri iriori. Meeca icoaque ancamanteri itsipapee atiri inquemisante, iraacameetsatanteariri iriori. ¹⁹ Pinequero, itiancaqueri Quirishito iroameetsajeitee arori, irineacameetsajeitanta-jeeri. Eiro iquenqueshiretajirotsi aisati caari cameetsatatsi antajeivetaniri. Meeca itiancajeitaquee arori ancamantajeiteri itsipapee icoaque Tasorentsi iraacameetsajeiteri, maaroni. ²⁰ Queario, itiancaquena Quirishito: novajimpido irineane Tasorentsi. Aisati iriori Quirishito icoacaaquempi pinquemisanteri iraacameetsatantempiri Tasorentsi. ²¹ Tecatsi irante Quirishito caari cameetsatatsi, iro cantaincha itiancaqueri iriri icamimentajeitaquee. Oquempetimovetacari yantaquero iriori caari cameetsatatsi. Irootaque meeca yoameetsatantajeitajeeri Tasorentsi.

Jaoca icantapinita Pavoro.

¹ Meeca nantiniri Tasorentsi icoacaaquenari, irootaque nocantantimpri: icavintsaasanojeitaquempi. Eiro meeca pitseenquiritsi. ² Jero oca ocantiri irineane: “Picantaquena, aisati noquemisantaquempi; moncarataca pavisacotantajari, irootaque nintacotantaquemperi”. Meeca aisati narori noncamantempi:

moncarataca meeca pinquemisante, pavisacotantajeari. ³ Tecatsi nante, tecatsi pinquisantenari; cameetsa noamejeitaquempi piojitetantacari pavisacojeitaje. ⁴ Nocantani nantaveetiniri Tasorentsi, noquearioventaquero, piojitetantacari queario nopincatsatasanotaqueri. Nocantani nantaveetiniri, iro cantaincha oshequi noquematsicamentacari, nashinoncaapinitaca, maaroni. ⁵ Ipasanataquena soraro, yoiminqueapinitaquena. Iquisapinjeitaquena atiripee. Oshequi opomerentsitimotaquena noquenquetsatacajeitiri atiripee. Nosaquitapiniti tsiteniriqui. Noquemapinitaquero notasheni. ⁶ Iro cantaincha cameetsa nosaviqui, niotasanoquero irineane Tasorentsi, oshequi namavetaquero iquisaquena caari quemisantatsi, piojitetantacari queario nantaveetiniri Tasorentsi. Amitacotapinitaquena Ishire Tasorentsi, nocavintsantapiniti, ⁷ queario oni oca noametantapinitiri, te nontseeyaji. Itasoncacoventapinitaquena Tasorentsi, yojocacoventaquena, aisati imatacaaqua quena noquemisantacaqueri itsipapee atiri icameetsatantajari. ⁸ Ainiro pincatsataquenari aisati shirontimentaquenari. Ainiro neacameetsataquenari aisati cantimataquenari. Ainiro quemisantaquenari aisati tseencaquenari. ⁹ Te iriojeitenaji atiripee, iro cantaincha iotaquena Tasorentsi. Isareajeivetaquena atiri iroyename, iro cantaincha aneatsina noni. Oshequi noneacatsiyetacaro, iro cantaincha iquempoyeaquena Tasorentsi. ¹⁰ Noashiretacojeitacari ashancappee, iro cantaincha noveshireimentacari Tasorentsi. Nashinoncaavetaca narori, iro cantaincha noamejeitaqueri ashancappee cameetsa yoveshireimentantajariri Tasorentsi. Tecatsi nashitaarantea, iro cantaincha ipaquena Tasorentsi maaroni coiteimotaquenari.

Oshequi icavintsaajeitaqueri Pavoro yora corintosati.

¹¹ Noyemisantaririnte, nocamantasanojeitaquempi maaroni noquenqueshiretaqueri, tecatsi nomanapitsatemp. Oshequi nonintajeitaquempi. ¹² Te nomdashiventeaji narori noquenquetsatacaimpi, iro cantaincha naamaaca ainiro pipashiventajeita avinti. ¹³ Ari noquempetacaantajeitaquempi notomipee, nishintopee: oshequi nocavintsaajeitaquempi. Aisati nocoaque pincavintsaajeitena narori.

Icantiri Pavoro: “Te pinquempetasanotebari tseencantatsiri”.

¹⁴ Eiro quiso poiritsi yora caari quemisantatsi. Pamene, ariorica acameetsataque, ¿aquempetacarimpa caari cameetsatatsi? ¿Ashanincajeitacarimpa? Oquempetaca quitaiteri aisati tsiteniri: te omoncaratavacayeji, onashita. ¹⁵ ¿Ishanincatacarimpa Quirishito yora Satanashi? Ariorica aquemisantaque, ¿aquempetacarimpa tseencantatsiri? ¹⁶ ¿Omoncaratavacaacampa ivanco Tasorentsi aisati ovanco isheroncayetiri atiri? Pamene, quiso yojeitaquee Tasorentsi, yora aneasanotatsiri, tempa peerani isanquenayeetironi irineane iriori: “Quiso noajeitanqueri maaroni quemisantanari, eiro nojocajeitiritsi. Nontasoncaventajeiteri, aisati impincatsajeitena. ¹⁷ Pinijantareajeri tseencantatsiri, eiro quiso poajeitiritsi, eiro pantayetirotsi caari cameetsatatsi. Impoiji naacameetsatasanojeitempi maaroni, ¹⁸ nontomintajeitajempi, nishintojeitajempi, pincantajeitena: ‘Apa’. Irootaque icantaqueriniri Avincatsarite, yora Tasorentsisanori”.

7

¹ Ari, nonintane, ayojeitaquero oca icantaqueeri Tasorentsi. Eiro meeca antayetiroti caari cameetsatatsi, aisati eiro aquenqueshiretirotsi. Tsame cameetsa ampincatsatasanojeiteri Tasorentsi, anquearioventajeiteneri icoacayeeri.

Yora Pavoro iveshireimentajeitacari corintosati.

² Nocoaque paacameetsajeitena. Piojeteaque te noashinoncaajeitempiji, te nantacaajeitempiroji caari cameetsatatsi, te namatavijeitempiji. ³ Te noncantempiji ainiro pantane, teve. Tempa nocamantaquempi oshequi nocavintsaajeitaquempi, oshequi nonintajeitaquempi. Nocantani noquenqueshirejeitaquempi aca quipatsiqui. Aisati ariorica noncamaque, noncanteani nonquenqueshirejeitapajempi anta inquitequi. ⁴ Te nonquenqueshireacotempiji, niotaque piquemisantaquena, irootaque noveshireimentantaquempi, noquimoshireeventantaquempi. Oshequi yoashinonqueetaquena, iro cantaincha noveshireimentasanojeitaquempi.

Ineacameetsajeitaqueri Pavoro corintosati.

⁵ Peerani, nareetantacari Maseroniaqui, te nomateroji nomaooreapee: yoashinoncaap-inyeetaquena. Aisati oshequi notsaroashiretanaque. ⁶ Iro cantaincha tempa iveshireacaapinijeitaquee Tasorentsi. Itiancaquenari yora Tito, irootaque noquimoshiretanta-
carri. ⁷ Ari noveshireimentacari Tito iriori, itsipataquena. Aisati icamantapaquena paacameetsajeitaqueri chapinqui, aisati iveshireimentaquempi. Icamantaquena pi-
coiteajeitaquena, aisati piquenqueshiretanaca: eiro papiitajirotsi oca pantaveitaniri peerani. Aisati icamantaquena pinitajeitaquena. Noquemantavacariri icanta-
paquena, oshequi noquimoshiretanaque. ⁸⁻⁹ Nosanquenatantaquempirori peerani, noquenqueshiretacaajeitaquempi. Poashirejeivetanaca, iro cantaincha impoiji pojo-
caquero pantaveitaniri, paventajeitajari Tasorentsi. Te nantsipetearozi nosanquena-
jeitaquempi, te noashinoncaajeitelpiji. Peerani aquenqueshirejeitanaca, iro cantain-
cha meeca aquimoshirejeitaque. ¹⁰ Icoaque Tasorentsi avashiretanaquea ajocantearori
caari cameetsatatsi antajeitaqueri, ampashinitantajeari. Impoiji ancanteri iroavisaco-
jeitee. Ariorica amatero oca icoacaaqueeri, anquimoshirejeitanaca. Yoashirejeive-
taca aisati iriori tseencantatsiri, iro cantaincha te iraventajeitariji irinti Tasorentsi,
irootaque ijatantacari Sharincaveniqui. ¹¹ Poashirejeivetacani, iro cantaincha meeca
piquearioventaquero piquemisantajeitaque. Picoajeitaque cameetsa pisavicajeitanaca.
Oshequi piquenqueshirejeitaca, aisati pitsaroajeitaque, irootaque picoantacari namita-
cojeitelpiji. Piquemisantasanojeitaquena, aisati pojocacaqueri yoranqui yantanirove-
taniri. Pitsoteaquero maaroni nocantajeitaquempi, meeca cameetsa pisavicajeiti.
¹² Nosanquenatantaquempirori nocoacaaquempi pamitacoteri yoranqui antacotiriri
iriri, aisati yora iriri, pamitacoteri. Iro cantaincha nocoacaaasanotaquempi piojeitaque
pinitasanojeitaquena. Tempa irootaque icoacaaquempi aisati Tasorentsi.

¹³ Ari meeca noveshireimentajeitaquempi, aisati noveshireimentavajari Tito. Os-
hequi iquimoshiretapaaque, icamantapaajana: "Cameetsa isavicacaajeitaquena".
¹⁴ Chapinqui, tequeratsitani irijatashitempi, nocamantavaqueri: "Icameetsajeitaque
corintosati, cameetsa iraacameetsatavaquempi". Ari yareetantaquempi iotaque
queario nocantajqueriri, te nontseyaji. Aisati oquempetaca, te namatavijeitelpiji
avirojei. ¹⁵ Oshequi intantajeitaquempi: iotaque piquemisantajeitaqueri aisati pipin-
catsajeitavaqueri. ¹⁶ Aisati narori, noveshireimentajeitaquempi: niotaque pantapinita-
quero icoacaaquempi Tasorentsi.

Oshequi icavintsanti yora maseroniasati.

¹ Meeca, noyemisantaririnte, nocoaque noncamantempi oshequi ineshinoncajeita-
queri Tasorentsi maaroni yora ayemisantaririnte anta Maseroniaqui. ² Oshequi
yoashinoncaajeivetacari ishanincapee, iro cantaincha oshequi iveshireimentajeitacari
Tasorentsi. Aisati te irashitaarantasanoveteaji, iro cantaincha oshequi yapatojeitiniri
quemisantatsiri quirequi, ipiriri. Ioejitaque yashinoncaajeitaca ayemisantaririnte anta
Jerosarequi. ³ Te capichaji imperi, oshequi ipaqueri. Te irijojeiteji intsaneempari
iirequite. Tecatsi canterine: "Pincavintsayeri piyemisantaririnte". Irisati iotashitacha
icavintsairi. ⁴ Icantasanotaquena: "Nocoaque namitacojeiteri noyemisantaririnte". ⁵ Ari
niovetaca imperi quirequi, iro cantaincha imapocaquena icantajeitaquena: "Nanteneri
Tasorentsi paitarica icoacaaanari, aisati nantempiro paitarica pincantaquenari. Pinca-
mantena paitarica icoacaaquenari Tasorentsi". ⁶ Ari chapinqui intanacaro Tito icant-
ajeitaquempi: "Pampatoteneri jerosaresati piirequite". Ari cameetsa papatojeitaqueneri.
Meeca nontiancadjempiri aisati incantajempi pampatotasanojeiteneri aisati piirequite,
pincavintsaasanojeiteri piyemisantaririnte.

Icantiri Pavoro corintosati: "Pintacoteari ashinoncaincari anta Jerosarequi".

⁷ Oshequi panaacojeitaqueri pashinipee piyemisantaririnte: panaacotaqueri
piquemisantasanojeiti, piquenquetsatasanojeiti, piotasanojeiti, piquearioven-
tasanojiniri Avincatsarite icoacaimpiri, aisati pinintasanojeitaquena. Meeca
nocoaque panaacojeiteri pineshinoncatasanojeiteri ashinoncaincari. ⁸ Te noncoyeji

nomperanatempi pimpajeiteri ashinoncaincari, iro cantaincha ariorica pimpasanoteri, piotacaajeiteri itsipapee queario pinctasanojeitaqueri piyemisantaririnte. ⁹ Tempa aisati oshequi ineshinoncajeitaquee Avincatsarite Jesoquirishito. Oshequi yashitaarantaca anta inquitequi, aisati oshequi catsini ipincatsaritini, iro cantaincha ipocantacari aca quipatsiqui, yojocanaquero maaroni cameetsayetatsiri. Yashinoncaavetapaaca: tecatsi timimotajerine, itseencajeitaqueri ishaninca, maaroni. Yashinoncaimentaquee arori, oncanteata cameetsa irisavicacaajeitajee anta inquitequi. ¹⁰ Nocoaque pintacotasanoteari yora ashinoncajeitachari anta Jerosarequi: tempa avirojeitaque intasanotacarori peerani. ¹¹ Picoajeitaque pintacoteari: meeca, intimerica piirequite pintacotanteariri, jentsite, pampatoteri pimpacantanteariri. ¹² Ocameetsati picoaque pincavintsayeri. Ari itimirica piirequite, tempa ari pimataquero avinti pimperi. Iro cantaincha terica intimeji piirequite, eiro nocantashitimpitsi pimperi. ¹³ Te noninteqi ompomerentsitimojeitempi, aisati eiro opomerentsitimojeitiritsi itsipapee. ¹⁴ Timatsi pashitaarantajeitaca, meeca pincavintsayeri yora ashinoncaincari. Coajica ariorica irashitaarantaquea iriori, aisati ariorica pashinoncajeitaquea avirori, impoijiquea impiatempi incavintsaajeitempi avirori. ¹⁵ Tempa ocantini Sanquenarentsi: “Yora piotasanovetacarori mana, te ontimimotajeriji aisati timaarantajantsine. Irintquea yora aatsiri capichaji, te irashinoncayeaji irinti. Aitaque, imoncaratavacaajeitaca maaroni”.

Intianqueri Tito irineajeri aisati corintosati.

¹⁶ Ari iquempetaquena Tito, oshequi inintajeitaquempi, irootaque nopasonquitancariri Tasorentsi. ¹⁷ Nocantaqueri: “Pijatashitajeri aisati corintosati, pineeri”. Iro cantaincha te apaniro narori noncoacayeri, irisati coashitacha irineajempi aisati. ¹⁸ Nontianquemperi itsipa ayemisantaririnte intsipatanaqueari. Oshequi iquenquet-satapinitiro irineane Tasorentsi, irootaque iojeitancariri maaroni quemisantatsiri. Aisati avirori, piquemacojeitaqueri. ¹⁹ Aisati itiancajeitaqueri ayemisantaririnte intsipatanaquena narori anta Jerosarequi, iramitacotena naanajeneri ashinoncaincari quirequi. Oshequi icavintsaajeitaqueri ayemisantaririnte, irootaque incantanteari jerosaresati: “Icameetsataque Tasorentsi”. Aisati iriojeitanaque oshequi acavintsaajeitaqueri. ²⁰ Ari icarataque oshequi quirequi pintianqueneriri, oshequi picavintsaajeitaqueri. Irootaque nocoantacari intime tsipatenaneri naanajeneri. Icantetanacari: “Picoshitaqueri”. ²¹ Te apaniro noncoaque irineacameetsatena Tasorentsi, aisati nocoaque irineacameetsajeitena ashinincaphee. ²² Aisati pineavajeri pashini ayemisantaririnte nontianqueri. Niotaqueri, iquearioventaquero iquemisantaque. Nocamantaqueri oshequi piquemisantajeitaque aisati oshequi picavintsaajeitaque, irootaque icoasantacari irijate irineempi. ²³ Yora Tito, quiso yoapinitaquena, yamitacotapinitaquena nintacojeitaquempi. Aisati yora intsipajeitari irineempi, iriojeitaque itiancanepee ayemisantaririnte aca. Cameetsa inajeiti, quemisantasanotiriri Quirishito. ²⁴ Ari oshequi nocantapinjeitaqueri quemisantatsiri aca: “Icameetsajeitaque corintosati”. Ariorica pineavaqueri yoca, paacameetsatasanotavaqueri iriojeitancariri queario oca nocantaqueriri.

Icamantaqueri paita icoacantariri irineshinoncajeiteri jerosaresati.

¹⁻² Jero oca nocantaquemperi: “Pintacoteari piyemisantaririnte”. Iro cantaincha tempa piotasanotaque picavintsaajeitaqueri. Niotaque te pintsaneempariji piirequite, irootaque nocamantantariri maseroniasati: “Ocarataque meeca aparoni osarintsi icoantacari corintosati intianqueneri jerosaresati quirequi”. Iotacojeitaquempi, irootaque icoasanojeitacari inquempejeitempi, irintacojeitantea iriori. ³⁻⁴ Ari nocantaqueri: “Icoaque corintosati intianqueneri jerosaresati iirequite”. Meeca nontianqueri yoca irijivatanaquena, incantempi pimpiotasanotanteariri. Nimpoitanaje narori noneajeitempi, ariorica intsipatanaquena itsipapee maseroniasati. Ariorica irineapaaquempi pivioncaqueneri jerosaresati piirequite, iriojeitapaaque queario nocantaqueriri, aisati eiro nopashiventatsi narori. ⁵ Ari nocantaqueri yoca ayemisantaririnte

irijivatanaquena, pampatojeitanteeariri piirequite. Avirojei cantashitachari peerani: "Nintacoteari ashinoncaincari", te naro cantasanotempine.

⁶ Ariorica pampatoteri piirequite, piquempevetacari panquiveetatsiri: ariorica impanquitero oshequi oitsoqui, irayero coajica oshequi, impiotero. Iro cantaincha impanquiterorica capichaji, ari capichaji iraye. ⁷ Piojeitaque jaoca incarate quirequi picoaqueri pimperiri. Aitaque incarataque pimperiri. Eiro pitsaneashiretaritsi, aisati eiro piperanataritsi itsipapee. Iro icoaqueri Tasorentsi ariorica pintacoteari, pinquimoshiretanaque. ⁸ Tempa ioti Tasorentsi icavintaasanoquempi catsini, eiro ishinetajimpitsi pashinoncaajeitea. Intimacayempiro maaroni coiteimotaquemperi, impasanotempiro ontimanteari pintacotanteeariri aisati itsipapee. ⁹ Tempa aitaque ocantini Sanquenarentsi: "Te pantsipetashiteaji pintacojeitari ashinoncaincari, eiro catsini ipeacotarotsi Tasorentsi picavintsanti". ¹⁰ Yora Tasorentsi ipapinitiri panquiveetatsiri oitsoqui impanquitanteearori, aisati ipapinijeitaquee avajeitari. Tempa aisati irishequianaquempiro timimojeitempineri ontimanteari pincavintaajeitaqueeari ashinoncaincari. ¹¹ Aiquero irovanaaqueempiro Tasorentsi, pintacotasanoanteariri itsipapee. Impoiji impasonquijeiteri iriori Tasorentsi, irineacameetsatasanojeiteri. ¹² Ariorica intacotantea arori, ampasanoteri ashinoncaincari coiteimotacariri. Iro cantaincha aisati avamejeiteri impasonquijeiteri Tasorentsi. ¹³ Ariorica pincavintaajeiteri piyemisantaririnte, iriojeitanaque iriori queario avirojeitaque quemisantasanojeitiriri Quirishito. Aisati iriojeitanaque te pintsaneempariji piirequite, irointi oshequi pintacotantaca, impoiji irineacameetsajeiteri Tasorentsi. ¹⁴ Oshequi iquenqueshireitaquempi, aisati oshequi icantapinitiri Tasorentsi iramitacojeitempi. Iojeitaque oshequi catsini ineshinoncajeitaquempi Tasorentsi. ¹⁵ Tsame ampasonquijeiteri, tempa icavintaasanojeitaquee catsini.

10

Icamantacoventaja irisati Pavoro.

¹ Ari itimi quisauenari, cantajeitaquemperi: "Ariorica itsipajeitaquempi Pavoro, itsaroacaajeitaquempi. Ariorica itimi arejiquí ipacantaquempi sanquenarentsi, iquisat-sataquempi". Ari timatsi noninti noncamantempi. Tempa ineshinoncajeitaquee Quirishito, te irishintsitsateeji: aisati noninti nonquempetempi narori. ² Timatsi yora cantimpipi: "Te iranteroji Pavoro icoacaavtariri Tasorentsi, irointi yantashitacaro icoayetiri iriori". Terica irimajerete iriori, pamenavaquenaya eiro nontsaroacaapaaritsi, irointi nonquisatsatapaquieri. Iro cantaincha te noncoyeji nonquisat-sajeitapeempi, irointi nocoaque aacameetsatavacaajeitea maaroni. ³ Aca quipatsiqui timatsi camaari quisajeitaqueeri: tecatsi ancantea amanateri; te inquempejeiteariji atiripee amanajeitanteeariri. ⁴ Te ontimeli amanatanteeariri, iro cantaincha timatsi irinti Tasorentsi tasoncacoventajeitaqueeri ampiajeitanteeariri camaari. ⁵ Timatsi yora piatsatacariri Tasorentsi, aisati cantiriri ashaninca: "Eiro piquemisantiritsi Tasorentsi". Iro cantaincha itasoncacoventajeitaquee Tasorentsi aimajerentajeitanteeariri maaroni piatsajeivetacariri, aisati anquemisantacanteeariri, irishiretasanotanteeariri Quirishito. ⁶ Aisati anta pinampiqui, niotaque piquemisantajeitaquena, iro cantaincha naamaaca itimaarantaque aparopee piatsataquenari. Irintiquea yora piatsataquenari, noncanteri Tasorentsi iroasanquejeiteri.

Icantiri Pavoro: "Narotaque itiancane Quirishito".

⁷ Ainiro caveaquetenari, aisati tseencaquenari. Ijivetaquena te naro itiancane Quirishito. Icantacotashitaca irisati: "Naro itiancane Quirishito", iro cantaincha noncantempi nainti: narosanotaque nainti itiancane. ⁸ Nocantapinitaquempi itiancaquena, iro cantaincha queariotaque oca nocantimpipi. Icoacaquena Avincatsarite nonquemisantacaasanojeitempi: te incoacayenaji nontseencacaajeitempi. Nantiniri icantaquenari, irootaque caari nopashiventanta. ⁹ Eiro pijititsi notsaroacaajeitimpipi, irootaque noquisatsatantaquemperi nosanquenatitaquemperi peerani. ¹⁰ Timatsi cantimpipi: "Isanquenatashita Pavoro, te iriojeji. Iquisatsatashitaquempi. Ariorica

impoque aca, pineavaqueri tecatsi pimpincatsatimenteriri. Te irioteji inquenquetsat-acaasanojeitempi". ¹¹ Pincamanteri iriori: "Ariorica irareejeitempi Pavoro, incaman-tasanotapaajempi oca isanquenajeitimpri. Eiro ipashinitirotsi irineane".

Te oncameetsateji ashemeti, irointi aveshireimenteari Avincatsarite.

¹² Ari ineacameetsajeitashitaja irisati yora tseenajeitanari. ¿Paita noncoanteari nonquempejeiteari iriori? Icantajeitaque: "Nomoncaratavacaajeitaca nanti, nocameet-satasanojeitaque". Queario, imoncaratavacaajeitaca, iro cantaincha te iriojeiteji, te aneeroji iojeitantari. ¹³ Te noninteji noneacameetsatashitea narosati: apatiro no-coaque nomataqueneri Tasorentsi maaroni icoacaquenari. Niotaque icoacaquena nonquemisantacaasanojeitempi avirori. ¹⁴ Te nanteroji caari icoacaana, iro cantaincha tempa narotaque intasanotacarori noquenquetsatacaajeitimpri peerani. Narotaque nanti camantajeitaquempi ariorica pinquemisantajeiteri Quirishito, iroavisacojeit-empri. ¹⁵ Te noninteji noncantashitea nomataquero nanti imataqueri iriori: tempa onashiyetaca. Nocoaque aiquero pijajeitatiye avirori pinquemisantasanojeitanaque. Impoiji novaanajea narori, ¹⁶ nonquenquetsatacaajeiteri itsipapee atiri aisati, yora caariquera iojeitatsi. Eiro nompotiritsi itsipapee quenquetsatacantatsiri, eiro nocan-tashitatsi naro quemisantacairiri yora iquemisantacairi iriori. ¹⁷ Te oncameetsateji ashemetimentero amataqueri arori, irointi ocameetsati aveshireimentearo imatacaa-jeitaqueeri Avincatsarite. ¹⁸ Te incameetsateji neacameetsatashitachari irisati, irin-tiquea cameetsatatsiri yora ineacameetsatiri Avincatsarite.

11

Yora Pavoro iquenquetsatacotaja irisati, aisati iquenquetsatacotiri quisqueriri.

¹ Nocoaque nonquenquetsatacotaja aisati. Terica aneeroji niotantari, iro cantaincha, eiro pishemanatsi. ² Pamene, tempa icoasanotapiniti shirampari irayero caari neiri shirampari. Ariorica oneaqueri pashini shirampari impiincaquero, irojocajero. Aisati noquempetaca narori, nocoaque nonquemisantacaasanojeitempi irineacameetsatasano-tantempi Tasorentsi, eiro yojocantimpitsi. ³ Peerani yora maranque yamatavitaquero Eva. Queariya, iquempetacantimpicari yoranqui: yamatavijeitimpicari. Piquemisan-tasanojeivetacari Avincatsarite, pipincatsatasanojeivetacari. Yojocacaimpirocari am-atavitantatsiri. ⁴ Te pinquenqueshiretimateaji. Piquemisantashijeitavacari maaroni jatashijeitimpri. Onashita oca iquenquetsatacotueri Jesoshi. Nocoacaquempi oame-jeitempi Ishire Tasorentsi, icoacaquempi iriori iroamejeitempi camaari. Nocaman-tajeitaquempi pinquemisanteri Jesoshi pavisacojeitajeari, onashita yoamejeitaque-mpiri iriori amatavijeitimpri. ¿Paita piquemisantajeitariri? ⁵ Itseenajeivetana iriori, iro cantaincha ¿paita noncoanteari nompincatsateri iriori? ⁶ Yaamaavetaquena te nonquenquetsate cameetsa, iro cantaincha timatsi nioyeriri. Piojeitaquena, piojeiti timatsi nioyeriri.

⁷ Pamene, peerani iroaqera noquemisantacantauquempi, tecatsi noncoacoti-majeitempi, iro cantaincha naamaaca ocameetsaveta noncoacotempime. ⁸ Naaque iirequite ipaquenari itsipapee quemisantatsiri nomatantarori noamejeitaquempi.

⁹ Nosaviquimojeitantimpri, nashinoncaavetaca, iro cantaincha te noncamantempiji. Impoiji iponeaca Maseroniaqui quemisantatsiri, ipapaaquenari aisati quirequi. Tecatsi catsini noncoacojeitempi avirori. ¹⁰ Niotaque irootaque icoacaquenari Quirishito. Meeca noncamantajeiteri maaroni acayasati tecatsi noncoacojeitempini peerani.

¹¹ ¿Paita noncamantanteiariri? ¿Pijitimpá te nonintajeitempi? Ioti Tasorentsi queario nonintasanojeitaquempi. ¹² Iro cantaincha nocoaque niotacaasanojeitempi te nonquempeteariji yora itsipapee oamejeivetimpri, amatavijeitimpri. Pipinatiri, irootaque yoamejeitantaquempi iriori. Naroqua nanti, tecatsi noncoacotempí.

¹³ Te intianqueriji irinti Tasorentsi. Yamatavijeitaquempi. Ishiacantashitaca itiancane Quirishito. ¹⁴ Aitaque icanta, yamatavitanti, iquempetacari Satanashi, yamatavitanti iriori. Ishiacantashitacari iriori inampire Tasorentsi. ¹⁵ Aitaque icantari quemisantiriri camaari: ishiacantashitaca iquemisantiri Tasorentsi. Iro cantaincha coajica impiateari Tasorentsi, iroasanquetaajeiteri.

Yora Pavoro yanaacojeitiri quisqueriri, iotasani.

¹⁶ Nampiitajempiro: eiro pijitashitanatsi te aneeroji niotantari. Pijitenarica caari iotatsi, pinquenqueshiretero oca: capichaji nonquenquetsatacota naro. ¹⁷ Te incamantenaji Avincatsarite nonquenquetsatacota, te incoacaayenaji noshemetashitea. ¹⁸ Iro cantaincha ishemejeiti irinti yora quisajeitaquenari: meeca nonquempeteari narori, noshemete. ¹⁹ Pijijeiveta piojeitaque avinti, pitseencaquena, iro cantaincha piquemisantashitaquena. ²⁰ Irintiquea yora amatavijeitimpri, te pintseenqueriji irinti. Oshequi iperanajeitaquempi, yaapitsajeitaquempi piquirette, ishemetimojeitaquempi, aisati ipasavoronirojeitaquempi. ¿Paitaquea? ²¹ Queario, te nioteji nonquempeteari.

Ari ainiro oshequi ishementimentiri: meeca nonquempeteari, oshequi noshemetimentaquero narori, onquempeteame te aneeroji niotantari. ²² Ishementimentaquero ijoriotaque. Tempa narotaque narori jorio. Ishanincatacari Ishiraeri, yora icoyeane Tasorentsi. Aisati noquempetacari narori. Icant: "Noshanincatacari Avaramani". Aisati narori, noshanincatacari. ²³ Icantashiveta: "Nantiniri Quirishito icoacaquenari". Oshequi nanti nanaacotaqueri. ¿Paitaquea noshemetantacari? Oshequi noqueari-oventaquero nantiniri Quirishito icoacaquenari, irootaque yoiminqueanteetapinive-taquenari caravosoqui, ipasatapiniyeetaquenari. Oshequi nocamapinivetaca. ²⁴ Yora nojorioririnte ipasatapinita quena, tac, tac, tac, tac, ocarataque 39 ipasataquena. Pashini quitaiteri aisati 39 ipasanatajana, tac, tac, tac. Aisati iquempetajana pashini quitaiteri, ocarataque quitaiteri apapacoron. ²⁵ Pashini quitaiteri ipasanatapinita quena, tac, tac, tac. Impojini aisati ipasanatajana, tac, tac, tac. Iro aisati ipasanatajana. Iro ipasatantanari inchaquipee. Pashini aisati ipichanayetaquena mapi, pitsec, pitsec, pitsec. Aisati noquenavetanaja pitotsiqui antearojaqui incajare. Jero otsitianaque, irovetainch nampiinqueme. Impoiji aisati noquempetapinitaca, nampiinqueme. Aparoni quitaiteri notsatajataca nianquijaqui, noquitaitetacotaque. ²⁶ Oshequi noquenaquenayetanaque noquenquetsatantacari. Oshequi nampiinqueme eniqui. Oshequi icoshitapinita quena coshitantatsiri, yoashinoncaapinita quena. Iroyename noshaninca, aisati itsipapee atiri. Iroyename savicatsiri nampitsiqui. Notimpinacavetaca inchatoshiqui, nashinoncaavetaca anta. Irovetainch nampiinqueme antearojaqui incajare. Yoashinoncaquena shiavetachari iquemisanti. ²⁷ Oshequi opomerentsitimotaquena, oshequi nashinoncaapinitaca. Oshequi te nomateroji nomaye tsiteniriqui. Noquemapinita quero notashe aisati nomire. Oshequi quitaiteri te ontimeti noyeari. Noquemaquero noatsincare, te ontimeti noicoro.

²⁸ Aisati nocantani noquenqueshiretapinita queri ayemisantairinte, noocoacaasanota-queri inquemisantasanojeite. ²⁹ Ariorica yoashiretaca ayemisantairinte, noashiretaca narori. Itimirica oashinoncairiri, noquisacotacari narori. ³⁰ Ari noshemevetaca, iro cantaincha nocamantajeitaquempiro oca piojeitanteari te naro matashitearone, irinti Tasorentsi matacaanarori paitapeerica. ³¹ Iriotaque Iriri Avincatsarite Jesoquirishito, tsame ancantaitatiyempani ampincatsajeiteri maaroni. Iotaque iriori te nontseeyaji. ³² Peerani ipincatsariventantini yora Aretashi. Itianquiri ivincatsaririnte ipincatsariventanti anta Tamashicoqui. Iriotaque aacantenanemer. Icoacoajeivetaquena soraropee, ³³ iro cantaincha yaanaquena ayemisantairinte anta tantotsiqui shoncarori nampitsi. Yataitacaanaquena irosati omoroquinta, impoini yoaniitacotajana quipatisqui. Irootaque nomatantarori noshiapitsatacari pincatsari aacantenanemer.

12

¹ Pamene, te oncameetsaveteji nonquenquetsatacota naro, iro cantaincha noquaque noncamantempi noneaqueri narori. Aisati noncamantempi icamantaquenari Avincatsarite. ²⁻³ Ocarataque meeca 14 osarintsi yaanaquena Avincatsarite anta inquitequi jenoqui, anta oncameetsaitetasano catsini. Ójataquerica novatsa, te nioteji: apanirorica ojataque noshire. Ioti Tasorentsi irinti. ⁴ Tecatsi noncantea noncamantempiro maaroni noquemaqueri anta. Arioricame nomavetaquearome, eiro icoacaananrotsi Tasorentsi noncamantempiro. ⁵ Oshequi noveshireimentayetacaro noneayetaqueri, iro cantaincha tecatsi noncantea noshemetimentearo. Irinti noncamantempi te

noncameetsateji narori. Tecatsi nomate narori: iriotaque Tasorentsi mataacaanarori paitapeerica, irootaque noveshireimentantacariri. ⁶ Noveshireimentaquearome nantaqueri narori, eirome optimime niotantari. Aisati nontseyame: pineaquero, tecatsi nomate apaniro. Te noninteji noncamantempiro nomayetirica narori. Timatsi pineacotaquenari aisati piquemacotaquenari: moncarataca, eiro novaimpirotsi aisati.

⁷ Timatsi oshequi iotacaaquenari Tasorentsi, iro cantaincha te incoacayenaji noshemetimentearo. Irootaque ishinetantacariri Satanashi yoashinoncaaquaena, noquematsicatantacarori nojouquitaca. ⁸ Ocarataque mava nocantavetacari Avincatsarite: "Poavisacotajena", ⁹ iro cantaincha icantaquena: "Noncavintsayempi, moncarataca. Eiro noavisacotimpitsi, iro cantaincha nontasoncacoventempi pamavetantearori". Meeca noveshireimentacaro oca noquematsicatacari: niotaque meeca itasoncacoven-taquaena Quirishito. ¹⁰ Iriotaque noveshireimentasanotacari. Te noshintsiteji, ishirontimentajeitaquena itsipapee, noquematsicayetacaro paitapeerica, iquisheetapinitaquaena, nashinoncaapinitaca, iro cantaincha noveshireimentacari Quirishito. Iotaque te noshintsititeji, iro cantaincha ishinstitacaquaena.

Cameetsa isavique Pavoro anta Corintoqui.

¹¹ Pineaquero, oshequi noquenquetsatacota jara narosati. Oncameetsateme pineacameetsatename, pinquenquetsatacota name, iro cantaincha, te. Irootaque noquenquetsatacota tajari narosati. Te noncameetsateji narori, tecatsi nomatasanote. Iro cantaincha te iranaacojeitenaji yora oamejeivetimpri pineacameetsajeivetri. ¹² Peerani, notsipatantaquempi, jentsiquero noamejeitaquempi, niotacaasanojeitaquempi queario itiancasanotaquaena Tasorentsi. Pineacojeitaquaena imatacaquaena notasoncantayetaque, nomayetaquero caari pineapiniti. ¹³ Nintacojeitaquempi, maaroni. Noquempetacaantajeitaquempi maaroni quemisantatsiri anta otsipapeequi nampitsi. Apatiro avinti, te noncantajeitempi: "Pimpena coiteimotaquenari". Ocameetsaveta noncantajeitempime piojiteameric. Eiro piquishimentanarotsi te noncamantempij peerani. ¹⁴ Irotaintsi meeca nojate noneajantempi aisati. Eiro opomerentsitimojeitimpitsi, tecatsi noncoacojeitempi. Apatiro nocooque pinquemisan-tajeitena. Noquempetacaajeitaquempi notomipee. Atomipee te impapiniteeji coiteimo-teeri, ainti apapinitiri coiteimotariri irinti. ¹⁵ Nocoaque nainti nonquearioven-tasanotempiro maaroni nantaqueri pinquemisantasa nojeitanteari. Oshequi catsini nonintasanojeivetaquempi avinti, iro cantaincha avirori, te pimpiatenaji pincav-intsayena. ¹⁶ Ari picantajeiti: "Queario, tecatsi incoacojeitee Pavoro, iro cantaincha timatsi ionirotantari iriori. Aamaaca yamatavijeitaquee, yaantarori paitapeerica". ¹⁷ ¿Timatsimpa yaitaquaempiri yora notiancaquempi? ¹⁸ Chapinqui notiancaquempi Tito aisati notiancaqueri itsipa ayemisantaririnte. ¿Timatsimpa yaitaquaempiri iriori? Tempa iquempetaquaena narori: tecatsi incoacojeitempi.

Oshequi iquenqueshiretaque Pavoro.

¹⁹ Pijitashijeivetaca apatiro nocooque pineacameetsajeitena. Noquemisantaqueri Quirishito, noshaninca, irootaque nocantacari nonquemisantacaajeitempi. Iotaque Tasorentsi queario nocantaquempi. ²⁰ Oshequi noquenqueshiretaca meeca. Naamaaca ariorica noneajeitapaaquempi eiro noneacameetsatasanojeitapaimpitsi. Aisati naamaaca eiro pineacameetsatavaquenatsi narori. Naamaaca noneapaaquempi piquisat-satavacaaca, piquisavacaaca, picantimatavacaajeitaca, otimi oshequi cantaantsi, pishe-mejeitaque, maaroni; te pisavicate cameetsa. ²¹ Naamaaca ariorica nareetajempi aisati noashiretacotapeempi. Iro noashiretacotantempi, yoametaquaena Tasorentsi te oncameetsateji pantajeitaqueri. Nomashiventacayeari yora caari jocajiro caari cameetsatatsi yantapiniyetaqueri: yora mayempiyetirori tsinane, aimentarori ijina, airori iyashiane, maaroni.

¹ Ari ocarataque apite noneantajantimpire peerani, meeca noneajantempi aisati. Ari ocantini Sanquenarentsi: "Intimerica apite, ariorica mava neacoterineri ashaninca irantero caari cameetsatatsi, piotasanotaque queario yantasanoquero, oncameetsatanteari poasanquetaajeiteri". ² Peerani apitetaque nocantajeivetacari yora antirori caari cameetsatatsi, aisati meeca nosanquenajeitaqueneri iroimpacantajearori oca yantayetaqueri. Eirorica yoipacajirotsi eiro nocavintsaajiritsi aisati. ³ Impoiji piojeitanaque queario novaajeitimpire irineane Quirishito. Te intsaroacaajeitempiji iriori, irointi oshequi ipincatsariventajeitaquempi, itasorentsitasanotaque. ⁴ Ipajacotanteevetacariri peerani Jesoshi, te irishintsiveteaji, iro cantaincha itasoncacoventaqueri Tasorents, yaneantajari meeca. Te noshintsiyeiteji narori, noquempevetacari Quirishito peerani. Iro cantaincha itasoncaventaque, nomatantarori nopincatsariventajeitaquempi. ⁵ Piotacojeitea avisati, piojeite queariorica piquemisantasanojeitaque. Tempa pioti quiso yoajeitaquempi Quirishito, itasoncaventajeitaquempi. Terica quiso iroyempi, te pinquemisanteji.

⁶ Nocoaque piojeitaque avirori noquemisantasanoque nainti. ⁷ Nocantapinitiri Tasorents iramitacojeitempi eiro pantantarotsi caari cameetsatatsi. Te noncoaveteji pineacameetsatashitena, irointi nocoasanotaque pincameetsatasanojeitanaque. Irompa nainti, eirorica pineacameetsatana. ⁸ Tecatsi noncantea nompashinitero irineane Tasorents: tempa oqueariotasanoque; nocoaque pinquemisantasanojeitero, maaroni. ⁹ Iro nocoacaasanojeitaquempi pinquemisantasanojeite. Ariorica pinquemisantasanojeite, moncarataca, eiro ocantimoneentanatsi pitseencanarica. Aitaque nocantiri Tasorents iramitacojeitempi pinquemisantasanojeitanteari. ¹⁰ Noshintsitsajeitaquempi meeca, oncanteata ariorica nareejeitempi tecatsiquea noshintsitsatimentapeempri aisati. Icoacaaquena Tasorents nompincatsariventante, iro cantaincha te noncoyeli noasanquejeitempi, irointi namitacojeitempi pinquemisantasanoanteari.

Ivetsajeitari.

¹¹ Ari, noyemisantaririnte, piveshireimentajeiteari Quirishito. Pinquenqueshirejeitea, eiro papitiapirotsi aisati caari cameetsatatsi. Poveshireacaavacaajeitea, paacameetsatavacaajeitea, impoiji quiso iroajeitempi Tasorents. Tempa oshequi inintajeitaquee, cameetsa isavicacaajeitaquee. ¹² Piquemisantasanojeitirica, paacameetsatasanotavacaajeitea: eiro piquisavacaajeitajatsi aisati. ¹³ Ivetsajeitimpi maaroni ayemisantaririnte aca. ¹⁴ Nocoaque meeca irineshiloncajeitempi Avincatsarite Jeso quirishito, irinintajeitempi Tasorents, aisati quiso oajeitempi Ishire.

Ari ocarati nosanquenajeitimpri: *Pavoro*

YORA PAVORO ISANQUENATINIRI CARASHIASATI

Ivetsatari Pavoro carashiasati.

¹⁻² ¿Savicajeitatsimpi, carashiasati? ¿Tecatsimpa oajeitempive? Narotaque aca Pavoro sanquenatimpiori oca. Te naro itiancane atiri, te incantenaji atiri: “Pinquenquetsate”. Irintiquea tiancana yora Jesoquirishito noquenquetsatacapinitiri atiri. Aisati iriri iriori itiancaquena: yora oitinaajiriri. Nocarajeitaqueri aca quemisantajeitatsiri, nosanquenajeitaquempiro noyemisantaririnte, maaroni. ³ Nocantapinitiri Apa Tasorentsi: “Pineshinoncajeiteri carashiasati, cameetsa pisavicaaajeiteri”; aisati iriori nocantiri Avincatsarite Jesoquirishito. ⁴ Tempa irisati shinetainchapeerani ipajacotanteetacariri, irootaque inintacaquerir Apa Tasorentsi. Te ancameetsajeiveiteani, irootaque ipajacotimentantaqueeri, aisati yoavisacojeitantzajeeri, maaroni. Te incoacayeriji tseencantatsiri irantacaajeitajero caari cameetsatatsi. ⁵ Tsame aneacameetsatasanojeiteri Tasorentsi, ancantaitatiyempani. Aitaque ancantajeiteari.

Itimi aparo oavisacotantatsiri: yora Jesoquirishito.

⁶ Noquenqueshireacotaquempi, jaoca picantajeitacari. Icoyeaquempi Tasorentsi, irootaque ineshinoncatantaquempi Quirishito. ¿Picatimaitacampa pojocajerome piquemisantiri? ¿Pijitimpa eiro imatirotsi iroavisacotajempi? ¿Picoaquempa pashini oavisacotempineri? ⁷ Queario nocamantajeivetaquempi jaoca pincanteari pavisacotantajeari. Eirorica piquemisantana, eiro pavisacotajitsi. Iro cantaincha timatsi pashini, comitacaajeitaquempi. Icoaque pashini irantacaajeitempime, icantavetimpi: “Eiro imatirotsi Quirishito iroavisacotempi”. ⁸ Ariorica nompashiniterome oca nocamantitaquempi, oncameetsateme iroasanquetaquenname Tasorentsi, intianquenname Sharincaveniqui. Aisati inquempetea iriori, ariorica impashiniterome inampire Tasorentsi, oncameetsateme aisati iroasanquejeiterime Tasorentsi. ⁹ Aitaque nocamantitaquempi, meeca nampiitajempiro: intimerica pashiniteroneri nocamantitaquempi, aitaque iroasanquetaqueri Tasorentsi. ¹⁰ ¿Janicampa nocoaqueri nonquimoshiretacayeri? ¿Iriompa atiripee? Teve, tempa irinti Tasorentsi. ¿Iriompa atiri nocoaque noveshireacayeari? Noncoaqueeme noveshireacayeari atiri, tecatsi noncanteame nantenerime Quirishito.

Jero oca icamantapinitiriri Pavoro.

¹¹ Meeca, noyemisantaririnte, piojeitaque nocamantajeitaquempi jaoca acantajeitajari avavisacojeitantzajari. Te irio atiri ashitearone irineane. ¹² Caari ini atiri iota-ccaanarori oca, te irio oametenarone atiri. Irinti Jesoquirishito iotacaanarori maaroni. ¹³ Piojeitaque jaoca nocantaveitaniri peerani: naro jorio, nomoncaratasanoveitaroni maaroni yamejeitari noshanincapée. Piojeitaque aisati noquisaveitarini maaroni quemisantajeitiriri Tasorentsi. Nocantirive, nocoaveitani nojocacaajeiterime iquemisantajeiti. ¹⁴ Queario, nomoncaratasanovetacaro maaroni yamejeitacari noshaninca: nanaacojeitaqueri maaroni noshiramparirinte. Aitaque, nomatasanoveitaroni maaroni yamejeitaniri noshanincani peeraniniri. ¹⁵ Iro cantaincha peerani, tequeratsitani nontimeni, iotitanani Tasorentsi. Ineshinoncatitanani, irootaque icoyeantajanari yoavisacotajana. ¹⁶ Inijaaquenari itomi, noneasanotantajariri: nioti jaoca icantari. Caari pinajeiveta noshaninca, iro cantaincha icoacaaquena nocamantajeitantzajimpire jaoca icantajeitaqueeri yoavisacojeitantzqueeri. Te nosampitashiteariji itsipapee atiri: “¿Paita nanteri?” ¹⁷ Tempa itiancaquena Tasorentsi irinti noquenquetsati. Te nojateji Jerosarequi nosampiteri itsipa itiancane: yora ijivataqueri itiancaqueri, ainti nojataque Araviaqui. Impoiji nopianaja aisati Tamashicoqui.

¹⁸ Ari mava osarintsi nosavicanaque, impoiji nojatanaque Jerosarequi, irosati noneantaapaacari Sejashi. Ocarataque quitaiteri 15 nosaviquimotaqueri. ¹⁹ Aisati noneaqueri Santiaco, yora irirenti Avincatsarite. Te noneeriji itsipapee iroamereni Jesoshi. ²⁰ Ineaquena Tasorentsi, iotaque te nontseyyaji. Queariotaque oca nosanquenataquemperi. ²¹ Impoiji aisati noquenayetanaque anta Shiriaqui aisati Shirishiaqui. ²² Tequerani iriojeitenani quemisantajeitiriri Quirishito anta Joreaqui, ²³ irointi iquemacotashitaquena noquemisantaji. Icantajeitaque: “Iquisajeiveiteeni maaroni, icoaveitani impoyereajeiteeme, iro cantaincha meeca icamantajeitaqueri atiri: ‘Pinquemisantajeitiriri Quirishito’”. ²⁴ Iveshireimentaquena quemisantajeitatsiri anta, icantajeiti: “Tempa icameetsati Tasorentsi, yoavisacotaqueri Pavoro”.

2

Iopianaja aisati Pavoro Jerosarequi.

¹ Ari opeeraniihanaque, ocarataque 14 osarintsi, ari nopianaja Jerosarequi. Notsipatanacari Verenave aisati naanajiri iriori Tito. ² Iotacaquena Tasorentsi ocameetsati nojataque. Apaniro nojatashijeivetacari yora jivatacaajeitiriri ayemisantaririnte, te nojatashijeiveteariji maaroni quemisantajeitatsiri. Nocamantanotaqueri oca nocamantapinijeitimpiri. Nosampijetiri: “¿Ocameetsatimpa oca nocamantajeitiriri yora itsipapee atiri? ¿Natsipetashitarompa?” Icantajeitana: “Je, cameetsa; te pantsipetashitearoji”. ³ Pamene, notsipatacari iriori Tito. Caari ini jorio, iro cantaincha te incantajeiteriji: “Pintoyeantea”. ⁴ Aisati itimi iriori cantavetachari: “Naro piyemisantaririnte”, iro cantaincha caari ini. Te noncajemeriji: iqueashitapaaca anta noametavacaajeitanta. Iro iqueantacari, icoaque iriote nomoncarajeitirorica isanquenare Moishishi, icoajeiveta intoyeantacaajeiteeme. Te irioteji avavisacojeitaja maaroni quemisantajeitaquerirri Jesoquirishito, te imperanajeiteejri Quirishito amajeitero yamejeitacari joriopee. ⁵ Te nonquemisantimateriji yora amatavitenanemerri. Nocoasanotaque piotasanotero jaoca acantajeitajari avavisacotantajari.

⁶ Tecatsi pashini incantena yora jivatacaajeitantsiri. Te incantenaji: “Impeajeitaja itsipapee atiri jorio iravisacotantajeari”. Pamene, peerani iroamereni Jesoshi inaveitani, iro cantaincha te nompincatsatashiteariji. Tempa iquempejeitaquee arori: ioti icomijeita iriori. Aisati iriori Tasorentsi, te impincatsateariji: iotiri icomijeita, tempa atiri ini. ⁷ Tecatsi imperanatena, irointi icantaque: “Queario, itiancaqueri Tasorentsi Pavoro iquenquetsatacari itsipapee atiri, icamantajeitiri jaoca incanteari iravisacotantajeari. Iquempetaca itiancaqueri Petero icamantajeitiri ashanincasanori arori”. ⁸ Queario, yora Tasorentsi itiancaqueri Petero iquenquetsatacaciajeitiri joriopee. Naroqua nainti, itiancaquena noquenquetsatacaciajeitiri itsipapee atiri. ⁹ Pinequero, ijivatacanti Santiaco, Sejashi, aisati Joa. Ari iojeitaque iriori itasoncacotentajana Tasorentsi. Yaacameetsajeitavaquena, aisati yaacameetsajeitavaqueri Verenave; icantajeitaquena: “Queario, aquempetavacaajeitaca. Oquempetaca noquenquetsatacaciajeitiri narori ajorioririnte, pijajeite avinti pinquenquetsatacaciajeiteri itsipapee atiri”. ¹⁰ Apatiro aisati icantajeitaque: “Pincavintsaaajeiteri ashinoncaincari”. Tempa aitaque nametacaro nocavintsaapinitiri.

Yantiri Sejashi anta Antioquiaqui.

¹¹ Iro cantaincha ijatantacari Sejashi Antioquiaqui, yantaquero caari cameetsatatsi, irootaque nocantantacariri. Meeca noncamantempiro jaoca ocantari. ¹² Yareetantapaacari yoacotapinivetacari caari joriotatsi. Ocameetsataque oca, iro cantaincha impoiji yareejeitapaaca itiancane Santiaco. Yora Sejashi itsaroacaavacari yora cantatsiri ocameetsati amoncarajeitero isanquenarenri Moishishi avavisacotantajeari, irootaque intentareantanacariri yora yoacojeivetaqueri. Irointiquea oca, te oncemeetsateji. ¹³ Impoiji ineacojeitaqueri yora itsipapee jorio yantaqueri Sejashi, iquempejeitacari: intentareashitanajari iyemisantaririnte, ipashiventacaajeitacari intsipajeitajeari. Iojeivetaca te oncemeetsateji intentareeri, iro cantaincha aisati iquempejeitacari Verenave. ¹⁴ Ari impoiji nareetapaaja narori. Noneantapaacariri Sejashi te intsipajeiteariji itsipapee

atiri, niotaque te irimoncarateroji oca queariotatsiri acamantajeitiriri atiri: "Yoavisacotashijeitee Jesoquirishito, te incantajeiteeji amoncaratero isanquenare Moishishi avavisacotanteeari". Ari napatojeitaca maaroni quemisantajeitatsiri. Nocantaqueri Sejashi: "Tempa aviro jorio, iro cantaincha te pinquempetasanotajeari ashanincasanori, irinti piquempetaca itsipapee ashaninca. Pamene, ¿paitasa picoacaantacariri yora itsipapee atiri inquempejeitee arori? ¹⁵ Arojeitaque jorio, ashi airo ajoriojeiti. Te anquempeteariji itsipapee atiri: te iriojeiterini peerani irinti Tasorentsi. ¹⁶ Iro cantaincha piojeitaque ariorica amoncarajeitaquerome maaroni isanquenareni Moishishini, eirome ineacameetsateeme Tasorentsi, ioti antajeitaquero caari cameetsatatsi. Ariorica ashireteari Jesoshi, anquemisanteririca, ari incavintsaasanojeitaquee Tasorentsi, eiro iquenqueshiretajirotsi aisati caari cameetsatatsi antajeitaqueri. Ari ashirejeitacari Jesoshi, aquemisantaqueri, irootaque ineacameetsajeitajeroji Tasorentsi, iquempetacantaquee te antajeiterozi caari cameetsatatsi. Te inquenqueshireterozi amoncarataquerorica isanquenare Moishishi. Te irineacameetsatashiteariji yora moncarajeiteronemeri maaroni ocantiri isanquenare Moishishi". Irootaque nocantaquerirri Sejashi aisati maaroni nojorioririnte.

Eiro oavisacoteetsi isanquenare Moishishi.

¹⁷ Pamene, ¿paita aventantacariri Quirishito? Tempa acoaque iroameetsajeitajee. Tempa oamejeitaquee isanquenareni Moishishi ainiro antane, irootaque aventantacariri Quirishito. ¿Yantacaajeitaqueempa Quirishito caari cameetsatatsi? Teve, te irantacaa-jeiteeroji. ¹⁸ Ari notseencaquero isanquenare Moishishi, eiro oavisacojeiteetsi. Non-cantempiricame meeca: "Tsame amoncaratero isanquenare Moishishi avavisacotantajeari", tempa ontimeme nantane. ¹⁹ Pinequero, te noncanteji narori: "Nomoncarayetaquero isanquenayetiniri Moishishi". Oquempetaca nocamaque, te nonquenqueshiretajeroji. Oametaquena eiro nomatirotsi maaroni ocantiri, aisati oametaquena noquemisantaqueri Tasorentsi. Iriotaque irinti oaneaquenari, naneantacari meeca; irootaque noquemisantantacariri narori. Ipajacotaca Quirishito coroshiqui, icamaque, torein. Oquempevetaca notsipatacari narori coroshiqui, nocamaque, torein, ²⁰ irootaque caari noquemisantantari cantavetanari: "Pinquemisantero isanquenare Moishishi paviscotantajeari". Queario, aneatsiquera noni, iro cantaincha te naro aneashitachane apaniro, irinti quiso yoana Quirishito. Iriotaque itomi Tasorentsi noquemisantaqueri, matacaanarori maaroni cameetsatatsiri nantayetiri. Inintasanotaquena, ishinetacotaca yoyeetaqueri, icamimentaquena irootaque yoameetsatantaquenari. ²¹ Te irantsipetashitearoji Tasorentsi ineshinoncajeitaquee. Iro cantaincha, pijiticari ariorica pimoncarajeitaquero isanquenare Moishishi ari paviscocojeitaque. Paventaquearoricame isanquenare, tecatsi pincantea pinquemisanteri Quirishito. Eirorica piquemisantiritsi, tempa yatsipetashitaca icamimentajeitaquempi.

Ariorica aquemisanti, quiso oajeitaquee Ishire Tasorentsi.

¹ Meeca, carashiasati, te aneeroji piotantari. ¿Janicampa amatavijeitimpri? Peerani nocamantajeitaquempini ipajacotimentajeitaquee Jesoquirishito yoavisacotantajeari. Piotasanojeivetacaroni, meeca picomitanajaro. ² Aparo nosampijeitempi: ora Ishire Tasorentsi, ¿paita quiso oajeitantaquempi? ¿Irompa pimoncarajeitaquero isanquenare Moishishi quiso oajeitantaquempi? Tempa iro quiso oantaquempi pishiretacaro nocamantitaquempi. Tempa pinquenqueshireempa. ³ Piquemisantantacari peerani, ¿paita oavisacojeitaquempi? Tempa iro Ishire Tasorentsi. ¿Paitasa picoantacari

meeca pimoncarajeitero isanquenare Moishishi? ¿Arimpa omatacaaajeitaquempi icoacaajeitaquempi Tasorentsi? ⁴ Oshequi pineacatsitimentari Jeso quirishito. ¿Patsipetashitarompa? ¿Ariompa pintseencanajeri meeca? ⁵ Pamene: tempa itiancaquempiro Tasorentsi Ishire. Tempa itasoncacoventapinitaquempi. ¿Paita itasoncacoventantaquempi? ¿Irompa pimoncaratapinitaquerido isanquenare Moishishi? Teve. Tempa pishiretacari, irootaque itasoncacoventantaquempi.

Ishiretacari Avarama Tasorentsi, irootaque ineacameetsatantacariri.

⁶ Tempa aisati piquempetacari Avaramani. Ishiretacaroni peerani maaroni icanqueraquiri Tasorentsi, irootaque ineacameetsatantacariri, oquempetetaca te iranterojo caari cameetsatatsi. ⁷ ¿Janica meeca shanincatasanotajariri Avaramani? Tempa yora quempetasanotajariri: yora shiretasanotariri Tasorentsi, quemisantasanojiriri. ⁸ Ora irineane Tasorentsi oquenquesatacotiri itsipasatipee atiri. Ocantitani coajica inquemisantajeitaje atiri iravisacotantajeari. Yora Tasorentsi peerani icamantaquerini Avaramani, icantiri: “Pishiretaquena, irootaque notasoncacoventantaquempi. Aisati nonquempetaqueri yora itsipapee atiri: ariorica irishiretena, nontasoncacoventaqueri”. ⁹ Aitaque icanta, itasoncacoventajeitiri maaroni quemisantatsiri, iquempetaqueraquiri Avarama. ¹⁰ Ainiro inaveta coatsiri irimoncarajeiterome maaroni isanquenaren Moishishi, iravisacotantajeari. Te irimaterojo, irootaque iroasanquetantajeiteariri Tasorentsi, intiancajeiteri Sharincaveniqui. Pinequero, ocanti Sanquenarentsi: “Iroasanquejeiteri Tasorentsi yora caari moncaratasanojeitiro maaroni isanquenatiniri Moishishi”. ¹¹ Pinequero, tecatsi ancantero amoncarajeitero ora sanquenarentsi. Eiro ajititsi amoncaratasanojeitiro avavisacotantajeari. Eiro ineacameetsashijeiteetsi Tasorentsi, irointi icantaquee: “Ariorica pishiretena, ari noneacameetsajeitaquempi, impoiji pincantaitatiyempani paneajeitanaje inquitequi”. ¹² Aisati isanquenaren Moishishi, te oamejeiteejii ashireteari Tasorentsi avavisacotantajeari, irointi oamejeitaquee ancantatiyempani amoncaratasanotero ocantayeteeri, avavisacotantajeari.

Yantaqueeneri Quirishito.

¹³ Te amoncaratapiniteroji isanquenaren Moishishi, irootaque incantanteemerri Tasorentsi: “Pijate Sharincaveniqui”. Te amoncarajeiterojo, iro cantaincha icamimentaquee Jeso quirishito, yoavisacojeitaquee. Tempa ocantitani Sanquenarentsi: “Yora pajacotachaneri inchatoqui incamimenteri maaroni antirori caari cameetsatatsi”. ¹⁴ Ari icamimentajeitaqueri pashinisatipee atiri, yoavisacojeitajeari maaroni quemisanteririri. Aisati iquempejeitani iriori yora Avaramani, iquemisantini, irootaque yavisaqueraquiri. Aisati Ishire Tasorentsi, quiso oajeitaquee maaroni arori quemisantajeitiriri. Irootaque icashiacaqueraquiri Avaramani peerani.

Icashiacaqueraquiri Tasorentsi Avaramani.

¹⁵ Pinquenqueshiretero, noyemisantaririnte, oca amejeitacari. Ariorica acoaque ancashiacaqueraquiri ashaninca amperi paitapeerica, asanquenateneri acashiacaqueraquiri, iriotasanojeari. Aisati asanquenatero avajiro. Impoiji tecatsi ancantera ampashinitapinitero, eiro amatirotsi amataviteri yora acashiacaqueraqueri paitapeerica. ¹⁶ Aisati iriori Tasorentsi, icantiri Avarama: “Ariorica pinquemisantena, ari noavisacotajempi”. Aisati icantaqueer: “Nontianqueri pishaninca, coajicani, iroavisacojeitajeari maaroni quemisanterineri”. Pamene, te incanteriji: “Nontiancajeiteri oshequi oavisacojeitimpine”. Teve. Iranti iquenquesataqueraqueri aparoni ishaninca, oavisacotantsinera: yora Quirishito. ¹⁷ Pinequero, otimi icantaqueeriniri Tasorentsi Avaramani peerani. Icantantacariniri, tequerani ontimeni isanquenaren Moishishi. Impoiji ocarataque osarintsi 430, ari isanquenatacaqueraqueri Tasorentsi Moishishi. Te impashiniteroji oca icamantitacariniri yora Avarama, te iramataviteriji. ¹⁸ Incoaqueeme Tasorentsi amoncaraterome isanquenare Moishishi avavisacotanteameri, eiro aquempetarime Avarama. Te ontimeniji irimoncaratantearomeri. Te iranteroni iriori ocantiri isanquenare Moishishi, irointi iquemisantaqueer Tasorentsi, irootaque icantantacariri: “Noavisacotempi”.

¹⁹ Ari, ¿paita otimantacari isanquenare Moishishi? Iotacaajeitaquee ainiro antane, irootaque acoajeitancacari oavisacojeiteeneri. Ipocaque Quirishito, te meeca ancoajeroji isanquenare Moishishi. Tempa iriotaque Quirishito ishanincani Avarama: yora icamantitaniri peerani Tasorentsi: “Nontiaquempiri coajica oavisacotempineri”. Aisati noncamantempiro oca: yora Tasorentsi icantiri inampire: “Pincamantai-teri Moishishi noneane”. Impoiji iriori Moishishi yovaaqueneri atiripee irineane Tasorentsi. ²⁰ Irintiquea Avarama iriotasanotaque neanatasanotaqueriri Tasorentsi, tecatsi ovayenerine irineane. Apaniro icamantaqueri, apaniro ini. ²¹ Peerani icantiri Tasorentsi Avarama: “Ariorica pinquemisantena, noavisacotempi”. Ari impoiji isanquenatacairy Moishishi, otimantacari isanquenare. ¿Onashitampa oca icantaqueriri Moishishi? Teve. Meeca ayojeiti te oavisacojeiteeji isanquenare Moishishi, tecatsi oncante oameetsatasanojeitee. ²² Oamejeitaquee sanquenarentsi ainiro antanepee maaroni. Te amajeiteroji icoacaqueeri Tasorentsi. Iro cantaincha timatsi icanta-jeitaqueeri maaroni arori shirejeitariri: ariorica anquemisanteri Jeso quirishito, aitaque iroavisacojeitaquee.

²³ Peerani, oshequi operanjeitaquee isanquenare Moishishi, oquempetacari variria, ariorica iroiminqueaquee caravosoqui. Oquempetacantaquee oquempoyeajeitaquee irosati ipocantacari yora aquemisantajeitaqueri. ²⁴ Aisati isanquenare Moishishi oshi-aqueri oametantatsiri: oamejeitaquee ainiro antane, acoantacari anquemisantajeiteri Quirishito, iroameetsajeitantzajeeri, inquempetacantajee te anteroji caari cameetsatatsi. ²⁵ Meeca ayojeitaqueri Quirishito, aquemisantaqueri. Aitapaji. Te ancoajeji meeca oametajeeneri anquemisanteri: tempa moncarataca.

Arojei quemisantatsiri, aquempejeitacari Avaramani.

²⁶ Aquemisantajeitaqueri Jeso quirishito, irootaque itomintantajeitaqueeri Tasorentsi. ²⁷ Pamene, aisati avaotisatimentari, iojeitancacari atiri aquemisantaqueri, aisati ashaincajeitacari. ²⁸ Meeca acarajeitaqueri jorio, caari joriotatsi, aisati acarajeitaqueri pimantaari, caari pimantacha, shirampari, tsinane, maaroni: amoncaratavacaajeitaca aquemisantajeitaque. Iro cantaincha jaocarica acantajeitari, eiro aquenqueshiretirotsi. Pineaquero, ariorica ashancatacari Jeso quirishito, ashancatavacaajeitaca. ²⁹ Aisati oquempetaca, ariorica aquemisantaqueri Quirishito, aquempejeitajari Avarama. Tempa icantirini peerani Tasorentsi: “Pinquemisantenerica, aitaque nontasoncacoventaque-mpi”. Irootaque icantajeitaqueeri meeca arori, eiro yamataviteetsi, irootaque aquempejeitantzajariri Avaramani arori.

4

Jaoca acantaveitaniri peerani, tequerani impoqueni Quirishito.

¹ Piotacotiri yameyetacari ashitaarantachari. Itimirica itomi, icoaque imperi maaroni yashiyetari. Aisati icantiri ishaninca: “Ariorica noncamaque, pinquempoyejeneriya notomijaniqui maaroni nashiyetari. Ariorica irantearitanaje, ari pimpajeri maaroni”. Ari icoaque imperi maaroni; tempa iriotaque ashijeivetariri itomi maaroni, iro cantaincha ainiroquera ijananequit, tequeratsita impincatsateaji. Oquempetaca te irishineteriji nampirentsipee impimantayetero iroaararo nampitariri, aisati tequera irishineteri itomi impimantayetero iroaararo. ² Itimi quempoyejiriri, aisati quempoyejiniriri yashiyetari. Ariorica ommoncaratapeempa icantiqueriri iririni, aitaque irishineteri paitapeerica. ³ Aitaque aquempevetaniri peerani arori, tequerani impoqueni Quirishito. Oquempoyeaveiteeni isanquenare Moishishi, oamejeiveiteeni antapinijeitironi pomersitsiyetachari. Aquemisantashiyevetaroni icantayetiri atiri, iperanajeiteeni. ⁴ Impoiji ommoncarataca icantiqueriri Tasorentsi. Itiancaqueri itomi, otimaqueri tsinane, jorio inavetapaaca, ipomerentsitimentaqueri isanquenare Moishishi. ⁵ Ayojeitaque opomersitsitaca amajeitero ocantayetiri isanquenare Moishishi. Aquempeveitarini pimantaari, iro cantaincha yoavisacojeitajee, irootaque itomintasanojeitantzajeeri Tasorentsi. ⁶ Tempa meeca arojeitaque itomipee, irootaque itiancantajeitaqueerori Ishire Itomi, quiso oajeitaquee. Irootaque meeca acantajeitantzajariri: “Apa Tasorentsi”. ⁷ Te

arojei meeca pimantaari, meeca arojeitaque itomipee Tasorentsi. Ineshinoncajeitaquee, timatsi icashiacaajeitaqueeri maaroni.

Arriorica apomerentsiventajaro isanquenatiniriri Moishishi joriopee, aquempetacari pimantaari.

⁸ Peerani, te piojeiveitearini Tasorentsi, pijitasorentsijeiveitarini irovetsicane Tasorentsi. Tecatsi incantajeitea intasorentssite. ⁹ Iro cantaincha meeca piojeitaqueri Tasorentsisanori, tempa aisati iriotaque iojeitaquemperi. ¿Paita picoajeitacari pinquempetajea peerani? ¿Picoaquempa pinquempetajea aisati pimantaari? ¿Paita pinquemisantashitanteeariri caari tasorentsitsati? Eiro imatirotsi iroavisacotempi. ¹⁰ Pinashitacaapiniyetaro quitaiteripee, cashiripee, osarintsipee, paitapeerica. Iro pinashitacaapiniyetantarori picoajeiveta irineacameetsatempime Tasorentsi. ¹¹ Oshequi nocantashireti meeca. ¿Natsipetashitampa nopomerentsiventimpi noamejeivetimpi?

Iquenqueshireyeteri Pavoro.

¹² Meeca, noyemisantaririnte, pinquempejeiten: eiro pipomerentsiventajarotsi isanquenare Moishishi. Tempa nojocajiro narori, meeca noquempejeitajimpi avirori, te pimpomerentsiventearoni peerani, te pioveitearoni. Nojatashitantimpiniri peerani, te pintseencajeitavaquenaji. ¹³ Aisati piojeitaque nocamantantapaaquempiniri jaoca pincanteari poavisacotea, nojouitapaaca narori. ¹⁴ Pipincayevetari mantsiyetatsiri, iro cantaincha te pimpincavaquenaji nanti, cameetsa poisavicavaquena. Impoquericame inampire Tasorentsi, pincavintsayerime; aisati impoquericame Jesoquirishito, pincavintsayerime iriori. Iro cantaincha narotaque nanti areetaquemperi. Oquempetaca pincavintaavaquerime iriori, picavintaasanotavaquena narori. ¹⁵ Peerani piquimoshireimentavaquena, ¿paita caari piquimoshirejeitanta meeca? Peerani picavintaajeitaquena catsini. Arrioricame noncantempime: “Pinquitsoreajenaro poqui, pimpenaro”, ari pimpaquenarome, arrioricame pimataquerome. Niotaque oshequi pinintasanojeitaquena. ¹⁶ Ari queariosanotaque oca noamejeitaquempiniri, ¿meecampame piquishimentaquenaro?

¹⁷ Queariompia: icoaque iroveshireacayempi yora amatavitimpipi, iro cantaincha eiro yamitacotasnotimpitsi. Icoaque pintseencajeiten, pinquemisantanteeariri irinti, piveshireimentanteeariri irinti. ¹⁸ Pamene, ocameetsati ancoaque ancavintaavaajitea, eiro amatavitavacaajeitatsi. Arriorica nontsipatemp, ocameetsati ancavintaavaajitea, aisati arriorica nonteentareanajempi, ancavintaavacyeani aisati. ¹⁹ Aisati, noshaninca, noquempetaca: oshequi noquenqueshireacotaquempi catsini, tequera pimoncarateroji icoacaquemperi Quirishito, tequera pinquempeteari iriori. Nonquenqueshireacotempini, noncanteani, irosati pinquempetanteeariri. ²⁰ Nocoasanovetaca nontimimotanajempime, cameetsa nonquenquetsataaanajempime. Te niotacotempiji pitarica noncantempiri ontimanteari piotanteari.

Arriorica aquemisantaque, avavisacojeitaca; eiro amoncaratajirotsi isanquenare Moishishi avavisacotantajeari.

²¹ Arriorica pijivetaca pimoncarataquero isanquenare Moishishi paviscotantajeari, pincamantena: ¿piotasanotirompa ocantiri isanquenare? ²² Ocanti itimini itomi Avarama apite. Aparo ashi inampire yamanantiri. Irio pashini ashi ijinasanori, te iramananteroji irointi. ²³ Yora otomi inampire iquempetasanojeitacari itsipapee jananequipee. Iro cantaincha inashita irinti otomi ijina. Icantitacaroni Tasorentsi: “Intime pitomi”. Impoiji omoncarataca icantaquerori, itimaque. ²⁴⁻²⁵ Ainiro oshiacantaqueri oca tsinane apite. Opajita nampirentsi Acara. Oshiacantaqueri iroori pomerentsiventirori isanquenare Moishishi. Isanquenataquero iriori icantaquerirori Tasorentsi anta toncaariqui timatsiri anta Araviaqui, pajitachari Shinai. Otomi ora nampirentsi, iquempetajaro iriniro: nampirentsi ini iriori, ainiro peranatariri. Aisati oshiacantaqueri nampirentsi joriopee timayetatsiri meeca Jerosarequi: yatsipetashitacaro ipomerentsiventajacaro isanquenare Moishishi, maaroni. ²⁶ Iro cantaincha

ainiro pashini tsinane: ijinasanori Avarama. Oshiacantaqueri iroori savicatsineri pashiniqui Jerosare, timatsiri anta jenoqui. Arojei savicatsineri anta, anampijeitearo iointi. Te arojei nampirents, te ampomerentsiventearoji isanquenare Moishishi, eiro apomerentsiventerotsi catsini. ²⁷ Irootaque isanquenatacotaqueniri Isayashini: “Pishiravarovetaca, iro cantaincha piveshireanaquea. Tequera pintimeri pitomi, iro cantaincha pinquimoshiretasanotanaque, irishequiasanotanaque pisaripee, eiro ishequititsi osaripee pinampire”.

²⁸ Meeca, noyemisantaririnte, aquempejeitacari ainti Isaca. Ainiro icashiacaquerir Tasorentsi Isaca, aisati ainiro icashiacaajeitaqueeri arori. ²⁹ Peerani, yora Ishimairi, yora otomi nampirents, iquisapinitaqueri irirenti: yora Isaca. Aisati oquempetaca, yora coatsiri amoncarajeitero isanquenare Moishishi iquisapinijeitaquee arori: tempa arojeitaque quiso oajeitaquerori Ishire Tasorentsi. ³⁰ Jero oca ocantiri isanquenatiniri Moishishi: “Icantiri Tasorentsi Avarama: ‘Pintiancajero ora pinampire aisati otomi. Yora Ishimairi, eiro iquempetasanotaritsi otomi pijinasanori. Yora Isaca irashitasanotajearo maaroni timimojeitimpri’”. ³¹ Pinequero, noyemisantaririnte, te ashanincajeitearoji ora nampirents, eiro apomerentsiventerotsi isanquenare Moishishi. Irootiquea ashanincajeitacari itomisanori Avarama: yora Isaca. Aquemisantaque, irootaque itomintantaqueeri Tasorentsi.

5

Pincoyeanontea: terica pininte pimpeajea jorio, ari pinquemisanteri Quirishito.

¹ Tempa peerani yoavisacotajee Quirishito, irootaque meeca ocameetsatantari ai-jatasanojeiteri. Te incoyeji anquempetajeari pimantaari. Eiro picoitsi imperanay-eetempi pimayetero paitapeerica paviscotantajeari. ² Pinquemisantasanojena. Naro-taque Pavoro camantimpiori oca. Arriorica pintoyeantea, pijiticari oavisacotempi; patsipetashitarocari paventavetacarini Quirishito, eiro imatirotsi iroavisacotempi. ³ Noncamantajempi aisati: arriorica pintoyeantea paviscotantajeari, ocameetsati pimoncarajeitero isanquenare Moishishi, pintsoteaquero maaroni catsini. Eiriorica pimoncarajeitrotsi maaroni, eiro paviscotajitsi. ⁴ Arriorica pininti pimoncarajeitero sanquenarentsi irineacameetsatantempi Tasorentsi, te pincoyeji irineshinoncatempi. Pitseenquiricari Quirishito. ⁵ Iro cantaincha arriorica ashinetero Ishire Tasorentsi oamejeitee anquemisante, ayojeitaque irimoncaratero Tasorentsi maaroni icantaqueeri. Aitaquequea ayojeitaque iroameetsatasanojeitee. ⁶ Arriorica aquemisantasanojeraueri Jeso quirishito, eiro isampiteetsi Tasorentsi: “¿Pitoyeantampa?” Teve. Te inquenqueshireterojo. Arriorica anquemisante, ari anintajeiteri itsipapee atiri. Irootaque icoacaaqueeri Tasorentsi.

⁷ Peerani cameetsa piquemisantajeitei. Pishiretasanojeivetacaroni queari-oyetatsiri. ¿Janicampa jocacaaquempiroi piquemisanti? ⁸ Te irijocacayempiro ir-inti Tasorentsi. Iriotaque coyeaquempiroi iroavisacotempi. ⁹ Otimirica tapiacaarori tanta capichaji, ari otapiacaacaro oshequi tanta, otsoteanaquero, maaroni. Aisati oquempetaca, aparoni amatavitantsiri yamatavijeitiri oshequi atiri. ¹⁰ Noshiretacari Tasorentsi, niotaque inquenqueshiretacajempi, pinquempejeitajenari. Te nioteji janicarica ashereaqueMPI, iro cantaincha coajica iroasanqueteri Tasorentsi. ¹¹ Timatsi cantanirotatsiri nocamantiri atiri irimoncaratero isanquenare Moishishi. Noncamantempime: “Pintoyeantea paviscacajeitajeari”, eiro nocamantimpime: “Icamimentaquee Quirishito corosiqui yoavisacojeitajee”. Impoiji eirome iquisaname jorioopee. ¹² Timatsi yora cantanirovetimpiri pintoyeantea, oshequi yashereajeitaquempi. Nocoaveta narori iraitsoquireempame iriori.

Arriorica pinintavacaajeitea, ari moncarataca.

¹³ Meeca, noyemisantaririnte, noncamantempi. Icoyeaquempi Tasorentsi iroavisacojeitajempi, te irinintacayempiji pimpomerentsiventearoji isanquenareni Moishishi. Yoavisacojeitaquempi, iro cantaincha te irishinetempiji pantero paitapeerica picoiri.

Icoaque pinintavacaajeitaja maaroni, aisati pincavintsavacaajeitaja. ¹⁴ Jero oca isanquenatiniri Moishishi: “Oquempetaca avisati cavintsaajancha, aisati pinquempejeiteri itsipapee, pincavintsaasanojeiteri, pinintasanojeiteri”. Ariorica amajeitaquero oca, cameetsa. Moncarataca. ¹⁵ Iro cantaincha piquisavacaajeitaca, oshequi picatsimajeitaque: oquempetaca patsicavacaajeitaca, aisati oquempetaca pipatsareavacaajeitaca, patsare. Ariorica pincatsimajeite, aitaque pimpoyereavacaajeitaja; eiro pimajeitirotsi pinquemisantajeite.

Acoajeivetari arori, aisati ocoacaajeitaqueeri Ishire Tasorentsi.

¹⁶ Noncamantasanotempi: pincantero Ishire Tasorentsi oamejeitempi paitapeerica panteri. Eiro pantirotsi caari cameetsatatsi picoayevetari avirori pantajeitemeri.

¹⁷ Timatsi caari cameetsatatsi acoayevetari antajeiteri arori, aisati timatsi ocoacaavetaqueeri Ishire Tasorentsi antacayeemeri. Te omoncaratavacayeaji. Onashiyetaca, irootaque caari amajeititaro cameetsayetatsiri antemerri. ¹⁸ Ariorica anquemisantero Ishire Tasorentsi paitarica antacayeeri, eiro aquenqueshiretirotsi amoncaratero isanquenare Moishishi.

¹⁹ Ayojeitaquero caari cameetsatatsi antapinijeitiri: ineavintsatiro shirampari caari yai, oneavintsatiri tsinane caari ai, antavintsatavacaajeita: acantirove, te ampashiventeaji. ²⁰ Aisati ashiacantiqueru paitapeerica ajitasorentsitashiyetari, amatsitanti, aquisavacaajeita, aquisatsatavacaajeita, anevetaro paitapeerica yashiyetari ashanincapee, atsimaaejencata, te ancvintsaavacayeaji, te aacameetsatavacaajeiteaji, irointi aquisashireavacaajeita. ²¹ Aisati anintitaqueru aitayeteri irovaararo ashaninca, avanti, ashinquijeita, maaroni. Peerani nocamantitimpini: “Queariompiya. Ariorica antapinitero maaroni ocappee, eiro amatirotsi ajate anta ipincatsaritinta Tasorentsi”. Meeca nampiitajempiro: “Queariompiya. Pantirocari caari cameetsatatsi”.

²² Iro cantaincha Ishire Tasorentsi oamejeitaquee anintavacaajeitaca, aquimoshirejeitaque, aveshireajeitaca, eiro aquisavacaatsi, acavintsaavacaaca, acameetsataque, eiro amatavitantsi, ²³ aneshinoncatavacaaca, eiro antayetirotsi caari cameetsatatsi acoavetari antemerri. Te ontsaneapitsateeroji isanquenare Moishishi maaroni oca. ²⁴ Yora pajacojeitachari corosiqui icamajeitaque, torein: tecatsi irantaje aisati. Ariorica aquemisantaqueri Jeso quirishito, oquempetaca arosati pajacotajancha, oshiacantaca acamaque, tecatsi ancantea ancoajeitaje antajero caari cameetsatatsi. ²⁵ Iro cantaincha oshiacantaca oaneajee aisati Ishire Tasorentsi, iota caajeitajee aisati. Tsame ancantero oamejeitee paitapeerica antayeteri. ²⁶ Eiro ashemetitsi, aquisacaaricari itsipapee. Eiro anintashireitiritsi oyetiri iriori.

6

Jero oca pashini yoameyetiriri Pavoro.

¹ Noyemisantaririnte, ariorica pineeri pishaninca yantiro caari cameetsatatsi, pincantero Ishire Tasorentsi oametempi pincavintsayeri. Queariya, piquishircari, jentsiquero pineanateri. Queariompiya pantirocari avirori caari cameetsatatsi. ² Pincavintsaavacaajeitea. Ariorica pincavintsante, pimataquero yoamejeiteeri Quirishito. ³ Itimirica shemetatsiri, yamatavitaja irisati. Te incameetsateji iriori. ⁴ Pinquenqueshireempa: piote ocameetsatirica pantayetiri. Ariorica ocameetsati pantayetiri, pinquimoshiretanaque. Eiro pishemetitsi, eiro pitseenquiritsi itsipapee, ⁵ tempa ainiro antajeitiri maaroni.

⁶ Ocemeetsati ampapiniteri oamejeiteerori irineane Tasorentsi maaroni coiteimojeitacariri. Te ancoyeji incoiteayetearo paitapeerica. Irinti quemisantajeitiriri pajeterineri. ⁷ Queariompiya, eiro pamatavijeitajatsi avisati, te incoacayeeji Tasorentsi antseencajeiteri. Paitapeerica apanquiyetiri, aayetajero oitsoquipee oshanincasanori iroori. ⁸ Oshiaquero ariorica antapinitero caari cameetsatatsi acoajeivetari, ari ajate Sharincaveniqui. Ariorica antapinitero ocoacaqueeri Ishire Tasorentsi, ari ancantaitatiyempani asavique inquitequi. ⁹ Eiro aperatarotsi antapinitero cameetsatatsiri. Ariorica ancantatiyempani antapinitero, ari impinajeitaquee coajicani Tasorentsi. ¹⁰ Ari

ocameetsati ancavintsaajeiteri itsipapee atiri, aiquero ajatatiye ancavintsaasanojeiteri ayemisantaririnte.

Ari yovectarataquerori isanquenare.

¹¹ Narotaque Pavoro sanquenatimpiori oca: pinequero, antearo nosanquenataquero.

¹² Yora coanirovetachari pintoyeantea, icoaque yora ijomoririnte irineacameetsanirojeiteri. Te irinintaniroteji inquisajeiteri. Incantempime: “Icamimentaquempi Quirishito coroshiqui yoavisacojeitajimpi”, ari inquisajeiterime ishaninca.

¹³ Maaroni yora toyeantachari te irimoncarateroji isanquenare Moishishi, iro cantaincha icoanirovetaca pintoyeantea avirori irishemetanteari. Irishemetimentempime, incanterime ishaninca: “Pineaquero, notoyeantacaacari. Iquemisantajeitaquena”.

¹⁴ Iro cantaincha te oncameetsateji noshemete nanti, irointi nocoaque noveshireimenteari yora Avincatsarite Jesoquirishito: yora pajacotimenteeri coroshiqui. Meeca oquempetimotaquena nopajacotaca narori. Nocamaque, te meeca noncoayetajeroji caari cameetsatatsi icoayetiri atiri, te nonquenqueshiretajeroji caari cameetsatatsi.

¹⁵ Eiro yavisacotashitatsi maaroni toyeantachari, aisati eiro yavisacotashitatsi caari toyeantacha. Iro cantaincha ariorica impashinitacajee Tasorentsi, ari avavisacotajea.

¹⁶ Arriorica piquemisantaquero oca, ari ishanincataquempi Tasorentsi, aisati nocoaque cameetsa irisavicacayempi, aisati nocoaque incavintsayempi.

¹⁷ Meeca eiro pashereanatsi, eiro pipiatsatanatsi. Narotaque antaveetiniriri Jesoshi, irootaque iquishimentantanarori tseencantatsiri, irootaque namashiyetantacari novatasapeequi.

¹⁸ Meeca, noyemisantaririnte, nocoaque irineshinoncajeitajempi aisati Avincatsarite Jesoquirishito. Tempa aitaque icantapinijeitimpiri.

Ari ocarati. Narotaque sanquenatirori oca: *Pavoro*

YORA PAVORO ISANQUENAJEITINIRI EJESOSATI

Ivetsajeitari Pavoro ejesosati.

¹ ¿Savicajeitatsimpi, ejesosati? ¿Tecatsimpa oajeitimpine? Narotaque Pavoro sanquenajeitimpiori oca. Itiancaquena Jesoquirishito noquenquetsatacotiri, irootaque icoacaquenari Tasorentsi. Meeca nosanquenajeitimpido maaroni quemisantajeitatsiri, maaroni quearioventiniriri Jesoquirishito icoacaajeitaquempi. ² Nocoaque irineshinnoncajeitempi Apa Tasorentsi, cameetsa irisavicacaajeitempi. Aisati iriori Avincatsarite Jesoquirishito: irineshinoncajeitempi, aisati cameetsa irisavicacaajeitempi.

Icoacaquee Tasorentsi ayojeiteri.

³ Tsame ancamtajeiteri atiri icameetsatasanoti catsini Tasorentsi: yora iriri Avincatsarite Jesoquirishito. Aquemisantaqueri Quirishito, meeca icantajeitaquee Tasorentsi: “Pisaviquimojeitenā coajica anta inquitequi jenoqui”. Tempa aisati meeca oshequi icavintsaajeitaquee, aveshireimentasanotacari catsini, oquempetaca asaviquimojeitaqueri inquitequi. ⁴ Peerani, tequerani irovetsiqueroni quipatsi, icoajeititaqueenī, iotitacani iroavisacojeitee Quirishito. Iquenqueshiretitacani: “Noameetsatasanojeiteri maaroni quemisantajeiterineri notomi”. Meeca ineacameetsajeitaquee, iquempetacantajeitaquee te anteroji caari cameetsatatsi. ⁵ Inintasanojeitaquee catsini, irootaque itiancantacariri Jesoquirishito icamimentajeitaquee. Aitaque icantitani peerani: “Nontomintajeiteari iriori quemisantsineri”. Irootaque icoacaajeitaqueeri maaroni. ⁶ Meeca ashanincajeitacari Itomi inintasanotiri, irootaque ineshinoncajeitan-taqueeri. Icavintsaasanojeitaquee catsini. Tsame ancantaitatiyempani ancamtajeiteri atiri: “Icameetsatasanotaque Tasorentsi”. ⁷⁻⁸ Ineshinoncatasanojeitaquee maaroni, inintasanojeitaquee catsini. Itiancaqueri Itomi icamimentajeitaquee, aparajatimen-tajeitaquee iriraja. Icavintsaasanojeitaquee, meeca te inquenqueshiretajeroji aisati caari cameetsatatsi antajeitiri. Tempa aitaque yoavisacojeitaquee. Iotacaajeitaquee, otimantacari ayojeitajari. ⁹ Aisati iotacaajeitaquee paita itiancantacariri Quirishito: te ayojeiveitearoni peerani. Aitaque, peerani icoitacani intianqueri iroavisacojeita-jee. ¹⁰ Jero oca icoacaajeitaqueeri maaroni: coajica impincatsaritasanotanaque catsini Quirishito. Ariorica omoncarataquea, irampatojeitaquee maaroni catsini: inquitesati aisati maaroni quipatsisati. Impoiji impincatsariventajeitaquee, maaroni.

¹¹ Ari aquemisantajeitaqueri Quirishito, meeca timatsi icoacaajeitaqueeri Tasorentsi. Tempa icoajeitaquee peerani, catsini: tequerani irovetsiqueroni quipatsi. Timatsi aisati icashiacaajeitaqueeri: irimajeitaqueero maaroni icantajeitaqueeri. ¹² Narojeitaque jorio jivajeitatsiri noquemisantajeitaqueri Quirishito, irootaque icoantacari Tasorentsi nompincatsajeiteri, aisati noncamantajeiteri atiri: “Icameetsatasanotaque Tasorentsi”. ¹³ Aisati avirojei: piquemacojeitaqueri Quirishito. Piquemaque ipocashijeitaquee yoavisacojeitaquee. Queario oni, irosati piquemisantantacari. Peerani icantajeitaquee Tasorentsi: “Arriorica pinquemisantaquena, quiso oajeitempi Noshire”. Meeca quiso oajeitaquempi, ayojeitacari pishanincatacari Quirishito. ¹⁴ Arriorica quiso oajeitaquee, ayojeitaque queario, intsoajeero Tasorentsi maaroni icantajeitaqueeri. Eiro yamataviteetsi. Tempa queario iraajeitanajee inampiqui antsipajeitanteeariri iriori. Tempa icameetsatasanotaque. Tsame aisati ancamtajeiteri maaroni atiri: “Icameetsataque Tasorentsi”.

Ipasonquitiri Pavoro Tasorentsi.

¹⁵ Noquemacojeitaquempi avirori, piquemisantasanojeitaqueri Avincatsarite Jesoshi, aisati pinintasanojeitaqueri piyemisantaririnte. ¹⁶ Irootaque nocantantariri Tasorentsi: “Ariove pimatacaqueri ejesosati”. Nocantani nopasonquitacoventajeitimpī, aisati nocantiri Tasorentsi iramitacojeitempi. ¹⁷ Noquenquetsatacapinitiri yora iriri Avincatsarite Jesoquirishito: tempa icameetsatasanotaque. Nocantiri: “Piotacaajeiteri ejesosati, piotacaajeiteri jaoca picanta avirori. ¹⁸ Piotacaasanojeiteri, iriojeitanteearori jaoca noncantajeiteari, coajica: tempa ocameetsatasanotaque catsini anta inquitequi”.

Tempa yashijeitaquee, irootaque nocoantacari piojeite ocameetsatasanojeiti maaroni icashiacaajeitaqueeri. ¹⁹ Oshequi catsini itasorentsitasanotaque, te ompeempaji ita-sorenca. Itasoncaventajeitaqueri maaroni quemisantajeitiriri. Peerani iotacaaajeitaquee itasorentsitasanotaque, ²⁰ tempa yoitinaajiri Quirishito. Yaanajiri anta inquitequi, aisati isavicacaajiri anta iracosanoriqui icaratajiri ipincatsariventantajeiti. ²¹ Icantaqueri: "Notiomi, nocoaque pimpincatsariventajeiteri maaroni pincatsarijeivetachari, savicacantajeivetachari, jivatacaantajeivetachari, maaroni. Pimpincatsariventajeiteri maaroni timajeitatsiri meeca, aisati pimpincatsariventajeiteri maaroni timajeitajantsineri coajican". Ari yanaacojeitiri maaroni, ipincatsaritasanotaque catsini. ²² Aisati icantaqueri: "Avirotaque cantacanterone jaocarica oncantayeteari paitapeerica, aisati pimpincatsariventajeiteri maaroni quemisantajeitimpri. ²³ Impincatsajeittempi iriori. Tempa piquempetasanotaquena narori, pitasorentsitasanotaque catsini, picantani pitasoncoventajeitaqueri maaroni quemisantajeitimpri".

2

Itasoncaventajeitiri Tasorentsi quemisantajeitiriri.

¹ Peerani, avirori, te piojeiveitearini Tasorentsi, pantapiniveitaroni caari cameetsatatsi, irootaque pijajeitanteameri Sharincaveniqui: iro cantaincha yoavisacojeitaqueMPI Tasorentsi, irootaque pijajeitantajeari inquitequi, paneasanojeitapaaje anta. ² Piquempejeiveitarini yora itsipapee tseencantatsiri, piquemisantaveitarini Satanashi, yora pincatsariventiriri iamaaririnte tasoncantavetachari. Iriotaque pincatsariventajeitiriri maaroni piatsajeitariri Tasorentsi. ³ Tempa peerani aquempeveitarini yora tseencantatsiri, antapiniveitaroni caari cameetsatatsi acoajeiveitaroni. Acantani, antapiniveitaroni paitapeerica acoaveitaniri, paitapeerica aquenqueshireveitaniri. Irootaque iquishimentantavetaqueerori Tasorentsi, iquempetacaantaquee itsipapee atiri. ⁴⁻⁵ Peerani, antapiniveitaroni caari cameetsatatsi, ashi aironi: te ayojeiveitearini Tasorentsi, aisati ajajeiteme Sharincaveniqui. Iro cantaincha yashi yoiro icavintsaasanojeitaquee, oshequi inintasanojeitaquee. Peerani yoaneajiri itomi, icantani meeca yaneanaji. Meeca aisati yoavisacojeitaquee arori, ancantaitatiyempani asaviquimojeti inquitequi. Tempa ineshinoncajeitaquee, irootaque yoavisacojeitantajeeri.

⁶ Icamaque Quirishito, impoiji yoitinaajiri Tasorentsi. Aisati arori aquempevetacari, ipashinitacaaquee Tasorentsi arori, aveshireimentajeitacari meeca Quirishito; aisati ayojeiti ancarajeiteri coajica anta inquitequi. ⁷ Incantaitatiyempani iriotacaajeitajee, oshequi catsini ineshinoncatasanojeitaquee, icavintsaasanojeitaquee: yashi yoiro. Iro icavintsaajeitantaqueeri ashanincatacarri Jeso quirishito. ⁸ Piquemisantaqueri, irootaque yoavisacotantaquempi Tasorentsi: tempa oshequi ineshinoncatasanojeitaquempi. Tecatsi pincantajeitea poavisacojeitaja avisati, irintiquea yoavisacotashijeitaquempi. ⁹ Arosatime oavisacotajanchaneme, tempa ashemejeiteme. ¹⁰ Iro cantaincha itasoncaventajeitaquee Tasorentsi ashanincajeitantarcariri Jeso quirishito, icoaque antayetero cameetsayetatsiri. Peerani, tequerani antimeni, otimini icoacaajeitaqueeri antayeteri. Icoaque ancantaitatiyempani antapinijetero.

Ariorica aquemisantajeitaqueri Quirishito, ari aquempetavacaajeitaja maaroni: jorio aisati pashinisatipee atiri.

¹¹ Te avirojei jorio. Ipincajeitaquempi iriori, icanti: "Te iriojeiteriji pashinipee atiri Tasorentsi, te intoyeanteaji". Ijijeiveta iotiri irinti Tasorentsi. ¹² Pinquenqueshirejeitero jaoca picantajeitani peerani: te pinquemisantajeiveitearini Quirishito, te pishanincajeiteariji joriopee, te piojeiveitearoni icantayetiri Tasorentsi, aisati te piojeiveitearoni icashiacaajeitaqueeri. Te pioveitearini Tasorentsi, aisati te pioveiteani icoaquei irineshinoncajeitatempi. ¹³ Queario, peerani te piojeiveitearini Tasorentsi, oquempetaca pitimini arejiqui catsini. Iro cantaincha icamimentajeitaquempi Quirishito, aparajatimentajeitaquempi iriraja. Meeca piquemisantajeitaqueri, pishanincajeitacari. Irootaque piojeitantarcariri Tasorentsi, quiso poasanojeitantarcariri. ¹⁴ Peerani narori,

aisati maaroni nojorioririnte, noquisajeiveitimpini: narori aisati iriori maaroni pishanincapeeni, aisati piquisajeiveitanani avirori. Iro cantaincha yoavisacojeitaquee Quirishito, ipeajiro aquisavacaajeiveitani, cameetsa isavicasacaajeitaquee. Meeca aquem-petavacaajeitaja maaroni.¹⁵ Icamimentaquee, eiroquea apomerentsiventantarotsi isan-quenareni Moishishi, tecatsi oncantajeitee. Peerani onashitacaajeiveiteeni, te ashani-nicatavacaajeiveiteani. Iro cantaincha meeca ashani-nicajeitacari Quirishito, aisati ashani-nicatavacaajeitaca maaroni, aquempetavacaajeitaja,¹⁶ acatsimareavacaajeitaja maaroni. Iro acatsimareavacantajeitajari, ashani-nicajeitajari yora pajacotimentajeitaqueeri coroshipui. Meeca eiro atsipetashitarotsi anquemisantero isanquenareni Moishishi avavisacotantajeari. Meeca aneacameetsajeitiri Tasorentsi maaroni: noshaninca aisati pishaninca.

¹⁷ Narojeitaque jorio: niojeivetaca jaoca icantari Tasorentsi, niojeivetaro irineane, iro cantaincha te nonquemisan-tajeiteriji. Avirojei, avinti, te piojeiveitearini catsini, oquempetaca pitimini avirori arejiqui. Iro cantaincha ipocaque Quirishito, icamanta-jeitaquee maaroni jaoca acantajari ashani-nicatavacantajeitajari, aquempetavacantajeita-jari.¹⁸ Oshequi imataqueeneri Quirishito, irootaque amajeitancarori aquenquetsat-acaajeitiri Tasorentsi. Aisati Ishire Tasorentsi oamejeitaquee aquenquetsatacaajeitiri.¹⁹ Peerani te pioveitearini Tasorentsi, te pishanincaveitearini. Iro cantaincha meeca, pinashijieitaca; piquempejeitacari itsipapee quemisantatsiri, piojeitaqueri Tasorentsi, pishanincajeitacari.²⁰⁻²² Meeca noshiacantempiro. Arriorica avetsiquero avanco, tempa ajivataque amenero cameetsari quipatsi, impoiji amenero otincamipee cameetsatatsiri, quisotatsiri. Impoiji atancotashitaquero maaroni inchaquipee, ashiticaquero oshipee, maaroni. Arriorica antsonquero pancotsi, asavicaque. Aisati aquempejeitacaro, arriorica aquemisantaque. Ijivataque yora itiancanepee Tasorentsi aisati yora camantantatsiniri icamantajeitaquee jaoca icantari Jeso quirishito: icameetsataque, imataquero yoavisaco-jeitaquee. Tempa iriotaque meeca Avincatsarite. Impoiji ashequiajeitaque maaroni quemisantatsiri, aisati otasoncaventajeitaquee Ishire Tasorentsi aquempetavacaajeitan-tajari: tempa ashani-nicajeitacari Quirishito, maaroni. Meeca yashijeitaquee Tasorentsi, quiso yoajeitaquee.

3

Yantayetiri Pavoro.

¹ Te avirojei jorio, iro cantaincha nonintajeitaquempi. Nocavintsaa-jeitaquempi, nocamantaquempi: "Arriorica pinquemisantajeiteri Jeso quirishito, ari iroavisacojeit-emp", irootaque yoiminqueanteetaquenari caravosoqui.² Tempa ineshinoncataquena Tasorentsi, irootaque nomatantarori noquenquetsatacaajeitimp. ³ Iotacaaquena caari iojeitini itsipapee, tampatica yoametaquena. Aitaque nosanquenajeitaquempiro, no-vaajimpiro icamantaquenari.⁴ Arriorica pineanatero oca nosanquenataquempiro, pio-jeitavaquero oca niotacotaqueri Quirishito, caari ioyeetini peerani.⁵ Te irioveitearoni yora peeraniniri, iro cantaincha Ishire Tasorentsi iota caajeitaquena: narojeitaque itian-canepee Quirishito aisati quenquetsatacocyteriri.⁶ Te avirojei jorio, iro cantaincha iota-caaquena arriorica pinquemisantajeite, pavisacojeitanaque. Pimoncarajeitacari noshan-incapee narori: ainiro cameetsayetatsiri icashiacaajeitaquee Tasorentsi. Aisati ashani-nicatavacaajeitaca: noshaninca aisati pishaninca avirori. Arriorica piquemisantaqueri Quirishito, irimoncarajeitaquempiro maaroni icantajeitaquenari narori.⁷ Irootaque oca noquenquetsatacotpinitaqueri. Ineshinoncataquena Tasorentsi, aisati itasoncaven-taquauna, nomatantarcarori noquenquetsati.

⁸ Pamene, noquemisantaveta; iro cantaincha te nonquempeteariji itsipapee quemisantatsiri: tecatsi nomataque narori. Iro cantaincha ineshinoncatashitaquena Tasorentsi, itiancaquena nocamantajeitaqueri itsipapee atiri jaoca icantari Quirishito icavintsaasanojeitaquee catsini. Te ayotacotashiteariji, irointi oamejeitaquee Ishire.⁹ Aisati itiancaquena nocamantajeitaquempi icoaque iroavisacojeitempi avirori, aisati maaroni itsipapee atiri. Aitaque peerani catsini icoa-quin-i

iroavisacojeitempi, iro cantaincha te irioyeeteni peerani iroavisacojeitempi, iroaquera iotacaajeitaquee. Iriotaque vetcicajeitiriri maaroni timajeitatsiri. ¹⁰ Meeca icoaque iriotacaaajeiteri maaroni yora inquitequiniri: yora cantacaantayetatsiri aisati yora pincatsariyetatsiri. Iriojeitanaque inquitequiniri oshequi itasoncaventajeitaqueri Tasorentsí quemisantajeitiriri, impoiji iriojeitanaque ainiro iotantari catsini Tasorentsí, yashi yoiro ioti catsini. ¹¹ Aitaque icoitacani peerani iriojeite maaroni inquitequiniri. Ainiro imayetaqueeneri Avincatsarite Jesoquirishito, iotantacari yora inquitequiniri oshequi ioti Tasorentsí catsini. Irootaque icoacaaqueriri. ¹² Aquemisantaqueri Quirishito, irootaque ayotantacari ocameetsataque anquenquetsatacayeri Tasorentsí, inquemisantavaquee. Eiro atsaroacaaritsi. ¹³ Piojeitaque noamejeitaquempi, irootaque oshequi yoashinoncanteetaquenari, iro cantaincha eiro poashiretacojeitanatsi, irointi pinquimoshirejeite.

Yora Pavoro icantiri Tasorentsí: “Pamitacojeiteri ejesosati”.

¹⁴ Oshequi ioti Tasorentsí, oshequi imataqueeneri, irootaque nopincatsatantarcariri, aisati noquenquetsatacapinitantacariri. ¹⁵ Iriotaque ashijeitaqueeri, maaroni quemisantajeitaqueri. Asavicajeiti arori aca quipatsiquica, ainiro isaviqui pashini inquitequi, iro cantaincha ashanincajeitacari. ¹⁶ Icameetsatasanotaque catsini Apa, itasorentsitasanotaque catsini, irootaque nocantantacariri incantero Ishire ontasoncaventempi, impoiji ontimasanotanaque piotanteari. ¹⁷ Nocantaqueri inquemisantacaasanojeitempi, pishiretapinitanteari Quirishito. Aisati, nocoaque pishirejeitaquearo jaoca icanta Tasorentsí inintasanojeitaquempi, pinquemisantasanotantajeariri. ¹⁸ Ariorica pishiretasanojearei, pinquempeteari itsipapee quemisantatsiri, piotasanojeite oshequi catsini inintasanojeitaquee Quirishito, te capichaji. Yashi yoiro inintasanojeitaquee, icantani. ¹⁹ Nocoaque piojeite inintasanojeitaquee, iro cantaincha te ayojeiteji paita inintantajeiteeri. Ariorica piojeitaque inintasanojeitaquee, nocoaque aisati pishiretasanojeiteari Tasorentsí aisati nocoaque irimatacaasanojeitempiro catsini maaroni icoacaaajeitaquempi.

Tsame ampincatsajeiteri Tasorentsí.

²⁰ Ari itasoncaventasanojeitaquee Tasorentsí, oshequi intacojeitaquee, yoanaaqueero maaroni acoacojeitaqueri. Tecatsi ancantea antsoteajeitero anquenqueshirejeitero maaroni imajeitaqueeneri. ²¹ Tsame maaroni quemisantajeitiriri Jesoquirishito ampincatsajeiteri Tasorentsí; tsame ancamantapinijeiteri atiripee icameetsatasanotí, ancantaitatiyempani. Aitaque ancantajeiteari.

4

Tsame anquempetavacaajeitea, maaroni.

¹ Noquemisantaqueri Avincatsarite, irootaque yoiminqueanteetaquenari aca caravosoquica. Meeca noncantajeitempi: cameetsa pisavicajeite; icoyeajeitaquempi Avincatsarite, meeca pimajeiteneri maaroni icoacaaajeitaquempi. ² Eiro pishemejeitsi, pincavintsantajeite, eiro pishemajeitaritsi pishaninca, irointi pinintajeiteri, eiro piquishirtsu. ³ Pincantajeitero Ishire Tasorentsí oamejeitempi pinquempetavaaajeitanteeari, cameetsa paacameetsatavacaajeitanteeari. ⁴ Maaroni quemisantatsiri ashanincatavacaajeitaca, aisati ainiro Ishire Tasorentsí apaniro, ora quiso oajeitaqueeri. Amoncaratavacaajeitaca: icoyeajeitaquee Tasorentsí, ayojeitaque irimajeitaqueenero maaroni icantajeitaqueeri, irootaque aveshireimentasanotantacariri. ⁵ Icarataque Avincatsarite apincatsajeitaqueri apaniro, amoncaratavacaajeitaca aquemisantajeitaqueri arori, aisati amoncaratavacaajeitaca avaotisamentajeitacari. ⁶ Itimi aparo Tasorentsí: yora Apasanori arori. Ipincatsariventajeitaquee maaroni arori, itasoncaventajeitaquee, quiso yoajeitaquee maaroni.

Onashiyetaca imatacaaajeitaqueeri Quirishito.

⁷ Ineshinoncaaajeitaquee Quirishito, iro cantaincha onashiyetaca imatacaaajeitaqueeri. ⁸ Ora irineane Tasorentsí oquenquetsatacotitarini, ocantitani: “Irovancanajearica Quirishito coajica inquitequi, iranaacojeiteri maaroni camaari quisajeivetacariri; irinti

atiripee, irimatacaaajeiteri paitapeerica".⁹ ¿Paita ocantantari: "Irovancanaja"? Aitaque iponeanacari peerani inquitequi jenoqui, irosati isavanticapaacari aca quipatsiquica. Impoiji yovancanaja aisati.¹⁰ Yora anuireatsiri aca quipatsiquica yovancanaja aisati anta inquitequi jenoqui. Anta ipincatsariventajeitaquee aisati itasoncaventajeitaquee maaroni, catsini.

¹¹ Imatacaaasanojeitaqueri quemisantajeitatsiri yantajeitaquero paitarica icoacaa-jeitaqueriri: itiancaneppee, camantantatsiri, quenquetsatacantatsiri, jivatacaantat-siri, oametantatsiri, maaroni.¹² Ari imatacaaajeitaquee arori, aisati iriori maaroni quemisantajeitiriri, irootaque amajeitantarori antaveetiniri. Aisati imatacaaajeitaquee aquemisantacaasanojeitaqueri maaroni quemisantajeivetariri Quirishito.¹³ Ari incanteani irimatacaaajeitee, irosati amoncaratavacanteari anquemisantasanojeite, aisati ayotasanojeitanteariri iriori. Icoaque ayotasanojeiteri anquempetasanojeitanteariri iriori.

¹⁴ Peerani aquempeveitarini jananequi, te amatasanojeiveitearoni antajeivetaniri. Aquemisantashijeivetacarini amatavijeitaqueerini, te ayoveiteani. Iro cantaincha te incoyeji Tasorentsi anquempetajeari jananequi, irointi icoaque anquempeteari ante-ripee, icoaque ontimasanote ayojeitanteari.¹⁵ Icoasanotaque ancavintsaasano-jeiteri itsipapee, cameetsa ancamatajeiteri irineane: tempa queariotasanoque. Icoaque aiquero ajatatiye anquempetasanojeitanaqueari Quirishito: yora Avincat-sarite.¹⁶ Aquemisantajeitaqueri, irootaque ashancatavacaajeitantacari; aisati yoame-jeitaquee amitacotavacaajeitantacari, aisati yoamejeitaquee amajeitantacanariri maaroni icoacaaajeitaqueri. Aisati yoamejeitaquee anintavacaajeitantacari.

Icantiri: "Eiro piquempetajatsi peerani".

¹⁷ Meeca novajempiro icantaqueri Avincatsarite, noncamantempiro icoacaaque-mpiri. Te incoacayempiji pinquempetajeari caari quemisantatsi: yatsipetashijeita iriori yaamaashiyetacaro paitapeerica, te inquenqueshireempaji.¹⁸ Te iriojeiteriji Tasorentsi, oquempetaca te ontimeji ishire. Te irinintajeiteji inquenqueshireteri, te incoajeiteji iroteri, irootaque caari irimatantearo Tasorentsi iroaneasanojeiteri irisaviquimojeitanteariri anta inampiqui.¹⁹ Yantapinitashitacaro caari cameetsatsi, iro cantaincha te impashiventajeiteji. Imayempitapinijeiti, itsinampavacaajeita, maaroni.²⁰ Yora Quirishito, te iroamejeitempiji pinquempeteari yora tseencantatsiri.²¹ Tempa piquemacotaqueri Jesoshi, queario noamejeitaquempi jaoca icantari.²² Ari meeca eiro piquempetajatsi peerani. Pashi poironi te pincameetsateni. Pinintasan-otironi pantayetironi caari cameetsatatsi, irootaque pamatavitantajari avisati.²³ Eiro piquenqueshiretajirotsi piquenqueshireveitaniri peerani, irointi pinquenqueshiretajero cameetsatatsiri.²⁴ Pimpashinijeitanaque: eiro pantashitajirotsi caari cameetsatatsi, irinti pinquempejeitajea Tasorentsi, tempa icameetsatasanotaque.

Icamantajeitiri Pavoro irantayeteri.

²⁵ Meeca eiro pamatavitantajitsi aisati, irointi tampatica pineanateri pishan-inca. Pamene: ariorica ashancatamacari Quirishito, ashancatavacaajeitaca, maaroni.²⁶ Ariorica pinquisashireaquea, eiro pantasanotirotsi caari cameetsatatsi. Aisati, ariorica pinquisashireaquea, pishintsite pincatsimareajea aisati,²⁷ oncateataquea eiro catsini imatimatantimpitsi camaari irantacayempiro caari cameetsatatsi.²⁸ Ariorica picoshiv-eitani, eiro papiitajirotsi pincoshitaje, irointi pintsameete. Pantaveetanontea avisati, aisati pincavintsayeri ashinoncaincari.

²⁹ Eiro pineanatantarotsi caari cameetsatatsi, irointi pineanatantearo cameetsayet-siri. Cameetsa poametavacayea, piveshireacayeari pishaninca.³⁰ Terica pisavique cameetsa, oashiretanaca Ishire Tasorentsi. Eiro poashiretacaarotsi: tempa irootaque quempoyeajeitaquempi. Oncanteani onquempoyeajeitaquempi irosati pijatanteari inquitequi. Anta inquitequi paviscotasanotapaaje catsini.³¹ Meeca eiro piquisatsi, eiro pitsimaajencatatsi, eiro picatsimatantitsi, eiro piquisatsatantitsi, eiro picantimatantitsi. Eiro catsini piquishiritsi itsipapee,³² irointi pincavintsaajeiteri, pineshinoncajeiteri.

Piquemisantaqueri Quirishito, meeca te inquishimentempiroji Tasorentsi pantayetaqueri, irointi icavintsaajeitaquempi: aisati pinquempejeiteri pishaninca iriori, eiro piquishimentiritsi yantayetaqueri, irointi pincavintsayeri.

5

¹ Tempa avirojeitaque itomipee Tasorentsi inintasanotiri: ari meeca pinquempejeiteeari. ² Inintajeitaquempi Quirishito, irisati shinetainchapajacoyeetiri, icamimentajeitaquempi. Ineacameetsatasanotaquero Tasorentsi oca imataqueri itomi. Oquempetaca inintajeitaquempi Quirishito, aisati pinquempeteri pishaninca, pinintasanojeiteri.

³ Eiro pantirotsi caari pai, eiro pitsinampantitsi catsini, eiro pinevetarotsi yashijeitari itsipapee: quemisantatsiri te irantapiniteroji oca. ⁴ Eiro picantatsatacotirotsi tsinane, eiro pincantatsatacotiritsi shirampari. Ocameetsati pimpashiventacayearo maaroni caari cameetsatatsi. Te oncameetsateji pishineventearo, eiro pishirontimentarotsi. Irointi ocameetsataque ampasonquiteri Tasorentsi: tempa icavintsaasanojeitaquee.

⁵ Jero oca noncamantempi, piotasanolavaquero: eiro ijatitsi inquitequi yora antapinitirori caari yai, aisati eiro ijatitsi tsinampaantatsiri, aisati nevetitayetariri iroaararo itsipapee. Yora nintasanotirori irashitaarantea iquempetacantaquero irorica Tasorentsi inintantarori. Pinequero, eiro ijatitsi irinti anta ipincatsarijeitinta Quirishito aisati Tasorentsi. ⁶ Ainiro coavetachari iramatavitempi: oshequi irineanatashivetempi, vero, vero. Incamantashijeittempi ocameetsati pimajeitero oca caari cameetsatatsi, iro cantaincha eiro piquemisantiritsi. Iroasanquejeitaqueri Tasorentsi maaroni caari quemisantiri. ⁷ Eiro catsini piquempetaritsi.

Icantiri: “Pintimajeite quitaiteriqui”.

⁸ Peerani oquempetani pitimini tsiteniriqui: pantapinitironi caari cameetsatatsi. Iro cantaincha yoameetsataquempi Quirishito, oquempetaca itimacaajimpi quitaiteriqui. Meeca cameetsa pisavijke, onquempetanteari pintime quitaiteriqui. ⁹ Ariorica antime quitaiteriqui, ancavintsante, antime cameetsa, tampatica aneanate. ¹⁰ Piojeitero icoacaaquempi Avincatsarite, impoiji pimamatero. ¹¹ Eiro pantirotsi yantayetiri timajeitatsiri tsiteniriqui, irointi piotacaajeiteri te oncameetsateji oca yantajeitaqueri. ¹² Nopashiventacaacaro noquenquetsatacotiro yantajeitiri, ora imanavetacari. ¹³ Ariorica piotacayeri te oncameetsateji yantajeitiri, onconijataque maaroni yantajeitaqueri. Impoiji iriotanaque te incameetsateji. Impoiji ariorica incoaque incameetsatanaque, onquempetajea irisavijke iriori quitaiteriqui. ¹⁴ Tempa icanteeti: “Ariorica pimaaque, pintinaanaje. Ariorica picamaque, pintinaanaje aisati. Iriotacaasanotempi Quirishito, irisavicacayempi quitaiteriqui”.

¹⁵ Pinquenqueshiresanotero paitapeerica pantayeteri: eiro piquempetaritsi caari iotatsi, irointiquea ocameetsati ontimasanote piotanteari. ¹⁶ Ariorica ompomerentsiti mojeittempi, iro cantaincha pinquearioventero pantero cameetsayetatsiri. ¹⁷ Eiro pantashiyetarotsi paitapeerica, irointi pijivate pinquenqueshiresanotea. Piojeitero paitapeerica icoacaaquempi Avincatsarite: impoiji pimamajeitero irointi. ¹⁸ Eiro pishinquitatsi, te oncameetsateji catsini: irointi pinquemisantasanotero Ishire Tasorentsi oamejeitantempi. ¹⁹ Oshequi pincantapiniteri pishaninca: “Tempa icameetsataque Avincatsarite”, aisati pimpampoyeaventapinijeiteri Tasorentsi, piveshireimenteari. ²⁰ Pipincatsataqueri Avincatsarite Jeso quirishito, irootaque itasoncacoventantaquempi Apa Tasorentsi. Meeca pimpasonquitapiniteri. ²¹ Ariorica pipincatsatiri Quirishito, pipincatsatavacaajeitea, paacameetsatavacaajeitea.

Ocameetsati incavintsaasanotero shirampari ijina, aisati ocameetsati ompincatsateri tsinane ojime.

²² Tsinane, ¿pipincatsatirimpia Avincatsarite? Ari, aisati pinquempeteri pijime, pipincatsateri iriori. ²³ Iquempetaca Quirishito ipincatsariventajeitiri quemisanajeitiriri, aisati inquempetea shirampari, impincatsariventero ijina. Tempa oshequi icavintsaajeitaquee Quirishito, irootaque yoavisacojeitajeeeri. ²⁴ Oquempetaca aquemisantajeitaqueri Quirishito, ocameetsati tsinane onquemisantapiniteri ojime.

²⁵ Iquempetaca Quirishito inintasanojeitaquee, irosati icamimentantaqueeri, avirojei shirampari, cameetsa pinintasanotero pijina.

²⁶ Pinequiero, inintajeitaquee Quirishito, icamimentajeitaquee, irootaque yoameetsatantajeiteeri. Ariorica anquemisantajeitero irineane Tasorentsi aisati avaotisajeitea, iroameetsatasanojeitee Quirishito anquearioventajeteneri maaroni icoacaajeitaqueeri.

²⁷ Icoaque irineacameetsajeitee arori, aisati iriori maaroni itsipapee quemisantatsiri; eiro otimimojeiteetsi caari cameetsatatsi. Icoaque ancameetsatasanotanaque, eiro catsini otimi antane. Pinequiero, oshequi inintajeitaquee. ²⁸ Aisati, shirampari, pinintasanojeitero pijina. Oquempetaca picavintsaaja avisati, pincavintsayero pijina. Yora cavintsairori ijina, icavintsaaja irisati. ²⁹ Te amatapiniteaji anquisajea arosati, irointi acavintsaaja arosati, aneshinoncataja arosati. Aisati, iquempetaquee Quirishito arori, ariorica aquemisantajeitiri, ³⁰ icavintsaajeitaquee; tempa ishanincajeitaquee, quiso yoajeitaquee. ³¹ Ocanti Sanquenarentsi: “Ariorica iraaque shirampari ijina, irojocanaqueri iriri, aisati iriniro, quiso iroanaquiero ijina. Yora shirampari aisati ijina ishiaquiero apaniro ivatsa irori: quiso iroavacayea, te oncameetsateji irojocavacayea”.

³² Opomerentsivetaca anquemero oca, iro cantaincha oshiaqueri Quirishito aisati maaroni quemisantajeitiriri, apaniro anajeitaque: iotaca ashanincatavacaajeitaca, aquempeavacaajeitaca. ³³ Ari nampiitajempiro: iquempetaca icavintsaaja irisati shirampari, ocameetsati incavintsaasanotero ijina, incanteani. Aisati ocameetsati ompincatsateri tsinane ojime.

6

Jaoca ancanteriri atomipee aisati ashijeiteeri.

¹ Jananequi, ariorica piquemisantaqueri Avincatsarite, icoacaquempi pinquemisan-tajeiteri aisati ashijeitimpire. ²⁻³ Otimini peerani oshequi icantapinivetacariniri Tasorentsi peeraniniri, iro cantaincha te incantapiniteriji: “Ariorica pinquemisantena, ario peerani pintimeni quipatsiqui”. Impoijiquea icantirini: “Ariorica pimpincatsateri piri, aisati pimpincatsatero piniro, cameetsa nosavicacayempi; peerani pintimeni avinti quipatsiqui, eirotsita picamitatsi”. ⁴ Shirampari, eiro pishemaritsi pitomipee, iquisacari; irointi poamejeiteri icantayetiri Avincatsarite, aisati poamejeiteri impincatsateri.

Jaoca incanteriri ivatorote aisati iratirite.

⁵ Intimerica amanantimpire, pinquemisanteri, pimpincatsateri. Oquempetaca pantiniri Quirishito maaroni icoacaquempi, panteneri amanantimpire maaroni icoacaquempi irori. ⁶ Eiro pamatavitiritsi. Eirorica yamenimpitsi, pincanteani pantaveeteneri: tempa aisati pantaveetiniri Quirishito. Pincoasanotaque panteneri Tasorentsi maaroni icoacaquempi. ⁷ Te irio pantaveetasanotene atiri, irintiquea pantaveetini Avincatsarite. ⁸ Piojeite ariorica pantapinitero cameetsatatsiri, impinatempi. Impinateri pimantaari, caari pimantacha, maaroni. ⁹ Aisati amanantiriri atiri: pincavintsaajeiteri pamanantanepee, tempa nocantaqueri inquemisantempi. Eiro p quisapinitiritsi. Eiro pipeacojeitarotsi: avirojeitaque ipincatsariventajetiri Quirishito, aisati ipincatsariventajetiri pamanantane: pimoncaratavacaajeitaca.

Quemisantatsiri ishiaqueri soraro.

¹⁰ Apanivaniji noncamantempi: pincanteri Avincatsarite impincatsariventajetempi, aisati intasoncacoventajetempi. ¹¹ Iquempetaca yaventapinitaro soraro ashirotatsiri iitsaare eiro imatantaritsi oyerenemer, paventajeiteari Tasorentsi eiro imatantimpitsi camaari, yora amatavijeitinemeri. ¹² Te irio ampiaeaa atiri aneayetiri, irinti apiataca caari conijayetatsi: yora pincatsariventiriri camaari, jivajeitiriri camaari, pincatsariventiriri maaroni tseencantatsiri, antirori caari cameetsatatsi, maaroni camaari catsini. Iquisajeitaquee irori. ¹³ Oquempetaca yaventayetaro soraro ashiroyetatsiri, paventeari avirori Tasorentsi poimpianpeariri camaari. Iroashinoncayempime, iro cantaincha

eiro imatasanotimpitsi, panaacotajeri. Pintsoeteayeteneri Tasorentsi maaroni icoacaajeitaquempi; eiro pojoquirotsi piquemisanti. ¹⁴ Pinquemisantsanotanaque, pinquenqueshirejeitero queariotasnotatsiri eiro yoashinoncantimpitsi camaari: oquempevetaca yaventaro soraro ishiticatsaquirero eiro imatantari yora quisavetariri. Pincameetsatasanotanaque eiroquea imatantimpitsi camaari: pinquempetanteeariri soraro, yaventaro ipashicanejitari. ¹⁵ Oquempetaca soraro isapatotanaca cameetsa iquenayetantari, ari pivetsicaquea pinquenayetanaque, pincamanteri atiri jaoca incanteari iravisacotantajeari. ¹⁶ Aisati ainiro soraro yojocaari, yojocantarori parashetatsiri chacopi caari iquentanteetari. Aisati avirori, pinquemisanteri Tasorentsi, eiroquea imatantimpitsi camaari irantacayempi caari cameetsatatsi. ¹⁷ Aisati, oquempetaca soraro ipashicainatacaro ashiro yavisacotantari, paventeeari avirori Tasorentsi paviscotantajeari: impoiji eiro imatimpitsi camaari. Ainiro aisati ivesamento soraro imatantariri iisane: oshiaquero irineane Tasorentsi oamejeitaquee Ishire amatanteeariri camaari.

¹⁸ Pinquenquetsatacapiniteri Tasorentsi. Paitapeerica oncoacayempi Ishire, pincanteri. Pincamanteri coiteimotaquempi. Eiro piperaventarotsi pinquenquetsatacayeri: pincantapiniteri: “Pincavintsaaajeiteri noyemisantaririnte”. ¹⁹ Aisati pincanteri iramitacotena narori, eiro nopashiventanta nonquenquetsatacaajeiteri atiri. Noncamantajeiteri caari iojeiveitan: iroavisacojeiteri Tasorentsi maaroni quemisantajeiterineri. ²⁰ Nocamantapinitaqueri atiri, irootaque yoiminqueanteetaquenari aca caravosquica. Pincanteri iramitacotena cameetsa noncamantapiniteri atiri, eiro nomanirotsi. Tempa irootaque icoacaquenari Tasorentsi.

²¹ Ariorica irareetea Tiquico, incamantapaquempi jaocarica nocantacari, aisati incamantempi pitarica nantayetaqueri. Iriotaque ayemisantaririnte nonintasanotiri, iquearioventiniri Avincatsarite maaroni icoacaquaquerir. ²² Irootaque notiancantacariri, nocoaque piojeite jaocarica nocantacari. Aisati nocoaque iriveshireacaajeitempi. ²³ Meeca, noyemisantaririnte, nocoaque cameetsa irisavicacayempi Apa Tasorentsi, nocoaque iroamejeitempi pinquemisantsanojeite aisati pinintasananojeiteri pishaninca. Aisati nocoaque inquempetacayempi iriori Avincatsarite Jesoquirishito. ²⁴ Ariorica pincanteani pinintasanoteri Jesoquirishito, nocoaque irineshiloncajeitempi Tasorentsi, maaroni.

Narotaque sanquenajeitimpiori: *Pavoro*

YORA PAVORO ISANQUENATINIRI JIRIPOSHISATI

Yovetsajeitari Pavoro jiriposhisati.

¹ ¿Savicajeitatsimpi jiriposhisati? ¿Tecatsimpa oajeitempine? Narotaque Pavoro sanquenajeitaquempirori, nocarataqueri aca iriori Timoteo. Narotaque antaveetiniriri Jesoquirishito icoacaquenari. Nosanquenajeitimpido maaroni noyemisantaririnte: quenquetsatacantajeitatsiri aisati amitacojeitiriri quemisantatsiri, maaroni. ² Nocoaque irineshiloncajeitempi Tasorentsi, aisati cameetsa irisavicaaajeitempi. Aisati nocoaque inquempetacaajeitempi Avincatsarite Jesoquirishito.

Ipasonquitiri Pavoro Tasorentsi.

³ Ariorica noquenqueshirejeitaquempi, nopasonquitapinitiri Tasorentsi. Avirojeitaque nopasonquitimentiri. ⁴ Aitaque nocantani noquenquetsatacapinitiri Tasorentsi, nocantapinitiri: “Pincavintsaajeiteri jiriposhisati”, aisati noveshireimentajeitaquempi. ⁵ Picantani pamitacotapinijeitaquena avaraquaero irineane Tasorentsi, acamantajeitiri atiri jaoca icantajari yavisacotantajari. Irootaque nopasonquitimentimpido. ⁶ Ocameetsataque oca pantapinijeitaqueri, tempa irio Tasorentsi antaaquempirori. Niotaque incantatiyempani, írimatacaapinitempiro, irosati impocantajeari Jesoquirishito. Ariorica impocapaaje iriori, ari moncaratapaaca maaroni pantajeitaqueri. ⁷ Tempa ocameetsataque noneacameetsajeitaquempi, aitaque oshequi nonintasanojeitaquempi. Ariorica nonapiniti caravosoqui, noquenquetsatacotiri Jesoquirishito, aisati ariorica yoisoquijana, aisati noquenquetsatacotiri. Nocamantapinitiri yora pincatsaripee paita noquenquetsatacotantariri Jesoquirishito; aisati nocamantiri oqueariotasanotaque irineane Tasorentsi. Iro cantaincha picantani avirori picavintaasanojeitaquena, aisati ineshiloncajeitaquee Tasorentsi. ⁸ Iotaque iriori oshequi nocoiteajeitaquempi. Oshequi inintasanojeitaquee Jesoquirishito, aisati noquempetaca narori, oshequi nonintasanojeitaquempi. ⁹ Aisati nocantiri Tasorentsi iramitacojeitempi, nocoaque aiquero pijatatiye pinintasanojeiteri itsipapee. Aisati nocantiri iroamejeitempi iriori piotasanojeitanteeariri, aisati ontimimojeitantempiri piotanteari: aiquero pijajeitatiye. ¹⁰ Nocoaque piojeite pantero cameetsatatsiri, eiroquea pantirotsi caari cameetsatatsi. Nocoaque pincameetsatasanojeitanaque, eiro otimitsi pantane; pincantaitatiyempani, irosati impocantajeari Jesoquirishito. ¹¹ Tempa yoameetsatasanojeitempi, meeca nocoaque cameetsa pisavicaeite, iramitacojeitempi iriori. Impoiji maaroni atiri impincatsajeiteri Tasorentsi, incantajeite: “Tempa icameetsatasanoti Tasorentsi”.

Itimi Pavoro caravosoqui, iro cantaincha ovaraanaca irineane Tasorentsi.

¹²⁻¹³ Noncamantempi, noyemisantaririnte: yoiminqueetaquena, iro cantaincha te nantsipetashitearoji nosaviqui aca caravosoqui. Nocantani nocamantajeitiri atiripee jaoca incanteari iravisacojeitantejeari. Iquemajeitaquena maaroni soraropee: yora shentajeitirori ivanco pincatsari. Aisati pashinipee atiri, iquemajeitaquena. Iojieiti tecatsi nante, irointi yoiminqueashiyeetaquena; apatiro noquenquetsatacotiri Quirishito. Eirome notimime aca, eirome iojejajime jaoca incanteari iravisacotantajeari. ¹⁴ Ineapaaquena ayemisantaririnte jaoca nocantari aca, irootaque iveshireimentajeitanteacariri Avincatsarite. Meeca te intsaroajeiteji, irointi icoasanojeitanaque incamantajeiteri maaroni atiri irineane Tasorentsi.

¹⁵ Ainiro oshequi quenquetsatacotiriri Quirishito. Inequena aparopee oshequi noquemisantacaajeitiri atiripee, irootaque iquisaneentantaquenari, aisati ipiatsatantaquenari; icoaque iranaacojeitena impincatsarite. Iro cantaincha ainiro pashini picavintaasanoquenari, ¹⁶ oshequi inintajeitaquena irinti. Iojieitaque iriori notimi aca caravosoqui noncamantajeitanteeari pincatsaripee paita noquenquetsatacotantariri Jesoquirishito, noncamanteri jaoca incanteari iravisacotantajeari. ¹⁷ Yora quisaque-nari, te incoacayeriji atiri inquemisantajeitena, irintiquea coantsi iranaacotena inquemisantacaajeiteri atiripee. Te irantaveetasanoteneri Quirishito, irointi icoaveta

iroashinoncayenameaca caravosoqui. ¹⁸ Ari, oncanteata inquishenata. Aparopee iquisa-neentaquena, yora pashini icavintsaquena, iro cantaincha iquenquetsatacojeitaqueri Quirishito, irootaque noquimoshiretantaquenari narori. Noncanteani nonquimoshiretasanotanaque. ¹⁹ Niotaque ariorica inquenquetsate, ari cameetsa nontime narori. Tempa picantaqueri Tasorentsi, irootaque yamitacotantaquenari, aisati amitacotaquena Ishire Jeso quirishito.

²⁰ Te noncoyeji nompashiventea, irointi nocoasanotaque narori cameetsa nonquemisantasanoteri Quirishito; nocoaque nonquempetajea peerani, te nontsaroyeji. Arioricampa iroyeetaquena meeca, irompa eiorica yoyeetanatsi, iro cantaincha paitapeerica nanteneriri, nocoasanotaque incantajeite atiri: "Tempa icameetsatasanoti Quirishito". ²¹ Eirotsitarica yoyeetanatsi meeca, irosati noncanteani nonquemisantasanoteri Quirishito. Ariorica noncamaque, ocameetsatasanotaque aisati: tempa noneasanoteri anta inquitequi; irootaque nocoasanotaqueri. ²² Eirotsitarica nocami, ari noncanteani nomateneri Avincatsarite paitapeerica icoacaquenari. Tempa ocameetsataque. Aisati, ariorica noncamaque, ocameetsataque. Te nioteji pitarica nocoasanotaqueri. ²³ Nocoasanovetacaro apite. Nocoaque noncame, nojatashitantariri Quirishito, quiso noanteariri. Tempa ocameetsatasanotaque. ²⁴ Iro cantaincha aisati ocameetsatasanotaque noncanteani nanee, namitacojeitantempiri avirori. ²⁵ Naamaaca meeca eirotsita yoyeetanatsi, eirotsitarica nojatitsi inquitequi. Nosaviquimojeitempi namitacojeitempi pinquemisantasanajeite, aisati piveshireimentajeiteari yora piquemisantasheru. ²⁶ Ariorica nojatashijetajempi aisati, piveshireimentavajena, aisati piojeitanaque icameetsatasanotaque Jeso quirishito.

Icantiri: "Cameetsa pisavica jeite".

²⁷ Jero oca pinquenqueshiretasanoteri: piquemisantaqueri Quirishito pavisacotan-tajari, meeca icoaque cameetsa pisavica jeite, pantapinjeitero maaroni icoacaquem-piri. Ariorica nojatashijetempi nocoaque noneajeitapeempi piquearioventajeitaqueri piquemisantajeiti maaroni. Eiroricampa nojatashijetimpitsi, iro cantaincha nocoaque nonquemacojeitempi pincaratavacaajeitea, pimpomerentsiventearo pincamantajeiteri atiri: "Ariorica pinquemisanteri Quirishito, iroavisacotempi". ²⁸ Eiro pitsaroacaajeitaritsi yora quisajeitimpine: impoiji inquenqueshirejtanaquea: "¿Paita caari itsaroacan-tana?" Iriojeite iriori irijajeite Sharincaveniqui, iriojeite aisati yoavisacojeitaqueri Tasorentsi. ²⁹ Icavintsaajeitaqueri Tasorentsi, inintacaajeitaqueri pinquemisanta-jeiteri Quirishito. Iro cantaincha aisati inintacaajeitaqueri pineacatsitmentajeiteari. ³⁰ Aitaque amoncaratavacaajeitaca apomerentsiventajitiniri. Peerani pineajeitaquena nopomerentsiventiniri. Meeca aisati piquemacojeitaquena, oshequi nopomerentsiven-tiniri.

2

Eiro picavintsaatsi avisati, irointi pincavintsaajeiteri itsipapee.

¹ Tempa ocameetsati piveshireimentajeiteari Quirishito. Inintajeitaqueri, irootaque ocameetsatantari piveshireimenteari. Tempa quiso oajeitaqueri Ishire Tasorentsi. Tempa piojeiti picavintsanti. Tempa piojeiti pineshioncatanti. ² Ari meeca nocoaque cameetsa pisavica jeite, paacameetsatavacaajeitea, pinintavacaajeitea. Cameetsa omon-caratavacaajeitea paitapeerica pincojeiteri aisati paitapeerica pinquenqueshirejeiteri. Ariorica pantajeitero oca, ari nonquimoshiretanaque. ³ Paitapeerica pantajeiteri, eiro piquisavacaajeitatsi, eiro pischemejeititsi. Eiro pijjeititsi picameetsatasanoti, eiro pij-jeititsi panaacojeitaqueri itsipapee, irointi pinquenqueshirejeite: "Icameetsatasanojeiti itsipapee, yanaacojeitaquena icameetsati". ⁴ Ocameetsaveta pincavintsayea avisati, iro cantaincha ocameetsatasanoti aisati pincavintsaajeiteri itsipapee.

⁵ Pinquempejeiteari Jeso quirishito: te incavintsayeaji irisati, irointi icavintsaajeitaquee arori. ⁶ Iriovetaca Tasorentsisanori inaveta, iro cantaincha icantiri iriri: "Apa, nioti aquempetavacaajeitaca, Tasorentsi anajeiti, ⁷ iro cantaincha nocoaque

nompeapeempa atiri, nantempiro maaroni picoacaquenari". Ari yojocanaquero ipincatsaritantaniri, itasorentsitananiri. Ari ifimantapaacari peerani quipatsiqui, yatiritasanotapaaque: ⁸ iquempejeitapaaquee arori. Te impincatsarivetaempaj, irointi ipincatsataqueri iriri. Irisati coantsi ipajacoyeetaqueri coroshiqui, icamimentajeitaquee arori. Irootaque intacaaquerir iriri. ⁹ Iro cantaincha impoiji yaajiri jenoqui, cameetsa isavicacaajiri catsini. Ipeavajiri aisati pincatsarisanori, yanaacojeitapaaqueri maaroni timajeitatsiri. ¹⁰ Icoaque Tasorentsi ampincatsajeiteri Jesoshi, catsini: yora jenoquiniri, arori quipatsiquiniri, yora ishaavijiniri, maaroni. Aiquero ajatatiye, ampincatsatasanojeiteri catsini. ¹¹ Aisati ancantasanojeite: "Iriotaque Jesoquirishito Pincatsarisanori", impoiji aacameetsatasanojeitanteeariri catsini yora Apa Tasorentsi.

¹² Ari, noshaninca, picantani piquemisantapinijeitaquenani. Notsipatantimpiniri piquemisantajeitaquenani. Meeca te nontsipajeitempiji, iro cantaincha nocoaque pinquemisantasanojeiteni aisati. Tempa yoavisacojeitaquempi Tasorentsi: meeca pimpincatsatasanojeiteri, panteneri maaroni icoacaajeitaquempi. ¹³ Tempa itasoncacoventapinitaquempi, picoajeitantacari pimayetaquero cameetsayetatsiri. Tempa ocameetsataque maaroni icoacaajeitaquempi, aitaque yamitacotapinijeitaquempi pimataquero. ¹⁴ Pimatasanojeitero maaroni icoacaquempi: eiro pishemarotsi, eiro pipiatsataritsi iriori.

¹⁵ Ariorica panteneri Tasorentsi maaroni icoacaquempi, eiro otimitsi pantane, irointi pincameetsashiretanaque. Tempa itomintajeitaquempi, ishintojeitaquempi. Yoameetsatasanojeitaquempi. Ara pinampiqui picarajeitaqueri oshequi tseencantatsiri: te incameetsateji, te irioteriji Tasorentsi. Oquempetaca tsiomentotsi otsiotaca amenantari, ari cameetsa pisavicajeite piotacaajeitanteeariri yora tseencantatsiri.

¹⁶ Oquempetaca pitsiotacaro tsiomentotsi pamenantari tsiteniriqui, aisati poamejeiteri pishaninca irineane Tasorentsi irineantapajearori iriori inuite, incantaitatiyempani iraneapaa je anta. Ari pimamajeitero oca; impoiji, impocajerica Quirishito, nonquimoshireimentajeitaquempi. Niotanaque te nantsipetashitearoji noamejeitaquempi. ¹⁷ Meeca piquemisantajeitaque. Tempa narotaque quemisantacaajeitaquempi, irootaque icoanteetacari iroyeetena. Arioricampa iroyeetena meeca, iro cantaincha niotaque aiquero pijatatiye pimpincatsatasanotanaqueri Tasorentsi. Irootaque noquimoshiretantacari, aisati nocoaque pinquimoshireventena avirori. ¹⁸ Queario, ocameetsati pinquimoshirejeitanaque, anquempetavacaajeitanteeari, anquimoshiretasanojeitanteeari, maaroni.

Itianquiri Pavoro Timoteo.

¹⁹ Ariorica incoacayena Avincatsarite Jesoshi, nocoaque intsipaite nontianquempi Timoteo. Ariorica impiaje aisati aca, incamantapaajena jaoca picantajeitari, nonquimoshiretanteari. ²⁰ Te noncarateriji itsipa quempetearine iriori: oshequi icoaque incavintsaajeitemi cameetsa pisavicajeitanteeari. ²¹ Ainiro pashinipee: iquenqueshirejeitaquero paitapeerica icoayetiri iriori, te inquenqueshiretapiniteroji icoaqueri Je soquirishito. ²² Iro cantaincha piojeitaque icameetsataque Timoteo, iquearioventiro yamitacotaquena noquenquetsataacaqueri atiri: nocamantajeitiri jaoca incanteari iravisacotanteeari. Oshequi yamitacotaquena, iquempetacantaquena narorica iriri. ²³ Irootaque nocoantacari nontianquempi. Ariorica niotasanoque iroyeetena, irompa eirorica, ari intsipaite nontianqueri Timoteo incamantapeempi. ²⁴ Aisati naamaaca irishinetena Avincatsarite nojatashijeitemi. Eiro osamanititsi, ari nareeta-pajempi.

Iquenquetsatacotiri Epajororito.

²⁵ Chapinqui pitiancaquenari ayemisantaririnte Epajororito, oshequi intacotaquena. Icarataquena, nantaveejitiniri Avincatsarite. Oquempetaca soraropee iquearioventiniri iyapitanote paitapeerica yantiniriri, nocarataqueri Epajororito noquearioventiniri Avincatsarite maaroni nantiniriri; te nomperaventearoji icoacaquenari. ²⁶ Oshequi icoiteajeitaquempi. Piquemacojeivetacari yojoquiitaca, oshequi poashiretacovetacari. Meeca iquenqueshiretaquempi, te incoyeji poashiretacoteari. ²⁷ Queario, yojoqui-itasanovetaca, irovetailcha incameme, iro cantaincha ineshinoncatajiri Tasorentsi,

yoavisacotajiri. Aisati narori, ineshinoncatajana, te incoacayenaji incamimotena. Ioti nashinoncaavetaca, te incoacayenaji noashiretacoteari. ²⁸ Meeca nocoasanotaque nontiancajempiri. Ariorica pineajeitavajeri, pinquimoshireeventajeitavajeri, impoiji eiro noashiretacotimpitsi. ²⁹ Paacameetsatavajeri, pinquimoshireeventavajeri; tempa irio quemasantiriri Avincatsarite. Pimpincatsatavaqueri, aisati pimpincatsajeiteri iriori maaroni quempejeitacariri. ³⁰ Tempa yantaveetiniri Quirishito, irootaque yojoquitantacari, irovetailcha incameme. Oshequi intacotapinitaquena: iquempetaquempi pintacotapinijeitenename, pintimeme aca. Te incavintsayeaji irisati, irootaque incamanteameri.

3

Paamayeariyea yora coatsiri impeacaajeitempi jorio.

¹ Aisati, noyemisantaririnte, noncantajeitempi: pinquimoshireeventajeiteari Avincatsarite. Te noshemearoji oca nosanquenatapinitimpiri, tempa oameetsati pinquemapinitero. ² Paamayeariyea yora coatsiri impeacaajeitempi jorio: te incameetsateji. Paamayeariyea, yoashinoncaimpicari, icoaveta intotacayempime. ³ Atsipetashita atotiro ameshina, eiro oameetsateetsi, eiro oavisacoteetsi. Iro cantaincha Ishire Tasorentsi oamejeitaquee apincatsatasanojeitiri Tasorentsi, irootaque yoameetsajeitanteeri, yoav-isacojeitanteeri. Aveshireimentajeitacari Jesoquirishito, ayojeitaque tecatsi ancanta-jeitea avavisacotaja arosati.

⁴ Arioricame amaterome avavisacoteame arosati, tempa narosati oavisacota-janchaneme. Oshequi nomayevetaca, nanaacojeivetacari itsipapee. ⁵ Iroaquera notimapaaqueni, ⁷ nomaacotapaaque, ari itoyeanteetaquena. Narotaque ishanincani Ishiraerini. Aisati noshanincatacari Vejamini. Narotaque joriosanori, nashi noiro. Nomoncaratasanotaquero isanquenare Moishishi, tempa naro variseo. ⁶ Nocoasanoveitani catsini nonquemisanterime Tasorentsi, irootaque noquisajeitancariri yora quemisantajeitiriri: nojijeiveitarini yamatavijeitiri atiri. Cameetsa nomoncarataquero isanquenare Moishishi, tecatsi incanteetenani: “Ainiro pantane”. ⁷⁻⁸ Noveshireimentaveitaroni maaroni nantiniri, noshemeveitani, iro cantaincha meeca niotaque natsipetashitacaroni. Queario, natsipetashijeitacaroni maaroni. Meeca eiro noquenqueshiretajirotsi nantaveitaniri, irintiquea Jesoquirishito nompincatsate. Niotaque ipincatsariventasanotaquena, noveshireimentasanotacari, icameetsatasanotaque. Te nonquenqueshiretajeroji maaroni nantaveitaniri peerani: te oncameetsateji, nojocanaquero nantaveitaniri, oquempetaca ajocapinitiro cajara. Te nonquenqueshiretajeroji jaoca nocantaveitaniri, notseencaja narosati; meeca nopincatsataqueri Quirishito irinti, noquemisantaqueri. Nocoasanotaque nompincatsatanaqueri, irootaque nojocajeitantarori maaroni nantaveitaniri. ⁹ Nocoaque noshanincatasanotaqueari. Te noncameetsatashiteaji narori: nomoncarayevetaro isanquenare Moishishi, iro cantaincha te oameetsantenaji. Irointiquea noquemisantaqueri Quirishito, irootaque yoameetsatantaquenari irinti. Aitaque, yoameetsajeitiri Tasorentsi maaroni quemisantajeitiriri. ¹⁰ Nocoaque niotasanojeri Quirishito. Oquempetaca itasoncacoventajiri Tasorentsi yoitinaantajariri, nocoaque intasoncacoventapinitena narori. Aisati, oquempetaca oshequi icatsitimentajeitaquee, nocoaque noncatsitmenteri narori; oquempetaca icamimentajeitaquee, nocoaque nantaveeteneri narori irosati iroimentanteenarori. ¹¹ Impoiji ariorica intinaajeitanaje maaroni camaintsiri, nocoasanotaque nontinaanaje narori, nontsipatanteariri Tasorentsi.

Icamantacotaja irisati Pavoro.

¹² Tequeratsita nomayetero oca noquenquetsatacotaqueri, tequeratsita noncameetsatasanote. Iro cantaincha nocoasanotaque nomamateneri catsini, tempa yoavisacotajana Jesoquirishito nomatantearori. ¹³ Pinequero, noyemisantaririnte: te noncantempiji nomatasanoyetaquero maaroni nocoqueri nomateri. Te nonquenqueshiretajeroji maaroni nantayeveitaniri, irointiquea iotaqua noquenqueshiretasanotiro maaroni nanteneriri Quirishito, aisati nocoasanotaque catsini quiso noanaqueri iriori.

¹⁴ Noquemisantaqueri, irootaque icoantacari Tasorentsi nojate inquitequi, nosaviquimotapaajeri iriori. Meeca noquearioventiro nantaveetasanotiniri impinatantenari coajica anta jenoqui. ¹⁵ Nocoaque pinquempejeitenen, maaroni quemisantasanojatsiri. Terica pinquempejeitenaji, iriotacaajeitempi Tasorentsi tequerata omoncarateaji pinquemisantasanojeite. ¹⁶ Iro cantaincha pinquearioventero pimatasanotero maaroni icoacaquempi. Tempa aitaque iotacaquempi maaroni.

Icoaque Pavoro anquempejeiteari iriori.

¹⁷ Noyemisantaririnte, pinquempejeitenen. Aisati piotacojeiteri itsipapee, iquempejeitanarica. Impoiji pinquempejeitenen maaroni: pinquemisantasanojeiteri Quirishito. ¹⁸⁻¹⁹ Peerani nocamantaquempi ainiro oshequi quishiriri Quirishito: yora pajacotimenteeri coroshiqui. Meeca napiitajimpilo: queario icarati oshequi quishiriri. Te impincatsajeiteri Tasorentsi, irointi iveshireimentaro yoari: oquempetaca ipeajiro yoari itasorentsite. Oncameetsate me impashiventajeiteame, iro cantaincha ishemetashijeitaca. Iotaca iquenqueshirejeitiro jaoca icantajeitari aca quipatsiqui. Coajica irijajeitanaque Sharincaveniqui. Niraacojeitaqueri narori. ²⁰ Iro cantaincha acoaque anampitasanotearo ainti inquitequi. Coajica imponeaquea inquitequi yora oavisacojeiteri: yora Avincatsarite Jesoquirishito. ²¹ Yashi yoiro itasoncanti, imatantarori paitapeerica icoaqueri. Intasoncacoventapajee arori, impashinitapajeenero avatsa, anquempetanteariri iriori. Meeca ashiairo apatsaajeiti, acamajeiti; iro cantaincha coajica anquempejeiteari iriori, oncemeetsatasanotanaque avatsa, catsini: eiro apatsaa-jeitajitsi, eiro acamajitsi.

4

¹ Ari, noyemisantaririnte, oshequi nonintajeitaquempi, oshequi nocoiteajeitaquempi, oshequi noquimoshireventaqueMPI, oshequi noveshireimentajeitaquempi. Quiso poajeiteri Avincatsarite, pojatasanojeiteri. Queario, oshequi nonintajeitaquempi. ² Meeca noncamantero Evoria aisati Shintique eiro oquisavacaatsi. Cameetsa oncanteri Avincatsarite iramitacotero aacameetsatavacayea. ³ Meeca noncamantempi, noshaninca, tempa atspatavacaaca antaveetiniri Avincatsarite: nocoaque pamitacotero ora tsinane aacameetsatavacaaja aisi. Peerani opomerentsiventavetaroni ocamantajeivetari atiri jaoca incanteari iroavisacotantajeari: ocarajeivetaquenani, aisi iriori Queremente, aisi pashini amitacojeitanari. Osanquenajeitaca ivajiropee yora amitacojeitanari anta jenoqui, isanquenatacotaca maaroni savicatsineri inquitequi.

Pinquimoshireventerri Tasorentsi.

⁴ Pincantaitatiyempani pinquimoshireventajeiteri Avincatsarite. Nampiitajempilo: pinquimoshireventasanojeiteri, maaroni. ⁵ Nocoaque iriojeite atiri picavintsantasanojeiti. Eiro pipeacotarotsi: irotaintsi impocaje Avincatsarite. ⁶ Eiro picantashirejeititsi. Pincantaitatiyempani pinquenquetsatacayeri Tasorentsi, pincanteri paitarica picoiri. Paitapeerica pincoajeiteriri, ari pincamanteri. Aisati pimpasonquitapinijeiteri. ⁷ Impoiji inquimoshiretacaasanojeitempi Tasorentsi catsini. Yanaacotasanojeitaquee arori, te amateroji anquimoshiretacaasanojeiteri itsipapee, te ayoteroji. Ariorica pinquemisanteri Jesoquirishito, incanteani Tasorentsi inquimoshiretacaajeitempi, iriveshireacaajeitempi. ⁸ Apanivaniji, noyemisantaririnte, noncamantempi oca. Pincoasanojeite eiro pamatavitanti, irointi tampatica pineanajeite, pincameetsate, pineshinoncatante, pintacotantea, pincavintsante, pinintavacaajeitea. Queario, pincanteani pinquenqueshiretasanotero maaroni cameetsayetsiri, irootaque pinquenqueshirejeiteri maaroni inea-cameetsajeitiri Tasorentsi. ⁹ Pantapinijeitero maaroni noamejeitaquempi, maaroni nocamantajeitaquempi, maaroni piquemajeitavaquenari. Paitapeerica pineaqueri nantaqueri narori, ari pantajeitero avirori. Impoiji quiso iroajeitempi Tasorentsi: yora veshireacaajeitimpipi.

Yorajiriposhisati oshequi ineshinoncajeitaqueri Pavoro.

¹⁰ Peerani piquenqueshirejeivetaquena, impoiji pipeacovetajana; iro cantaincha meeca piquenqueshirejeitajana aisi, picavintsaaajeitaquena, irootaque noquimoshiretasanotantacari. Tempa icameetsataque Avincatsarite. Te pimpeacotasanojenai,

iro cantaincha te pimaveitearoni pincavintsaajeitena. ¹¹ Te noncamantempiji ainiro coiteimotaquenari paitapeerica: teve. Te oshequiteji timimojeitanari, iro cantaincha niotaque meeca noquimoshiretashita. ¹² Nametacaro te nashitaaranteaji, aisati nametacaro ariorica nashiyetearo paitapeerica. Niyetaquero maaroni: niotaque noquemacaro noanaro, aisati niotaquero notasheaque. Niotaque nashitaarantaca, aisati niotaque nashinoncaaca. ¹³ Tempa quiso yoana Quirishito, imatacaaquena, irootaque nomatantarori paitapeerica icoacaaquenari Tasorentsi. ¹⁴ Iro cantaincha pineshiloncajeitaquena. Piojeitaque nashinoncaavetaca, irootaque picavintsaajeitantaquenari.

¹⁵ Aisati piojeiti jaoca ocantani peerani, iroquerani noquenquetsatacantaquempini ara pinampiqui, níntacojeitaquempi. Nojatantajari aisati, noponeanaja Maseroniaqui, nojayetaque pashinipeequi nampitsi. Avirojei pintacojeitavaquena, pipashijeitavaquenaro coiteimojeitaquenari. Te inquempejitempiji yora quemisantajeitatsiri anta pashinipeequi nampitsi. ¹⁶ Aisati, nosavicantacari anta Tesaronicaqui, pitiancajeitaquenaro coiteimotaquenari. Impoiji pashini pipacantajana aisati. ¹⁷ Te noncoacaavetempiji pimpapinitena paitapeerica, irointi nocoasanotaque pimayetero cameetsatatsiri, cameetsa impinatasanojeitantempiri Tasorentsi. ¹⁸ Ipapaquenaro Epajororito maaroni pipacantaquenari. Ocameétsatasanoti oca pantaqueri, oquempetaca irio pipaqueri Tasorentsi maaroni. Ineacameetsataquero, iveshireimentaqueMPI. Meeca otimimotasanotaquena paitapeerica, tecatsi pashini coiteimotenane; moncarataca. ¹⁹ Piquemisantasanotaqueri Jeso quirishito, irootaque irintacojeitantempiri Tasorentsi, impajeittempi maaroni coiteimojeitaquempi. Ashitaarantincari ini iriori, te irimashitsejí. Tempa ipincatsaritasanoti, icameetsatasanoti.

Ivecarataquero Pavoro isanquenare.

²⁰ Tsame ampincatsatasanojeiteri Apa Tasorentsi, ancantaitatiyempani. Aitaque ancantasanojeiteari. ²¹ Novetsajeitimpí, aisati novetsajeitari maaroni iriori quemisantiriri Jeso quirishito. Ivetsajeitaquempi aisati maaroni ayemisantaririnte aca. ²² Aisati ivetsajeitaquempi maaroni quemisantatsiri: yora iratiritipee Sesari, maaroni. ²³ Nocoaque irineshiloncatasanojeittempi Avincatsarite Jeso quirishito. Piveshireimentajeiteari, maaroni.

Narotaque sanquenataquempirori oca: *Pavoro*

YORA PAVORO ISANQUENATINIRI COROSASHISATI

Ivetsajeitari Pavoro corosashisati.

¹⁻² ¿Savicajeitatsimpi, corosashisati? ¿Tecatsimpa oyempine? Narotaque Pavoro sanquenatimpiori oca. Narotaque itiancane Quirishito, irootaque noquenquetsatantari: irootaque inintacaquenari Tasorentsi. Nocarataqueri aca ayemisantaririnte Timoteo. Nosanquenajeitimpido maaroni quemisantasanojiriri Tasorentsi ara pinampiqui: avirojeitaque noyemisantaririnte quemisantasanojeitiriri Quirishito. Nocoaque irineshinoncajeitempi Apa Tasorentsi, aisati nocoaque cameetsa irisavicasaajeitempi.

Ipasonquitacoventiri Pavoro corosashisati.

³ Nocantani nocantapinitiri Tasorentsi iramitacojeitempi, aisati nopasonquitapinitiri Tasorentsi: yora iriri Avincatsarite Jesoquirishito. Avirojeitaque nopasonquitacoventiri. ⁴ Oshequi noquemacotaquempi, piquemisantasanojiriri Avincatsarite, aisati oshequi pinintasanojeitiriri ayemisantaririnte. ⁵ Peerani piquemaqueroni ariorica pinquemisante, pavisacotaje. Queario oca piquemaqueri. Aisati piojetavaqueroni cameetsa irisavicasayempi Tasorentsi anta inquitequi. ⁶ Oca piquemaqueri ojatacoyetanaque maaroni nampitsipeequi. Piquemantacarori avirori, piojetavaquero queario ineshinoncajeitaquee Tasorentsi. Ari piquemisantaquero, irootaque pipashiniantajari. Aisati iquempejeitaquempi pashinipee atiri, ipashinijeitaji iriori. ⁷ Tempa irio Epajarashi quenquetsatacainpiniri peerani. Iquempetaquena, icantani yantaveetiniri Quirishito. Cameetsa yantaveetiniri, irootaque notiancantacariri peerani iquenquetsatacainpi. ⁸ Icamantaquena piquemisantaquero Ishire Tasorentsi, irootaque pinintasanojeitacariri itsipapee atiri, ⁹ irosati nocantantacariri Tasorentsi: “Pamitacojeiteri noyemisantaririnte anta Corosashiqui”.

Icantiri Pavoro Tasorentsi: “Pamitacojeiteri quemisantajeitimpido anta Corosashiqui”.

Ari nocantani nocantapinitiri Tasorentsi: “Piotacayeri corosashisati maaroni picoaaqueriri”. Aisati nocantiri: “Nocoaque pintianqueneri Pishire oametasanojeiteri, iotacaasanojeiteri”. ¹⁰ Aisati nocantiri iramitacotempi cameetsa pisavique, piveshireacaasanojeitanteeariri, pimayetanteearori cameetsayetatsiri. Tempa irio Avincatsarite, irootaque ocameetsatantari amajeiteneri oca. Aisati nocantiri iramitacotempi piotanteeariri, aiquero pijatatiye. ¹¹ Pashini aisati nocantiri irimatacantempiori: tempa irio Tasorentsisanori, icameetsatasanoti. Irimatacayempiro pimatapinitanteearori cameetsayetatsiri: eiro pishemarotsi, irointi pinquimoshireventero. ¹² Aisati nocantiri Apa iramitacotempi pimpasonquitanteeariri. Tempa yoameetsajeitaquee, ivetsicashireajetaquee ajajeitantajeari anta icashiacaajeitaqueenta. Ancarajeitapaajeri maaroni ayemisantaririnte anta oquitaitetasanotinta catsini.

Iquenquetsatacotaqueri Jesoquirishito.

¹³ Peerani oquempevetaca atimaveitani anta otsitenitasanotinta: apincatsaveitarini camaari. Iro cantaincha yoavisacojeitajee Tasorentsi, irootaque apincatsatantajariri Itomi: yora inintasanotiri. ¹⁴ Icamimentajeitaquee arori, avavisacojeitanteeariri. Icavintsaasanojeitaquee, meeca eiro iquenqueshireacotajeerotsi caari cameetsatatsi antajeitiniri.

¹⁵ Te inconijateji Tasorentsi, iro cantaincha iconijataque itomi, iquempetasanojatari. Peerani, irio jivatatsiri itimi irinti, tequerata ontimayete oca aneayetaqueri.

¹⁶ Tempa iriotaque vetsicajetiriri maaroni: inquitesati, quipatsisati, conijayetatsiri, caari conijayetatsi, maaroni. Ari yovetsicajetiriri caari conijayetatsi: yora pincatsarajeitatsiri, jivatacaajeitantsiri, savicasaajeitantsiri, maaroni. Iriotaque Quirishito

vetsicajeitiriri maaroni. Te irovetsicashiteariji, irointi yovetscantari impincatsajeiteri iriori. ¹⁷ Iriotaque Quirishito intasanotacarori itimi, catsini. Icantaqueri maaroni yovetsicane: "Aitaque pincantajeiteari". ¹⁸ Iro aito iotacairori avatsa maaroni. Eirome otimime, eiro aneime. Aisati iquempetaca Quirishito: ipincatsariventajeitaquee arori, aisati maaroni itsipapee quemisantiriri; eirome itimime, eiro ayojeitirime Tasorents, eiro aquemisantajeitime, eiro avavisacojeitajame. Irio jivatiriri maaroni tinaajeitajanchaneri, yanaacojeitaqueri ipincatsaritasanoti. Queario ipincatsaritasanoti catsini, ¹⁹ itasorentsitasanotaque catsini: irootaque icoacaaqueriri iriri. ²⁰ Peerani aquisajeiveitarini Tasorents, iro cantaincha icamimentajeitaquee Quirishito corosiqui, yaparajimentaqueero iriraja. Yoameetsajeitaquee, meeca aneacameetsajeitajiri Tasorents, aisati ineacameetsajeitaquee arori. Aisati inquitesati, ineacameetsajeitiriri Tasorents; aisati iriori, ineacameetsatiri. Ari imataquero Quirishito, cameetsa asavicajeitancari maaroni.

Iquenquetsatacotiri corosashisati.

²¹ Ari, peerani te pinquenqueshiretapinterini Tasorents, piquisajeiveitarini. Piquenqueshireitaroni caari cameetsatatsi, aisati pantapiniveitaroni, caari piquenqueshiretantarini Tasorents. ²² Iro cantaincha yatiritapaaque Jeso quirishito, impoiji icamimentaqueempi, yoameetsataquempi, irootaque pineacameetsatantariri Tasorents, aisati ineacameetsatantimpri iriori. Ineaquempi picameetsatasanotaque, iquempetacaantaqueempi te aneajeroji meeca pantane. Meeca eiro icantajimpitsi: "Ainiro pantane". ²³ Iro cantaincha icoaque ancantaitatiyempani anquemisanteri. Aiquero ajatatiye, anquemisantsasanotanaque. Pamene, ovaraanaca irineane Tasorents maaroni nampitsipeequi. Ocamantajeitee jaoca ancanteari avavisacotantajeari. Tempa naro ovaraaquerori, nocarajeitaqueri itsipapee ovarayetaquerori; aisati icamantaquempiro Epajarashi. Pishiretacaro, piotantacari paviscotaji. Meeca eiro piperaventarotsi.

Yoametiri Pavoro caari iojeiveitani.

²⁴ Oshequi iquematsicatacaro Quirishito yoavisacojeitancariri maaroni quemisantajeitiriri, meeca ishiacantaquee arori ivatsasanori iriori. Aisati narori, noquempetacari: ainiro noquematsicamentaqueempi, noquemisantacantantaquempi, irootaque noquimoshiretancarri. Moncarataca meeca. ²⁵ Icantaquena Tasorents: "Pamitacojeiteri maaroni piyemisantaririnte, aisati poametasanojeiteri noneane". ²⁶ Ari meeca noamejeittempiro caari iojeiveitani inampiree Tasorents, aisati caari iojeiveitani atiripee. Meeca iotacaajeiteero Tasorents, aisati iriori maaroni itsipapee quemisantajeitiriri. ²⁷ Icoaque meeca piojeitero oca imajeitaquempi: ocameetsatasanoti catsini. Te avirojei jorio, iro cantaincha quiso yoasanojeitaquempi Quirishito, irootaque piojeitancarri cameetsa pisaviquimojeiteri Tasorents, coajica. ²⁸ Iriotaque Quirishito noquenquetsatacotiri. Nocantajeitiri atiri: "Pantirocari caari cameetsatatsi". Aisati noametasanojeitiri iriotasanotanteariri Quirishito, irishiretsasanotanteariri. Impoiji iriotacojeiteri atiripee, icameetsatasanoti. ²⁹ Irootaque nopomerentsitementantaqueempi, caari noperaven-tantimpi. Irio Quirishito shintsitacaquenari, itasoncaventaquena nomatantacarori.

2

¹ Nocoaque piojeite nocantani nopomerentsitacoventimpi noquenquetsatacariri Tasorents: nocantapinitiri iramitacotempi, aisati noquempetacoventiri yora ayemisantaririnte anta Araoriseaqui. Aisati iriori nopomerentsitacoventajeitiri maaroni caari neana. Nocantapinitiri Tasorents iramitacotempi ² piveshireajeitancarri, pinintava-caajeitancarri. Aisati nocoaque ontimimotasanojempri piofanteari, nocoaque pio-tasanoteri yora imanaqueniri Tasorents. Meeca iotacaajeitimpri: piojeitiri, iriotaque Quirishito. ³ Iotasanojempri catsini, otimasanojempri catsini iotantari. Te amateroji anquenqueshiretero maaroni iotiri irinti.

Icantiri Pavoro: "Yamataviyeetimpicari".

⁴ Queariompia, yamataviyeetimpicari: irootaque noamejeitantimpiori maaroni oca. ⁵ Queario, te nontsipajeitimpiji, iro cantaincha oshequi noquenqueshiretaquempi. Noveshirementaqueempi: cameetsa pisavicafeiti, aisati piquemisantsanojeitaque.

⁶ Tempa peerani pishiretacari Avincatsarite Jeso quirishito, irootaque yoavisacotantaquempi. Irosati pincanteani: pishireteari maaroni quitaiteriqui, paitapeerica panteri.

⁷ Noshiacantempiro: ora panqurentsi, irootaque ovaritsa shiocacairori, aisati irootaque shintsitacairori. Aisati pinquempeteari avirori, quiso poyer Quirishito iriotacantempi, aisati irishintsitacantempiro. Pincantaitatiyempani pinquemisantsanoteri, tempa irootaque yoameyeetimpri. Aitaque pincantajeiteari, pimpasonquijeiteri Quirishito, tempa icavintsaasanojeitaquee.

⁸ Queariompa: eiro piquemisantiritsi yora coavetachari iramatavijeitempi. Iroamejeitempime atiripee maaroni iquenqueshireyetiri, aisati maaroni ioyevetari: oca yoameyevetariri ishanincani iriori, intasanotacarori itimi, iro cantaincha te ontampatificateji. Yamatavitimpicari. Te incoacayempiji iriori pinquemisantero yoametimpri Quirishito.

⁹ Peerani iquempetaquee Quirishito avatsa arori, iro cantaincha itasorentsitasantaque catsini, yashi yoiro. ¹⁰ Ariorica quiso poyer, intasoncaventapinijeitempi, incantaitatiyempani, eiro pashinoncantajatsi catsini. Ipincatsaritasanotaque catsini, yanaacotasanojeitiri maaroni itsipapee pincatsarivetachari. ¹¹ Yora joriopee, itoyean-tajeita: yojocaquero imeshina. Meeca oquempetaca pitoyeantaca avirori, iro cantaincha yojocacaaquempiro Quirishito caari cameetsatatsi pantiniri. Meeca eiro acoirotsi antapinitero caari cameetsatatsi: tempa ipashinitacaajeitaquee. ¹² Ariorica pivaotisajeitaca, oquempetaca pitsipatacar Jesoshi: picamajeitaque, aisati pitijajeitaca. Tecatsi pincantero pincoayetero pantero caari cameetsatatsi: tempa oquempetaca picamaque. Itinaanaja aisati Quirishito, meeca oquempetaca pitinaajeitanaja aisati: meeca pinashijetaja. Iro pinashijetantajari, pishiretacari yora Tasorentsisanori: yora oitinaajiriri Quirishito. ¹³ Peerani oquempetimojeitaqueMPI picamaque, te pinquenqueshireterini Tasorentsi, irointi pantapiniveitaroni caari cameetsatatsi. Te pioveitarini Tasorentsi. Meeca quea icavintsaajeitaqueMPI: te inquenqueshiretajeroji aisati caari cameetsatatsi pantajeiveitaniri. Meeca piquempetacari Quirishito: piojeitiri Tasorentsi, aisati coajica pisaviquimojeiteri anta inquitequi. ¹⁴ Pamene: peerani oshequi apomerentsiventavetaro isanquenaren Moishishi avavisacotantajeameri, iro cantaincha te amoncarajeitero. Ayojeitanaque otimini antane, irootaque ajatanteameri ishaaviji. Iro cantaincha icamimentajeitaquee Quirishito coroshipi, yoavisacojeitaquee. Meeca eiro apomerentsiventirotsi sanquenarentsi avavisacojeitajeari. ¹⁵ Peerani, icamantacari Quirishito coroshipi, iotacaajeitaquee tecatsi incantajeitee camaari iroashinoncaajeitee. Itsaneacoventaquee, eiro ishinetiritsi camaari irantanatee.

Eiro piquenqueshiretirotsi yoameyevetimpri atiripee.

¹⁶ Te oncameetsateji inquishimentempiro pishaninca poapinitari aisati piraapinitiri. Ainiro quitaiteripee inashitacaari joriopee, aisati imaoreajeitancari. Irosati yantironi: maaroni osarintsi, maaroni cashiri, aisati maaroni saavar. Terica pimoncarateari avirori, eiro pishinetiritsi inquishimentempiro. ¹⁷ Peerani icantani yametapinijeitaro joriopee, iquenqueshireantariri Tasorentsi, iro cantaincha meeca yareetaca Quirishito. Irriosanori irinti, ampincatsajeiteri. Moncarataca, ari ocarati: eiro meeca apiitapinitojirotsi yamejeitaro joriopee. ¹⁸ Queariompa, eiro pishinetiritsi iramatavitempi. Icoacaimpicari pinquempeteari iriori, icantimpicari: “Pimpincatsateri inampire Tasorentsi pavisacotantajeari. Noneaquiero caari ineapiniyeeti: ¿pinequerompa avirori?” Ishemeitive. Eiro piquenqueshiretirotsi incantavetempri, itseeyani. ¹⁹ Te inquenqueshireteriji yora Jivajeitaqueeri, te irioteriji. Aroquea ainti, ariorica anquenqueshireteri Quirishito, iriotacaajeitee, iramitacojeitee quiso avavacaajeitea, amatasanotanteorori icoacaaqueeri Tasorentsi.

²⁰ Icamaque Quirishito, aisati oquempetaca pitsipatacar picamaque avirori. Meeca eiro piquenqueshiretajirotsi yoameyevetimpri atiripee: eiro oavisacotimpitsi. ¿Paita patsipetashitantarori pantashiyevetacaro icantimpipri iriori? ²¹ Icantanirovetimpipri: “Arriorica picoaque poavisacotea, eiro pipamitiritsi yora, eiro poaritsi yora, eiro pantiritsi”. ²² Tempa icantashitacaro atiri oca, yoametashitimpipri. Pamene, tempa ashi airo

avapinijeitaro avari: ariorica ayearo, poyere; tecatsi oncantero ashire. ²³ Ariorica antiteari, ajiticari ayoti, ajiticari aquemisantasanoti, ajiticari te ashemete, ajiticari ashinoncaimentacari Tasorentsi. Iro cantaincha atsipetashitacaro atita. Ariorica antitaquea, acantani acoaquero caari cameetsatatsi, aisati ashemetaque.

3

Icantiri Pavoro: "Cameetsa pisavicajeite".

¹ Peerani te piojeiveitearini Tasorentsi, pijajeiteme Sharincaveniqui; iro cantaincha icamimentajeitaquempi Quirishito, yoavisacojeitaquempi. Impoiji itinaanaja; irootaque meeca piojeitariri Tasorentsi, eiro pijajeititsi Sharincaveniqui, ainti pijajeite inquitequi: anta isaviquinta Quirishito iracosanoriqui Tasorentsi, icaratiri ipincatsaritasanotaque. Meeca pincoasanotanaque pisavicajeite anta, pintsipajetanteariri.

² Pinquenqueshirejeitea jaoca pincanteari anta inquitequi, eiro piquenqueshiretap-iniyetajirotsi jaoca pincantajeiteari aca quipatsiquica. ³ Oquempetaca picamaque, eiro meeca piquenqueshireyetajirotsi timayetatsiri quipatsiquica, eiro piquempetajatsi peerani. Iro cantaincha yoaneajeitaquempi Tasorentsi, pintimajeitapaaaje inquitequi. Iquempoyeaquempi, inquempetacantajempi Quirishito. ⁴ Coajica impiaje quipatsiquica Quirishito, yora oaneajeitaqueeri. Cameetsa impincatsaritapaaque, ancarajeitapaajeri ampincatsaritapaaje arori.

Icanti Pavoro: "Eiro papiitajirotsi caari cameetsatatsi pantaveitaniri peerani".

⁵ Eiro catsini papiitajirotsi caari cameetsatatsi pantaveitaniri peerani. Shirampari, eiro pantirotsi caari pai. Tsinane, eiro pantirtsis caari pai. Eiro pimayempitapinititsi. Eiro pinevetarotsi tsinane. Eiro pinevetaritsi shirampari. Eiro pinevetasanotarotsi vaararontsi: piquempetacantarocari irio pitasorentsitsi pinintantarori. ⁶ Oshequi imayetiro atiripee, irootaque inquisanteariri coajica Tasorentsi. ⁷ Peerani pantap-iniveitaroni, pashi poironi. ⁸ Pojocajeitajero meeca: eiro piquisavacaajeitajatsi, eiro pitsimajencatavacaajatsi, eiro picatsimatavacaajatsi, eiro picantimatavacaajeitajatsi, eiro pineaveetantajarotsi caari cameetsatatsi, ⁹ eiro pamatavitavacaajeitajatsi. Tempa pinashijetaja meeca, eiro papiitajirotsi pantaveitaniri. ¹⁰ Meeca pimpashinitasanotanaquea, pincameetsatasanojeitanaque, pinquempejeiteari yora Vetsicanaquempi peerani. ¹¹ Te inquenqueshireteroji Tasorentsi jaocarica acantajeitari: ariorica arioroti, terica; ariorica atoyeanta, terica. Te inquenqueshireteroji jaocarica aponeacari, paitapeerica ayoyetiri, arorica pimantaari, terica impimanteeteeji. Irointi iquenqueshiretacotee aquemisantiririca Quirishito.

Jaoca icantajeitari quemisantatsiri.

¹² Pamene, tempa icoyeajeitaquempi Tasorentsi. Icoaque pincameetsatasanotanaque, aisati inintajeitaquempi. Icoacaajeitaquempi pashi poyerio pincavintsante, pineshinoncatante. Eiro pishemetitsi, eiro pishema, eiro piquisa. ¹³ Pintacotavacaaya: eiro pipiataritsi quisavetempineri, irointi pincavintsayeri. Tempa icavintsaimpi Avincatsarite, meeca pishiacoteri, pincavintsajeiteri itsipapee. ¹⁴ Jero oca pimatasanoteri: ariquero pinintavacaasanojeitea catsini, maaroni. Pineaquero, ariorica anintavacaajeitea, ari ancameetsatasanojeitanaque maaroni. ¹⁵ Nocoaque piveshireimentajeiteari yora Quirishito. Irootaque icoyeajeitantaquempi, icoaque piveshireajeitanajea, maaroni. Icoaque anquempetavacaajeitea, maaroni quemisantatsiri. Aisati icoaque ampasonquijeiteri Tasorentsi. ¹⁶ Pinquenqueshiretasanotero irineane Quirishito. Pincanteri iriotacaajeitempi cameetsa poametavacaajeitajeari. Icavintsajeitaquempi Tasorentsi, meeca pimpasonquijeiteri. Poametavacaajeitea pimpampoyeaventajeiteri. ¹⁷ Te ancoajeiteji impashiventacaajeitee Avincatsarite Jesoshi, irootaque nocoacantaquempi poameetsayetero maaroni pantayeteri. Ocameetsati anquenqueshiretapiniteri, ampanquijeitanteeariri Tasorentsi.

Icantiri jaoca ancanteriri ashanincabee.

¹⁸ Tsinane, pimpincatsateri pijime, irootaque icoacaajeitaquempi Avincatsarite. ¹⁹ Shirampari, pinintasanoteri pijina, eiroquea piquishirotshi. ²⁰ Jananequi,

pinquemisantapiniteri ashijeitimpiri, paitapeerica incantempiri. Irootaque iveshireimentari Avincatsarite. ²¹ Itimirica pitomipee, eiro piquisatsatiritsi: pishemashireacaaricari. ²² Pimantaari, pinquemisantsanoteri yora amantanimpiri, paitapeerica incantempiri. Eiroquea pamatavitiritsi: eirorica yamenimpitsi, iro cantaincha eiro piperatarotsi pintsameeteneri. Ariorica pipincatsatiri Avincatsarite, ari pishintsiventeneri pivotorate. ²³ Paitapeerica panteneriri, pishintsiventeneri. Pinquempetacanteri pishintsiventiniri Avincatsarite, te irio atiri. ²⁴ Piotasanotaque pantapinitaqueneri Avincatsarite Quirishito, iriotaque pinatempineri coajica, iroaneasanotajempi anta inquitequi. ²⁵ Irintiquea yora antapinitirori caari cameetsatatsi: iroashinoncayeri irinti. Paitapeerica antajeitaqueri, timatsi incanteeri arori, tecatsi ancantea amataviteri.

4

Icantiri Pavoro: “Pinquenquetsatacapiniteri Tasorentsi”.

¹ Itimirica atiri pamanantiri, cameetsa pineshiloncateri, pincavintsayeri. Tempa pioti itimi anta inquitequi pivincatsarite avirori: iotaque maaroni pantajeitaqueri. ² Pincantaitatiyempani pinquenquetsatacapiniteri Tasorentsi, pimatasanotero catsini. Queario, ariorica pinquenquetsatacayeri, pimpasonquitapiniteri aisati. ³ Tempa nocamantapinitiri atiripee jaoca incanteari iravisacotantajeari, irootaque yoiminqueanteetaquenari meeca caravosoquica. Aisati pincanteri Tasorentsi iramitacotena noncamantajeiteri atiripee jaoca icantajeitaqueeri Quirishito yoavisacotantajeari. ⁴ Nocoaque cameetsa nontsoteeneri, inquemasanotantearori. ⁵ Aisati avirori, ariorica pincarajeiteri caari quemisantayetatsi, cameetsa pisavique, aisati cameetsa poamejeiteri, eiro piperaventarotsi. ⁶ Ariorica pinquenquetsatacayeri, pincavintsayeri. Eiro pashereiritsi: vero, vero, vero. Ariorica irisampitempi pitarica, piole cameetsa panqueri incoanteari iriori inquemisante.

Iquenquetsatacotiri Tiquico.

⁷⁻⁸ Meeca nontianquempi Tiquico, ayemisantaririnte nonintasanotiri. Iquempejeitaquena, iquearioventiniri Avincatsarite paitapeerica yantiniriri. Incamantapaaquempi jaoca nocantacari nosavicaque. Irootaque nontiancanteariri, piotanteari jaoca nocantajeitari aca. Aisati nocoaque iriveshireacayempi. ⁹ Intsipatanaqueari Tiquico pishaninca Oneshimo. Irisati iriori ayemisantaririnte, iquearioventiniri Avincatsarite paitapeerica yantiniriri. Nonintasanotiri. Ari incarate apite camantapeempineri maaroni nantajeitiri aca.

Ivetsajeitari corosashisati.

¹⁰ Ainiro aca yoiminqueetaqueri aisati yora Arishitaraco, ivetsajeitaquempi. Aisati ivetsajeitaquempi Maricoshi, yora iraniri Verenave. Tempa nocamantapaaquempi chapinqui: ariorica irareetempi Maricoshi, pineshiloncatavaqueri. ¹¹ Jeri aisati Jesoshi, yora pajitachari aisati Joshito, ivetsataquempi. Jorio inajeiti, iro cantaincha icarajeitaquena noquenquetsatacojeitiri Tasorentsi, jaoca icanta ipincatsariventaquee. Aisati oshequi iveshireacaquena. ¹² Ainiro aisati pishaninca Epajarashi, ivetsajeitaquempi. Irisati iriori antaveetiniriri Jesoquirishito. Icantani icantapinitiri Tasorentsi iramitacotempi pincameetsatanteari, aisati pimatantearori maaroni icoacaajeitaquempi Tasorentsi. ¹³ Noncamantempi: queario, ipomerentsiventasanojeitaquempi. Aisati ipomerentsiven-tiri yora araoriseasati, jeri aisati iyeraporishisati. ¹⁴ Aisati ivetsajeitaquempi Irocashi: yora aavintantatsiri nonintasanotiri. Aisati ivetsajeitaquempi yora Temashi.

¹⁵ Novetsajeitari maaroni ayemisantaririnte anta Araoriseaqui, aisati novetsataro Ninaja, aisati novetsajeitari maaroni quemisantapinjeitatsiri anta ovancoqui.

¹⁶ Pineanajeiteneri nosanquenare maaroni quemisantatsiri aviroriqui. Impoiji pincanteri yora araoriseasati irineanateneri maaroni iyemisantaririnte iriori. Aisati pineana-jeitero ora nosanquenajeitininiri iriori. ¹⁷ Jero oca pincanteriri Ariquipo: “Pimamatero maaroni icoacaquempi Avincatsarite”.

¹⁸ Ainirona nosaviqui aca caravosoqui, eiro pipeacotanatsi. Nocoaque irineshilonca-jeitempi Tasorentsi.

Col. 4:18

323

Col. 4:18

Ari ocarati. Narotaque sanquenajeitimpiori: *Pavoro*

IJIVATAQUE PAVORO ISANQUENAJEITINIRI YORA TESARONICASATI

Ivetsajeitari Pavoro tesaronicasati.

¹ ¿Savicajeitatsimpima ara, tesaronicasati? ¿Tecatsimpa oajeitempime? Narotaque aca Pavoro, nocarajeitiri Shirivano aisati Timoteo. Nosanquenajeitaquempiro maaroni noyemisantaririnte ara. Tempa avirojeitaque shanincajeitacariri Apa Atasorentsite aisati Avincatsarite Jeso quirishito. ² Nocoaque irineshino najeitacariri aisati cameetsa irisavicaaajeitempi.

Oshequi iquemisanti tesaronicasati.

Nocantatiani nopasonquitiri Tasorents: nopasonquitimentajeitacariri aisati nocantiri iramitacotempi. ³ Ariorica noquenquetsatacairy, noquenqueshiretapi najeitacariri: “Pintasoncaventeri tesaronicasati”. Oshequi pishirejeitacari aisati pinintajeitaqueri, irootaque pantaveetantacanariri maaroni icoacaajeitaquempiro. Aisati noquenqueshiretaquempi, piquearioventiro pishirejeitacari Avincatsarite Jeso quirishito, piojeitaque eiro yamatavitimpitsi. ⁴ Noyemisantaririnte, icantani inintaquempi Tasorents. Niojeitaque icoyeajeitaquempi, irootaque itomintajeitaquempiro. ⁵ Piojeitaque peerani nocamantajeitaquempi jaoca pincanteari pavisa cojeitanta jeari; te noncantashiteaji. Oamejeitaquempi Ishire Tasorents, otasoncacoventajeitaquempi, piojeitanta carori queariosanotaque nocantaquempiro. Aisati ocameetsajeitaque maaroni nantajeitaqueri, irootaque piotantacari queariotasanotaque nocantaqueri.

⁶ Paitarica pineacotaquena nantaqueri, ari piquempejeitaquena. Aisati pimataquero paitarica piquemacotaqueri yantayetiri Avincatsarite Jesoshi. Piquemisantaquero maaroni nocamantajeitaquempiro, irosati piquemaatsicatimentantacarori, iro cantaincha piveshirementacaro Ishire Tasorents. ⁷ Ari cameetsa pisavicajeitaque, irootaque icoantajeitacari inquempejeitempi maaroni ayemisantaririnte anta Maseroniaqui aisati Acayaqui. ⁸ Aitaque povaajeitanaquero Irineane Avincatsarite. Te apaniro inquemacotempi yora maseroniasati aisati acayasati, irointi iquemacojeitaquempi maaroni itsipapee atiri piquemisantanotaque. Te noncamantajeiteriji narori, ⁹ irointi iquenquetsatacashi jeitaquempi maaroni. Iajeitaque peerani nojatashitantaquempiro, pojocajeitajiro maaroni povetsicashiyevetari pijitasorentsivetari. Paventajeitacari Tasorentsisanori, yora aneasanotatsiri; meeca pantaveetaqueneri icoacaajeitaquempiro iriori. ¹⁰ Icamaque peerani Jesoshi, yora Itomi Tasorents, impoiji yoitinaajiri aisati. Coajica, inquisajeitaqueri maaroni caari cameetsatatsi, iro cantaincha eiro atsaroacaa-jeitaritsi ainti: tempa yoavisacojeitaquee. Meeca paamaajeiteari Itomi: piojeitaque impocaje, imponeaquea inquitequi.

2

Yantayetiri Pavoro Tesaronicaqui.

¹⁻² Peerani, tequerani nojateni pinampiqui, oshequi noneacatsitacarori anta Jiriposhiqui, aisati ishirontimenteetaquena. Aisati oshequi opomerentsitimotaquena ara pinampiqui, iro cantaincha te nontsaroapeji. Aitaque, yamitacotaquena Tasorents, nomatantacarori nocamantajeitaquempiro Irineane. Te nantsipetashitearoji noquivantajeitaquempi. Tempa, noyemisantaririnte, piojeitaquero maaroni oca.

³ Noquemisantacantaquempiniri, te noncoyeni namatavijeitempi. Tampatica noametaquempini: te nontseeyaji. ⁴ Iotitaca Tasorents cameetsa novaayempiro irineane, irootaque itiancantanari nocamantimpilo. Te nonintasanoveteaji irineacameetsajeitena atiri, irointi nocoasanotaque irineacameetsatena Tasorents. Iriotaque iotasanolirori maaroni aquenqueshirejeitiri. ⁵ Te nonintejieitacariri noveshireacaashijeitempi, te noncantashijeitempi: “Picameetsatasanojeitaque”. Namatavitimpicari. Ioti Tasorents te irio nonintimentempi piirequite. ⁶⁻⁷ Tempa narojeitaque itiancane Quirishito noquenquetsati, irootaque ocameetsatantavetari

noncantempime: “Pimpincatsajeitena”. Iro cantaincha te noncoyeji pimpincatsajeitena, aisati te noncoyeji impincatsajeitena itsipapee atiri. Ariorica atsotairi tsinane otomipee, ari ocavintsairi. Aisati noquempetacantapaaqueempini peerani: nocavintsaajeitapaaquempi, te noshintsitacaajeitapeempi.⁸ Oshequi noneacameetsajeitapaaquempi, oshequi nonintajeitapaaquempi, irootaque nocamantantapaaquempiroi irineane Tasorentsi. Meeca, paitapeerica nantayetaqueri, nocantatiani noquenqueshiretapinijeitaquempi.

⁹ Piojeiti, noyemisantaririnte, oshequi nopomerentsitacaro nantaveeti quitaiteriqui aisati tsiteniriqui. Te nonintajeiteji pimpomerentsiventenaro avirori pimpashiyetenai paitapeerica. Nocamantajeitaquempiro Irineane Tasorentsi. ¹⁰ Pineajeitaquena noquemisantanotaque, cameetsa nosavicajeitaque, te ontameji nantane. Aisati ineajeitaquena Tasorentsi, cameetsa nosaviquimojeitaquempi, noyemisantaririnte. ¹¹ Jero oca noshiacantempiri: tempa cameetsa yoametiri shirampari itomipee. Piojeitaque noquempetacantajeitaquempi notomipee, nocantajeitaquempi pinquemisante, noveshireacaajeitaquempi, aisati noamejeitaquempi ¹² cameetsa pisavicajeite iriveshireimentantempiri Tasorentsi. Tempa icoyeajeitaquempi pisavicajeitajeari anta ipincatsaritinta, anta ishipaquireacojeitirinta maaroni.

¹³ Peerani, noquenquetsatacantapaaqueempiniri, pishiretasanotavacaro Irineane Tasorentsi. Te pijitavaqueroji iro nashi noneane, irointiquea piotaquero iroosanotaque irineane Tasorentsi, tempa queario oni. Piquemisantaque, irootaque opashinitacantajimpiri, oameetsatantajimpiri. Irootaque nocantantacariri Tasorentsi: “Ariove, iquemisantaquero tesaronicasati pineane”. Aitaque nocantani nocantapinitiri. ¹⁴ Ari, noyemisantaririnte, piquempejeitacari yora quemisantajeitiriri Jesoquirishito anta Joreaqui. Iquisajeitaqueri jorio ayemisantaririnte anta, aisati iquempejeitaquempi pishaninca ara pinampiqui, iquisajeitaquempi iriori. ¹⁵ Yoacantajeitaqueri jorio Jesoquirishito, aisati peerani yoajeitaquerini camantantatsiniri. Aisati iquempejeitaquena narori: iquisajeitaquena, te incoacaajenaji noshanincatajeari. Te onimoteriji Tasorentsi yantanirojeitaqueri: tempa iquisanirojeitaqueri maaroni itsipapee atiri. ¹⁶ Oshequi itsaneacotapinivetaquena nonquenquetsatacaaajeitempi avirorije, maaroni caari joriotatsi. Te incoacaajeivetempiji pavisacojeitaje. Aiquero ijatatii yantaquero caari cameetsatatsi, iro cantaincha meeca iquisaqueri Tasorentsi, queario iroasanquetaajeiteri.

Icoaque Pavoro irineajeri aisati tesaronicasati.

¹⁷ Noyemisantaririnte, te ancaratavacaajeivetempaji, meeca oshequi nocoiteajeitaquempi. Te aneavacaajeitajeji, iro cantaincha te nompeacotempiji. Oshequi nocoaque aneavacaajeitaja aisati. ¹⁸ Nocoajeivetaca nonquivantajeitajempime. Aisati narori nocoapinivetaca nojatashitempime apaniro, iro cantaincha yoipiavajana Satanashi. ¹⁹ Coajica impocapaaaje aisati Avincatsarite Jesoquirishito. Iotaque iriori avirojeitaque noquemisantacaajeitaqueri. Ariorica impocaje, nonquimoshiretimentajeitempi, noveshireimentajeitempi, oshequi nonquenquetsatacojeitempi. ²⁰ Queario, noveshireimentasanojeitaquempi meeca, noquimoshiretimentasanojeitaquempi.

3

¹ Oshequi noquenqueshirejeivetetaquempi, iro cantaincha tecatsi noncantea nareejajempi narori. Naamaaca ocameetsati nosavique apaniro aca Atenashiqui, ² iro cantaincha nocoaque notianquempiro inti Timoteo. Tempa iriotaque ayemisantaririnte, tempa iquempejeitaquee antajeitiniri Tasorentsi, aquenquetsatacojeitiri Quirishito, acamantajeitiri atiri yoavisacotantaque. Ari yareetapaaquempi Timoteo, yamitacotapaaquempi piquemisantanotaque, aisati iveshireacaajeitapaaquempi. ³ Pamene, timatsi quisajeitaquempi, iro iquisantaquempi piquemisantaqueri Jesoshi. Iro cantaincha eiro picantashiretanaquetsi, tempa piotitacani intime quishempineri. ⁴ Notsipatantaquempiniri, nocamantitaquempi: “Ariorica pinquemisante, inquisaqueempni tseencantatsiri”. Aitaque piojeitaque meeca moncarataca

nocamantitaquempiniri,⁵ irootaque oshequi noquenqueshireantaquempi. Notiancaqueri Timoteo niotanteari irosatirica piquemisantajeiti. Naamaavetaquempi yan-tacaquempiro camaari caari cameetsatsati. Ariorica pinquemisanterime camaari, natsipetashitacarome noquemisantacaajeitaquempi peerani.

⁶ Ari meeca yareetapaaja aisati Timoteo. Ineaitimpi, meeca ocameetsati oca icaman-tapaajanari: "Irosati icanta tesaronicasati, iquemisantasanojeitaque, aisati inintasano-jeitaqueri itsipapee. Ineacameetsajeitaquempi, icoiteajeitaquempi". Aisati narori, oshe-qui nocoteajeitaquempi avirori.⁷ Oshequi nashinoncaaca narori aca, iquisheetaquena. Iro cantaincha niotaque picantatiani piquemisantajeitaque, irootaque noveshireimen-tantajeitaquempi.⁸ Meeca noquimoshirejeitanaque, niojeitaque piquearioventaquero piquemisantaqueri Avincatsarite.⁹ Oshequi catsini noveshireimentaquempi, irootaque nopasonquitantacariri Apa Tasorentsi aisati Avincatsarite Jesoquirishito. Tempa yame-nacojeitaquee maaroni.¹⁰ Noquenquetsatacapinitiri Tasorentsi: quitaiteriqui aisati tsiteniriqui. Nocantiri: "Nocoaque pintianquena noneajeri aisati tesaronicasati". Aisati nocoaque intianquena namitacojeitempi pinquemisantasanojeitanteari eiroquea pit-seencashiretantaajatsi.¹¹ Nocoaque irareetacayena ara pinampiqui.¹² Nocoaque irami-tacotempi cameetsa pinintasanotavacaajeitea catsini, aisati pinintasanojeiteri catsini itsipapee. Nocoaque pimoncarajeitena, nonintasanojeitaquempi avirori.¹³ Nocoaque iroameetsashiretasanotempi catsini, pinquempetanteariri iriori. Coajica impocaje Avincatsarite Jesoshi, intsipajeitaqueari maaroni quemisantajeitiriniri, yora yoameet-sajeitiniri. Ari, impocajeiterica, nocoaque irineacameetsajeitempi Tasorentsi: tempa irio Apa arori.

4

Icantajeitiri: "Cameetsa pisavicajeite, pinintajeiteri itsipapee, panteneri Tasorentsi ico-aaquempi".

¹ Meeca, noyemisantaririnte, nocoaque pimajeitero oca noncantempi: irootaque icoacaimpiri Avincatsarite Jesoshi. Noamejeitaquempiro jaoca pincantajeiteari piveshireacantajeariri Tasorentsi. Ari pimatapinitaquero peerani: aiquero pijatatiye meeca, pimatasontero.² Piojeitaquero icantaquempiro Avincatsarite Jesoshi, novaajimpiro narori.³ Icoasanotaque Tasorentsi pincameetsatasanojeitanaque. Aisati te incoyeji pineavintsatero tsinane caari pai,⁴ irointiquea icoaque quiso poasantero pijinasanori. Cameetsa paasantero, pincavintsayero.⁵ Eiro piquempetaritsi caari quemisantiri Tasorentsi: inevetashitacaro tsinane, iotashitaca icoashitaca irineavintsatero.⁶ Aisati icoaque eiro pimatirotsi itsaneayetacari. Eiro pineavintsatityetiritsi ijina pishaninca. Ariorica pantacoteri, iroasanquetasanotempi Avincatsarite. Tempa oca nocamantasanotitaquempiro peerani.⁷ Te incoacaajeiteejiri Tasorentsi anquempeteari otsiti aneavintsayetero tsinane, irointi icoacaajeitaquee ancameetsatanaque.

⁸ Yora caari mayeterone oca nocantitaquempi, te irio impiatsatea atiri, irinti ipiatsataca Tasorentsi: yora tiancaquemprori Ishire.⁹ Pinintavacaajeitaca: tempa iriotaque Tasorentsi oamejeitaquemprori. Maname nosanquenatajempime aisati: "Pininta-jeiteri piyemisantaririnte", tempa nantsipetearome. Tempa picantani pinintavaca-jeitaca.¹⁰ Queario, pinintajeitaqueri ayemisantaririnte: maaroni yora maseroniasati. Meeca, noshaninca, noncantempi aisati, aiquero pijatatiye pinintasanojeiteri catsini.¹¹ Pincoajeitanaque pisavicajeite cameetsa. Eiro pashereiritsi itsipapee. Eiro paamaaco-taritsi. Pantaveetapinite, paanteari coiteimojeitimpipi. Tempa nocamantitaquemproni oca.¹² Ariorica pimajeitero, ari irineacameetsajeitempi maaroni caari quemisantatsi, aisati eiro ocoiteimojeitimpitsi paitapeerica.

Intinaajeitanaje camajeitaintsiri, aisati impocaje Quirishito.

¹³ Meeca, noyemisantaririnte, noninti noncamantempiro jaoca incantajeiteari yora ayemisantaririnte, camajeitaintsiri. Nocoaque piotasantero. Eiro piraacotasanziritsi, eiro piquempetaritsi yora caari iotatsine antinaajeitaje.¹⁴ Ayojeitaque icamaque Jesoshi, aisati itinaanaja. Aisati inquempejeitaqueari maaroni quemisantajeitaqueriri,

camajeivetainchari: irointinaajeitajeri Tasorentsi. Ariorica impocapaaje aisati Jesoshi, intsipajeitaqueari. ¹⁵⁻¹⁷ Jero oca noncamantempi, irootaque irineane Avincatsarite. Coajica impocaje, aisati intianqueri Tasorentsi inampirepee, incanteri: "Meeca quea pijajeite pampatojeiteri maaroni quemisantajeitanari". Irosati intiotantaquearo itiore, aisati incajemapaaque yora jivatacaaajeitiriri. Irosati irisaviincantapaaqueari Avincatsarite, imponeaquea inquitequi jenoqui. Eirotsitarica acamajeititsi arori, eirotsita ajivajeitiritsi camajeitantsiri ajajeite jenoqui. Intinaajeitavajetsita quemisantajeitiriniri Quirishito. Impoijiquea ajajeite, antsipajeitanaqueari camajeivetainchari. Iraayee-tanaquee anta mencoriqui, antonquitavaqueari Avincatsarite anta inquitequi. Impoiji ancantaitatiyempani quiso avanaqueri. ¹⁸ Pincamtajeiteri maaroni ayemisantaririnte oca nocamantaquempi, piveshireantajeiteari, maaroni.

5

- ¹ Te nonintacayempiroji nosanquenatempiro jaoca oncarate impocantajeari Jesoshi.
- ² Yora coshitantatsiri: ariorica incoshite, irimananaquearo tsiteniri. Aisati iquem-petacari Avincatsarite, imanaquero jaoca oncarate impoque: tempa piojeitaquero oca.
- ³ Ariorica incanteete: "Cameetsa meeca asavicajeite, tecatsi antanateeene", ari omapoc-aqueri irashinoncaquea. Inquempetearo tsinane tsomontetatsiri. Omapocaquero antsicaneentaquero, tecatsi oncantero ompeajearo.

⁴ Iro cantaincha, noyemisantaririnte, piojeitaque avinti: te onquempetimotempiji pintime tsiteniriqui. Eiro imapoquimpitsi Avincatsarite, eiro iquempetacaantimpitsi yora coshitantatsiri, imapoquiri ishaninca icoshitiri. ⁵ Aitaque piojeitaque, oquem-petimotimpi pitimi quitaiteriqui. Te arojei caari iojeitatsi, te antimeji tsiteniriqui. ⁶ Te inquenqueshireteaji itsipapee, iro cantaincha eiro aquempejeitaritsi arori. Tsame anquenqueshirejeitea ainti, aamaajeitajeari Avincatsarite. Eiro ashinquitatsi, irointi anquenqueshirerempa. ⁷ Imaapiniyeeti tsiteniriqui, ishinquitapiniyeeta tsiteniriqui, ⁸ iro cantaincha aquenapinijeitaque ainti quitaiteriqui, eiro ashinquitatsi. Ariorica imanatapinita soraro, ipashicanejitacaro ashira, aisati ipashicainatacaro. Yaventacaro, eiro aveantaritsi ivesamento oyerinemeri. Tsame anquempejeiveteari iriori, iro cantaincha aventeari Tasorentsi, irinti: anquemisanteri, aninteri, ayotaque ari iroavisacojeitaquee, impoiji eiro imatanteetsi yora camaari. ⁹ Te incoyejii Tasorentsi inquisajeitee, irointi icoaque iroavisacojeitee, ariorica anquemisanteri Avincatsarite Jesoquirishito. ¹⁰ Icamimentajeitaquee maaroni, aneatsiri aisati camaintsiri, antsipa-jeitanteeari maaroni. ¹¹ Irootaque noncantantempi: poametavacaajeitea maaroni piveshireajeitanteari, piotasanojeitanteari. Tempa aitaque pimajeitaquero meeca.

Jero oca icoacaqueriri Pavoro irantajeiteri.

¹² Noyemisantaririnte, pimpincatsajeiteri maaroni quemisantacaajeitimpire, tempa ipomerentsiventimpiro maaroni. Tempa irio Avincatsarite tiancaqueriri, irootaque ipin-catsariventajeitantaquempiro aisati yoamejeitantaquempi. ¹³ Cameetsa yantaveetap-initi, irootaque ocameetsatantari pimpincatsatasanojeiteri, pinintasanojeiteri. Aisati nonintaque paacameetsatavacaajeitea maaroni. ¹⁴ Meeca nocoaque noncamantajeit-tempi, noyemisantaririnte, nocoaque pincantajeiteri yora peranti eiro iperatatsi. Yora tsaroashenti, piveshireacayeari. Pamitacojeiteri yora caariquera materone inquemisan-tasanote. Jentsiquero poamejeiteri maaroni, eiro pi quisatsajeitiritsi.

¹⁵ Ariorica iroashinoncayeetempi, eiro pipiataritsi, irointi pincavintsaava-caapinijeitea. Aitaque pincanteari, pincavintsaapinijeiteri maaroni atiri.

¹⁶ Piveshireimentapiniteari Tasorentsi, ¹⁷ pinquenquetsatacaapiniti. ¹⁸ Jaocarica incanteetempi, pincanteri: "Irove, Apa, iroashinoncayeetenata; aviroquea avinti noveshireimentaqueempi", irootaque icoacaquempi. Tempa avirojeitaque quemisantajeitiriri Jesoquirishito.

¹⁹ Pincantasanojeitero Ishire Tasorentsi oamejeitempi, eiro pipiatsajeitarotsi. ²⁰ Eiro pitseenquirotsi icamantimpire itiancane Tasorentsi. ²¹ Piotasanotavaquero maaroni iroametempimeri itsipapee. Ariorica ocameetsatasanoti, ari pishiretearo.

²² Paamaaventearo maaroni caari cameetsatatsi.

Ivetsajeitari Pavoro.

²³ Yashi yoiro isavicacaajeitaquee Tasorentsi cameetsa. Nocoaque iroameetsashiretasanojeitempi. Nocoaque iramitacotempi poameetsajeitero maaroni piquenqueshiretapinijeitiri aisati maaroni pantapinijeitiri. Cameetsa inquempoyejempri irosati impocantajeari Avincatsarite Jesoquirishito. ²⁴ Icoyeaquempi Tasorentsi, eiro meeca yamatavijeitimpitsi, aitaque irimataquero maaroni icantajeitaquemperi. ²⁵ Noyemisantaririnte, nocoaque pincantapinijeiteri Tasorentsi: “Pamitacoteri Pavoro”. ²⁶ Pincanteri maaroni ayemisantaririnte ara novetsajeitari. ²⁷ Aisati nocoacaquempi pineanajeiteneri maaroni pishaninca oca nosanquenajeitaquemperi. ²⁸ Nocoaque incantaitiyempani irineshiloncajeitempi Avincatsarite Jesoquirishito.

Narotaque sanquenajeitimpiori oca: *Pavoro*

YAPIITAJIRO PAVORO ISANQUENAJEITINIRI TESARONICASATI

Yovetsajeitajari aisati Pavoro tesaronicasati.

¹ ¿Savicajeitatsimpampa, tesaronicasati? ¿Tecatsimpa oajeitempine? Narojeitaque aca Pavoro, Shirivano, aisati Timoteo; nosanquenajeitajimpilo, aisati nosanquenajeitajiniri iriori maaroni noyemisantarininte ara. Tempa avirojeitaque quemisantajeitaqueriri Apa Atasorentsite aisati Avincatsarite Jesoquirishito. ² Nocoaque irineshiloncajeittempi aisati cameetsa irisavicacaajeittempi.

Iquemisantaque tesaronicasati, aisati intavacaajeitaca.

³ Ocameetsati nopasonquitacoventapinitimpi, noyemisantaririnte. Aiquero pijatatiipiquemisantasanojeitanaque aisati pinintavacaasanojeitanaca. Irio nopasonquitapinitiri Tasorents. ⁴ Queario, nocamantajeitiri itsipapee quemisantiriri picantatiani piquemisantajeiti. Oshequi iquisheetaqueMPI, aisati oshequi yoashinoncaajeitaqueMPI, iro cantaincha te pojoqueroji piquemisanti. ⁵ Pinequiero, cameetsa ipincatsariven-taqueMPI Tasorents. IshinetacoventajeitaqueMPI pineacatsijeitacaro maaroni oca, pincameetsashireantajejari, pintsipajeitanteeariri anta ipincatsaritinta.

⁶ Iro cantaincha icoaque Tasorents impiateari yora oashinoncaajeitaquempi, aitanaquempi irineashiitetemparota iriori. ⁷⁻⁸ Meeca yoashinonqueevetaqueMPI, iro cantaincha coajica cameetsa irisavicacayempi Tasorents, pincarajeitena narori. Coajica irimapocapaaquee Avincatsarite Jesoshi, imponeanaquea inquitequi, intsipatapaaque-ari inampirepee shintsitasanotatsiri. Irishipaquireapaaque, inquempejeitapaaquearo paamari. Cameetsa irisavicacaajeitaquempi, iro cantaincha iroasanquejeitapaaqueri maaroni caari quenqueshireterine: maaroni yora caari quemisanterone icantayevetariri. ⁹ Incantaitatiyempani irineacatsitacaqueMPI anta Sharincaveniqui, eiro catsini ineiritsi iriori Avincatsarite. Eiro ineiritsi impincatsaritasanote, eiro ineiritsi intason-cantasanyoyete. ¹⁰ Ariorica impocaje Avincatsarite, impincatsajeitavaqueri maaroni atiri yoameetsajeitiri, aisati iramenasanojeitavaqueri catsini maaroni quemisantajeitiriri. Piquemisantajeitavaquero peerani maaroni nocamantajeitaquempi, irootaque pincarajeitanteeariri ariorica impocaje. ¹¹ Ari icoyeajeitaqueMPI Atasorentsite, meeca nocantapinitiri iramitacojeittempi, nocoaque iriveshireimentasanojeittempi. Aisati nocantapinitiri irimatacaajeittempi maaroni cameetsatatsiri icoacaaquempi panteneriri. Ariorica pinguemisantasanojeiteri, pantajeiteneri icantakuempi; aisati nocantapinitiri intasoncaventajeittempi pimatasanotanteearori. ¹² Irineajeittempi atiri cameetsa pisavicajeitaque, irootaque impincatsajeitanteeariri Avincatsarite Jesoshi. Iojeiti atiri aviro quemisantiriri Jesoshi, irootaque irineacameetsajeitantempire. Tempa oshequi ireshinoncajeitaquee Atasorentsite, aisati Avincatsarite Jesoquirishito.

2

Iquenquetsatacotaqueri Jesoshi, impocantajeari.

¹⁻² Meeca, noyemisantaririnte, piojeitaque impocaje Avincatsarite Jesoquirishito. Impocajerica, arí irampatojeitapajee maaroni, ancarajeitanteeariri iriori. Meeca noninti noncamantempi: eiro picantashirejeititsi, aisati eiro pitsaroajeititsi. Ariorica incanteetempi: "Areetapaaja Avincatsarite", eiro pishiretarotsi incanteetempire. Ariorica incanteetempi: "Oametaquena Ishire Tasorents, ocanti pocaji". Ariorica incanteetempi: "Noneaqueri narori". Ariorica incanteetempi: "Ocanti isanquenare Pavoro areetaja".

³ Yamataviyeetimpicari. Eiro pishiretimatarotsi incantempire. Tequera omoncarateaji impocantajeari Jesoshi. Irijivajeite oshequi atiri inquisajeiteri Tasorents, impiajeiteari. Aisati intime yora janirotatsineri Sharincaveniqui, yora jivajeitiriri quisapinitiriri Tasorents. ⁴ Inquisaniroteri Tasorentsisanori, aisati inquisajeitero maaroni ijitasorentsitashivetari atiri. Incantanirote: "Itimayeveta oshequi tasorentsiyevetachari, iro

cantaincha nanaacojeitaqueri nainti. Notasorentsitasanotaque catsini". Irisavicanirotaque anta ivancoqui Tasorents, incantanirotaque: "Naro nainti Tasorentsisanori, pinquemisantajeitena". Ari, impoijiquea impocaje Quirishito, irinti.

⁵ Peerani notsipajejantimpiniri, nocamantitaquemppironi maaroni oca. Tempa ainiro piquenqueshiretaquero. ⁶⁻⁷ Impocanirotitaqueame yora quisasanotaquerir Tasorents, iro cantaincha timatsi tsaneacariri. Timatsi yantanirovetacari meeca, iro cantaincha imanaquero. Te oncameetsateji oca yantanirotaqueri. Ainiroquera tsaneacariri, irootaque caari iconijatanta. Ariorica omونcararatapaaquea impocantajeari, irijate yora shentiriri tsaneacariri, impoiji impocanirotasanotapaaque. Piojeitiri yora tsaneacariri: tempa irio Tasorents. ⁸⁻¹¹ Ari inconijatasanotapaaque yora caari quemisantanirotiro icantiri Tasorents. Iro impocanteari intianqueri yora Satanashi. Irimatacayeri paitapeerica, intasoncantayete: incoapaaque avajeitavaqueri cavaco. Aisati incoapaaque iramatavijeitapaaqueri atiri, maaroni. Irantanirotapinitero caari cameetsatatsi, iramatavitasanotanteariri maaroni yora jatatsineri Sharincaveniqui: queario, te incoajeiteji iriojeitero tampaticatatsiri oavisacojeiterinemer. Ari irishineteri Tasorents iramatavijeiteri, inquemisantajeitero tseeyantsi. Iro cantaincha impoitapaaqueri Avincatsarite Jesoshi, intasoncapaaqueri, iroapaquaqueri. Irishipaquireacotapaaqueri, impoyereapaajeri, poyere. ¹² Impoiji iroasanquetaasanoteri Tasorents maaroni caari quemisantiro queariotasnotatsiri: yora veshireimentarori caari cameetsatatsi.

¹³ Iro cantaincha nopasonquitapinitiri Tasorents. Avirojeitaque, noyemisantarinte, nopasonquitacoventajeitiri. Inintajeititaquempini Avincatsarite. Peerani catsini icoyeajeititaquempini Tasorents iroavisacojeitempi. Ari oameetsatasanojeitaquempi Ishire, aisati pishirejeitacaro quearioyetatsiri, irosati yoavisacojeitanti-piri. ¹⁴ Narotaque ovaajimpirori oca icamantaquemppiri pavisacotantajari. Icoyeajeitaquempi pinquempeteari Avincatsarite Jesoquirishito, pincarajeiteri pimpincatsar-ijeite. ¹⁵ Pincantaitatiyempani pinquemisantasanojeite. Eiro pipeacojeitarotsi maaroni noametitaquemppiri peerani notsipatantaquemppiri. Aisati eiro pipeacojeitarotsi maaroni nosanquenajeitaquemppiri. ¹⁶ Oshequi inintajeitaquee Avincatsarite Jesoquirishito, aisati Apa Atasorents. Icantaitatiani iveshireacaajeitaquee. Ineshinoncajeitaquee, irootaque ayojeitantacari irimajeiteero maaroni icantajeitaqueeri. ¹⁷ Nocoaque iriveshireacaajeitempi. Aisati, pitarica pantapiniteri, pitarica pincanteri, nocoaque iramatacotapinitempi.

3

Icantajeitiri Pavoro: "Jero oca pantajeiteri".

¹ Meeca, noyemisantaririnte, noncamantempi. Noninti pincanteri Avincatsarite iramatacotena noshintsitacantearori novaajero irineane, aisati impincatsajeitanteeariri maaroni quemajeitavaqueroneri, inquempejeitempi avirori. ² Timatsi caari cameetsajeitatsi coatsiri iroashinoncayena. Pincanteri Tasorensti iroavisacotena. Te meeza inquemisantajeiteji maaroni atiri. ³ Eiro yamatavitimptsi Avincatsarite, cameetsa pishireteari. Iramitacotempi piveshireimentasanotanteariri, aisati irojocaacoventempi: eiro ishinetiritsi camaari irantacayempiro paitapeerica. ⁴ Iriotaque Avincatsarite iotacaaquenari pimatapinitaquero maaroni nocantimpipi. Aitaque pincantaitatiyempani pinquemisantena. ⁵ Avincatsarite Quirishito icantatiani iquearioventiniri Tasorents maaroni. Nocoaque irimatacaajeitempiro pinquempeteari iriori. Aisati nocoaque irimatacaajeitempiro pinintasanasanojeiteri.

⁶ Meeca, noyemisantaririnte, noncamantempiro oca icoacaquemppiri Avincatsarite Jesoquirishito. Ariorica iperataca piyemisantaririnte, eiro piquempejeitaritsi. Te nonquempeteariji narori; pineajeitaquena, te nomperateaji nainti. ⁷ Piojeitaque ocameetsatimojeitimpipinquempejeitenavirori. Peerani, notsipatantaquemppironi, te nomperateaji. ⁸ Ariorica pipayetaquenaro noari, nopolnataquero. Aitaque nantaveetapinitaque quitaiteriqui aisati tsiteniriqui. Nopolmerentsiventacaro maaroni coiteimojeitaquenari oncanteata tecatsi pimpomerentsiventenari avirori. ⁹ Ocameetsavetaca noncoacotempime paitapeerica, iro cantaincha nonintaque nonijayempiro ocameetsati pantaveetapinite, eiro piperatatsi. ¹⁰ Notsipatantaquemppiri nocamantajeitaquemppiro

oca: yora caari antaveetatsine, eiro yoatsi. ¹¹ Noquemacotaqueri picarajeitaqueri peranti. Te irantaveeteji, irointi iquenayeti yaamaacotashitari ishaninca, ineaveetashita, vero, vero. Te oncameetsateji. ¹² Tempa ineajeitaquee Avincatsarite Jeso quirishito, irootaque nocamantajeitantzimpiori oca. Pincantasanojeiteri irimajerejeite, intsameejeite, impomerentsiventero coiteimojeitacariri.

¹³ Noyemisantaririnte, eiro piperatarotsi pintacotantajeitea. ¹⁴ Pioteri yora caari quemisantiro oca nosanquenatimpiri. Eiro piquempetacaasanotiritsi piyemisantaririnte, oncateata iroashiretanteeari. ¹⁵ Eiro piquishiritsi, irointi cameetsa poametasanoteri: tempa iriovetaca piyemisantaririnte. ¹⁶ Tempa cameetsa isaviqui Avincatsarite, meeca nocoaque cameetsa irisavicacaajeitempi maaroni quitaiteriqui, jaocarica pisavicajeiteri. Nocoaque quiso iroajeitempi.

¹⁷ Narotaque nainti Pavoro vetsajeitaquemperi. Pineaquero nosanquenare piotanteari narosanotaque pacantaquemperi. Aitaque nametacaro: ariorica nosanquenatapinitiri ayemisantaririnte, nosanquenajeitiniri novajiro. ¹⁸ Nocoaque irineshinoncajeitempi Avincatsarite Jeso quirishito.

Ari ocarati: *Pavoro*

IJIVATAQUE PAVORO ISANQUENATINIRI TIMOTEO

Ivetsatari Pavoro Timoteo.

¹ ¿Savicatsimpi, Timoteo? ¿Tecatsimpa oyempine? Narotaque Pavoro sanquenatimpiori oca; itiancaquena Avincatsarite Jesoquirishito noquenquetsati, aisati itiancaquena Tasorentsi. Iriotaque matirori yoavisacojeitee, ayotasanojeiti te intimeji pashini oavisacotantatsine. ² Noquemisantacaquempi peerani, irootaque noshiacantanimpiri notomisanori. Nocoaque irineshinoncatempi Apa Atasorentsite, incavintsayempi, cameetsa irisavicacayempi. Aisati inquempetacayempi Jesoquirishito, yora Avincatsarite.

Isaviqui Timoteo Ejesoqui.

³ Nojatantacari Maseroniaqui, nocantasanotanaquempi: "Pisavicavaquetsita aca Ejesoqui". Nocoacaquempi pincantimenteri amatavitantatsiri; pincantajeiteri: "Eiro poametantiotsi tseeyantsi". ⁴ Pincantajeiteri ayemisantaririnte: "Eiro piquemisantashitarotsi iquenquetsatashiyetari". Pincanteri aisati: "Eiro pishiretashitarotsi iquenquetsatacotashiyetari maaroni peeraniniri. Patsipetashitarocari paamaashiyetearo paitapeerica. Tecatsi oncantempi ocapée oamejeitempi. Ainiro icoacaqueeri Tasorentsi: ariorica ashireteari irinti, ari iroamejeiteero". ⁵ ¿Paita nocamantantimpiori oca? Irootaque nocamantantimpiori nocoaque pincameetsashiretanaje, nocoaque pintime cameetsa, eiroquea poashiretantatsi; nocoaque pinquemisantanotanaque. Ariorica pimajeitaquero oca, aitaque pimataquero aisati pinintasanojeiteri itsipapee. ⁶ Ainiro comiyetacarori aparopee, iquenquetsatacotashiyetaro irinti caari ioyeti, yatsipetashitaca icantavacamentaro. ⁷ Icoayeveta iroametanterome icantacantiniri Moishishini, iro cantaincha te iriotimateroji icantavetari. Te iriotimateroji pitarica icamantacotasanolvetari, vero, vero: ishiaqueri eroti.

Iquenquetsatacotiro icantacantiniri Moishishini.

⁸ Ayojeiti ocameetsati icantacantiniri Moishishini, iro cantaincha acomitarocari. ⁹ Piota sanotavaquero oca noncamantempi: arojeitaque yoameetsatane Tasorentsi, te aro irisanquenateene Moishishini. Irinti isanquenatini yora caari quemisantiro irineane Tasorentsi: yora piatsatariri, caari quemisantiri, yora caari cameetsatatsi, antapinitirori caari cameetsatatsi, caari quenqueshiretiri Tasorentsi, oiriniri iririni, oironiri irinironi, oantatsiri, ¹⁰ neavintsatirori caari yai, ora neavintsatiriri caari ai, yora tsinampairiri ishiramparirinte, noshicantatsiri, tseeyari, maaroni. Aisati isanquenatiniri maaroni quisayetiriri yora oametantayetirori cameetsatatsiri. Tempa irio Tasorentsi sanquenataacaqueriniri Moishishini. ¹¹ Cameetsa oni oca noametantiri. Itiancaquena Tasorentsi noncamantacoteri irinti, ioti nomataqueneri icantaquenari. Cameetsa oca nocamantacotiriri: tempa icameetsatasanoti irinti.

Yantayetiri Pavoro.

¹² Icoyeaquena Avincatsarite Jesoquirishito nanteneri paitapeerica icoacaquenari. Iotaque nomoncarateneri maaroni icoacaquenari: iotaque eiro namatavitiritsi. Aisati imatacaaquenaro nantayetiniriri, irootaque nocantantariri: "Ariove, pimatacaaquerenaro". ¹³ Peerani nocantimaveitarini, noshemetimoveitarini, aisati noquisajeiveitarini maaroni quemisantiriri. Iro cantaincha tequerani nioveitearini Quirishito, tequerani nonquemisantaveiteani. Te nioveiteani pitarica nantayetiniriri, irootaque icavintsanthaquenari. ¹⁴ Ineshinoncatasanotaquena catsini Avincatsarite: yoametaquena nonquemisantiri Jesoquirishito, aisati nonintasanotiri. ¹⁵ Queariotaque oca noncamantempi, cameetsa pinquemisantavaquero. Ipocapaaque aca quipatsiquica Jesoquirishito

yoavisacojeitaqueri caari cameetsajeitatsi. Nanaacojeitaquempi maaroni, te noncameetsaveiteani catsini.¹⁶ Irootaque icavintaantaquenari, ijivataquena narori ineshi-noncataquena, te inquishenaji. Irootaque ayotantacari aisati inquempejeiteri iriori maaroni quemisanterineri coajica: irineshilononcajeiteri, incantaitatiyempani intimasanojeitajeari anta inquitequi.¹⁷ Incantaitatiyempani Atasorents site impincatsariventajee arori. Tecatsi incantea incame. Yashi yoiro imana. Apaniro itasorentsiti. Tsame ancantaitatiyempani ampincatsatasanojeitanaqueri, ancamatap-inijeitanaqueri atiri icameetsatasanoti. Aitaque ancanteari.

Jero oca icantayetiriri Pavoro Timoteo.

¹⁸ Piotaque, Timoteo, noshiacantaquempi notomi. Pinquemisantero oca noncantem-piri. Tempa peerani Tasorents i, cantajeitaqueri ayemisantairinte: “Oshequi irimate-naro Timoteo nocoacaqueri”. Irosati yovaajeitantaqueerori arori. Meeca pimamatero icamantacotaquempi. Pioti yora soraropee ishintsiventiniri iyapitanote paitapeerica icantiriri. Meeca, pinquempeteari, pishintsiventeneri paitapeerica panteneriri Avincat-sarite,¹⁹ pinquemisantasanoqueri. Ariorica pioti ocameetsati pantero paitapeerica, ari pimamatero. Ainiro yora iovetachari te oncameetsateji paitapeerica, iro cantaincha yantashitacaro, impoiji yojocajiro iquemisanti.²⁰ Aitaque imataquero Imeneo aisati Ariantero: yojocajiro iquemisanti. Te oncameetsateji oca, irootaque nocantantacariri iriori: “Iroashilononcayempita Satanashi”; oncateataquea iriotanteari pashini ashinina eiro icantimatantaritsi iriori Tasorents.

2

Icantiri: “Pincanteri Tasorents iramitacojeiteri maaroni atiri”.

¹ Ari nojivataque noncamantempiro oca: pinquenquetsatacayeri Tasorents, pincanteri iramitacojeiteri maaroni atiri, pimpasonquitacoventeri. ² Aisati pincanteri iramita-cojeiteri pincatsaripee aisati maaroni pashini ivincatsaririnte, impoiji cameetsa asavica-jeitanteari, eiro itimitsi ashereajeiteeneri. Aisati cameetsa amatasanotero anquemisan-tajeiteri Tasorents, ampincatsajeiteri. ³ Cameetsa ancamatapiniteri Tasorents oca, irootaque icoiri; tempa iriotaque oavisacojeitaqueeri. ⁴ Icoasanotaque iriori avavisaco-jeitaja maaroni, aisati icoaque ayojeitero queariotatsiri, maaroni. ⁵ Maaroni asavicajeiti arori aca quipatsiquica. Ainiro Tasorents apaniro, isaviqui irinti inquitequi. Te aneapinitjeri, iro cantaincha ainiro aparoni shirampari vaapiniteerori irineane: yora Jeso quirishito. Aisati apaniro yovaqueneri Tasorents aneane arori, ashancatan-tacariri. ⁶ Yora Quirishito, irisati coashitacha, icanti: “Nocoaque noncamimentajeiteri maaroni atiri noavisacojeitanteeariri”. Ari imataqueenero ayojeitancariri. ⁷ Ipeaquena camantantatsiri, itianquena noamejeiteri maaroni atiri inquemisantajeitero oca queariotatsiri. Te nontseyaji, queariotaque oca nocantimpiri.

Jaoca ancanteari anquenquetsatacayeri Tasorents.

⁸ Ari nocoaque anquenquetsatacayeri Tasorents, maaroni. Ariorica anquen-quetsatacayeri, cameetsa asavicajeite: te oncameetsateji anquisheri itsipapee, te on-cameetsateji antseenqueri Tasorents. ⁹ Aisati nocoaque onquitsaatea tsinane cameetsa, eiro ocoitsi irineveyeetearo, aisati cameetsa onquenqueshirete. Te oncameetsateji ontsiricoishitero oishi irineveyeetearori, aisati te oncameetsateji oaneencashitearo oro, aisati perata. Aisati te oncameetsateji oshemetacayero oitsaare pinatasanotachari: ineveyeetarocari. ¹⁰ Iointi ocameetsati oneshilononcatante: ari ocameetsavetari oma-jeiterome maaroni quemisantajeitiriri Tasorents. ¹¹ Ocameetsati onquemisantasano-teri tsinane shirampari, aisati omajerete, iotantearori paitapeerica. ¹² Te noshineteroji tsinane oametante, aisati te oncameetsateji omperanateari shirampari, iointi ocameetsati omajerete. ¹³ Ijivataqueri Tasorents peerani yovetsicaqueri Aran, impoiji iroori yovetsi-caqueri Eva. ¹⁴ Te iramataviteri Satanashi Aran, iointi yamatavitaque tsinane, impoiji antaqueri caari cameetsatatsi: te onquemisanteri Tasorents. ¹⁵ Iro cantaincha ari-orica oncavintsayeri tsinane otomipee, oncantatiyempani onquemisanteri Tasorents, onintajeiteri oshanincabee, cameetsa osavique, cameetsa onquenqueshiretaquea, ari oavisacotaquea.

3

Jaoca incanteari yora jivatacaajeitiriri iyemisantaririnte.

¹ Queario oca icanteetiri: “Ariorica icoaque shirampari irijivatacaajeiteri iyemisantaririnte, tempa ocameetsati oca icoqueri”. ² Ariorica irijivatacaajeiteri iyemisantaririnte, te oncameetsateji ontine irantane. Cameetsa iraye ijina aparoni, te oncameetsateji irishinquitea, cameetsa inquenqueshiretanaquea, incameetsashirete, cameetsa irineshinoncatavaqueri quivanterineri, cameetsa iriotasanote iroametante. ³ Te oncameetsateji irirapinitero quepishijatasanotatsiri, te oncameetsateji inquishea; irointi cameetsa incavintsante, cameetsa Irisavique, te oncameetsateji irinintasanoteri quirequi. ⁴ Cameetsa iroametapinitero ijina, cameetsa iroametapinijeiteri itomipee, inquemisantajiteariri iriori, eiroquea ipiatsajeitantaritsi, cameetsa Irisavicanjeiteari. ⁵ Eiorica imatirotsi inquemisantacayeri itomipee, aisati ijina: „jaoca incanteari irintacoteari maaroni yora quemisantajeitiriri Tasorentsi? ⁶ Te oncameetsateji irijivatacante iroquera quemisantatsi: ishemeticari. Iquempetaricari camaari, ishemetaque peerani, impoiji yoasanquetaqueri Tasorentsi. ⁷ Cameetsa iriojeiteri yora caari quemisantajeitatsi, incantajeite: “Icameetsati yora jivatacaajeitiriri quemisantatsiri”. Impoiji eiro imatantaritsi incantimajeiteri, aisati eiro imatantaritsi camaari irantacayeri caari cameetsatatsi.

Iquenquetsatacotiri amitacotapinitiriri iyemisantaririnte.

⁸ Yora amitacotapinitiriri iyemisantaririnte: cameetsa irishiyeri yora jivatacaajeitiriri, incameetsashiretanaque. Te oncameetsateji iramatavitante. Aisati te oncameetsateji irirero oshequi cachojar. Aisati te oncameetsateji inquenqueshireteri quirequi iroshequiyeri. ⁹ Cameetsa inquearioventero inquemisantasanotero maaroni yoameyetiriri Tasorentsi, aisati ocameetsati iriote te aneeroji irantane. ¹⁰ Pijivate pamenasanoteri, piotasanojeri icameetsatasanotirica. Ariorica piojeitaque icameetsatasanoti, ari pincanteri iramitacojeiteri quemisantajeitatsiri. ¹¹ Aisati onquempeteari ijina, oncameetsashiretanaque: te oncameetsateji oncantimatante, te oncameetsateji oshinquitea, te oncameetsateji amatavitante. ¹² Yora amitacotantatsiri, cameetsa iraye ijina aparoni. Cameetsa iriote inquemisantacaasanoteri itomipee: impincatsateri iriori iriri. Aisati cameetsa iriote inquemisantacaajeiteri maaroni saviquimojeitiriri. ¹³ Ariorica cameetsa iramitacojeiteri iyemisantaririnte, ari impincatsayeeteri, aisati irimatero inquemisantasanoteri Jeso quirishito, eiro itsaroacaaritsi.

Iquenquetsatacotiri quemisantajeitiriri Jesoshi.

¹⁴⁻¹⁵ Nocoavetaca intsipaite nareetitapeempime, iro cantaincha eiorica nomatirotsi. Irootaque nosanquenatantimpiori oca: nocoaque piote jaoca acantajeitari. Icoyeajetaquee Tasorentsi: tempa arojeitaque quemisantajeitiriri. Aneatsiri ini. Ayojeitiro oca queariotasanotatsiri: cameetsa anquearioventero avaayetero. ¹⁶ Queario, te ayotashiteaji jaoca icantari Tasorentsi, iro cantaincha iotacaajeitaquee Quirishito. Tasorentsi ini, iro cantaincha yatiritapaaque. Ora Ishire, irootaque iotacaajeiteeri itasorentsitaque. Yora inampirepee Tasorentsi yamenacoventajeitaqueri Quirishito. Acamantacojeitaqueri arori maaroni nampitsipeequi, iquemisantajeitaqueri savicajeitatsiri. Yovancajiri iriri aisati inquitequi, cameetsa isavicipaaji catsini.

4

Quearioyea yoameyeetimpircari tseeyantsi.

¹ Jero oca ocamtasanojeitee Ishire Tasorentsi. Coajica, irotimataintsi impocantajeari Quirishito, intime jocajeiteroneri oca queariotatsiri aquemisantajeitiri. Inquemisanteri amatavijeiterineri, ovaayetirori yoameyetiriri camaari iriori.

² Iramatavitante yora atiri, iro cantaincha irishiacanteame iquemisanti. Tecatsi incantea iriote te oncameetsateji oca icantayetiri. ³ Intsaneapiniteari shirampari iraye ijina, aisati intsaneaquearo tsinane aye ojime. Aisati intsaneapitsataqueeri avajeiteari avari yovetsicaqueeri Tasorentsi. Aquemisantajeitiri Tasorentsi, ayojeiti queariotaque yoamejeitaqueeri irinti. Aitaque icoaque ampasonquitacoteri ayeari, irosati avanteariri. ⁴ Ocameetsajeitaque maaroni yovetsicaqueri Tasorentsi. Ariorica

ampasonquiteri, cameetsa avajeiteari, eiro apinquiritsi. ⁵ Yoameetsantaqueeri Tasorentsi avajeitari. Ariorica ampasonquiteri, aisati anquenqueshiretero irineane, ocameetsati avapinijeiteari maaroni.

Pinquearioventeneri Tasorentsi maaroni icantayetimpri.

⁶ Ariorica povaajeiteneri ayemisantaririnte oca nocantimpri, ocameetsati. Tempa pishiretapinitacaro, oametasanotaquempi. Ariorica poamejeiteri itsipapee nocamantimpri, ari incantempi Jeso quirishito: "Cameetsa oca pantaquenari". ⁷ Eiro pishiretarotsi oca iquenquetsatashitari tseeyari: te oncameetsateji pinquenqueshiretapinitero. Irointiquea pinquearioventero pinquemisantasano Teri Tasorentsi, irinti.

⁸ Ocameetsaveta pinquenaveete aisati pintsameete, oshintsitasanotantajeari pivatsa; iro cantaincha ocameetsatasanoti catsini pinquearioventeneri Tasorentsi paitapeerica panteneriri. Eiro patsipetarotsi irointi: cameetsa pisavique meeca, aisati cameetsa pisavique coajica anta inquitequi. ⁹ Queariotasanaque oca nocamantaquempi. Ocameetsataque irishirejeitearo maaroni atiri. ¹⁰ Apomerentsiventacari atiri, aque-matsicatimentacari inquemisantajeitajeari. Aneatsiri ini Tasorentsi, ayojeiti eiro yamataviteetsi: iringo oavisacojeitiriri maaroni atiri. Queario, yoavisacotasanojeitiri maaroni quemisantajeitiriri.

¹¹ Pincantajeiteri atiri irimamajeitetro oca nocantimpri, poametasanojeiteri.

¹² Evancariquerampi, iro cantaincha eiro pishineyetiritsi intseenqueetempi. Paitapeerica pantayetaqueneriri Tasorentsi, cameetsa pimayetero, inquempetantempri piyemisantaririnte: pineanate cameetsa, pisavique cameetsa, pinintajeiteri itsipapee, pinquemisanteri Tasorentsi, poameetsantero maaroni pinquenqueshireyeteri.

¹³ Coajica noneajantempi. Meeca pineanatapiniteneri ayemisantaririnte irineane Tasorentsi, piveshireacaapiniteari, poametapiniteri. Pincantatiyempani, irosati nareetantapajeari. ¹⁴ Peerani icamantacotantaquempi, aisati icantantariri jivatacaantatsiri Tasorentsi iramitacotempi, aisati yajiricainataquempi, irosati imatacaantaquempi Tasorentsi. Meeca eiro piperaventarotsi oca imatacaaquaquempi.

¹⁵ Pimatapinitero oca imatacaaquaquempi, iringo oavisacojeitajeari maaroni atiri pimatasanotaquero. ¹⁶ Pinquenqueshiretasanoteri paitarica pantayeteri, aisati paitarica poameyeteri: pinquearioventajeari. Ariorica pimajeitetro oca, ari poavisacotacantajeari maaroni quemajeitempineri, aisati paviscotaje avirori.

5

Jaoca pincanteriri itsipapee pishaninca.

¹ Eiro pi quisatsatiritsi anteashipari; irointi cameetsa pineanateri, pinquempetacanteri irio piri avirori, cameetsa pincavintsayeri. Aisati evancaripee, pinquempetacanteri pirenti. ² Ora anteashiparo, pinquempetacantero piniro. Aisati evancaropee, pinquempetacantero pitsiro: eiro piquenqueshiretirotsi pantero. ³ Ariorica ontimashita-jea camajimentaaro, terica intime neshinoncatajerone, pineshinoncateroyea avinti.

⁴ Iro cantaincha itimirica otomi, oshinto, iriorica osari, cameetsa irineshinoncatero iriori. Irootaque icoiri Tasorentsi cameetsa ayojeite ancavintsayeri ashanincasanori arori. Cameetsa ampajiteeri ashijeiteeri coiteimojeitacariri. Tempa peerani ipajeitaquee maaroni coiteimojeitaqueeri arori. ⁵ Ariorica otimashitasanotaja camajimentaaro, apaniro oquenqueshiretasanotiri Tasorentsi irinti, te intimeji pashini neshinoncateroneri. Ocantani: tsiteniriqui, quitaiteriqui, oquenquetsatasaapinitiri Tasorentsi, ocantapinitiri paitarica ocoayetiri. ⁶ Iro cantaincha ainiro pashini, onashita irointi: ocoaque onquimoshiretashitea. Aneavetaca, iro cantaincha eiro oneiritsi Tasorentsi.

⁷ Pincamantajeiteri maaroni quemisantatsiri irimamajeitetro oca nocantimpri, oncanteata eiro otimitsi irantane.

⁸ Ocameetsati aneshinoncajeiteri itsipapee ashaninca, aisati ashanincasanori arori, aneshinoncatasanoteri. Eirorica aneshinoncatiritsi, eiro acantitsi: "Noquemisanti narori". Teve. Te incameetsateji tseencantatsiri, iro cantaincha terica aneshinoncateri ashaninca arori, anaacojeitajiri ainti yora tseencavetachari, te incameetsatasanoteji catsini. ⁹ Ariorica omoncarataquero camajimentaaro 60 osarintsite, ari pincantero

intacojeiteari maaroni ayemisantaririnte. Ocameetsataque aisati aaveitaniri aparoni ojimeni, te oshequiyerini. ¹⁰ Ocameetsati pineacojeitaquero omayetaquero cameetsayetatsiri: intacojeitacari otomipee, oneshinoncajeitaqueri itsipapee, amitacojeitaqueri maaroni quemisantajeitiriri Tasorentsi, ocavintsaaajeitaqueri ashinoncaincari, oquearioventaquero omayetaquero cameetsayetatsiri. Ariorica pineacojeitaquero omayetaquero oca cameetsayetatsiri, ari ocameetsati pincantero intacojeiteari quemisantajeitatsiri ashinoncaajeitachari. ¹¹ Iro cantaincha eiro picantirotsi ora camajimentaaro caari anteashipatatsi. Ocoircari shirampari antashiteari. Ocoicari aaje aisati, ojocajircari Quirishito. ¹² Ojivavetaca ocantavetacari: “Nonquemisantasanoempempetaricari tsiroti. Aamaashitaricari oshaninca, oneanatantarocari caari cameetsatatsi.

¹³ Irootaque nocoantacari aaje aisati camajimentaaro, tequeratsitarica anteashiparote. Cameetsa intime otomipee. Cameetsa oncoteneri ojime iroyeari, aisati otomipee. Cameetsa ontijeneri iitsaare, onquiveneri iitsaarepee, maaroni. Ariorica cameetsa ontine, tecatsiquea incantea atiri incantimajeithee. ¹⁴ Jero imayetaquero Satanashi aparopee: yojocacaajiro oquemisantavetacari Quirishito. ¹⁵ Itimirica oshanincasanori camajimentaaro, cameetsa iriotashitea incavintsayero iriori. Te oncameetsateji incanteri quemisantajeitatsiri: “Pincavintsaaajeiteroyea avinti”. Timatsi pashini camajimentaaro, savicatsiri apaniro: tecatsi oshanincasanori cavintsayeroneri. Iroquea irointi, cameetsa incavintsaaajeitero yora quemisantajeitatsiri.

Jaoca ancantajeiteriri yora jivatacaaajeiteeri.

¹⁶ Cameetsarica ijivatacanti yora jivatacaaajeitiriri quemisantatsiri, ocameetsati impinatasanoteri. Cameetsa inquemisantasanofteri aisati. Ariorica ipomerentsiventaquero iquenquetsati aisati yoametanti, cameetsa impinatasanoteri. ¹⁷ Aitaque ocanti Sanquenarentsi: “Eiro pipashicavantetiritsi yora vaca aaticaitirori tirico, pishineteri iroyea. Tempa yaaticaitimpido paantarori oitsoqui”. Aisati ocanti: “Ocameetsati impinayeeteri yora antaveetiniriri”.

¹⁸ Eiro piquemisantashitaritsi aparo cantacotashitearineri jivatacaaajeitimpido, piquemisantirocari tseeyantsi. Iro cantaincha incarataquerica neasanoterineri 2, ariorica 3, ari pishiretearo oca incamantempido. ¹⁹ Queariorica otimi yantasantaqueri, ari pincanteri: “Eiro papiitajirotsi aisati oca pantaqueri”. Cameetsa iriojeitero maaroni quemisantatsiri oca pincanteriri, inquenqueshirejeitanteeari, iriojeitanteeari eiro yantantarotsi iriori caari cameetsatatsi. ²⁰ Ayojeitaque icarajeitaquee Atasorentsite, aisati Jesoquirishito. Aisati icarajeitaquee inampiree iriori. Irootaque nocantantimpido pimamajeitero pincanteri antirori caari cameetsatatsi. Eiro pipincatsatashitaritsi jivatacaaavetimpido avirori. Ocameetsati pimoncaratavacaajeitea avirori. ²¹ Eiro pipeashitaritsi shirampari jivatacaaajeiterineri quemisantatsiri, eiro pipamiinatashitaritsi. Pijivate piotasanoteri. Eiro pishinetiritsi itsipa irantero caari cameetsatatsi: ariorica pishineteri, ontine pantane avirori. Pantirocariya avirori caari cameetsatatsi.

²² Eiro apatiro piriro nija, irointi pirero aisati ovaja capichaji. Oameetsatajempido pamporetsa picatsiti. Aapinitaqueempi pimaore, iro cantaincha oshintsitacayempi ovaja. Ariorica pirapinitero capichaji, ari oavisacotajempi, aisati oshintsitacajempi.

²³ Oconijataque caari cameetsatatsi yantaniyotiri aparopee atiri; iojeitaque incantacoteri Tasorentsi: “Ainiro yantane”. Ainiro pashini manavetacarori yantayetiri, iro cantaincha coajica onconijate aisati maaroni yantayetiri iriori. ²⁴ Aisati, ariorica antayetaquero cameetsayetatsiri, oconijataque aparopee, ineacojeitaqueero atiri. Iro cantaincha tequera onconijateji maaroni cameetsatatsiri antajeitaqueri: coajica onconijatasanotaque maaroni. Aitaque oncanteari.

¹ Yora amanantiriri iveranaro, iperanatasanotacari. Iro cantaincha ariorica iquemisantaque yora pimantaari, ocameetsati impincatsateri yora amanantiriri. Impoiji tecatsi incanteete incantimateri Tasorentsi, aisati tecatsi incanteete: “Te oncameetsateji oca yoametiriri quemisantsatsiri”. ² Ariorica iquemisantaque yora amanantajiriri, te oncameetsateji incante yora pimantaari: “Iriotaque meeca noyemisantaririnte, nomoncaratavacaaca. Eiro meeca nopincatsatiritsi”. Irootinti cameetsa irantaveetasanoteneri: tempa irio iyemisataririnte yantaveetiniri, irootaque inintantariri. Irootaque, Timoteo, poamejeiteriri maaroni, pincantajeiteri maaroni irimajeitero.

Iquenquetsatacotiri oametantirori tseyantsi.

³ Ainiro quenacaashitacarori oca noametiriri. Te irishiretearoji ora queariotatsiri yoametiriri Avincatsarite Jeso quirishito. Aisati te irishiretearoji oca oamejeitaqueeri anquemisanteri Tasorentsi. ⁴ Oshequi ishemeti, iro cantaincha te aneeroji iotantari. Te irioteji. Isampitacotashitacaro paitapeerica. Ineanatashiniroveetaca, vero, vero. Impoiji iquisashireaqueri itsipapee, iquisatsataqueri, icantimataqueri, yaamaacotacari yantiro caari cameetsatatsi. ⁵ Iquisavacaajeitaca yora quenqueshiretirori caari cameetsatatsi, te inquenqueshireteroji queariotatsiri. Iquemisantiromempeaca, ijitashivetaca ari irayeme paitapeerica. ⁶ Iro cantaincha ariorica anquemisantasano Taso rents, aisati aveshireimenteari, ari asavicasanojeitanaque cameetsa.

⁷ Atimantapaacari peerani, tecatsi amapaaque. Aisati onquempetea, ariorica ancamaque, tecatsi aanajeri aisati. ⁸ Iro cantaincha timatsirica avajeitari aisati aquitsaa-jeitari, aitapaaji, eiro aiquero acoanaitii aisati. ⁹ Irintiquea yora coatsiri irashitaaran-tea yantanirotashiyetacaro paitapeerica irishequiantearori irovaararo. Omapocashita-paacari yantaquero paitapeerica. Te inquenqueshireteaji, icoashitacaro caari cameet-sayetatsi, impoiji incamaquerica, irijate Sharincaveniqui. ¹⁰ Ariorica ancoasanotaque ashiyetearo paitapeerica, aitaque antaquero caari cameetsatatsi. Oshequi quemisan-tavetachari yojocajiro iquemisanti. ¿Paita yojocantarori? Tempa icoaque irashiyetearo paitapeerica, iro cantaincha impoiji oshequi inquenqueshiretanaquea, iroashiretasano-tanaquea catsini.

Icantiri: “Pinquearioventeneri Tasorentsi pantaveeteneri”.

¹¹ Iro cantaincha avinti, piquearioventiniri Tasorentsi paitarica icantimpri. Pineve-tarocari avirori paitapeerica. Pincoasanote pincameetsatasanotanaque avinti. Pimpin-catsateri Tasorentsi, pinquemisantasano teri, pinquearioventeneri maaroni icoacaaque-mpiri, pantaveeteneri; pinintasanojeiteri itsipapee, pineshinoncajeiteri. ¹² Ariorica opomerentsivetaca piquemisantasano teri Tasorentsi meeca, iro cantaincha ocameet-satasanoti pimataquero. Pinquearioventeneri icoacaaajeitimpri. Eiro pipeacotarotsi: pincantaitatiyempani panee inquitequi. Icoyeaquempi Tasorentsi iroaneantajempiri anta inquitequi. Tempa irootaque picantaqueri avirori, icarajeitaque oshequi quemajitavaquempi. Queariotaque picantaquerir. ¹³ Tempa irio Tasorentsi oaneajeiteeneri inquitequi, maaroni. Aisati peerani Jeso quirishito, te intsaroacayeariji Pontsio Pirato, yora oacantaquerir. Icantiri: “Queario, narotaque pincatsari”. Meeca icarajeitaquee Tasorentsi aisati Jeso quirishito, yamenacoventajeitaquee. ¹⁴ Irootaque noncantan-tempirori oca: pintso teaquero maaroni nocantimpri, eiro picomitarotsi. Pincantatiyempani, pimatasanoteri irosati impocantajeari Avincatsarite Jeso quirishito. ¹⁵ Ioti Tasorentsi jaoca oncarate impocantajeari, iriotaque cantatsineri. Iquimoshiretaque irori. Apaniro ini, itasorentsitasano taque catsini, ipincatsariventajeitiri maaroni pincat-sariventavetariri atiri, jjivatacaaajeitiri maaroni jivatacaaajeivetariri atiripee. ¹⁶ Apaniro irinti eiro itsoncatsi, eiro icamitsi catsini. Anta itiminta otimi quitaiteri catsini, tecatsi ancantea ajatashitero. Te intimeji neerinieri Tasorentsi. Tecatsi ancantea aneajeiteri. Ocameetsati ampincatsatasanojeitanaqueri maaroni. Icantatiani ipincatsariventanti irinti, yashi yoiro. Aitaque icanta.

Jero oca icantiriri ashitaarantincari.

¹⁷ Pincanteri ashitaarantincari eiro ishemetitsi. Aisati pincanteri eiro iveshirei-mentarotsi yashi yevetari, tempa ari ompeajea, coajica. Irintiquea Tasorentsi

iriveshireimentea. Ipapinijeitaquee maaroni coiteimojeitaqueeri aquimoshirejeitantari. ¹⁸ Oshequi iroaararo iriori ashitaarantincari. Pincamanteri meeca irineshinoncajeiteri ishanincapee, oshequi irineshinoncateri. Te oncameetsateji irimashitsate. Cameetsa incavintsante, irointi. ¹⁹ Ariorica irimayetaquero oca, cameetsa. Impinateri Tasorentsi coajica anta inquitequi, anta incantaitatiyempani iraneapaaje cameetsa.

Ivecarataquero isanquenare.

²⁰ Meeca, Timoteo, otimi icantaquemperi Tasorentsi pantaqueneri. Ari pimamatener-iquieti, eiro pamatavitiritsi. Eiro pishiretashitarotsi cantaantsi. Ainiro oametantayeve-tarori paitapeerica, ijiveta ioti, iro cantaincha te omoncaratavacayeaji icantiri. Eiro pishiretashitarotsi yoametashiyevetimpri. ²¹ Ijitashivetaca yora ioti, iro cantaincha, te irioteji. Irootaque caari iquemisantanta. Ari, nocoaque irineshinoncatempi Tasorentsi. Narotaque sanquenatimpiori oca: *Pavoro*

YAPIITAJINIRI PAVORO ISANQUENATAJINIRI AISATI TIMOTEO

Ivetsatajari aisati Pavoro Timoteo.

¹⁻² ¿Ainirompi, Timoteo? ¿Tecatsimpa oyempine? Narotaque Pavoro sanquenatajimpiori oca. Itiancaquena Jeso quirishito noncamantajeiteri maaroni atiri ariorica inquemisantajeiteri Jeso quirishito, ari iroaneajeitajeri anta inquitequi. Irootaque icoacaquenari Tasorentsi. Notiomni, nonintasanotimpi. Nocoaque irineshinoncatempi Tasorentsi, aisati Avincatsarite Jeso quirishito. Aisati nocoaque incavintaasano tempi, cameetsa irisavicacayempi.

Ipasonquitacoventiri Pavoro Timoteo.

³⁻⁵ Noquenquetsatacapinitiri Tasorentsi maaroni quitaiteriqui, aisati tsiteniriqui. Paitaricapee nanteneriri, nocoasanotaque noveshireacayeari. Tempa peerani yantaveetinirini iriori yora noshanincani. Peerani, nojocantanaquempiriranqui, poashiretanaca, piraaca. Oshequi meeca nocoiteaqueMPI. Nocoaveta noneajempime aisati, noveshireimentasanotajempime. Noquenqueshiretajimpi, oshequi piquemisantasanotaque, piccantani. Piquempetacaro pisaro Iroira, aisati piniro Eonise: oquemisantasanajeiti iroori. Nioti ainrotatsi piquemisanti, irootaque nopasonquitacoventantimpri.

Eiro pipashiventacaarotsi pinquemisantacayeri atiri.

⁶ Piquemisantaqueri Tasorentsi, irootaque noncantantempi: peerani, nopaminitantakaquempi, aisati nocantantacariri Tasorentsi iramatacotempi, timatsi imatacaaquaempi. Meeca pimatasanotero maaroni imatacaaquaempi. ⁷ Te incoyeji antsaraacayeari atiri, irointi icoasanotaque anquearioventeneri maaroni. Icoaque anintajeiteri atiri; aisati icoaque ontimimojeitee ayojeitanteari, cameetsa asavica jeitajeari. ⁸ Eiro pipashiventacaarotsi pinquenquetsatacoteri Avincatsarite. Aisati, eiro pipashiventacaanatsi; noquemisantaqueri Avincatsarite, irootaque yoiminqueanteetaquenari meeca caravosoquica. Oshequi noneacatsitimentacari Quirishito, cameetsa pinquempetena avirori. Aitaque irimatacayempiro Tasorentsi maaroni icoacaquaempi. ⁹ Peerani, tequerani irovetsiqueroni oca quipatsica, iotitaqueeni anquemisanteri Jeso quirishito. Icoyeajeititaqueeni cameetsa asavica jeitanteari. Te ancameetsaveiteani, iro cantaincha timatsi icoacaquaerri. Ineshinoncatashijetaquee, yoavisacojeitaquee. ¹⁰ Ipocapaaque quipatsiquica Jeso quirishito, yora oavisacojeitaquee. Meeca ayotasanojeitaquero maaroni imataqueeneri Tasorentsi. Eiro meeca atsaroitsi anceme. Ayojeiti ariorica ancamaque, eiro ajatitsi anti Sharincaveniqui. Cameetsa oni oca icamantajeiteeri: yoaneasanojeitaquee, ancantaitatiyempani asaviquimojeiteeri inampipi.

¹¹ Itiancaquena Tasorentsi noncamantajeiteri atiri oca cameetsatatsiri, aisati noamejeiteri. ¹² Irootaque noneacatsitantarorri maaroni aca caravosoquica. Iro cantaincha te nompashiventeaji. Niotasanotiri yora noquemisantiri: niotaque eiro yamatavitanatsi, irootaque nocantantacariri: "Pinquempoyejena". Niotasanoti inquempoyejena irosati impocantajejeri. ¹³ Queariotasanotaque maaroni noametaquaempi, te namatavitempiji. Pimoncaratero maaroni nocantaquaempi. Pinquemisanteri Jeso quirishito, pinintasanoteri. ¹⁴ Quiso oajeitaquee Ishire Tasorentsi. Timatsi omatacaaquaempi, ari pimamayetero cameetsa.

Jaoca icantajeitiriri Pavoro.

¹⁵ Pioti yojocajeitaquena ashiasati: Jijero, Eromo jeneshi, maaroni. ¹⁶ Nocoaque incavintsayeri Avincatsarite Oneshijoro, aisati ishaninca iriori. Intacotapinitaquena Oneshijoro, te impashiventeaji iquivantana aca caravosoquica. ¹⁷ Itimantacari aca Oromaqui, icoacoayetaquena, irosati ineantapaquenari aca. ¹⁸ Piotasanoti aisati oshequi yamitacotaquena anta Ejesoqui. Coajica, impocajerica Avincatsarite, aitaque incavintaappaajeri.

Icantiri: “Pincantaitatiyempani pantaveeteneri Tasorentsi”.

¹ Meeca, notiom, tempa ineshinoncataquempi Jeso quirishito, irootaque nocantantimpiri pishintsiventeneri maaroni pantayeteneri. ² Timatsi piquemitaquenari, tempa picarajeitaqueri oshequi pashini quemajeitaquenari. Ari poameyeteri pashini ashaninca, inquearioventeneri Tasorentsi iroametante iriori. Irovaajeneri aisati itsipapee oca noametaquempi. ³ Yora soraropee cameetsari ineacatsitimentapinitari ivincatsarite. Pinquempeteari avirori, eiro pitsarotsi pineacatsitimenteari Avincatsarite Jeso quirishito. ⁴ Aisati te riomparitapiniteaji soraro, te impanquiveeteji, irointi apatiro iquearioventiniri iyapitanote inintacairiri. ⁵ Ocameetsati yora aatiquirori perota inquemisanteri yora jivatamacairiri. Eirorica iquemisanteri, eiro ipashiyeetaritsi oca ipapinitiriri anaacotantatsiri. ⁶ Yora panquiveetatsiri, ariorica intsameetacotasano tero ivanquire, ari irayero oshequi oitsoqui, coajica. Te irantsipetearoji itsameetacotiro. ⁷ Pinquenqueshireterasano tero oca noshiacantimpiri, ari iriotacaasanotempiro Avincatsarite.

Pinquenqueshireteri Jeso quirishito.

⁸ Pinquenqueshireteri aisati Jeso quirishito, yora ishanincani Iravirini; yoyevetacari, iro cantaincha itinaanaja aisati. Irootaque oca nocamantapinijeitiriri atiri, iravisacojeitajeari. ⁹ Nocantani noquenquetsatacaajeitiri atiripee, irootaque noneacatsitan- tacarori meeca. Yoisoyeetaquena, iquempetacanteetaquena oayeri. Iro cantaincha tecatsi incanteetero iroisotero irineane Tasorentsi: tempa ovaraanaca irointi. ¹⁰ Paita noneacatsitantacarori maaroni oca? Irio noneacatsitimentiri maaroni atiri icoyaqueri Tasorentsi, incantaitatiyempani irisavacanteeari cameetsa anta inquitequi. Iriotaque Jeso quirishito oavisacoterineri. ¹¹ Queariotaque oca incanteetiri: “Ariorica ancamimenteri Quirishito, ari antsipatapaajeari anta inquitequi, asaviquimotapaajeri. ¹² Ariorica ampomerentsiventeneri antayeteneri paitapeerica meeca, iro cantaincha coajica ancra- ajeiteri ampincatsarijeite. Ariorica ancanteri atiri: ‘Te nioteriji Jeso quirishito’, aisati incantacotee iriori: ‘Apa, te nioteriji yoca’. ¹³ Ariorica amataviteri, iro cantaincha eiro yamataviteetsi inti. Irimoncarataquero maaroni icantaqueeri”.

¹⁴ Tempa icarajeitaquee Avincatsarite. Pincantapiniteri atiri eiro icantavacaimen- tarotsi paitapeerica yoameyetiriri. Yatsipetashitacaro icantavacaimentaro oca, icomi- tacaaricari yora quemajeiterineri. ¹⁵ Pantasanoyeteneri Tasorentsi, incantantempiri: “Cameetsa maaroni pantaquenari”, impoiji eiro otimitsi pimpashiventanteeari. Piotasan- otiro irineane Tasorentsi, meeca poametantero cameetsa; tempa tampatica oametanti irointi. ¹⁶ Eiro pishiretarotsi cantaantsi, eiro picantavacaatsi: pojocacaasanotiricari atiri inquemisanterime Tasorentsi. ¹⁷ Oshiaquero patsaarontsijenca, ariorica aaquee, ontson- canaquee maaroni atseempequiqui, ampatsayetanaque. Yatsipetacaro icantavacaaniro- taca yora Imeneo aisati Jireto. ¹⁸ Icomijejitacaro quearioyetatsiri. Icantaniroti: “Aitanaji. Itinaajeivetaja itsipapee, iro cantaincha eiro atinaajeitajatsi ainti”. Iquenqueshireta- caajeitaqueri maaroni quemajeitaqueriri. ¹⁹ Piotero ocaocantiri irineane Tasorentsi: “Iotasanoliri Tasorentsi maaroni quemisanteri”. Aisati ocanti: “Intimerica can- tatsine: ‘Noquemisanteri Avincatsarite’, ocameetsati irojoquero caari cameetsatatsi yantayetiri”. Aitaque ocantaqueri. Irineane Tasorentsi oshiaquero antearo mapi: te ompashinitapiniteaji.

²⁰ Anta ivancoqui ashitarantincari timatsi oshequi iveratote. Ainiro pinatasan- otachari, yovetsiqueetiro oro aisati perata. Ainiro caari pinatacha, yovetsiqueetiro inchato aisati quipatsi. Ora pinatachari, iveshireimentacaro: icoaque irameniteri maaroni ishaninca. Ora caari pinatacha onantari cajara. ²¹ Ariorica poameetsataquea avisati, pojociquerorica caari cameetsatatsi pantapinijeitiri, ari pinquempetearo perato pinatasanotachari; iriveshireimentempi Avincatsarite, incoaque irineajeitajempi maaroni. Impoiji pimataqueneri paitarica incoacaquempi. ²² Eiro catsini piquenqueshire- tirotsi caari cameetsayetatsi yantayetiri evancaripee. Irointiquea pincoasanotanaque

pincameetsatanaje, pinquemisantasanotanaje, pininteri itsipapee, pincarajeiteri itsipapee cameetsayetatsiri: maaroni yora aventasanotariri Avincatsarite. ²³ Eiro pican-tavacaimentashitarotsi caari ayotasanojeiti: piquisavacaacari. ²⁴ Ariorica antaveeteneri Avincatsarite paitapeerica, te oncameetsateji anquisajeiteri ayemisantaririnte; irointi cameetsa ancaavintsayeri itsipapee, cameetsa avameteri, eiro ashemaritsi, ²⁵ cameetsa avameteri yora quisajeitaqueeri. Cameetsarica avameteri, impoiji ariorica inqueneshiretanaquea, irojocajero caari cameetsayetatsi inquemisantanteearori queariotatsiri. Iramitacoteri Tasorentsi. ²⁶ Yamatavivetacari camaari: Otimaveta icoacaavetacariri, irootaque yantantavetacanariri iriori; iro cantaincha iroavisacoteri Tasorentsi, ariorica inquemisanteri.

3

Jaoca incanteari amatavitantatsineri, coajicani.

¹ Piotero oca: coajica, ariorica omoncarataquea impocantajeari Jesoshi, oshequi ompomerentsitimoteari quemisantatsiri. ² Irisati nintajanchane atiri, incoasanoteri quirequi, irishemete, irishirontimenteari itsipapee, incantimateri Tasorentsi, impiatsateari ashitariri, eiro ipasonquitiritsi neshinoncaterineri, eiro iquenqueshiretiritsi Tasorentsi. ³ Eiro iotrotsi incavintsayeri itsipapee, eiro iotitsi incatsimareajea, incantimatante, eiro ipashiventacaarotsi irantayetero tsinanepee, inquisanaquea, inquisayeteri cameetsayetatsiri, ⁴ iramatavyeteri ishanincasanoripee, irantashiyetearo paitapeerica, eiro iquenqueshiretatsi, irishemetasanote, incoanaque inquimoshiretashitea, eiro icoitsi iroteri Tasorentsi. ⁵ Inquemisantamempeashiteari Tasorentsi, iro cantaincha eiro ipincatsatiritsi. Eiro piquempetaritsi avirori. ⁶ Inqueavancoteri itsipapee atiri, iramatavitateero tsinanepee. Te onquenqueshiretasanoteaji, irootaque irimatanteearori iramatavitateero. Oshequi antaquero caari cameetsatatsi, ocoasanotaque antayetero. ⁷ Oshequi oquemisantashiyetacari pashini oamenirotirori, iro cantaincha te iotasanoteroji queariotatsiri. ⁸ Peerani yora Janeshi aisati Jampireshi ipiatsatacarini Moishishini, te incoacayeriji joriopee inquemisantajeiteri. Aisati iquempetacari meeca yora amatavitantatsiri: te incoacayeriji atiri inquemisantero queariotasanotatsiri. Te oncameetsateji oca iquenqueshireyetaqueri, iquemisantamempeashitaca. ⁹ Eiro icantatianni irimatero oca. Tempa peerani iotacojeitiri yora piatsatacariniri Moishishini. Aisati coajica iriojeitanaque atiri queario yamatavitantaque yora amatavitantatsiri.

Pinquemisantasanotero queariotasanotatsiri.

¹⁰ Piotacotasanoquena. Piotaquero noameyetimpri. Piotaquero nantayeteri. Piotaquero nocoaqueri nomayeteri narori nantayeteri. Piotaque aisati noquemisantaqueri Tasorentsi, noquearioventiniri maaroni, nonintaqueri, te noshemearoji nocatsimentaqueri. ¹¹ Aisati pioti iquishimentapiniyeetaquenaro noquemisanti. Piotaque aisati noquematsicatapinitacaro anta Antioquiaqui, Iconioqui, aisati Irishitaraqui. Oshequi iquisajeitaquena savicajeitatsiri anta. Iro cantaincha yoavisacotapinitaquaena Avincatsarite. ¹² Queario, iquisheetiri maaroni quemisantiriri Jesoquirishito, ariorica icoasanotaque inquemisantasanoteri. ¹³ Aiquero irijatatiye iramatavitasanotante yora caari cameetsatatsi, aisati oametantirori tseeyantsi. Aisati yora camaari iramataviteri iriori. ¹⁴ Aviroquea avinti, pincantaitatiyempani pishiretanaquearo maaroni noamejeitaquemperi. Tempa piotaque eiro namatavitimpitsi. ¹⁵ Peerani, pijananequivetani, yoameyeetaquempiro irineane Tasorentsi. Irootaque oametaquempirori piquemisantaqueri Jesoquirishito, paviscotantajari. ¹⁶ Irootaque Tasorentsi sanquenatacantiquerori irineane, maaroni. Oamejeitaqueero queariotasanotatsiri, terica oncameetsateji antaqueri, ocamantaquee. Oamejeitaquee jaoca ancanteari avameetsatantajeari arosati, aisati oamejeitaquee ancameetsajeitanaque. ¹⁷ Irootaque otimantacari irineane Tasorentsi, ancameetsatasanotantajeari. Impoiji tecatsi ancantea ancomitea, irointi antasanojeitero maaroni icoacaqueeri Tasorentsi.

4

¹ Coajica impocaje Jeso quirishito impincatsaritapaaque. Ariorica impocaje, ari irini-jaajeitapaaqueero yantayetiri maaroni aneajeitatsiri aisati maaroni camajeitantsiri. In-camantajeitee jaoca incantajeiteeri. Ayojeiti icarajeitaquee meeca, aisati icarajeitaquee Tasorentsi, irootaque meeca nocamantantimpiori oca. ² Pinquenquetsatapinitero irineane Tasorentsi maaroni quitaiteriqui. Jaocarica incarateri catsirincaiteri, jaocarica pisaviqueru, eiro catsini pimajeretitsi, irointi pinquenquetsatacayeri maaroni atiri. Terica oncameetsateji oca yantaqueri, ari pincanteri, aisati pintsaroteri. Pincantajeiteri cameetsa irisavicajeite. Jentsiquero poametasanojeiteri itsipapee, eiroquea piquisat-satiritsi. ³ Coajica, ariorica cameetsa avamejeiveteari atiri irineane Tasorentsi, iro can-taincha eirorica iquemisantajeitirotsi. Eiro icoirotsi, irointiquea incoasanojeite oame-jeiterineri tseeyantsi. Irooqua icoasanotaqueri inquemero, irointi. ⁴ Eiro iquemisan-tirotsi irineane Tasorentsi, irointi inquemisantashitearo iquenquetsatashiyetari atiri. ⁵ Aviroquea, avinti, paamaventea: piquempetaricari. Ariorica pincatsitmenteri Avin-catsarite, eiro poashiretatsi. Pinquemisantacayeri itsipapee. Pimatasanotaqueneri Tasorentsi maaroni icoacaquemperi.

Iquenqueshiretiri Pavoro.

⁶ Iro nocamantantimpiori oca, irotantsi iroyeeten, irotantsi nojate narori in-quitequi. ⁷ Nopomerentsiventasanotiniri Avincatsarite, nomataqueneri maaroni ico-ccaquenari, te namataviteriji. ⁸ Coajica, impocajerica Avincatsarite, impashiyetenaro cameetsayetatsiri. Eiro ipanarotsi apaniro narori, irointi impajeiteri maaroni atiri, yora yoameetsantaqueri: arojeitaque maaroni aamaajeitacariri. Tempa cameetsa icantacoventajeitaquee maaroni.

Pashini icamantajiriri aisati.

⁹ Pishintsite pimpoque pineena. ¹⁰ Yora Temashi, icoaque iriveshireimentearo timayetatsiri quipatsiqui. Yojocanaquena, ijatanaque Tesaronicaqui. Yora Quere-sente, ijatanaque Carashiaqui, yora Tito ijatanaque Taramashiaqui. ¹¹ Apanivaniji Irocashi, itsipataquena. Ariorica pimpoque, pamaquenari Maricoshi, oshequi no-coaque iramitacotena. ¹² Aisati ijatanaque yora Tiquico. Notianquiri iriori Eje-soqui. ¹³ Aisati pamaquenaro noicoro noanajiri Toroarequi, otimi anta ivanco-qui Caripio. Aisati pamaquenaro maaroni sanquenarentsipee, aisati novaperitepee. ¹⁴ Yoashinoncaasanotaquena Arijantero, yora vetcicapinitirori ashiro. Coajica iroasan-queteri Avincatsarite. ¹⁵ Paamayeariyea avirori, yoashinoncaimpicari. Oshequi iquishi-mentaquenaro nocantajeitaqueriri.

¹⁶ Ijivatantacari pincatsari isampitacoventana, te intimeji cantacoventenaneri, ishi-apitsajeitanaquena. Te noncoyeji iroasanqueteri Avincatsarite. ¹⁷ Irintiquea irinti, quiso yoana. Itasoncaventaquena, nomatantarori noquenquetsatacajeitiri itsipasati atiri, maaroni. Iroashinonqueetename, iro cantaincha yoavisacotaquena Avincat-sarite. ¹⁸ Ariorica iroashinonqueetaquename aisati, niotaque ari iroavisacotajena aisati; irisavicacayena inquitequi, anta ipincatsaritinta iriori. Tsame ampincatsatasanojeiteri, aitaque ancantaitatiyempani.

¹⁹ Novetsataro Pirishira, aisati iriori Aquira. Aisati novetsatari maaroni ishaninca Oneshijoro. ²⁰ Ainiroquera Erashito, isaviqui anta Corintoqui. Navisantacarori Mireto-qui, noneanajiri Torojimo: ijoquitaca. ²¹ Pishintsite pimpoque, tequeratsita onquimo-jate. Ivetsajeitimpí Eovoro, Pororente, Irino, Iraoria, jeri maaroni ayemisantaririnte.

²² Nocoaque incavintsayempi Avincatsarite, irineshinoncatasanotempi.

Narotaque sanquenatantimpiori oca: *Pavoro*

YORA PAVORO ISANQUENATINIRI TITO

Ivetsatari Pavoro Tito.

¹ ¿Ainirompi Tito? ¿Tecatsimpa oyempine? Narotaque Pavoro sanquenatim-pirori oca. Nocoasanotaque nanteneri Tasorentsi paitapeerica incoacayenari. Itian-caquena Jeso quirishito nonquemisantacaasanojeiteri maaroni atiri, yora icoyeaqueri Tasorentsi. Aisati niotacaasanoteri queariotasanotatsiri inquearioventanteorori in-quemisante. ² Peerani, tequerani irovetsiqueroni quipatsi, icantitacani Tasorentsi: “Noaneasanojeiteri maaroni nocoyeajeitaqueri, nosavicacaajeiteri aca inquitequi”. Te iriotimaterojí Tasorentsi iramatavitante. Ayojeitaque ancantaitatiyempani aneajeitanaje anta inquitequi. ³ Meeca omoncarataca iriojeitanteorori maaroni atiri irineane Tasorentsi, yora oavisacojeitaqueeri. Irootaque itiancantaqueunari noncamantajeiteri atiripee. ⁴ Peerani noquemisantacaquempi, irootaque meeca noquempetacantanta-quempi notomisanori. Nocoaque irineshiloncatempi Tasorentsi, cameetsa irisavica-cayempi, aisati inquempetacayempi Jeso quirishito, yora oavisacojeitaqueeri.

Jaoca incantajeiteari yora jivatacaaajeitiriri quemisantatsiri.

⁵ Peerani nojocanaquempi anta Queretaqui, pamitacotantariri ayemisantaririnte iquemisantasanotantacari. Aisati nocantaquempi: “Ariorica pinquenayetanaque anta maaroni nampitsipeequi, pincoyeajeiteri jivatacaaajeiterineri ayemisantaririnte, yora quemisantacayerineri”. ⁶ Meeca noncamantempi. Te oncameetsateji irijivatacan-tashitea; irointi ariorica cameetsa isaviqui, aisati otimirica ijina aparoni, aisati ocameet-satirica iquemisantajeitaque maaroni itomipee, aisati icantacoyeetiririca itomipee: “Cameetsa iriori, te impiatsatanteaji”, ari iriotaque jivatacaaajeiterineri ayemisantarir-inte. ⁷ Pinequiero, ariorica incoaque irantaveeteneri Tasorentsi, acoajeitaque arori incameetsatasanote. Te oncameetsateji impiatsatantea, inquishempa, irishinquitempa, irantanayeteri itsipapee, iramataviteri itsipapee iraitanteariri iirequite aisati iroaararo. Te oncameetsateji maaroni oca. ⁸ Irointiquea ocameetsati irintacoteari itsipapee, irin-intero maaroni cameetsayetatsiri, inquenqueshiretanaquea, inquemisantasanotanaque, incameetsatasanotaque, iriote iraamaaventea irisati eiro yantantarotsi caari cameet-satatsi. ⁹ Cameetsa inquearioventero inquemisantasanotero irineane Tasorentsi, ora avamejeitaqueriri, irimatantearori iroametantasanotero iriori queariotatsiri. Aisati iriotasanote iroameteri yora tseencantatsiri.

¹⁰ Ainiro oshequi caari quemisantiri jivatacaaajeivtariri, neaveetashitachari, am-atavitantatsiri, maaroni. Aitaque icantajeita yora cantanirojeitashitariri quemisantatsiri: “Pimpeajeitaja jorio, maaroni”. ¹¹ Nocoaque poimajerentanirojeiteri. Yo-jocacaaniroyetaqueri oshequi quemisantatsiri iquemisanti. Te oncameetsateji oca yoametantanirotiri. Apatiroti icoaque iraitashiteari quemisantatsiri iirequite. ¹² Ainiro aparo, yora quenquetsatacainca ishaninca, icanti iriori: “Yashi yoiro queretasati ya-matavitanti, icatsimatanti. Oashenti ini”. ¹³ Queariotaque oca icantaqueri. Ari pintsarotasanojeiteri yoranqui, inquemisantasanojeitanteorori queariotatsiri. ¹⁴ Te on-cameetsateji ashiretashitearo iyenquetsare jorio, aisati icantashiyetari yora tseenquirori queariotasanotatsiri. ¹⁵ Ariorica acameetsati arori, aneacameetsajeiteri maaroni ashancap-ee, eiro aamaajeitaritsi. Iro cantaincha irinti, te incameetsateji, aisati itseencanti, irootaque caari ineacameetsatantari ishanincapee; irointi yaamaashijiteitari. Queario, eiro imatirotsi inquenqueshireyetero cameetsayetatsiri. ¹⁶ Icantanirojeiveta yoranqui: “Niotiri Tasorentsi”, iro cantaincha te irisavique cameetsa, irootaque ayotantacari itseeyani, te irioteriji. Te incameetsateji catsini yoranqui, ipiatsatanta, te irioteji irantero cameetsatatsiri.

¹ Aviroquea, avinti, cameetsa pinquenquetsatero queariotasanotatsiri. ² Poameteri yora antearipee eiro ishinquitatsi, cameetsa irisavique, cameetsa inquenqueshire-tanaquea, inquemisantsasanotanaque, irimintasanotanaqueri itsipapee, inquearioventeneri Tasorentsi maaroni. ³ Aisati pinquempetero anteарopee, poametero cameetsa osavique, onquemisantsasanote. Te oncameetsateji oncantimatante, aisati te oncameetsateji irapinitero quepishijari. Cameetsa osavique iriojeitanteari itsipapee quemisan-tatsiri jaoca incantajeiteari. ⁴ Aisati cameetsa oametero evancaropee onintasanoteri ojime aisati otomipee. ⁵ Oametero aisati onquenqueshireempa, oncameetsate; cameetsa oncoteneri oshaninca, antsiteneri, onquiveneri iitsaare, maaroni oncavintsante, onquemisantsasanoteri ojime. Impoiji tecatsquea incanteetero intseenqueetero irineane Tasorentsi.

⁶ Aisati poameteri evancaripee inquenqueshiretasanojeitanaquea iriori, cameetsa irisavajeite. ⁷ Aisati avirori, cameetsa pisavicanaque, iriojeitanteari atiri jaoca incantajeiteari incavintsante iriori. Cameetsa poametante, tempa piotasanoti yamena-cotimpi Tasorentsi. ⁸ Cameetsa pinquenquetsatacayeri atiri, oncateata eiro otimitsi inquishimentempiri. Impoiji impashiventea coavetachari impiatsatempime, eiro otimitsi incantimatantempiri. ⁹ Pincamanteri pimantaari inquemisantsasanoteri amanantiriri, irimatasanoteneri maaroni icantaqueriri. Te oncameetsateji impiatsateari, ¹⁰ te oncameetsateji incoshiteri. Irointi ocameetsati iriotasanote yora amanantiriri eiro yamatavitirtsí catsini. Impoiji incoasanojeite atiri inquemisanteri yora oavisaco-jeitaqueeri, incantajeite: "Ocameetsati oca iquenquetsatacoyeetiriri Tasorentsi".

Paita ayojeitantacari ineshinoncajeitaquee Tasorentsi.

¹¹ Meeca ayojeitaque ineshinoncajeitaquee Tasorentsi, icoaque iroavisacojeiteri maaroni atiri. ¹² Ari ineshinoncajeitaquee, yoametaquee ajocajero atseencanti, aisati ajocajero icoajeitiri tseencantatsiri. Ayojeiti ocameetsati maaroni quitaiteri anquenqueshire-tanaquea, ancameetsatanaque, anquemisantsasanotanaqueri Tasorentsi. ¹³ Meeca ay-jojeitaque aamaajeitajeari Tasorentsi: yora Avincatsarite Jesoquirishito. Tempa irio oavisacojeitaqueeri. Ayojeitaque impocaje, eiro yamataviteetsi, irootaque aquimoshire-jeitajerri. Aneajeitavajeri, impincatsaritapaaque. ¹⁴ Antapinijeitaquero caari cameetsatatsi, iro cantaincha icamimentajeitaquee yoavisacotantajeitajeri, yoameet-satantajeitajeri, ashanincatasanojeitajerri iriori, acoasanojeitantacari antapinitero cameetsayetatsiri irointi. ¹⁵ Pincamtasanojeiteri maaroni atiri oca nocamantaque-mpiri. Tempa itiancaquempi Tasorentsi, ari pincamtasanojeiteri atiri inquemisan-tasanojeitanaque. Terica oncameetsateji yantayetiri, cameetsa pincamtasanojeri. Eiro pishinetirtsí intseencajeitempi.

3

Pashini icantayetiriri.

¹ Pincamtajeiteri ashaninca impincatsajeiteri maaroni jivatacaajeitiriri aisati pin-catsariventajeitiriri, inquemisantajeiteri. Pincanteri ocameetsati incoajeitanaque irantajeitero cameetsayetatsiri. ² Pincantajeiteri eiro icantimatiritsi itsipapee, eiro iquisatsatavacaajeitatsi, eiro iquisatsi, irointi cameetsa incavintsajaeiteri maaroni atiri. ³ Peerani te anquenqueshireveiteani arori, te anquemisantaveiteani, amatavitanta-veitani, antapinitashiveitaroni maaroni acoanirotashijeitaniri, aisati antashiveitaroni maaroni anintashijeivetaniri. Acantani antapiniveitaroni caari cameetsatatsi, aquisat-sicaveitarini itsipapee, aquisaveitani, aquisavacaajeiveitani. ⁴ Iro cantaincha iotaca-jaiteaquee Tasorentsi, yora oavisacojeitaqueeri. Iotacaajeitaquee icavintsajaeitaquee, in-ntasanojeitaquee. ⁵ Yoavisacojeitaquee. Te antajeivetearoji cameetsatatsiri iroavisaco-jeitanteeri, iro cantaincha icavintsaashijsjeitaquee. Avaotisajeitaca, yoaneasanojeitaquee, opashinishirejeitaquee Ishire. ⁶ Aquemisantajeitaqueri Jesoquirishito, yora oavisaco-jeitaqueeri, irootaque itiancasanojeitantaqueeri Tasorentsi Ishire, te intsaneemparojo. ⁷ Ineshinoncajeitaquee, irootaque yoameetsatantaqueeri, aisati icanti ancantaitatiyem-pani antimajeite inquitequi. Ayojeitaque eiro yamataviteetsi. ⁸ Queariotaque oca

icamantaqueeri. Nocoaque pincantajeiteri quemisantajeitiriri Atasorentsite irimajeit ero maaroni oca, pincamantasanoteri. Ocameetsajeitaque maaroni oca: eiro yatsipetashijeitarotsi.

Jero oca pashini icantiriri Pavoro Tito.

⁹ Eiro pisampitacoventirotsi caari iotasanoyeeti, aisati eiro pishiretashitarotsi iquenquetsatacotashitaniri yora intacaroniri. Eiro piquishimentarotsi isanquenaren Moishishi, eiro piquisatsatimentarotsi. Patsipetashitarocari, eiro oametimpitsi. ¹⁰ Intimerica amatavyeterineri quemisantatsiri inquisavacaajeitanteari, pincamanteri eiro yamatavitanti. Terica inquemisantempi, aparo pampiitasanoteri. Iro cantaincha terica inquemisantempi, eiro picantajiritsi: “Noyemisantaririnte”. ¹¹ Iquemisantiro tseeyantsi iriori. Te oncemeetsateji yantayetiri, ainiro yantane.

¹² Nontianquemperi Aretemashi; tericampa, irioricampa Tiquico. Ariorica pineavaqueri, pishintsite pijate Nicoporishiqui: aitaque pineavaquenari anta. Nocoaque nonquimojantsitacotanaque anta. ¹³ Pintacoteari yora Senashi, aisati Aporo. Yora Senashi ioyeriro icantayetiri pincatsaripee. Pimpavaqueri maaroni coiteimotariri ariorica irovaanajea. Te oncemeetsateji oncoiteimoteari paitapeerica. ¹⁴ Ocameetsati iriojeitanaque ashanincapee arori incavintaantajeite. Ocameetsati iramitacoteri yora ashinoncaincari. Ocameetsati irimayetero maaroni cameetsayetatsiri. ¹⁵ Ivetsajeitaquempi maaroni nocarajeitaqueri aca. Novetsajeitar maaroni quemisantatsiri ara, nintajeitanari. Nocoaque irineshiloncajeitempi Tasorentsi. Narotaque sanquenatimpiori oca: *Pavoro*

YORA PAVORO ISANQUENATINIRI IRIORI JIREMONA

Ivetsatari Pavoro Jiremona.

¹ *¿Savicatsimpi, Jiremona? ¿Tecatsimpa oyempine?* Narotaque Pavoro sanquenatimpiori oca. Nosaviqui meeca aca caravosoquica. Noquenquetsatacotaqueri Jeso quirishito, irootaque yoiminqueanteetaquenari. Nocaratiri ayemisantaririnte Timoteo nosanquenatimpiori oca. Nonintasanotaquempi. Piquempejeitaquena, antaveejeitiniri Tasorentsi paitapeerica. ² Meeca novetsataro Apia, ayemisantaroronte. Aisati novetsatari Ariquipo, yora noshiacantaqueri nosoraroririnte. Yora soraropee iquearioventiniri iyapitanote maaroni icoacairiri. Aisati iriori Ariquipo, imoncarataquena, noqueari-oventajeitiniri Tasorentsi maaroni icoacaajeitaquenari. Aisati novetsajeitari maaroni ayemisantaririnte apatotapinitachari pivancoqui. ³ Nocoaque irineshinoncajeitempi Apa Atasorentsite, cameetsa irisavicacaajeitempi. Aisati inquempetacaajeitempi Avincatsarite Jeso quirishito.

Iveshireimentari Pavoro Jiremona.

⁴⁻⁵ Icamantapiniyeetaquena picantani piquemisantiri Avincatsarite Jesoshi, aisati pintajeitiri maaroni quemisantatsiri yoameetsantiri Tasorentsi. Irootaque nocantapinitantariri Atasorentsite: “Ariove pimatacaqueri Jiremona pamitacotasano teri catsini”. ⁶ Nocantiri iriotacaasanojeiteri maaroni ashaninca piquemisantacaajeitiri. Cameetsa iriotacaasanojeiteri intacotasanojeitee Quirishito. ⁷ Meeca niotaque, nonintane, pinintajeitiri itsipapee quemisantatsiri yoameetsantiri Tasorentsi, aisati piveshireacaajeitari, irootaque noquimoshireimentantaquempi, aisati noveshireimentantaquempi.

Icantacoventiri Oneshimo.

⁸ Nioti naro itiancane Quirishito: ishinetakena noncamantempiro paitarica panteri, ⁹ iro cantaincha anintavacaaca, irootaque caari nocoanta noncantempi: “Jero oca pantayeteri”. Ari nanteashipataque meeca. Noquenquetsatacotaqueri Jeso quirishito, irootaque yoiminqueanteetaquenari caravosoquica. ¹⁰ Timatsi noquemisantacaqueri aca, noshiacantaqueri meeca notomi. Ipajita Oneshimo: iriotaque noncantacoventeri. ¹¹ Te iramitacoveitempiniji, iro cantaincha meeca oshequi iramitacotempi avirori, aisati iramitacotena narori.

¹² Nontiancajeri meeca impiashitanajempi aisati. Nonintasanotaqueri catsini. ¹³ Nocoasanovetaca quiso iroyename aca, iramitacotasano terename aca caravosoquica: onquempeteame arime pintimeme aca, pamitacotename avirori. Noquenquetsatiro irineane Tasorentsi, irootaque notimantacari meeca aca. ¹⁴ Iro cantaincha te nioteji paitarica picori avirori. Te nonintejni noncantasanotempi pintacotena: aviro avinti cantatsine. ¹⁵ Peerani ishiapitsavetaquempi, meeca quea incantaitatiyempani quiso iroajempi. ¹⁶ Peerani pamanantane inaveitani. Iro cantaincha meeca iriotaque piyemisantaririnte pinintasanotajeri. Oshequi nonintiqueru narori, meeca pinintasanotavajeri avirori. Ocameetsati pininteri pamanantane, iro cantaincha ocameetsatasanoti pinintasanoteri catsini piyemisantaririnte.

¹⁷ Pamene, tempa aquempeavacaaca arori. Ari meeca noninti pineshinoncatavaqueri, pinquempetacantename pineshinoncatavaquenam naroricame areetapainchaneme. ¹⁸ Ariorica icoshitaquempi, aisati ariorica irevitaquempi, ari pincoacotenaro narori maaroni. ¹⁹ Narotaque nainti Pavoro sanquenatimpiori oca. Nompinaventajeri paitapeerica irevitaquempi. Pinquenqueshiretero oshequi nocavintsaquempi: pioti eirome notimime, eirome paviscotajime. ²⁰ Tempa, nonintane, piquemisantiri Avincatsarite, meeca nocoaque pincavintsayena narori. Tempa piquemisantiri Quirishito, meeca nocoaque piveshireacaajena.

²¹ Niotaque ari pinquemisantena, irootaque nosanquenatantimpiori oca. Aitaque niotaque ari pimateno maaroni nocantaquempi, aitaque povanaashitavaqueanari maaroni nocantaquempi. ²² Aisati nocoaque pivetsiquenaro nosavicantapeempari. Niotaque ariorica pincanteri Tasorentsi, irishinetena noneajempi aisati. ²³ Ainiro

nocarataqueri Epajarashi aca caravosoquica. Iquempetaquena iquenquetsatacotiri Jesoquirishito, irootaque yoiminqueanteetacariri iriori. Ivetsatimpi.²⁴ Aisati ivet-sajeitaquempi Maricoshi, Arishitaraco, Temashi, Irocashi, maaroni. Icarajeitaquena nantajeitiniri Atasorentsite paitapeerica.²⁵ Nocoaque irineshiloncatempi Avincatsarite Jesoquirishito.

Narotaque sanquenatimpiori oca: *Pavoro*

ISANQUENAYEETINIRI IJORIORIRINTE

Yanaacotaqueri Quirishito itsipapee itiancanepee Tasorentsi, ipincatsaritasanoti.

¹ Peerani yora Tasorentsi yoamejeitaqueri yora quenquetsatacantayetatsiniri. Aparopee ineasanotiri Tasorentsi, irio itsipa iquemashitacari ineanatiri, irio itsipa ineiri inampire, irio itsipa aisati imishitacaacari, maaroni. Aiquero yovainiri, aiquero yovainiri, yoamejeitaqueri. Impoiji iriori yovaajeitaqueneri yora ashanincapeeni. ² Meecaquea yoametasanojeitaquee itemisanori iriori Tasorentsi. Tempa iringa que irinti anaacojeitiriri atiri ipincatsariti. Icantiri peerani: “Notiomi, aviro vetsiqueroneri quipatsi, inquite, maaroni; pincantacantayetero maaroni”. Ari imoncarataqueneri icantaqueriri. ³ Ishiasanotaqueri iriri, ishipaquirereasnotaque, ipincatsaritasanotaque. Tempa yanaacojeitiri atiri ipincatsariti. Arriorica irinintanaque irimayetaquero paitapeerica, infasoncaque. Ari imajeitaquero maaroni icantajeitiri catsini: apatiro ineanataque, mataca. Peerani ainironi antayetironi caari cameetsatatsi, irootaque caari acameetsatantaveitani. Iro cantaincha ipocaque irinti icamimentajeitaquee yoameetsajeitajeeeri. Iopianaja aisati anta inquitequi, isavicapaaaji iracosanoriqui Tasorentsi, icaratiri ipincatsarijeiti.

Yanaacotaqueri Quirishito inampirepee Tasorentsi, ipincatsaritasanoti.

⁴ Irisati aisati anaacojeitiriri inampirepee Tasorentsi, ipincatsaritasanoti, tempa icantiri Tasorentsi: “Notomi”. Ishanincatasanotacari. ⁵ Icantirimpa Tasorentsi inampire: “Aviro notomi, meeca notomintaquempi”? Te intominteariji inampirepee, irintiquea irinti Quirishito. ⁶ Icantirimpa inampirepee: “Narotaque pirintajeitari, notomintajeitaquempi”? Te incanteriji. ⁷ Aisati peerani, ipocantacari itomi quipatsiquica, icanti: “Nocoacaajeitaqueri maaroni nonampirepee impincatsajeiteri notomi”. ⁸ Icantiri Tasorentsi: “Notiancapinitiri nonampirepee yovaajiniri ashaninca noneane, ishintsitasanojeiti. Ainiro shiaarantaquerori paamari”. ⁹ Iro cantaincha icantiri Itomi irinti: “Oshequi pipincatsariti, oshequi pitasorentsiti: pincantaitatiyempani. Ocameetsatasanotaque pineane, oqueariotasanotaque. ¹⁰ Oshequi pinintacaajeitaqueri atiri intime cameetsa; te pinintacaajeiteriji catsini irantero caari cameetsatatsi. Noveshireacaasanotaquempi, panaacojeitaqueri itsipapee piveshireasanotanaca avinti”. ¹¹ Aisati icantiri: “Pincatsari”; tempa icantiri: “Oshequi pipincatsariti avirori. Peerani povetsicaquero quipatsi, inquite, aisati maaroni timantajeitarori. ¹² Coajica ompeajeitanajea, irompa avinti pincantaitatiyempani pintime. Oquempeta maatsaraantsi yojoqueetiro irantajeari iroquerari, aisati pinquempetacantajero iroori quipatsi: pojocajero povetsicantajeari pashini. Irompa avinti, eiro pipashinitatsi, eiro pipeatsi catsini”. ¹³ Icantirimpa Tasorentsi inampire: “Pisavique nacosanoriqui irosati impincatsarijeitantanempiri quisajeivetimpiri”? Te incanteriji, irinti icanti itomi irinti. ¹⁴ Tempa irio inampirepee antayetiniriri icoacaajeitaqueriri: yamenacoventajeitaqueri maaroni yora oavisacotajanchaneri.

Ocameetsati anquemisantasanojeiteri Itomi Tasorentsi.

¹ Icoacaasanojeitaquee Tasorentsi anquenqueshiretasanotero maaroni icantajeitaqueeri Itomi: tempa oqueariotasanotaque, te oncemeetsateji ampeacotearo icantajeitaqueeri. ² Tempa oqueariotasanotaque maaroni icantajeitiriri inampirepee, aisati yoasanquetaajeitaqueri Tasorentsi maaroni caari quemisantajeitavaqueri: inecarove.

³ Meeca oshequi ipomerentsiventajeitaquee Itomi yoavisacojeitajeeeri. Arriorica antseenajeiteri, pijitimpaa eiro yoasanquetaajeiteetsi iriri? Ijivataque Avincatsarite iriori yoamejeitaqueri iroamerepee jaoca ancantajeiteari avavisacotantajeitajeari; impoijiquea yovaajeitaqueero arori yora quemajeitaqueriri. ⁴ Janicarica icoacaapiniyetiri Tasorentsi itasoncantayeti, imatacaaqueri; aisati omatacaaajeitiri

Ishire paitapeerica, caari amati arori. Ari aneajeitaqueri, ayojeitacari queariotaque icantiri Tasorentsi.

Coajica impincatsajeiteri maaroni atiri Jesoshi.

⁵ Ari meeca nonquenquetsatacotoero pashini quipatsi onta inquitequiniri: ora asavicajeitantaajeari coajica. Eiro anta ipincatsariventajeitajeetsi inampirepee Tasorentsi, ⁶ eiro catsini. Tempa peerani icantirini Iravirini Tasorentsi: “Te nonquempetempiji avinti, te nontasorentsiteji narori. ¿Paita piquenqueshiretantranari? Tecatsi pinquenqueshirementenari. Aisati, ¿janicampa yora poneachaneri inquitequi, yora atiratapaatsineri? ¿Paita pineacameetsatantariri iriori? ⁷ Ariorica impocapaaque quipatsiqui, eiro imoncaratapajaritsi pinampire ipincatsariti. Iro cantaincha eiro osamanitasanotitsi iranaacotajeri aisati, impincatsaritasanotaje. Pisavicacaajeri cameetsa, pimpeajeri pincatsarisanori. ⁸ Pincanteri: ‘Pincantacantajeitero maaroni. Ari impincatsajeitempi maaroni timajeitajantsineri’”. Irootaque isanquenatiniri Iravirini. Pinequero, icantiri: “Pincantacantajeitajero maaroni, impincatsajeitempi maaroni timajeitajantsineri”. Tequera omoncarateaji maaroni, iro cantaincha ⁹ ayojeitaque peerani iponeanaca Jesoshi inquitequi, ipocaque quipatsiqui. Te impincatsaritasanotapeeji, te irimoncaratapajariji inampire Tasorentsi ipincatsariti. Oshequi yoashinonqueevetacari, icamimentajeitaquee, irootaque caari ajajeitantea Sharincaveniqui. Irio tiancaqueriri Tasorentsi ayojeitacari oshequi ineshinoncajeitaquee. Meeca cameetsa isavicapaaaji inquitequi, ipincatsaritasanotapaaji aisati.

Icamantaquee paita icamantacari Jesoshi.

¹⁰ Ari yovetsicajeitaquee maaroni, irootaque meeca ampincatsajeitainteariri maaroni; tempa itasoncaquee atimajeitacari meeca. Oshequi iquematsicatimentajeitaquee, irootaque ocameetsatantari ampincatsajeiteri, avavisacojeitajeari; tempa aitaque icoaque intomintajeitajee Tasorentsi maaroni, icoaque iraajeitajee inquitequi. ¹¹ Ari yoameetsajeitaquee Jesoshi, meeca acantajeitiri Iriri iriori: “Apa”. Irootaque caari ipashiventacantee Jesoshi icantajeitee: “Iye”, aisati: “Tsio”. ¹² Tempa ocanti Sanquenarentsi: “Icantiri Quirishito Iriri: ‘Noncamantajeiteri iyepree aisati tsiopee jaoca picanta; noncarajeiteri nompampoyaventajeitempi’”. ¹³ Ocanti pashini Sanquenarentsi: “Noncarajeiteri iyepree aisati tsiopee nonquemisantajeiteri Tasorentsi”. Iro pashini ocanti: “Apa, pinequena aca, nocarajeitiri aisati pitomipee, aisati pishintopee. Irootaque pitimacantacariri noshanincajeitajeari”. ¹⁴ Arojeitaque atiri itomipee Tasorentsi, irishintopee; caamaneri anajeitaque. Ari iquempejeitapaaquee Jesoshi, icamimentajeitaquee. Intsoncajeiteri camaari, coavetachari iroajeiteeme aisati iraajeitanaqueeme Sharincaveniqui. ¹⁵ Peerani atsaroacaajeiveitaroni ancamajeiteme, acantatiani; meeca te antsaroajeitanajeji, irointi aveshireajeitanaja. ¹⁶ Te irio irintacotapeempa Jesoshi inampirepee Tasorentsi, antiquea intacojeitapaaaca aroripee: maaroni joropee. ¹⁷ Ari yatiritapaaque, irirentijeitapaaquee; iquempejeitapaaquee arori, irootaque iotantacari ineshinoncajeitaquee aisati icantaqueri Tasorentsi irineshinoncajeitee iriori. Aisati imajeitaqueri maaroni icoacaajeitaqueriri Tasorentsi, icamaque yoameetsajeitancariri maaroni antirori caari cameetsatatsi, meeca yaacameetsajeitaquee Tasorentsi. ¹⁸ Oshequi iquematsicacaro iriori; aisati ineantavetacari camaari, irantacayerime caari cameetsatatsi. Meeca aroripee, ariorica anquematsicayetearo paitapeerica, aisati ariorica irineantavetaquee camaari, ioti irinti Jesoshi aitaque ocantari. Irootaque iotantacarori intacojeitaquee.

Yora Quirishito, yanaacotaqueri Moishishini ipincatsariti.

¹ Meeca, noyemisantaririnte, noncamantempi te pinquempejeiteariji yora caari quemisantatsi: icoyeajeitaquempi avinti Tasorentsi pintsipajeitainteariri anta inquitequi. Pinquenqueshirejeitanaqueri Jesoshi, jaoca icanta: iquempejeitacari maaroni itiancaneppee Tasorentsi, icamantajeiteero maaroni icoacaaqueeri Tasorentsi. Aisati iquempetacari yora ivincatsarite saserote: yovaajiniri Tasorentsi acoacotiriri arori.

² Peerani yora Tasorentsi icantaqueri Moishishi: "Cameetsa poamejeiteri pishanincaphee, piotacaajeiteri maaroni noocoacaajeitaqueriri". Ari iquearioventaqueneri Moishishi maaroni icantaqueriri Tasorentsi. Yora Jesoshi yanaacotasanoquaqueri Moishishi, iquearioventasanoquaqueri Tasorentsi maaroni icantaqueriri, catsini. ³ Tempa aneacameetsatasanotiri yora vetsquirori ivanco: te aneacameetsatasanoteroji ivanco irointi. Tempa irio iotatsiri irinti yovetsiqui: te ioteji pancotsi overtsicajeja irosati. Aisati ocameetsati aneacameetsatasanoteri Jesoshi, oshequi ipincatsariti; eiro aneacameetsatasanotirtsii Moishishi irinti, te impincatsaritasanoteji. ⁴ Timatsi vetsquirori maaroni pancotsipee, iro cantaincha yovetsicajeitaqueri Tasorentsi maaroni timajeitatsiri, catsini. ⁵ Ari cameetsa iquearioventiniri Moishishi Tasorentsi maaroni icoacaayetaqueriri, iro cantaincha iquempetacari inampire. Intavetacaro yoamejeitaquee capichaji yantayetiri Tasorentsi.

Iquisaqueri Tasorentsi tseenquiriri aisati piatsatariri.

⁶ Iro cantaincha, Quirishito irinti, iquearioventasanoquiniri Tasorentsi maaroni icoacaajeitaqueriri. Caari ini inampire, irinti itomisanori. Ariorica ancanteani ashirejeiteeari, ayojeitaque iraajeitanaquee anta inquitequi, irootaque ocameetsatantari anquimoshirejeite, impoiji ayojeitaque ashanincajeitacari Tasorentsi. ⁷ Jero oca osanquenatacaaqueriniri Ishire Tasorentsi yora Iravirini: "Meeca pinquemajeitavaquero icantiri Tasorentsi. ⁸ Eiro piquishiritsi, eiro pitseenquiritsi: eiro piquempetaritsi yora piatariniri peerani. Ipiavetacari peerani Tasorentsi anta caaraiteriqui, ijivetani eiro yoasanquetairitsi. ⁹ Icantini iriori: 'Queario ipiajeivetaquena narori pishanincani peerani. Ocarataque 40 osarintsi natsipetashita notasoncacoventiri. ¹⁰ Iro cantaincha ipiajeitaquena, irootaque noquisajeitancariri narori, nocantaquerini: Oshequi pitseencaquena, te pinquenqueshiretenaji. Te pincoajeiteji piojeite pitarica noocoacaajeitaquemperi. ¹¹ Noquisaqueri, irootaque nocantasanoquatancariri: Eiro pareejeitatsi anta Canaqui, aisati eiro pareejeitatsi aca ocameetsaitetica'. Irootaque isanquenatiniri peerani Iravirini.

¹² Queariompia, noyemisantaririnte, pitseenquiricari Tasorentsi: te oncameetsateji. Yanei irinti, icantani. Iro cantaincha ariorica pintseenqueri, pimpeacoteari: eiro piquenqueshiretajiritsi aisati. ¹³ Irinti ocameetsati meeca pinquemisantacaapiniteri pishaninca maaroni quitaiteri: coajica eiorica pimatirotsi. Eiorica iquemisantajeiti meeca, incanteani irampiitapinitero caari cameetsatatsi, irametearo: impoiji oshequi iramatavitaquea, eiro icoitsi catsini inquemisante. ¹⁴ Ariorica ancantaitatiyempani ashireteari Quirishito, ayojeitanaque ancarajeiteri ajajeitanaque inquitequi: eiro yamataviteetsi. ¹⁵ Iro cantaincha pinquenqueshiretajero isanquenatiniri Iravirini: "Meeca pinquemajeitavaquero icantiri Tasorentsi. Eiro piquishiritsi, eiro pitseenquiritsi: eiro piquempetaritsi yora piataracariri peerani".

¹⁶ Peerani yora ejipitosati oshequi yoashinoncaajeitaqueri maaroni intacantajeitaqueri. Ari icantajeitiri Moishishi: "Tsame, naajeitanajempi pashiniqui quipatsi, cameetsaquea asavacajeitajeari". Icantajeiti: "Cameetsa, tsame ajajeite maaroni". Iro cantaincha tempa iriojeitaque piajeitacariri Moishishi aisati Tasorentsi. ¹⁷ Irootaque ishemantacariri Tasorentsi. Ocarataque 40 osarintsi ishemacari. Oshequi yantajeitaquero iriori caari cameetsatatsi, irootaque ishinetantacariri icamajeitaque anta caaraiteriqui. ¹⁸ Te inquemisantajeiteriji, irootaque icantasanotantariri: "Eiro pareejeitatsi anta ocameetsaiteti". ¹⁹ Pinequero, itseencajeitaqueri Tasorentsi, irootaque caari yareejeitanta iriori anta ocameetsaitetinta.

¹ Pamene, icantajeitaquee Tasorentsi: “Ariorica pinquemisantajeitena pisaviquimo-jeitena aca nonampiqui, aca ocameetsaitetica”. Iro cantaincha queariompia, piquem-petaricari yora peeraniniri caari areetachani. ² Ocameetsatasanotini ora icashiacaave-tacariniri Tasorentsi, aisati ocameetsati oca icashiacaajeitaqueeri arori. Iro cantaincha te inquemisantajeiteni iriori, irootaque yatsipetashitantacarori icamantiri.

³ Ariorica aquemisantasanaqueri Tasorentsi, ari areetasanotaquea anta ocameet-saitetinta, iro cantaincha eiro yareetatsi yora caari quemisantiri. Tempa icantaquerini Tasorentsi: “Noquisaqueri, irootaque nocantasanotantariri: ‘Te pinquemisantenaji, irootaque eiro pareetantatsi anta ocameetsaitetinta’ ”. Peerani, tequerani irovets-iquieroni quipatsi, yovetsiquitavetanari irisavicanteameri, iro cantaincha te iraree-jeiteaji. ⁴ Ayojeitaque yovetsicajeivetacaro maaroni, moncarataca. Tempa ocanti Sanquenarentsi: “Ocarataque 6 quitaiteri yovetsicajeitasantacarori Tasorentsi maaroni; moncarataca. Impoiji, quitaiteri 7 yoipacaquero yovetsicantaque, ari ocarati”. ⁵ Ari yovetsicavetanari, iro cantaincha te inquemisantajeiteriji iroripee, irootaque icantan-tari aisati Tasorentsi: “Eiro catsini yareejitatsi aca ocameetsaitetasanotica”. ⁶ Ari ocameetsataque ora icantaqueriniri Tasorentsi, iro cantaincha eiro yareejitatsi iriori yora icantaqueniri: pineaquero, te inquemisantajeiteji. Iro cantaincha intimaarantaje areetajanchaneri. ⁷ Icanti Tasorentsi: “Meeca quea nocoacaajeitaqueri atiri inquemisantajeiteni irareejitantajeari jenoqui”. Irootaque isanquenatacaaqueriniri Iravirini: “Meeca, ariorica pinquemavaqueri Tasorentsi inquenquetsatacayempi, eiro piquishir-itsi, eiro pitseenquiritsi”.

⁸ Arime irareetacaajearime Josoe ishanincapée anta ocameetsaitetinta, ¿arimpa im-poiji irisanquenatacaaquerime Tasorentsi Iraviri: “Coajica irareejitea quemisantajeitanari anta ocameetsaitetinta”? ⁹ Irootaque ayojeitasantacari coajica ajajeitaje maaroni quemisantatsiri anta ocameetsaiteti, eiro anta apomerentsitapaaajatsi antsameejeitaje. ¹⁰ Peerani itsoncantacarori Tasorentsi yovetsicayetaque, yoipacaquero, tecatsi irantaje aisati. Aisati arorije, ariorica ajajeite iroriquinta, anquempejitetapaaajeari, amaorea-jeitapaaaje, tecatsi antajeitapaaaje. ¹¹ Tsame ancoasanojeitajero areejitajea anta: eiro apatsataritsi, eiro atseenquiritsi. Eirorica aquemisantasanojiri, eiro areetajaritsi. ¹² Aneatsiri ini Tasorentsi, oshequi itasorentsi; imatasanotaquero maaroni icantajeitiri. Tecatsi ompomerentsitimoteari, ioti jaoca ocantari aquenqueshireantari aisati ashire; ioti catsini jaoca acantari; iotiro maaroni aquenqueshirejeitiri aisati maaroni acoajeitiri. ¹³ Tecatsi materone irimanapitsateari: ineasanojeitaquee maaroni; jaocarica asavica-jeitiri, ineajeitaquee. Itsoteayetiro quipatsi, maaroni; iquenqueshirejeitaquee maaroni.

Yora Jeso quirishito iquempevetacari ivincatsarite saserote.

¹⁴ Ari ijataji Jessoshi anta inquitequi, itsipatapaaajari iriri, yora Tasorentsi. Ainiro meeca icantiri Iriri: “Pincavintsaajeiteri quemisantajeitanari”, iquempevetacari yora ivincatsarite saserotepee, irootaque ocameetsatantari ancantaitatiyempani anquemisantajeit-eri. ¹⁵ Yatiritapaaqueni peerani, iquematsicayetacaro paitapeerica, aisati yora caamari iriori irantacayerime caari cameetsatatsi, iro cantaincha tecatsi irante. Iotitantaque-erori irinti maaroni aquematsicayetari aisati jaoca icantaqueeri camaari. Ioti opomer-entsitimoeitaquee, iro cantaincha icavintsaasanojeitaquee. ¹⁶ Eiro meeca atsaroa-caajeitajaritsi anquenquetsatacayeri Tasorentsi: ayojeitaquee irineshiloncaajeitaquee, incavintsaasanojeitaquee. Eiro ishineteetsi ashinoncaajeitea.

Icoacaqueriri Tasorentsi yora ivincatsarite saserote.

¹ Ari ipeaqueri Tasorentsi atiri ivincatsarite saserote, icoacaapinitiri iramanacoven-tajeitee arori. Irio vaqueneriri Tasorentsi paitarica apajeitiriri. Antajeitiro caari cameetsatatsi, irootaque maaroni osarintsi yoantanariri saserote Tasorentsi aparoni vi-rantsi cameetsari, itaaqueneri. Impoiji yaacameetsajeitaquee maaroni quemisantatsiri, iquempetacantajeitaquee te antajeiteroji caari cameetsatatsi. ² Ari iquempejeitaquee arori, atiri ini; te irimateroji intime cameetsa catsini, irointi timatsi yantiri iriori caari cameetsatatsi. Irootaque iotantacari icavintsaajeitaquee ariorica antero arori caari

cameetsatatsi. ³ Aisati ariorica yoiniri Tasorentsi ovisha, iquenqueshiretiro antanepee arori, aisati irantane iriori. ⁴ Te irisati peashitachane ivincatsarite saserote, irinti peaqueri Tasorentsi; oquempetaca peerani ipeaqueri Aaro isaserotetantacari.

⁵ Aisati iquempetaca Quirishito: te irisati peashitachane quempetearine saserote, irinti peaqueri Apa Tasorentsi. Tempa icantiri peerani: “Aviro notomi, meeca quitaiteri notomintaquempi”. ⁶ Pashini aisati icantiri: “Pincantaitatiyempani pisaserotetanaque, pinquempeteari iriori Merequiserequi”.

⁷ Peerani, yatiritantapaintaniri Quirishito, oshequi iquenquetsatacapinitiri Iriri, iraanasnotacani, aisati ijajuitacani; icantiri: “Apa, ariorica noncame niotaque pimatajena pointinaajena”. Ari oshequi ipincatsataqueri Tasorentsi, irootaque imatantacarori iriori icoacairiri. ⁸ Queario, itomi Tasorentsi ini, iro cantaincha iquemisantiri Iriri, irootaque iquematsicatantacarori paitapeerica. Meeca ariorica anquemisante arori, aisati anquematsictearo paitapeerica, iotiro irinti jaoca ocantari. ⁹ Ari imatasanotaquero maaroni icoacairiri iriri, iquemisantsanotaqueri: irootaque imatantarori aisati yoavisacojeitiri maaroni quemisantasanojeitiriri iriori. Meeca eiro ajajeititsi Sharincaveniqui, ainti ajajeite inquitequi, ancantaitatiyempani asavicajeitapaaje. ¹⁰ Iriotaque ishiacantaqueri Tasorentsi ivincatsarite saserote, icanti: “Irio iquempetaca notomi Merequiserequi iriori”.

Tequera inquemisantsanote yora isanquenatiniri.

¹¹ Nocoavetaca nontsoteajeitempirome maaroni oca, noametasanojeitempirome. Ottimaveta piotantavetari, iro cantaincha te pinquemisantavaquenaji, irootaque caari piquemantavacaro. ¹² Oncameetsateme poamejeiterime meeca itsipapee, iro cantaincha ainirotatsi picoajeiti oamejeitempineri. Picoajeiti nampitajempiro caari pomerentsitatsi. Piquempetacari jananequi: coatsimpi pantsomite, te paveeroji pantsiquero poyeari. ¹³ Queario, piquempejeitacari jananequi, coatsimpi pantsote: tequera pio-tasanojeitero Irineane Tasorentsi oamejeiteeri jaoca ancanteari ancameetsajeitanta-jeari. ¹⁴ Piotasanoterime Tasorentsi, pincoajeiteme poyeari pantsicasanoterime. Pio-taqueme paita cameetsatatsiri antajeitaqueri, aisati piotaquerome caari cameetsatatsi eiro pantirome.

6

Icamantiri sanquenatirori paita isanquenatantanariri.

¹ Eiro napiitapinitajimpirotsi oca noametacotapinitiriri Quirishito: te ompomerentsiteaji. Eiro meeca picantajanatsi: “Pampiitapinitajenaro”. Ocameetsati aiquero pijatatiye piotasanotanaquero maaroni icoacaajeitaquempiro Tasorentsi. Nocantimpini peerani: “Eiro pantashiyetarotsi paitapeerica, eiro oavisacotimpitsi: tecatsi pincantea poavisacotajea avisati. Ocameetsati pinquemisanteri Quirishito pavisa-cotanta-jeari. ² Pivaotisatimentajeiteari iriojeitanteari atiri piquemisantiri. Ariorica pincanteri Tasorentsi iramitacoteri piyemisantaririnte, pipamijeitaqueri. Ariorica ancamajeite antinaajeitanaje aisati, impoiji incantacoventajeitee Tasorentsi”. Ari eiro napiitajimpirotsi oca piotitaniri, ³ irointi ariorica irinintacayena Tasorentsi, noametempiro iroquerari, caari piquemapiniti.

⁴⁻⁶ Pamene. Ainiro ashainca quemavetaroniri irineane Tasorentsi, iveshireimen-tavetacari Tasorentsi, amitacovetacari Ishire iroori. Iovetaca ocameetsati irineane Tasorentsi; iovetaca coajica impincatsariventajeitee Quirishito. Iro cantaincha yojocajiro iquemisantaveitani. Ariorica yojocajiro iquemisantiri Itomi Tasorentsi, oquem-petaca icoaque irampiitajerime aisati impajacotacantajeri. Itseencaqueri, icoaque intseencaajeiteri itsipapee atiri, irishirontimentajeitanteeariri Quirishito. Ari tecatsi incantajea inquemisantsanotaje yora quemisantaveitachaniri. Queariyea, piquem-petaricariye avirori. ⁷ Ariorica cameetsa oparii incani quipatsiqui aisati onintiro pan-quirents, otimaque yoajeitarri yora panquitirori. Tempa iriotaque Tasorentsi oameet-santirori quipatsi onintantarori panquirents. ⁸ Iro cantaincha ariorica pineaquero oantsiqui saveshiniro aisati otsipapee totsequishi, tempa picanti: “Te oncameetsateji, tsame anquiacojetero, antaajeitero maaroni”. Queariyea, piquempetarocari avirori, irointi pinquempetearo cameetsari quipatsi.

Iveshireacaacari yora isanquenatiniri.

⁹ Ari nocantavetaquempi: “Pitseenquicari”, aisati nocantimpi: “Piquempetarocari quipatsi oshiocantari saveshiniro”. Iro cantaincha, noshaninca, nonintajetaquempi. Naamaaca cameetsa pisavicajeitaque, aisati iroavisacojeitempi Tasorentsi.

¹⁰ Tempa icameetsataque, eiro ipeacotarotsi maaroni pantiniriri: ioti piquearioventaquero icoacaimpiri, ioti picavintsaajeitiri piyemisantaririnte, picantani. ¹¹ Nocoacaasanojeitaquempi pinquearioventajeitero pinintajeiteri itsipapee, pincanteani, irosati omoncaratanteari impinatantempiri Tasorentsi. ¹² Eiro piperaventarotsi icoacaimpiri Tasorentsi, irointi pinquempejeiteari yora itsipapee quemisantanotiriri, quearioventiniriri maaroni icoacajaeitiriri iriori. Queario irineajeitero maaroni icashiacaajeitaqueriri.

¹³ Pamene, ariorica ancoaque ayotacaasanoteri itsipapee ashinanca queario oni acantaqueriri, acantiri: “Ioti Tasorentsi queario oni oca nocantimpi. Yanaacojeitaquee irinti, ipincatsaritasanoti. Ariorica namatavitempi, yoasanquetanacari”. Timatsi meeca icantaqueeri Tasorentsi, iro cantaincha tecatsi anacoterine irinti, tecatsi oasanquetay-erine irinti. Apatiro icantiri Avarama: “Queario oca noncamantempiri nainti, tempa naro Tasorentsi: eiro nopashiniyetiroti noneane”. ¹⁴ Impoiji icantiri: “Queario, non-tasoncacoventempi, oshequi nintacotempi; aisati noshequiaqueri pishaninca”. ¹⁵ Ari yoyeanotaqueri Avarama, impoiji ineasanotaquero maaroni icashiacaairiri. ¹⁶ Tempa ariorica ancoaque ayotacaasanoteri itsipapee ashinanca queario oni acantaqueriri, acantiri: “Ioti Tasorentsi queario oni oca nocantimpi. Yanaacojeitaquee irinti ipincatsaritasanoti. Irimatacayena nontsoteaqueempiro maaroni nocantimpi. Ariorica namatavitempi, iroasanquetaquena iriori”. Ariorica ayotaque ipincatsatasanotaque Tasorentsi, ari ashiretasanotearo icantaqueeri. ¹⁷ Ari otimini icashiacaajeitacariniri Tasorentsi yora peeraniniri. Icoqueni iriojeite eiro yamatavijeitirts, irootaque ican-tasanotantariri: “Queario oca noncamantempiri nainti, tempa naro Tasorentsi: eiro nopashiniyetiroti noneane”. ¹⁸ Ari oqueariotasanoque irineane Tasorentsi: te irioteji intseeya. Iro cantaincha aisati icantini: “Queario oca noncamantempiri”, ayotasano-jeitacari eiro catsini yamatavitantitsi. Meeca, ariorica aventeari iroavisacojeitjee, ayotasanoque irimataqueero oca icantaqueeri: iroavisacotasanojeitee. ¹⁹ Ariorica ayojeitaque avavisacotaca, tempa aveshireasanotaca, eiro aquenqueshiretajatsi aisati. Ayojeitaque ocameetsataque anquenquetsatacacjeiteri meeca Tasorentsi, aisati coajica areejeiteari: tecatsi ticavaqueene. ²⁰ Ijivajeitanaquee Quirishito, icamantacoventaquee: iquempetaci yora Merequiserequi, ivincatsariteni saserote peerani.

7

Yora Merequiserequi yanaacojeitaqueri isaserotetasanoque maaroni ishanincani Irevi.

¹ Ari meeca nonquenquetsatacoteri yora Merequiserequi: peerani ipincatsarivent-a-jeitaqueri yora saremisati. Aisati Tasorentsi iriori, yora savicatsiri inquitequi, ipeaqueri saserote, icanti: “Irio saserotetatsine yoca”. Ari itimi pashiniqui nampitsi Avarama. Ya-jeitanaqueri iratiritepee, ijajeitanaque imanajeitiri yora iisaneeentane, yora noshiquiriri itomitsori: oshequi inajeiveta, iro cantaincha ipoyereajeitaqueri maaroni, ivincatsarite-peee, maaroni. Ari ipianaja Avarama, yoipiajiri itomitsori, aisati yamayetajiro ivararoni yora yovaitiri. Ipiantajari, itonquiotavacari Merequiserequi, icantiri Tasorentsi: “Pin-tasoncacoventeri Avaramaca cameetsa irisavicanteari”. ² Impoiji yaarantaji Avarama vaararontsi, ipaarantaqueri, icantiri: “Jeroca irashi Tasorentsi”. Otimirica 10, ari ipaqueri aparoni. Ari ipajita iriori Merequiserequi. Acantiri aneanequi: “Cameet-satatsiri”. Ipincatsariventajeitiri saremisati. Ocantiri Saremi aneanequi: “Cameetsa asavicajeiti”. ³ Ora sanquenarentsi tecatsi onquenquetsatacoteri iriri Merequiserequi. Tecatsi onquenquetsatactero iriniro, icharine, tecatsi. Tecatsi onquenquetsatacoteri itimantacari aisati icamantacari. Oquempevetaca icantani itimini, irootaque ishi-antacariri itomi Tasorentsi; icantani iriori isaserotetanaque, icantapinitiri Tasorentsi: “Pintasoncaventeri maaroni quemisantanari”.

⁴ Pineaquero, oshequi ipincatsaritini Merequiserequi. Intacantajeitaqueeniri peerani Avaramani, iro cantaincha ipincatsatiri, aisati ipaarantaqueri ivaararoni imanatiniri.

⁵ Pamene, impoiji catsini itimi ishanincani Avaramani: yora Irevi. Isanquenatacaaqueri Tasorentsi Moishishi, isanquenatantarori: “Icoaque Tasorentsi impeaquea ishanincani Irevi saserotetatsineri. Nocoaque maaroni ijorioririnte impaarantteri iriori ivararo, ivira, maaroni: intimerica 10, ari imperi aparoni”. Pinequero, ishanincani Avaramani inajeitini: ishanincani Irevi aisati maaroni ijorioririnte. Ishanincatavacaajeitaca. ⁶ Iro cantaincha peerani yora Merequiserequi te irishanincatearini Avaramani, inashita iriori; iro cantaincha yaavaquero maaroni ipaarantaqueriri iriori, aisati icantacoven-taqueri yora intacantajeitaqueeri: yora icashiacaqueri Tasorentsi. ⁷ Pinequero, yora Merequiserequi anaacotantatsiri ipincatsariti, irootaque icantantariri Tasorentsi: “Apa, pintasoncacoventeri Avaramaca cameetsa irisavicateari”. ⁸ Aca ashinanca inajeiti yora ishanincani Irevi, imoncarajeitaquee arorije, acamajeiti, iro cantaincha yaapinitaqueri maaroni apajeitaqueriri. Iro cantaincha peerani yora Merequiserequi, inashita: oquempevetaca te incameji irinti, te onanteji sanquenarentsi: “Icamaque”. ⁹⁻¹⁰ Peerani, ipaarantantacariri Avarama vaararontsi, tequerani intimeni Irevi: itimi iriori impoiji. Iro cantaincha arime intimitame, impaarantterime aisati iriori: tempa inquempetearime yora jivatatsiri itimi. Aisati inquempejeiterime maaroni ishanin-capeeni Irevi: maaroni saserotetatsiri. Aitaqueme impincatsajeiterime Merequiserequi maaroni. Pinequero, ajorioririnte ipincatsajeitaqueri saserotepee, irootaque ipaarantajeitancariri paitapeerica, iro cantaincha yora saserotepee ipincatsatasanojeitaqueri Merequiserequi: tempa yanaacotantaque iriori isaserotetasanotaque, ipincatsaritasan-otaque.

Yora ishanincani Irevi, tecatsi incantee iroavisacojeitee.

¹¹ Ari itimajeiveta yora ishanincani Irevi: yora Aaro aisati maaroni ishanincani iriori, isaserotejeitaque; aisati otimaveta isanquenajeitiniri Moishishi, oamejeitiri paitapeerica antajeitiri. Iro cantaincha tecatsi incantee irorijei iroameetsajeitee, iroavisacojeitee; irootaque itiancantacariri Tasorentsi pashini saserotetajantsiri, quempetajariri yora Merequiserequi. ¹² Ari inashita yora saserotetatsiri, aisati meeca onashita icoacaajeita-jeeri Tasorentsi. ¹³⁻¹⁴ Itimaveta saserotepee shanincajeitariri Irevi, aisati isanque-najeitaqueneri Moishishi, yoamejeitiri paitarica yantajeitaqueri. Iro cantaincha yora iroqueratajantsiri saserotetajantsiri te irishanincateariri Irevi, irinti ishanincatacari Jora. Te irisaseroteteji itsipapee ishanincani Jora: te irisanquenajeitenerini Moishishi, te incanteriji irinti impeaquea saserote. ¹⁵ Meeca itimi yora quempetariri Merequiserequi, inashita iriori, ayotantacari onashita icoacairiri Tasorentsi. ¹⁶ Te irishanincateariri Aaro ipeantacari saserote; irointi itasorentsitaque aisati icantatitani yanei, irootaque ipeantacari saserote. ¹⁷ Tempa icantirini Tasorentsi peerani: “Pincantaitatiyempani pisaserotetanaque, pinquempeteari irori Merequiserequi”. ¹⁸ Otimavetani oca isanque-natiniriri ishanincani Aaro, iro cantaincha te incoyeji Tasorentsi ampomerentsiventearo meeca. Antsipetearome, tecatsi oncantajeitee oavisacojeitee. ¹⁹ Amoncarajeiterome maaroni, eiro oameetsajeiteeme. Iro cantaincha irinti Quirishito aitaque irimataje iraajeitanajee anta Tasorentsiqui. Te antsipetashiteaji aquemisantajeitaqueri irinti.

Icanti Tasorentsi: “Queario, incantaitatiyempani Quirishito irisaserotetanaque”.

²⁰ Te incantashiteaji Tasorentsi, icantasanoti: “Queario oca noncamantempiri, tempa naro Tasorentsi. Incantaitatiyempani Quirishito irisaserotetanaque”. ²¹ Te inquempeteariji irinti ishanincajeini Aaro. Iro cantaincha icantiri Quirishito irinti: “Queario oca noncamantempiri, tempa naro Tasorentsi. Te noncantashiteaji, eiro namatavitimpitsi. Avirotaque saserote, pincantaitatiyempani”. ²² Irootaque ayojeitancariri yanaacotanta-que Jesoshi isaserotetasanotaque, imajeitaquee yoavisacojeitaquee. ²³ Ari icarajeivei-tani oshequi saserotetevetachaniri, iro cantaincha icamapinijeitaque, yojocapinijeita-queri isaserotetantaniri. ²⁴ Irinti Quirishito, icantani itimi: irootaque imatantarori isaseroteti, icantani. ²⁵ Imajeitaqueri quemisantajeitiriri: yoavisacotasanojeitaqueri maaroni coasanotatsiri iraanajeri Tasorentsiqui. Icantani yanei, irootaque imatantarori icamantacoventeitaquee.

²⁶ Queario, ocameetsatasanoti isaseroteventajeitaquee; tempa Tasorentsi ini, te aneroji irantane, te iranteroji caari cameetsatatsi; te inquempejeiteariji yora caari cameetsajeitatsi isaviquimojeivetapaintaniri. Meeca isaviqui cameetsa anta inquitequi jenoqui. ²⁷ Yora itsipapee saserotetatsiri, maaroni quitaiteri yoapinitiniri Tasorentsi ivirapee, itaapinitiniri. Iro yoapinitantanariri, oshequi iquenqueshiretaquero caari cameetsatatsi yantajeitiri aisati yantajeitiri iriori ijorioririnte. Tecatsi iroapinite inti Quirishito, iointi apatio icamentajeitaquee: moncarataca, eiro yapiitajirotsi aisati. ²⁸ Ari peerani isanquenatini Moishishi, icanti: “Impeajeitanaquea ishanincani Aaro saserote”. Atiri inajeiti iriori, yantajeitiro caari cameetsatatsi. Iro cantaincha impoiji icanti Tasorentsi: “Queario oca noncamantempi, tempa naro Tasorentsi: incantatiyempani Quirishito irisaserotetanaque”. Iriotaque Quirishito Itomi, te iranteroji caari cameetsatatsi inti, icantatiani icameetsatasanotaque.

8

Isaserotetanaque Quirishito anta inquitequi.

¹ Piotavaquero oca noncamantempi: iriotaque Quirishito saserotetimentajeitaqueeri. Isaviquimotiri Tasorentsi anta inquitequi jenoqui, anta iracosanoriqui; icaratiri ipincatsarijeiti. ² Yora ishanincani Aaro iquenquetsatacapinitiri Tasorentsi anta pancotsiqui yovetsiquiri atiri, icantashitacaro: “Ivanco Tasorentsi”. Inti Quirishito isavicasanoti anta Tasorentsiqui: te irio vetsiquerone atiri, inti Avincatsarite vetsiquirori inampi iriori. ³ Yora ivincatsarite saserote ipapinitiri Tasorentsi paitapeerica; yoaque-neri virantsi, shemi; itaaqueneri. Inti Quirishito, te iroyeneriji virantsi; irisati coantsi yoyeetantacariri. Impoiji ijatashitaqueri Tasorentsi, icantapaqueri: “Narotaque nainti camimentajeitaqueriri ashaninca, oavisacojeitaqueriri”. ⁴ Intimeme meeca aca quipatsiquica, eirome isaserotetime; pineaquero, te irishanincateariji Aaro: iriojeitaque ishanincani Aaro tsoteaquerori isanquenatiniri Moishishi. ⁵ Yantaveetapiniti anta icantee-tirinta: “Ivanco Tasorentsi”, iro cantaincha te anta irisavicasanote Tasorentsi. Apatiro oshiacaventiro inampisanori anta inquitequi. Peerani, yovetsicantarori Moishishi, icantiri Tasorentsi: “Anta toncaariqui pajitachari Shinai noametasanotaquempiro jaoca pincanterori pancotsi: pimoncaratasanotero nocantaquempi”. ⁶ Ocameetsavetaca ora isanquenatiniri peerani Moishishi, isaserotejeitancatraci Aaro aisati ishanincani, aisati yamitacojeivetacari ajorioririnte. Iro cantaincha oca icantiri meeca Tasorentsi ocameetsatasanotaque, oshequi anaacotaquero isanquenatiniri Moishishi. Aisati iquempetaca, oshequi imatasanotaqueenero Quirishito, oshequi yanaacotaqueri Aaro. ⁷ Oncameetsatasanotaqueme isanquenatiniri peerani Moishishi, eirome icantirime pashini Tasorentsi.

⁸ Tempa icantini Tasorentsi peerani: “Tequera omoncarateaji, te oncameetsatasanoteji oca isanquenatiniriri Moishishi Aaro”. Irootaque isanquenatacantacariri itsipapee quemisantatsiniri peerani: “Ianti Avincatsarite: ‘Coajica ontine pashini noncamantajeiteriri maaroni joriopee, onashitanaquea. ⁹ Eiro oquempetajarotsi ora nocantaqueriri yora intacantacaroniri. Peerani isavicaveitani maaroni joriopee Ejipitouqui, iro cantaincha naajetanaqueri pashiniqui quipatsi. Isanquenavetacaro Moishishi noocoacaajeivetacariri, iro cantaincha te inquemisantajeitenaji. Irootaque caari namitacojeitancatari. ¹⁰ Meeca timatsi noncamantajeiteriri maaroni joriopee. Coajica niotacaasanojeitaqueri maaroni noncantajeiteriri, inquenqueshiretasanojeitero, eiro ipeacojeitarotsi. Impincatsatasanojeitaquena, aisati nontasoncacocktajeiteri narori. ¹¹ Eiro yatsipetashijeitatsi iroametavacaajeitea, eiro icantavacaajeitatsi: “Noshaninca, pioteri Novincatsarite”. Aitaque iriotashijeitena maaroni: pincatsaritatsiri, caari pincatsaritatsi, maaroni catsini, iriojeitena. ¹² Noncavintsaasanojeiteri maaroni antirori caari cameetsatatsi, eiro noquenqueshireacotajiritsi aisati yantayetiri’”. Irootaque icantitacari peerani Tasorentsi. ¹³ Pineaquero, icantini: “Ontime pashini noncamantajeiteriri atiri, eiro oquempetajarotsi nocantiniri peerani”. Ari oca icantiri meeca, irootaque poyeetajarori icantiniri peerani.

Iquenquetsatacotiro pancotsi yantaveetantari saserotepee.

¹ Peerani icantajeitiri Tasorentsi intacantaqueeniri jaoca incantajeiteari inquemisan-tajeite, aisati icantiri jaoca oncanteari pancotsi irantaveetanteari saserotepee. ² Ari yovetsicajeitaqueroni pancotsi, imoncarataqueroni icantiriniri Tasorentsi. Anta yan-taveetapinitinta saserotepee icanteetiro irashi Tasorentsi. Otimi anta yoantarori vera itsiotari, aisati otimi mesa. Anta mesaqui yoapinitiro tanta, ocarataque 12, aque-nqueshirejeitantarori ipapinijeitaquee Tasorentsi avajeitari. ³ Otimaque oticaashiro, ainiro araquerora tecatsi jatapinitatsine, icanteetiro inantasanotari Tasorentsi iriori. ⁴ Otimi ara itaapinitantarori casancapatsari, iro yovetsicantarori oro. Otimi aisati cajo, ipashicantarori oro. Ara tsompoina, otimi coviti yovetsicantarori oro, tsompoina irointi iteyeetiro mana. Aisati otimi cajoqui iotiquiro Aaro, ora shiocashitachaniri peerani oshi. Aisati otimi ora mapi isanquenatacainiri Tasorentsi Moishishi. ⁵ Anta otataroqui cajo ishiacantaqueri apite inampirepee Tasorentsi ipajiyetiri querovine. Ishiacantaca ainiro isavicaque Tasorentsi. Yamenajeitaquero otataro cajo anta yoapinitiro maaroni osarintsiqui ivincatsarite saserote iriraja virantsi. Oquempetaca iquenqueshirejeitiri camimentajeiteeri, cavintsaajeiteeri. Eiro meeca notsoteasanotirotsi noncamantempiro jaoca ocantayetari.

⁶ Ari yovetsicajeitaquero peerani, imoncarataquero icantiriri Tasorentsi Moishishi. Impoiji iqueapinijeiti saserotepee, yantaveetapinijeiti. ⁷ Iro cantaincha te irijatapini-jeiteji oticaashiroqui araquerora. Aparoni ijati maaroni osarintsiqui irinti ivincatsarite. Ijivataque yoiniri Tasorentsi virantsi, impoijiquea iqueanaque apaniro, yaanajiro iriraja, itecaquero anta otataroqui cajo; icantiri Tasorentsi: “Apa, pincavintsaajeitea, eiro piquishimentajeitanarotsi nantajeitaqueri aisati yantajeitaqueri noshanincapee; eiro piquenqueshireacojeitajanarotsi aisati”. ⁸ Pinequero, otimi oticaashiro, ticaajeitaque-riri itsipapee saserote aisati maaroni joriopee. Tecatsi incantajeitea irijajeite anta isavicanasotariqui Tasorentsi. Irootaque oshiacantajeitaqueeri Ishire Tasorentsi, ayojeitasantacari yora ishanincani Irevi tecatsi incantajeitee irareetacaajeitee anta Tasorentsiquinta. ⁹ Ocameetsati anquenqueshirejeitero meeca ayojeitanteari: maaroni ipapinijeitaqueri Tasorentsi, aisati maaroni yoapinitiniri aisati itaapinitiniri, te oameet-sajeiteriji yora papinivetariri aisati taapinivetanariri. ¹⁰ Peerani yoametashijeitari paitarica yantashijeitari; paitarica yoajeitari, aisati paitarica irajeitiri; yoametashijeitari jaoca incanteari inquivapinitea, paitapeerica. Irootaque icoacaajeivetacariri Tasorentsi atiri peerani. Iro cantaincha ari ocaratini, moncarataca. Ipocapaaque meeca Quirishito aamaajeitari. Meeca onashitaja icoacaajeitajeeri Tasorentsi arori, iroqueratajantsiri, ocameetsatasanotaque.

Yora Quirishito yoameetsajeitirori maaroni antajeitirori caari cameetsajeitatsi.

¹¹ Ipocapaaque Quirishito iquempevetapaajari ivincatsarite saserote, iro cantaincha ocameetsatasanotaque oca yantapaaqueri irinti. Yantaveetini itsipapee saserote anta pancotsiqui yovetsiquiri atiri; iro cantaincha irinti, ijatasanotaque anta ivancosanoriqui Tasorentsi: ocameetsatasanotaque irointi anta inquitequi. ¹² Aca quipatsiqui yora ivincatsarite saserote ijatapiniti maaroni osarintsi, yaapinitiro iriraja chivo aisati vacajaniqui anta pancotsiqui tsompoina, ora icanteevetari inantasanotari Tasorentsi. Iro cantaincha Quirishito irinti, icamimentajeitaquee, impoiji ijataji anta inquitequi isavi-casanotinta Tasorentsi. Ishiacantaca yaanajiro iriraja: caari oni iriraja virantsi, irointi irirajasanoi iriori. Icantiri Tasorentsi: “Pinequero, nocamimentajeitaqueri maaroni atiri noavasacotantajariri, incantaitatiyempani irisavicanajeari aca anampiquica”. Te irantsipeteaji irinti impiapinite, aparo imataquero, ari ocarati. ¹³ Ari peerani ariorica yantironi ashaninca caari cameetsatatsi, yoqueri saserote vaca, iriorica chivo, iriorica vacajaniqui. Impoiji yaaquero iriraja, ipantaqueri yora antirori caari cameetsatatsi. Aisati itaaqueri ivatsa, impoiji ipantaqueri shirampari itsimenquitore virantsi. Impoiji icantajeitiri ishaninca: “Icameetsataji aisati yoca. Ocameetsati incarajeitajeri aisati quemisantatsiri”. ¹⁴ Irintiquea Quirishito, icameetsatasanotaque irinti, ocantani otimi ishire. Icantiri Tasorentsi: “Apa, nocoasanotaque noncamimentajeiteri atripee,

noavisacojeitanteeariri". Ari aparajatimentajeitaquee irirajasanori irinti, te iro iriraja virantsi: icamimentajeitaquee, meeca eiro atsipetajarotsi anquenqueshiretero caari cameetsatatsi, ora jatacaaajeiteenemeri Sharincaveniqui, iointi anteneri Tasorentsi maaroni icoacaajeitaqueeri. Impoiji ancantaitatiyempani asaviquimojeiteri anta inquitequi.¹⁵ Ari peerani apatiro ayojeitaquero isanquenare Moishishi, aisati antap-inijeitaquero caari cameetsatatsi, ajajeitanteameri Sharincaveniqui; iro cantaincha icamimentajeitaquee Quirishito, yoavisacojeitantejeri. Meeca onashita icantajeitaqueeri Tasorentsi: "Ocameetsaiteti maaroni nocashiacaajeitaqueri quemisantajeitanari nocoyeajeitaqueri. Incantaitatiyempani iroveshireimentajeitearo".

Yoamejeitaquee paita icamimentajeitantejeri Quirishito.

¹⁶⁻¹⁷ Ari pinquenqueshiretero yamejeitacari ashanincaphee. Otimirica ivaararopee, isanquenati paperiqui: "Ariorica noncame nocoaque irashiyetajearo noshanincapeeni". Ari isanquenataquero ivajiropee ashijetajearone ivaararopee. Impoiji, ariorica incamaque, iriojeitanaque irio ashijetajearone. Eirotsitarica icami yora sanquenatirori, eirotsita yaajeitirotsi vaararontsi. Iro cantaincha incamaquerica, moncarataca: impoijiquea iraajeitero.¹⁸ Aisati oquempetacani peerani: otimi icantiriniri Tasorentsi ashanincani peerani. Tecatsi incantea Tasorentsi incame, iro cantaincha icamapinijeitaque poshiniiri omoncaratantacari icantiriniri.¹⁹ Peerani icamantiri Moishishi maaroni icoacaajeitiriri ajorioririnteni, irosati isanquenatantarori. Impoiji icamantajeitiri ishaninca icantiriniri Tasorentsi; impoiji aisati yoajeitaqueri vacajaniqui aisati chivo, yaajatavaquero iriraja, iconojataquero njia. Impoiji yaaquero iviti ovisha quitioncapitiri aisati casancashiri, yovincaquero ojaqui, isaitantariri ishanincaphee. Aisati isaitaquero iroori oca isanquenatacaaqueriri Tasorentsi.²⁰ Ariorica isaijeitaqueri, icantajeitiri ishaninca: "Ari nocamantajeitaquempiro maaroni iroquerari icamantaquenari Tasorentsi. Icanti: 'Ariorica pinquemisantajeitena, nontasoncacoventajeitempi'. Aisati avirori picantajeiti: 'Cameetsa'. Irootaque nosaitantaquempiroi meeca iriraja".²¹ Impoiji isaitaquero aisati pancotsi iquemisantajeitancari, aisati isaijeitaquero maaroni timayetatsiri tsompoina.²² Ari isanquenatini Moishishi: "Irootaque iriraja poshiniiri oameetsajeitirori paitapeerica; aisati eirorica itimi camimenterineri atiri, amparajatimenterineri iriraja, eiro yavisacotajitsi".

Iquenquetsacotiro paita icamimentantaqueeri Quirishito.

²³ Ari otimi oshiacantiri oca pancotsi aisati maaroni timajeitatsiri tsompoina. Ocameetsati isaijeitaquero yoameetsatantacarori. Iro cantaincha otimi inquitequi oca ishiacantajeitaqueri, itimi aisati anaacotirori iriraja virantsi, oameetsatasanotirori maaroni timajeitatsiri inquitequi:²⁴ iriotaque Quirishito. Yora saserotepee ijatapiniti anta pancotsiqui yovetsicajeitiri atiri, ishiacanteetiro: "Inantari Tasorentsi". Iranti Quirishito ijatasanotaji itimasanotinta Tasorentsi, icantacoventajeitaquee.²⁵ Yora ivincatsarite saserote ijatapiniti anta inantariqui Tasorentsi, yaapinitiro maaroni osarintsiqui iriraja poshiniiri: te irayeroji iriraja irashi iriori. Te irijatapiniteji iranti Quirishito iraapinitantearori iriraja.²⁶ Arioricame iraapiniterome iriraja Tasorentsiqui, oncameetsateme incamapiniteme, peerani catsini: yovetsicantarori quipatsi, irintearome incamapiniteme, irosati meecame. Iro cantaincha moncarataca peerani icamantacari: aparoni icamaque, yoavisacojeitaquee.²⁷ Ayojeitaque aparo acamajeitaque, toren, ari acarati; te ampitapiniteroji ancame. Ariorica ancamaque, impoiji incantacoventajeitaquee Tasorentsi.²⁸ Ari oshequi anajeiveta, iro cantaincha aparo icamimentajeitaquee Quirishito; imoncarataquero, eiro icamajitsi aisati. Impocaje aisati coajica ancorajeitasanotajeri, ancorajeiteri aisati maaroni itsipapee aamaajeitariri meeca.

¹ Pamene, maaroni isanquenatacotaquerini peerani Moishishi oshiacantaqueri yora pocapaintatsiniri, cameetsatasanotatsiri. Yareetapainta, oshequi itasoncaventa-jeitaquee. Icantiri Moishishi Aaro: “Poapiniteneri Tasorentsi virantsi maaroni osar-intsiqui”. Ari icantani ishanincani yoapinijeivetari, iro cantaincha tecatsi oncanteri oavisacojeiteri yora quemisantirori isanquenatiniri Moishishini. ² Arime oavisacojeiterime yoca yoapinitiri, tempa iroimpacayerome yoapinitiniri. Aisatime iroavisacotajeame yora, eiro iquenqueshirejeitajrome aisati yantayetiri. ³ Iro cantaincha yoapinijeivetari ivira maaroni osarintsiqui, irosati icanta oquenqueshiretacaapinitiri yantayetiri. ⁴ Tecatsi oncanteri iriraja vaca aisati chivo oameetsajeiteri antirori caari cameetsatatsi. ⁵ Ipocantacari quipatsiqui peerani Quirishito, tempa icantiri Tasorentsi: “Apa, te pineacameetsatasanoteroji iriraja virantsi, te oameetsajeiteriji antajeitirori caari cameetsatatsi. Irootaque pivetsicantanarori novatsa noncamimentajeitanteeariri maaroni atiri, noameetsajeitanteeariri. ⁶ Te pineacameetsateriji maaroni itaapinijeivetimpri atiri, aisati maaroni yoapinijeivetimpri poameetsajeitanteearimeri. ⁷ Irootaque nocantantimpri: ‘Pamene, Apa, nopoqua aca nantantempiori maaroni picoacaquenari. Nomoncaratero maaroni isanquenatacotiteetaquenaniri peerani’ ”.

⁸ Pinquenqueshiretasanotero oca icantiniri Jesoshi: “Te pincoyeji, Apa, iroajeitem-piri atiri virantsi, intaapinijeitem-piri. Te pineacameetsatimenteariji yora pavetimpri maaroni isanquenatacotiniri Moishishi”. ⁹ Impoiji icantiri: “Pamene, Apa, pocaquena nantantempiori maaroni picoacaquenari”. Icantantarori oca, icanti: “Ontimaite maaroni yantayevetaniri ishanincani Irevi. Ontime iroqueratajantsineri”. ¹⁰ Aparo icamimentajeitaquee Jeso quirishito, eiro yapiitajatsi incamaje aisati, imoncarataquero. Yoameetsatasanojeitaquee, aisati maaroni iriori quemisantajeitiriri, iquempetacanta-jeitaquee te anteroji caari cameetsatatsi.

Te iroavisacotanteji virantsi yora yoyeetiri, irinti Quirishito oavisacotantatsiri.

¹¹ Ari yantaveetapinitaque maaroni saserotepee, yoapinitiniri Tasorentsi virantsi, itaapinitiniri, iro cantaincha te oameetsajeiteriji maaroni antirori caari cameetsatatsi. ¹² Iro cantaincha aparoni icamimentajeitaquee Quirishito, yoameetsajeitanteeareri, mon-carataca. Impoiji isavicapajii anta iracosanoriqui Iriri, ¹³ yoyeaqueri irimatanteearori icantaqueriniri: “Coajica nontsoncajeiteri maaroni quisajeitaquem-piri”. ¹⁴ Aparo icamimentajeitaquee maaroni: tempa icoyeajeitaquee Tasorentsi, yoameetsatasanojeitaquee. ¹⁵ Aisati oametasanojeitaquee Ishire Tasorentsi queario nosanquenataquem-piri; tempa osanquenatacairini peeraniniri: “Icanti Tasorentsi: ¹⁶ ‘Tempa narotaque Ivincatsarite jorio, irootaque noncantajeitanteeariri: Te pimajeiteroji nocantaqueriri Moishishi, iro cantaincha coajica nonquenqueshiretacaajeitempiro maaroni noocoacaajeitaquem-piri, pintsoteajeitajero, piotasanojeitajero, maaroni’ ”. ¹⁷ Impoiji aisati osanquenatacaaqueri: “Icanti Tasorentsi: ‘Eiro noquenqueshiretacotitajiritsi aisati caari cameetsayetatsi yan-tajeitaqueri’ ”. ¹⁸ Pamene, ariorica icavintsaajeitiri Tasorentsi antirori caari cameet-satatsi, aisati terica inquenqueshiretacotajeri aisati yantaqueri, eiro icoajitsi aisati camimenterineri iroameetsatanteeariri. Pinequero, ineacameetsajeitaquee meeca.

Icamantajeitaquee paita icoacaajeitaqueeri arori.

¹⁹ Noyemisantaririnte, icamimentajeitaquee Quirishito, yaparajatimentajeitaqueero iriraja yoavisacotantaqueeri. Meeca ayajeitaque ineacameetsajeitaquee Tasorentsi, ocameetsatantari anquenquetsatacapinijeiteri. ²⁰ Peerani otimini pancotsiqui oticaashiro, ora caari ijatapinijeitantanai atiri onta inantarinta Tasorentsi: tempa otica-jeitaqueri. Iro cantaincha icamimentajeitaquee Quirishito, caari otimantaja meeca ticaajeeneri. Yaneanaji aisati, irootaque ocameetsatantari meeca anquenquetsatacap-initeri Tasorentsi. ²¹ Isaserotetasanotaque, ipincatsariventasanojeitaquee arori, aisati maaroni itsipapee quemisantajeitiriri Tasorentsi. ²² Yaparajatimentajeitaqueero iriraja, aisati avaotisatimentajeitacari. Irootaque meeca eiro atsaroacantaritsi Tasorentsi, ayajeitaque eiro yoipiajeiteetsi, irointi iraacameetsatasanojeitee. ²³ Ayojeitaque iri-mataqueenero maaroni icantajeitaqueeri, eiro yamatavijeiteetsi: irootaque ocameetsatantari ancamantajeiteri itsipapee atiri oca aquemisantaqueri.

²⁴ Tsame meeca anquenqueshirejeiteri itsipapee: anintajeiteri aisati ancavintsaajeiteri. ²⁵ Timatsi ayemisantaririnte caari pocapinitatsi inquemisante: eiro piquempejeitaritsi avirori, irooti pampatotapinijeitea poimoshirencavacaajeitanteari maaroni. Tempa ayojeiti eiro osamanititsi impocantajeari Quirishito, irootaque ocameetsatantari aveshireimentajeiteari aisati aveshireacaajeiteari itsipapee. ²⁶ Pamene, ariorica ayojeitaque icamimentajeitaquee Quirishito, irootaque yoavisacotantaqueeri, ocameetsataque ashiretearo, anquemisantasanojeiteri: tempa irootaque icantiriri Tasorentsi, oqueariotasanoataque. Te oncameetsateji catsini antseenqueri, te aneriji pashini oavisacoteeneri. ²⁷ Aitaque coajica inquisajeitanaqueri Tasorentsi maaroni tseenquiriri, iroasanzetasanojeiteri. Impoyereajeitajeri maaroni iisane, poyere. ²⁸ Yora ajorioririnteni yoapinijeitaquerini caari pincatsatiro isanquenare Moishishi. Itimirica apite cantatsiri, ariorica icarati mavat cantatsiri: “Ainiro yantane, noneajeitaqueri”, ari yoajeitaqueri ishaninca. Te incavintsaajeitimateriji. ²⁹ Ariorica intseenqueri atiri Itomi Tasorentsi, aisati incanterica: “Yatsipetashita icamaque Quirishito, yatsipetashita yaparajataquero iriraja, eiro yoavisacoteetsi”; aisati incantimaterorica Ishire Tasorentsi, ora cavintsaajeiteri: ¿pijtimpa eiro yoasanquetirtsitasi? Aitaque iroasanquetasanotaqueri, catsini: irineashiiteteareotave, ironea caari inquemisantantari. ³⁰ Tempa ayojeitiri, ayojeiti icanti: “Aitaque nompiaeiteari, noasanquetaajeiteri nainti”. Aisati icanti: “Queario noncantacoventajeiteri maaroni atiri, tempa naro pincatsariventacojeitiriri”. ³¹ Ariorica intsencante atiripee, inquisaqueri Tasorentsi, yora aneasanotatsiri: ocameetsati intsaroacaasanojeiteari catsini, yoashinoncairicari.

Icantiri: “Pinquearioventero pinquemisante, eiro pitsaroitsi pashinoncaimenteari Quirishito”.

³² Pinquenqueshirejeitajea jaoca ocantari peerani, iroquerani piquemacotaquerini Quirishito. Iquishimentajeitaquempiro pishaninca piquemisanti, ³³ ishirontimentajeitaquempi, yoashinoncaajeitaquempi. Aisati pineajeitaqueri yoashinoncaajeitaqueri itsipapee piyemisantaririnte. ³⁴ Picavintsaapinitaqueri yora yoiminquearanteetaqueri. Ariorica icoshitaquempini pivaararo, piquimoshirejeitaqueni, picantini: “Irayerota. Coajica ontimasanoyetaje cameetsayetatsiri anta inquitequi, eiro itimajitsi coshitajeeneri anta. Ancantaitatiyempani asavicajeite anta ocameetsaitetinta catsini”. ³⁵ Eiro pipeacotarotsi piquimoshireimentiri, aiquero pijatatiye pinquimoshirejeitanaque. Queario, impinatempi Tasorentsi. ³⁶ Ocameetsati pincanteani pinquearioventero maaroni icoacaimpiri Tasorentsi, impoiji irimatempio icantaquempi. ³⁷ Tempa ocantini sanquenarentsi: “Irotajantsi ipocaje Avincatsarite, eiro osamanititsi, tempa icanti: ‘Nompocaje. ³⁸ Ocameetsati inquemisantasanojeiteni yora noameetsantiri. Iro cantaincha irojocajerorica inquemisanti, eiro noveshireimentajaritsi’”. ³⁹ Te ancarajeiteriji arori yora jocajeitirori inquemisanti: irijajeite iriori Sharincaveniqui. Aquemisantajeiti ainti, ajajeite ainti inquitequi.

11

Yantajeitiniri quemisantasanoatsiniri peerani.

¹ Piquemisantiri Tasorentsi piotasanotantacari irimatasanotempiro maaroni icanquempi. Ainirotatsi oshequi caariquera aneajeiti, iro cantaincha aquemisantajeiti, irootaque ayojeitancari aneajeitajero coajicani maaroni icashiacaajeitaqueri. ² Iquemisantini yora peeraniniri, irootaque ineacameetsatantariri Tasorentsi. ³ Aquemisantajiri arori, irootaque ayojeitancari ineanataque Tasorentsi otimantacari quipatsi, inquite, aisati maaroni timantarori. Ineanataque otimantanacari: tecatsi irovetsicantearori. ⁴ Iquemisantini Averini, irootaque ineacameetsatitan-tacariri Tasorentsi ipaqueriri; irintiquea Caini, te inquemisanteji, irootaque caari ineacameetsatantariro ipavetacariri iriori. Ineacameetsataqueri Tasorentsi Averini, irootaque ineacameetsatitan-tacariri ipaqueriri. Icamaqueni iriori peerani, iro cantaincha ocameetsati anquempejeiteari: anquemisantajeite irineacameetsajeitanteeri

Tasorentsi. ⁵ Iquemisantini Enoco, caari icamanta. Aneatsi ini, yaanajiri Tasorentsi in-quitequi. Tecatsi neajerine aisati: queario, yaasanotanajiri inquitequi. Tequerani iraay-erini, icantini: "Queario, noneacameetsatasanotaqueri Enoco". ⁶ Eirorica aquemisantiri, eiro ineacameetsajeiteetsi. Intimerica coatsiri irareeteari Tasorentsi, ocameetsati inquemisantasanoteri, aisati iriotasanotanaque impinateri coasanotatsiri irioteri.

⁷ Aisati iquemisantini Noeni. Icantirini Tasorentsi: "Coajica ompoque antearo incani catsini, incajaretanaque maaroni. Pivetsiquero antearo pitotsi paviscotantajeari". Ari iquemisantaqueri. Osarintsitasanovetani, iro cantaincha yantaque pitotsi, yavisacotantajari, aisati yavisacojeitantzajari maaroni saviquimojeitiriri. Te inquemisantajeiteji itsipapee ishaninca, irootaque yoasanquejeitantzacariri Tasorentsi. Irintiquea Noeni yoameetsantiri: tempa iquemisantiri irinti. ⁸ Aisati iriorini Avaramani, iquemisantirini Tasorentsi. Icantirini iriori: "Nocoaque pijate pashiniqui quipatsi, anta arejiqui: aitaque pisavicapeeri. Nompempiro pashitasanoteari avirori; aisati nomperi pitomi, piccharine, maaroni. Tsame pijate, nocoi nonijayempiro". Ari ijatanaque, iro cantaincha te iriojeiti jaocarica irijateri. ⁹ Yareetantacari, ineapaaqueri pashini atiri savicajeitatsiri. Oquempevetaca caari iipatsite, te irisavicasanoteji, irointi iquenayetaque; iro cantaincha icantani iquemisantiri Tasorentsi. Aisati iquempejeitaca Isaca aisati Jacovo: te irisavicasanoteji, te irivetsicajeiteji cameetsari ivanco, ¹⁰ irointi iquenqueshirejeitiro pashini inampi, caari yovetsiqui atiri. Iajeitaque coajica iraajeitanajeri Tasorentsi anta inampiqui iriori, yovetsicaqueri iriori. ¹¹ Oquemisantini Sarani: shiravaro oni, te intimeni otomi. Impoiji anteashipatanaque. Icantiquerri Tasorentsi: "Coajica intime pitomi", irosati oquemisantantacariri. Ocanti: "Eiro yamatavitanatsi Tasorentsi". Impoiji itimaque. ¹² Aisati yanteashipatasanotaqueni Avaramani, oshequitasanotaque irosarintsite. Te intimaveteaji catsini itomi, iro cantaincha impoiji itimacaquero ijina otomi. Meeca icarajeiti ishanincani oshequi catsini, tecatsi ancanteri ayojeiteri jaocarica icarajeitiri: iquempejeitacari impoquiropee, tecatsi ancanteri ayojeiteri jaocarica icarajeitiri. Aisati iquempejeitacaro ovane impanequi anta otsapijaqui incajare, oshequi catsini.

¹³ Ari icamajeitaque iriorijei quemisantatsiniri: isavicajeivetani Canaqui, iro cantaincha te irineasanojeiteroji maaroni icantiqueriniri Tasorentsi. Iro cantaincha iojeitaque irineajero coajica. Icantajeitini: "Te nonampitasanotearoji quipatsica, te nosavicasanoteji aca". ¹⁴ Irootaque ayojeitantzacari icoajeitaqueni irareejeitea pashiniqui nampitsi irinampitasanotantapajearori. ¹⁵ Incoajeitajeme impiajeitanajeme anta Ejipitoqui iponeantacari, ari irijajeiteme. ¹⁶ Iro cantaincha icoajeitaque irijajeite cameetsaiteriqui nampitsi: ora timatsiri inquitequi. Irootaque yoveshirementantacariri Tasorentsi iriori: te impashiventacaimatearji, itomintasanojeitacari. Aisati yovetsicajeitiniri isavicajeitancari. ¹⁷ (-)

¹⁸ Peerani icantirini Tasorentsi Avaramani: "Meeca itimi pitomi papanirorite, pipajitiri Isaca. Iriotaque ashijeitearineri pincharinentayetajeari, maaroni. Tecatsi itsipa ashitearine". (v 17) Ari yevancaritapaini Isaca, irosati ineantantariri Tasorentsi Avarama, iriotanteari queariorica iquemisantasanotiri. Icantiri: "Poyenari pitomi papanirorite, pintayenari". Ari iquemisantirini, icantiri: "Ari, nojate noyeri".

¹⁹ Iquenqueshiretaca: "Icantana Tasorentsi: 'Iriotaque ashijeitearine pincharinentayetajeari, maaroni'. Tequera intime itomi iriori, iro cantaincha icantiquena: 'Poyerri'. Naamaaca ariorica noyeri, irointinaajeri". Ijatanaque, irotaintsi iroyerime, iro cantaincha icantiri Tasorentsi: "Eiro poiritsi, irointi noneantimpi. Meeca niotaque pipincatsatasanotaquena". Ari oquempetimovetacari Avarama yoitinaajiniri itomi, yaneanaji aisati.

²⁰ Aisati iquemisantini Isacani, irootaque icantacoventantariri Jacovo aisati Esao. Icantiri Tasorentsi: "Pintasoncacoventeri notomi apite". Irootaque itasoncacoventantanariri oshequi. ²¹ Aisati iquempetani Jacovoni, iquemisantini. Irotaintsi incame, iro cantaincha ititacaro iotiquiyo; yoivotashitacari Tasorentsi, icantiri: "Pintasoncacoventajeiteri itomipee Jose". ²² Aisati iriorini Jose, iquemisantini. Peerani itimini Ejipitoqui, aisati maaroni ishaninca, iro cantaincha iotaque iraajeitanajeri joriopee anta

iipatsitequi iriori. Irootaque icantantariri ishaninca: "Irotaintsi noncame. Coajica, ariorica pijajeitanaje aipatsitequi arori, paajeitanajeroyea notonquini, pintijapaajero".

²³ Peerani icantajeivetarini yora ivincatsarite ejipitosati: "Noshaninca, pineaqueri yoshequiaeitanaque joriopee: te oncameetsateji. Pijajeite pivincajeiteri maaroni itomipee, iroquera timayetatsiri". Ari yora iriri Moishishi iquemisantini, aisati iriniro: ipincatsajeitirini Tasorentsi, irootaque icantantari: "Eiro apincatsatiritsi irinti ivincatsarite ejipitosati. Icameetsataque atomi, eiro ashinetiritsi iroviinquiteeri". Ari imanapitsataqueri, caari yoantari. ²⁴ Ari impoiji oneaqueri Moishishi irishinto pincatsari. Oquenqueshireti: "Eiro noiritsi, irointi nonquempetacantajeri notomi, intime novancoqui". Impoiji yantearitanaque. Iquemisantaqueri Tasorentsi, irootaque icantantari: "Te noncoyeji noshaninateari ejipitosati, naro jorio". ²⁵ Iotaque iquemisantajeiti joriopee, irootaque yoashinoncaajeitancariri ejipitosati. Iquimoshirejeivetaea ejipitosati, iro cantaincha te oncameetsateji itimajeiti, irootaque caari icoanta Moishishi irishanincajeiteari. ²⁶ Te incoyeriji iirequite ejipitosati isaviquimovetacari, irinti icoasanotaque iquemisantiri Quirishito, iquematsicatimentacari iriori. Iotaqueni coajica impinateri Tasorentsi. ²⁷ Iquemisantini, iotaque te inconijateji Tasorentsi, iro cantaincha iotaque quiso yoiri; irootaque caari itsaroacantari pincatsari, aisati ishiapitsajeitancariri ejipitosati, yaajeitanaqueri maaroni ijorioririnte. ²⁸ Aisati iquemisantiri Tasorentsi, yora cantiriri: "Meeca tsiteniri nontianqueri nonampire iroyeri itomipee tseenajeitanari, yora jivatatsiri itimi. Iro cantaincha ariorica poyer ovisha, pisaitero pivanco iriraja, iravisanteari yora oantatsiri, tecatsiquea incanteri pitomipee". Ari iquemisantaqueri Moishishi, aisati iquemisantacaajeitaqueri ijorioririnte, caari icamajitanta itomipee. Iro apajitarorri quitateri: "Yavisantaniri".

²⁹ Aisati iquemisantajeitini maaroni joriopee. Ishiapitsajeitacari yora isorarotepee ejipitosati. Yojajeivetanacari, iraavajerime. Jero oticajeitaqueri joriopee antearoja incajare, tecatsi inquenajeitanaque. Iotaque Tasorentsi iquemisantajeitiri, irootaque iteen-careajatantacarori incajare, oquipatsitanaque nianqui. Jentsipaite yavisajeitanaque intatiquero maaroni joriopee. Yojajeivetapaacari ejipitosati, iro cantaincha yoipiajatajiro Tasorentsi incajare, aajeitaqueri soraropee.

³⁰ Aisati iquemisantajeitini joriopee anta Jericoqui. Itantacotasanojeitaca savicajeitatsiri, iticajeitavaqueri joriopee. Iro cantaincha icantiri Tasorentsi: "Pishoncajeitanaque-aro nampitsi, paniijeitanaque. Aparo quitateri, aparo pishoncajearo; otsipa aisati, otsipa aisati, irosati 7 quitateri". Ari omoncaratapaaca quitateri 7, irosati otireantanaca tantotsi. Icamajeitanaque tseencantatsiri, savicajeitatsiri. ³¹ Otimi anta aparoni tsinane, pajitachaniri Arava. Peerani oshequi antayetirini shiramparipee caari ai. Oquemisantaji iroori, amitacotantariri itiancaneppee Josoe iramenero nampitsi. Te oncameji irointi anta Jericoqui, te onquempeteariji itsipapee tseenajeitantsiri.

³² ¿Paita pashini nonquenquetsatacoteri? Oshequitanaque meeca nosanquenare, iro cantaincha itimi oshequi catsini itsipapee quemisantajeitiriri Tasorentsi: Quereo, Varaca, Santso, Jete, Iraviri, Samoiri, aisati itsipapee quenquetsatacantatsiniri. Eiro meeca notsoteirotsi yantayetiri maaroni. ³³ Iquemisantajeitirini Tasorentsi, itsoncajeitancariri oajeiterinemer. Iquemisanti itsipapee imatantarori cameetsa ipincatsariventajeitiri ishaninca, aisati imatantacanariri Tasorentsi icantaqueriri. Yojoqueevetari manitimashiqui, iro cantaincha iquemisantini, irootaque caari yoantarini. ³⁴ Pashini yojoqueevetari paamariqui, iro cantaincha te intayeaji. Impesheeterime itsipapee, iro cantaincha yoavisacotaarantaqueri Tasorentsi. Imantsiatarantaque, iro cantaincha yoavisacotaarantaqueri, ishinstitacaarantaqueri. Imatacarantaqueri manatachari. Yoimishiaarantaqueri manaterinemer quenisantatsiri. ³⁵ Oquemisanti tsinanepee, irootaque itinaantajari ojimeni, aisati otomipee.

Yoashinoncaaranteetaqueri itsipapee quenisantatsiri, yoatsinaaranteetaqueri; icantiri: "Ariorica pojocajero piquemisanti, ari cameetsa noimpacajempi". Iro cantaincha icantiri: "Eiro nojapirotsi noquemisanti. Coajica cameetsa irisavicacayena Tasorentsi". ³⁶ Ari ishirontimentaarantacari, ipasanataarantaqueri, tac, tac, tac; yoisotaarantaqueri carenatsaqui, yoiminquiaarantaqueri, ³⁷ ipichaarantaqueri mapi,

pitse, pitse, pitse. Itotaqueri ichaquireaqueri, chaquire. Ipesaarantaqueri, peti. Itsipapee te inquitsaateaji cameetsa, irointi iquitsaatashitacari imeshina ovisha aisati imeshina chivo; ocoiteimotacari paitapeerica, iquisheetaque, yoashinonqueetaqueri. ³⁸ Iquenayetanaque caaraiteriqui aisati toncaariqui. Imanapitsayetacari quisakeriri anta omoropeequi toncaari. Icameetsatasanojeitaqueni, iro cantaincha te iraacameetsaniroteariji yora tseencantatsiri. ³⁹ Ari iquemisantajeitaqueni, irootaque ineacameetsatantacariri Tasorentsi, irinti; iro cantaincha te irineasanojeiteroji maaroni icantajeitecariri. ⁴⁰ Ocameetsatasanotaque icoacaajeitaqueeri Tasorentsi: te incoacaajeiteriji yora peeraniniri irijivajeitee irineajeitero, irointi icoaque amoncaratavacaajeitea aneajeitero maaroni.

12

Icantiri: “Pinquearioventeneri Tasorentsi icoacaimpiri, eiro pishemashireatsi”.

¹ Ari oshequi iquemisantajeitaqueni maaroni yocapee noquenquetsatacojeitaqueri. Meeca oquempetaca yapatotashijeitaquee, yamenacojeitaquee iriojeitanteari paitarica antajeiteri arori. Noshiacantempiro: tempa yamejeita evancaripee ishiajeita iritanteari janicarica anaacotantatsineri. Ariorica irishianaque, tecatsi inquijanaque, irointi yojocanaquero iitsaare irishiasanotanteari. Aisati ocameetsati ajocajero caari cameetsatatsi antajeivetari amatantearori maaroni icoacaajeiteeri Tasorentsi, anquearioventero. ² Ancanteani anquenqueshirejeiteri Jesoshi, yora oavisacojeitaqueeri peerani, aisati iriotaque aajeitanajeeneri coajica inquitequi. Oshequi iquematsicatimentajeitaquee coroshipui peerani, oshequi yoashiventaaajeitaqueri iriori. Iro cantaincha iotaque irisavicasajitajee cameetsa anta inquitequi, irootaque iquematsicatimentantaqueeri. Meeca isaviqui iriori anta iracosanoriqui Tasorentsi, icarajeitaqueri ipincatsariventaaajeitaquee. ³ Oshequi peerani iquisajeitaqueri tseencantatsiri, oshequi yoashinoncaaajeitaqueri. Meeca ocameetsati pinquenqueshiretasanojeiteri, impoiji eiro poashiretatsi, eiro pishemashireatsi.

Yoasanquetaaqueri Tasorentsi quemisantatsiri antirori caari cameetsatatsi.

⁴ Ari picantayevetari antirori caari cameetsajeitatsi: “Pojocajero pantayetiri”, iro cantaincha tequera inquishimentajeittempiro. Tequera iroimentempiro, tequera iroashinoncaimentempiro. ⁵ ¿Pipeacotarompa itomintaquempi Tasorentsi? Pinquenqueshiretajero aisati oca isanquenatacaaqueriri peeraniniri: “Notiom, ariorica noasanquetayempi, eiro piquisanatsi, tempa narotaque pivincatsarite. Aisati ariorica noasanquetayempi, eiro pishemashireanatsi. ⁶ Ariorica irantero nonintane caari cameetsatatsi, noasanquetaapiniteri. Nocoaque niotacanteariri te oncameetsateji irampiitapinitero. Ariorica noasanquetayempi piotanteari notomintasanotaquempi”.

⁷ Ariorica iroasanquetaajeitempi Tasorentsi, eiro pishemashireatsi. Inintajeitaquempi, itomintajeitaquempi, irootaque yoasanquetantaquempi. Tempa amejeitaro arori avasanquetaapinijeitiri atomipee. ⁸ Maarori shirampari yoasanquetaajeitaqueri itomipee. Eirorica yoasanquetaimpitsi Tasorentsi, te aviro itomi, irishinto: te pis hanincateariji. ⁹ Yoasanquetaajeitaquee ashijeiteeri, iro cantaincha tempa apincatsajeitaqueri. Tempa aisati ocameetsati ampincatsajeiteeri Tasorentsi ashijeiteeri, ancantaitatiyempani asavicanterari anta inquitequi. ¹⁰ Yora ashijeiteeri yoasanquetaajeitaquee aisati yoamejeitaquee ayojeitancacari asavicajeiti cameetsa aca quipatsiqui: eiro osamanittsi, ari ancamaque. Aisati yora ashijeiteeri te iriojeiteji maaroni, irointi yaamaashiyeta iriori; ainiro iquisashitee. Irintquea Tasorentsi, te iraamaashiyeteaji irinti, cameetsa yoasanquetaajeitaquee, cameetsa yoametasanojeitaquee. Impoiji ancarajeiteri iriori ancantaitatiyempani ancameetsatasanojeitapaaje. ¹¹ Ariorica yoasanquetayee, tempa avashirevetanaca, te anquimoshirevetanajeaji. Iro cantaincha impoiji aquenqueshiretanaja, ayotaque yoamejeitaquee anquimoshirejeitanaque aisati ancameetsatanaque.

Icantiri: “Piveshireimentajeiteari Tasorentsi”.

¹² Piquempejivetaca pimaotsajeitaque. Pintinaanaje, pishintsitanaje: queario iquishimentajeitaquempiro piquemisantajeiti, iro cantaincha piveshireajeitanaquea. ¹³ Pinquearioventero icoacaimpiri Tasorentsi. Piveshireacaajeiteari piyemisantaririnte oashirejeivetachari inquemisantasanojeitanteari iriori. ¹⁴ Pincoasanojeite paacameetsajeiteri maaroni itsipapee atiri, eiro piquishiritsi. Aisati pincoasanotaque pintime cameetsa: eirorica pitimi cameetsa, eiro pimatirotsi pinquemisantacaajeiteri itsipapee, eiro iojeitiritsi Avincatsarite. ¹⁵ Pamitacotavacaajeitea, poametavacaajeitea, iriojeitanteari maaroni ashanincapee ineshinoncajeitaqueri Tasorentsi. Pquisashireajeitircari pishaninca, te oncameetsateji. Ariorica pinquisavacaajeitea, eiro pitimajeititsi cameetsa, aisati pojocajeitirocari piquemisanti. ¹⁶⁻¹⁷ Piojeitaque paita yantaquerini Esao. Iriotaque itomi Isaca; Esao iriotaque jivatatsiri itimi; irinti Jacovo, impoitatsiri. Ari yamejeitaca ashijeiteeri icantacoventasanotiri jivatatsiri itimi itomi, intasonca-coventanteariri Tasorentsi. Aisati icantiri: "Aviro poyeetajenneri, ashijetajearone timimoyetanari". Aisati inquempeterime iriori Isaca, incavintaasanofterime Esao. Iro cantaincha pashini quitaiteri oshequi iquemaquero iriori itashe, impoiji ineakeri irirenti otimi oshequi yoari. Icantiri: "Iye, pimpena noyeari: aasanotaquena notashe". Icantiri: "Ariorica icantacoventaquena nanti apa, aisati incantena nompoyeetajeari, ari nompaquempiro poyeari". Icantiri: "Ari, aviroyeampa. ¿Paita noncoanteari nanti incantacoventena coajica? Irotantsi noncame meeca". Ari ipaqueri yoari. Impoiniji iquenqueshireavetanaja Esao, oshequi iraasanovetanaca, icantavetari iriri: "Apa, nocasanoataque pincanteri Tasorentsi nompoyetantajempiri". Icantiri: "Eiro. Nocantacoventaquera meeca pirenti. Impoiji meeca picantaquena". Te incoyeji Esao intasoncacoventerime Tasorentsi, irointi itseencaqueri. Eiro piquempejitaritsi meeca avirori.

Cameetsa icavintaajeitaquee Tasorentsi meeca: eiro aquempetaritsi peeraniniri, yora tsaroa-caajeitacariniri.

¹⁸ Te pineajeiteroji ineajeitaqueri peeraniniri anta toncaariqui shinaiquiniri, itsaroajeitancari. Icamantantacariri Tasorentsi Moishishi maaroni icoacaaajeitaquerir, ineajquero omapocanaca otaashitaca paamari, aisati otsitenitanaque quitaiteriqui, ineajquero antearo tampea. ¹⁹ Iquemajeitaqueri ishaninca aisati antearojenca itioti aisati iquemajeitancariri Tasorentsi, itsaroacaajeitacari catsini, icantajeiti: "Eiro pineanajeitanatsi aisati, oshequi notsaroacaajeitaquempi. Nocamicari". ²⁰ Icani Tasorentsi: "Te noncoyeji impoque aca toncaariqui atiri aisati ivira. Impoquerica aca ivira, pimpichaajeiteri, poyer". Ari itsaroajeitanaque maaroni atiri, catsini. ²¹ Aisati iriori Moishishi, itsaroacaajeitacaro maaroni ineajeitaqueri; icanti: "Oshequi notsaroanaque, irootaque nopioncantanacari". ²² Avintipee, te pijajeiteji Shinaiqui, irootaque caari pitsaroajeitanta. Irointi oquempetaca pijajeitaque anta pashiniqui toncaari, pajitachari Sio, ora timatsiri anta Jerosarequi: shiaquerori inampi Tasorentsi. Pinequero, oquempetaca pijatasanoataque pashiniqui Jerosare, ora inquitequiniri: pareejecitacari Tasorentsi, icavintaasanojeitaquempi, irootaque caari pitsaroajeitanta. Ainiro anta oshequi catsini inampire, yapatotimentajeitacari, ipampoyeaventajeitaqueri, maaroni. ²³ Anta intime maaroni quemisantatsiri itomintajeitacari Tasorentsi, maaroni savicasanotatsineri anta: ainiro osanquenataca meeca ivajiro, maaroni. Ainiro Tasorentsi, yora cantacovenajeitaqueeri, maaroni. Ainiro aisati maaroni yora quemisantajeitatsiniri peerani; yoameetsajeitaqueri Tasorentsi, cameetsa isavicajeiti meeca inquitequi. ²⁴ Aisati oquempetaca pareetaca Jesoshiqui, yora oamejeiteeri maaroni icantajeitaqueri Tasorentsi. Peerani yoqueri Caini irirenti Averi, irootaque yoasanquetaantacariri Tasorentsi Caini. Yoeetaqueri aisati Jesoshi, iro cantaincha icamimentajeitaquee irinti, icavintaajeitaqueeri Tasorentsi.

²⁵ Pinquemisantajeiteriya yora quenquetsatacaaajeitimpri, pipiatsataricari. Peerani ipiatsajeitacari ashanincani Moishishi. Ishaninca inaveta, iro cantaincha te inquemisantjeriji, irootaque yoasanquementajeitancariri Tasorentsi. Caari ini atiri coatsine inquenquequetsatacayempi meeca, irinti Tasorentsi. Oshequi yanaacotantaque ipincatsariti. Eirorica piquemisantiritsi irinti, tempa iroasanquetasanojeitempi catsini.

²⁶ Peerani anta Shinaiqui iquenquetsatacantacariri Tasorentsi Moishishi, inicaquero quipatsi. Iro cantaincha icantirini iriori: "Coajica apanivani nonicajero aisati quipatsi, iro cantaincha aisati nonicacoteri inquitesati maaroni". ²⁷ Ari icantini: "Apanivani nonicajero aisati". Aitaque intsonquero maaroni nicajeitachaneri, maaroni caari quiso-tasanotatsi. Ontimaarantanaque irointi caari nicachane. ²⁸ Ari coajica asavicajeitan-tajearo anta pashiniqui quipatsi, ora caari tsoncanetachane: anta impincatsariven-tasanojeitee. Irootaque ocameetsatantari ampasonquitasanojeiteri, anquearioventeneri maaroni icoacaqueeri; tsame ampincatsatasanojeiteri maaroni. Ocameetsati intsaroa-caajeiteari maaroni caari pincatsatiri, ²⁹ tempa intsoncasanojeitaqueri maaroni tseeca-jeitiriri, impoyereajeitajeri, maaroni: poyere.

13

Icantiri: "Pintimajeite cameetsa".

¹ Ari, pinintavacaasanojeitea: pinquempetacanteri itsipapee irio pirenti pinintasan-otiri. ² Ariorica irareetempi caari pineapiniti, paacameetsatavaqueri. Ainiro aacameet-satavaqueriri caari ineapiniti, ijivetari ishaninca ini yora yaacameetsatiri: jaa, irinti inampirepee Tasorentsi inajeiti. ³ Pincavintsajaeiteri maaroni ayemisantaririnte, yora yoiminqueeyetiri: pintimeme anta caravosoqui, tempa pincoaqueme cavintsajempine-meri avirori. Pincavintsajaeiteri maaroni yoashinonqueeyetiri: tempa pishaninca-jeitacari. ⁴ Ocameetsati aye ajina; ocameetsati iroori tsinane aye ojime. Ocameetsati irineero shirampari ijina; ocameetsati oneeri tsinane ojime. Iro cantaincha iroasan-quetaajeiteri Tasorentsi maaroni aimentarori ijina aisati maaroni aimentariri ojime. Aitaque iroasanquetaajeiteri maaroni antirori caari yai. ⁵ Eiro picoitsi poshequiyeri piirequite, irointi piveshireimentearo timimojeitimpri. Tempa icanti Tasorentsi: "Eiro noshinetimpitsi pashinoncayea, quiso noajeitempi". ⁶ Irootaque ocameetsatantari an-cantapinijeite: "Niotaque intacotapinitaqua Avincatsarite, eiro noquenqueshireatsi. Tecatsi incantena atiri iroashinoncayena".

⁷ Pinquenqueshiretasanoteri jaoca icantari yora quemisantacaajeitimpri: yora oame-jeitimpiori irineane Tasorentsi. Pinquenqueshiretasanoteri maaroni imajeitaqueri, impoiji pinquempejeiteari iriori, pinquemisantasanojeite. ⁸ Te impashinitapiniteji Jesoquirishito, irosati icanta: peerani, meeca, irosati coajica. ⁹ Eiro piquemisan-tirotsi yoametantashiyetari atiripee. Tempa ocameetsati anquemisantero yoamejeiteeri Tasorentsi, yora neshinoncajeiteeri. Ainiro cantimentajeiteerori paitarica avajeiteam-eri, iro cantaincha yatsipetashitacaro: te oameetsajeiteriji iroripee, aisati eiro oameet-sajeiteetsi arori. ¹⁰ Ari icamimentajeitaquee Quirishito, avavisacojeitantajari; irintquea yora cantiriri saserotepee: "Poyenari novira navisacotantajeari", yatsipetashijeitacaro, eiro yavisacotajitsi. ¹¹ Ari yora ivincatsaritepee saserote yoapinitiri virantsi aisati yaajatapinitiro iriraja anta ivancoqui Tasorentsi. Icantiri Tasorentsi: "Ainiro irantane noshaninca, irootaque noantariri virantsi piotanteari icoaque pincavintsayeri. Jero oca iriraja". Impoiji yaajeitanaquero ivatsani virantsi anta arejiqui, itaaqueri. ¹² Aisati iquempetacantaqueri Jesoshi, yaajeitanaqueri arejiqui yoantacariri: te ari iroyeri nampitsiqui. Iro cantaincha icamaque yoameetsajeitantaqueeri.

¹³ Ariorica irishirontimentee tseencantatsiri, ariorica iroashinoncaajeitee, iro can-taincha ocameetsati ancanteani anquemisanteri Jesoshi. Tempa ishirontimentajeitacari iriori, yoashinoncaajeitaqueri. ¹⁴ Caari oni anampisanori oca quipatsi, irointquea acoajeitaque anampitasanotearo anta inquitequi. ¹⁵ Ariorica aquemisantaqueri Je-soquirishito, ocameetsati ancamantapinijeiteri itsipapee: "Oshequi icameetsataque Tasorentsi, oshequi nopincatsatiri". ¹⁶ Pincanteani pantayetero cameetsayetatsiri aisati pincavintsajaeiteri itsipapee: irootaque icoacaajeitaquempri Tasorentsi.

¹⁷ Pinquemisantajeiteri yora quenquetsatacaaajeitimpiori irineane Tasorentsi, pimp-incatsajeiteri. Ocameetsati iroamejeitempi iriori cameetsa, pincameetsashirejeitanta-jeari. Coajica irisampitavaqueri Tasorentsi: "¿Paita poametaqueri yora piquemisanta-aaajeitaqueri? ¿Cameetsampa iquemisantaquempi?" Ari incamanteri. Tempa cameetsa

iranqueri: "Je, cameetsa iquemisantajeitaquena". Iro cantaincha eirorica piquemisantiri, incanteri: "Teve inquemisantenaji", impoiji iroasanquetempi Tasorentsi. ¹⁸ Te nioteji ainirorica nantane, naamaaca te aneroji; iro cantaincha nocoaque pincanteri Tasorentsi oncanteata eiro otimantatsi catsini. ¹⁹ Aisati pincanteri oncanteataquea nareetitantajempri aisati, aneavacantajeeari. ²⁰ Aisati noncanteri iramitacojeitempi avirori. Niotaque inquemisantena Tasorentsi, tempa itasoncacoventajeitaquee: icoaque irisavicacaajeitee cameetsa. Peerani aisati yoitinaanajiri Avincatsarite Jesoquirishito: yora cantacoventajeitaqueeri, amenacoventajeitaqueeri. Yamenacoventajeitaquee, iquempetacari ashitariri irovishate, yamenajeitiri. Icamimentajeitaquee ayojeitan-tacari queario icantaqueeri Tasorentsi: "Noavisacojeitempi, nosavicacayempi aca nonampiquica, pincantaitatiyempani". ²¹ Nocantaqueri: "Poameetsatasanojeiteri noshaninca, pimatacayeri cameetsayetatsiri irantajeitantempirori maaroni picoacaajeitaque-ri: tempa iquemisantajeitaqueri Jesoquirishito". Aisati nocantajeitimpি avirorije: "Pimpincatsatasanojeiteri Quirishito, pincantaitatiyempani. Aitaque ancantajeiteari".

Ivecarataquero isanquenare.

²² Noshaninca, te oshequiteji oca nosanquenajeitimpri: pinquenqueshiretasano-jeitero. ²³ Piojeitaque yoiminqueetaqueri Timoteo caravosoqui, iro cantaincha iso-toanaji meeca. Ariorica jentsipaita irareetea aca, nontsipatanajeari ara pinampiqui, noneajeitapajempi. ²⁴ Novetsajeitacari maaroni quenquetsatacantatsiri aisati maaroni ayemisantaririnte. Ivetsajeitaquempi maaroni itariasati. ²⁵ Nocoaque incavintsaajeit-tempi Tasorentsi, maaroni. Aitaque incanteari. Ari ocarati.

ISANQUENATIRI SANTIACO

Yovetsajeitari Santiaco ijorioririnte.

¹ ¿Savicajeitatsimpi, nojorioririnte, maaroni? ¿Tecatsimpa oyempine? Meeca nosanquenajeitaquempiro, maaroni jayetanaantsiri pashinipeequi nampitsi. Narotaque Santiaco sanquenajeitaquempirori oca, narotaque antaveetiniriri Tasorentsi aisati Avincatsarite Jesoquirishito. Novetsajeitaquempi, maaroni.

Icantiri: “Ariorica ompomerentsitimojeitempi paitapeerica, iro cantaincha pinquemisan-tasanojeite”.

² Meeca, noyemisantaririnte, noncamantempi: ariorica ompomerentsitimojeitempi paitapeerica, ocameetsati pinquimoshiretasanojeitanaque catsini. ³ Piotasanojeitero oca: ariorica ompomerentsitimotempi, paventeari Tasorentsi, ari iramitacotaquempi pinquemisantasanojeitantaque, pincanteani. ⁴ Cameetsa pincantaitatiyempani pinquemisantasanojeite, impoiji pincameetsashirejeitanaque, pivetsicashirereasanojeitanaquea: pimajeitantarori maaroni icoacaajeitaquempi Tasorentsi.

⁵ Terica pitero icoacaimpiri Tasorentsi, pincanteri: “Piotacayena paitarica pin-coacayenari”, ari irimataquero iriotacaasanotempi, eiro ishemimpitsi. ⁶ Iro cantaincha, ariorica pincanteri, cameetsa pinquenqueshiretasanotea: “Niotaque iquemaquena Tasorentsi, irimataquenaro oca nocoacotiriri”. Eiro pitseencajiritsi. Ainiro itsipapee quenquetsatacavetariri Tasorentsi, iro cantaincha itseencanti. Timatsi icoacovetariri, iro cantaincha yaamaaca eiro iquemiritsi. Iquenqueshirevetaca: “Meeca iquemaquena Tasorentsi”, iro cantaincha impoiji iquenqueshiretaca: “Te inquemenaji Tasorentsi”. Ari iquempetacaro ora otavoncare anta incajarequi. Otatsincajataquero tampea, ojocajataquero, opiapinitantari. ⁷ Quearioya, piquempetaricari yora tseencantatsiri. Eiro pijititsi irayero iriori paitapeerica incoacovetariri Avincatsarite. ⁸ Yora tseencapinitatsiri, iperaventajeitacaro maaroni yantayevetari.

⁹ Ainiro oshequi ayemisantaririnte caari ashitaarantacha, iro cantaincha ocameetsati inquimoshiretasanotanaque: tempa ineacameetsataqueri Tasorentsi iriori. ¹⁰⁻¹¹ Aisati ocameetsati yora ashitaarantachari iriveshireimentajeiteari Avincatsarite; eiroquea iveshireimentarotsi yashiyetari, tempa eiro osamanititsi incamanteari, irijocayetanaquero maaroni timimovetariri. Ocameetsati irlote iquempetacaro oteaqui tojari: oshintsiti ocamapiniti. Ocameetsaitetamaque, iro cantaincha impoiji ijenoquitapaaque catsirinaiteri, icatsirincatasanotapaaque. Oshimpeshitanaque tojari; oshimpetanaque oteaqui, aisati ojireanaque. Pinequero, eiro osamanititsi incamanteari yora ashitaaran-tachari, irijocajeitanaquero maaroni timimovetariri. ¹² Ariorica pincoajeivetea pantero caari cameetsatatsi, iro cantaincha eirorica pantiro, pinquimoshiretasanotanaque, aisati impinatasanotempi Tasorentsi: irisavicasaanotempi anta inampiqui iriori, pincantaitatiyempani panee anta. Aitaque icantitarini: “Nosavicasaanotempi anta inquitequi maaroni nintasanojeitanari”.

¹³ Ariorica pinquenqueshiretea pantero caari cameetsatatsi, eiro picantashitatsi: “Icoacaquenaro Tasorentsi”. Pamene, te incoyeji Tasorentsi irantero irinti caari cameetsatatsi, aisati te incoacayeriji itsipapee irantero. ¹⁴ Ariorica anquenqueshiretero antero caari cameetsatatsi, impoiji ancoanaque antero. ¹⁵ Impoiji, ariorica ancoaque antero, antasanotaquero; ontimanteari antseenque, aisati ajatanteari Sharincaveniqui.

¹⁶ Eiro picomitarotsi, noyemisantaririnte nonintasanotiri. ¹⁷ Iriotaque Tasorentsi cavintsaajeiteeri, pasanojeiteeri maaroni cameetsatasanotatsiri. Iriotaque vetsiquiriri catsirinaiteri, cashiri, impoquiropee, maaroni timayetatsiri. Te impashinitapiniti Tasorentsi, irosati icantani icavintsaasanojeitaquee. ¹⁸ Icoaque Tasorentsi ashaninca-jeiteari, irootaque itomintantaqueeri. Itimacaqueero irineane, oametasanojeitaquee queariotasanzatsiri. Aquemisantaquero, irootaque itomintantaqueeri. Ijivajeitaquee arori, iro cantaincha impoiji intomintajeiteari oshequi itsipapee atiri aisati.

Jero oca icoacairiri Tasorentsi quemisantatsiri.

¹⁹ Piojeitavaquero oca, noyemisantaririnte nonintasanotiri: ocameetsati ajivate anquemero icantaqueeri itsipa, eiro ashintsitsi aneanateri, eiro ashintsitsi anquishea. ²⁰ Ariorica anquishea, tecatsi ancantea anteneri Tasorentsi cameetsatatsiri. ²¹ Irootaque nocantantimpiri: te pincameetsashirejeiteji. Te oncameetsateji catsini pantayetaqueri: pojocasanojeitajero maaroni oca. Pishiretearo cameetsa irineane Tasorentsi, oca pique-maqueri. Ariorica pinquemisantasanotero, ari oavisacotaquempi. ²² Pimatasanotero ocamantimpiri irineane: eiroquea piquemashitarotsi, oncanteataquea eiro pamatavittantajatsi avisati. Te oncameetsateji pinquemashitearo, irointi pinquemisantasanotero. ²³ Yora quemashitarori, yora caari antasanotiro ocantaqueri, te iringotanoteji jaoca icanta; yatsipetacaro iquemavetaro, te inquenqueshiretajeroji aisati. Ishiaqueri amenavorovetachari amenaarontsiqui: ²⁴ yamenavoroveta ivoroqui, impoiji ijatanaji, te inquenqueshiretajeoji aisati jaocarica ocantacari ivoro. ²⁵ Iro cantaincha yoavisaco-jeitaquee ainti, irootaque ocameetsatantari ancantaitatiyempani anquenqueshiretap-intero irineane Tasorentsi itimacaaqueeneri: tempa ocameetsatasanoti. Eiro aque-mashitarotsi, irointiquea amayetero ocantayetiri, anquimoshirejeitajeari.

²⁶ Ariorica ajitashitaquea queario aquemisanti, iro cantaincha ariorica quisat-satapinitiri itsipapee, amatavitaja arosati: tequera anquemisantasanooteji, irointi at-sipetashitaca aquemisantamempeaca. Pineaquero, icoaque Apa Tasorentsi ayojeite eiro ashintsitsatiritsi ashaninapee. ²⁷ Icanti ariorica anquemisantasanoque, an-cavintsayeri yora ashinoncaincari: yora jananequi camatsiri iriri, iriniro. Aisati an-cavintsayero camajimentaaro, eiro antayetirotsi yantayetiri tseencantatsiri. Irootaque icoacaasanojeiteeri Tasorentsi.

2

Cameetsa arintavacaajeitea.

¹ Tempa, noyemisantaririnte, piquemisantajeitiri Avincatsarite Jesoquirishito. Icameetsatasanoti irinti. Te incoacayempiji pincavintaapinitashiteari apaniro yora ashitaarantachari, irinti caari ashitaarantacha pipincashireaqueri. ²⁻³ Anta papatotapinijeitanta: ariorica iqueapaaque quitsaatachari cameetsari iitsaare, yaniyotaro pinatasanotachari oro. Irio pineacameetsatavaqueri irinti, picantavaqueri: "Jeroca savicamentotsi cameetsari, pisavicaree". Ariorica iqueapaaque caari ashitaarantacha, quitsaatachari maatsaraantsi, pipincashireavaqueri, picantavaqueri irinti: "Ari ara pincatiapee. Tecatsi pisavicaree". ⁴ Aparopee pineacameetsajeitiri, itsipapee pipincajeitaqueri. Te paacameetsatavacaajeitea: tempa pijiveta pinashijeita, irootaque pipincavacaantacari. Te oncameetsateji oca piquenqueshirejeitiri.

⁵ Pinquemisantena, noyemisantaririnte nonintasanotiri. Tempa icoyeaqueri Tasorentsi yora caari ashitaarantacha inquemisantasanoanteeariri iriori, irisavicanteari anta ipincatsaritinta. Icanti: "Nosavicacaajeiteri aca nonampiqui maaroni nintajeitanari". ⁶ Irompa avinti, pipincashireaqueri yora caari ashitaarantacha. Tempa irio ashitaarantincari quisajeitaquempi. Tempa irio oashinoncaapinijeitimpri, coatsiri iroiminqueacantapinijeitempi caravosoqui. ⁷ Tempa iriojeitaque cantimatiriri Jesoshi. Ja, irinti, icameetsatasanoti, irootaque cavintsaaajeitaquempi.

⁸ Timatsi icantitacaniri Avincatsarite: "Oquempetaca avisati cavintsajancha, aisati pinquempejeiteri itsipapee, pincavintaajeiteri iriori, paacameetsajeiteri". Ariorica pimataquero oca, ocameetsatasanoti. ⁹ Iro cantaincha ariorica pipincashireaqueri ashinoncaincari, te paacameetsatavacaajeiteji: te oncameetsateji oca. Tempa ocanti Sanquenarentsi: "Terica paacameetsatavacaajeitea, ainiro pantane".

¹⁰ Pimoncarataqueroricame maaroni ocantiri isanquenatiniri Moishishini, iro cantaincha otimirica aparo caari pimoncarati, ainiro pantane: oquempetaca tecatsi meeca pimoncaratea. ¹¹ Icantini: "Eiro paimentarotsi pijina. Eiro paimentaritsi pijime". Irisati cantatsiri: "Eiro poanti". Terica paimentearo pijina, terica paimenteari pijime, iro cantaincha ariorica poanti, ainiro pantane:

te pimpincatsateroji icantayetiniri peerani Moishishini. ¹² Coajica, ariorica incantacoventempi Quirishito, tempa incavintsaasanotempi. Aisati pinquempejeiteri maaroni pishaninca: pincavintsaasanojeiteri itsipapee, cameetsa pineshiloncatsateri. ¹³ Eirorica pineshiloncatiritsi itsipapee, eiro ineshinoncatimpitsi avirori Quirishito. Ayojeiti ineshinoncatapinitaquee, irootaque eiro atsaroajeitantzsi ariorica incantacoventajeitaquee.

Ariorica aquemisantasanaquaqueri Tasorentsi, anteneri icoacaaqueeri.

¹⁴ Pamene, noyemisantaririnte: icantashitarica ashaninca: “Noquemisanti”, iro cantaincha terica incavintsayeri itsipapee, ¿ocameetsatimpa? Te, te oncameetsateji. Tempa iquemisantashiveeta: ¿jaoca incanteari iravisacotantajeari? ¹⁵ Ariorica piotaque ocoiteimotacari piyemisantaririnte iitsaare aisati iroyeari, pincavintsaayeri. ¹⁶ Eiro picantashitaritsi: “Cameetsaya pijke. Cameetsa pinquitsaatea. Cameetsa pinquemaquea”. Eirorica pipavaqueritsi oca coiteimotacariri, ¿picavintsaasanotirimpá? Te. ¹⁷ Pinequiero, ariorica aquemisantashita, terica aneshinoncateri itsipapee, te oncameetsateji: atsipetashitacaro aquemisantamempeaca.

¹⁸ Intimerica cantempineri: “Piquemisantashiveeta avinti; irompa nainti, nantaveetiniri Tasorentsi icoacaquenari”. Queario irinti icantaqueri. Eirorica pantaveetiniri Tasorentsi, ¿jaoca oncanteari piotacantenari piquemisantasanoitiri? Cameetsa nantaveetiniri nainti, piotanteari noquemisantasanoitiri. ¹⁹ Pishirevetaro apaniro ini Tasorentsi, ari cameetsa. Aisati ishirenirojeivetaro iriori camaaripee, irootaque it-saroanirotantacari, ipioncanirotantacari; iro cantaincha eiro yavisacotajitsi. ²⁰ Tempa, noshaninca, ontine piotantari. Tempa pincoyeji piote. Eirorica antaveetiniri Tasorentsi icoacaqueeri, atsipetashitacaro aquemisantamempeaca. ²¹ Pinquenqueshireteri yora ashanincani intacaroniri: yora Avaramani. Iroaqenerime Tasorentsi Isaca anta yoap-initinirinta virantsipee. Tempa irootaque icantantari Tasorentsi: “Noneacameetsataqueri Avarama”. ²² Pinequiero, te inquemisantashiveteji, irointi yantaveetiniri Tasorentsi aisati paitapeerica icoacaquerirí. Yantaveetiniri, irootaque omontcaratan-tacari iquemisantasanaquaque. ²³ Omontcarataca sanquenarentsi, cantatsiri: “Iquemisan-tiri Avarama Tasorentsi, irootaque icantantacari Tasorentsi: ‘Noneacameetsataqueri Avarama’”. Aisati icanteeti: “Irio Avarama inintane Tasorentsi”.

²⁴ Pinequiero. Ariorica apatiro onavetea inquemisantamempeempa atiri, tecatsi incantea Tasorentsi irineacameetsateri. Irompa ariorica inquemisantasanoteri aisati irantaveeteneri icoacairiri, ari irineacameetsataqueri. ²⁵ Aisati oquempetaca Arava: ora neavintsatapinivtariri pashinipee shirampari anta Jericoqui. Ocavintsaajeitavaqueri maaroni yora itiancanepee Josoe. Onijavaqueri pashini avotsi inquenantanaqueari irishiapitsatantanaqueariri yora quisaquerirí. Oca antaqueri Tasorentsi, irootaque ineacameetsatantacarori. ²⁶ Eirorica aneencajitsi, tempa camasanotaquee anaque; aisati oquempetaca, eirorica antiniritsi Tasorentsi icoacaaveteeri, te anquemisantasanojeiti.

3

Ariorica aneaveetashitea, antirocari caari cameetsatatsi.

¹ Pamene, noyemisantaririnte, noametanti narori. Coajica, ariorica incantacoventajeitee Tasorentsi, incantena: “Pamene, oshequi poamejeivetacari itsipapee: ¿paita caari pimatantaro avirori picantavetacariri iriori? Oncameetsateme pimatasanoterome avinti”. Tempa piotiro. Irootaque nocamantantimpirori oca: eiro picoashitatsi poametante. Icoasanotaque Tasorentsi pimajeitero maaroni picantaqueri. ² Tempa aneanatantajeitaro caari cameetsatatsi. Intimericame caari neanatantaro caari cameetsatatsi, irootaque cameetsatasanotatsiri catsini; iotaque yantapinitaqueri cameetsatatsiri, paitapeerica yantayetiri. ³ Atimpatacotapinitiri cavayo ivantequi iquemisantanteeri. Orijaniqui onaveta atimpatacotantariri, iro cantaincha amatantacari aquenacairi anteari cavayo. ⁴ Pinquenqueshiretero aisati antearo pitotsi. Antearo onaveta, aavea-queri antearo tampea aanaquiero. Iro cantaincha oquenacaanaquiero oomarojaniqui, jaocarica inintiri yora comatirori. ⁵ Aisati oquempeta anene: orijaniqui onaveta, iro

cantaincha oshequi omayeti: irootaque avametantariri atiri, aisati quisatsatacantariri. Oquempetacaro amorecaque paamari, capichaji onavetaca, iro cantaincha omataquero otaaquero antearo ovaantsi. ⁶ Aisati aquempetacaro, ariorica capichaji ancante, iro cantaincha quisacaajeitacari oshequi atiri, antacaajeitaqueri caari cameetsatatsi. Tempa iriotaque sharincavenisati oamejeitaqueerori aneanatantaro caari cameetsatatsi, irootaque oshequi quisavacaajeitacari.

⁷ Ari ayojeitaque avamejeitaqueri poshiniripee, tsimeripee, maranque, shimappee, maaroni. Avamejeitaqueri, avirajeitari. ⁸ Iro cantaincha te intimeji oametachane irisati irimajerete eiro ineanatantaro caari cameetsatatsi. Ashi airo aneanatantaro caari cameetsatatsi. Oashinoncaajeitaquee piantatsiri, ari oamaaquee irerorica, iro cantaincha aisati oashinoncaajeitaquee caari cameetsatatsi aneanatashiyetari, irootaque ijajeitacari oshequi atiri Sharincaveniqui. ⁹ Acantapinitaque: “Icameetsatasanoti yora Apa Avincatsarite”. Iro cantaincha aisati acantimanirotiri atiri: tempa ishiavetari iriori Tasorentsi. ¹⁰ Otimi avante aparoni, iro cantaincha irootaque aneshinoncatantariri ashinanca, aisati quisatsatantariri. Te oncameetsateji, noyemisantairinte, anconoayetero aneshinoncatsateri aisati anquisatsateri. ¹¹ Noshiacantempiro: anta osquijatiro omoronaja nija, ariorica oPOCHAJATI, ariorica OCACHOJATI. ¿Arimpa omataquero pochajari aisati cachojari, apite? ¹² ¿Arimpa omataquero naranca ontimantearo manco oitsoqui? ¿Arimpa omataquero ova ontimantearo oitsoqui iyera? Aisati eiro omatirotsi cachojari ompeajea pochajari. Aisati aquemejeitacaro: terica ancameetsashirete, eiro amatirotsi aneanatapinitero cameetsayetatsiri.

Iquenquetsatacotiro iotantari.

¹³ ¿Piotimpá piquenqueshireta? ¿Timatsimpa piotantari? Ari cameetsa pintime: eiro pishemetitsi, irointi cameetsa pineshinoncatante, cameetsa aisati pinquenqueshiretaquea. ¹⁴ Ariorica pinquisashiretanaqueri itsipapee, aisati ariorica pincatsimashireaqueri, eiro pishemetitsi. Eiro pamatavitantsi: eiro pijitashitatsi picameetsati, eiro pijititsi pioti. ¹⁵ Ariorica pantaniroyetaqueri oca caari cameetsayetatsi, te irio oametempirone Tasorentsi, irinti atiri oametempirori, aisati camaari. Te irio oametempirone Ishire Tasorentsi. ¹⁶ Pinequero, ariorica pinquisashireavacaquea, ariorica pincatsimashireavacaquea, eiro pimatirotsi pisavacajeite cameetsa, irointi pantapinijeitero caari cameetsatatsi, maaroni. ¹⁷ Iro cantaincha ariorica irinintacaquempiro Tasorentsi ontine piotanteari, pincameetsashiretanaque, eiro piquisatsi, pincavintsante, eiro pipiatsataritsi itsipapee, pashi moyero pineshinoncatante, poameetsatasanotero maaroni pantayeteri, eiro pitseencashireiritsi itsipa, eiro pamatavitantsi. ¹⁸ Pitarica apanquitiri, ayero oitsoqui. Aisati oquempetaca, ariorica cameetsa ancavintsanaqueri itsipapee, ari irineacameetsataquee Tasorentsi.

Iquenquetsatacotiri caari coatsine incavintsante.

¹ ¿Paita piquisavacantajeitacari? Tempa pineveyetaro vaararontsi, irootaque piquisavacaajeitacari. ² Picoajeivetacaro paitapeerica, iro cantaincha te payeroji. Poantaque. Pineveyetaro yashiyetari itsipapee, iro cantaincha te payeroji, irootaque piquisavacaajeitacari. Iro caari paantaro picoayevertari, te pincantasoteriji cameetsa Tasorentsi. ³ Picantavetari, iro cantaincha caari paasanotanta, te oncameetsateji ora picoasanovetacari: picoaveta pincavintsayea avisati. ⁴ Pishiaquero aimentariri ojime: ocoaqueri pashini shirampari, oquisaqueri ojime. Ariorica pinintayetiro maaroni timayetatsiri quipatsiqui, piquisaveri Tasorentsi. Maaroni nintatsiri irishanincateari tseencatatsiri iquishiri Tasorentsi. ⁵ Jero oca ocantiri sanquenarentsi: “Itiancajeiteero Tasorentsi Ishire iriori, iro cantaincha meeca icavintsaasanotaquero: te incoyeji antseenquero”. Te oncantashiteaji sanquenarentsi, te antsipetashiteaji osanquenataca.

⁶ Oshequi ineshinoncatasanojeitaquee Tasorentsi, irootaque ocantantacari sanquenarentsi oca: "Iroashinoncayeri Tasorentsi yora shemetatsiri, iro cantaincha ineshinoncajeitaqueri yora caari shemetatsine".

⁷ Irootaque nocantantimpri: pishinetacotea, paitarica irinintacaquempi Tasorentsi. Irintiquea camaari, pimpiateari, impoiji ari irojocanajempi.

⁸ Pinquenqueshireteri Tasorentsi, quiso iroantempri irinti. Pantapiniveitaroni caari cameetsatatsi: meeca pojocajero maaroni oca pintimantajeari cameetsa. Oshequi pitseenquirini Tasorentsi; pincanteri meeca: "Poameetsashiretajena, pinquenqueshiretacayenaro cameetsatatsiri". ⁹ Pinquenqueshiretajea, poashiretea; te oncameetsateji maaroni pantapinitiri. Pishirontimentavetacaro caari cameetsatatsi: oncameetsateme poashiretanaqueame; piquimoshireventavetacaro: oncameetsateme poashiretasanotanaqueame, irointi. ¹⁰ Pincanteri Avincatsarite: "Te noncameetsateji, te nomatimateroji cameetsayetatsiri. Nocoaque pincavintsayena". Ari incavintsaquempi, iroameetsatatempi, iramitacotempi. ¹¹ Eiro, noyemisantaririnte, picantimatavacaajatsi. Ariorica pincantimateri pishaninca, aisati ariorica pincante ainiro irantane, pitseencaquero isanquenaren Moishishi. Tempa ocanti: "Pinintavacaajeitea". Iro cantaincha picanti avinti: "Te oncameetsateji ocantiri isanquenaren Moishishi. Te noncoyeji nonintavacaajeitea". Ariorica pincante: "Te oncameetsateji isanquenaren", te pinquemisanteroji, irointi pitseencaquero. ¹² Pamene, apaniro icantacantanti irinti Tasorentsi, aisati apaniro icantacoventajeitaquee maaroni. Oshequi ipincatsariti. Irio matirori yoavisacojeitiri quemisantiriri aisati intianqueri tseenquiriri Sharincaveniqui. Aviroquea, avinti, ¿janicampa cantanirotimpri: "Pincantimateri pishaninca"?

Isanquenatacotiri yora iomparitachari aisati ashitaarantincari.

¹³ Pamene, picantayeveta: "Meeca nojate nampitsiquinta: terica meeca, ari osaitequera nojatasanote. Anta noavisaite aparoni osarintsi: niomparitea, oshequi naye paitapeerica". ¹⁴ Iro cantaincha te piotacoteaji osaitequera, paitarica oyemperni. Aneavetatsimpi meeca, iro cantaincha piquempetacaro mencorijenca. Te osamaniteji omencoriietete, impoiji jentsipaite opeanaja. Aisati avirori, eiro osamanititsi irosati pincamanteari. ¹⁵ Irointiquea pincante: "Ariorica irinintacaquena Avincatsarite, eirot-sitarica nocamitsi, ari nomataquero coajica paitapeerica". ¹⁶ Pamene meeca, oshequi pishemeti, pineacameetsatashitaja avisati: te oncameetsateji. ¹⁷ Ariorica piovetaro cameetsatatsiri, iro cantaincha te pimateroji, ainiro pantane.

5

Jero oca icamantiriri yora ashitaarantincari.

¹ Meeca, ashitaarantincari, noncamantempi: piraajeitea coajica, pincavintsajaeitea, irotaintsi oshequi pinquematsicajeitearo. ² Ompatsaayetanaque maaroni pashijeivetari. Intsonquitajeittempiro sancori piitsaarepee. ³ Oyechariyetanaque maaroni ashiroyetatsiri pashiyevetari: oro, perata, maaroni. Ariorica oyechariyetanaque, irioyeetempi pipiotashitacaro, iro cantaincha te pimpinateriji yora patiritepee. Ontsonquea ashiroyetatsiri, aisati avirori, pijate Sharincaveniqui, eiro pineajirotsi aisati pashijeiveitaniri. ⁴ Pamene, pamatavijeitaqueri maaroni patirite, te pimpinatasanoteriji, irootaque pipiotantarori pivaararo oshequi. Iquisatsajeitaquempi patiritepee. Iotaquero Avincatsarite: tempa ipincatsariventajeitiri maaroni timajeitatsiri. Ioti te pincavintsan-teji, irootaque iroasanquetantempi. ⁵ Avisati quenqueshireacotajancha, te pinquenqueshireteriji itsipapee iriori, piveshireimentaro pashiyetari. Noshiacantempiro: ariiorica inquejitaque pivira, ari pincantajeiteri pishaninca: "Tsame ayeri novira; quejitaque, moncarataca avanteariri". Aisati iquempetaca Tasorentsi, icanti: "Oshequi timimojeitiriri, moncarataca noasanquetanteariri". ⁶ Poashinoncaasanotaqueri cameetsayetatsiri: te pimpashitimateariji coiteimojeitacariri, irootaque icamantacari, torein; iro cantaincha te inquisavetempiji. Irintiquea meeca quisheimpineri Tasorentsi.

Paamayempari Avincatsarite.

⁷ Noyemisantaririnte, paamayempari Avincatsarite, irosati impocantajeari. Pinquenqueshireteri yora panquiveetatsiri, yoyeaquero ivanquire oitsoquitantajeari. Oparii incani, yoyeaquero. Osamani aisati, ari opariaji aisati. Coajica, ariorica ontimanaje oitsoqui, oshequi ontimanaque ovinaro, impoiji iroveshireimentearo panquitirori. ⁸ Aisati avirori, pincanteani paamaajeari Avincatsarite, eiro osamanititsi impocantajeari: piveshireimenteari. ⁹ Eiro, noyemisantaririnte, picantimatavacaajeitatsi. Ariorica pincatimatavacaya, icantimpicari: “Ainiro pantane”. Quempejitaapaque meeca yora Cantacoventajeitaqueeri, irotajantsi impocaje. ¹⁰ Pinquenqueshireteri yora camantantatsiniri peerani. Itiancaqueri Avincatsarite, irootaque iquenquetsatacotantarini. Peerani ipomerentsiventinirini, peerani yaamaacarini iriori Avincatsarite impocanteari. Meeca, aisati pishiajeiteri avirori. ¹¹ Pamene, ariorica pinquearioventeneri Avincatsarite paitapeerica, pinquimoshiretanaque. Ontimerica pinquematsicatimenteariri, iro cantaincha pinquimoshireventeri. Piquemacojeitaqueri Joponi, iquearioventiniri Avincatsarite maaroni yantayetiniri. Impoiji icavintsaaqueri, aisati ineshinoncataqueri. Piojeiti yashi yoiro icavintsanti, ineshinoncatanti.

Eiro picantashitatsi.

¹² Pamene, noyemisantaririnte. Paitapeerica pinquenquetsatacoteri, ariorica pintseeyea, eiro catsini picantashitatsi: “Ioti Tasorentsi otampaticati nocantiri, terica ontampaticateji oca nocantiri, nocoaque iroasanquetayenata”. Pincanterica: “Ario, nantempiro”, ario pimamatero. Pincanterica “Eiro nantirotsi”, eiro pantirotsi. Eiro catsini pamatavitanti: ariorica pamatavitante, iroasanquetaaquempi Tasorentsi.

Pinquenquetsatacayeri Tasorentsi.

¹³ ¿Picarajeitirimpashinoncaincari? Cameetsa pincanteri Tasorentsi incavintsayeri, iroavisacoteri. ¿Picarajeitirimpaquimoshiretatsiri? Pincanteri impampayeaventeri Tasorentsi. ¹⁴ ¿Picarajeitirimpamantsiari? Pincanteri incajemerita yora jivatacaajeitiriri quemisantatsiri. Cameetsa incanteri Avincatsarite iroavisacoteri, aisati intiritateperi quejitsi. ¹⁵ Ariorica inquemisantanote, ari iravisacotaje yora mantsiari. Irio Avincatsarite oavisacotajerine. Otimirica caari cameetsatatsi yantayetiri, aisati incavintsayeri, eiro iquenqueshiretajirotsi aisati. ¹⁶ Irootaque noncantantempiri: ariorica pantero caari cameetsatatsi, pincamantavacaajea aisati pincantajeiteri Tasorentsi: “Pincaivintsaajeitena, navisacojeitantzajeari”. Yora shirampari yoameetsantiri Tasorentsi, ariorica icantiri, oshequi imatasanotaqueneri. ¹⁷ Atiri inaveitani peerani Iriashini, iquempetaquee arori. Icantasanotiri Tasorentsi: “Eiro poariajirotsi meeca incani. Pinquenqueshiretacayerinoshinanca”. Ari avisanaque mava osarintsi, te omparajejincani quipatsiqui. ¹⁸ Icantajiri aisati: “Meeca nocoaque poariajero aisati incani”, impoiji opariaji, aisati oshiocanaji ivanquirepee joriopee.

¹⁹ Pamene, noyemisantaririnte: ariorica pincarajeiteri jocavetajearoneri oca queariotasananotsiri iquemisantavetari, pinquenqueshiretacajeri, pinquemisantacaasanotajeri. ²⁰ Piojeitero oca: yantavetacaro caari cameetsatatsi, iquenashiveetaca, irijateme Sharincaveniqui, iro cantaincha poavisacotajeri eiro ijatantatsi. Otimimotasanovetajari yantayetiri oshequi, iro cantaincha inquemisantajerica aisati, incavintsayeri Tasorentsi, eiro iquenqueshiretajirotsi aisati yantavetacari.

Narotaque sanquenatimpirori: *Santiago*

IJIVATAQUE PTERO ISANQUENATINIRI IYEMISANTARIRINTE

Ivetsajeitari.

¹ ¿Ainirompi noyemisantaririnte? ¿Tecatsimpa oyempine? Narotaque Petero sanquenajeitimpiori oca. Narotaque itiancane Jesoquirishito noquenquetsati. Nosanquenajeitimpido maaroni nojorioririnte, quemisantajeitiriri Quirishito, jaocapeerica pisavicajeitiri anta Pontoqui, Carashiaqui, Caparoshiaqui, Ashiaqui, Vitiniaqui, maaroni. ² Peerani icoyeajeitaquempi Apa Tasorentsi, icoaque intomintajeitajempi. Aisati oameetsashirejeitaquempi Ishire piquemisantantacariri Jesoquirishito; icamimentajeitaquempi, aparajatimentajeitaquempi iriraja yoavisacotantaquempi. Nocoaque irineshinoncatasanojeitempi, aisati cameetsa irisavicasaasanojeitempi.

Tsame ampasonquijeiteri Tasorentsi, tempa icavintsaasanojeitaquee.

³ Tsame ancamtajeiteri ashanincapée: “Icameetsatasanotaque Tasorentsi: yora Iriri Avincatsarite Jesoquirishito”. Icavintsaasanojeitaquee, yashijeitaquee: oquempevetaca iroaquera atimaji aisati, irootaque ashanincatantacariri. Yoitinaajiri itomi, irootaque ayojeitantzacari antinaajeitanaje arori, ancantaitatiyempani aneajeitapaaaje anta inquitequi. ⁴ Ainiro yovetsicajeitaquempi pisavicajeitantzapaajeeari anta inquitequi. Oncantaitatiyempani ontive, ocameetsatasanotaque, eiro otsoncatsi, ainiro iquempoyeaque-mpiro. ⁵ Piquemisantajeitaqueri Tasorentsi, irootaque itasoncacoventantaquempi; iquempoyeajeitaquempi irosati impocantajeari. Impoijini pineajeitero maaroni yovetsicajeitaquempi.

⁶ Queario, ariorica ompomerentsitimojeitempi paitapeerica, iro cantaincha eiro osamanititsi irosati pineantearori pinampi anta inquitequi. Ariorica pinquenqueshiretero oca, tempa ocameetsati pinquimoshireimentearo. ⁷ Ari yora vetsiquirori oro icotaquero, ojatanaca, impoiji yojocajiro ovitsijare quipatsi. Impoiji ineantacaro paamariqui, irootantearori iotasnotacarica oro. Aisati iriori Tasorentsi ineantapini-jeitaquempi irootanteari piquemisantasanotaquerica. Ora oro, oshequi opinavetaca, iro cantaincha ompeaquea; irompa ainti aquemisantaque, eiro apeatsi. Irootaque inea-cameetsatasanotantaqueeri, ariorica aquemisantasanotaque. Impoiji, ariorica impoque, incantajeitapaaquee: “Noneacameetsajeitaquempi: pincarajeitená anta inquitequi, pintsipajeitena ampincatsarijeite”.

⁸ Tequera pineajeiteri, iro cantaincha pintajeitaqueri, piquemisantajeitaqueri, piveshireimentatasanotacari catsini. ⁹ Piquemisantajeitaqueri, irootaque yoavisacotantaquempi, pishanincajeitantzacariri. ¹⁰ Peerani yora camantacoveitariniri Tasorentsi icoajeiveitani irioteme jaoca ancanteari avavisacoejtantajeari. Isanquenatacovetacari Tasorentsi, iojeivetani icavintsanti, iro cantaincha te iriotasanoteji. ¹¹ Timatsi oamejeitaqueriri Ishire Quirishito, iro cantaincha te inquemasanojeitavaqueroji. Oametaquerini, ocanti: “Oshequi iroashinoncayea, incamaque; impoijini impincatsaritanaje”. Iquenqueshirejeitacani: “¿Janicampa oquenquetsatacotiri? ¿Jaoca oncarate impincatsaritanaje?” ¹² Iro cantaincha icamantaquerini Tasorentsi: “Eiro pineiritsi avirori, irintiquea neajerine impoitanajantsineri intimaje coajicani”. Tempa arojeitaque meeca iquenquetsatacotiniri. Meeca otiancaquena Ishire Tasorentsi noquenquetsatacaa-jeitaquempi, nocamantajeitaquempi yoavisacotanti Quirishito. Aitaque icoasanojeiveta inampirepee Tasorentsi iriotasanotero jaoca acantajari avavisacotantajari.

Oshequi icavintsaajeitaquee Tasorentsi, tsame aveshireimenteari.

¹³ Meeca pinquenqueshirejeitanaquea, cameetsa pisavicajeite. Piojeite ariorica impocaje Jesoquirishito aneajeitavaqueri, aisati oshequi incavintsaajeitapaaquee; ari piveshireimentajeiteari. ¹⁴ Tempa irio Tasorentsi ashijeitimpuri. Ari pinquemisantajeiteri. Peerani te piojeiveitearini, irootaque pantashitantaveitaroniri caari cameet-satatsi. Meecaquea piojeitiri: eiro piquempetajatsi aisati. ¹⁵ Icameetsatasanotaque

yora coyeajeitaquempi yoavisacotajimpi: meeca pinquempejeiteari iriori, poameetsantasanyetero maaroni pantayeteri. ¹⁶ Tempa peerani isanquenayeetironi oca icantitacaniri Tasorents: “Nocameetsatasanotaque narori, irootaque nocoantacari pincameetsatasanotanaje avirori”.

¹⁷ Ari meeca pirintajeitacari: ocameetsati piojeite iojeitaquempi maaroni, itsoteajeitaquempi. Ari incantacoventempi, inquenqueshirejeitero jaoca ocantari maaroni pantajeitiri. Ocemeetsatirica, ari iraacameetsatempi. Terica oncameetsateji pantayetiri, iroasanquetayempi. Pimpincatsajeiteri meeca, cameetsa pisavicajeite irosati pareejeitanteari inquitequi. ¹⁸ Peerani patsipetashiveitaroni pantashiyeyeveitaroni yamejeitaniri ajorioririnteni, iro cantaincha yoavisacojeitaquempi Tasorents. Te impinaventempiroji perata aisati oro yoavisacotantempi. Te onanteji, coajica ari ontsoncajea iroori. ¹⁹ Irintiquea itiancaqueri itomi, yora inintasanotiri catsini. IcamimentaqueMPI irinti, aparajatimentaqueMPI iriraja pavisacojeitantzari. Arriorica yantiro ajoriorrinte caari cameetsatatsi, yamejeitari yoiniri Tasorents ovisha, itaaqueneri. Apatiro yoiniri cameetsatasanotatsiri ovisha. Aisati iquempetaca iriori Quirishito, icameetsatasanotaque: tecatsi irantane. ²⁰ Peerani, tequerani ontimeni quipatsi, icantini Tasorents: “Coajica nontianqueri notomi quipatsiqui iroavisacojeiteri atiripee”. ²¹ Ari ipoqua, icamimentajeitaquempi, impoiji yoitinaajiri Tasorents, yaanajiri aisati anta ocameetsaitetinta. Meeca piojeitaque queario icavintsaasanojeitaquempi, ari cameetsa pinquemisantajeiteri, piojeite irootaque savicacaajeitelpineri anta inquitequi.

²² Ari piquemisantaquero maaroni yoamejeitaquempi Tasorents, tempa otam-paticatasanotaque maaroni icantaqueri. Meeca yoameetsashirejeitaquempi, aisati icoacaajeitaquempi pinintasanojeiteri maaroni piyemisantaririnte. Pinquearioventero, pinintavacaasanojeitea catsini. ²³ Peerani otimimpi piniro, meeca piquempejeitacari ashijeitimpire, pincamajeite avirori. Iro cantaincha meeca piquemisantaquero irineane Tasorents, ocantani otimi. Aisati yashijetajimpi, piquempejeitajari iriori: pincantatatiyempani pintime inquitequi. ²⁴ Tempa ocanti Sanquenarents: “Ashiaquero tojari: oshintsiti ocami, oshintsiti opatsai. Timatsi amajeivetacari, iro cantaincha oquempetaca oteapee tojari: ompeajea, ontsoncajea. ²⁵ Iro cantaincha oncanteani ontime irineane Avincatsarite: eiro opeatsi irointi”. Irootaque irineane noamejeitaquempi: icavintsa-jeitaquee Tasorents, yoavisacojeitaquee. Tempa ocameetsataque.

2

¹ Meeca eiro piquisatsi, eiro pamatavitanti, eiro pishemeti, eiro paamaari pishaninca, eiro picantimatiritsi. ² Yora iroquaera timatsi yatsotapinitiro otsomi iriniro, irootaque iqueveantacari. Aisati meeca avirori, pincoasanoteri irineane Avincatsarite: pineanat-apinitero, pinquenqueshiretapinitero, piotasanotantearori iriori. ³ Tempa piojeitaque icavintsaasanojeitaquempi, ineshinoncajeitaquempi. ⁴ Arriorica avetsiquero mapipanco, ajivatero avatiyero quisotacayerone mapi avanquetantearori oshanincabee. Eirorica otimi, eiro oquisotitsi pancotsi. Irootaque Quirishito shiaquerori mapi, iro cantaincha yaneasanoti irinti, aisati yoaneajeitaquee arori. Itseenajeivetacari ashanincabee, iro cantaincha ineacameetsatasanotaqueri Tasorents irinti. Eirome itimime, eiro avavisacotajame. ⁵ Avirojei, piquempejeitacaro mapipee yoanqueyeetaqueri jenioquiji. Yoaneajeitaquempi avirori, pincantatatiyempani anta inquitequi. Piquempejeivetacaro pancotsi, isavicanteri Tasorents; pantajeiteneri maaroni icoacaajeitaquempi. Piquemisantajeitaqueri Jesoquirishito, irootaque ineacameetsatantarori maaroni pantajeitiniriri. ⁶ Irootaque ocantiniri Sanquenarents: “Icanti Tasorents: ‘Nontianqueneri joriopee Quirishito, oshequi noneacameetsataqueri. Nocoyeaqueri iroavisacojeiteri maaroni quemisantajeiterineri, eiro yashinoncaajatsi iriori’”.

⁷ Avirojeitaque quemisantajeitiriri, tempa pineacameetsajeitaqueri. Irintiquea maaroni tseenajeitiriri, te irineacameetsateri. Oquenquetsatacotaquerini Sanquenarents, ocanti: “Yora vetsiqueronomeri pancotsi itseencaquero mapi, icanti: ‘Te oncemeetsateji’. Iro cantaincha ineacameetsatasanotaqueri Tasorents.” Pinequero, itseenajeitaqueri jorio Quirishito, iro cantaincha ineacameetsatasanotaqueri Tasorents.

⁸ Aisati ocanti Sanquenarents: “Yora Quirishito ishiaquero mapi itsitincacari atiri

ipariantacari. Queario, te iriojeitavaqueri, icomijeitavacari". Pineaquero, jero oca ishiacantaqueri: iro caari iojeitantari, te inquemisanteroji icantavetacariri Tasorentsi, irootaque iroasanquetaajeitanteeariri.⁹ Iro cantaincha icoyeasanojeitaquempi yoavisacojeitantaquempi. Pantaveejeitiniri yora Pincatsarisanori. Yoameetsajeitaquempi, pishanincatasanojeitacari Tasorentsi. Te piojeiveiteani, oquempetaca pitimini meeca tsiteniriqui; iro cantaincha icoyeajeitaquempi, iotaacaasanojeitaquempi, oquempetaca pitimi meeca quitateriqui. Meeca icoacaquempi pincamantajeiteri atiri: "Ocameetsasanotaque yantajeitaqueeneri Tasorentsi".¹⁰ Peerani te pincameetsaveiteani, iro cantaincha meeca pishanincajeitacari Tasorentsi. Peerani te piojeiveiteani icavintsaavetaquempi, meeca piojeiti, piveshireimentajeitacari.

Cameetsa pisaviquimojeiteri itsipapee atiri.

¹¹ Noshaninca, piojeitaque nonintajeitaquempi. Te pishanincatasanojeiteariji yora pisaviquimojeitiri, tempa pinampitasanotearo inquite. Eiro pantashiyetarotsi caari cameetsayetatsi yantayetiri itsipapee atiri iriori. Ariorica pantashiyetearo, eiro picameetsashirettsi.¹² Icantashijeiveta itsipapee atiri: "Te incameetsajeiteji joriopee", iro cantaincha cameetsa pisavacajeite, iriojeitanteari queario piquemisantajeitaqueri Tasorentsi. Impoiji inquemisante iriori, aisati ariorica impocapaaje Quirishito, incantajeite: "Tempa icameetsataque Tasorentsi".

Pinquemisantajeiteri pincatsariventajeitiriri pishaninca.

¹³ Ariorica piquemisantaqueri Avincatsarite, ocameetsati pinquemisantajeiteri aisati iriori pincatsariventajeitimpri aca quipatsiqui. Pinquemisantajeiteri yora pincatsariventajeitiriri maaroni savicajeitatsiri,¹⁴ aisati pinquemisantajeiteri maaroni itiancanepee. Itianquiri iroasanquejeiteri caari cameetsatatsi irisavacajeite. Irintiquea cameetsatatsiri isaviqui irineacameetsateri.¹⁵ Ainiro caari iotiri Tasorentsi, icantimatiri quemisantatsiri. Irootaque icoantacari Tasorentsi pisavacajeite cameetsa inquenqueshirejeitanteari, irimajerejeitanteari.¹⁶ Ari piquemisantajeitaqueri Tasorentsi, meeca te incoyeji imperanajeitempi iriori pinquemisantajeiteri pincatsariventajeitimpri aca quipatsiqui, tempa ocameetsati piotashitea pimpincatsajeiteri. Te oncameetsateji pantajeitero caari cameetsatatsi.¹⁷ Paacameetsajeiteri itsipapee atiri, pinintaajeiteri ayemisantaririnte, pimpincatsajeiteri Tasorentsi, aisati pimpincatsajeiteri yora pincatsariventajeitiriri pishaninca.

Yoamejeitiri namparentsipee.

¹⁸ Namparentsi, pinquemisantajeiteri yora nampitimpri, pimpincatsajeiteri. Eiro apaniro pipincatsatiri cavintsaquempi, neshinoncatimpri; irinti pimpincatsateri aisati peranatimpri, quishimpri.¹⁹ Pamene, ariorica iquisashitaquempi nampitimpri, tempa iotaquero Tasorentsi; aisati ariorica yoashinoncashitaquempi, iotaquero aisati. Eiro pipiatsataritsi nampitimpri. Ariorica piquemisantiri Tasorentsi, tempa ari incavintsaasanojeitempi coajica.²⁰ Pamene, ariorica pamataviteri nampitimpri, ariorica impasatimentempiro. Eirorica pipiatsavetari, iro cantaincha ¿ocameetsatimpa pamatavitaqueri? Eiro ineacameetsatimpitsi Tasorentsi. Iro cantaincha ariorica impasatashitempi yora nampitimpri aisati te pimpiatsateari, ari irineacameetsatempri Tasorentsi.²¹ Irootaque icoacaquempi: eiro pipiatsataritsi yora quisashitimpri. Pinquenqueshireteri iriori Quirishito: oshequi ineacatsitimentaquempi, icoaque pinquempeteari.²² Tecatsi irante irinti caari cameetsatatsi, aisati te iramatavitanteji.²³ Te impiatsateariji yora quisatsajeitaquerir, aisati te inquisatsateriji yora oashinoncaajeitiriri. Irintiquea iquenqueshiretaqueri iriri, yaventacari, iotaque ari irintacoteari iriori.²⁴ Icamimentajeitaquee anta coroshiqui, eiroquea iquenqueshiretantajarotsi aisati Tasorentsi caari cameetsatatsi antajeitiri. Meecquea meeca, eiro antapinitajirotsi aisati caari cameetsatatsi, irooti antapinite cameetsatatsiri. Oshequi ineacatsitimenta-jeitaquee, eiro ashinoncantatsi arori.²⁵ Piojeitaque yora ovisha te aneeroji iotantari: oshequi iquenashiyeta. Eirorica itimitsi shenterine impeaarantaquea. Aitaque piquemejeiveitarini ovisha, te piojeiveiteani. Iro cantaincha timatsi meeca Shentajeitimpri, iquempoyeasanojeitaquempi.

Yora shirampari aisati ijina, ocameetsati iraacameetsatavacaya.

¹⁻² Tsinane, pimpincatsateri pijime. Terica inquemisante meeca, iro cantaincha ocameetsati irineaqueMPI piquemisantsanotaque aisati cameetsa pisaviqui. Impoijiquea irineacameetsatempI, aisati arioricampa pimateri pinquemisantacayeri. ³ Eiro apatiro pincoashitea poameetsantero piishi, poaneenquea, pinquitsaatea, paitapeerica. ⁴ Irootiquea pincoasanote pincameetsashiretanaque, pineshinoncatsateri pijime. Irootaque icoacaasanotaquempi Tasorentsi. ⁵ Aitaque oquempejeitaniri peeraniniri quemisantiriri Tasorentsi: cameetsa osaviquini, opincatsatirini ojime. ⁶ Ora Sarani oquemisantirini Avaramani, oshequi opincatsatarini. Ariorica pintime cameetsa, pinquempetearo, impoiji eiro pitsaroacaaritsi pijime: eiro otimitsi inquishimentempi.

⁷ Aisati shirampari: te omoncaratempI pijina, te oshintsitasanoteji, irootaque nocantantimpI pincavintsayero, pineacameetsatero. Tempa pimoncaratavacaaca, icavintsaaJeitaquempi Tasorentsi pisavicajeitanteeari coajica anta inquitequi. Eirorica picavintsairo pijina, eiro iquemisantimpI Tasorentsi ariorica pinquenquetsatacaveteari.

Corajica iroashinoncayeeteri antirori cameetsatatsiri.

⁸ Aisati noncantajeitempI maaroni: pinquempetavacaajeitea, pineshinoncatavacaajeitea, pinintajeiteri piyemisantaririnte, pincavintaavacaajeitea, eiro pishemejeititsi. ⁹ Terica oncameetsateji yantimotaquempi pishaninca, eiro pishemaritsi; ariorica inquisatsatempI, eiro pipiataritsi. Pincanteri Tasorentsi incavintsayeri. Irootaque icoyeajeitantaquempi Tasorentsi: icoaque incavintaajeitempI. ¹⁰ Tempa irootaque ocantiniri Sanquenarentsi: “Pincoquerica pinquimoshiretanaque aisati pisavique cameetsa, eiro pi quisatsatiritsi pishaninca, aisati eiro pitseeyatsi. ¹¹ Eiro pantayetirotsi caari cameetsayetatsi, irooti pantayete cameetsayetatsiri. Pincoasanotaque pintime cameetsa. ¹² Yamenapinijeitiri Avincatsarite maaroni quemisantajeitiriri, ishentajeitiri. Iquemapinitiri ariorica iquenquetsatacairi. Iro cantaincha te incavintsayeriji antapinitirori caari cameetsatatsi”.

¹³ Pincoasanoterica pantapinitero cameetsatatsiri, ¿ariompa intime coatsiri iroashinoncayeMPI? ¹⁴ Ariorica intime aparo quisashitimpineri, iro cantaincha intasoncacoventempI Tasorentsi. Eiro pitsaroacaaritsi yora quisashitimpI, eiro picantashiretitsi, ¹⁵ irinti pimpincatsatasanoteri Quirishito. Ariorica irisampiyetempI: “¿Paita piquemisantantacariri Jeso quirishito?” Ari cameetsa pancanaqueri, eiro pi quisatsatanaqueritsi. Pincanteri paita piotantacari iraanajempi inquitequi. ¹⁶ Eiro catsini pantirotsi caari cameetsatatsi. Impoiji iriotanaque yora quisaqueMPI irio Quirishito oameetsantimpI. Impoiji aisati impashiventanaquea, iriotanaque te oncameetsateji incantimatempI. ¹⁷ Ariorica incoacayempi Tasorentsi iroashinoncayeetempI, iro cantaincha oncameetsate pashinoncaimentearo cameetsayetatsiri pantayeteri. Te oncameetsateji pashinoncaimentearo caari cameetsayetatsi pantayeteri.

Yantayetaqueri Quirishito.

¹⁸ Ari te ancameetsajeiteji arori, oshequi antayetaquero caari cameetsatatsi, iro cantaincha icameetsatasanotaque irinti Quirishito. Icamimentajeitaquee irinti, yoavisacojeitaquee; icoaque aneajeitantaJeariri Tasorentsi. Icamasanovetaca; iro cantaincha ishire, te oncameji. ¹⁹ Icamantacari, ijashiretapainti anta Sharincaveniqui, anta yoaquerinta Tasorentsi camaaripee aisati ishireni tseencantatsiniri. Ari iquenquetsatacaveri. ²⁰ Peerani, te inquemisantajeiteni iriori ishaninca Noeni. Yovetsicantavetacaroniri ivito, icantapinijeivetacari ishaninca peerani: “Pinquemisantajeiteri Tasorentsi”, iro cantaincha te inquemisantajeiteri. Ari peerani yamavenavetacari Tasorentsi, iro cantaincha impoiji ishemanacari, itiancaquero antearo incani, incajaretanaque, maaroni. Aanaqueri maaroni, itsitiaeitanaque, pomiririri. Ari icarati avisacotajantsiri pitotsiqui ocho. ²¹ Ari ishiajeivetacarini iriori vaotisajeitachari meeca. Ariorica avaotisataquea, te iro ancaate, irooti ashiacantiro icamimentajeitaquee Jeso quirishito, aisati

itinaanaja, yoavisacojeitaquee. Aisati ashiacantiro aventari Tasorentsi yoameetsashire-jeitantaqueeri. ²² Ari meeca ijataji Jeso quirishito anta inquitequi, isaviquimotapaajiri Tasorentsi iracosanoriqui: icaratiri ipincatsariventajeitee. Aisati oshequi ipincatsajeitiri inampirepee, itsipapee pincatsarivetachari, maaroni.

4

¹ Ari piojeitaque otimi oshequi iquematsicatacari Quirishito, te incoyeji eiro iquematsicataro. Aisati avirojei, eiro picoajeititsi eiro piquematsicatarotsi paitapeerica. Pamene, ariorica pinquematsicatearo paitapeerica, eiro picoajitsi pantapinitero caari cameetsatatsi ² aisati icoayetiri atiripee. Irointiquea pincoasanotanaque panteneri Tasorentsi paitapeerica incoacayempi, irosati pincamanteari. ³ Peerani pantaveitaroni yantapiniyetiri yora tseencantatsiri: moncarataca, eiro papiitajirotsi aisati. Jero itsinampanti iriori, yantayetiro caari yai, ishinkuitapinita, imayempitavacaapinijeita, iquisavacaajeitaca, ipincatsatashitacaro ijitasorentsitsashitari. ⁴ Te iriojeiteji iriori, icanti: “¿Paita caari iquempetantana quemisantatsiri?” Yoajeitanaquempi cavaco, irosati icantimajeitantaquempi. ⁵ Iro cantaincha coajica impoche Quirishito incanta-coventajeiteri maaroni atiri: aneajeitatsiri aisati camajeitatsiri. Irisampijeiteri tseen-cantatsiri: “¿Paita piquisantacariri quemisantanari? Te oncameetsateji”. Eiro yaquir-itsi, oshequi impashiventanaquea. ⁶ Peerani yora Jesoshi iquenquetsatacaajeitaqueri savicaveitachaniri, icamantajeitaqueri: “Ariorica pinquemisante, pincantaitatiyempani pintime anta inquitequi”. Ari icamajeteitaque: tempa yantajeitaquero caari cameetsatatsi, irootaque icamajeteitacari, iquempejeitacari maaroni atiri. Iro cantaincha yoitinaajiri Tasorentsi maaroni quemisantajeitiriri, isavicacaajeitaqueri anta inampiqui. Meeca iquempejeitacari Tasorentsi: eiro icamajetajitsi aisati.

Tsame ancavintsayeri ayemisantaririnte.

⁷ Pamene, irotantsi omoncarataquea incantacoventantajeiteeri Tasorentsi. Cameetsa pisaviceite catsini, pinquearioventero pinquenquetsatacaapinijeiteri.

⁸ Pincoasanojeite catsini pinintavacaajeitea. Ariorica pinintavacaajeitea, eiro piquenqueshiretirotsi caari cameetsatatsi yantayetiri itsipapee, irointi pincavintaavacaajeitea. ⁹ Pincanteani pineshinoncajeitavaqueri maaroni quivantempineri.

¹⁰ Tempa otimi imatacaaquempi Tasorentsi, ari pimamatero pintacotanteariri pishaninca. Piotacaajeiteri iriori icavintaajeitaqueri Tasorentsi.

¹¹ Ariorica pinquenquetsatacayeri pishaninca, pinquearioventero povaajeneri irineane Tasorentsi. Ariorica pintacoteari pishaninca, pincanteri Tasorentsi iramitacotempi, aitaque irimatacaquempi. Ariorica anquemisantasanofteri Jeso quirishito, incantajeite itsipapee atiri: “Tempa icameetsatasanoti Tasorentsi”. Tsame aneacameetsajeiteri maaroni, ampincatsajeiteri: ancantaitatiyempani. Aitaque ancantajeiteari.

Icantiri: “Ariorica pinquematsicatimenteari Quirishito, pinquimoshiretanaque”.

¹² Noshaninca, oshequi nonintajeitaquempi. Niotaque oshequi yoashinonqueetaque-mpi. Eiro poanaquetsi cavaco, aitaque yoashinonqueetiri aisati itsipapee quemisan-tajeitatsiri. ¹³ Tempa aisati yoashinonqueetaqueri iriori Quirishito, meeca piquem-pejeitacari: ari pinquimoshirejitanque. Aisati, coajica impincatsaritapaaque ir-inti, irosati pinquimoshireventasanotanteariri. ¹⁴ Ariorica inquishimenteeyetempiro piquemisantiri Quirishito, pinquimoshiretanaque: tempa aitaque itasoncacoventaque-mpi Tasorentsi. Quiso oajeitaquempi Ishire, aisati coajica cameetsa pisaviquimoteri anta inquitequi.

¹⁵ Iro cantaincha eiro poantitsi, eiro picoshititsi, eiro pantayetirotsi caari cameet-sayetatsi, eiro pashereiritsi pishaninca, maaroni. Ariorica inquishimenteeyetempiro ocapee, pineashiiitetearove. ¹⁶ Iro cantaincha ariorica pinquemisantasanofteri Quirishito, irootaque inquishimentanteetempiro, eiro otimitsi pimpashiventimenteri. Irointi pincante: “Tempa icameetsataque Tasorentsi, ishinetana noquematsicatimentacari Quirishito”. ¹⁷ Pamene, irotantsi incantacoventajeitee Tasorentsi: irijivajeitee maaroni arori itomintajeitari, impojiquea iriori tseencajeitiriri. Ariorica irintacojeitee

arori, tempa iroashinoncaasanojeiteri yora caari quemisantajeitiri. ¹⁸ Tempa ocantini Sanquenarentsi: “Ari yoavisacojeitaqueri Tasorentsi yora quemisantajeitiriri yoameetsajeitaqueri, iro cantaincha irovetainchia irijajeiteme Sharincaveniqui. Irintiquea yora tseenquiriri Tasorentsi, yantapinitiro caari cameetsatatsi: tempa ari irashinoncaasanotaquea irinti”. ¹⁹ Ariorica pantiniri Tasorentsi icoacaquempi, irootaque picatsitimentantacariri, ocameetsataque. Pinquearioventero pantayetero cameetsayetatsiri. Pincanteri Tasorentsi: “Pinquempoyejena”. Tempa iriotaque vetsicaquempi, inquempoyeasanotempi, eiro yamatavitimpitsi.

5

Yora Petero yoametaqueri jivatacaaajeitiriri iyemisantaririnte.

¹ Jero oca nosanquenateneriri quenquetsatacantatsiri. Tempa narotaque narori quenquetsatacantatsiri. Peerani noneasanotaqueri Quirishito ineacatsitacaro oshequi. Aisati coajica, ariorica impoque Avincatsarite impincatsariventantapaaje, nontsipateari nompincatsariventante narori. Ari meeca timatsi noninti noncamantajeitimpire:

² yora ashitariri irovishate intacojeitacari irovishate. Aisati avirori, pintacotapini-jeiteari ashanincaphee piquemisantacaajeitaqueri. Avisati coashitachane, eiro itimitsi peranatemperni. Te iro pinquenquetsatacapinijeitanteeariri paitanteariri iirequite, irointi pincoasanotaque pintacojeiteari. ³ Eiro pishintsitsajeitiritsi, irointi cameetsa pintime, inquempejeitanempire iriori. ⁴ Coajica impoque yora pincatsariventajajeeri, iraajeitanajee, irisavicacaajeitapaajee anta inquitequi. Ancantaitatiyempani asavicajeite anta ocameetsaiteti catsini.

⁵ Aisati evancaripee, noncamantempi: pimpincatsajeiteri maaroni timacaajeitimpi. Eiro pishemejeitsi, irointi cameetsa pincavintsaavacaajeitea. Yora Tasorentsi iquisaqueri yora shemetatsiri, iro cantaincha ineacameetsajeitaqueri caari shemejeitatsi. ⁶ Pimpincatsajeiteri iriori: tempa itasorentsitasanotaque, ipincatsaritasanotaque; impoiji irisavicacaajeitempi cameetsa catsini. ⁷ Eiro piquenqueshireatsi, eiro poashiretatsi. Otimirica piquenqueshireyetiri, pincanteri Tasorentsi: “Oshequi noquenqueshireaca. Pamitacotena eiro noquenqueshireantajatsi aisati”. Ariorica pincanteri, ari piveshireimenteari iriori. ⁸ Queariompa: paamayeari camaari. Oshequi catsini ique-naquenayetaque, icoaveta irojocacaajeiteerome aquemisantajeiti maaroni: eiro catsini aquemisantajatsi. Iquempetacari anteari maniti, ariorica itasheasanotaque: yoari iovintsane, itsoncasanotaqueri, te intimeji timaarantajantsine. ⁹ Pinquemisantasano Avincatsarite pimpiatanteeariri camaari. Queario ontimayete pinquematsicayeteari, iro cantaincha tempa aisati iquempejeitaquempi iriori ayemisantaririnte anta otsipapeequi quipatsi. ¹⁰ Eiro osamanitasanotitsi pinquematsicatearo: ioti Tasorentsi pipincatsaqueri Quirishito, ari impoiji iraajeitanaqueMPI anta inquitequi. Pincantaitatiyempani pisavicaaje anta ocameetsaitetasanotinta catsini. Yashi yoiro icavintsanti: iroameetsantasanojeitempi, iriveshireacaajeitempi, impeavajempi pincatsari avirori, eiro pican-tashiretajtsi aisati. ¹¹ Tsame maaroni ampincatsatasanojeiteri, ancantaitatiyempani. Iroove, icameetsatasanotaque catsini.

¹² Jeri yoca Shirivano, iriotaque aanajempirone oca nosanquenare. Oshequi noneacameetsatiri: iriotaque ayemisantaririnte, iquearioventiro iquemisanti. Ari nocantaquempi oshequi icavintsaasanojeitaquempi Tasorentsi, queario nocantaquempi. Meeca pinquemisantasano Avincatsarite piveshireimenteari iriori. ¹³ Ivetsajeitaquempi maaroni ayemisantaririnte aca Vavironiaqui, tempa irisati icoyeane Avincatsarite iquemisanta-jeitiri. Aisati ivetsajeitimpri noamere Maricoshi. ¹⁴ Paacameetsatavacaajeitea maaroni, pincavintsaavacaajeitea. Nocantiri Tasorentsi: “Pincavintsaajeiteri maaroni quemisantiriri pitomi, cameetsa pisavicaacaajeiteri”.

Narotaque sanquenajeitimpiori: *Petero*

YAPIITAJINIRI PTERO ISANQUENATINIRI IYEMISANTARIRINTE

Ivetsajeitari.

¹ ¿Ainirompi noyemisantaririnte? ¿Tecatsimpa oyempine? Narotaque Shimo Petero sanquenajeitimpiori. Narotaque itiancane Jesoquirishito, nantiniri iriori paitarica icoacaaqueunari. Tempa amoncaratavacaajeitaca aquemisantajeitaqueri Tasorentsi aisati Jesoquirishito, yora oavisacojeitaqueeri. Irootaque yoameetsajeitantaqueeri. ² Ari piojeitaqueri, irootaque oshequi incavintsaajeitantempiri aisati cameetsa irisavicacaa-jeitantempiri.

Ocameetsati anquearioventeneri Tasorentsi maaroni antajeiteneri.

³ Ari icoyeajeitaquee Tasorentsi ancameetsajeitanteari aisati cameetsa asaviquimo-jeitanteariri anta ocameetsaitetinta. Ariorica ayojeiteri, intasoncacoventajeitaquee cameetsa asavicajeitanteari aisati cameetsa anquemisantanteeariri. ⁴ Oshequi intasoncacoventajeitaquee anquimoshireimentantajeiteariri catsini, irimataqueenero maaroni icantaqueeri. Iromitacojeitee eiro acoantaro antero caari cameetsatatsi. Aisati iramitacojeitee anquempejeitanteariri iriori. ⁵ Ariorica acoajeitaque intasoncacoventajeitee, ocameetsati ajivataque anquemisanteri. Ariorica anquemisanteri, impoiji ocameetsati ancameetsatanaque. Ariorica ancameetsataque ocameetsati aisati ayotasanotanaque paitarica icoacaqueeri. ⁶ Ariorica ayotaque paitarica icoacaqueeri, ocameetsati aisati aamaventanaquea arosati amatantearori. Ariorica aamaventanaquea arosati, ocameetsati anquearioventero icoacaqueeri. Ariorica anquearioventero icoacaqueeri, ocameetsati aisati ampincatsatasanotanaqueri. ⁷ Ariorica ampincatsatasanotanaqueri, ocameetsati aisati anintajeitanaqueri maaroni ayemisantaririnte, ancavintsaajeitana-queri maaroni ashanincajei. ⁸ Ariorica pimatasanojeitanaquero maaroni ocapee, ari oshequi pimataqueneri Avincatsarite Jesoquirishito, aisati piotasanotanaqueri. ⁹ Yora caari majeitiro ocapee te iriotasanoteriji Avincatsarite, te inquenqueshireterozi icav-intsairi. Oshequi yantajeitironi caari cameetsatatsi, iro cantaincha icavintsaasanota-queri, yoameetsataqueri, te inquenqueshireajerozi aisati. ¹⁰ Meeca, noyemisantaririnte, pinquearioventasanotero panteneri Tasorentsi maaroni icoacaajeitaquemppiri, te oncameetsateji irantsipetashitearo icoyeaquempi pijatanteari anta inquitequi. Aisati eiro pojouriotsi piquemisantiri, ¹¹ oncantateaquea iraantanajempiri anta inquitequi, anta icantani ipincatsariventanti Avincatsarite Jesoquirishito: yora oavisacojeiteeri.

Icantiri: "Eiro pipeacotarotsi oca nocantaquemppiri".

¹² Te iroquera pinquemajeitero oca nocantaquemppiri: piojeitaroni, aisati pimayeta-quero cameetsa. Iro cantaincha nampiitajempiro aisati nonquenqueshiretacajemppiro. ¹³⁻¹⁴ Iotacaquaena Avincatsarite Jesoquirishito eiro osamanititsi noncamanteari. Iro cantaincha nonquenqueshiretacajemppiro irosati noncamanteari. ¹⁵ Impoiji, ariorica noncame, eiro pipeacotantarotsi, irosati pinquenqueshiretantaquemppiri.

Tampatica oamejeitaquee irineane Tasorentsi.

¹⁶ Tempa nocamantajeitaquempi coajica impocaje aisati Avincatsarite Jesoquirishito, oshequi impincatsaritapaaque. Queario oca nocantaquemppiri, te noncamantajeit-empiro naamaashijeitacari. Tempa narojeitaque neasanojeitaqueri Jesoshi peerani ishipaquireaque aisati itasoncantayetaque. ¹⁷⁻¹⁸ Peerani ijatantacari Jesoshi toncaariqui, noijatanaqueri narori, aisati itsipapee iroamere; noneasanojeitaqueri ishipaquire-anaque, aisati noquemajeitavaqueri Apa Tasorentsi, yora cameetsatasanotatsiri. Icantiri: "Iriotaque yoca notomi nonintasanotiri, oshequi noneacameetsatasanotaqueri". Irosati nopincatsatasanojeitantanacariri Jesoshi. ¹⁹ Timatsi aisati isanquenajeitiniri yora camantantatsiniri peerani: iotacaasanojeitaquee queario impocasanotaje Quirishito, impincatsariventajeitajee. Ocameetsati pinquenqueshiretasanojeitero ocantiri San-quenarentsi piotanteariri jaoca icanta. Oquempetacaro atsiota tsiteniriqui: eirorica

atsiota, eiro aneitsi. Ari ocameetsati pincanteani pinquenqueshirejeitero, irosati impocantajeari; impoiji iriotacaasanojeitempi, onquempetimojeitempi oquitaitetasanoti. ²⁰⁻²¹ Nocoaque piotasanojeitero oca: ora isanquenare yora camantantatsiniri otampatitacasanotaque. Te irioteniji intacarori, yora camantantatsiniri, caari oni irineane iriori; irointi oamejeitaqueri Ishire Tasorentsi, isanquenatantacarori irineane.

2

Iquenquetsatacotiri amavatitantatsiri.

¹ Ari peerani itimini quenquetsatacaaajeitiriniri joriopee, iro cantaincha yamatavijeitirini, aisati intime meeca amatavijeitimpineri avirori. Iroamejeitempiro tseeyantsi, intseeyacoteari Tasorentsi. Tempa ayojeitaque icamimentajeitaquee Jesoshi ajajeitanteari inquitequi, iro cantaincha incantanirote yora amavatitantatsineri: "Eiro apincatsatiritsi Jesoshi". Irootaque iroasanquetasanotanteariri Tasorentsi. ² Intime oshequi oijajeiterineri: inquempejeiteari, irantayetero caari cameetsatatsi; irootaque intseenqueetanteariri Quirishito. ³ Oshequi iramatavijeitempi, iroametashiyetempiro paitapeerica iraitantempiriri piquirette. Peerani icanti Tasorentsi: "Aitaque noasanquetasanojeiteri yora amavatijeiterineri quemisantatsineri". Queario, eiro osamanititsi irijajeite Sharincaveniqui. ⁴ Peerani yora inampirepeeni, ipiatsajeitacarini Tasorentsi, yantayetaquero caari cameetsatatsi. Ari yoasanquetaajeitaqueri, yojocajeitaqueri anta Sharincaveniqui, anta otsiteniitasanotinta. Aitaque itimaqueri iriori anta, irosati incantacoventanteariri Quirishito. ⁵ Pamene, peerani yoamaajeitaquerini Tasorentsi yora ishanincapeeni Noe. Te impincatsajeiteriji Tasorentsi, irootaque itiancantacanariri incani aajeitaqueri. Tecatsi pashini iroavisacote, irinti Noe aisati ishanincasanori iriori, caratatsiri 7. Tempa iriotaque quenquetsatacaaajeivetacariri ishanincapee, camantajeivetacariri jaoca incanteameri iravisacojeitantzajeameri. ⁶ Peerani itaajeitaqueri Tasorentsi maaroni soromasatini, aisati maaroni comorasatini; itaajeitaqueri ivancopee, irovararo, maaroni. Otaaca maaroni, poyere. Ocameetsati meeca anquenqueshirejeitero yantaqueri Tasorentsi ayojeitanteari iroasanquejeiteri maaroni caari pincatsatiri. ⁷⁻⁸ Ari icameetsataqueni Orotini; isavicaveitani anta, iro cantainchate irineacameetsateroji oca yantajeitaqueri yora isaviquimojeitiri. Oshequi iquenqueshiretanaca maaroni quitateri: "¿Paita caari iquemisantajeitantzari Tasorentsi?" Ari ineacameetsataqueri Tasorentsi iriori, irootaque caari itaantari.

⁹ Ari iotasanoque Tasorentsi yoavisacojeitaqueri pincatsajeitiriri, eiro iquempetantaritsi tseencantatsiri. Irinti yora caari cameetsajeitatsi, iroashinoncaajeitajeri, irosati impocanteari incantacoventantajeiteariri. ¹⁰ Aitaque iroasanquejeiteri maaroni coatsiri irantayetero caari cameetsayetatsi, antashiyetarori paitarica icoayetiri, jeri aisati yora tseenquiriri Avincatsarite. Tecatsi impincatsajeite, oshequi ishemejeiti, te intsaroyeji icantimajeitiri inampirepee Tasorentsi. ¹¹ Ari isavicajeiti iriori anta Avincatsaritequi, aisati oshequi ishuntsiti, oshequi ipincatsariti, iro cantainchate impiateariji yora cantimajeitiriri. ¹² Iquempejeitacari iriori poshiniripee, tecatsi iriote. Iquenashiyeta, impoiji imanatiri atiri, yoajera, shemi. Yora tseencantatsiri icantimatashiyetaro caari ioti, irootaque irijajeitanteari Sharincaveniqui, intsipajeiteari camaari. ¹³ Yoashinoncantajeiti meeca: coajica irashinoncaajeitaquea iriori. Iveshireimentashiyetaro timayetatsiri meeca: te inquenqueshireteroji jaoca incanteari coajica. Te oncameetsateji yantajeitiri iriori, iro cantaincha yantacaajeitaquempiro caari cameetsatatsi pinquempejeitanteeariri avirori. ¹⁴ Inevejeitaro tsinaneppee, icantani yantapinitiro caari cameetsatatsi: tecatsi incantero irijocajero, yashi yoiro. Yantacaajeitaqueri caari quenqueshirevetaro caari cameetsayetatsi. Yashi yoiro inevejetaro vararontsi. Queario irijajeite iriori Sharincaveniqui.

¹⁵ Te incoajeiteji intime cameetsa, irointi yantashiyetaro paitapeerica. Iquempejeitacari Varamani, itomini Veoro. Iquenquetsavetaroni peerani irineane Tasorentsi, iro cantaincha inewetasanotaro vararontsi, te irantasanoteneriji Tasorentsi icoacaavetariri.

¹⁶ Te inquemisanteriji, irointi yojajataqueri coatsiri imperi vaararontsi. Ari imapocaqueri

irashinote ineanataqueri. Te irioteji irio neanatacairyi Tasorentsi. Ari iquenquejaqueri, ipiatsatacari, impoiji oshequi yoanaqueri cavaco iriori, aisati oshequi iquenqueshire-anaca: te inquenqueshiretajeroji aisati vaararontsi. ¹⁷ Ariorica pinqueacotero nija oncontejatanteari, tempa pincoasanotaque ontine nija. Iro cantaincha ariorica ompir-ijatanaje, te oncameetsateji, tecatsi payero nija. Ari yora amatavitanatsiri ishiaquero pirijatatsiri nija: te incameetsateji. Oshequi ineaveeti, vero, vero, iro cantaincha tecatsi iramitacotempi. Aisati iquempevetacaro mencori, ariorica pinequero amaquero tam-pea: pijiti ompariye incani, iro cantaincha ariorica amatavitempi, te ompariye. Timatsi intimasanotanteeari iriori, yovetsicaqueneri Tasorentsi anta otsiteniitasanoti catsini. ¹⁸ Oshequi ishemejeiti, aisati icantapiniti: "Pinequero, nantashiyetacaro paitapeerica nocoayetiri". Ari yamatavyetiri oshequi iro aquera quemisantavetachari: iro aquera yojocavetacaro caari cameetsatatsi yantayetiri, iro cantaincha yantacaanirotajiri aisati. ¹⁹ Icantayetiri: "Tempa irio Tasorentsi oavisacotimpipi, te pimateroji poavisacotajea avisati. ¿Paita caari pantantaro paitarica picoayetiri? Tempa icavintsaakuempi, eiro iquishimentimprotsi. Tsame pinquempetena narori". Irootaque icantayevetari, iro cantaincha yamatavitantiroti, Jero yantapinitiniri camaari icoacairiri iriori: iriotake ivincatsarite. Iriome Tasorentsi ivincatsarite irantenerime icoacairiri iriori, cameetsa irisavique. ²⁰ Pamene, peerani yashinoncaajeivetaca: yantapinijeivetaroni caari cameetsatatsi yantajeitiri tseencantatsiri. Impoiji iotajiri Avincatsarite Jesoquirishito, yoavisacotajiri. Iro cantaincha yapiitajiro ora yantapinijeiveitaniri. Meeca tecatsi incantacoventajea iroimpacajero aisati yantayetiri, irootaque irashinoncantasanoteari catsini. ²¹ Pinequero, ocameetsaveta eiro iovetarime Tasorentsi. Yoameetsaveta-jari, aisati yoamevetajari, iro cantaincha ipiatsanirotacari yora cavintsaavetajari. ²² Icanteetini: "Yora otsiti yoipiajaro iamarancane, yoajaro. Atsipetashitacari aquiviri shintori, tempa impianaje aisati intivironcajearo sampoatsa". Queario icanteetiri. Aitaque iquempejeitari iriori yora quemisantavetachari, yapiitajiro caari cameetsatatsi.

3

Iquenquesatacotiri Jesoshi, impocantajeari.

¹⁻² Ari, noyemisantaririnte, piojeiti nonintajeitaquempi. Chapinqui nintantaquempirori nosanquenataquempiro, noquenqueshiretacaaquempiro isanquenatiniri yora quenquesatacotiriniri Tasorentsi peerani. Aisati noquenqueshiretacaaquempiro maa-roni yoamejeitaquenari Avincatsarite, yora oavisacojeiteeri. Impoiji itiancajeitaquena noquemisantacaajeitaquempi. Meeca napiitajimpiro nosanquenatajimpiro pinquenqueshiretasanotanteeari. ³ Piojeitaque eirotsitarica ipoquitsati Avincatsarite, intime oshequi tseencantatsineri, irantashiyetearo paitapeerica incoaniroyeteri iriori. Irishirrontimentajeitarei Avincatsarite, ⁴ incantajeite: "¿Icantimpa Quirishito impocaje? Iji, iji, iji. ¿Jaocari meeca? Tempa camaque peerani. Eiro ipocajitsi. Peerani yaamaavetacarini yora intacaroniri iquemisanti, iro cantaincha te irineeriji, irosati meeca. Peeraniiteni. ¿Pijitimpá pineajeri avinti? Iji, iji. Irosati ocantani quipatsi, te ompashiniteaji". Irootaque incantajeiteri tseencantatsineri.

⁵ Te incoyeji inquenqueshiretero yantayetaqueri Tasorentsi. Peerani icantaque iriori: "Ontimeta quipatsi, aisati ontimeta inquite", irosati otimantacari. Ari yovetsicaquero quipatsi, ocontetapaaque incajarequi, meeca aisati oshoncacaro incajare. ⁶ Aitaque ocantacari peerani, iro cantaincha impoiji yoasanquetaajeitaqueri yora ishanincani Noe. Iro yoasanquetantacariri, te oncameetsateji intimeni. Ari opariaqueni antearo incani, ooncanaca maaroni quipatsi, aisati ipoyereajeitanaca tseencantatsiri. ⁷ Aisati icanti Tasorentsi: "Coajica nontayero inquite aisati quipatsi, aisati nontaaocojeiteri maaroni timantarori". Tempa peerani icantini "Novetsiquero quipatsi", irosati otimantacari. Meeca icanti: "Coajica nontaaajero quipatsi", tempa aisati irimatajero. Aisati tequerata omoncarateji intaantajearori, iro cantaincha coajica intayero, pomein, aisati intaaco-jeiteri maaroni tseencantatsiri, iroasanquetaajeiteri. ⁸ Meeca pinquenqueshirejeitero oca, noshaninca: ajijeivetaro 1000 osarintsi peerani catsini. Iro cantaincha te irijiteroji

irinti. Ineaquero te osamaniteji, oquempetimovetacari aparoni quitaiteri. Ajijeitiro te osamaniteji aparoni quitaiteri, irioquea iriori ineaquero osamani, oquempetimovetacari iro 1000 osarintsi. ⁹ Pinequero, ajijeivetaro opeeranitaque, tequera irimoncaratero icantaqueeri: tequera impoque Avincatsarite. Iro cantaincha te irijiteroji irinti opeeranitaque. Eiro yamataviteetsi, iro cantaincha osamani onaveta yoyeacovetacari tseencantatsiri, icoaque inquenqueshiretajea eiro ijatanta Sharincaveniqui. ¹⁰ Iro cantaincha coajica irimapocasanotapaaquee Avincatsarite, impocaje. Antearo ontocanaque inquite, ton; ontsoncasanotanaquea, poyere. Intaasanotanaquea impoquiro, catsirincaiteri, cashiri, maaroni: pomein, intsoncasanotanaquea iriori, poyere. Aisati quipatsi, ontayea; aisati ontaacotasanojeitanaquea maaroni timajeitatsiri quipatsiqui, pomein, poyere.

Icamantiri jaoca oncanteari coajica.

¹¹ Ari meeca ayojeitanaque ontsoncajeitajea maaroni aneajeitiri, irootaque ocameetsatantari anquenqueshiretanaquea, anquemisantasanoteri Tasorentsi, cameetsa antime catsini. ¹² Cameetsa aamaajeiteari Tasorentsi impocaje, cameetsa aisati antajeiteneri maaroni icoacaqueeri irishintsitajeari impocaje. Ariorica omoncarataquea, ontayea inquite aisati inquitesati ontsoncajeitanaquea, maaroni, poyere. ¹³ Iro cantaincha timatsi pashini icantaqueeri, ayotanaque eiro yamataviteetsi. Icanti: "Pashini novetsicaje aisati inquite iroquerari, aisati quipatsi iroquerari. Oncameetsatasanotaje irointi, eiro itimajitsi antayetajeroneri caari cameetsatatsi". ¹⁴ Meeca, noyemisantaririnte, paamaajeitacaro icantaqueeri. Pincoasanotaque pintime cameetsa, aisati paacameetsatava-caajeitea; impoiji ariorica impocaje, irineacameetsatasanotapaaquempi. ¹⁵⁻¹⁶ Queario, tequera impocaje, iro cantaincha yoyeajeitaqueri itsipapee atiri inquemisantajeite iriori iravisacojeitajeari. Irootaque isanquenajeitaquempi Pavoro iriori, yora anintasano-jeitiri. Oshequi iotacairi Tasorentsi. Timatsi pomerentsitaarantainchari isanquenaye-tiri. Meeca yora caari iotatsi, yora caari quemisantasanotatsi, iquenacaashitacaro irineane Pavoro, te ontampaticateji incamantacotero. Aisati iquenacaashiyetacaro pashini irineane Tasorentsi, irootaque iroasanquejeitanteeariri.

Ivecarataquero isanquenare.

¹⁷ Ari, noshaninca, nocamantaquempi jaoca oncanteari coajica. Nocamantajeitaque-mpi intime yora caari cameetsayetatsine, piatsajeitearineri Tasorentsi, iroametantero tseeyantsi. Queariyea, piquemisantiricari, icomitacaimpicari. ¹⁸ Pinquemisantasanoteri Avincatsarite Jeso quirishito, yora oavisacojeiteeri, piotasanotanaqueri. Tsame meeca aisati ampincatsatasanojeiteri, ancantaitatiyempani. Aitaque ancantajeiteari, maaroni. Narotaque sanquenajeitimpiori: Petero

IJIVATAQUE JOA ISANQUENATINIRI IROAMERE

Yora Ashitarori Irineane yoamejeitaquee jaoca ancanteari antimanteari inquitequi.

¹ ¿Ainirompi, noamere? ¿Tecatsimpa oyempine? Narotaque aca Joa sanquenajeitimpiori oca. Meeca nosanquenatacotaqueri intasanotarori itimi. Tequerani ontimeni quipatsi, itimitani irinti. Iriotaque Ashitarori irineane, oamejeitaqueeri jaoca ancantajeari antimajeitajeari anta inquitequi, ancantaitatiyempani. ² Itsipatarini Apa Tasorentsi, impoiji ipocaque aca quipatsiqui. Noneapinijeitaqueri, namenapinijeitaqueri, noquemapinijeitaqueri, nopamitapinijeitaqueri: meeca nocamantajeitaquempi jaoca icantari, aisati nocamantajeitaquempi jaoca incantajeitajeari aneasanojeitanta-jeari anta inquitequi. ³ Ari yora noneasanotaqueri, noquemasanotaqueri, iriotaque noquenquetsatacotaqueri. Meeca noncamantasanoempni, pinquempetantenari narori. Aquempejeitacari Apa, aisati aquempejeitacari itomi: yora Jesoquirishito. ⁴ Meeca nosanquenajeitempiro oca pinquimoshiretasanojeitanteari.

Ishiasanotaquero Tasorentsi quitaiteri.

⁵ Meeca noncamantempiro icamantaquenari iriori. Ishiasanotaquero Tasorentsi quitaiteri, te intsitenitimateji: te iranteroji irinti caari cameetsatatsi. ⁶ Ancanterica: "Noquempetacari", iro cantaincha ariorica antapinitero caari cameetsatatsi, aquempetacaro aquenanaque tsiteniriqui: antseyashitaca, amatavitantaque. ⁷ Iro cantaincha icameetsatasanotaque Tasorentsi, iquempetacaro iquenanaque irinti quitaiteriqui. Ariorica cameetsa asavique, oquempetaca aniihanaque quitaiteriqui, ashiaqueri iriori: aquempetavacaajeitaca. Icamimentaquee Jesoshi, yora Itomi Tasorentsi: aparajatimetaquee iriraja yoavisacojeitantaqueeri, yoameetsajeitantaqueeri. ⁸ Ancanteririca: "Te nanteroji caari cameetsatatsi", arosati amatavitajancha, tequera ayotimateroji queariotasanoatsiri. ⁹ Te iramataviteejee Tasorentsi, icameetsataque. Ariorica ancamanteri: "Ainiro nantane", incavintsaaajeitee, iroameetsajeitee, maaroni. ¹⁰ Ancanteriricame Tasorentsi: "Te nanteroji caari cameetsatatsi", ancamterime aisati: "Te pioteji, pitseeyani". Ancanteriricame: "Te aneroji nantane", te ashiretearoji irineane.

2

¹ Meeca, noamere, nosanquenajeitempiro eiro pantantarotsi caari cameetsatatsi. Timatsi Apaqui Cantacoventajeitaqueeri: yora Jesoquirishito, icameetsatasanotaque. Ariorica antero caari cameetsatatsi, incantacoventee. Incanteri iriri: "Pincavintsayeri yora quemisantanari". ² Ainiro antajeitiri maaroni, iro cantaincha icamimentajeitaquee corosiqui. Te apaniro incamimentajeiteri ashanincaphee arori, irointi icamimentajeitaqueri maaroni atiri. Yoameetsajeitakee Tasorentsi, aisati iriori maaroni quemisanta-jeitiriri, eiro iquishimenterotsi caari cameetsatatsi antajeitaqueri, eiro yoasanqueta-jeiteetsi.

Quemisantiriri Tasorentsi, iriotaque iojeitiriri.

³ Ariorica antapinijeitaquero icantaqueeri Tasorentsi, ayotavacaajeitaca ashanincatacari. ⁴ Ainiro cantashitachari: "Noshanincatacari Tasorentsi", iro cantaincha te iranteneriji icantavetariri. Iriotaque tseyari, irisati amatavitajancha. ⁵ Ariorica antasanotiro icantaqueeri Tasorentsi, arojeitaque nintasanojeitiriri. Irootaque ayotava-kaantacari aquempetasanojeitacari. ⁶ Ancanterica: "Quiso noanaqueri Tasorentsi", cameetsa ancantaitatiyempani ashiasanoteri, asavique cameetsa.

⁷ Nonintane, te naro intearone oca nocamantimpiri. Peerani intajeitaqueeroni Tasorentsi icamantajeitaqueeroni. Peerani piquemaquero. ⁸ Te ayoveiteani, oquempetimojeiveiteeni atimini tsiteniriqui, iro cantaincha ipocapaaque iotacaajeitaqueeri, oquempetaca iquitaitetacojeitaquee. Irootaque meeca napiitantimpiori. Iqueari-oventiro Quirishito inintajeitaquee. Aisati avirori, pinquearioventero, pinintajeiteri itsipapee. ⁹ Ancantashitearica: "Noqueni quitaiteriqui, niotiri Tasorentsi", iro cantaincha anquisheririca ashaninca, ainiroquera aqueni tsiteniriqui. ¹⁰ Ariorica aninteri

ashaninca, anquenasanotanaque quitaiteriqui, eiro aisati antapinitirotsi caari cameetsatatsi. ¹¹ Ariorica anquisheri ashianinca, oquempetaca aquenashitanaca tsiteniriqui, ainiro antapinitiro caari cameetsatatsi. Te ayoteji jaocarica aquenaqueri, oquempetaca otsitenitimotaquee, te aneeroji amenanteari.

Eiro pinintasanotirotsi yantapiniyetiri tseencantatsiri.

¹² Noamere, otimi pantajeitiniri, iro cantaincha yoavisacojeitaquempi Jesoshi. Irootaque meeca nosanquenatantimpiori oca. ¹³ Avirojei shirampari: piojeitaqueri yora intasanotarori itimi, irootaque nosanquenatantimpiori oca. Avirojei, evancari: te panteneri camaari icoacaavetaquempi, irootaque nosanquenatantimpiori oca. ¹⁴ Avirojei jananequi: piojeitiri Apa, irootaque nosanquenatantimpiori oca. Avirojei shirampari: piojeitaqueri yora intasanotarori itimi, irootaque nosanquenatantimpiori oca. Avirojei evancari: pishintsjeitanaque, piquearioventaquero piquemisantaquero irineane Tasorentsi, aisati te pinquemisantimateriji camaari, irootaque nosanquenatantimpiori oca. ¹⁵ Eiro picoasanotirotsi pantero yantapiniyetiri tseencantatsiri. Eiro picoasanotirotsi timayetatsiri quipatsiqui. Ariorica pinintasanoejetero, eiro pimatirotsi pinintasanoejeteri Tasorentsi. ¹⁶ Aitaque acantajeitar: aquenqueshirejeitaquero paitarica acoasanotaqueri anteri. Acoasanotaquero paitarica aneayetaqueri, ashemetimentaqueri ashietari. Te irio oameteerone Apa, irinti atiri oamejeiteerori. ¹⁷ Ompeanaja timayetatsiri quipatsiqui, aisati ompeajeitanajea maaroni acoajeivetari. Iro cantaincha ariorica anteneri Tasorentsi icoacaqueeri, ancantaitatiyempani antimeni anta inampiqui.

Iquenquetsatacotiri tseeyacojeitacariri Quirishito.

¹⁸ Noshaninca, irotaintsi impocaje Quirishito, eiro osamanititsi. Piquemacotaqueri yora pashini pocatsineri, yora amatavitantatsineri, cantatsineri: “Te iratiritapeeji Jesoshi, te imponeempaji inquitequi. Caari ini Quirishito”. Ipajiyetiri yora cantatsiri: “Antiquirishito”. Noncamantempi, yareejitaca. Timatsi meeca oshequi amatavitantatsiri, irootaque ayojeitancarei eiro osamanititsi impiasanotaje Quirishito. ¹⁹ Peerani icarajeiveiteeni yora amatavitantatsiri, iquemisantaveitani, iro cantaincha meeca yojoceitaquee. Te inquempetasanojeiteeji. Inquempetaqueeeme, quiso iroajeitaqueeeme, iro cantaincha yojocajeitaquee. Meeca ayotasanojeitaqueri te inquempejeiteeji, te inquemisantajeiteji. ²⁰ Avintiquea itianajeitaquempiro Tasorentsi Ishire, quiso oajeitantiempiri. Piotasanojeitaquero. Te pishiyeriji yora caari ioterone queariotatsiri: te irioteji irinti. ²¹ Piojeitaquero queariotatsiri, irootaque nosanquenatantimpiori oca. Piotaque te intseeyaji caari tseeyacha. ²² Tseeyari ini yora cantashitachari: “Yora Jesoshi, caari ini Quirishito”. Itseenquiri Apa. Itseenquiri Itomi, icantashita: “Caari ini Quirishito”. ²³ Yora tseenquiriri Itomi, te iriotejeriji Apa. Yora cantasanotatsiri: “Quirishito ini Itomi Tasorentsi”, iriotaque iotasanoliriri Apa. ²⁴ Pincantaitatiyempani pinquenqueshiretero oca piquemaqueri peerani. Ariorica pinquenqueshiretasanotero, quiso poyerri Itomi, aisati Apa. ²⁵ Jero oca icashiacaqueeri: “Pincantaitatiyempani pisavique nonampiqui”.

²⁶ Ari nosanquenatacotaqueri yora amatavitempinemer, ²⁷ iro cantaincha itianajeitaquempiro Tasorentsi Ishire, quiso oanaquempi. Te pincoyeji pashini oame-tempineri. Quiso oanaquempi, ari meeca otsoetequempiro maaroni, oametasanotaquempi. Tampatica oametaquempi, te ontseeyaji. Tempa oamejeitaquee quiso ayeri Quirishito: ari quiso poyerri.

Yashijjeitacari Tasorentsi.

²⁸ Meeca, noamere, quiso poyerri Quirishito. Coajica impocaje. Ariorica pincanteani quiso poyerri, ari piveshirementavaqueari, eiro pipashiventacaavacari. ²⁹ Ari ayojeitaque icameetsataque Tasorentsi. Incameetsataquerica iriori atiri, ari ayojeitanaqueri itomintajeitacari Tasorentsi.

3

¹ Icantajeitaquee Tasorentsi: “Avirojeitaque notomipee, nishintopee”. Queario ican-
taque. Pineaquero, oshequi inintasanojeitaquee Tasorentsi. Te irioteriji tseencantatsiri
jaoca icantari, irootaque caari iotantee arojei itomi. ² Meeca, nonintane, avirojei
itomipee Tasorentsi, irishintopee. Tequera ayojeiteji jaocarica ancanteari, coajicani.
Ariorica impiaje aca quipatsiqui, amenajeitavaqueri jaocarica icantari. Impoijiquea
ashiasanojeiteri iriori. ³ Aamaajeitajari impocaje, irootaque acoajeitancari meeca
ancameetsajeitanaque: anquempejeitajeari iriori, icameetsataque. ⁴ Ariorica antaquero
caari cameetsatatsi, te anquemisanteroji icantavetaqueeri Tasorentsi. Te oncameet-
sateji ampiatsatearo icantaqueeri. ⁵ Tempa piojeitaque ipocaque peerani aca quipatsiqui
yoavisacojeitajee. Piojeitaque aisati te iranteroji irinti caari cameetsatatsi. ⁶ Ariorica
quiso avanaqueri, eiro antirotsi arori caari cameetsatatsi. Yora antapinitirori caari
cameetsatatsi te irineeriji Jesoshi, te irioteriji jaocarica icantari, aisati te irishanin-
cateariji.

⁷ Noamere, yamataviyeetimpicari. Ariorica antapinijeitiro cameetsatatsiri, aitaque
acameetsajeitanaque: amoncarajeitacari Tasorentsi, icameetsataque. ⁸ Yora antirori
caari cameetsatatsi, ishanincatacari camaari: tempa iriotaque intasanotacarori caari
cameetsatatsi. Ari ipocapaque Itomi Tasorentsi. Iro ipocashitasanotiri irojocacaajeri
maaroni yantanirotiri camaari. ⁹ Ariorica itomintajeitaquee Tasorentsi, eiro antap-
inijeitrotsi caari cameetsatatsi. Itomintaquee, irootaque quiso oantaqueeri Ishire,
aquempejeitacari. Irootaque caari antapinijeitajaro caari cameetsatatsi. ¹⁰ Irootaque
ayotantacari ashaincajeitacari Tasorentsi. Yora caari materone cameetsatatsiri, te
irishanincateariji Tasorentsi. Aisati iquempeta yora caari ninterine ishaninca, te iris-
hanincateariji, irootaque ayotantariri ishanincatacari camaari. ¹¹ Jero oca intaquemperi
Tasorentsi icamantaquempiro peerani: “Cameetsa pinintavacaajeitea”. ¹² Eiro pishiiritsi
Caini: ishanincatacari camaari. Yoqueri irirenti. ¿Paita yoantacariri? Yashi yoiro
te incameetsateji, iro cantaincha ineakeri irirenti cameetsa oni oca yantayetaqueri,
irootaque yoantacariri.

Pinintajeiteri piyemisantaririnte.

¹³ Noyemisantaririnte, inquisheempirica tseencantatsiri, eiro poanaquetsi cavaco.
¹⁴ Anintajeitaqueri ayemisantaririnte, irootaque ayojeitancari ancantaitatiyempani
asavique inquitequi. Peerani te ayoveitearini Tasorentsi, iro cantaincha meeca ayojeita-
jiri. Yora caari ninterine ishaninca, incantaitatiyempani intime irinti Sharincaveniqui.
¹⁵ Yora quishiriri ishaninca, iriotaque oayeri. Piojeitaque eiro itimitsi oayeri inquitequi.

¹⁶ Yora Quirishito irisati coantsi icamimentajeitaquee, irootaque ayojeitancariri in-
intajeitaquee. Aisati arori, te oncameetsateji antsaroacayearo ancamimenteri ayemisan-
taririnte. ¹⁷ Jeri ashitaarantachari: ineavetaririca yashinoncaaca iyemisantaririnte,
terica icoye incavintsayeri, ¿inintirimpas Tasorentsi? ¹⁸ Noamere, te oncameetsateji
ancantashijeitea: “Nonintiri noshaninca”. Iro cantaincha cameetsa aneshinoncajeiteri,
anintasanojeiteri, ¹⁹ irootaque ayojeitancari aijatasanotiri Tasorentsi, te aneroji an-
tane. ²⁰ Ayotirica otimi antane, ¿paita inquenqueshireteri Tasorentsi? Tempa itsoteiro
maaroni, iojeitaque maaroni antajeitiri.

²¹ Aisati, nonintane, ariorica ayojeite te aneroji antane, ayojeite aisati ocameetsati
anquenquetsatacapinijeiteri Tasorentsi. ²² Ariorica anquemisantero icantaqueeri,
aisati amateneri icoacaaqueeri, ayojeitaque ariorica anquenquetsatacayeri, aitaque
inquemaquee. ²³ Jero oca icantaqueeri: “Pinquemisanteri notomi Jesoquirishito. Pimon-
carateneri icantaqueempiri iriori: ‘Pinintavacaajeitea’”. ²⁴ Ariorica anquemisantajeitero
icantaqueeri, quiso avanaqueri. Aisati iriori, quiso iroajeitaquee. Itiancajeitaquee Ishire,
irootaque ayojeitancariri quiso yoajeitaquee.

4

Piojeiteri maaroni oamejeitempineri.

¹ Nonintane, eiro piquemisantashijeitaritsi maaroni oamejeitempinemer: ya-
matavitimpicari. Ariorica incantempi: “Itiancaquena Tasorentsi”, iro cantaincha

pivivateri pisampiteri paitarica iroamejeitempi, piotanteariri queariorica itianquiri Tasorentsi. Aca quipatsiqui timatsi oshequi coavetachari iramatavijeiteeme. ² Jero oca piotanteariri otiancanepee Ishire Tasorentsi: incantajeitee irinti: "Yatiritapaaque Jesoshi, iponeaca inquitequi. Iriotaque Quirishito". Iriojeitaque shanincatacariri Tasorentsi. ³ Iro cantaincha te intianqueriji Tasorentsi yora caari cantatsi: "Quirishito ini Jesoshi". Iriotaque antiquirishito. Piquemacojeitaqueri icanteeti: "Impoque tseey-acotearineri Quirishito". Ainiro meeca tseeyacojeitariri. ⁴ Noamere, yashijeitaquempi Tasorentsi, quiso yoajeitaquempi. Tempa ipincatsaritasanotaque irinti, yanacojeitaqueri maaroni coavetachari iramatavijeitempime. Irootaque caari piquemisantartari yora tseeyachari. ⁵ Tempa ishanincajeitacari iriori tseencantatsiri, irootaque iquenqueshirejeitacarori icoayetiri atiri. Iquemisantajeitaqueri ishaninca iriori. ⁶ Aroquea ainti, ashanincajeitacari Tasorentsi, iquemisantajeitaquee maaroni iotiriri, irootaque ayotantariri quiso oajeitaqueri Ishire Tasorentsi: ora oamejeitiriri queariotasnotatsiri. Yora caari ioterine Tasorentsi, te inquemisantajeiteji, irootaque ayotantacariri yamatavijeitaca irinti.

Tsame anintavacaajeitea.

⁷ Nonintane, tsame anintavacaajeitea. Iriotaque Tasorentsi intasanotacarori yoamejeitaquee anintavacaajeitanteari. Ariorica anintajeitiri itsipapee, arojeitaque itomipee Tasorentsi, ayojetiri. ⁸ Yora caari nintiri ishaninca, te irishanincateariji Tasorentsi: irishanincataquearime, inquempetaquearime, tempa yashi yiro inintajeitaquee. ⁹ Irootaque ayotantacari inintajeitaquee, itiancaqueri Itomi irapintite quipatsiquica yoavisacojeitajee, ancantatatiyempani asaviquimotantajeariri anta inquitequi. ¹⁰ ¿Janica nintasanotantsiri? Te anintasanoteriji Tasorentsi, irinti inintasanojeitaquee. Itiancaqueeri Itomi, icamimentajeitaquee, yoavisacojeitacarori. Meeca te inquenqueshiretajeroji Tasorentsi antajeivetari, eiro yoasanquejeiteetsi.

¹¹ Pinequero nonintane, inintasanojeitaquee Tasorentsi catsini. Irootaque ocameetsatantari anintavacaajeitea arori. ¹² Tecatsi neerine Tasorentsi, iro cantaincha ariorica anintavacaajeitea, quiso irojeitanaquee Tasorentsi, aiquero ajatatiye anintasanojeitanaqueri. ¹³ Itiancajeitaqueero Ishire, quiso oajeitaquee. Irootaque ayojeitacarori quiso avajeitaqueri arori, aisati quiso yoajeitaquee iriori. ¹⁴ Itiancaqueri Apa Itomi aca quipatsiquica yoavisacojeitajee, maaroni. Noneajeitaqueri, meeca nocamantacojeitaqueri. ¹⁵ Ancanterica: "Iriotaque Jesoshi Itomi Tasorentsi", quiso irojeitanaquee Tasorentsi. Aisati anquempejeitea arori, quiso avanaqueri: anquempetavacaajeitea maaroni. ¹⁶ Ari ayojeitaquee inintaquee, ashirejeitacaro. Yashi yiro inintajeitaquee. Ariorica ashi ayero anintavacayea arori, quiso avanaqueri Tasorentsi, aisati quiso iroanaquee iriori.

¹⁷ Coajicani ancamajeitaque, iro cantaincha eiro atsaroacaaritsi Tasorentsi. Ariorica aveshireimenteari, ayotanaque anintasanojeitaqueri arori, aitaque amoncaratacarari iriori Jeso quirishito. ¹⁸ Ariorica ayojeitaquee inintajeitaquee, eiro atsaroacaaritsi. Ariorica inintasanojeitaquee catsini, ¿jaoca ancanteari antsaroacanteariri? Ayojeitericame iroasanquejeitaquee, aitaque antsaroacayearime. Yora tsaroacaariri Tasorentsi, tequeratsita iriote irinintasanoteri. ¹⁹ Ijivataquee Tasorentsi inintajeitaquee, tsame meeca anintajeiteri arori. ²⁰ Incanteeterica: "Nonintiri Tasorentsi", iro cantaincha inquisheririca ishaninca, tseeyari ini. Terica irinintajeiteriji ishaninca iriori, tecatsi incanteri irininteri Tasorentsi. Pinequero, terica irimatero irininteri ishaninca in-eapinitiri, ¿jaoca incanteari irinintanteariri Tasorentsi? Te irineeriji irinti. ²¹ Jero oca icantajeitaqueeri Quirishito: "Arriorica anintiri Tasorentsi, aisati anquempeteri ashanincapee, anintajeiteri".

Ocarataque mava iota caajeitaqueeri Quirishito ini Jesoshi.

¹ Arriorica ayojeitaqueri Jesoshi iriotaque Quirishito, aitaque yashijeitaquee Tasorentsi. Arriorica anintiri Apa, anintiri aisati Itomi. ² Arriorica anintiri Tasorentsi,

anquemisantero icantaqueeri, ayotanteari anintajeitiri maaroni yashijeitacari.
³ Ariorica anintasanotiri Tasorentsi, anquemisasantanotero icantaqueeri. Te ompomerentsitasanoteaji anteneri icantaqueeri. ⁴ Ariorica yashijeitaquee Tasorentsi, eiro aijatiritsi tseencantatsiri. Iro caari aijatantari, aquemisantaqueri Tasorentsi.
⁵ ¿Janica caari oijatiri tseencantatsiri? Tempa yora iotiriri Jesoshi, cantatsiri: "Iriotaque Jesoshi Itomi Tasorentsi".

⁶ Peerani, ipocantacari Jesoquirishito quipatsiquica, ivaotisataca aisati icamimentajeitaquee, ayojeitacari Quirishito ini. Te apatiro ivaotisataca, aisati icamimentajeitaquee. Aisati oamejeitaquee Ishire Tasorentsi jaoca icantari. Tampatica oamejeitaquee. ⁷ Ocarati mava iotacaaqueeri Quirishito ini: ⁸ Ishire Tasorentsi, ivaotisataca Jesoshi, aisati icamimentajeitaquee. Omongaratavacaaca, iotacaajeitaquee jaoca icantari Jesoshi. ⁹ Tempa ashirejeitacaro icamantaqueeri atiri, iro cantaincha yanacojeitaqueri Tasorentsi, queario yoametantaque irinti. Icamantacotasanoquaqueri itomi. ¹⁰ Ariorica aquemisantaqueri Itomi, aquenqueshiretasanoquaqueri. Yora caari quemisan-tiri Tasorentsi, te irishiretearofi icamantacotiriri Itomi: itseenquaqueri Tasorentsi, ijiti-tiri irio tseeyachari. ¹¹ Aquemisantaqueri ainti Itomi, irootaque irisavicacantajeita-jeeri Tasorentsi anta inampiqui, ancantaitatiyempani. ¹² Aitaque incantaitatiyempani iraneaje inquitequi maaroni iotiriri Itomi. Yorari caari iotiri, tecatsi incantea irisavique anta inquitequi.

Icantiri: "Pinquenquetsatacapiniteri Tasorentsi".

¹³ Piquemisantaqueri Itomi Tasorentsi, meeca nosanquenajeitimpilo piotanteari pin-cantaitatiyempani panee anta inquitequi. ¹⁴ Eiro apashiventatsi anquenquetsatacayeri: timatsi icoacaqueeri ancantapiniteriri. Ariorica amoncarataquero ayojeitaque ari inquemisantaquee. ¹⁵ Ayojeitaque paitarica ancanteriri, inquemisantaquee. Aitaque irimataqueenero oca ancanteriri. ¹⁶ Ariorica pineeri piyemisantaririnte yantaquero caari cameetsatatsi, iro cantaincha terica intseenqueriji Tasorentsi, pincantacoven-teri iroavisacotanteariri. Timatsi yantaqueri pashini tseencantasano-tatsiri: ariorica pinea-cotaqueri, piotanaque irijate irinti Sharincaveniqui. Te noncantempiji pincantacoven-teri irinti. ¹⁷ Te oncameetsateji catsini antayetero caari cameetsatatsi, iro cantaincha eiro ajitashitatsi irijate Sharincaveniqui maaroni antayetirori.

¹⁸ Ayojeiti ariorica yashijeitaquee Tasorentsi, te antapinintajeroji caari cameetsatatsi. Yojocacoventaquee Itomi, tecatsi incantee camaari. ¹⁹ Ayojeitaque ashanincajeitacari Tasorentsi. Irintiquea maaroni tseencantatsiri, ipincatsariventajeitaqueri camaari. ²⁰ Ayojeitaque ipocaque peerani Itomi Tasorentsi, irotaque iotacaajeitaqueeri, ayo-jeitacari yora Tasorentsisanori. Ashanincajeitacari iriori, aisati ashanincajeitacari Itomi, yora Jesoquirishito. Aisati iquempetacari iriri, Tasorentsisanori ini iriori. Yoaneajeitaquee, ancantaitatiyempani aneajeitanaje anta inquitequi. ²¹ Noamere, piquemisantiocari ijitasorentsitashiyeetari.

Ari ocarati. Narotaque sanquenajeitimpirori: *Joa*

YAPIITAJIRO JOA ISANQUENATINIRI IROAMERE

Ivetsajeitari.

¹⁻² *¿Ainirompi tsio? ¿Ainirompi, nioti? ¿Tecatsimpa oajeitempíne?* Narotaque jivatacaajeitaqueriri ayemisantaririnte aca. Niotaque, tsio, aviro icoyeaque Tasorentsi piotantacariri, aisati icoyeajeitaqueri pitomipee. Queario, nonintasanojeitaquempi. Te apaniro nonintajeitaquempi narori, aisati iquempejeitaca maaroni ayemisantaririnte: intajetaquempi. Oshequi ashirejeitacaro irineane Tasorentsi, aitaque ancantaitatiyempani, tempa queariotasanaque ocamantajeaqueeri. ³ Oshequi ininta-jeitaquee Apa Tasorentsi, aisati itomi, yora Avincatsarite Jeso quirishito, queario oni oca yoamejeitaqueeri. Aisati incantaitatiyempani incavintsaajeitee, irineshinoncajeitee, irisavicacaajeitee cameetsa.

Intime coajica oshequi tseeyacotearine Quirishito.

⁴ Ari noneayetaqueri aparopee pitomipee, oshequi noveshireimentajeitacari. Cameetsa isavicaajeiti, iquemisantajeitaquero queariotatsiri yoamejeitaqueeri Apa Tasorentsi, aisati yantiniri maaroni icoacaajeitaqueeri. ⁵ Meeca, noshaninca, nocoaque nonquenqueshiretacaajempiro intajetaqueero Tasorentsi yoamejeitaqueeri peerani: ocameetsataque anintavacaajeitea, maaroni. Te naro intearone noamejeitempiro oca. ⁶ Ariorica aninteri Tasorentsi, amajeiteneri maaroni icoacaajeitaqueeri. Ari icoacaajeitaquee ashi ayero anintavacaajeitea, maaroni, anquearioventero. Tempa irootaque icantajeitaqueeri peerani.

⁷ Itimi meeca oshequi amatavitantatsiri, yoametantiro tseeyantsi, icantajeiti te imponeempaji Jesoshi inquitequi, te iratiritateeji. Aisati icanti te inquempejeiteeji arori, caari ini Quirishito. Yora tseeyacotariri Quirishito iquishiri iriori, te incoyeji anquemisanteri. ⁸ Paamayeariya: yamatavitimpicari. Oshequi piquearioventaquero pantapinitiniri Tasorentsi icoacaquempi; ariorica pincanteani, eiro patsipetashitarotsi, impinatempi iriori. Iro cantaincha paamayeari yora coatsiri iramatavijeitempi: ariorica pojataqueri, pantsipetearo maaroni pantayevetanariri Tasorentsi, tecatsi impinatempi. ⁹ Pojoquiricari Quirishito: eirorica pishiretarotsi yoamejeitaqueeri iriori, te pioteriji Tasorentsi. Iro cantaincha ariorica pincanteani pishiretearo yoamejeitaqueeri, pioteri aisati Iriri: quiso iroajeitanaqueMPI Apa aisati Itomi. ¹⁰ Irijatashitempirica atiri iroamejeitempi, piotavaqueri paitarica yoametacotapinitiriri Quirishito. Terica ontampaticate oca icoavetari iroametempiri, eiro paacameetsatavaqueritsi: eiro pisavicacairitsi pivancoqui, eiro piquemisantiritsi catsini. ¹¹ Ariorica paacameetsatavaqueri, pishanincajeitacari: aitaque pincarajeitaqueri poametantero tseeyantsi. Te oncameetsateji catsini.

Ivecarataquero isanquenare.

¹² Timatsiquera oshequi pashini nocoaque noncamantajeitempi, iro cantaincha te noninteji nosanquenatempiro. Nocoaque nojate noneempi. Ariorica aneavacaajeitea, noncamantasanotempiro maaroni. Aisati anquimoshirejeitanaque maaroni. ¹³ Ainiro aca otomipee pireento. Tempa iriojeitaque icoyeaqueri Tasorentsi. Ivetsajeitaquempi. Ari ocarati.

Narotaque sanquenatimpiori: *Joa*

MAVATAPAAQUE ISANQUENATINIRI JOA IROAMERE

Ivetsatari Joa Cayo.

¹ *¿Ainirompi Cayo? ¿Tecatsimpa oyempine? Narotaque Joa, jivatacaajeitiriri ayemisantaririnte aca. Queario, oshequi nonintaqueMPI.*

Cameetsa pintacotapiniteari ayemisantaririnte.

² Noncamantempi, nonintane, nocantacoventapinitaqueMPI: nocantiri Tasorentsi intasoncacoventempi cameetsa pisavicanteeari. Niotaque piquemisantasanoTAQUE, aisati nocantacoventimpi pishintsivatsatasanotanteeari. ³ Ainiro areejeitachari ayemisantaririnte, icamantapaaquena piquearioventiro pisaviqui cameetsa, aisati piquemisantasanoTAqueri Tasorentsi, irootaque noquimoshireimentantaquempi. ⁴ Ariorica noquemacotaqueri noshaninca iquemisantasanoTAQUE, aitaque noquimoshiretasanoTAQUE. ⁵ Nonintane, piquearioventaquero picavintsaajeitaqueri ayemisantaririnte, pitsoteaqueri: yora poneayetachari pashinipeequi nampitsi, maaroni. Cameetsataque. ⁶ Icamantajeitaquena maaroni ayemisantaririnte aca, oshequi pinintajeitavaqueri. Ariorica irareetajempi aisati pinampiqui, ocameetsataque pintacoteari; ariorica irijatanaje, pimpajeitavajeri coiteimojeitariri: irootaque icoacaaquempi Tasorentsi. ⁷ Iquenaquenayetanaque iquenquetsatacotapinitiri Jesoquirishito, tecatsi incoacojeiteri yora caari quemisantatsi, ⁸ irootaque ocameetsatantari intacojeiteeari arori, amitacojeiteri inquenquetsatero irineane Tasorentsi: tempa queariotasanoTAQUE ocaman-tayetaqueeri.

⁹ Timatsi nosanquenavetanariri ayemisantaririnte anta, iro cantaincha te impincatsatenaji yora Irioterejeshi. Icoaveta irijivatacanteme iriori. ¹⁰ Ariorica nareejeit-EMPI nonquenqueshiretacaajeitaquempi jaoca icantari: itseeyacotaquena, icanti-mataquena. Aisati, ariorica yareevetari ayemisantaririnte anta, te irineshiloncatavaqueriji. Aisati iquisaqueri yora neshinoncatavaqueriri areejeitachari, aisati te irininta-aaajeiteriji incaraajeiteri inquemisantajeite.

¹¹ Nonintane, te oncameetsateji catsini oca yantayetaqueri yoranqui: eiro piquem-petaritsi. Irinti pinquempetea antirori cameetsatasanoyetatsiri. Yora antapiniyetirori cameetsatatsiri, iotiri Tasorentsi; yora antapiniyetirori caari cameetsatatsi, te irioteriji.

¹² Queario, icameetsatasanoTAQUE Irimitirio. Tempa ineacameetsajeitaqueri quemisan-tajeitatsiri aca, aisati noneacameetsataqueri, aisati avirori pineacameetsataqueri.

¹³ Timatsiquera oshequi nocoaque noncamantempi, iro cantaincha te non-coyeji nosanquenatempiro. ¹⁴ Naamaaca irotaintsi noneempi: ariorica aneavacayea nontsoteaqueMPI, noncamantempiro maaroni. ¹⁵ Cameetsayea pisavique. Ivetsajeitaquempi ashanincaphee aca. Aisati ashanincaphee ara, novetsajeitari, maaroni.

Narotaque sanquenatimpiori oca: *Joa*

YORA JORASHI ISANQUENATINIRI IYEMISANTARIRINTE

Ivetsajeitari Jorashi iyemisantaririnte.

¹ ¿Ainirompi, noyemisantaririnte? ¿Tecatsimpa oajeitempime? Narotaque Jorashi sanquenajeitimpiori oca, narotaque antaveetiniriri Jesoquirishito; narotaque irirenti Santiacos. Ari niotaque icoyeajeitaquempi Apa Tasorents, irootaque piquemisantajeitantariri, aisati oshequi inintajeitaquempi. Iquempoyeaventajeitaquempi, pineanteariri coajica Jesoquirishito. ² Nocoaque incavintsaaajeitempi, cameetsa irisavicacaajeitempi. Aisati nocoaque paacameetsatavacaajeitea maaroni, pinintavacaajeitea.

Icantiri: “Paamayeariyea coatsiri iramatavitempi”.

³ Piojeitaque oshequi nonintajeitaquempi. Tempa yoavisacojeitaquee Tasorents. Meeca noquenqueshirevetaca noncamantempime jaoca icantajeitaqueeri: itasoncaventajeitaquee, icavintsaaajeitaquee, maaroni; iro cantaincha meeca eiro nocamantimpiori oca. Timatsi meeca pashini noninti noncamantempiri, iointi. Nocoacaquempi pinquearioventero pinquemisantero yoamejeitaquempi Tasorents, te ompashinitapinitaeji. Eiro piquemisantirts yora itsipapee coajeivetachari iramatavijetempime. ⁴ Ainiro yora cantatsiri: “Noquemisanti”, iro cantaincha yamatavitanti. Ioti icavintsaaajeitaquee Tasorents, yoavisacojeitaquee. Meeca icantashijeitaquempi yoranqui: “Cameetsa antajeitaquero paitarica acoajeitiri, eiro iquisheetsi Tasorents”, iro cantaincha iointi yamatavitanti. Te impincatsajeiteriji Avincatsarite Jesoquirishito, irootaque irijatanteari Sharincaveniqui. Tempa irootaque ocantiri Sanquenarents.

⁵ Timatsi piotasanojeitaqueri, iro cantaincha noninti nonquenqueshiretacaajempiro aisati. Peerani oshequi yashinoncaajeitaca maaroni joriopee anta Ejipitoqui, iro cantaincha yoavisacojeitaqueri Tasorents, yaajeitanaquei pashiniqui quipatsi. Iro cantaincha iconoajeitacari joriopee tseenquiriri Tasorents, irootaque yoantacariri iriori. ⁶ Aisati itimaveitani inquitequi inampireni Tasorents, icameetsaveitani catsini, iro cantaincha ipiatsatacari Tasorents. Meeca te irisavicajeji anta ocameetsaitetinta, ainti yojocaqueri Tasorents oshaaviji, anta otsitenitasanotinta. Aitaque isavicaqueri irosati incantacovertanteariri, iroasanquetasontanteariri. ⁷ Aisati iquempejeitaca yora soromasatini aisati comorasatini, aisati maaroni ishanincapeeni iriori: oshequi yantajeitaquero caari cameetsatatsi. Yantajeitaquero iashianepee, itsinampaavacaajeitaca, maaroni. Ari yoasanquetaajeitaqueri Tasorents, maaroni; irootaque ayojeitantacari otimi Sharincaveni, iroasanquetaajeitanteariri maaroni antapinitirori caari cameetsatatsi: incantatatiyempani inquematsicatearo paamari. ⁸ Iro cantaincha te inquenqueshireteaji yora amatavitantsiri. Icantani yantayetaquero iashiane, itsinampavacaaca; itseencaqueri ivincatsarite, ishirontimentajeitacari; icantimajeitaqueri yora inampirepee cameetsari Tasorents.

⁹ Peerani icanteetini: icamantacaniri Moishishi, icoaveta Satanashi iraanaquerime anta Sharincaveniqui. Aisati iquempetaca Miyeri, yora ivincatsarite inampirepee Tasorents: icoaveta iraanaquerime iriori inquitequi. Ari icantavacaaca apite. Ari yora Miyeri oshequi itsaroacaari Satanashi, oshequi ipincatsataqueri, irootaque caari ipiatsatari. Apatiro icantiri: “Iranti Tasorents piatempineri”. Irootaque icantaqueriri.

¹⁰ Noshaninca, yora amatavijeitimpire te irijojeiteji irisavique cameetsa, iro cantaincha icantimajeitaquee arori arioricu atimi cameetsa. Te aneeroji iotantari, iquempejeitacari avira: yantashijeitaro paitarica icoiri. Irootaque iroasanquetaajeitanteariri Tasorents, ¹¹ irashinoncaajeitaquea. Iquempejeitacari yora Caini, yora oiriri irirentini. Iquempejeitacari yora Varama: ipinayeetiri quirequi, irootaque yantantarori caari cameetsatatsi. Iquempejeitacari aisati yora Core: ipiatsatacari peerani Moishishini. Tempa iroasanqujeiteri Tasorents, maaroni.

¹² Pamene, ariorica papatotapinita poajeita, picoajeiveta pinintavacaajeiteame, pincaivintsaavacaajeiteame. Iro cantaincha icarajeitaquempi yoranqui, caari pimatasanotantaro cameetsa. Te irioteji iriori impashiventea, oshequi yoajeitaca, te inquenqueshireteriji itsipajeitari. Oshequi ineaveetashita, vero, vero, iro cantaincha te iramitacojeitemppiji. Iquempetacaro mencori amatavijeitimpiri: amavetaro antearo tampea, pijitashijeiveta ompariye incani, iro cantaincha, te. Iquempetacaro inchato caari timatsi oitsoqui, te oncanjeji, ocameetsati anchaquiero, amponquitireajero, antaajero.

¹³ Tempa pineapinijeitiro otsapijaqui opitsishimoretaque, te pineacameetsateroji: ari iquempejeitari iriori, te oncameetsateji yantayetiri, oncameetsateme impashiventeame. Pishiacantavetacari impoquiro iotacaimppiri jaoca pinqueneri, iro cantaincha yamatavijeitaquempi. Irijatanaque iriori anta otsitenitasanotaque, incantaitatiyempani irisavique. ¹⁴ Peerani catsini iquenquetsatacotaquerini Enoco, yora ishaninca Aran, icantini: "Pamene, coajica impoque Avincatsarite, incarajeiteri oshequi catsini inampirepee. ¹⁵ Iroasanquetaajeitapaqueri maaroni caari cameetsajeitatsine. Iriojeiteri maaroni tseencajeitiriri: ipiatsajeivetacari, icantimajeivetaque, irootaque iroasanquetaajeitantariri". ¹⁶ Ari iquisashirejeitanaca, icantimajeitaqueri ishaninca, icoasanotaque iran-tapinitero caari cameetsatatsi, oshequi ishemejeitaque. Ipincatsatamempeashitacari ishaninca iramatavitanteeariri.

¹⁷ Ari, noshaninca, oshequi nonintajeitaquempi, irootaque nocoadcantimpiori pinquenqueshiretasanotero icantayetimpiri itiancanepee Avincatsarite Jesoquirishito.

¹⁸ Tempa icamantajeitaquempini: "Coajica pineasanojeitavaqueri tseencantasanotatsiri, irantashijeitearo paitapeerica icoqueri iriori". ¹⁹ Iriojeitaque amatavijeitiriri itsipapee, irootaque iquisavacaajeitancacari; oshequi itseencantajeiti, te quiso oyeri Ishire Tasorentsi.

Icamantiri Jorashi icoacaqueriri.

²⁰ Ari, nonintane, pinquemisantasanojeiteri avinti Tasorentsi, impoiji pimatasanojeitero pintime cameetsa. Pincoasanotero Ishire oametasanojeitempi pinquenquet-satacayeri. ²¹ Pincoasanajeite irinintajeitempi Tasorentsi. Piojeitaque incavintsaajeitempi Avincatsarite Jesoquirishito, iraajeitanaquempi anta inquitequi, pincantai-tatiyempani pisaviquimojeiteri. ²² Pincavintsaasanojeiteri yora caari iojeitiri Tasorentsi, poametasanojeiteri. ²³ Poavisacojeiteri pishaninca, itaacari anta Sharincaveniqui. Queariompia, piquempetaricari yora piquemisantacaajeitaqueri. Eiro pantimatirotsi catsini caari cameetsatatsi yantajeitiri iriori.

²⁴⁻²⁵ Tempa timatsi Tasorentsi apaniro, aisati iriori Avincatsarite Jesoquirishito: yora oavisacojeitaqueeri. Ainiro itasorenca irinti, iquempoyeasanojeitaquempi eiro pantimatantarotsi caari cameetsatatsi. Iraajeitanaquempi inquitequi: anta ocameetsaitetasanotaque catsini. Aitaque anta anquimoshireventajeitapaajeri, maaroni. Tsame meeca ancamantajeiteri atiri: "Icameetsatasanoti Novincatsarite, ipincatsaritasanoti, itasorentsitasanoti". Aitaque ancantatiyempani ancamantapinijeiteri itsipapee, eiro ajocajirotsi. Aitaque ancantaitatiyempani.

Narotaque sanquenajeitimpiori: *Jorashi*

ICAMANTIRI TASORENTSI JOA PAITARICA IRANTAYETERI JESOQUIRISHITO.

Intanacaro Joa isanquenare.

¹ Intasanotacaro Tasorentsi, icamantaqueri Jesoquirishito, impoiji yovaajiniri iriori inampire, impoiji iriori yovaajanaro narori, meeca novaajeitempiro avirori. Nopincatsataqueri Tasorentsi, aisati piquempejeitaca, pipincatsajeitaqueri avirori; meeca icamantajeitaquee paitarica iranteri Jesoshi: eiro osamanititsi irimatantearori. ² Ari oshequi iotacaquena Tasorentsi aisati Jesoquirishito: ainiro icamantaquenari aisati inijaquenari. Meeca noncamantajeitempiro jaoca ocantari. ³ Iroimoshirencajeiteri Tasorentsi maaroni neanateroneri oca nosanquenajeitaquemperi aisati maaroni quemajeitavaqueroneri. Iro cantaincha eiro iquemashitarotsi, irointi irimatasanotero ocantaquerirri inquimoshiretanteari. Pamene, eiro osamanititsi irimatantearori Jesoshi maaroni oca noquenquetsatacotirri.

⁴ Narotaque Joa sanquenatirori oca. Nosanquenajeitaqueneri savicajeitatsiri anta Ashiaqui, aisati iriori yora quemisantajeitatsiri anta 7 nampitsipeequi. ¿Ainirojeimpi, maaroni? Ainiro Tasorentsi iriori, irosati icanta: itimini peerani, irosati meeca; irosati incanteani, coajica. Nocamantaqueri: “Pincavintsaaajeiteri noyemisantaririnte anta Ashiaqui, cameetsa pisavicasaajeiteri”. Irosati nocantaquerori Ishire, ora quiso oiriri ipincatsariventanti. ⁵ Irosati nocamantaquerirri Jesoquirishito: tempa cameetsa yovaajeitaqueero arori icantaquerirri Tasorentsi. Iriotaque nijantajirori itinaanaja, aisati ipincatsariventajeitiri pincatsarivetachariaca quipatsiquica. Oshequi antajeivetacaro caari cameetsatatsi ajajeitanteameri Sharincaveniqui, iro cantaincha oshequi ineshinoncajeitaquee, yaparajatimentaqueero iriraja, yoavisacojeitantaqueeri. ⁶ Icantajeitaquee: “Pincarajeitena ampincatsarijeitaje, aisati pinquenquetsatacapiniti Apa: pincanteri iramitacojeiteri piyemisantaririnte”. Tsame ampincatsatasanojeiteri maaroni, ancantaitiyempani. Aitaque ancantajeiteari.

⁷ Pamene, inquenapaa je menceriqui, aitaque aneajeitavajeri maaroni. Aisati irineajeitavajeri pajacojeivetacariri peerani. Ari intsaroacaajeitavaqueari maaroni tseencajeitiriri, iriraajeitanaquea, jii, jii. Queario, aitaque oncanteari. ⁸ Te impashinitapiniti Avincatsarite, itasorentsitaque, irosati icantani: peerani, aisati meeca, aisati coajicani. Icanti: “Narotaque intacarori maaroni, aisati narotaque vecarayeroneri maaroni”.

Ijivataqueri ineaqueri Joa.

⁹ Ari, noyemisantaririnte, aquempetavacaajeitaca: aquemisantajeitaqueri Jesoshi, irootaque yoashinoncaapinijeitantaqueeri tseencantatsiri. Ipincatsariventajeitaquee Jesoshi, irootaque amavejeitantacarori. Noquenquetsatiro irineane Tasorentsi aisati noquenquetsatacotaqueri Jesoshi, irootaque yojocanteetaquenari aca ovoyeqaqui ipajiy-eetiri Patimoshi. ¹⁰ Ari tomincoqui noquenqueshiretasanotaqueri Tasorentsi, irosati noquemantacariri iquenquetsatacaaquaenae. Antearojenca ineanataquena, iquempetacari tiorentsi; jajencaitaque irineane, ¹¹ icantaquena:

—Pisanquenatero maaroni nonijaayetempiro, impoiji pimpacanteri quemisantajeitatsiri anta Ejesoqui, Eshimirinaqui, Perecamoqui, Tiatiraqui, Sarireshiqui, Jirarerejiaqui, jero Araoriseaqui. Ocarataque inampipee 7.

¹² Nopitsocashitanacari yora quenquetsatacaaquaenari; ari noneaquero onantari veera, ocarataque 7, yovetsiqueetiro oro. ¹³ Nianqui noneaqueri isatecaca quempetariri Jesoshi, yora poneainchari inquitequi peerani, iquempetapaaca yatiritantapaacaniri. Iquitsaataro tsantsashitsari iitsaare, onaque inejiqui quempevetarori ishiticatsaquito, yovetsiqueetiro oro. ¹⁴ Oquitamaroishitasanotaque iiishi, oquempetacaro ampeji aisati sharaca: quitamaro catsini. Oquempetacaro iroqui paamari amorequi. ¹⁵ Oshipaquireaque iiti, oquempetacaro ashilotatsiri saancanatatsiri. Antearojenca ineanati, iquempetacaro oshequi ovarijare antearo, sooo. ¹⁶ Yajiricaqueri iracosanoriqui 7 impoquiero; ocontetapaaque ivantequi ivesamento, otsaampiti apite omititsaqui;

oshipaquireasanotaque ivoro, oquempetacari catsirincaiteri, ishipaquireasanotaque, shipaquirerere. ¹⁷ Noneantacariri, notaanaque iitiqui, toren. Oquempetaca nocamaque. Ipamitaquena iracosanoriqui, icantaquena:

—Eiro pitsaroacaanatsi, narotaque intasanotacarori maaroni, aisati narotaque vecarayerone maaroni. ¹⁸ Naro aneasanotatsiri. Nocamasanovetaca, iro cantaincha naneanaji aisati; meeca noncantaitatiyempani nanee. Eiro nocamajitsi aisati. Narotaque cantajeiterine ariorica incame atiri, eiorica icamitsi; narotaque cantajeiterine janicarica jatatsineri inquitequi aisati janicarica jatatsineri Sharincaveniqui. ¹⁹ Meeca pisanquenatero oca pineaqueri, aisati pisanquenatacoteru nantayeteri coajica. ²⁰ Meeca noncamantempiro caari pioti incaranqui. Pineaqueri impoquiro najiricaqueri: ishiaqueri yora jivatacaaajeitiriri quemisantajeitatsiri anta 7 nampitsipeequi. Meeca piotaque nopincatsariventajeitiri. Aisati ora onantari veera: oshiaqueri maaroni quemisantajeitatsiri anta nampitsiquinta. Meeca piotaque quiso noajeitanaqueri.

2

Isanquenajeitiniri quemisantajeitatsiri anta Ejesoqui.

¹ Jero aisati icantaquenari Jesoshi:

—Jero oca pisanquenateneriri yora jivatacaaajeitiriri quemisantajeitatsiri anta Ejesoqui: “Meeca noncamantempiro icamantaquenari yora ajiriquiriri impoquiro iracosanoriqui: yora anitatsiri anta onantariqui veera, caratatsiri 7. ² Icantimpi: ‘Niotaquero pantayetaqueri, niotaquero pipomerentsiventaque nocoacaimpiri, te pishemearoji. Niotaquempi te pishinetimateriji piyemisantaririnte irantapinitero caari cameetsatatsi. Ainiro jatashivetimpri cantashitachari: “Narotaque itiancane Quirishito”, iro cantaincha piotaqueri iramataviterime quemisantatsiri: niotaque te pishineteriji inquenquetsatacayempi. ³ Niotaque oshequi pineacatsitmentaque, iro cantaincha te pishemearoji, te pojocajeroji pantayetaquenari. ⁴ Iro cantaincha ainiro pojocaqueri aparo: peerani pinintasanovetaquena; meecari, meeca te pinintasanotenaji. ⁵ Pinquenqueshirejeitea jaoca picantaniri peerani; te pinquempejeiteaji meeca. Pinquenqueshirerempa, pinintasanojeitajena aisati. Eiorica pinintajanatsi, nojatashitimpicari, notsoncajeitimpicari. ⁶ Iro cantaincha timatsi noneacameetsatantimpri: te pineacameetsateroji yantayetaqueri oijajeitiriri Nicorashi, yantashiyetaro caari yai. Aisati narori, te noneacameetsateroji yantajeitiri. ⁷ Otimirica piquemantari, pinquemavaquero oca nocamantaquempiri. Peerani otimini EreQui inchato oanean-tatsiri: arioricame iroyearome peeraniniri, incantaitatiyempanime iraneeme. Meeca ainiro quempevetarori anta ocameetsaitetinta, anta Tasorentsiqui. Ariorica cameetsa pisavicajeite aisati pimatapinitaque nocoacaimpiri, onquempetaquea poaquearo inquitequi oaneasanojeitimpineri: queario pincantaitatiyempani pisavicajeite anta inquitequi”.

Irootaque isanquenatacaaquerenari Jesoshi.

Isanquenajeitiniri quemisantajeitatsiri anta Eshimirinaqui.

⁸ Aisati icantaquenari Jesoshi:

—Jero oca pisanquenajeiteneriri yora jivatacaaajeitiriri quemisantajeitatsiri anta Eshimirinaqui: “Meeca noncamantempiro icamantaquenari yora intasanotacarori maaroni, vecarayeroneri maaroni. Icamaque peerani, impoiji itinaanaja. ⁹ Icantimpi: ‘Niotaquero pantayetaqueri, niotaquero oshequi picatsitmentaque, niotaquero pashinoncaimentaque: iro cantaincha eiro pipeacotarotsi nompinatasanotempi anta inquitequi. Niotaque oshequi icantimajeitaquempi yora shiavtariri quemisantatsiri. Icantanirojeiveta: “Noquemisanti”. Jaaquea narori, te inquemisantajeitenaji, irinti iquemisantaniroti Satanashi. ¹⁰ Queario, oshequi pinquematsicatearo, iro cantaincha eiro pitsaroashirettsi. Yora camaari iroiminquehaarantacantempi caravosoqui, icoaque iritantempiro queariorica piquemisantsanotaquena. Oncarate 10 quitaiteri oshequi pineacatsiyetearo paitapeerica. Pinquarioventenaro maaroni nocamantaquempiri, irosati pincamanteari; impoiji nompinatasanotempi, aisati pincantaitatiyempani panee

anta nonampiqui. ¹¹ Otimirica piquemantari, pinquemavaquero oca nocamantaquem-piri. Ariorica cameetsa pisavique aisati pimatapinitenaro nocoacaimpiri, eiro pijatitsi avirori Sharincaveniqui”.

Irootaque isanquenatacaaquesnari Jesoshi.

Isanquenajeitinisri quemisantajeitatsiri anta Perecamoqui.

¹² Aisati icantauena Jesoshi:

—Jero oca pisanquenateneriri yora jivatacaajeitiriri quemisantajeitatsiri anta Perecamoqui: “Meeca noncamantempiro icamantaquenari yora ashitarori ivesamento, tsampitatsiri apite omititsaqui. ¹³ Icantimpi: ‘Niotaquero maaroni pantayetaqueri, niotaque ara pisaviquira itimi aisati oshequi pincatsatiriri Satanashi: queario isaviquimo-jeitimpi iriori. Niotaque piquemisantsanotaquena, te pojoquenaji. Peerani itimini pinampiqui Antipashi: yora quenquetsatacotanari, antanarori maaroni nocoacairiri. Pineacojeitaqueri yoyeetaqueri, iro cantaincha te pojocajeiteroji piquemisantaquena. ¹⁴ Iro cantaincha ainiro pantayetiri caari noninti. Noshiacantempiro: ainiro yoameta-queriniri Varama peerani Varaca; impoiji iriori yantacaajeitaqueri pijorioririnteni caari cameetsatatsi: ipincatsatashijeitaro yovetsicayetiri atiri aisati yantapiniyetiro caari yai. Ainiro meeca picarajeitiri shiaqueriniri yora Varama: yantacaarantaquempi pipincatsatashiyetaro yovetsicane atiri aisati pantashiyetaro caari pai. ¹⁵ Queario iriojeitaque oijajeitiriri Nicorashi. Te oncameetsateji yantajeitaqueri: yantacaajeitimpicari yantayetiri iriori. ¹⁶ Pinquenqueshirejeitanaquea, eiro piquempetajatsi chapinqui. Eirorica pojocajeitirotsi pantayetiri, nojatashijeitimpicari nompoyereajeitapeempi. Ainiro novesamento novantequi nompesajeitantaapeempi, peti, peti, peti. ¹⁷ Otimirica piquemantari, pinquemavaquero oca nocamantaquemempiri. Ariorica cameetsa pisavique aisati pimatapinitaquenaro nocoacaimpiri, nompaquempi poyeari caari conijatatsi, oquempetaca nopashijeitacari peeraniniri mana. Aisati nomperi quitamarori mapi, nosanquenatero mapi qui ivajiro iroquerari: iringero iriori ivajiro, iro cantaincha eiro iotirotsi itsipapee”.

Irootaque isanquenatacaaquesnari.

Isanquenajeitinisri quemisantajeitatsiri anta Tiatiraqui.

¹⁸ Aisati icantauena Jesoshi:

—Jero oca pisanquenateneriri jivatacaajeitiriri quemisantajeitatsiri anta Tiatiraqui: “Meeca noncamantempiro icamantaquenari Itomi Tasorents: oquempetacaro iro-qui paamari amorequi, aisati oshipaqireaque iiti, oquempetacaro ashirotsiri saan-canatatsiri. ¹⁹ Icantimpi: ‘Niotaquero pantayetaqueri. Niotaque pinintavacaajeitaca, piquemisantajeitaquena, pintacojeitacari pishaninca, piquearioventaquenaro maaroni nocoacaaajeitaquemempiri. Aiquero pijatatiye pimatasanojeitanaquero. ²⁰ Iro cantaincha ainiro pantiro caari noninti: pishinetaquero ora Jesavere oamejeitaqueri quemisan-tanari yantayetantacarori caari yai aisati iquemisantacarori yovetsicayetiri atiri. Ocantaveta: “Noquenquetsatacotapinitiri Tasorents”, iro cantaincha amatavitapini-jeitaqueri quemisantajeitanari. ²¹ Noyeavetacaro onquenqueshireanajeame; iro can-taincha te oncoyeji onquenqueshirete, te oncoyeji ojocayetajero antayetiri caari ai.

²² Meeca noncamantempi: nojouitacayearo, aisati eirorica iquenqueshireajeitatsi yora quemisantajeitirori, noashinoncaasanojeiteri iriori catsini. ²³ Queario noajeiteri maaroni oijajeifirori Jesavere, nontsoncajeiteri, maaroni. Impoiji iriojeitanaque maaroni quemisantajeitatsiri niotaquero maaroni iquenqueshirejeitiri atiri aisati niotaquero maaroni icoajeitaqueri. Ocameetsatirica pantajeitaqueri, aitaque noncavintsaasanojeit-emp; iro cantaincha terica oncameetsateji, aitaque noashinoncaajeitempi. ²⁴ Yorari pit-sipapee, caari quemisantiro Jesavere, aisati caari antasanotiniri icantavetariri Satanashi, tecatsi noncantajeiteri; ²⁵ iointi incanteani inquemisantena irosati nareetantapaajeari.

²⁶ Ariorica pimatapinitaquenaro maaroni nocoacaaquemempiri irosati nareetantajeari, ari nompeajempi pincatsariventajeiterineri oshequi atiri. ²⁷ Oquempetaca narori, icantauena Apa nopincatsaritancarori, aisati noncantempi avirori pimpincatsaritasan-otantanaqueari. Ariorica ompariaque coviti, omporocapaaque maaroni, poyere; aisati pinquempetea avirori: pimpoyereajeitajeri maaroni caari quemisantajeitana, poyere.

²⁸ Pimpincatsaritasanotanaque, oshequi noaneenquempi, pinquempeteari impoquiro anteariteaquiri. ²⁹ Otimirica piquemantari, pinquemavaquero oca nocamantaquempi”.

Irootaque isanquenatacaaquerenari Jesoshi.

3

Isanquenajeitiniri quemisantajeitatsiri anta Sarireshiqui.

¹ Impoiji aisati icantaquena Jesoshi:

—Jero oca pisanquenateneriri jivatacaaajeitiriri quemisantajeitatsiri anta Sarireshiqui: “Meeca noncamantempiro icamantaquenari yora quiso oirori Ishire Tasorents: yora ajiriquiriri 7 impoquiro. Icantimpi: ‘Niotaquero maaroni pantayetaqueri; ijitashiy-evetimpi avirojeitaque quemisantincari, iro cantaincha niojeitimpi nainti oshequi pitseenqui. ² Queariompia, pitseencasanotajicari, pijaticari Sharincaveniqui. Te onimoteariji Tasorents: pantayetaqueri. Piquemisantaveta: pinquenqueshirejeitea meeca pinquemisantasano- tanteari. ³ Pinquenqueshiretasanotanajero noneane piquemaqueri peerani: pishiretasanotanajero, pinquenqueshiretanajea. Eirorica piquemisantasano- tajana, nojatashitempi, noasanquetayempi. Te piojeiteji jaoca oncarate nojatashitan- tempiri: noquempetacari coshinti, te pioteji jaocarica oncarate irijatashitantempiri incoshitantanempiri. ⁴ Oshequi pitseencantajeiti, iro cantaincha ainiro timaarantantsiri quemisantaquenari: cameetsa isavicajeiti irinti. Pantajeitaquero caari cameetsatatsi noshiacantaquempiro piquipatsitiro piitsaare; irintiquea quemisantanari, te inquipat- siteroji iitsaare; noneaquiero oquitetaque, oquitamarotasanoque. Queario icameet- sataque noneacameetsatantarcariri. ⁵ Maaroni antajeitaquerori noocoacaajeitaqueriri inquitsaataquearo ora quitamarotasnotatsiri catsini. Ainiro osanquenataca ivajiropee maaroni savicatsineri inquitequi. Nompeajero ivajiropee tseencajeitanari, iro cantain- cha eiro nopeajirotsi ivajiropee antirori maaroni noocoacairiri. Aisati noncamanteri Apa: “Iriotaque yoca quemisantaquenari”. Irosati noncamantajeiteriri maaroni inampirepee.

⁶ Otimirica piquemantari, pinquemavaquero oca nocamantajeitaquempi”.

Irootaque icantajeitaqueriri Jesoshi sarireshisati.

Isanquenajeitiniri quemisantajeitatsiri anta Jirarerejiaqui.

⁷ Aisati icantaquena Jesoshi:

—Jero oca pisanquenateneriri jivatacaaajeitiriri quemisantajeitatsiri anta Jirarerejiaqui: “Meeca noncamantempiro icamantaquenari yora cameetsatasanotatsiri, yora Quirishitosanori. Iriotaque ishanincani Iravirini, impincatsariventasanotee. Incanter- ica: ‘Intsipatena yoca’, eiro itimitsi tsaneemparine. Incanterica: ‘Eiro itsipatanatsi yora’, tecatsi areetacayearine. ⁸ Icantimpi: ‘Niotaquero pantayetaqueri. Peerani noocoacaitaquempi: “Pinquenquetsatero noneane, namitacotempi”. Ari pimatitaquenaro, irosati meeca pimataquenaro: tecatsi incanteetempi iroimajerenteetempi. Te pishequijeiteji, aisati te pimpincatsarijeiteji, iro cantaincha piquearioventajeitaquenaro nocantajeitaquempi. Picantajeitaqueri atiri: “Noquemisantaqueri Jesoquirishito”, te pimpashiventacayenaji. ⁹ Ainiro ashaninca quemisantiriri Satanashi, irootaque quisantaquempi, iro cantaincha icantashita: “Noquemisantiri Tasorents”. Te in- quemisanteriji, itseeyani. Coajica nareetacaajeitajeari aviroriqui intiyeroashitanta- peempiri, impincatsatashtitantapeempiri: iriojeitanaque oshequi nonintajeitaquempi. ¹⁰ Yoashinoncaajeivetaquempi, iro cantaincha piquearioventaquero nocantajeitaquempi, te pishemearozi, irootaque nojocacoventantaquempi. Coajica noneantajeiteari ma- roni savicajeitatsiri quipatsiqui niotanteari jaoca icantajeita. Ompomerentsitimo- jeitaqueari maaroni atiri; iro cantaincha, queario nojocacoventajeitatempi. ¹¹ Pamene, eiro osamanititsi nareetantajempiri. Pincanteani pinquemisantajeite, impoiji tecatsi tsaneavaquempine pijatanaque inquitequi; pisavicapaaaje anta, pincantaitatiyempani. ¹² Ariorica pimataquenaro maaroni noocoacajeitaquempi, ari nosavicacaasanotempi anta itiminta Tasorents: eiro pipajatsi aisati. Nosatoncaatempni pivancainaqui ivajiro Tasorents: iriotanteeteari pishanincatacari. Aisati nosatoncaatempni ovajiro inampi Tasorents: ora Jerosare iroquerari poneachaneri inquitequi. Impoiji iriotanteeteari

pinampitaro avirori. Aisati nosatoncaatempa novajiro narori, iroqueratajantsiri, iri-otanteeteari ashanincatavacaajeitaca.¹³ Otimirica piquemantari, pinquemavaquero oca nocamantaquempi’ ”.

Irootaque isanquenatacaaquerenari Jesoshi.

Isanquenajeitiniri quemisantajeitatsiri anta Araoriseaqui.

¹⁴ Aisati icantaquena Jesoshi:

—Jero oca pisanquenajeiteneriri jivatacaaajeitiriri quemisantajeitatsiri anta Araoriseaqui: “Meeca noncamantempo icanantaquenari yora Queariotasanotatsiri, ovaajeerori ora icantaqueeri Tasorents: irootaque Quirishitosanori. Irootaque intarori yovetsicantaque: imataquero maaroni icantaqueriri Tasorents. ¹⁵ Icantimpi: ‘Niotaquero maaroni pantayetaqueri. Pinquearioventenarome noocoacaimpiri, noshiacantempime catsirincajari; pintseencasanotenname, noshiacantempime catsincajari. Niotaque te pinquearioventenaroji noocoacaimpiri, iro caintaincha te pintseencasanotenaji; irootaque noshiacantantaquempirori saavajari. Eirorica picoi pincatsirincajate, ari pincatsincajate; aisati oquempetaca, eirorica picoi pinquemisantasano, ari pintseencasanoteta: eiro piconoirotsi. ¹⁶ Te noncoyeji nirero saavajatatsiri: noquishocajataquero, ontimaite. Aisati avirori, te noneacameetsatempiji.

¹⁷ Picantajeiveta: “Naro ashitaarantajeitachari, oshequi nomayetaque, tecatsi coiteimotajenane”. Picomitaca: te pioteji pashinoncaaca; pashinoncaasanotaca, tecatsi timimotempine, piquempetaca picaaratsempequitaque. Te piotasanoteriji Tasorents: oquempevetaca te pameneji. ¹⁸ Meeca noncantempi: pamanenaro oro cameetsatasanotatsiri, ontimimotantempiri pashitaarantantajejari. Aisati pamanenaro quitsaarentsi quitamarori pinquitsaatantajejari eiro ineanteetajimpitsi, eiro pipashiventantajatsi. Pamanenaro aisati aavintarontsi pincajoquitajejari, pamenantajejari. Pinequero, ariorica pincantena, ari nonquemisantacaasanotempi, noameetsajeitempi eiro pipashiventantatsi, niotacaasanojeitantajempiriri Tasorents. ¹⁹ Ariorica nonintasanotiri ashaninca, noametiri, aisati noasanquetairi, iriotanteeari eiro yantantajarotsi caari cameetsatatsi. Meeca eiro pitseencantitsi, irointi pinquenqueshireempa: pincoasanotaje pioteri Tasorents. ²⁰ Pamene, oquempetaca nocatiapaaca saiteriqui, nocoaque noneempi. Ariorica pineavaquena aisati povetsatavaquena, nonqueapaaque, nosaviquimotapeempi aisati noimotapeempi. Nocoasanotaque ashanincatavacaajeitaquea. ²¹ Tempa nomataqueneri Apa maaroni icoacaaquenari, impoiji nosaviquimotaqueri, notsipatajari nopincatsariventanti. Meeca pinquempetajena: ariorica pimataquenaro maaroni noocoacaaajeitaquempi, ari pisaviquimotena pintsipatena ampincatsariventantajeite. ²² Otimirica piquemantari, pinquemavaquero oca nocamantaquempi’ ”.

Irootaque isanquenatacaaquerenari Jesoshi.

4

Iquenquetsatacotiri Tasorents aisati saviquimojeitiriri.

¹ Impoiji namenanaji aisati, noneasanotaquero inquite, tsompoina; oquempetaca ashitareaca ashitacorontsi. Impoiji noquemajiri aisati yora noquemaqueri incaranqui, ariorica ineanati ishiavetacari tiorents. Icantaquena:

—Caatanaque aca jenoquica. Noncamantempo nantayeteri coajica.

² Irosati otentashiretantaquena Ishire Tasorents, irosati inquiteequi. Jeri noneapaa-queri Tasorents, isaviqui isavicamentequi ipincatsaritants. ³ Oshequi imarereataque, iquempetacaro mapi marereatatsiri: quitioncanirotatsiri, quenashinirotatsiri, maaroni. Aisati ainiro anta savirents, ishoncacaro isavicitari. ⁴ Aisati oshoncacaro isavicitari oshequi pashini savicamentequi, ocarataque 24. Anta isavicateitaque 24 savicacantatatsiri, pincatsariteitatsiri. Iquitsaajeitaro iitsaare quitamaromaori, yamatseejeitaca. Iro yovetsiqueetiri iramatseere oro. ⁵ Oponeaca ivincatsarimentoqui Tasorents quem-petarori iporequi aisati itirei. Aisati inejitacaro tsiorontsi, ocarataque 7: oshiacantaca Ishire Tasorents. ⁶ Aisati inejitacaro incajare, oshiaquero amenaarontsi.

Aisati anta inejitacari aparoni ivira, jeri itapiiqui itsipa, jeri iracosanoriqui aisati irampatequi itimi itsipapee ivira. Icarajeitaque 4. Otimi iroqui iriori ivoroqui aisati otimi iroqui itapiiqui. ⁷ Ishiaqueri aparoni maniti; irio itsipa ishiaqueri vaca; irio itsipa ishiaqueri shirampari; irio itsipa ishiaqueri paquitsa, itimpavanquitanaca. ⁸ Ari otimi ishivanquipee virantsi 6; oshequi iroquipee, jaocarica onayetaqueri. Icantani ipampoyeaventajeitiri Tasorentsi: quitaiteriqui, tsiteniriqui; te iroimpacayeroji. Jero oca ipampoyeapinitiri:
 Icameetsataque, icameetsataque, icameetsataque yora Avincatsarite Tasorentsi:
 oshequi itasorentsitaque, tecatsi ompomerentsitimoteari.
 Icantani itimi: peerani, irosati meeza, aisati coajicani.

⁹ Ari yapiitapinitiro:
 Icameetsatasanoti Tasorentsi, oshequi nopincatsatiri.
 Oshequi nopasonquitiri yora pincatsariventaqueunari.
 Icantani yanei, eiro icamitsi catsini.

¹⁰ Ariorica iquemapinijeitavaqueri yora 24 savicacantatsiri, itiyeroashitapinijeitacari Tasorentsi, ipincatsajeitaqueri. Yaajeitaquero iramatseerepee yoanijeitaqueneri iitiqui, ipampoyeaventajeitiri:

¹¹ Picameetsatasanotaque, Novincatsarite, oshequi pitasorentsitaque.
 Ocameetsati noneacameetsajeitimp, nopincatsajeitimp.
 Niotaque tecatsi pomerentsitimotempine: tempa pivetsicaquero maaroni timajeitatsiri.
 Picoaqueni peerani ontine paitapeerica, irootaque otimantacari meeza.

5

Iquenquetsatacotiri Jesoshi, ishiacantiri ovisha.

¹ Ari noneaquiero aisati iracosanoriqui Tasorentsi yampinaicaquero sanquenarentsi, osanquenataca tsompoinaqui aisati acaqueroca. Ari ampinaicaca aisati otsinetaca: ocarataque 7 otsinetaca. ² Jeri noneaqueri inampire Tasorentsi, shintsitasanotatsiri, icantaveta:

—¿Janica cameetsatasanotatsiri irimatantearori irampinaicareajero oca sanquenarentsica, intsinecareajero?

³ Ari namenajeivetanaca, tecatsi anquerine. Tecatsi materone irampinaicareajero: inquitesati, quipatsisati, sharincavenisati, tecatsi catsini. ⁴ Te intimeji catsini cameetsatasanotatsine, matasanoteroneri irampinaicareajero, irootaque ni-raantanacari: noashiretanaca te intimeji camantenane ocantayetiri sanquenarentsi.

⁵ Impoiji icantaquena aparoni savicacaantatsiri:

—Eiro piraatsi. Timatsi ampinaicareajeroneri: yora ishanincani Jorani; iquempevetari maniti, oshequi ishuntsiti. Aisati ishanincatacarini Iravirini, aisati oshequi ipincatsariti. Imataqueneri Tasorentsi maaroni icoacaajeitaquerir, irootaque irimatantajearori irampinaicareajero sanquenarentsi, aisati intsinecareajero.

⁶ Ari ainiro anta Tasorentsi, jeri ivira, aisati yora savicacantajeitatsiri. Jeri noneaqueri isatecaca nianqui Ovisha, yamashitaca ora isatayeetaqueri peerani yoanteetacariri. Otimi itseequi 7, aisati iroqui 7: oshiacantaquero Ishire Tasorentsi, itiancaquero otsoetequero quipatsi. ⁷ Ari isavicaque Tasorentsi ivincatsarimentoqui, yajiriquiro iracosanoriqui sanquenarentsi, ampinaicapatitachari. Ari ijataque Ovisha iriori, yaapaquero. ⁸ Impoiji yora virantsi aisati yora savicacantayetatsiri itiyeroashijjeitacari Ovisha. Yajiricajeitiro shiavetarori ijaviquimento; yajiricajeitiro aisati shiavetarori tsota, yovetsiqueetiro oro: otimi tsompoina casancapatsari. Oshiaquero iroori casancapatsari iquenquetsatacapinijeitiri quemisantatsiri Tasorentsi. ⁹ Impoiji ipampoyeaventajeitiri Ovisha pampoyeantsi iroquerari:

Ocemeetsati pajiriquero avinti sanquenarentsi,
 aisati ocemeetsati pintsinetarejero ora otsineyetacara.
 Tempa peerani yoyeetaquempi, aparajatimentajeitacari piraja maaroni atiripee,
 poavisacojeitacariri irisaviquimojeitanteeariri Tasorentsi, maaroni.
 Poavisacojeitaqueri timayetatsiri maaroni atiripee, nashiyetarori maaroni irineanepee.
 Queario, poavisacojeitaqueri poneayetachari maaroni nampitsipeequi, jaocarica isavicajeitiri.

¹⁰ Pipeajeitaqueri pincatsarijeitatsiri aisati quenquetsatacapinijeitiriri Tasorents: impincatsariventajeiteri maaroni savicajeitatsiri quipatsiqui, aisati incanteri Iriri iramitacojeiteri.

¹¹ Impoiji namenanaji aisati, noneajeitaqueri; aisati iriori oshequi catsini inampirepee Tasorents: te aparopee irine, oshequisano catsini. ¹² Antearojenca ipampoyeaventa-jeitiri:

Icameetsatasanotaque Ovisha yoyetaqueri, ioejitaque maaroni timajeitatsiri oshequi itasorentsitaque, oshequi timimojeitiriri, oshequi ioti catsini, maaroni imayetaquero catsini.

Tsame maaroni ampincatsajeiteri, aneacameetsajeiteri, aveshireimentajeiteari.

¹³ Aisati noquemajeitaqueri maaroni savicajeitatsiri inquitequi, quipatsiqui, aisati maaroni camajeivetainchari: yora itijeevetacari quipatsiqui, aisati yovinqueevetari; ipampoyeajeitaque maaroni catsini:

Tsame aveshireimentajeiteari Ovisha maaroni, ampincatsajeiteri, aneacameetsajeiteri, ancantaitatiyempani. Tempa itasorentsitasanotaque, icantani, peerani.

¹⁴ Irosati icantantacari yora 4 virantsi:

—Aitaque ancantajeiteari, ampincatsatasanojeiteri.

Aisati itiyeroashijkeitacari savicacantajeitatsiri, ipincatsajeitaqueri maaroni.

6

Itsinecareajiro sanquenarentsi.

¹ Ari ocarataque 7 otsinetaca sanquenarentsi. Noneacotaqueri Ovisha itsinecareajiro aparoni, irosati noquemantacari virantsi, antearojenca ineanati, iquempetacaro itirei, antearojenca. Icantiri quijacotariri cavayo:

—Caate, pimpoque aca.

² Irosati noneantavacariri jivatapaintsiri: jeri iquijacotapaacari cavayo quitamarori, yajiricaquero iveane. Yamatseeeyeetaqueri; coajica irijatanaque inquisajeiteri quishiriri, incoaque iranaacojeiteri irimanateri, impoyereajeiteri.

³ Impoiji itsinecareajiro otsipa, irosati icantantari itsipa virantsi:

—Caate, pimpoque aca.

⁴ Jeri iquenapaaque itsipa cavayo, quitioncatasanotatsiri. Icanteetiri:

—Meeca poamejeiteri atiri irimanatavacaajeitea, iroavacaajeitea.

Ari ipeetavaqueri antearo ivesamento.

⁵ Impoiji yora Ovisha itsinecareajiro otsipa, irosati noquemantacari itsipa virantsi, icantiri:

—Caate, pimpoque aca.

Irosati noneantavacari iquenapaaque potsitari cavayo, yajiricapaaquero quijacotariri imoncararatantayetariri tenayetatsiri, paitapeerica. ⁶ Irosati noquemantacari satecainchari virantsi nianqui, icanti:

—Te aneasanoteroji tirico aisati oquempetaca shinqui, irootaque opinatasanotantacari. Irointi oreji orivo aisati ovaja, irootaque timasanotaintsiri.

⁷ Impoiji itsinecareajiro otsipa, ocaratapaaque meeca 4, irosati noquemantacari itsipa virantsi, icantiri:

—Caatanaque, pimpoque aca.

⁸ Jeri noneavaqueri pashini cavayo, quiterivitiri; ipajita yora quijacotapaariri: Caamantsi. Yojatapairi pajitachari Sharincaveni. Icantavaqueri:

—Aviro cantacoventajeiterineri oshequi atiri anta quipatsiqui, nocoaque pimpe-saarantajeiteri, peti, peti; paacantajeiteri itashe; pojoquiiitacaaranteari; pintianqueneri maniti irantsicaaranteri, irovamaaranteri.

⁹ Impoiji itsinecareaqueri otsipa, ocarataque meeca apapacoron; irosati noneantacarori itaapinitantarori casancapatsari. Itimi anta oshequi quemisantajeitatsiri, camajeivetainchari. Peerani iquenquetsajeitaquero irineane Tasorents, icamantapinitiri atiri jaoca icantari Tasorents, irootaque yoanteetacariri. ¹⁰ Antearojenca icantajeiti camajeivetainchari:

—Novincatsarite, aviro pincatsariventajeitiriri maaroni savicajeitatsiri. Oshequi picameetsatasanotaque, pitasorentsitasanotaque. Niotaque otampaticatasanot i pineane, te pamatavitantimateji. ¿Jaoca oncarate pinquisacoventajeitajena? ¿Jaoca oncarate poasanquetaajeitanteeariri iriori savicajeitatsiri quipatsiquinta, oajeitaquenari?

¹¹ Ari ipajeitaqueri quitsaarentsi quitamarotasanotatsiri. Icantiri:

—Pimaoreavaquetsita. Tequera omoncarateaji noasanquetaasanojeitanteeariri oajeitaquempi. Timatsiquera itsipapee piyemisantaririnte iroyeeteri. Piquemisanta-jeitaquena, irootaque yoanteetaquempi; inquemisantajeitaquena itsipapee, irootaque iroanteeteariri iriori. Ariorica omoncarataquea, ari noasanquetaajeiteri maaroni oan-tatsiri.

¹² Impoiji itsinecareajiro otsipa, ocarataque meeca 6. Namenanaque, jero onicasanotanaca quipatsi, antearo onicanaca: nica, nica, nica. Itsitenitasanotanaque catsirincaiteri, iquempetanacaro tsmenquito; inti cashiri, iquitioncatasanotanaque, iquempetanacaro irajantsi, quitionca catsini. ¹³ Aisati ipariajeitanaque maaroni impoquiropee: iquempetacaro oitsoqui iyera ora iraacatsiri, ariorica otimi antearo tampea, ari ojireayetanaque. ¹⁴ Opeanaca inquite, oquempetaca yampinaiqueetaquero sanquenarentsi. Opeaca maaroni quipatsi: toncaaripee, ovoyeja, maaroni; poyere.

¹⁵ Aisati noneaqueri ivincatsaritepee atiri, jeri ivincatsaritepee soraro, ashitarantin-cari, shintsiyetatsiri, ivatorote, iratiritepee, maaroni atiri: ishiajeitanaca omoroqui imperita. Aisati ishiajeitanaca mapipeequi anta toncaariqui. ¹⁶ Icantajeivetacaro toncaari aisati mapi:

—Pimpariye, pintijajeitena, pimanena. Yaanacari Tasorentsi, aisati yaanacari yora Ovisha. Oshequi iquisaquena. ¹⁷ Meeca iquisajeitaquena maaroni; meeca impoyerea-jeitena, poyere.

7

Isatoncaajeitiri ishanincapeeni Ishirairi.

¹ Impoiji noneaqueri inampirepee Tasorentsi, caratatsiri itsipasati, icatiajeitaca anta otsapitapaa quipatsi; ipeavaquero tampea, maaroni. Ipeasanotavaquero maaroni, caari otimanta tampea quipatsiqui, incajarequi, inchatoqui, jaocarica. ² Impoiji aisati noneaqueri itsipa inampire Tasorentsi, iponeaca anta iquenapainta catsirincaiteri, yamaquero irisatoncaatanteariri atiripee. Icajemacojeitapaquaqueri itsipapee, yora tsoncajeiteroneri coajica quipatsi aisati incajare. ³ Icantiri:

—Eirotsita pitsonquitarotsi quipatsi, incajare, inchato, maaroni. Ajivatavaquerita asatoncaajeiteri ivancainaqui maaroni quemisantajeitiriri Tasorentsi.

⁴ Ari noquemaqueri icantaque jaoca icarajeitaqueri satoncaajeitainchari: icarajeiti 144,000 quemisantatsiri. Icarajeitaqueri ishanincani maaroni itomipee Ishirairi. ⁵ Ari isatoncaajeitaqueri ivancainapeequi: icarajeitaque ishanincani Jora 12,000, icarajeitaque ishanincani Oroveni 12,000, icarajeitaque ishanincani Cara 12,000, ⁶ icarajeitaque ishanincani Asere 12,000, icarajeitaque ishanincani Nejatari 12,000, icara-jeitaque ishanincani Manaseshi 12,000, ⁷ icarajeitaque ishanincani Shimeo 12,000, icara-jeitaque ishanincani Irevi 12,000, icarajeitaque ishanincani Isacara 12,000, ⁸ icarajeitaque ishanincani Savoroni 12,000, icarajeitaque ishanincani Jose 12,000, icarajeitaque ishanincani Vejami 12,000. Ari isatoncaajeitiri ivancainaqui, maaroni.

⁹ Impoiji namenanaji aisati, jeri noneajeitaqueri oshequi catsini atiri aisati, yapato-jeitaca: tecatsi ancantea amoncarajeiteri jaocarica icarajeitiri. Inashijeitaca atiripee, onashijeitaca irineaneppee, maaroni. Icatiashijeitapaacari Tasorentsi, aisati anta itim-inta Ovisha. Iquitsaajeitacaro quitamarori iitsaare, yajiricajeitaquero compiroshi.

¹⁰ Antearojenca icantajeitaque:

—Iriotaque oavisacojeitaqueeri yora Tasorentsi savicatsiri ivincatsarimentoqui, aisati yora Ovisha.

¹¹ Ari itimi quempeji Tasorentsi yora savicacaajeitantsiri aisati yora virantsi. Ishon-cajeitacari oshequi catsini inampirepee Tasorentsi, ipincatsajeitaqueri, ¹² icantajeiti: Ariove, tempa oshequi ioti Atasorentsiti, oshequi itasorentsiti.

Tsame maaroni aveshireimentapinijeiteari, aneacameetsatapinijeiteri, ampasonquitapinijeiteri, ampincatsatapinijeiteri; aitaque ancantaitatiyempani.

¹³ Impoiji isampitaquena aparoni savicacaantatsiri:

—¿Piotimpa janica yora quitsaajeitachari quitamarori? ¿Piotimpa jaoca iponeajeitari?

¹⁴ Nocantaqueri:

—Teve nioteji. Pincamantena: tempa pioti avinti.

Icantaquena:

—Iriojeitaque neajeitaqueriri yashinoncaajeitaca oshequi atiri; oshequi ineacatsitacaro iriori. Iquivantajeitaro iitsaare iriraja Ovisha, irootaque oquitamarotasanolantacari.

¹⁵ Irootaque yapatotimentantacariri Tasorentsi, intacojeitantzcariri anta ivancoqui. Icantani intacojeitacari: quitaiteriqui aisati tsiteniriqui. Ari quiso iroajeiteri Tasorentsi iriori, irojocacoventajeiteri, maaroni. ¹⁶ Eiro iquemajeitajirotsi aisati itashe, aisati eiro iquemajeitajirotsi imire. Eiro itaajeitajiritsi aisati catsirincaiteri, eiro iquemaatsicatajarotsi aisati paamari. ¹⁷ Ari yora Ovisha itsipatari Tasorentsi: iriotaque Ovisha shenteiterineri maaroni quitsaajeitachari quitamarori, papinijeiterineri maaroni coiteimojeitacariri. Iroimoshirencaitaqueri, eiro ishinetiritsi iriraajeitacea aisati.

8

¹ Impoiji itsinecareajiro aisati, caratatsiri 7. Ari imajerejeitanaque maaroni savicajeitatsiri anta inquitequi. Osamanitapainti omajeretasanolanaque catsini.

Itiojeiti intayetacarori inampirepee Tasorentsi, caratatsiri itsipasati.

² Impoiji aisati noneaqueri 7 inampirepee Tasorentsi, icatiajeitaca Tasorentsiqui. Ipeetaqueri 7 tiorentsi. ³ Jeri aisati itsipa nampirents, icatiaca anta itaapinitantaroriquinta casancapatsari, yovetsiqueetiro oro. Yajiricaquero onantajaniquitari yovetsiqueetiro aisati oro. Ari itaaqueneri Tasorentsi casancapatsari, oshiaquero oca iquenquetsatacaapinijeitiri quemisantiriri Tasorentsi. ⁴ Ari areetacari oyachaare Tasorentsiqui, ocasancajencatapaaque, oshequi ineacameetsataquero. Aisati oquempetaca, oshequi ineacameetsataquero iquenquetsatacaapinijeitiri quemisantajeitiriri. ⁵ Impoiji yora nampirents yaquero paamari, yoquero onantajaniquitari, ipishoncaquero quipatisquica. Impoiji antearojenca itireanaque, tiriririri; iporecanaque, porec, porec; aisati antearo onicaca quipatsi, nica, nica, nica. ⁶ Irosati yovetsicantajeitanaca nampirents intiotanteari.

⁷ Itiotaque jivataintsiri, tii, tii, tii; irosati opariantanaca quipatsiqui iriniqui, jero aisati paamari, oconoacaro aisati irajantsi. Otaarantaca timayetatsiri quipatsiqui, otaarantaca inchatoshi; otaasanotaca iroori saveshi, tojari, maaroni, poyere.

⁸ Impoiji itiotaque apitetapaintsiri nampirents, tii, tii, tii; irosati noneantacarori quempetarori antearo toncaari, tainchari: ipishonqueetaquero incajarequi, pocn.

⁹ Opeaarantaca incajare irajantsi, icamaarantaque timatsiri incajarequi, aisati otsonhaarantaca pitotsipee.

¹⁰ Impoiji itioti mavatapaintsiri, tii, tii, tii; irosati noneantacarori shiaqueriri impoquiro iparianaque, itaapaaca, pomein. Iparianaque nijatenipeequi aisati anta ocontejayetapaaque njia. ¹¹ Opeaarantaca quepishijari, irootaque icantanteetariri shiavetariri impoquiro: Quepishiri. Icamajeitanaque oshequi irajeivetarori njia.

¹² Impoiji itioti aisati itsipasatitapaintsiri, tii, tii, tii; irosati itsitenitavetanaca catsirincaiteri aisati cashiri. Aisati itsivacaarantayetanaque iriori impoquiropee, irosati itsitenitavetanaca quitaiteriqui. Aisati ipearantayetanaca quitaporoquitatsiri tsiteniriqui. ¹³ Ari namenanaji aisati, noneantacariri anteari paquitsa yaranaque anta inquitequi. Aisati noquemaqueri, antearojenca ineanati, icanti:

—Jo, oshequi irashinoncaasanojeitanaquea catsini savicajeitatsiri quipatsiqui. Irotaintsi intiojeite yora itsipapee nampirents, caratatsiri mava, impoiji irashinoncaasanojeitea maaroni atiripee.

¹ Ari itioti itsipa inampire Tasorentsi, yora apapacorotapaintsiri, tii, tii, tii. Irosati noneantacariri impoquiro, iponeaca inquitequi, ipariaque quipatsiqui. Ipeetaqueri iyavitariori omoro jatatsiri tsompoina catsini, te aneeroji oncaratapee, ² irosati antoo. Ari iyavireapaaquero, itatareapaaquero, jero ocontejencatapaaque oshequi oyachaare. Ojataque jenoqui irosati otsitenitantanaca jenoqui, aisati iriori catsirincaiteri itsitenitanaque. ³ Impoiji noneaqueri tsinari, iquenantapaacaro cachaa, itsoteapaaquero quipatsi, imatacaaqueri Tasorentsi yoantaque, iquempetacari quitoniro. ⁴ Icantiri:

—Poajeitearo ivanquirepee maaroni caari quemisantajeitana, yora caari satoncaajeitacha ivancainaqui. Eiro catsini poarotsi otsipayetari saveshi, tojari, inchatoshi, eiro catsini. ⁵ Nocoaque pinquematsicatacayeari maaroni caari quemisantajeitana, incarataque 5 cashiri, iro cantaincha eiro poamaajeitiritsi.

Ari yoajeitaqueri, oshequi icatsitaque, iquempetacari quitoniro. ⁶ Ariorica omoncarataquea maaroni oca noneaqueri, ari incoajeivetanaquea atiripee incamajeite; iro cantaincha eiro imatirotsi income. Incoajeivetanaja iroajeame irisati, iro cantaincha eiro imatirotsi.

⁷ Ari namenasanotaqueri tsinari: iquempetacari cavayo, ipashicayetaca ashiro eiro aveantaritsi sataamentotsi aisati chacopi. Yamatseetacaro shiirori oro. Orari ivoropee oshiaquero avoropee arori. ⁸ Ivit oquempetacaro oishi tsinane, oquishipeti. Iraji oquempetacaro iraji maniti, antearoquiaji. ⁹ Inejitonqui oshiaquero ashiro, ariorica yaranaque, antearojenca yaranaque, ishiaquero itirei, tiriririri. ¹⁰ Irishi oshiaquero irishi quitoniro, ainiro itseequi. Ariorica yoqueri atiri, icatsitasanotaqueri, ocarataque apapacoroni cashiri icatsitaque. ¹¹ Ainiro ivincatsarite tsinaripee: iriotaque ivincatsarite maaroni camaari. Ipajita irineanequi jorio Avaroni; iro irineanequi quireshiasati ipajita Aporoni. Iro acantiri aneanequi arori: Poyereantatsiri. ¹² Aitaque icantari yora intacarori oashinoncaajeitiriri quipatsisati. Timatsiquera apite aisati.

¹³ Impoiji itioti itsipa inampire Tasorentsi, yora seishitapaintsiri, tii, tii, tii; irosati noquemantacariri itsipa neanatatsiri. Ari oponeacari irineane ora itaapinitantaroriqui casancapatsari, vetsicachari oro. Otimi anta Tasorentsiqui, otiminta otseequi itsipasati. ¹⁴ Icantiri tiotaintsiri:

—Pijate poimisoquijajeri yora 4 camaari yoisotiri Tasorentsi anta antearojaqui eni: ora pajitachari Eojarateshi.

¹⁵ Ari ijataque, yoimisoquijajiri camaaripee. Ari icantini Tasorentsi peerani: “Niotaquero jaoca oncarate impoyereaarantanteeariri atiripee. Niotaquero jaoca oncarate omoncaratanteari osarintsi, cashiri, quitaiteri, aisati jaoca incarate catsirincaiteri”. Meeca omoncarataca, irootaque yoimisoquijantajariri. ¹⁶ Yora camaari ijivajeitaqueri oshequi catsini soraropee, icarajeiti 200,000,000. Niotaqueri, icantaquenari. ¹⁷ Aisati noneajeitaqueri iyavayote. Ipashicanejitaro quijacotariri quiraatatsiri, oshiaquero paamari, ora morecasanotatsiri. Iito cavayopee oshiaquero iiotopee maniti. Oponeaca ivantequi oshequi paamari, jero cachajenca oshequi, jero morecasanotatsiri. ¹⁸ Iroojetaque poyerearantajeitiriri atiripee: ora paamari, cachajenca, jero morecasanotatsiri poneachari ivantequi cavayo. ¹⁹ Irootaque yoantariri cavayo atiri: ivanteaisati irishi. Iro irishi oshiaqueri maranke, ainiro oitotaca, yatsicantacariri atiri.

²⁰ Ari itimaarantaque aparopee atiri, iro cantaincha te inquenqueshirejeitelpaj: te incoyeji catsini inquemisanteri Tasorentsi. Icantani yantapinitiro caari cameetsatatsi, ipincatsatapinijeitiri camaari, aisati ipincatsatashijeitaro yovetsicayetiri: oroyetatsiri, peratayetatsiri, otsipa ashroyetatsiri, mapitatsiri, inchatoyetatsiri, maaroni. Ijitasorentsitashiyetaro, iro cantaincha tecatsi oncantea amene, onqueme, aisati aniite. ²¹ Icantani yoayeriti, imatsitanti, yantiro caari yai, icoshiti. Te inquenqueshiretemateaji catsini.

¹ Impoiji noneaqueri itsipa inampire Tasorentsi, shintsitasanotatsiri. Iponeaca inquitequi, oshoncacari mencori, itimaque savirents iitoqui jenioquiji. Ivoro os-hiaqueri catsirincaiteri, ivori oshiaquerpa amari. ² Yajiriquire sanquenarentsi, pinaiccareachari. Ilisanori aaticajatapairori incajare, irointi irampate aaticapairori quipatsi. ³ Antearojenca icajemapaaque, iquempetacari maniti icajemi, jan, jan. Impoiji itireanaque, icarataque 7, tiiriririri. ⁴ Noquemantacariri itireanaque, irotantsi nosan-quenatem, iro cantaincha noquemaqueri icantaquena inquitesati:

—Eiro pisanquenatirotsi icantiri tireatsiri, pimanero.

⁵ Ari noneajiri aisati inampire Tasorentsi, yora aatiquirori incajare aisati quipatsi: yovanquiro iracosanori inquitequi, ⁶ icanti:

—Timatsi Tasorentsi aneasanotatsiri, icantani yanei, eiro icamitsi catsini. Yovetsica-queri inquite aisati maaroni timantajeitarori; yovetsicaqueri quipatsi aisati maaroni timantajeitarori; yovetsicaqueri incajare aisati maaroni timantajeitarori. Ioti iriori te nontseeyaji, irotantsi meeca omoncaratea. ⁷ Impoiji intiote yora inampire Tasorentsi, yora sietetapaintsiri. Ari onconijatapaaque manavetachari peerani: oca yoametiriri Tasorentsi quemisantajeitiriri peerani, yora quenquetsatacojeitiriniri.

⁸ Impoiji noquemajiri aisati jenoquisati quenquetsatacaaquerenari incaranqui. Icantana:

—Pijate, paavaquero sanquenarentsi yajiriquire nampirents aatiquirori incajare aisati quipatsi.

⁹ Irosati nojatashitancariri, nocantapairi:

—Pimpenaro sanquenarentsi.

Icantavaquena:

—Jero, payero, poyearo; ariorica poaquearo, pinequero opochati, oquempetaca ija pitsi. Iro cantaincha impoiji ompianeentaquempi.

¹⁰ Ari naavaquero, noacaro. Opochavetaca, iro cantaincha impoiji opianeentaquena.

¹¹ Impoiji icantaquena:

—Meeca pinquenquetsatacoteri aisati jaoca incantajeitarei coajica pashinipee atiri: nashiyetarori irineaneppee, pincatsaripee, maaroni.

11

Iquenquetsatacotiri apite quenquetsatacantatsiri.

¹ Impoiji ipaquenaro Tasorentsi inchaqui, shiirori cotiquiirontsi, impoiji icantaquena:

—Jero oca pimoncaramentoca. Pijate meeca novancoqui, pimoncarataitero; aisati pimoncaratero itaantarori casancapatsari, aisati pimoncarajeiteri maaroni quemisantajeitatsiri anta, jaocarica icarajeitiri. ² Eiroyea pimoncaratirotsi anta saiteriqui: irointiquea pimoncarate onta iquenantari caari quemisantajeitatsi. Incarataque 42 cashiri inquenayetanaque itsipapee atiri anta nonampiqui: ora Jerosare. Oshequi iroashinon-caajeiteri savicajeitatsiri. ³ Nontianqueri apite quenquetsatacotonaneri, oncarate 1,260 quitaiteri inquenquetsatapinite. Incantapinijeiteri atiri: “Pinquenqueshirejeitanaquea. Eiro papiitapinitrotsi caari cameetsatatsi, irointi pinquemisantajeite, ‘pintimajeite cameetsa’”.

⁴ Iquenquetsatacotitacarini peerani Sacariashini yora apitetatsineri, ishiacantaqueri orivo. Aisati ishiacantaqueri onantari veera timatsiri anta Avincatsaritequi. Tempa irio-taque pincatsariventajeitiriri maaroni atiri. ⁵ Intimerica coavetachaneri iroashinoncay-erime yora apitetatsineri, omponeaquea ivantequi iriori paamari, ontsoncasanojeiteri, ontaajeiteri, pomein. ⁶ Oshequi irimatacaajeiteri Tasorentsi. Peerani inquenquetsatap-nite, iro cantaincha incoaquerica eiro oparii incani, eiro opariitsi, irosati irivecaran-tearori inquenquetsate. Aisati, incoaquerica, impeajero njia irajantsi. Aisati incoaque-rica, iroashinoncaapinijeiteri maaroni savicajeitatsineri. ⁷ Ariorica irimoncarataquero inquenquetsate, jeri aisati imponeaquea omoroqui tsompoina covencatatsiri iriori. In-quisapeeri quenquetsatatsineri, iranaacotapeeri, iroapeeri, shemi. ⁸ Imponaajeitaquea camajeitatsineri anta Jerosarequi, nianqui. Ishiacantaqueri Tasorentsi Jerosare Soroma aisati Ejipito; iro ishiacantantarori, oshequi yantapinijeitiro jerosaresati caari cameetsatatsi. Tempa aitaque ipajacoyetaqueriri Jesoshi Jerosarequi. ⁹ Oncarate mava quitaiteri

imponaaajeite nampitsiqui nianqui, irosati intampaticatantajeari catsirinaiteri aisati. Impocajeite maaroni atiripee iramenajeiteri camaintsineri, irinashijeitanaquea ame-najeiterineri: imponeaquea otsipapeequi nampitsi, onashiyetaquea irineanepee. Eiro ishinetiritsi intjeeteri. ¹⁰ Inquimoshirejeitanaque maaroni savicajeitatsineri, iro in-quimoshiretanteari incamaque yora apite quenquetsatacaajeivetearineri: impashitava-caajeitea paitapeerica. Incantajeite:

—Tsame anquimoshirejeite. Camanirotaque yora quenquetsatacotiriniri Tasorentsi: eiro imatajirotsi iroashinoncaajeitajee aisati.

¹¹ Iro cantaincha tampatica catsirinaiteri intasoncajeri Tasorentsi, intinaajeitajeri apite, incatiajeitanaje. Ari intsaroacaajeitanaqueari maaroni neajeitajerineri. ¹² Impoiji inquemaqueri Tasorentsi, antearojenca incanteri:

—Cantanaje aca jenoqui.

Ari irijajeitanaque inquitequi, inquenantanajearo menci; irineajeitavajeri maaroni quisajeivetariniri. ¹³ Irosati onicantanaquea quipatsica, ontireaarantanaque pancotsipee. Incarajeite camajeitatsineri 7,000. Oshequi intsaroajeitanaque itsipapee, impoijiquea impincatsajeitaqueri, icantajeite:

—Tempa oshequi ipincatsariti Tasorentsi, itasorentsitasanoti.

¹⁴ Irootaque omoncaratanteari apitetapaintsiri iroashinoncaajeiteri Tasorentsi atiripee. Apanivaniji ora mavatapaintsineri.

Moncarataca ipincatsariventanti Tasorentsi.

¹⁵ Impoiji itiotaque yora itsipa inampire Tasorentsi, yora sietetapaintsiri: tii, tii, tii. Noquemajeitaqueri savicajeitatsiri inquitequi, antearojenca icantajeiti: Meecaquea impincatsariventajeiteri Avincatsarite maaroni quipatsisati, incarateri Quirishito impincatsariventantajekte, incantaitatiyempani.

¹⁶ Impoiji yora 24 savicacaajeitantsiri iponeaca ivincatsarimentoqui, irosati itiyeroashijeitancariri Tasorentsi: oshequi ipincatsajeitaqueri.

¹⁷ Ipampoyeaventajeitiri:

Avirotaque, Novincatsarite, Tasorentsisanori:

oshequi pishintsitaque, oshequi pipincatsaritaque.

Te pimpashinitapiniteaji, picantani pitasorentsitaque.

Aisati pipincatsaritasanotaque, meeca pimpincatsariventajeiteri maaroni atiri; eiro pojocajirotsi, irosati pincanteani.

Irootaque nopasonquijeitantimpipi.

¹⁸ Iquisajeivetimpi atiripee, iro cantaincha meeca pipiajeitacari.

Poitinaajeitajiri camajeivetainchari, maaroni:

pipinajeitaqueri maaroni antaveetimpiori picoacaaajeitaqueri, maaroni quenquetsat-acojeitimpipi, quemisantajeitimpipi, maaroni.

Pincatsajeitimpipi, pincatsariveitachaniri quipatsiqui, caari pincatsariveitachani, maaroni.

Cameetsa pisavicacaajeitaqueri pinampiqui.

Irintiquea yora quisajeitimpiniri, caari cameetsajeitatsini, poasanquetaajeitaqueri, pitiancajeitaqueri Sharincaveniqui.

¹⁹ Impoiji ashitareanaca ivanco Tasorentsi anta inquitequi, noneaquero tsompoina cajo, ora onantari isanquenare Tasorentsi peerani. Aisati noneaquero yamatsequi, matsec, matsec; aisati antearojenca itirei, tiiriririri; aisati onicanaca quipatsi, shique, shique, shique; jero aisati opariitasanotaque iriniqui, sacorororo.

Iquenquetsatacotaqueri Quirishito aisati yora maranquetatsiri.

¹ Impoiji otimi aisati noneaqueri anta inquitequi, ishiacantaqueeneri aisati Tasorentsi, ayotanteari irantayeteri coajicani. Noneaquero tsinane, oquempetaca oquitsaatacari catsirinaiteri, aaticaqueci cashiri, amatseetacari 12 impoiquiro. ² Otsomontetaque, irotaintsi intime, atsicaneentaquero, ocavintsaanaca, ocajemanaque:

—Ayavee, ayavee.

³ Imapocaquero, ipocapaaque anteari maranque, catsini; quitioncaitaque ini. Ocarataque iito 7, aisati itseequi 10. Yamatseeyetaca iiotopeequi. ⁴ Irishi inoshicaaranta-paaqueri oshequi impoquiro catsini, sorororo; impoiji ipishoncajeitaqueri quipatsiqui. Icatiapaaca anta otiminta tsinane, yoyeaquero ontimeri otomi, iroantavaqueariri. ⁵ Ari otimiri otomi, yora pincatsariventasanojeiterineri maaroni atiri; tecatsi piatearinier coajicani. Imapoquiri Tasorentsi, yaapitsatanaqueri jananequi, yaanajiri inquitequi, isavicacaapaaqueri ivincatsarimentoqui. ⁶ Oshianaca tsinane anta caaraiteriqui, anta yovetsicaqueneronta Tasorentsi. Ishentaquero anta cameetsa, ocarataque 1,260 quitateri.

Imanatavacaajeitaca anta inquitequi.

⁷ Jero aisati imanatavacaajeitaca anta inquitequi. Yora Miyeri, icarajeitaqueri itsipapee inampire Tasorentsi, iquisajeitavaqueri yora maranque aisati inampirepee iriori; imanatavacaajeitaca. ⁸ Irio anaacotantatsiri inampirepee Tasorentsi, yojocajeitaqueri maranque aisati icarajeitiri, tecatsi incantea iriori impiajeitanaje inquitequi. ⁹ Ari yojocasanojeitaqueri quipatsiqui, aisati maaroni inampirepee. Iriotaque yora maranquetatsiri peerani: ivincatsarite camaari, aisati ipajiyetiri Satanashi. Peerani oshequi yamatavijeivetacarini atiripee, iro cantaincha eiro imatapirotsi aisati. ¹⁰ Impoiji aisati noquemaqueri inquitesati, antearojenca icanti:

—Meeca yoavisacotasanojeitaquee Tasorentsi, itasoncacoventajeitaquee, ipincatsariventajeitaquee; aisati iriori Quirishito ipincatsariventajeitaquee. Cameetsataque. Icantani peerani icantacojeitaquee Satanashi, aisati maaroni ayemisantaririnte, icoapinivetaca iroasanquejeiteeme Tasorentsi: icantani, quitaiteriqui, tsiteniriqui. Meeca quea eiro imatapirotsi Satanashi aisati. ¹¹ Icamimentajeitaquee Ovisha, aparatimentajeitaquee iriraja, irootaque caari imatantajaro Satanashi iroasanquetacantajee. Aisati aquemisantasanojeitaqueri Tasorentsi, antajeitaqueneri maaroni icoacajeitaqueeri, irootaque caari yoasanquetantajeitee. Ainiro acarajeitaqueri camimentiriri Quirishito, te incoyeni inquempoyeempa irisati. ¹² Meeca aquimoshirejeitaque, acarajeitaqueri maaroni savicajeitatsiri aca inquitequi; ancanteani anquimoshiretasanojetanaque. Iro cantaincha irashinoncaasanojeitanaquea maaroni quipatsisati. Oshequi iquisa Satanashi, ioti eiro osamanititsi irisavique quipatsiqui, oshequi iroashinoncaa-jeiteri savicajeitatsiri.

Yora maranque iquisaquero tsinane.

¹³ Ari ipariapaaque maranque quipatsiqui, oshequi iquisapaaquero tsinane tomintariri otomi. ¹⁴ Itasonquiro Tasorentsi otimantacari oshivanqui apite, oquempetacaro ishivanqui anteari paquitsa. Impoiji arapitsatanaqueri maranque, ojataque anta ocaaraiteapai. Anta intacoyeetacaro icarataque 42 cashiri. ¹⁵ Impoiji yora maranque yaparajataquero oshequi njia catsini, oponeanaca ivantequi, chararara; icoaveta irooncagerome quipatsi, icoaveta areetapeemparome tsinane, omphiincanaqueme. ¹⁶ Iro cantaincha ocavintsaquero quipatsi tsinane, otencareanaque, oquiajatanaque maaroni njia quipatsiqui. ¹⁷⁻¹⁸ Aiquero ijatatii iquisaquero tsinane. Te irimateroji iroori, irootaque ijatashitariri itsipapee otomipee: maaroni yora antiniriri Tasorentsi icantaqueriri, aisati maaroni quemisantasnotiriri Jesoshi; icoaveta intsoncajeiterime iriori.

13

Ari iquenquetsataquaqueri covencatatsiri.

¹ Impoiji nocatiaca impanequivi, anta otsapijaqui antearoja incajare. Jeri noneavaqueri incajarequi icontetapaaque covencatatsiri, otimi itseequi 10, jero iito 7. Otimi itseequivi amatseerentsi; aisati isatoncaataca iiotopeequi: ocantimatiri sanquenarentsi Tasorentsi. ² Ari ishiapaaqueri maniti. Iiti oshiaquero iiti meeni; irointi ivante oshiaquero ivante maniti. Icantavaqueri maranque:

—Meeca nocoaque nomatacayempi, pinquempetenari: oshequi pimayetaque, oshequi pimpincatsaritanaque, oshequi pincantacantayete.

³ Amashitasanotaca catsini iito aparoni, naamaaca irovetaincha oamayerime amashitaqueriri. Yoajeitanaqueri cavaco maaroni atiri, icantajeiti:

—¿Paitaquea caari icamanta? Pamenerote iito, jooo, ¿paitaquea oaqueriri?

⁴ Aisati ipincatsajeitaqueri maranque, icantajeiti:

—Pineaqueri, oshequi imatacaquaqueri covencatatsiri.

Aisati ipincatsajeitaqueri covencatatsiri, icantajeiti:

—Pineaqueri, oshequi ishintsica, tecatsi materine impiateari.

⁵ Impoiji yora maranque icantiri covencatatsiri:

—Meeca pinquisanaqueri Tasorentsi, incarate 42 cashiri pimpincatsaritasanotanaque.

Ari oshequi ishemetsataque, oshequi icantimataqueri Tasorentsi. ⁶ Ari icantimataqueri iriori, icantimataquero inampi, aisati icantimajeitaqueri savicajeitatsiri anta.

⁷ Aisati icantaqueri maranque:

—Pinquisajeiteri maaroni quemisantajeitiriri Tasorentsi, poashinoncaajeiteri. Aisati pimpincatsariventajeiteri savicajeitatsiri quipatsipeequi, pashiniyetirori irineanepee.

⁸ Aitaque impincatsajeiteri maaroni atiripee. Apatiroquea irinti quemisantatsiri, eiro ipincatsatiritsi. Aitaque, tequerani irovetsiqueroni quipatsi, iotitacarini Tasorentsi maaroni quemisantajeiterineri. Aitaque isanquenataqueroni ivajiropee, ipajititayetacarini yora Ovisha camimentajeiterineri. ⁹ Otimirica piquemantari, pinquenqueshiretero oca nosanquenataquempi. ¹⁰ Icanti Tasorentsi: “Noiminqueajeiteri coajica maaroni oiminqueajeivetaquempineri. Nompesajeiteri maaroni pesajeivetempineri”. Meeca icoacaajeitaquee Tasorentsi ancantaitiyempani anquemisantajeiteri, anquearioventero.

Iquenquetsatacotaqueri itsipa covencatatsiri.

¹¹ Impoiji noneaqueri itsipa covencatatsiri, iponeaca irinti quipatsiqui tsompoina. Iquempevetacari ovisha, otimi itseequi apite; icovencati ineanati. ¹² Oshequi ipincatsaritaque, iquempetacari itsipa covencatatsiri, yora amashitachari iitoqui. Aisati icantajeitiri maaroni savicajeitatsiri:

—Pimpincatsajeiteriye yora amashitachari iitoqui.

Ari ipincatsajeitavaqueri. ¹³ Oshequi itasoncantayetaque yora apitetapaintsiri. Imayetaquero caari ineapinijeiti ashanincabee. Ineajeitaqueri atiri yoariaquero paamari: oponeaca inquitequi, irosati quipatsiqui. ¹⁴ Oshequi imayetaque, irootaque yamatavijetantacariri oshequi atiri, ijitasorentsijeivetacari. Ariorica itsipatacari yora jivatiriri, oshequi imayetaque. Aisati icantajeitaqueri atiri:

—Jentsite, pishiacantajeiteri yoca jivataquenari, yoca ipesheevetacari. Pine queri, te incameji.

¹⁵ Ari iquemisantajeitaqueri, yovetsicajeitaque ishiacantaro. Impoiji itasoncaquerero, aneantacari, aisati oneanatantacari. Impoiji icantajeitaqueri atiri:

—Pimpincatsajeitero oca avetsicajeitaqueri: irootaque atasorentsite.

Ari ipincatsajeivetacaro. Irintiquea maaroni caari pincatsatiro, yoacantajeitaqueri.

¹⁶ Aisati isatoncaatacantaqueri atiripee, maaroni. Isatoncaajeitaca iracosanoriqui, ariorica ivancainaqui, maaroni: pincatsarijeitatsiri, caari pincatsarijeitatsine, ashitaranta-jeitachari, caari ashitarantajeitachane; yora yamananteetiri aisati yora caari yamananteeti: isatoncaajeitaca maaroni. ¹⁷ Iro isatoncaajeitaqueriri ivajiro covencatatsiri, yorari itsipapee isatoncaajeitaqueri inomerote. Icantajeitiri:

—Eirorica isatoncaajeita atiripee, eiro noshinetiritsi iramanantayete aisati impimanayete.

¹⁸ Ocameetsati meeca ontive piotanteari, pinquenqueshiretero inomerote covencatatsiri. Irootaque inomerote atiri, ocarataque 666: irootaque piotanteariri.

14

Iquenquetsatacotaqueri Ovisha aisati yora pampoyeaventajeitiriri.

¹ Impoiji namenanaji aisati, jeri noneaqueri yora Ovishatatsiri, icatiaca toncaari qui pajitachari Sio: otimi Sio Jerosarequi. Icarajeitaqueri maaroni quemisantajeitatsiri, satoncaajeitachari ivancainaqui ivajiro Ovisha aisati iriri. Icarajeitaque 144,000.

² Impoiji noquemajeitiri aisati inquitesati, antearojenca irineane; iquempetacaro antearoja ovarijare, aisati antearo itirei. Iriojeitaque javioquijetirori shiirori ijavioqui.

³ Itimajeiti anta Tasorentsiqui, anta itiminta savicacantayetsiri aisati yora itsipasati virantsi. Ari ipampoyeajeitiro pampoyeantsi iroquerari; ocameetsajencataque, iro cantaincha tecatsi materone iriotero: apaniro irinti 144,000 atiri oavisacojeitainchari.

⁴ Te irantajeitajeroji caari cameetsatatsi iriori, icameetsajeitaque: aisati icantani yojajeitaqueri ovisha, jaocarica ijayetaqueri. Iriojeitaque quemisantajeitiriri Tasorentsi aisati Ovisha. ⁵ Te intseyeajeiteaji, aisati icameetsajeitaque, te irantajeitajeroji caari cameetsatatsi.

Irotaintsi iroasanquejeiteri Tasorentsi caari quemisantiri.

⁶ Impoiji noneaqueri itsipa inampire Tasorentsi, yarayetanaque inquitequi nianqui. Iquenquetsatacaajeitaqueri maaroni savicajeitatsiri quipatsiqui, jaocarica otimayetiri inampipee, aisati jaocarica ocantayetari irineaneppee. Icamantajeitaqueri jaoca incanteari iroavisacojeitajeari. Irootaque icantapinijeitiriri Tasorentsi maaroni atiri peerani, te impashiniteroji. ⁷ Antearojenca icanti:

—Pimpincatsajeiteri Tasorentsi, pincantajeiteri pishaninca: “Icameetsataque Tasorentsi”. Pamene, moncarataca meeca iroasanquejeiteri maaroni caari quemisantajeitiri. Pimpincatsatasanojeiteri: tempa iriotaque vetsiquirori inquite aisati quipatsi, incajarepee aisati njatenipee, maaroni.

⁸ Yojatanaqueri itsipa nampirentsi, icanti iriori:

—Peerani yora savicaveitachaniri Vavironiaqui yantacaapinijeitaquerini itsipapee atiri caari cameetsatatsi, iro cantaincha meeca ipoyereajeitaqueri Tasorentsi vavironi-asati. Eiro imatacaajeitajiritsi aisati paitapeerica.

⁹ Impoiji yojatajiri itsipa nampirentsi aisati: yora mavatapaintsiri. Antearojenca icantapaaque iriori:

—Queariomphia, pipincatsatiricari yora covencatatsiri, aisati ora ishiacantaro. Aisati pishinetaricari irisatoncaatempa pivancainaqui, ariorica pacoupi. ¹⁰ Ariorica pimpincatsateri covencatatsiri aisati pishinetearirica irisatoncaatempa, ari inquisaqueMPI Tasorentsi; inquisasanotempi, eiro icavintsaimatimpitsi. Pinquematsicatasanotaquearo paamari, irineajeitempi maaroni inampire Tasorentsi aisati yora Ovisha. ¹¹ Pincantaitatiyempani pinquematsicatarepaamari; eiro otsivacanetitsi, oncantaqueani: quitaiteriqui, tsiteniriqui, peerani catsini. Aitaque inquematsicajitearo maaroni pincatsatiriri covencatatsiri aisati ishiacantaro, aisati maaroni satoncaajeitarori ivajiro. ¹² Pamene, ariorica pantapinitiro maaroni icoacaimpiri Tasorentsi, aisati ariorica piquemisantasanotaqueri Jesoquirishito, eiro pishemarotsi; ariorica pinquematsicatimentearo, iro cantaincha eiro patsipetashitarotsi.

¹³ Impoiji noquemaquero aisati Ishire Tasorentsi anta inquitequi, ocantaquena:

—Jero oca pisanquenateri: “Inquimoshiretacayeari Tasorentsi maaroni camajeitatsiri, iquemisantirinirica Ivincatsarite. Queario, inquimoshiretacaasanoteari Tasorentsi, tempa iotiro maaroni yantajeitaqueniri quipatsiqui; irisavicacaajeitaqueri cameetsa, irimaoreacaasanojeitajeri”.

¹⁴ Impoiniji namenanaji aisati, jero noneaqueri mencori, oquitamarotasanoque. Aisati noneaqueri shiaqueriri Atiritapaintsiri, isavicaque mencoriqui. Yamatseetacaro iramatseere, vetsicachari oro. Aisati yajiricaqueri shiavetarori saviri, otsampitasanoque. ¹⁵ Impoiniji noneaqueri itsipa nampirentsi, iponeaca ivancoqui Tasorentsi. Antearojenca icajemacotaqueri yora savicatsiri mencoriqui:

—Moncarataca meeca pimpesacotero panquirentsi, sampataque meeca maaroni quipatsquiniri. Pijate meeca pimpesacotero.

¹⁶ Ari ipesacojeitaqueri savicatsiri mencoriqui, peti, peti; yaajeitaqueri maaroni panquirentsi quipatsquiniri. ¹⁷ Impoiji iponeaca ivancoqui Tasorentsi anta jenoqui itsipa nampirentsi. Aisati yamaque iriori shiavetarori saviri. ¹⁸ Jeri ipocaque pashini aisati, iponeaca anta itaapinitironta casancapatsari. Iriotaque taarantirori paitapeerica. Antearojenca icajemacotaqueri ishaninca ajiriquirori isavirite:

—Iracaque ovapee: pimpesajeitero maaroni timajeitatsiri quipatsiqui, paayetajero maaroni, pampatotero.

¹⁹ Irosati ipesantarori maaroni ovapee anta quipatsiqui, yaayetajiro, yoajiro anta intsinacaitantearori Tasorentsi: ishiacantaqueri inquisasanojeiteri coajicani Tasorentsi

maaroni tseencajeitiriri. ²⁰ Ari oniri itsinacaitantarori anta oantsiqui, te ari one nampitsiqui. Ari oponeanaca itsinacaitantaroriqui oshequi catsini irajantsi, ooncanaca quipatsiqui; oquimojatanaque, areetacaro ivantequi cavayo. Otsoteanaquero irajantsi 320 quirometero: ojatanaque antoo.

15

Yaajeitaquero inampire Tasorentsi pajoqui oashinoncaajeiterineri atiri.

¹ Impoiji noneaquero anta inquitequi itsipapee, ishiacantiro aisati timayetatsineri coajica. Oshequi noquenqueshiretaquero, oshequi noanaquero cavaco. Noneaueri 7 inampire Tasorentsi, oashinoncaajeiterineri atiri. Iriojeitaque vecarayeroneri maaroni oashinoncayerineri atiri; omoncaratapaaquea inquisanaquea Tasorentsi. ² Noneaquero aisati incajare, oshiaquero amenarontsi, oconoaro paamari. Noneajeitaqueri anta otsapijaqui icatiajeitaca caari pincatsajeitiri yora covencatatsiri, jero aisati ishiacantaro; iriojeitaque maaroni caari satoncaatacha ivajiro aisati inomerote. Ari yajiricajeitaquero shiavetarori ijavioqui Tasorentsi. ³ Ipampoyeajeitaquero ivampoyeane Moishishi, yora antaveetiniriniri Tasorentsi. Aisati ipampoyeajeitaquero ivampoyeane yora Ovisha. Jero oca ipampoyeajeitaqueri:

Novincatsarite, tempa aviro Tasorentsi, oshequi pimayetaque.

Oshequi pitasoncantayetaque, noanaquero cavaco pantayetaqueri.

Ocameetsayetaque pantayetaqueri, te pamatavitanteji.

Queario, pipincatsariventajeitaqueri savicajeitatsiri maaroni nampitsipeequi, picantani.

⁴ Tempa, Novincatsarite, ocameetsati nompincatsajeitempi, aisati iriori maaroni savica-jeitatsiri.

Ocameetsati noncamantajeiteri atiri: “Icameetsati Tasorentsi”; tempa queario, pi-cameetsataque.

Imponeajeitanaquea maaroni nampitsipeequi impincatsajeitantempi.

Tempa iriojeitanaquea ocameetsataque pantajeitaqueri.

⁵ Impoiji namenanaji aisati, noneaquero ashireanaca ivanco Tasorentsi, onta in-quitequiniri. Noneasanotaquero anta ininta Tasorentsi. ⁶ Itimi pancotsiqui yora 7 inampire, yora oashinoncaajeiterineri atiri. Noneaueri isoquijanaque. Iquitsaajeitaro quitsaarentsi tsivitamaori, oquitamaromaotasanotaque. Ainiro inejiqui shiirori ishiticatsaquito, yovetsiqueetiro oro. ⁷ Aisati ainiro iriori aparoni virantsi, ipacojeitavaqueri nampirentsi aparopee pajo. Ojaaca pajoqui oja, oashinoncaajeiterineri atiri. Oshia-cantaqueri inquisheri Tasorentsi coajican tseencajeitiriri. Icantatiani yanei Tasorentsi, eiro icamitsi irinti catsini. ⁸ Oshequi ishipaquirei, oshequi itasorenca; ainiro oyachaare, ojaacaro pancotsi. Tecatsi incanteetero inqueajeitero pancotsi, irosati irimatantearori nampirentsi icantaqueri Tasorentsi.

16

Jaoca ocantari timatsiri pajoqui.

¹ Impoiji noquemaqueri ineanataque anta ivancoqui Tasorentsi. Antearojenca icantiri yora 7 inampirepee:

—Meecaquea pijajeite pisacotero quipatsiqui oja pajoquiniri, irootaque shiaquerori quisaca Tasorentsi.

² Irosati ijatantaca yora jivatatsiri. Isacotaquero quipatsiqui oja, irosati isompo-jeitantanaca maaroni satoncaajeitarori ivajiro covencatatsiri, aisati maaroni pincat-satirori ishiacantaro. Jo, oshequi isompojetanaque; opatsayetanaqueri, ishitiyetanaque.

³ Impoiji ijataque apitetantsiri, isacotiro oja anta antearojaqui incajare. Opeanaca, oquempetacaro irirajani camaintsiniri. Icamajeitaque timajeivetachari: shimappee, oma-nipee, maaroni. ⁴ Impoiji ijataque mavatapaintsiri nampirentsi, isacotiro pajoquiniri anta enipeequi aisati njatenipeequi. Opeajeitanaca irajantsi. ⁵ Impoiji icantiri:

—Tasorentsi, oshequi picameetsataque; picantani pitimi: peerani, irosati meeca. Ocameetsataque poasanquetaajeiteri maaroni yontapee, irineashiteteearota; ⁶ tempa iriojeitaque oajeitiriri quemisantajeitimpire aisati quenquetsatacojeitimpire. Meeca pipiatacoventajari, poajeitaqueri. Ineacarove iriori, tempa iriojeitaque oayeri.

⁷ Aisati itimi itsipa anta itaapinitironta casancapatsari. Icanti iriori:

—Queario, Novincatsarite, aviro Tasorentsi mayetirori maaroni. Ocameetsataque poasanquetaajeiteri, irineashiiteteearotave: piotaquero poasanquetaimentiriri.

⁸ Impoiji ijataque itsipa nampirentsai aisati, yora itsipasatitapaintsiri. Isacotiro pajoquiniri anta catsirincaiteriqui, imatantacariri itaajeitaqueri atiripee. ⁹ Ari itaajeitaqueri, irosati quisatsajeitacariri Tasorentsi: yora tianquiriri oashinoncaajeitiriri. Te inquenqueshirejeiteaji. Te incoajeiteji irojocajero caari cameetsatatsi yantayetiriri, aisati te incoajeiteji impincatsajeiteri Tasorentsi. ¹⁰ Impoiji yora apapacorotapaintsiri, isacotiro pajoquiniri anta ivincatsarimentoqui covencatatsiri. Irosati otsitenitantanaca anta ipincatsaritinta. Oshequi icavintsaajeitanaca, irosati yatsicanenetantanaca. ¹¹ Oshequi quisatsajeitaqueri Tasorentsi, iquishimentaro isompopee aisati maaroni iquemaatsicayetacari. Iro cantaincha te inquenqueshiretempaji, te incoajeiteji irojocajero caari cameetsatatsi yantajeitaqueri. ¹² Impoiji yora itsipa nampirentsai isacotiro ivajonequiniri anta antearojaqui eni pajitachari Eojarateshi, irosati opirijatasanotantanaca, pirijaiteni. Meeca tecatsi ticajeitavaquerine yora pincatsaripee jivajeiterineri maaroni isorarotepee. Imponeajeitanaquea anta iquenapainta catsirincaiteri. ¹³ Impoiji noneaqueri aisati yora maranke, yora covencatatsiri, aisati yora amatavitantatsiri; iponeajeitaca ivantepeequi mava camaari, ishiapaaqueri mashero. ¹⁴ Queario, icamaaritasanotaque; itasoncantanirovetaca, imayetaquero caari aneapinijeiti. Ijatashjeitiri maaroni pincatsaripee, icantajeitiri:

—Tsame ancarajeitavacaye, amitacotavacaajeitea amanajeiteri maaroni oijajeitiriri Tasorentsi, antsoncajeiteri, maaroni.

Ja, ariorica impocapaaaje Tasorentsi, yora matirori maaroni, irimanatavacaa-jeitea irioripee. Inquemacojeitero maaroni atiripee irantayetapaaqueri Tasorentsi.

¹⁵ Incantapaaque:

—Pamene, oquempetaca coshitantatsiri imapoquiri yora icoshitiri, aisati narori, nomapocajeitapaaquempi. Te piojeiteji jaocarica oncarate nompocantajeari. Nonquimoshiretacaajeitajeri maaroni aamaajeitanari, quempetarori isaaquiti. Nocoaque incameetsajeitanaque, eiro yantapinitirotsi caari cameetsatatsi. Inquempetacantea iquitsaata cameetsa, tecatsi neatsempequiterine eiro ipashiventantaja.

¹⁶ Iro cantaincha yora camaaripee yapatojeitaqueri maaroni sororopee anta nampitsiqui ipajitiri jorio Aramaqueroni. ¹⁷ Impoiji yora nampirentsai sietetapaintsiri: yora caratapaintsiri. Isacotiro ivajonequiniri anta tampeaqui, irosati noquemantacari timatsiri anta ivancoqui Tasorentsi, savicatsiri ivincatsarimentoqui. Antearojenca icantaque:

—Moncaratapaaca, aitapaji.

¹⁸ Impoiji oshequi iporequi, porec, porec; aisati antearojenca itirei, tiiririri. Aisati antearo catsini onicaca quipatsi. Te aneapiniteroji quempetearoneri oca. Antearo onicaca catsini: nica, nica, nica, nica. ¹⁹ Irosati oporocajeitantanaca maaroni pancotsipee anta Vavironiaqui, aisati maaroni otsipapeequi nampitsi, otsoncajeitaca maaroni, poyere. Iquenqueshiretaquero Tasorentsi maaroni yantajeitaqueniri vavironiasati, irootaque quisasanojeitacariri, yoashinoncaasanojeitaqueri. ²⁰ Opeajeitanaca maaroni ovoyejapee; aisati otishipee, opeajeitanaca, maani. ²¹ Jero aisati opariaque iriniqui, iro cantaincha antearo onasanotaque catsini. Otenataque apaitsquironi 40 quiro. Oponeaca inquitequi, opariaque atiriqui, oshequi otsoncajeitaqueri. Oshequi itsaroacaajeitacaro iriori, irosati quisatsajeitacariri Tasorentsi.

17

Iquenquetsacotiri vavironiasati, irashinoncaajeitanaquea, coajica.

¹ Impoiji ipocashitaquena aparoni nampirentsai, sacotirori pajoqui. Icantaquena:

—Caatanaque aca: nonijayempiro jaoca incanterori Tasorentsi ora antajeitiriri shirampari, savicatsiri enipeequi, jero nijateenipeequi. Iroasanquetayero.

² Yantajeitaquero ivincatsaritepee itsipapee atiri. Oamejeitaqueri maaroni atiri yantapinitiro caari yai.

³ Impoiji yaanaquena anta caaraiteriqui, otimi anta onijaquenari Ishire Tasorentsi. Noneaqueri tsinane, oquijacotacari covencatatsiri, quitioncatatsiri: otimi 7 iito, jero itseequi 10. Isatoncaayetaca ivatsapeequi: ocantimatiri Tasorentsi isatoncaaro.

⁴ Oquitsaatacaro tsinane quiraanirori aisati quitioncari. Oaneencayetacaro oro, jero mapi shipaquireatsiri aisati quitamaroquiri. Ajiriquiro otsotane, yovetsiqueetiri oro; ojaacaro caari cameetsayetatsi, oshiacaventiro antacaajeitiri atiri iquemisantashitaro yovetsicane atiri aisati oamejeitiri imayempitanti. ⁵ Osatoncaataca ovancainaqui: ainiro oshiacantayetaqueeri, iro cantaincha tequera onconijatasanote. Ocanti: “Antearo oni Vavironia, irootaque oamejeitirori tsinane antayetiri caari ai. Irootaque oamejeitiriri oshequi atiri iquemisantashitaro yovetsicashiyetari”. ⁶ Impoiji niotaquero oshinquitaca tsinane. Iro oshinquitacari irirajani quemisantaveitariniri Jesoshi oajeitaqueri. Oshequi noanaquero cavaco, namenasanotaquero, sorererere. ⁷ Iro cantaincha isampitana inampire Tasorentsi:

—¿Paitaquea poantarori cavaco? Noncamantempi caari piotitiro, aisati noncamantempi caari piotitiri yora covencatatsiri oquijacotacari. ⁸ Itimaveitani yoranqui, te aneeriji meeca, itimi meeca omoroqui tsompoina, jatatsiri antoo. Coajica iraajeri aisati Tasorentsi, intiancanteariri Sharincaveniqui: anta incantaitatiyempani irashinoncayea. Itimaveitani, ipeaca, intimaje aisati; ariorica irineajeitavaqueri tseencajeitatsineri, iroajeitavaqueri cavaco. Peerani, iroqueran iovetsiquiro Tasorentsi quipatsi, isanquenatiro ivajiropee maaroni jatatsineri inquitequi, iro cantaincha te irisanquenaterojo ivajiropee yora tseencantatsiri. ⁹ Pinquenqueshiretasanoter oca noshiacantempi piotantearori: ora iiotopee caratatsiri 7 oshiacaventiro 7 toncaaripee osaviquinta tsinane. ¹⁰ Aisati oshiacaventiri 7 pincatsaripee. Icamanaque apapacoroni, itimi meeca aparo, coajica intime yora caratapaintsineri. Eiro osamanititsi impincatsariventante yora caratapaintsineri. ¹¹ Yora covencatatsiri, iriotaque aparoni pincatsariveitachaniri nocantaquempi: “Icamaque”. Iro cantaincha intinaanaje aisati, impincatsariventante aisati, impoiji irijate Sharincaveniqui. ¹² Aisati ora 10 itseequi pineajeitaqueri: oshiacantiri itsipapee pincatsarieitatsine coajica. Incarajeiteri covencatatsiri, impincatsarievetanaquea, eiro osamanititsi impincatsariventante. ¹³ Inquempetavacaajeitea pincatsaripee, incantajeiteri covencatatsiri: “Nompincatsajeitemi avirori, nantajeittempiro paitarica pincoacaajeitenari”. ¹⁴ Impoiji inquisajeiteri Ovishatatsiri, aisati oijajeitiriri: irimanajeiveteari, incoajeivetea intsoncajeiterime. Iro cantaincha impajiteiteari Ovishatatsiri, intsoncajeiteri irinti. Tempa iriotaque anaacojeitiriri pincatsajeitatsiri, ipincatsaritasanoti; iriotaque anaacojeitiriri maaroni savicacantantatsiri, maaroni. Icoyeajeitaqueri maaroni quemisantajeitiriri, ipashinitacaajeitajiri, ari quiso yoajeitanajiri iriori, maaroni.

¹⁵ Aisati icantaguena nampirentsi:

—Aisati pinequiero enipee aisati nijatenipee osavicanteri tsinane. Oshiacantajeitaqueri iriori maaroni atiripee savicajeitatsiri jaocaricapee, jaocarica ocantayetari irineanepee, maaroni. ¹⁶ Aisati itseequipee oshiacantajeitaqueri atiripee quisajeitaquerori tsinane: ora antapinitiriri caari ai. Aisati inquempejeiteri yora covencatatsiri, inquisaquero iriori. Iroashinoncayero, irisapoquero, iroyearo ovatsa, intayero. ¹⁷ Irio Tasorentsi quenqueshiretacayerineri inquisajeitero, irimatantearori icoiri iriori. Incantajeite: “Tsame ampincatsajeiteri yora covencatatsiri quitioncatatsiri, anteneri paitapeerica incoacaajeiteeri”. Aitaque incantajeiterori oca omoncaratanteari icantiri Tasorentsi iriori. ¹⁸ Oca tsinane pinequiero oshiacantajeitaqueri maaroni savicajeitatsiri nampitsiquinta: yora anaacojeitiriri itsipapee atiri ipincatsariti.

18

Intime oshequi iraacojeiterine vavironiasati.

¹ Impoiji noneavaqueri ipocapaaque itsipa inampire Tasorentsi, iponeanaca inquitequi. Oshequi ipincatsaritapaaque, ishipaquireapaaque, iquitaitetasanotapaaquero quipatsi, yatsioquintapaaquena. ² Antearojenca icajemapaaque:

—Tsoncajeitaca ini maaroni savicajeiveitachaniri Vavironiaqui; oshequi inajeiveitani, oshequi ipincatsariveitani, meeca ipoyereajeitaca. Irio timapaajantsiri camaaripee inampiniqui, mamaroniro, tsivaniniro, maaroni. Iquempejeitacaro tsinane, antapinitiriniri caari ai. ³ Te oncameetsaveiteani osavique, aisati oamejeitaqueri maaroni

itsipapee atiri i quempejitanacarori iriori. Yantajeitaqueroni pincatsaripee; oshequi yaarantaque yora pimantirori ovetsicane, caari cameetsayetatsi.

⁴ Impoiji noquemaqueri Tasorentsi anta jenoqui, icanti:

—Pisoquijajeitanaje, quemisantajeitanari: piquempetarocari, pantirocari avirori caari cameetsayetatsi antiri iroori. Picarajeitirocari, noasanquetaajeiticari. ⁵ Oshequi catsini antapinitiro caari cameetsatatsi. Eiro nopeacotarotsi antayetaqueri. ⁶ Peerani oshequi oashinoncaajeitaqueri itsipapee, meeca pimpiajeitearo, aiquero pijatatiye poashinoncaasanojeitero. Te oncameetsateji antajetaqueri. ⁷ Peerani oshequi oshemetaqueni aisati oshequi antashiyetacari shiramparipee; meeca aisati onquempetea, oshequi pineacatsitacayearo aisati oshequi poashiretacayearo. Oquenqueshirevetaca: “Narotaque pincatsaro, te naro camajimentaaro, eiro noashiretatsi”. ⁸ Nomapocaquero noashinoncaasanotaquero; oneaqueri oshaninca incamajeite, iraacojeiteari, onquemero otas; ontsonquero paamari. Tempa narotaque pivincatsarite, tempa naro Tasorentsi. Ainiro noshintsinca noasanquetantearori.

⁹ Yora pincatsaripee antayetirori aisati antavintsayetirori irineajeitero ontaaya, irineero oyachaare; impoiji iriraacojeitero, iroashiretacotearo. ¹⁰ Areji incatiaeitanaque; intsaroajeitanaque, iramaaquea iroashinoncaajeiteri Tasorentsi iriori. Incantajeite:

—Oo, vavironiasati, pashinoncaajeitacave. Antearo onaveitani pinampi, oshequi picarajeiveitani savicajeiveitachaniri. Imapocaquempi Tasorentsi, itsoncajeitaquempi, maaroni.

¹¹ Ari iriraacojeitaquempi pimanajeitatsiri, iroashiretacojeitaquempi. Peerani oshequi pamanantajeiveitaroni paitapeerica ipayeveitimpiniri, iro cantaincha eiro meeca pamanantajitsi aisati. ¹² Tecatsi incantea impimantempiro oro, perata, shipaquireatsiri mapi, quitamaroquiri mapi, tsivitamaori, quitioncaniromaori, quiripemaori, quiramaori, inchato casancacotari, itseequi quitamarotseequiri isheronqueetiri, pinatachari inchato yovetsiqueetiri, ashiroyetatsiri, pinatachari mapi, ¹³ pochapaneri, conoavantachari yoari, casancapatsari, casancajayedatsiri, ovaja, quejitsi, tirico, ovane tirico, vaca, ovisha, cavayo, shiacomentotsi, atiri; queario, ipimantaniroyetiri atiri. ¹⁴ Incante:

—Eiro poajarotsi aisati chochoqui pinintaveitaniri; eiro otimimotajimpitsi aisati pivaararopee aisati poanencayetajeari: ontsoncaquea coajicani, poyere.

¹⁵ Yora pimantapiniveitaroniri maaroni oca vaararontsi yaantapiniveitariniri oshequi quireequi; iro cantaincha meeca incatiaeitanaque arejiqui, intsaroajeitanaque, iraamayea aisati iroashinoncaajeiteri Tasorentsi iriori. Iriraanaquea aisati irishencatanaquea, jii, jii, jii. Incante:

¹⁶ —Oo, vavironiasati, pashinoncaacave. Antearo onaveitani pinampi, oshequi picarajeitani savicajeiveitachaniri. Piquitsaajeiveitaroni tsivitamaori, quitioncaniromaori, aisati quiramaori, poanencajeiveitaroni oro, mapi shipaquireatsiri, jero aisati quitamaroquiri mapi. ¹⁷ Meeca imapocaquempi Tasorentsi, itsonquitaquempiro maaroni, poyere.

Aisati maaroni marinero aisati ashietarori pitotsi aapinitirori vaararontsi icatia-cojeitaca ivitoqui, arejiqui. ¹⁸ Paricoti yamenacojeitaquero oyachaare, povaa, irosati irajeitantanaca. Icantajeiti:

—Oo, ocameetsaveitani nampitsinta, te ontimeniji quempetearoneri.

¹⁹ Oshequi yoashirejeitanaca, irosati itijainatantaca quipatsi iitoqui. Oshequi iraacojeitacaro aisati yoashiretacacaro, icajemajeitanaque:

—Oo, pashinoncaajeitacave vavironiasati, antearo onaveitani pinampini, oshequi picarajeiveitani. Oshequi ojatapinitini antearo pitotsi anta, ipimantiro ashitarori oshequi ovaararontsi, yaantariri oshequi quireequi. Iro cantaincha omapocanaca otsoncanaca pinampi, maaroni.

Inquimoshirejeitanaque quemisantajeitatsiri.

²⁰ Impoiji noquemaque icanteeti:

—Pinquimoshirejeitanaque, maaroni inquitesati: quemisantajeitatsiri, itiancanenipee Quirishito, camantantaveitachaniri, maaroni. Peerani oshequi oashinoncaajeitaquempi, irootaque ipiatacoventantaquempi Tasorentsi.

²¹ Impoiji noneaqueri inampire Tasorentsi, shintsitasanotatsiri. Yaaquero antearo mapi, ipishoncaquero antearojaqui incajare, pocn. Icanti:

—Noviincaquero mapi, opeasanotaca; tecatsi neajeroneri aisati. Aisati inquempeyeetajero Vavironia, intsonqueetajero iroori, poyere; tecatsi neajeroneri aisati.

²² Ainiro aquemapinivetari meeca javioquivetachari, pampoyeajeivetachari, shiovivetachari, voorerovetachari; iro cantaincha coajica tecatsi quemajerine. Ainiro inaveta

meeca vetsicayevetarori paitapeerica, iro cantaincha coajica eiro itimajitsi. Ainiro aquemaqueri meeca tononquirori yoyeetari, tonon, tonon, tonon; iro cantaincha

coajica tecatsi quemajerine. ²³ Eiro otsiotajatsi aisati itsiomento; eiro itimajitsi aisati aajantsine ijina. Peerani iotaocojeitaqueri yora pimantayetatsiri anta Vavironiaqui,

oshequi ivioncaqueri iirequite. Yora savicajeitatsiri yamatavijeitaqueri itsipapee atiri, ²⁴ aisati yoacantajeitaqueri maaroni quenquetsatacotiriniri Tasorentsi, aisati maaroni quemisantatsiniri; irootaque impoyerentajeiteariri Tasorentsi maaroni vavironiasati.

19

¹ Impoiji noquemajeitaqueri oshequi catsini inquitesati, antearojenca ipampoyeajeiti: Irove, icameetsatasanotaque Tasorentsi: iriotaque oavisacojeiteeri. Tsame ampincatsatasanojeiteri, tempa itasorentsitasanotaque.

² Ocameetsataque yoasanquetaquero antapinitiriri caari ai, iotaquero yantayetiri, tecatsi incomitea.

Oshequi oamejeitaqueri itsipapee atiri yantiro caari yai, irootaque yoasanquetantacarori; tempa oneashiitetacarove.

Aisati oshequi oashinoncaajeitaqueri quemisantajeitiriri, irootaque ipiatacoventantacariri.

³ Impoiji yapijjeitajiro:

—Icameetsataque Tasorentsi. Otaasanotaca, oncantaitatiyempani oncatiajencatanaque cachaa, eiro opeatsi.

⁴ Ari isavicaque Tasorentsi anta ivincatsarimentoqui. Itiyeroashijeitacari yora 24 savicacaantatsiri aisati yora apitesati virantsi, oshequi ipincatsajeitaqueri. Icantajeiti:

—Aitaque ancantajeiteari ampincatsajeiteri Tasorentsi, tempa icameetsataque.

⁵ Impoiji itimi pashini inquitesati, itimi quempeji Tasorentsi, icanti iriori:

Pineacameetsajeiteri Atasorentsite, maaroni antaveejitiriri, aisati maaroni pincatsajeitiriri.

Pincatsaripee, pineacameetsajeiteri;

caari pincatsarivetacha, pineacameetsajeiteri avirori.

⁶ Impoiji noquemajeitaqueri oshequi catsini jenoquisati, antearojenca ineanajeiti, iquempejeitacaro oshequi ovarijare antearojatatsiri aisati iquempejeitacaro antearo itirei. Icantajeiti:

Icameetsataque Tasorentsi: ipincatsariventajeitaquee Avincatsarite, oshequi ish-intsinca.

⁷ Tsame aveshireimentajeiteari, anquimoshireimentajeiteari maaroni.

Tsame ampincatsajeiteri maaroni.

Meeca omoncarataca irayero Ovisha ijina; vetsicaca ijinatsori.

⁸ Ishinetaquero oquitsaataro quiripemaori, cameetsatasanotatsiri, quitamarotasananotsiri; te ompitsimiteji.

Ora quiripemaori oshiacantaquero cameetsayetatsiri yantajeitaqueri quemisantajeitatsiri.

⁹ Impoiji icantaquena nampirentsni:

—Jero oca pisanquenateri: “Irotaintsi iraye Ovisha ijina, aisati inquimoshireventearo, aisati icajemajeitiri oshequi atiri iroimojeiteari. Inquimoshiretasanojeitaque maaroni icajemajeitiri”.

Impoiji icantaquena:

—Oca nocamantaquemperi, irootaque icantasanotaquenari Tasorentsi.

¹⁰ Ari notiyeroashivetacari nampirentsni, nompincatsaterime, iro cantaincha icantaquena:

—Eiro pipincatsatanatsi. Tempa aquempetavacaajeitaca: narori, aisati avirori, jeri maaroni piyemisantaririnte quenquetsatacotpinitiriri Jesoshi. Aitaque aquempetava- caajeitaca antajeitiniri icoacaajeitaqueeri. Eiro pipincatsatanatsi, irintiquea Tasorentsi pimpincatsate.

Yora quenquetsatacotiriri Tasorentsi, iriojeitaque quenquetsatacotiriri aisati Jesoshi.

Imanatavacaajeitaca anta Aramaqueroqui.

¹¹ Impoiji noneaqueru inquite tsompoina, jeri noneaqueri cavayo quitamarotasano- tatsiri. Ainiro quijacotacariri, ipajieetiri: Caari Amatavitantatsi; aisati ipajieetiri: Tampaticatatsiri. Icameetsataque: te iroasanquetashiteariji atiri, te iroashiteariji. Ioti paitarica yantiri, te inquisashiteariji. ¹² Iroqui oquempetacaro paamari amorequi, yamatseetacaro oshequi amatseerentsi. Isatoncaataca ivancainaqui ivajiro, iro can- taincha tecatsi ioterone; apaniro iotiro irinti. ¹³ Iquitsaatacaro ajacachari irajantsi; aisati ipajieetiri: Ashitarori Irineane Tasorentsi. ¹⁴ Impojeitapaaqueri oshequi soraro jenoquiniri, iquijacojeitacari cavayo; iquitsaajeitaro quiripemaori, oquitamarotasano- taque, te ompitsiteji. ¹⁵ Otimi ivantequi jivajeitiriri ivesamento, tsaampitasanotatsiri impesajeitanteeariri caari pincatsajeitiri. Impincatsariventasanojeiteri, eiro catsini icavintsaimatiritsi. Yora vetsiquirori ovaja yaaticasanotaquero ova yaajatantacarori oja. Aitaque inquempetaqueriri iriori, iraaticasananojeitaqueri atiri, iriojeitanteeari iriori iquisasanojeitaqueri Tasorentsi, yora Shintsitasanotatsiri. ¹⁶ Osanquenataca iitsaarequi jivajeitiriri, aisati ivoriqui, ocanti: “Irio pincatsariventajeitiriri maaroni pincatsaripee, anaacojeitiriri maaroni savicacantajeitatsiri”.

¹⁷ Impoiji noneaqueri aparoni inampire Tasorentsi catiainchari catsirincaiteriqui. Antearojenca icajemajeitaqueri maaroni tisonipee:

—Caate, poajeitea. Poajeiteari ivatsa impajeittempi Tasorentsi; timatsi oshequi poajeiteari. ¹⁸ Poyeari ivatsa pincatsari, ivatsa capitanotatsiri, ivatsa savicacaantatsiri, ivatsa cavayo aisati yora quijacovetariri. Poyeari ivatsa maaroni atiri: pimantaari aisati amanantavetajariri, pincatsaritatsiri aisati caari pincatsaritatsi.

¹⁹⁻²⁰ Aisati noneajeitaqueri yora covencatatsiri aisati maaroni yora pincatsaripee, ya- patojeitaqueri isorarotepee, maaroni. Aisati yojataqueri covencatatsiri yora atiri, can- tavetachari: “Noncamantempi jaoca icantari Tasorentsi”. Oshequi itasoncantayevetaca, yamatavijeitancariri caari quemisantajeitiri Tasorentsi. Isatoncaajeitaca ivancainaqui yora caari quemisantatsi. Ari ijatashijeivetacari irimanajeiterime yora quijacotacariri iyavayote aisati soraropee iriori. Iro cantaincha yaavaqueri apite: yora covencatatsiri aisati yora amatavitantatsiri, tapi. Aneatsiquera, yojocaqueri anta antearoqui paamari. ²¹ Irinti itsipapee, ipesajeitaqueri yora quijacotachari, ipesajeitaqueri maaroni, peti, peti, peti. Iro ipesantacariri ivesamento ivantequiniri. Ari yoajeitacaro tisoni ivatsani, iquemasanotacaro.

20

Iquenquetsatacetro 1,000 osarintsi.

¹ Impoiji noneavaquaqueri yaniireapaaque itsipa inampire Tasorentsi, iponeanaca in- quiteequi. Yajiriquiro iyavireantarori omoro quipatsi, jatatsiri antoo. Aisati yamapaa- quero antearo carenatsa. ² Yaapaaqueri yora maranke, timitachari peerani. Icanteetiri camaari aisati icanteetiri Satanashi. Ari yoisotasanotapaqueri, oiso, oiso; oncarataque 1,000 osarintsi iroisoreacotantajeariri aisati, coajican. ³ Impoiji yojocaqueri omoroqui, yashitacotaqueri, iyavitacotaqueri. Tecatsi incantajea aisati iramatavijeitajeri atiripee, oncarataque 1,000 osarintsi. Iro cantaincha impoiji irisoquijanaje, eiro osamanititsi iramatavitanaje aisati.

⁴ Impoiji noneajeitaqueri oshequi savicajeitatsiri ivincatsarimentopeequi: irio- jeitaque icantiri Tasorentsi: “Pincantacoventajeiteri maaroni atiri”. Peerani te impin- catsajeiteriji iriori yora covencatatsiri aisati ishiacantaro. Aisati te irisatoncaateaji ivan- cainaqui aisati iracoqui ivajiro covencatatsiri. Iquenquetsatacojeitaqueri Jesoshi aisati yoametantajeitiro irineane Tasorentsi, irootaque ipesanteetacariri itsanoqui. Meeca itinaajeitanaja, incarajeiteri Quirishito, oncarataque 1,000 osarintsi impincatsariven- tantajeite. ⁵ Iro cantaincha tequera intinaajeitanaje itsipapee. Ariorica avisanaque

1,000 osarintsi, ari intinaajeitanaje maaroni. ⁶ Oshequi inquimoshirejeitanaque yora jivatasanojeitatsineri intinaajeitanaje: iroameetsatasanoteri Tasorentsi. Iriotanaque eiro ijatitsi Sharincaveniqui, irointi impincatsajeiteri Tasorentsi aisati Quirishito, aisati oncarataque 1,000 osarintsi incarajeiteri impincatsarijeitanaque.

Irivecaratantearori irimanatavacaya.

⁷ Ariorica omoncaratapaaquea 1,000 osarintsi, ari iroisoreajeri Satanashi, iroimisoquijajeri aisati. ⁸ Impoiji irijatanaque iriori maaroni nampitsipeequi, intsoeteanaquero quipatsi, irampatojeitanteeariri savicajeitatsiri irimanajeitanteeariri quemisantajeitatsiri. Icantetiri yora oijajeitiriri Satanashi: Co, aisati Maco. Incarajeitanaque oshequi catsini. Oquempetaca te amateroji amoncarajeitero ovane impaneequi, aisati eiro amatirotsi amoncarajeiteri iroripee, jaocarica incarajeiteri. ⁹ Inquenajeitanaque anta opampaitetinta, irishoncajeitanaqueeari maaroni quemisantajeitatsiri, aitaque irishoncajeitaquero Jerosare: ora nampitsi anintajeitaqueri. Irimanajeitapaaquerime quemisantajeitatsiri, iro cantaincha omapocanaquea omponeanaquea inquitequi antearo paamari, ontsoncajeitapeeri; ontaajeitapeeri, pomein. ¹⁰ Impoiji irayeeteri camaari, yora amatavijeitiriri atiri, irosati irojocanteeteariri anta antearoqui paamari. Anta incarajeiteri yora covencatatsiri aisati yora amatavitantatsiri, cantavetachari: “Noquenquetsatacotiri Tasorentsi”. Ari oshequi inquemaatsicajeitearo: quitaiteriqui, aisati tsiteniriqui; incantaitatiyempani.

¹¹ Impoiji noneaquero antearo ivincatsarimento, oquitamarotaque; aisati noneaueri yora savicantarori. Opeasanotanaca quipatsi aisati inuite, maani. ¹²⁻¹⁵ Aisati noneaueri maaroni piincajeivetachari incajarequi. Itinaajeitanaja tijajeivetachari aisati maaroni jajeitatsiri Sharincaveniqui. Queario, noneajeitaqueri: pincatsariveitachaniri aisati caari pincatsaveitachani, icatiimojeitacaro ivincatsarimento Tasorentsi. Impoiji ipenareetaquero oshequi sanquenarents. Osanquenajeitaca sanquenarentsipeequi maaroni yantajeitiniri atripee. Ariorica ocameetsati yantajeitiniri, icanti Tasorentsi: “Nompinateri, cameetsa nosavicacayeri”. Terica oncameetsateji yantajeitiniri, icanti: “Noasanquetayeri yora”. Otimi otsipa sanquenarents aisati, ipenareetaquero. Osanquenataca irointi ivajiropee maaroni savicatsineri inquitequi. Yora caari sanquenatacacha yojoqueetaqueri anta antearoqui paamari: anta yojoqueetiri maaroni tseencantatsiri aisati maaroni camaari. Ipajiyetiro paamari Inampi Ashinoncaasanotachari: yora caari neajeitajerine Tasorentsi.

21

Iquenquetsatacotaquero Jerosare iroquierari.

¹ Impoiji noneaquero pashini inuite aisati pashini quipatsi, iroqueratajantsiri. Aitaque opeasanotanaca ora intacaroniri, aisati opeaca incajaren. ² Aisati noneaueri ora Jerosare iroqueratajantsiri, ora cameetsatasanotatsiri, inampi Tasorentsi; oponeanaca inuitequi, aniireapaaque quipatsiqui. Oshequi oaneencayetaca, oquempetacaro tsinane, irotaintsirica aye ojime, oaneencaca. ³ Noquemaqueri jenoquisati, timatsiri quempeji ivincatsarimentoqui Tasorentsi. Antearojenca icanti:

—Pamenajeite: ijataque Tasorentsi irisaviquimojeiteri atiri. Quiso iroajeiteri, irishoncajeitanteeariri. Eiro yojoceitajiritsi. ⁴ Iriveshireacaajeiteari, eiro ishinetiritsi atiri iriraajeitaja aisati; eiro icamajeitajitsi. Eiro iraacotajaritsi aisati camajantsineri, eiro ishencatadjatsi, eiro iquematsicatjarotsi paitapeerica. Aitaque ontsonqueari maaroni ocapee.

⁵ Impoiji icanti Tasorentsi:

—Pamene, noaqueratacaaajeitero maaroni.

Aisati icantaquena:

—Pisanquenatero oca: queario nocantaquemperi, te namatavitempiji.

⁶ Aisati icantaquena:

—Moncarataca, nomataquero. Narotaque intacantarori maaroni, aisati narotaque vecarayeroneri maaroni. Intmerica miretatsineri, nompashiteari irireri; eiro nococotiritsi: aitaque nompajeiteri maaroni coiteimojeitacariri. ⁷ Ariorica irantajeitenaro

maaroni nocoacaajeitiriri, nompasanojeiteri maaroni coiteimojeitacariri. Nontasonca-coventapinijeiteri, aisati nontomintasanojeiteari. ⁸ Irintiquea yora tsaroshenti, tseen-cantatsiri, antayetirori caari cameetsayetatsi, oantsiri, antirori caari yai, matsitantatsiri, pincatsatashiyetarori yovetsicayetiri atiri, aisati maaroni amatavitantatsiri, nojocajeteri antearoqui paamari. Irootaque noshiacantantacariri irampiitaja incamajeitaje.

⁹ Impoiji ipocashitaquena aparoni inampire, yora icarajeitiri incaranqui 7 ajiriquirori itsotane jaavetachari oja oashinoncaajeitiriri atiri. Icantaquena:

—Caate, nonijayempiro iroaquera aatsiri ojime: irootaque ijina Ovisha.

¹⁰ Intentashiretanaquena anta antearoqui otishi catsini, inijaapaaquenaro Jerosare: ora cameetsatasanotatsiri nampitsi. Oponeanaca Tasorentsiqui anta inuitequi, anireapaaque. ¹¹ Ishipaquireacaquero Tasorentsi, oquempetaca shipaquireasanotatsiri mapi caari aneapiniti, osaancanatasanotaque catsini. ¹² Otimi nampitsiqui tantorentsi shoncarori, jatatsiri jenoqui. Otimi otantorequi 12 omoropee, yareetapinitantarori nampitsi; itimi anta 12 inampire Tasorentsi shentajeitirori. Osanquenataca omoropeequi ivajiropee yora 12 itomini Ishirairini. ¹³ Otimi mava omoropee anta iquenapai catsirincaiteri, otimi aisati mava omoropee anta iqueanajinta, aisati otimi omoropee omerequipeequi aisati: jero mava acaqueroca, jero mava antaqueronta. ¹⁴ Otimi ishaaviji antearo mapi caratatsiri 12, yoanquetantarori oshanincapee mapi. Osanquenataca antearoqui mapi ivajiropee yora 12 itiancanepée Ovisha.

¹⁵ Ari yajiricaquero nampirentsi imoncaratantarori nampitsi, yovetsiqueetiro oro. Ari imoncarataquero nampitsi aisati tantorentsi, aisati omoro iroori, iqueapinijeitanti. ¹⁶ Ainiro omerequi tantorentsi ocarati otsipasati, omoncaratavacaaca maaroni. Imoncarataquero, ocarataque omerequi 2,200 quirometero. Aisati oquempetaca ojeno-quitaque tantorentsi. ¹⁷ Imoncarataquero otontapatsati, ocarataque 64 metero. Ari nosanquenataquempiro icantaquenari yora nampirentsi.

¹⁸ Iro yovetsicantarori tantorentsi mapi marereayetatsiri, camaranirori. Irointi nampitsi, iro yovetsiqueeyetiri oro, iro cantaincha osaancanataque, maaroni. ¹⁹ Ara tantorentsiqui ainiro antearo mapi ishaavijiniri nocamantacotaqueri incaranqui. Oaneencayetacaro marereayetatsiri mapi, pinatasanoyetachari: otimi camaranirori, quisaari, quitamaronirori, quenashiri, ²⁰ potsonanirori, quitioncanirori, camarari, cavoreanirori, quiterinirori, quenashinirori, potsonanirori, jero quiraanirori. Ocarataque onashiyeta mapipee 12. ²¹ Ora ashitarontsi anta iqueapinitantaroriquinta tantorentsi yovetsiqueeyetiro mapi quitamaronirori. Iro yovetsiqueetiri ashitarontsi aparo mapi. Aisati maaroni avotsi anta nampitsiqui yovetsiqueetiro oro, iota oro, tecatsi onconoyeari; aisati osaancanatasanotaque.

²² Te noneeroji nampitsiqui ivanco Tasorentsi inquemisantajeitanteari savicajeitatsiri. Aitaque itsoteaquero Tasorentsi aisati Ovisha nampitsi, iquemisantajeitaqueri savicajeitatsiri jaocapeerica. Tempa iriotaque Avincatsarite mayetirori maaroni. ²³ Te intemeji catsirincaiteri irooreantearori nampitsi, aisati te intemeji cashiri quitasanteterone: tecatsi incoajeitanteeariri. Tempa itimi Tasorentsi, oshequi ishipaquirei oquitaitetantari nampitsi. Aisati iquempeta Ovisha, itsjoyetaquero. ²⁴ Itsiojeitiri maaroni atiripee; aisati ivincatsaritepee, ipocajeitapaaque, ipincatsajeitapaaqueri, icantajeiti: “Tempa icameetsatasanotaque Tasorentsi”. ²⁵ Ametapinijeitaca ashitapinitiro anampi tsitemiriqui, iro cantaincha anta te irashitapiniteroji: tempa ocantani oquitaiteti, te ontsitenitimateji. ²⁶ Queario, ipocajeitaque maaroni atiripee ipincatsajeitaqueri Tasorentsi, icantajeiti: “Tempa icameetsatasque Tasorentsi”. ²⁷ Iro cantaincha eiro otimitsi anta caari cameetsayetatsi, paitapeerica. Aisati eiro yareetatsi antayetirori caari cameetsayetatsi, jao-carica ocantayetari; aisati eiro yareetatsi amatavitantatsiri. Irintiquea areejeitachane sanquenatacojeitachari anta isanquenarentsitequi Ovisha. Iriojeitaque savicatsineri Tasorentsiqui, incantaitatiyempani.

paaque, chararara. ² Oquenajatanaque nampitsiqui nianqui. Otimi otsapijapeequi inchato, oaneantatsiri. Onashiyetaca oitsoqui, ocarajeitaque 12. Maaroni cashiri onashiyetaca oitsoqui timayetatsiri. Irointi oshi oshiaquero aavintarontsi oavisacojeitiriri maaroni atiri. ³ Eiro otimitsi nampitsiqui caari cameetsayetatsi; tempa anta isaviqui Tasorentsi aisati Ovisha. Impincatsajeiteri maaroni quemisantajeitiriri. ⁴ Irineavorojeiteri maaroni, aisati irisatoncaajeitaquearo ivancainaqui ivajiro, maaroni. ⁵ Eiro otsitenitajitsi aisati, eiro icoajeitajitsi intsiojeitanteari aisati catsirincaiteri. Aitaque intsiotacojeiteri iriori Avincatsarite Tasorentsi. Incarajeiteri iriori maaroni, impincatsarijeitanaque.

Ivecarataquero Joa isanquenare.

⁶⁻⁷ Impoiji icantaquena inampire Tasorentsi:

—Queariotaque oca icantaqueri Jesoshi, eiro yamatavitimpitsi; icanti: “Eiro osamanititsi nompocantajejeari”. Peerani Avincatsarite Tasorentsi yoamejeitaquerini yora camentantatsiniri iquenquetsatantacari. Meeca itiancaquena narori, irootaque noamejeitantaquemperi jaoca oncanteari coajica: eiro osamanitasanotitsi omoncaratantajejeari.

Iroimoshirencajeiteri Tasorentsi quemisantajeiteroneri maaroni ocantiri oca sanquenarentsica. ⁸ Nopajita narori Joa. Narotaque quemaquerori aisati neaquerori maaroni oca nosanquenatacotaquerica. Irio onijaquenarori inampire Tasorentsi. Inijantaquenarori, oshequi nopincatsataqueri, notiyeroashivetacari, ⁹ iro cantaincha icantaquena:

—Eiro pipincatsatanatsi, aquempetavacaajeitaca: tempa arojeitaque antaveejeitiniriri Tasorentsi. Narori, avirori, aisati piyemisantaririnteni, yora quenquetsatacantatatsiniri, jeri aisati maaroni quemisantajeitirori oca pisanquenatiri: aquempetavacaajeitaca. Eiro catsini pipincatsatanatsi narori, irintiquea Tasorentsi pimpincatsatea.

¹⁰ Impoiji aisati icantaquena:

—Eiro pimanirotsi oca pisanquenataqueri, irotaintsi omoncarataquea. ¹¹ Eirotsitarica omoncaratatsi nocantaquempirica, incanteani irampiitapinitero caari cameetsatatsi yantajeitiri, aiquero irijatatiye. Aisati inquempeteari yora cameetsatatsiri: aiquero irovaajerori yantayetiri iriori. Yora quemisantasnotatsiri incantaitatiyempani irimatasanoteneri Tasorentsi maaroni icoacairiri.

¹² Icanti Jesoshi:

—Eiro osamanitasanotitsi irosati nompocantajejeari. Ariorica nareejeitapaaquempi, nompinajeitapeeri maaroni antajeitaquenarori nocacairiri. ¹³ Narotaque intacantarori maaroni, aisati narotaque vecarayerone maaroni. Nojivatasanotaque notimini, eiro nocamitsi, irosati noncanteani nontime. ¹⁴ Noimoshirencajeiteri maaroni quivajeitirori iitsaare, impoiji noshineteri iroajeitearo oitsoqui inchato oaneantatsiri, aisati noshinejeiteri irisavicajeite nonampiqui: inqueajeitapeero omoro iqueapinijeitantzari. ¹⁵ Anta saiteriqui itimi tseencantatsiri, matsitantatsiri, antayetirori caari cameetsayetatsi, oantatsiri, pincatsatirori yovetsicashiyetari atiri, coatsiri iramatavitea irisati, amatavjeitiriri itsipapee, maaroni. Eiro yareejeitarotsi irinti nonampiqui. ¹⁶ Narotaque Jesoshi. Notiancaquemperi nonampire, icamantaquempiro noneane povaajeitanteanariri quemisantajeitanari. Narotaque vetsquiriri Iravirini, aisati narotaque ishanincani. Noshiacantaqueri impoquiero yora arimampoquitatsiri oquitaitetamani.

¹⁷ Ishire Tasorentsi aisati ijinatsori Ovisha, ocantajeitiri:

—Caate, Novincatsarite.

Tsame maaroni quemajeitirori, pinquempejeitearo, pincantajeite:

—Caate, Novincatsarite.

Aisati avirori, jaocarica pisavicajeitiri: ariorica piquemaquero pitashe, paventeari. Janicarica coaintsine irire, paventajeiteari: impaquempi nija oaneantatsiri, tecatsi incoacojeitempi. ¹⁸ Jeroca noncamantajeiteriri maaroni neanateroneri oca sanquenarentsica. Moncarataca, ari ocarati. Tecatsiya pisanquenataje aisati. Ariorica povaajero, iroasanquetasanotempi Tasorentsi: iroashinoncaasanotempi onquempetea yoashinoncaasanojeitaqueri maaroni oquenquetsatacotaqueri oca. ¹⁹ Aisati oquempetaca, pipeajirocari sanquenarentsica. Ariorica pimpeajero paitapeerica, eiro ishinetimpirotsi Tasorentsi oitsoqui inchato oaneantatsiri; aisati eiro pineirotsi inampi Tasorentsi, oca oquenquetsatacotirica. ²⁰ Yora oametaquenarori oca icanti:

—Queario, eiro osamanititsi nompaintajeari.

Aitaque incanteari. Caate Novincatsarite Jesoshi. ²¹ Nocoaque irineshinoncatasano-jeitempi Avincatsarite Jesoshi. Aitaque incantapiniteani.
Narotaque sanquenatirori: *Joa*